

清
實
錄

高宗純皇帝實錄(二三)

卷九七四至卷一〇四七
乾隆四十年至四十二年

清實錄

第二冊

中華書局影印

清 實 錄

(第 二 冊)

高宗實錄(一三)

*

中 華 書 局 出 版

(北京王府井大街 36 號)

北京市中國書店發行

中國建築工業出版社印刷廠印刷

*

787×1092 毫米 1/16 · 65 印張

1986 年 4 月第 1 版 1986 年 4 月北京第 1 次印刷

印數 0,001——1,500 冊

統一書號: 11018 · 1355 —21 定價: 48.00 元

清實錄第二一冊目錄

高宗純皇帝實錄(一二三)

卷九七四	乾隆四十年正月上	一	卷九八九	乾隆四十年八月下	一九五
卷九七五	乾隆四十年正月下	一五	卷九九〇	乾隆四十年九月上	二一三
卷九七六	乾隆四十年二月上	二六	卷九九一	乾隆四十年九月下	二三八
卷九七七	乾隆四十年二月下	四三	卷九九二	乾隆四十年十月上	二四六
卷九七八	乾隆四十年三月上	五六	卷九九三	乾隆四十年十月下	二六一
卷九七九	乾隆四十年三月下	六九	卷九九四	乾隆四十年閏十月上	二七八
卷九八〇	乾隆四十年四月上	八二	卷九九五	乾隆四十年閏十月下	二九〇
卷九八一	乾隆四十年四月下	九二	卷九九六	乾隆四十年十一月上	三〇八
卷九八二	乾隆四十年五月上	一〇五	卷九九七	乾隆四十年十一月下	三三〇
卷九八三	乾隆四十年五月下	一二八	卷九九八	乾隆四十年十二月上	三四六
卷九八四	乾隆四十年六月上	一三三	卷九九九	乾隆四十年十二月下	三五八
卷九八五	乾隆四十年六月下	一四一	卷一〇〇〇	乾隆四十一年正月上	三七五
卷九八六	乾隆四十年七月上	一五四	卷一〇〇一	乾隆四十一年正月下	三九六
卷九八七	乾隆四十年七月下	一六六	卷一〇〇二	乾隆四十一年二月上	四〇九
卷九八八	乾隆四十年八月上	一八一	卷一〇〇三	乾隆四十一年二月下	四三一
			卷一〇〇四	乾隆四十一年三月上	四五五
			卷一〇〇五	乾隆四十一年三月下	四八〇
			卷一〇〇六	乾隆四十一年四月上	五〇一
			卷一〇〇七	乾隆四十一年四月下	五一五

卷一〇〇八	乾隆四十一年五月上	五三三
卷一〇〇九	乾隆四十一年五月下	五四六
卷一〇一〇	乾隆四十一年六月上	五五五
卷一〇一一	乾隆四十一年六月下	五六九
卷一〇一二	乾隆四十一年七月上	五八二
卷一〇一三	乾隆四十一年七月下	五九二
卷一〇一四	乾隆四十一年八月上	六〇八
卷一〇一五	乾隆四十一年八月下	六一七
卷一〇一六	乾隆四十一年九月上	六二九
卷一〇一七	乾隆四十一年九月下	六四四
卷一〇一八	乾隆四十一年十月上	六五五
卷一〇一九	乾隆四十一年十月下	六六六
卷一〇二〇	乾隆四十一年十一月上	六七四
卷一〇二一	乾隆四十一年十一月下	六八三
卷一〇二二	乾隆四十一年十二月上	六九三
卷一〇二三	乾隆四十一年十二月下	七〇四
卷一〇二四	乾隆四十二年正月上	七一七
卷一〇二五	乾隆四十二年正月下	七三五
卷一〇二六	乾隆四十二年二月上	七四九
卷一〇二七	乾隆四十二年二月下	七六六
卷一〇二八	乾隆四十二年三月上	七七九
卷一〇二九	乾隆四十二年三月下	七九一
卷一〇三〇	乾隆四十二年四月上	八〇三
卷一〇三一	乾隆四十二年四月下	八一四
卷一〇三二	乾隆四十二年五月上	八二九
卷一〇三三	乾隆四十二年五月下	八四四
卷一〇三四	乾隆四十二年六月上	八五五
卷一〇三五	乾隆四十二年六月下	八六六
卷一〇三六	乾隆四十二年七月上	八七六
卷一〇三七	乾隆四十二年七月下	八八九
卷一〇三八	乾隆四十二年八月上	九〇五
卷一〇三九	乾隆四十二年八月下	九一七
卷一〇四〇	乾隆四十二年九月上	九二六
卷一〇四一	乾隆四十二年九月下	九三六
卷一〇四二	乾隆四十二年十月上	九四八
卷一〇四三	乾隆四十二年十月下	九六四
卷一〇四四	乾隆四十二年十一月上	九七七
卷一〇四五	乾隆四十二年十一月下	九八七

卷一〇四六 乾隆四十二年十二月上 一〇一〇

卷一〇四七 乾隆四十二年十二月下 一〇三三

大清高宗法天隆運至誠先覺體元立極敷文
奮武孝慈神聖純皇帝實錄卷之九百七十四

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士刑部尚書禮部尚書稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未春正月己酉朔

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜宗室王公等宴○庚

戌

上奉

皇太后幸金昭玉粹侍早膳重華宮侍晚膳○

諭額駙等尚俱照公主封號授為固倫額駙

和碩額駙惟公主所生之子未經定例賞給

品級此內如下嫁蒙古王公之公主等所生

之子本各有應得品級無庸另為辦理至在

京公主所生之子若不授以品級於體制殊

未允協嗣後在京公主所生之子至十三歲

時如係固倫公主所生即給予伊父固倫額

駙品級和碩公主所生即給予伊父和碩額

駙品級現在豐紳濟倫年已十三即著賞給

伊父和碩額駙福隆安品級著為例○又諭

昨歲江蘇淮安一帶八月間因黃水驟長漫

決外河老壩口以致山陽清河等縣猝被水

災業經降旨賑卹並將乾隆四十年應徵錢

糧全行豁免及乙未年漕糧漕項同節年舊

欠錢糧漕米悉予緩徵災黎自可不致失所

第念該處此次被災情形較重。今春正賑已畢。貧民待哺。猶殷著。加恩將山陽清河鹽城阜寧等四縣坐落山阜等縣之淮安大河二衛勘實成災十分之貧民。無分極次。再加賑兩個月。成災八九分者。無分極次。加賑一個月。以資接濟。其下游之東臺泰州興化等屬。先經被旱。勘明成災。自五分至七八分不等。皆係一隅偏災。與山陽等處情形不同。照例賑濟。均已口食有資。但轉瞬東作屆期。或應酌借籽種口糧之處。並著該督撫察看確情。

妥協酌辦。用普春澤再安徽之定遠壽州等處。上年亦缺雨。偏被旱災。除查明零星勘不成災外。所有合肥定遠全椒三縣被旱田地較廣。鳳陽壽州宿州泗州盱眙五州縣雖被災較輕。但均係前歲災歉之區。恐今春青黃不接之時。民力不無拮据。並著加恩將八九分極次貧民。同七分災極貧民。各加賑一個月。至廬州鳳陽長淮泗州四衛災軍各隨坐

落合肥等州縣一體加賑。以昭一視同仁之至意。其無庸加賑次貧以下。如有應行酌借籽種牛具之處。並著該督撫察看情形酌辦。俾窮黎均霑實惠。該部遵諭速行。○又諭直隸天津河間等屬。上年偶被偏災。業經賞撥通倉米十萬石。以備賑濟之需。民食無虞。缺乏。惟念被災各戶。計至昨冬正賑已畢。今春青黃不接。二麥尚未登場。民間口食未免拮据。著加恩將天津青縣靜海滄州南皮鹽山

慶雲獻縣交河東光武邑武強霸州文安大城寧河等十六州縣。無論極次貧民。應於正月起。均予加賑兩個月。俾資接濟。再景州以西地方。有與武邑災地毗連村莊河間肅寧與獻縣災地毗連各村。並阜城毗連交河災地各處。經該督覆勘。應入六七分災者。並著一體查明給賑。以示一視同仁。至意。該部即遵諭行。○定邊右副將軍廣州將軍明亮叅贊大臣副都統舒常奏帶石達爾圖等處賊

番負隅固守屢詢投出番人供稱賊番以正地一路官兵業經徹出即將番衆調往綽斯甲布嚴防等語臣等密諭土司雍中旺爾結等抽派土兵一千名擬於正地一帶覓間進攻掩其不備諭軍機大臣等覓路進攻分掣賊勢固屬出奇制勝之一法但奇正並用則可若專恃正地一路為得計而於達爾圖宜喜等處概置不辦則斷不可雖賊番護巢自衛守抗益堅我兵未能直進若用礮轟其碉

卡使日就傾頽賊衆自難久聚諒非力所難及明亮等何竟不籌辦及此看來各路之兵惟阿桂一路最為可望朕前日用硃筆標記之路似應得手歲內晴霽月餘為番境從來未有之事自係迅掃賊巢佳兆但番地氣候春間每多雨雪今已立春尤宜上緊籌辦不可羈延坐待將軍等統兵勦賊冒險撲礮或致稍有挫誤自非所宜若過於慎重不能制勝乘時亦非良策著傳諭阿桂等當要速行

之辛亥

上詣

皇太后宮問安 御紫光閣賜蒙古王公台吉及回部郡王等宴 召大學士及內廷翰林等茶宴以天祿琳琅聯句 諭湖廣提督李國柱陞見來京於十二月二十四日召見畧詢地方情形因諭汝尚未至老邁可仍回任語未畢彼即奏請於新正月初二日請訓仍告假掃墓以其言不近理顧

而哂之即令其出俾其自知省悟乃伊竟於昨早具摺告假而去可謂不知禮之甚者矣外省提鎮來京每有召對時經朕諭令回任或有再三懇請多留數日者雖未必盡出於中誠然在臣子奉上之義自應如此今李國柱既請陞見入都乃甫一召見輒思回任且正值新年凡朝覲至者均集於此而該提督遽以回籍掃墓為請太覺不識輕重朕宵旰勵精辦理庶務從不稍

羈時刻。或遇軍報要件。即除夕元旦。何日不召見軍機大臣。降旨籌辦。並不因令節少嫌煩碎。至臣下乞假私情。且係拜掃之事。豈新歲所宜言。李國柱。不過因在京多住一日。恐畧添用度。遂爾急欲告假。冀圖省費。竟置大體於不顧。所見實屬猥瑣。况伊在提督任。亦非出色之員。即如楚兵在川省軍營者。前據富德奏稱。衣履不全。皆由楚省解送遲延所致。雖非李國柱專責。既為提督。則通省之兵。

何一非伊所轄。亦應向陳輝祖豫為商酌。以供接濟。乃竟視同膜外。且此事朕尚未問及。彼乃急遽請回。若此。尤屬不合。李國柱著交部嚴加議處。○又諭。昨歲甘肅夏秋二禾。據報通省收成。統計八分有餘。尚屬豐稔。惟皋蘭武威等七州縣。夏禾被有偏災。而皋蘭金縣等五處。秋禾復被霜雹。均經先後分別照例賑卹。災黎自可不至失所。第念該省土瘠民貧。其被災之夏秋二禾。收成未免歉薄。閭

閭不無拮据。著加恩將皋蘭武威二縣夏禾被災較重之處。於青黃不接時。再展賑一個月。其被災較輕之靈州。寧朔。平羅。鎮番。沙泥州。判等五處。如有缺乏籽種口糧。並著該督隨時體察。照例酌借。以資接濟。又皋蘭金縣等五處。秋禾亦被偏災。除皋蘭一縣已於夏災案内展賑外。所有金縣。西寧。平番。肅州。四州縣屬。並著一體展賑一個月。以示朕軫卹邊氓至意。該部遵諭速行。○又諭。甘肅僻近

西陲。民貧土瘠。一遇水旱偏災。即降旨蠲賑緩帶。殆無虛歲。比年各屬收成。尚稱豐稔。所有該省。自乾隆二十三年。至三十五年。民借籽種口糧牛本等項。積欠甚多。前念邊地民食維艱。特將積欠糧四百餘萬石。全行豁免。其折色銀一百三十二萬餘兩。分作六年帶徵。以紓民力。乃自三十五。六。七。八等年。僅完銀二十八萬六千餘兩。仍未完銀一百四萬餘兩。地方官以定有年限之項。照例按數催

徵第念該省每年均有應徵地丁籽糧等項。若同時新舊並徵。民力恐不無艱窘。自應再加區別。展帶用昭體卹。所有河州等二十五處。歷年雖間有災傷。不過一隅。收成尚稔。其未完銀十三萬六千八百餘兩。仍依原限帶徵外。其寧遠等十二處。雖有偏災。尚不致荒歉。其未完銀十八萬四千六百餘兩。於原限之外。再展限二年。至皋蘭等十二處。歷年被災稍重。民力更覺拮据。其未完銀七十一萬

九千餘兩。於原限之外。再展限四年。俾得從容完納。該督務將應徵應緩之處。出示曉諭。令小民共知朕格外加恩之至意。該部即遵諭行。○壬子。諭。前據伍彌泰奏稱。加木喀爾裏塘等處。夾壩賊搶奪官物。殺傷行人。朕以此等賊匪。膽敢一連搶奪二次。殊無法紀。務須上緊查拏。正法示衆。今據恒秀奏到。加木喀爾之賊。俱已全行拏獲。至文綬所差副將韓廷良等。往拏裏塘之賊。祇獲二名。其餘尚

未就獲。著傳諭文綬。嚴飭所屬實心訪拏。毋使漏網。將此傳諭伍彌泰。恒秀知之。○癸丑。諭。上年東省秋田。尚屬有收。惟壽光等縣沿海村莊。於八九月間。偶被風潮。豆麥間有淹損。業經照例撫卹。並將成災六七八分之場地。按次分別加賑。小民俱已得所。但念成災地畝。昨秋未收。菽豆等項。及所種麥苗。均經被淹受傷。今歲春花。不無失望。著加恩將壽光。樂安。濰縣等三縣。並官臺王家岡二場。成

災各村莊。無論極次貧民。竈戶。於二月間。再加賑一個月。俾瀕海窮黎。均霑愷澤。又山西之永寧州。臨縣。上年亦偶被山水。田禾幸未受傷。照例撫卹。民情已屬安帖。第被水之戶。今春或有應酌借籽種之處。亦著該撫確查妥辦。以普同仁。該部即遵諭行。○又諭。昨歲豫楚二省。俱獲豐收。惟河南之信陽。光州等處。湖北之安陸等州縣。衛均因夏秋之間。偶爾缺雨。間成一隅偏災。秋收未免歉薄。業經

照例分別撫卹加賑小民已不致失所但今歲青黃不接之時窮黎口食未免拮据著加恩將河南之信陽羅山光州光山固始五州縣極次貧民概行加賑一個月湖北之安陸京山隨州孝感應山棗陽六州縣及屯田坐落六州縣之武昌武左德安襄陽四衛將成災七八分極次貧軍民於例賑之外各加賑一個月其餘五七分災之鍾祥荊門雲夢應城襄陽宜城等民屯地畝並著該督撫酌

看情形分別借給籽種以濟春耕該督撫等其董率屬員實心經理務俾茅簷均霑實惠以副朕軫卹民隱至意該部遵諭速行○諭軍機大臣等據徐績奏查閱南陽鎮屬營伍有陳州營都司范樹欽鑲黃旗漢軍漢仗弓馬俱去得但於營伍事宜不甚曉暢應遵新奉諭旨將該員解任回京咨部引見等語所辦非是前因周元理奏直省綠營旗員內有弓馬生疎者請照例勒限半年學習朕以滿

員簡用外任原使為綠營標準若在任武藝轉致荒廢殊失八旗勇敢之風是以降旨令回京引見并諭各省均照此辦理原係專指滿洲人員而言今范樹欽係屬漢軍本不必援以為例如該員弓馬平常或至廢弛營伍該撫即當照例糾叅今弓馬既稱去得且年甫三十尚堪造就即云營伍不甚曉暢訓練未能熟諳自應勒限令其學習如再不知改悔即據實劾奏從重議處未晚何必遽令徹

回此乃徐績誤會前旨以致辦理未當且以已係漢軍避瞻徇之嫌該撫平日尚屬能事何致舛誤乃爾以此觀之無怪其前在山東於逆匪滋事之案漫無覺察調度貽誤地方也今朕加恩錄用徐績自當力圖改勉若如此糊塗錯謬恐不能承受朕恩矣徐績著傳旨申飭○又諭本日敦福奏到年終彙奏各摺均已批閱此等彙奏事件無須臨時查辦自應於歲前入奏方合年終彙奏之義今敦

福所奏甄別佐雜及各衙門幕友二摺直至新年始行奏到殊屬遲緩敦福著傳旨申飭○是日立春順天府進土牛春山寶座○甲寅諭曰柏琨在庫倫四年有餘著派索琳前往庫倫換柏琨回京○命和碩額駙福隆安子豐紳濟倫在御前行走○乙卯世祖章皇帝忌辰遣官祭

孝陵○諭前據兵部參奏署雲貴總督圖思德擅用八百里臺馬沿途趕回奏摺夾板一事

諭令袁守侗就近查詢據實覆奏并令圖思德明白回奏今據袁守侗奏稱查問圖思德因奏摺牌文俱係豫先繕就填註十一日及至十四日始行拜發未及改正日期後經想起恐沿途驛站疑詰隨差標丁持牌追趕並未填寫限行里數後追趕不及仍將原牌繳回其擅填八百里則係昆明縣票轉傳現在另行查奏並據圖思德回奏請旨交部嚴加議處各等語是圖思德於此事尚無別項情

節但該署督不過發摺日期填寫小誤並非大過即隨便附摺奏明朕亦不加之責備乃輒差弁丁持票追趕其咎轉較日期錯誤為重雖填用八百里臺馬係昆明縣轉傳自有擅動驛馬之咎俟袁守侗圖思德參奏到日再辦但其事究因圖思德急欲趕回奏摺所致即屬不合圖思德著交部嚴加議處○定西將軍尚書阿桂定邊右副將軍尚書公豐昇額參贊大臣領侍衛內大臣色布騰巴勒

珠爾都統海蘭察副都統額森特奏賊番於榮噶爾博山梁及沿河各處竭力死守自宜於近賊處所來間進攻隨於十二月二十三日抽撥漢土官兵由薩斯嘉赤溝繞路前進二十四日抵舊則大海向南山腿之下兩路官兵同時進撲攻克中間一柵賊番出碉衝突被鎗箭殲斃十餘人餘悉入碉堅守其康薩爾山腿上第一碉於二十四日派烏什哈達等從正面山脊仰攻賊用鎗礮石塊於寨

牆內堵禦。臣等督率官兵。施放大礮。牆內賊。番傷斃者甚多。勢極窮迫。諭軍機大臣等。此次官兵進攻。殺賊頗為不少。賊衆自必膽寒。若能攻克得式梯寨。則進剿勒烏圍。自然勢如破竹。阿桂等及此天晴雪少之時。務須上緊籌辦。勿遲至二三月間。雨雪甚時。致有稽阻。但亦不可不審度利害。冒險撲礮。惟當妥酌行之。至於官兵分路進攻。均距賊巢不遠。而阿桂一路。尤為得力。現在賊番雖間有潛出滋擾之事。我兵各處嚴為防範。可不致有疎虞。即或賊番死守。官兵未能迅入。諒賊勢不過延挨數月。自必滅亡。今事屆垂成。萬無中止之理。國家帑藏充盈。軍需之用。寬然有餘。計兩次撥銀九百萬兩。現已陸續到川。約可用至四五月內。設再需用五六百萬。方能歲事。亦所不惜。想阿桂等必能深體朕心。斷不稍存畏難作輟之見。但應將此意。令滿漢官兵。及土司土練等。一體聞知。俾堅其心。於

事更為有益。○丙辰。享

太廟。遣履郡王永城恭代行禮。○遣官祭

太歲之神。○

上詣

大高殿行禮。○奉

皇太后居長春仙館。○詣

安佑宮行禮。○幸圓明園。○丁巳。諭軍機大臣

等。今日海成奏到。蒐羅遺書一摺。據稱紳士

明理之人。現在宣揚恩旨。伊等天良難泯。自

當呈獻無遺。但恐村僻愚民。本不知書。而家

藏斷簡遺編。或涉不經。更有讀書舊家。子孫

零替。其敗筭殘篋中。不無違礙書籍。而目不

識丁。雖出示收繳。亦難必其盡獻。現在復飭

各屬。傳集地保。逐戶宣諭。無論全書廢卷。俱

令呈繳。按書償以倍價。俾盡行繳出。以便分

別辦理等語。所辦頗好。各省查辦遺書。其中

狂悖字句。節經降旨。各督撫實力查繳。並准

其自行首出。仍不加之罪愆。雖現在各省已

有繳到者。而所繳尚覺寥寥。其勢似未能遍及。今海成所辦較為周到。且又不致煩擾各省。自可做而行之。著傳諭各督撫。照式一體妥辦。海成原摺並著鈔寄閱看。○又諭。前據徐績奏。將盤獲逆匪王倫。總麻服姪王有介。小功服弟王柄。二犯押解到京。經朕交軍機大臣會同刑部審訊。今據王有介供稱。上年八月二十五日。王倫即有封為總兵之說。及至二十八日。果見王倫起事。因赴張秋鎮告

知王柄同逃。九月初七八。過渡黃河。尚有改名登簿為據等語。所供情節似尚不妄。應俟該撫查明覆奏到日。再行覈辦。至逆匪於未經起事之前。即有封官妄議逆跡。久已顯然。該知縣既經聞知。若能及早掩捕。尚可先發制人。何至蔓延為害。是該縣之庸迂貽誤。罪無可辭。因其已被賊戕。予以優卹。使其人尚在。必當重加懲治。是該縣轉因以身殉賊而得益也。至該撫徐績。身任封疆。於地方叛逆

重案。蓄謀日久。竟爾漫無覺察。釀成事端。其獲戾本不為小。今已加恩復用。已往之事姑置不論。徐績當倍知感奮改悔。以蓋前愆。若仍不知自勵。於地方要務。復有疎畧貽誤之處。必加倍重治其罪。不能再為寬宥也。將此傳諭知之。○戊午。

上還宮。○諭軍機大臣等。據周元理奏。現在修理郊勞臺。其舊設黃幄處。已建八方亭一座。立有御製詩碑。可否即於亭內。安設寶座。酌量裝修。抑或拆去四面圍牆。芟除樹木。填成平地。請旨遵行等語。已於摺內批示。碑亭建於舊張黃幄之所。亭內平地鋪石。極為完整。於此安設座次。即屬甚好。祇須於靠後三面添設背板。以為護風屏。便不嫌其空曠。至圍牆外地。本無需用之處。所有舊牆不必拆動。其樹木培植十餘年。現已長成高茂。尤無因此芟除之理。著將此傳諭周元理知之。○是日起。

上以祈穀於

上帝。齋戒三日。○己未。諭軍機大臣等。連日盼望各路軍報甚切。至明亮等前奏分路勦賊之說。雖非正辦。若果乘間得手。亦足稍分賊勢。乃今日奏到。尚係發土兵前往正地起程日期。而帶石軍營。作何籌備之處。未據提及。殊不可解。明亮等前此雖奏稱。賊番將山岡剗斷。以阻官兵進路。亦祇帶石一處為然。豈能將各處山岡盡行剗斷。且金川番衆屢有

投出之人。伊等有路可來。官兵豈無路可往。明亮等何竟不設法進攻。幾同守株待兔。倘賊番因我攻擊稍懈。仍然偷暇耕作。又可積糧持久。殊為非計。至土兵前往正地。不過如治病偏方。未可專恃。明亮等若僅駐兵此處。觀望不前。何由得進。豈有已近賊巢。復欲坐待經年之理。雖冒險撲礪。非行軍所宜。然亦豈可因噎廢食。不思急圖進取。明亮等惟當鼓勵官兵。激其勇敢之氣。以期覓間得勝。斷

不可稍涉遷延。坐失機會。各路將軍等。均當一體努力為之。○命侍講學士金士松。在南書房行走。○以鑲藍旗蒙古副都統和隆武。為正藍旗蒙古都統。○庚申。

上詰

南郊齋宮齋宿。○諭前據弘昉等奏。查審逆犯呂留良之孫呂懿兼。曾孫呂敷先。捐納監生一事。係戶部辦理錯誤。現已另降諭旨。至檢閱刑部原議。作為另戶之案。竟係錯會朕旨。

朕前諭。令將發遣之曾為職官及舉貢生監出身者。免其為奴於戌所。另編入旗。出戶當差。係指尋常為奴遣犯而言。其真正反叛及強盜。免死減等人犯。原旨即在開除不辦之列。若呂留良子孫。係大逆重犯緣坐。即屬反叛。豈可援輕罪有職人員。概免為奴出戶。致令逆惡餘孽。得仍竄籍良民。實不足以示懲創。而申法紀。即如此次王倫之族。設有舉貢生監。亦免其為奴出戶乎。著交刑部存記。嗣

後如遇辦理此等大逆緣生之案。不特舉貢生監不應減免。即官職甚大者。既為逆犯子孫。罪在不赦。亦不當復為區別。所有呂懿兼呂敷先。二犯前既倖為開戶。今復妄思混廁衣冠。情罪尤為可惡。若僅照該將軍所擬永遠枷號。罪及其身而止。尚不足以蔽辜。著將該二犯及其家屬。俱發往黑龍江。給與披甲之人為奴。○又諭弘昉等。奏查審呂留良之孫呂懿兼。曾孫呂敷先。倖列開戶。及混行捐

監一事。檢閱原案。刑部既誤於前。戶部復誤於後。所有呂懿兼。呂敷先。二犯。改定罪名之處。現已另降諭旨。其刑部從前議免為奴。本難辭舛謬之咎。但事隔久遠。原辦之堂官。俱已無存。姑免置議。至呂懿兼。呂敷先。捐監戶部兩次准其捐監。則係近年之事。閱戶部原稿。大學士于敏中。亦曾畫行一次。念其日直內廷。所辦事務較多。於部內常行稿件。未暇詳加檢閱。著從寬免其交部。即侍郎梁國治

彼時亦尚未到任。畫稿其餘各堂官。辦理部務。理宜詳慎。何乃於此等稿件。全未寓目。率行畫諾耶。著將此案畫稿之戶部堂官。俱交部議處。○又諭向遇上元節。例穿蟒袍三日。今年正月十六日。適屆月食。雖月食非日食。可比為春秋所不書。但究關垂象之義。亦應昭敬。是日著止穿常服。其蟒袍改於十七日補穿。所有應行筵宴。亦著改於十七日。○諭軍機大臣等。福建學政汪新。差滿回京復命。

召見時。看其人尚明白。未知其在學政任內。聲名若何。辦事才情若何。能否堪勝道府。或竟可備兩司之用。鐘音與彼同事三年。知之必悉。著傳諭鐘音。即行據實覆奏。尋奏汪新於學政任內。考校諸務。頗屬認真。人亦謹飭明白。似堪勝巡道郡守之任。得旨是。已用道矣。○又諭向來各省學政。三年差滿。該督撫間有將其任內考試聲名若何。具摺附奏者。亦有竟不奏及者。至其辦事才情若何。是否

足供任使。則緊置之不論。殊非為國家留意人才之道。學政在任三年。與督撫相處。近而且久。其優劣知之最真。不特考試之是否。公當。教士之能否實心。督撫當不時訪察。即其心術才具。亦無難體驗而知。且學政中可供簡擢者。頗不乏人。如韋謙恒。閔鶚元。蔣元益。諸臣。或於巡幸召見賞識。并證以督撫之言。或於復命時。詢察記名。漸加甄拔。現俱用至大員。其由督撫特奏密薦者。不可多得。豈避

嫌不辦。抑視學政為無足重輕。易而忽之耶。著傳諭各督撫。於該省學政。留心體察。倘有考試不公不法之事。自無待其年滿。即應隨時叅劾。其餘在任三年。或學問優長。不愧師儒之席。或僅循分供職。止堪勝任者。或有才識明敏。通曉吏治。可用為道府及兩司者。各督撫各就所見。秉公據實密奏。毋得稍涉偏私。所有現在換回之各學政。即照此旨。分別覆奏。將此於各督撫奏事之便。諭令知之。○

軍機大臣等議覆。西藏辦事大臣宗室恒秀奏稱。加木喀爾所屬石板溝。梨樹山等。十一隘口。皆通桑干壩大路。原派唐古忒兵八十名。設卡駐防。卡多人少。巡察未能周徧。請於狄巴布賴庫特。所轄作岡。衮珠等處兵丁內。揀選五十名。分駐緊要隘口。嚴行防範。又查管理桑干壩地方頭目巴賽喇嘛。於上年四月病故。該處因無人管束。不肖之徒。往往藉端生事。應於桑干壩地方人等。素所心服之

達爾汗。綽爾濟呼圖克圖。阿錯。二人內。補放一人。以資彈壓。但達爾汗。綽爾濟呼圖克圖。年幼。阿錯現在患病。請俟阿錯病痊後。令往加木喀爾。與狄巴布賴庫特等。公同商議。定擬辦理。均應如所請。又自打箭鑪至西藏一路。地方遼濶。驛站駐防官員。未能周察。請於碩板多。石板溝。巴塘。裏塘。西處。各添設委把總一員。協同辦事。查委把總。並非正官。即正千把總。亦俱係末弁。管轄兵丁。誠恐未能得

力。現在征勦金川。蜀省官多。應飭令四川總督富勒渾。俟大功告成後。於綠營官員內。或遊擊。或守備。簡派四員。分駐碩板多等處。管理驛務。從之。○辛酉。祈穀於

上帝。

上親詣行禮。○詣長春仙館。問

皇太后安。○奉

皇太后幸山高水長。至丁卯。皆如之。○幸圓明園。○壬戌。

上奉

皇太后幸同樂園。侍早晚膳。至辛未。皆如之。○御奉三無私殿。賜皇子諸王等宴。○諭軍機大臣等。東省逆匪案內。未獲要犯。內歸太一犯情罪。尤為可惡。不可不亟行搜捕。以正刑章。乃迄今三月。未見奏報。拏獲雖已。通飭直隸河南各督撫。及口外地方。一體嚴查。但此等惡逆。形蹤最為詭秘。或因外省查拏嚴緊。轉行改換衣裝。潛匿本地。以圖漏網。亦未可

知。楊景素。應嚴飭山東各屬。實力細心躡訪。

毋任藏竄稽誅。而臨清泰安尤宜留心。再聞

徐績前在山東。曾令人改裝赴張家口。外購

線訪拏歸太。是否已經回東。有無消息。並著

楊景素查明覆奏。至未獲之劉煥。冀盤佑。身

係胥役。膽敢依附逆犯。戕害本官。罪惡均屬

重大。現俱未經緝獲。亦不可任其倖逃。法網

楊景素。務當嚴飭各屬。上緊查拏。毋使匿跡

遠颺。將此由五百里傳諭楊景素知之。尋奏。

徐績曾派外委丁剛。帶捕役同赴張家口。外

緝拏歸太。劉煥二犯。於本年正月初。該弁等

回東。稟稱並無蹤跡。現飭各屬於該犯本籍

之東昌壽張臨清泰安等處。改裝購線。逐細

密查。並令叅將王普。帶歸太之族兄歸琦。同

往山東江南交界處所。實力躡訪。報聞。○癸

亥。

上詣

安佑宮行禮。○御正大光明殿。賜朝正外藩等

宴。召科爾沁和碩親王旺扎勒多爾濟多羅
郡王喇什噶勒當喀喇沁多羅郡王喇特納
錫第固山貝子多羅額駙扎拉豐阿浩齊特
多羅郡王齊蘇龍多爾濟翁牛特多羅郡王
布達扎布多羅貝勒諾爾布扎木素扎魯特
多羅貝勒錫勒塔喇茂明安多羅貝勒袞楚
克扎布教漢固山貝子固山額駙垂濟扎勒
鎮國公固山額駙羅布藏錫喇布鄂爾多斯
固山貝子納木扎勒多爾濟巴林輔國公和
碩額駙德勒克喀爾喀和碩親王固倫額駙
拉旺多爾濟親王品級郡王車布登扎布扎
薩克圖汗多羅郡王齊旺巴勒齊多羅郡王
多羅額駙桑齋多爾濟多羅貝勒阿玉爾阿
拉善和碩親王和碩額駙羅布藏多爾濟杜
爾伯特輔國公扎納巴克回部郡王品級多
羅貝勒霍集斯輔國公圖爾都額色尹和什
克色提巴勒氏等至御座前賜酒成禮

大清高宗法天隆運至誠先覺體元立極敷文
奮武孝慈神聖純皇帝實錄卷之九百七十四

大清高宗法天隆運至誠先覺體元立極敷文奮武孝慈神聖純皇帝實錄卷之九百七十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級軍功紀錄五次

尋常紀錄十四次臣德璘經筵講官太子少保工部尚書紀錄六次臣曹振鏞等奉

敕修

乾隆四十年乙未正月甲子月食○

上臨和靜固倫公主第酌酒○還宮視

皇貴妃疾○幸圓明園○諭朕於二月初六日

舉行經筵所有應行典禮著各該衙門照例

豫備○乙丑

上御正大光明殿賜大學士尚書等宴○諭軍

機大臣等現在官兵進攻距賊巢不遠急盼

捷音而各路進兵惟阿桂一路更為喫緊自

谷噶進兵以來處處仰攻屢獲大勝今自攻

得日爾巴當噶等處後兵皆從上壓下其勢

更順理應乘勝速成何轉至於棘手雖賊人

因離巢益近死守益堅攻打原不甚易阿桂

等自當設法速攻不應頓兵坐待此時若能

添兵分進使賊人應接不暇自屬有濟但功

速垂成無庸再為調發而京兵相距尤遠更

屬鞭長莫及因念賊勢已極窘迫未必復能

逸出擾我後路今計各處守兵尚多除大板

昭一處地關緊要難於抽動其旺保祿長清

兩處所屬守兵內擇其無關緊要者自可抽

出千餘換至阿桂處守卡即於現在守卡兵

內換出可用戰兵千餘令豐昇額帶領另行

覓路進攻以掣賊勢或竟從功噶爾拉當噶

爾拉擇路前進其地雖有零星賊匪然防守

不甚著意若由此直進攻其無備亦是出奇

之法但豐昇額既進之後又當為聲援之策

須計能入能出不可瞻前而不顧後方為妥

協著即傳諭阿桂悉心妥酌能否如此辦理

於事果否得力一面籌辦一面奏聞○丙寅

諭鑲藍旗蒙古副都統員缺著瑚尼勒圖補授。瑚尼勒圖現在軍營。其副都統員缺著嵩貴署理。○又諭據博爾額奏署蓋平縣知縣事教授辛開一於民人張會被竊一案。將賊犯霍代周跪鍊壓棍以致重傷斃命。復不據實驗詳。更屬欺朦。請旨革職等語。辛開一著革職。交與德風博爾額提集案內。應訊人犯一併嚴審。究擬具奏。○諭軍機大臣等。近日閱米芾墨蹟。其紙幅有勤有二字印記。未

能悉其來歷。及閱內府所藏舊板千家注杜詩。向稱為宋槧者。卷後有皇慶壬子。余氏刊於勤有堂數字。皇慶為元仁宗年號。則其板是元非宋。繼閱宋板古列女傳。書末亦有建安余氏靖菴刊於勤有堂字樣。則宋時已有此堂。因考之宋岳珂相臺家塾論書板之精者。稱建安余仁仲雖未刊有堂名。可見閩中余板在南宋久已著名。但未知北宋時即以勤有名堂否。又他書所載。明季余氏建板猶

盛行。是其世業流傳甚久。近日是否相沿。并其家刊書。始自北宋何年。及勤有堂名所自。詢之閩人之官於朝者。罕知其詳。若在本處查考。尚非難事。著傳諭鐘音於建寧府所屬訪查余氏子孫。現在是否尚習刊書之業。并建安余氏自宋以來刊印書板源流。及勤有堂昉於何代何年。今尚存否。或遺蹟已無可考。僅存其名。并其家在宋時曾否造紙。有無印記之處。或考之志乘。或徵之傳聞。逐一查

明。遇便覆奏。此係考訂文墨舊聞。無關政治。鐘音宜選派誠妥之員。善為詢訪。不得稍涉張皇。尤不得令胥役等僭端滋擾。將此隨該督奏摺之便。諭令知之。尋奏據余氏後人余廷勳等呈出族譜。載其先世自北宋遷建陽縣之書林。即以刊書為業。彼時外省板少。余氏獨於他處購選紙料。印記勤有二字。紙板俱佳。是以建安書籍盛行。至勤有堂名相沿已久。宋理宗時有余文興號勤有居士。亦係

襲舊有堂名為號。今余姓現行紹慶堂書集。據稱即勤有堂故址。其年代已不可攷報聞。

○丁卯御史色爾布胡紹鼎奏

皇上祀

壇之期。凡執事人員僕從。肆由午門乘馬出入。甚屬不合。請嗣後凡遇

大祀。隨從執事人員。祇准本身由午門前乘馬。其家人馬匹。不准由闕門牽入。得旨。所奏是依議。○戊辰諭曰。侍郎高樓著同軍機章京

永保。馳驛前往山西查辦事務。○諭軍機大臣等。據高晉奏。籌辦濰河各工情形。一摺。內有以備來年減洩異漲之語。似舊歲籌辦時措辭。及檢閱摺後。月日係本年正月初八日。拜發。則來年當指丙申年而言。斷無越過今年。豫計明年之理。此必摺稿於歲內辦定。新正繕發時。不復檢點。致有此誤耶。雖其事無大干礙。但陳奏河務關係年分情形。錯此一字。於理即不通。高晉平日諸事細密。不應忽

畧若此。著傳諭知之。至另摺所奏收繳遺書內應燬各書。如查有書板。即行查銷等語。此等應燬書籍。如有板片存留。著查明一併解京銷燬。○己巳諭據楊景素奏。東省營伍中鳥鎗一項。演習未能得法。現在需人訓練。查各營出有叅將等缺。或由他省補放。或由軍營坐補。均未到任。請於火器健銳三營應用遊擊都司守備內。各揀選二員。飭發來東。先令分署各缺。專司教演。遇有相當題選缺出。

陸續題補等語。著照所請。派福隆安扎拉豐阿。會同該部。於火器健銳二營內揀選帶領引見發往。○諭軍機大臣等。明亮等奏。土兵進攻正地情形。雖亦殲賊十餘。但係路遇夾壩之賊。為數無多。而於正地一帶賊寨。並未能攻得尺寸。此路原止可為牽綴賊勢之用。並非實有可進之機。今賊眾既已知覺防範。尤不可復致力於此。徒勞無益。明亮等自當就現駐之處。覓間進剿。不應株守坐待。看來

各路軍營光景。惟阿桂一路較可設法進取。朕亦惟阿桂一路是恃。著傳諭阿桂。務須實力上緊籌辦。以副朕懷。○又諭昨據山西民人孔傳章在阿思哈處控告。有山東逆匪王倫之姪。王老嫗兒帶同四人在汾陽縣監生武接武家。當經呈報冀村鎮蔣巡檢。未經查辦。繼喊稟知縣。將該犯等拏獲。又復意存開脫。將四犯放走。止暫留王老嫗兒。欲俟事久冷淡。再行省釋等語。已派侍郎高樸軍機章

京永保。馳驛前往查審矣。如所控為監窩藏逆黨屬實。自應嚴拏重究。若該巡檢果因與武錫命交好。徇情袒縱。其罪即無可寬。而該知縣。如果有向孔傳章稱傷人性命甚多。你自思何苦如此之語。則竟欲庇護反叛情罪。實為重大。即應一併革職拏問。但其間查案拏犯等事。應有地方大員會同辦理。已延三。現派同常青赴殺虎口會勘事件。如尚未起身。即先行馳赴汾陽縣。會同高樸等查辦。俟

事竣後。再往殺虎口。如業經起程。即著接察使黃檢前往。隨同高樸等審辦。其知縣巡檢。如果應行拏問。及有應解京審訊要犯。即著該撫或該司派委妥員沿途小心。隔別管押解京。若途中稍有疎虞。惟僉差之撫司是問。將此由四百里發往。並諭高樸。永保知之。○庚午。諭川省軍營大功指日告成。計節次所撥軍需銀兩。已足敷用。至平定促浸以後。一切善後事宜。不無尚需經費。著於部庫內再

撥銀五百萬兩。即照上年戶部奏准之例。令經由各省督撫派員承管。遞行轉解。交川省藩庫存貯備用。該部即遵諭行。○諭軍機大臣等。昨據山西民人孔傳章在阿思哈處控告逆匪王老嫗兒一案。已派侍郎高樸軍機章京永保前往會同已延三查審矣。據所稱另獲四犯。聽說內有壽張衙役兩人。不知託何鬼名鬼姓。總之衣帽裝飾。漢仗年紀。斷不是良民樣式。直待逆匪勦除之後。黃榜張示。

於十一月初間將四犯先行放走等語。雖未能逐一指實。據云壽張衙役兩人。安知不即係未獲之劉煥。冀盤佑二犯。且四犯由晉省縱回山東。所有經由之直隸地方及山東本籍。必有蹤跡。可以尾查訪緝。著傳諭周元理。即於該犯等由山西回籍。應行經過地方。嚴飭各州縣按站挨查。上年十一月初間各犯經由情形。及有無逗留潛匿。逐一確查根究。並著楊景素嚴飭地方官。於壽張臨清等處。

訪查上年十一月內有無自山西回籍之人。如經躡有形蹤。立即拏獲。訊供派委妥員。管押解京審訊。如高樸等到彼。訊得所遣四犯姓名籍貫。則查拏更易。即一面具奏。一面飛咨楊景素查拏。自更無漏網。將此由三百里發往。並令高樸等知之。○定西將軍尚書阿桂。定邊右副將軍尚書公豐昇額。叅贊大臣領侍衛內大臣色布騰巴勒珠爾。都統海蘭察。副都統額森特奏。康薩爾第一碉。屢經大

礮轟摧。自應乘此進攻。隨於初五日。派烏什哈達海祿帶兵直撲碉根。賊番藏空穴中。施放箭石。死力拒守。據投出番人供稱。是日碉內傷斃三十餘人。至此數日內。賊番屢來侵擾。俱被殲戮。且一經官兵衝擊。即行敗逃。其非齊心抗拒。已可概見。諭軍機大臣等。此次攻打康薩爾第一碉。官兵等頗屬奮勉。至番地氣候。冬令多晴。入春即多雨雪。朕屢促將軍等。上緊籌辦。原慮因此或有阻滯耳。今

甫交春。令即已大雪。恐愈遲愈多。不可不早為之計。况雨雪雖云凍滑。前此攻勦各處碉卡。於雪中雪後。得勝者甚多。可見事在人為。阿桂等不宜以雨雪為辭。稍存自畫之見。至康薩爾及沿河一帶地方。賊番因逼近窠巢。捨死堅守。實堪切齒。但閱投出番人克思嘉等供詞。稱賊人糧食。祇有苦荬圓根。其窘可知。並稱火藥將次用完。土司分付頭人每家要交一觔硝。二兩磺等語。如此豈能經久。著

傳諭阿桂等。即當上緊籌度。設法竭力進攻。以期迅速。歲事。○辦理糧餉。浙江布政使郝碩奏。目下時屆春初。天氣和暖。運送軍糧。更為便捷。查軍營及頭敵。現存米八千餘石。自凱歌坪達爾扎克至雪山根薩爾赤各站。現存米三千八百餘石。梭洛柏古大板昭薩拉等站。共存米三萬三千餘石。似此源源運供。軍儲益加寬裕。至糧運經由道路。有因積雪漸消。途間不無積水。泥濘。現在酌撥人夫。或改建高橋。或墊鋪土石。俾得通行無阻。得旨嘉獎。○辛未。

上詣長春仙館問

皇太后安。奉

皇太后居暢春園。○諭前因都統五福溘逝。曾諭部察例議卹。而部議以五福係革職留任之員。應得祭葬。不准賞給。固屬照例。覈議。但念五福久直內廷。恪勤素著。著加恩將伊革職之案。准予開復。仍著該部。照都統應得卹

典察例議給。以示優卹。○以侍講學士金士松充日講起居注官。○壬申。

上詣暢春園問

皇太后安。○叅贊大臣副都統富德奏。據駐守穆谷總兵劉輝祖及派往穆當噶爾設伏之護軍叅領德克登額等報稱。該處皆有賊。番前來窺竊。俱被擊敗。竄走等語。番賊奸詭。現飭後路嚴為防範。俟有可乘之隙。即圖洗勦。諭軍機大臣等。閱富德此奏。並未深入。尚在坐守。未免過於慎重。據現在情形。成功在即。一切雖當籌畫萬全。亦應奮力前進。以圖迅速。歲事。豈但云謹守。即有滅賊之理乎。況時屆春令。番地雨雪方多。倘長此坐待。即再守數月。亦不過如是耳。富德獨不計及乎。目下賊番情勢。窘迫已極。尚數次潛出。侵擾營卡。我有大兵數千在彼。不能相機設法。殲戮賊衆。豈不為賊衆所笑。著傳諭富德。但覓得路徑。即速進攻。不宜坐待。又奏據投出番人申

札供稱賊衆糧食缺少。欲投天朝者甚多。因賊目查察嚴密。未能逸出。索諾木又復傳知百姓。稱說綽窩斯甲遣回。必係招降我等衆百姓聞此。無不歡欣盼信等語。臣思將計就計。即繕寫番字諭帖。飭令先後投出番民前往各處傳播。使賊衆互生疑忌。諭軍機大臣等。富德所奏相機離間之法。止不過如治病偏方。賊番狡詭異常。未必肯為我反間所惑。斷不可恃有此策。轉致稍緩進攻。且賊番鬼

蜮伎倆。無所不至。恐其因此將計就計。詐為殺首乞降之說。暗藏叵測。切不宜輕率出營受降。萬一誤墮術中。實屬不成事體。將軍等當共知此意。現在各路官軍俱逼近賊巢。祇須一處得進。則他處自皆潰散。若僅駐兵看守。不使賊人軼出。而我兵亦無由得其尺寸之地。似此何時可以歲事乎。看來各路進攻官兵。自當以阿桂一路最為可望。至昨諭令明亮統兵應往何路協剿。有益及令抽撥長

清等各處兵丁。如何妥善之處。亦惟阿桂實心籌酌。著傳諭阿桂妥協辦理。速行奏聞。○癸酉。諭據明亮等奏。促浸賊人差頭人斯丹增具稟。將所留漢土官兵及烏鎗送至營門乞降。即給與回檄。將送來之兵丁烏鎗俱交斯丹增帶回等語。賊匪當此攻圍緊急之時。指日即當殄滅。尚敢巧計嘗試。殊堪切齒。明亮等自應即將獻出兵丁烏鎗等俱行存留。並拘其頭人斯丹增嚴加刑訊。究出實情。方

為正辦。乃率行給與回檄。又不留兵丁烏鎗。并將斯丹增擅行縱歸。所辦甚屬錯謬。明亮舒常前此辦理軍務。尚能實心妥協。屢經獎諭優敘。今辦理此事。錯謬甚大。不可輕恕。俱著交部嚴加議處。○諭軍機大臣等。昨日敦福奏到四摺。今早又據奏到六摺。俱當經批閱矣。朕以其連日進遞奏章。必有他故。因令軍機大臣傳訊齋摺差員。據該把總蔣萬寧稱。今年正月初一日。護巡撫敦福同日拜發

夾板二副一填十二月二十日交令正月十八日先進一填十二月二十七日交令正月二十四日續進把總因途次遇雨於本月二十三日方得到京是以於二十四五兩日內分起投遞等語敦福所辦殊屬非是該護撫奏到各摺既係同日拜發即應令差員一并遞進或各摺有必須分日呈遞者即當分遣兩人齎進方為合理今以同日所發之摺填寫先後月日不免涉欺若以應行分遞之事

止差一人以圖節省路費更屬見小二者皆非所宜敦福初經任用不應荒唐若此著傳旨申飭○又諭據敦福奏到兵犯在配並無脫逃一摺係歲底應奏之件川省潰兵分發各省安插節經降旨令各督撫將有無脫逃之處於年終彙奏一次今已屆正月二十五日敦福而外惟德保熊學鵬曾先後奏到其餘並無奏及者辦理殊屬遲緩著傳諭各督撫將因何不按期彙奏緣由據實覆奏仍將

潰兵在配有無脫逃之處具摺奏聞○又諭昨據戶兵二部議駁西安將軍福僧阿奏請豁免由京移駐西安兵內革退年老殘疾三十七人借支餉銀一摺朕以福僧阿辦理非是即交軍機大臣等覈查八旗初派駐防報部冊內皆係遴選壯健並無年老殘疾之人福僧阿從前如何辦理報部實屬朦混著傳旨申飭並令明白回奏○甲戌上詣暢春園問

皇太后安○諭署湖廣襄陽鎮總兵官達色自到川省軍營甚為奮勉出力著加恩實授襄陽鎮總兵以示獎勵○定西將軍尚書阿桂定邊右副將軍尚書公豐昇額參贊大臣領侍衛內大臣色布騰巴勒珠爾都統海蘭察副都統額森特奏此次攻克康薩爾山梁官兵各加奮勉而頭等侍衛扎勒丹巴圖魯佛倫泰吉林佐領委署參領奇蘭保黑龍江副總管委署參領僧保防禦委署參領森保吉

林領催博布善等尤為出力。可否酌量加恩。諭曰。佛倫泰著加恩賞給副都統職銜。奇蘭保著賞給札爾木巴圖魯名號。僧保著賞給札爾木巴圖魯名號。森保著賞給袞爵木巴圖魯名號。並照例每人各賞銀一百兩。博布善等著加恩俱陞一等用。○又諭。據阿桂等奏到攻克康薩爾山梁。占獲碉寨木城石卡。并痛殲賊番情形一摺。據稱賊番於康薩爾守禦不遺餘力。因於本月十二日。分派將弁。

帶兵黃夜前進。拽開欄木。拔起鹿角。躍過重濠。拋擲火彈。賊人抵死距守。官兵一呼湧上。直登碉頂。殺死碉內外各賊。並將地窖石板踏塌。壓斃多賊。隨將地穴填塞。繼又分兩翼衝下。連奪大碉石卡木城。至山脊兩旁。見係密菁。黑夜難以進攻。連夜竿柵。運礮轟摧。連日各兵勇氣倍增。四面環攻。賊人無路可逃。俱從懸崖跳下。跌斃者又復甚眾。所有山溝內水碉寨落一齊搶占。三日內。共攻克大碉。

十座。木城四座。大石卡二十座。寨落七處。活拏二賊。殲斃二百餘賊。奪獲銅鐵礮二尊。刀矛鳥鎗毛毯糶犯甚多。再此處係進攻噶爾丹寺。及噶朗噶勒烏圍正路。現在察看情形。於兩三日內。攻取勒吉爾博。以期迅抵賊巢等語。此次將弁兵丁。奪卡殲賊。勇往出力。甚屬可嘉。所有出眾超羣之將領。經將軍等另摺保奏者。業經分別加恩。賞給巴圖魯名號。及超擢陞等賞翎。以示鼓勵。其在事出力兵。

丁。並著查明各賞一月錢糧。○又諭曰。桂林奏。按察使經歷張鑑。自進勦金川以來。委管西南兩路。隨營糧務。一切支放事宜。經理妥協。上年冬間。達爾圖軍糧。因長運烏拉遲緩。該員亦能實力催趲。無誤。又新捐從九品徐鼎。在軍營繕辦奏摺。兼管文案。實心經理。頗屬勤勞。請旨加恩等語。張鑑著以府屬知州陞用。徐鼎著以縣丞鹽大使陞用。交富勒渾文綬。遇有相當缺出。題補。并令先換頂戴。以。

示獎勵○諭軍機大臣等。適日盼望軍報甚切。而各路將軍連次所奏。俱未得手。煩悶實甚。覽此深為欣慰。康薩爾為賊番第一要隘。今既將該處山梁盡行攻克。是官兵已得勝勢。更可乘銳深入。此實仰賴

上蒼嘉佑。阿桂等尤當努力奮勉。速成大功。將軍等此次調度有方。幸獲大勝。甚為可嘉。俟攻得勒烏圍時。再行優敘。所有陣亡之巴西薩。甚為可惜。著與受傷之侍衛庫爾德等。及陣亡弁兵。一併查明咨部。照例卹賞。其庫爾德等所受各傷。俱曾全愈否。亦著阿桂遇便覆奏。○乙亥。

上詣暢春園。問

皇太后安。○還宮。視

皇貴妃疾。○幸圓明園。○丙子。禮部題。朝鮮國

王李昫遣使表賀

萬壽。冬至。元旦。三大節。及進歲貢方物。賞賚筵

宴如例。○丁丑。

上詣暢春園。問

皇太后安。○

皇貴妃薨。諭本月二十九日。

皇貴妃薨。逝。著稱

令懿皇貴妃。依例輟朝五日。派皇六子。皇八

子。皇十二子。皇十五子。皇孫綿德。綿億。綿惠

九公主。額駙拉旺多爾濟。扎蘭泰。及丹巴多

爾濟。豐紳濟倫。穿孝。並派皇六子。尚書永貴

總管內務府大臣金簡。經理喪儀。所有應行

典禮。著各該衙門察例具奏。○

上至吉安所。

令懿皇貴妃前奠酒。○還宮。○諭曰

皇貴妃薨。逝。例應素服十日。今已擇於二月

初五日。移殯靜安莊。所有初六日。經筵典禮

仍照常舉行。至初七。八等日。適屆恭祭

社稷壇。齋戒。其應行陪祀執事大臣官員。著於

初七日起。即穿用常服朝珠。餘仍穿足素服

十日。○戊寅。

上至吉安所。

令懿皇貴妃金棺前奠酒。○詣暢春園。問

皇太后安。○幸圓明園。○是月。河東河道總督

姚立德奏。東省運河。以汶泗為源。遇伏秋汛

發。汶水鋪灌閘河。所有各湖進水出水斗門。

悉行築壩嚴閉。現在南旺湖存水四尺九寸。

蜀山湖存水八尺九寸。馬踏湖存水六尺九

寸。馬場湖存水五尺八寸。以待重運。經臨至

下游之微山湖。自去冬開放。江省黃河北岸

潘家屯引渠後。源源灌輸。現存水九尺七寸。

俟桃汛屆期。水勢有長無消。足資濟運。得旨

嘉獎。○署雲貴總督圖思德奏。天馬關一帶。

與緬匪接壤。邊防最要。查張鳳街之北地名

杉木籠。內通隴川。外達邊境。向撥弩手二十

名。在彼駐防。俱係猺夷。難保無偷漏情弊。現

於張鳳街隴川二營內。各派千把總一員。兵

四十名。分立堆卡。於山崖兩邊。嚴防邊隘。又

三臺山外。查遮放地方。有小徑通木邦。亦屬

沿邊要口。即於三臺山營內。派千總一員。兵

二十名。設卡巡邏。使緬匪不敢潛窺內地。報

聞。○雲南巡撫李湖奏。滇省湯丹碌碌大水。

茂麓四廠。自乾隆三十七年。清釐之後。各廠

領本辦銅。並無墮欠。惟前督臣彰寶奏開九

渡等新廠。係初闢山箐。尋砂挖硎。工費較大。

現在逐款清查。使無懸宕。並將衰竭之廠。停

採封閉。以免虧蝕。報聞。

實錄卷九十五

圭

大清高宗法天隆運至誠先覺體元立極敷文奮武孝慈神聖純皇帝實錄卷之九百七十六

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭軍機處管理

吏部理藩院事務正黃旗滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭軍機處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未二月己卯朔諭前日御史

奏事官

奏事官

邱日榮以派出巡漕請訓朕召見時詢及伊曾陳奏幾事據邱日榮奏稱曾經條奏二事一係京員京察必在本衙門歷俸三年方准一等一係各省請員揀發應以到部投供及供限已滿人員方准揀選俱經吏部議駁朕以該御史所言尚非盡不可行何以吏部概行議駁因令該部檢查邱日榮所奏之摺並部議原稿呈覽今據查邱日榮所奏共係三事其京察揀發二事合為一摺與該御史原

奏之語相合尚有奏請京員告假不必拘定年限一摺經部議駁並傳旨申飭乃邱日榮當朕面詢時並未奏及此乃其日請訓之色爾布同時召對所目覩者在邱日榮未嘗不知所言之不甚當理且經奉旨申飭恐一經逮及露其所短遂思含糊混過未免意存取巧邱日榮揜其不善而著其善非忠告之體著交部察議至該御史所奏京察人員必本衙門歷俸三年方准保送一等意在杜絕躁進之風所言不為無見即不能照外省拘定三年亦當酌示限制不應如舊例半年之過於欲速至揀發人員拘定投供及不拘投供均恐易生趨避該部亦當酌議盡善以防其流弊朕辦事惟準酌情理期於至當邱日榮近日奏對雖有不合不肯因此并其所言而廢之其所奏京察揀選二事仍著該部另行詳悉妥議具奏尋議京員京察向例初任及降補捐復等員不滿三年原不准保送惟由

別衙門陞調各官。果有才猷出衆。到任半年。即准接算前俸一體薦舉。若定限三年未免淹滯。是以將該御史所奏毋庸議。但京察大典事關考績。舊例半年亦覺過速。請嗣後在本衙門歷俸一年方准保送。至所奏各省請員揀發。凡應投供人員。俱須扣滿供限。方准揀選。查各項應補應選人員。向來俱係將屆選期。始行在部投供。若必扣五十五日之限。恐備選人數不敷。是以議請照舊辦理。但舊

例未經投供人員。亦准一體揀選。難保無趨避之弊。嗣後概不准與挑。其投供人員。雖毋庸扣足限期。亦須投供驗到。方准揀選。如果人數不敷。請仍照前例。將記名之現任京員一體傳令與挑。從之。○又諭。禮部議覆程景伊條奏。禁止鄉試考官出題割裂小巧一本。惟稱嗣後如有似此命題者。將考官議處。而於現在四川省出題牽連無理之考官。乃置之不議。所辦非是。考試固當避熟習擬題。以

防勦襲。然亦不可割裂牽搭致礙文義。蓋試題為制藝所由出。若務為新巧。恐士子揣摩。弋獲趨入纖佻。文風純駁之分。即士習端衰所繫。而民俗之醇薄實因之。其機不可不慎。今禮部不將四川考官。即附本叅處殊屬不合。所有禮部堂官著交部察議。此本著發還交該部另行妥議具奏。○定西將軍尚書阿桂定邊右副將軍尚書公豐昇額叅贊大臣領侍衛內大臣色布騰巴勒珠爾都統海蘭

察副都統額森特奏。正月十六日官兵進攻堪布卓寨。分為兩翼潛進合圍。比及賊番知覺。我兵已豎梯而上。據碉房之頂。賊衆竄走無路。皆為刀箭所斃。十七日復進攻甲爾納寨。該處賊番已被官兵截斷。正用皮船偷渡。我兵追擊。均經落水淹斃。其前後寨碉及沿河崖洞同時攻克。又奏。盤獲奸細朗木太。供稱賊番欲於康薩爾等處偷截官兵後路。以伊本係沃克什人。官兵必不動疑。使之偵探。

大兵信息等語。種種詭譎。實堪痛恨。諭軍機大臣等。阿桂等奏攻克甲爾納堪布卓。沿河各礮寨情形。甚屬奮勉。可嘉。據稱堅梯而上。想係所帶雲梯。即此可見平時演習之效。其先登者為誰。著即查明據實具奏。以便加恩示獎。此兩處攻得。已至河沿一帶。官兵汲飲有資。即可乘勝直取得式梯。進剿勒烏圖。其勒吉爾博山梁礮卡。若能相機攻得。於進取更為有益。至已攻得甲爾納對河。即係斯年

木咱爾與明亮軍營更近。阿桂等固可隔河用礮轟摧。明亮等亦可約會就近設法夾攻。若能併力攻得。斯年木咱爾於進攻勒烏圖尤為得力。至所稱攻礮時。索倫佐領伊爾賽因攻撲傷亡甚為可惜。其都司梁朝桂等先登受傷。亦屬可憫。並交阿桂等將陣亡受傷弁兵一併查明咨部議卹。至盤獲奸細朗木太。必係阿桂窺破其狡譎情形。逐一嚴訊。方能得實。他人並不能如此用心。阿桂既辦及

此。則各處投出之人。將軍叅贊等。不可不留心體察。如有形跡可疑者。即當嚴詰得實。勿為賊番所愚。至阿桂另摺所奏。議調南路等處兵七千名。會攻宜喜山梁。所見甚是。與朕前次所降諭旨。適合。絨布一帶。現雖駐兵牽綴賊勢。但明亮西路之兵。若能攻進。即可由馬爾邦一路夾攻取勝。引進南路之兵。同剿噶喇依。惟其地甚關緊要。亦須勇幹大員統兵駐守。富德自不便輕離該處。著傳諭富德

即速酌量抽撥。○四川總督富勒渾奏。現在大兵乘勝深入。軍糧軍火等項。儲備充裕。其前敵所需礮子。亦飛飭各站將生鐵儘數運供。再官兵既克康薩爾一帶。即日下抵河干。會合北路官兵。必須用船濟渡。一切船料久已備齊。並製造皮船聽候調用。至後路梭洛柏古等處。督率將兵嚴加防範。以壯聲援。得旨嘉獎。○庚辰戶部議覆御史柯瑾奏。衛守備一官。無操防巡緝之責。因公處分絕少。又

與文職一體徵收錢糧養廉較營員為厚往
住希圖戀棧俸滿時於經徵錢糧冊內故報
未完不及一分以為停陞地步嗣後遇應陞
時如有經徵不及一分至一二分以上者均
令離任協同新任徵收完日開復應如所請
至所奏衛守備選法向例單月七班盡歸外
題二四六十雙月缺出又歸在外卓異班陞
補是在外所占月分太多請改卓異人員於
單月七班之末雙月均歸部選查雙月班內
惟武進士及効力班之提塘等較多近來三
等武進士業經奏請復行揀選拔置營缺提
塘年滿時又復請分別營衛較前已屬疏通
若如該御史所奏未免過優嗣後雙月出缺
應將卓異人員與候補各班相間輪用從之
○辛巳軍機大臣議覆寧夏將軍傅良奏稱
寧夏馬兵二千二百名每名拴馬二匹伊等
不諳餵養馬多倒斃請照西安涼州例令每
兵各拴一馬以備操演其餘作價存庫遇有

緊急用馬既可立時採買而所餘馬乾銀兩
又可分給衆兵養贍家口庶新駐兵丁不致
有賠補馬匹之累應如所請從之○壬午
上詣暢春園問

皇太后安○諭軍機大臣等今日富德摺到不
過將所放夾壩之賊殲戮數人據此看來富
德所領之兵斷不能前進與其將一萬數千
人為牽綴賊番之用何若分助明亮之為得
濟乎富德若以兵少不敷派撥致有貽誤則
獲罪重大矣著傳諭富德速派兵六千名前
往明亮軍營仍帶餘兵用心駐守如遇窺探
賊番盡行勦殺倘有疎虞或令賊番少得便
宜亦惟伊是問○癸未

上至吉安所臨送

令懿皇貴妃金棺移殯靜安莊還宮○禮部
議准御史王寬奏各省鄉試謄錄飭州縣慎
送正身書吏如經委驗官駁回將地方官議
處中式硃卷潦草不成字體者原送之地方

官叅處謄錄於題內筆誤三字及文內錯落數字者杖責對讀未經對出者戒飭謄錄顯違格式遺落成行錯誤成句有礙文義及對讀不行對改者均黜革從之○蠲安徽合肥定遠泗州盱眙全椒鳳陽宿州壽州天長滁州懷遠霍邱六安霍山等十四州縣廬州鳳陽長淮泗州四衛乾隆三十九年水旱災地額賦並緩壽州泗州盱眙鳳陽宿州懷遠六州縣鳳陽長淮泗州三衛舊欠漕項均予分

年帶徵○豁甘肅寧朔縣水衝民地二千三百一十六畝有奇額賦○甲申以舉行仲春經筵遣官告祭

奉先殿

傳心殿
上御文華殿講官暨侍班之大學士九卿詹事等行二跪六叩禮分班入殿內序立直講官四人出就講案前行一跪三叩禮復位直講官永貴王際華進講日日新又日新二句講

畢

上宣御論曰曾子釋新民之義而引湯之盤銘此意最親切蓋湯之盤銘以修身而及正心也曾子之解經文則以治人而及修己也終必由始末當反本故欲洗濯其身者要當先復其心之善而欲教化其民者要當先勉其身之修夫正心以修身者豈有他術哉亦惟克己復禮去其習染之汚而復其本然之善而已蓋習染之最易害人心如塵埃之最易生屋宇日日掃之塵埃未必能盡去日日新之習染未必能盡除日日新又日新如是而已矣若謂新民之道必更有以新之則是外本內末雖日施訓誡之令有不出於柳宗元之所譏矣講官暨侍班官跪聆畢興直講官覺羅永德嵇璜進講易經有孚惠我德一句講畢
上宣御論曰易理廣大無所不包仁者見之謂之仁知者見之謂之知予昔常以勿問其施

惠釋元吉矣。至於惠我德。予亦以為應於為君者言之。蓋惠者何。即我之德也。我施德惠而稍有不孚於心。則仍是違道干譽之為欲。天下人之愛戴。此非問乎。此非不孚乎。且九五為君位。亦不應計及人之愛戴也。或曰。如此。不有違歷來釋經者乎。曰。觀象玩辭。予惟知盡予為君之道。講官暨侍班官跪聆畢。大學士舒赫德。手敏中奏曰。

皇上聖敬日躋。大德天覆。本自新以作民新。不煩訓誡而化。推實心以敷實惠。不計愛戴而施。

帝學皇猷。同源共貫。臣等幸侍

講筵。親承

訓示。曷勝欽仰。奏畢。諸臣出就拜位。行二跪六叩禮。禮成。

上還宮。賜講官暨侍班官等宴於文華殿東

廡之本仁殿。遣官祭

先賢之神。諭軍機大臣等。明亮等奏。由南

路至宜喜。計十二日行程。所調之兵。自不能甚速。著再傳諭富德。令其即速抽撥。遄赴宜喜備用。勿稍遲誤。致干重戾。○乙酉。諭。庶吉士黃壽齡。上年因遺失永樂大典。經部議以降二級留任。仍罰俸一年。因該員尚未散館授職。無任可留。令再學習三年。方准散館。因屬咎所應得。第念四庫全書處未定章程以前。纂修等將書攜歸校辦者。諒不止一人。黃壽齡第因遺失。遂干吏議耳。其情尚稍可原。

黃壽齡著從寬。准其同壬辰科庶吉士一體散館。其議處之案。改為罰俸三年。○又諭。領侍衛內大臣旺扎勒。在內廷効力行走多年。伊子博靈阿。又受傷身故。因伊無子。朕加恩將博靈阿堂兄烏爾圖納遜第三子祥麟。給伊為嗣。承襲輕車都尉。今祥麟復經病故。甚屬可憫。著加恩於博靈阿堂兄之子內。再揀一人。給博靈阿為嗣。令其承襲輕車都尉。旌表守正捐軀之山西寧武縣民。高有珍妻。

田氏○是日起

上以祭

社稷壇齋戒三日。丙戌。諭軍機大臣等。阿桂等奏。攻克沿河斯莫思達碉寨。乘勝深入。自屬更便。阿桂等尤當設法。妥速辦理。佇聽捷音。又富德奏。南路現在情形。防範亦屬緊要。自不便過於多徵。或致兵力太單。且所請抽撥三千兼之章谷。抽派一千。合以宜喜。日旁原有之兵。可得七千餘人。足敷進剿之用。即

著照富德所請。准其撥兵三千。前往宜喜協剿。至絨布一帶。甚關緊要。富德未可輕離。即與兆舒亮均係南路得力之員。該處將領無多。亦不宜再行分派。著富德仍在絨布寨駐守。其派往宜喜之兵。祇須選派章京等率領。並著明亮於奎林和隆武三保內酌留一員。同舒常駐劄帶石。以綴賊勢。仍於此內酌派二員。星馳前往南路一帶。迎見抽撥之三千兵。帶領遄行。明亮亦即選戰兵數千。迅赴宜

喜部署一切。俟南路之兵一到。相機設法進攻。以期必得。又諭曰。阿桂。富勒渾等奏。據叨烏站員王石渠報稱。兵役李友趙得富。盤獲偷放夾壩之胡榮。嚴刑審訊。據供實名。張元係逆犯張坤忠之姪。於三十八年。隨同張坤忠。逃往促浸。賊酋配以妻室。曾為賊創挖礮。勦製造火藥。並經兩次至叨烏等處。盜竊毛牛等物。此次賊人欲放夾壩。復令潛來探路。假作民夫。混入夫棚。潛被盤獲等語。張坤

忠以內地兵丁。膽敢竄逃。賊境為其所用。本屬罪大惡極。雖寸磔不足以蔽辜。該犯張元。隨同從逆。供賊使令。實為同惡相濟。罪不容誅。阿桂。富勒渾等。將該犯在營嚴訊。備極諸刑。仍即凌遲處死。所辦甚是。至站員王石渠督飭兵役。細心盤獲。洵為奮勉出力。且伊係革職効力之微員。能如此查拏要犯。更屬可嘉。王石渠著加恩。以縣丞即用。其兵役李友。趙得富等。即飭該站員查明重賞。至叨烏一

站係富勒渾管轄之地。逆犯張元即於彼處拏獲。富勒渾著免其交部。其餘應行議處各職名。仍著該督等查明送部。分別議處。○又諭曰。郝碩奏軍營米價現在稍長。恐至三四月間。又復加增。所有三路各站人夫。每日需米。約計七百餘石。請於麥收時。採辦灰麵數十萬觔。將站夫口糧。五日內搭放一日。可節省米數千石。其採買灰麵。除站夫沿途支用外。亦可運營以資裹帶等語。著傳諭文綬。即

飭附近各路軍營州縣。於春麥收割時。採買灰麵數十萬觔。分給各站搭放人夫口糧。如有餘剩。仍送軍營備用。○丁亥。祭

先師孔子。遣大學士于敏中行禮。○諭軍機大臣等。巴延三奏山東撫臣查拏劉煥咨文。係正月二十六日。由六百里封遞。乃於二月初五日始行接到。顯係沿途遲延。封袋亦有破損等語。驛站文報往來。關係緊要。且係六百里事件。尤當嚴密馳送。無誤。今東撫咨文。

遲至十日始抵晉省。且封袋亦有破損。恐沿途或有拆看情弊。事關查拏逆犯。不可不徹底根究。著傳諭周元理。楊景素。即飭屬逐站挨查。前項所發公文。係何驛站擦損遲延。即將該管官據實叅奏。至晉省。經遞各站。巴延三亦當一體嚴查。並驗明此件遞到咨文。其封口處。曾否開拆。並有無開後重黏痕跡。一併據實覆奏。將此由五百里諭令知之。○又諭。現在征勦金川。大功已屬垂成。自可剋期

歲事。惟賊番護巢衛死守拒益嚴。即得勒烏圖後。尚恐其堅守。噶喇依不免稍需時日。昨據文綬奏。去冬所撥京餉。於正月二十日起。已解到一百五十萬兩。其餘亦可源源續至。前據伊等籌算。此項餉銀可用至本年四月。今又撥京餉五百萬。約計可用至九月。似不須復籌接濟。但軍需用度。寧可寬餘儲備。著傳諭富勒渾文綬。悉心覈計。前後所撥京餉。約可用至何時。即行據實奏聞。當再撥餉五

百萬解往以期寬裕。又諭節次所撥軍需銀兩已至四千餘萬將來奏銷頗屬不易富勒渾文綬身為總督此事乃其專責但軍需款項繁多非伊二人耳目所能周察若由京簡派大員前往經理未必深悉該處情形因思鄂寶督辦糧運數年一切皆所熟悉而桂林劉秉恬曾任四川總督諸務尤所素諳著派鄂寶桂林劉秉恬會同富勒渾文綬辦理軍需奏銷實心稽覈勿使承辦之員朦混浮開。若查辦未能妥協致有冒銷舞弊之處惟伊五人是問。目今軍務將竣有應陸續稽覈者鄂寶等當以次清釐勿致臨時匆遽將此一併傳諭知之。○以故和郡王綿倫弟綿備襲爵故奉國將軍永璫子綿昶降一等襲奉恩將軍。○蠲緩江蘇丹徒縣坍江田地漕糧二百九十一石有奇。戊子祭

大社

大稷

上親詣行禮。詣暢春園問

皇太后安。幸圓明園。諭軍機大臣曰富德奏攻打喀咱普得妻情形所辦亦好自當相機進取以期采入閱富德前次所奏地圖其現攻之喀咱普及由德木特進攻之得妻均距馬爾邦不遠若能攻得則馬爾邦一帶乘勝直進非多兵不可若撥去三千恐不敷用此又今昔情形不同非可執一而論者軍營之事原屬移步換形朕於此從無成見若富德能留此兵攻進馬爾邦與明亮添兵由達爾圖攻進何異又何必往來僕僕乎著富德自行酌量若將應行抽撥之三千兵留住可以攻進馬爾邦即毋庸復為撥往惟期於事有益當善體朕意妥酌行之又富德奏內有賊番鎗石如雨之語未免可疑凡自賊中投出番衆及拏獲生口俱供賊番火藥日漸缺少似非虛妄安得尚有寬餘之藥放鎗不絕乎著傳諭各路將軍叅贊嗣後奏報賊情賊

數止應據實覈奏不得稍有絲毫捏飾又據明亮等奏進攻喀爾西情形礙位轟擊賊碉更可望摧堅克捷明亮等當努力為之○已

丑

孝康章皇后忌辰遣官祭

孝陵○命簡親王豐訥亨為正使協辦大學士吏部尚書官保為副使齎

冊寶詣靜安莊

贈諡

皇貴妃為

令懿皇貴妃冊文曰秩尊九御崇儀留翬翟之班禮重三宮遺徽著苕華之管惟贊內久欽淑範象德允符斯飾終用錫嘉名鴻章克協率稽上諡式闡芳徽惟

皇貴妃魏氏性東溫恭衷全誠敬溯承儀於宸掖珩璜之矩無愆游領職於軒宮圖史之歲彌謹

金萱敬奉承

歡嘉衿佩之風玉葉蕃敷占吉叶弓謀之喜飭

小心以自慈撫抑時形懷內則以長存庥和宜集何百齡之未半竟一病之弗瘳三十年椒壁如新空餘芬烈廿九日奠階初落莫駐春韶追疇昔之令名休稱猶在概平生之懿德節惠加隆行以光昭禮惟宜稱茲以冊寶諡曰

令懿皇貴妃於戲雲輶已杳宮闈空仰夫音塵瑤檢重頒寶冊徒供夫明器念芳規其不

沫難窮誅德之辭副嘉號以克諡益切思賢之感用彰盛典式播徽音○諭軍機大臣等前日召見選補河南陳州府知府劉標伊本係降調捐復之員因詢以從前緣事案情據奏在雲南順寧府任內委查墮煎鹽觔詳報不實而語涉含糊不肯明言復令軍機大臣傳訊始將囑令井員認賠薪本鹽課即捏報補煎足額等情說出是該員前此被劾實有瞻徇同官之咎及經詢問又復揜其不善而

著其善敢於面欺其心術已不可信且察其才質亦甚平庸恐難勝知府之任著傳諭徐績俟劉標到任後即留心察看如果稍露劣蹟即據實奏毋得畧存瞻隱倘該撫有意姑容別經訪覺當惟徐績是問○又諭阿桂等奏攻打沿河寨落及勒吉爾博遜克爾宗情形頗屬認真但俱未能得利甚為焦急所有兩處攻打陣亡受傷官員兵丁並著查明照例咨部卹賞至另摺所稱各省綠營應行補缺兵額共萬餘名請川省調撥三千並於陝甘貴州挑補六千赴川備用等語已飛諭各督撫迅速挑辦派員帶領遙程前往現在征勦金川一切調度惟阿桂是恃是以有所陳懇悉如所請允行今既准添此項兵丁則官兵聲勢倍盛凡在營士卒應益知鼓舞奮興而土兵見添兵攻勦尤為滅金川之驗更可堅其效順之忱即賊衆聞知自必更加驚恐潰散尤速今大功已屆垂成凡有益於進

攻之事朕不肯稍為憚煩惜費阿桂不可坐待此兵務宜速籌勝算迅奏膚功以紓朕宵旰懸念至三路攻勦之兵惟阿桂一路屢經攻奪險要逼近賊巢其明亮舒常一路自攻克達爾圖山梁後總未能籌勦得利及駐兵帶石以來又將數月此路既不可進自應繞往達爾圖一路或宜喜一路另籌進攻似此遷延株守何時可望成功而富德一路擁兵不為不多乃自上年四五月後半載有餘不過攻得尋常碉卡數座其於河之南北如庚額特等處緊要地方均未能摧破若俱如此攻勦則賊境何由得進且同係賊番碉卡何以阿桂統兵所至不論仰攻旁擊到處催堅明亮舒常富德均著傳旨申飭阿桂前奏明亮一路約計需兵七千著富德處撥兵三千前往其吉地章谷亦可撥兵一千又阿桂商令富勒渾等酌撥川省兵三千亦可令先赴明亮處應用明亮得此七千兵合伊所統兵

內再挑數千即可滿萬豈有如此力量尚不能進攻之理明亮即當仍遵前旨令舒常駐守帶石自行馳赴宜喜迅速進攻仍各將籌辦得勝情形迅速覆奏佇盼捷音○又諭川省各路大兵現在乘勝果入所有攻得碉卡要隘均須節節留兵防守若再加添兵力一鼓直前賊衆聞之自必更加慌亂歲事尤為迅速據阿桂奏稱酌調甘陝川黔省兵丁著即傳諭富勒渾文綬迅速妥辦一面遣赴軍

營一面奏聞並著勒爾謹畢沅韋謙恒會同各該提督於甘肅陝西貴州每省各挑精兵二千名選派勇往曉事之鎮將備弁星速帶領前赴川省軍營應用如提督相隔稍遠者該督撫徑行選派再行知會勿因會辦致羈時日其一切軍裝器械料理起程並沿途行走各事宜著各督撫等查照前例迅速妥辦其何省兵丁應派何路軍營並著阿桂先期檄知帶兵人員分路馳往並著富勒渾文綬

速飭所屬於陝甘黔三省赴川路徑沿途妥為料理俾各兵隨到隨行勿稍阻滯○庚寅諭嗣後每年致祭

先農壇祇須太常寺於二月內以親詣或遣官雙請本到閤時即票擬朕親詣行禮及遣某人恭代雙奏進呈其禮部豫行雙請之本毋庸複進○諭軍機大臣等昨據阿桂奏請調撥陝甘貴州兵丁六千名赴川備用已照所請諭令各督撫即速照數撥遣矣今思此項添調之兵未必果有實濟即如陝甘二省昨歲曾據勒爾謹奏稱此後難以再敷調遣今阿桂雖稱各省在營兵丁均有缺額已行知該本省募補并有各營受傷兵丁仍撥回本營養傷者在阿桂之意似以現在擬調之兵仍係軍營原缺之額非另添新兵可比但各營缺額雖經咨回本處其曾否募補足數及新募之兵果否得力或仍以舊兵撥川募兵留營抵數及發回養傷之兵曾否痊愈可

用均須妥為籌辦該督撫若欲覈實籌撥恐難於額數適敷若隨意挑補充數發往仍屬有名無實此事昨經阿桂奏到朕以其身任征勦專責所籌自應不誤隨即允行竟夕躊躇通盤詳計實有未能悉妥協者除四川本省所調三千尚可及時應用其餘傳諭陝甘貴州督撫令其實心籌酌將能否照辦之處一面辦理一面奏聞是此項兵丁果能赴川與否尚難遽定即該省竟如數調發而覈計行程亦須五月初間方抵軍營阿桂現統大兵直入距勒烏圍賊巢不遠擣穴擒渠計日而辦豈可尚存遷延之見待至五月新兵到後始期成事乎即以善後駐兵而論各省綠營兵調集川省者已不為少以備挑選駐守兵數儘自有餘何必更藉此三省新兵湊補即三省之兵業已調發阿桂亦當酌量其入川後如已屬功成即速撤令領兵之員仍行帶回勿致徒勞往返細閱阿桂昨奏調兵之

意以明亮一路宜喜山梁正值西路大營對面若添兵數千不必攻撲大礮竟從山溝繞越直截賊後斷無不破之理明亮一路果須添兵連進亦不宜俟遠省調兵再辦昨已諭令富德酌量撥兵又於吉地章谷抽撥合計可得兵七千若如阿桂所言宜喜一路得此多兵自可迅速直進如明亮一路雖係添兵仍不能進步即留舒常在帶石並於奎林和隆武三保三人內酌派一人同其領兵駐守明亮等即帶所添之兵歸併阿桂軍營合力籌勦以期迅速集事較之調兵遠省多延時日者自更直捷阿桂何不計及此乎著傳諭阿桂等迅速妥籌辦理毋為緩不濟急之見又昨據阿桂奏准明亮劄稱華布什咱土兵惟願在本地攻打等語殊屬非是現在各路軍營隨征土兵自各處調集者多如華布什咱土兵之言則各土兵皆憚於遠離何由得隨營効用之力況土兵等既隨征到營自

應聽將軍調度何得任其自逞已私此等兵丁自當查明予以懲治即不然亦當立時嚴飭使知敬畏明亮何竟視為當然之事轉向阿桂代述其言即此可見明亮之不善辦事著傳諭明亮此時且不必提起但查明此等兵丁記檔俟功成應予議敘時將功抵折并飭諭衆土兵嗣後不許再存此見致干咎戾○又諭曰明亮等奏添建木城奪獲水泉雖亦設法進攻總未能得其要領如所稱用礮

擊打賊礮自應晝夜不輟使賊番無暇修補若賊果夜間潛出尤當乘其外出用鎗礮極力轟擊既可毀其礮卡兼可殲斃賊番方為正理乃聽其潛出補礮毫無措置明亮等太覺無用如此安能望其有成至土司雍中旺爾結告稱回寨添派土兵固屬誠心出力亦未免借派兵為名暫欲回寨明亮等准令回寨催兵所辦亦是但俟到營後即須善為駕馭令其土緊効力勿使觀望遲延為要○軍

機大臣等奏內閣大庫恭藏無圈點老檔年久訛舊所載字畫與現行清字不同乾隆六年奉旨照現行清字纂成無圈點十二字頭以備稽考但以字頭釐正字蹟未免逐卷翻閱且老檔止此一分日久或致擦損應請照現在清字另行音出一分同原本恭藏得旨是應如此辦理○戶部議准署兩廣總督廣東巡撫德保奏廣東省歸靖香山雙恩碧甲大洲海甲小靖博茂丹兜白石西海惠來小

江等各鹽場每年應徵場課自乾隆四十年為始即令委管各員就近徵解於奏銷冊內開造委員職名一體考察分別議敘議處從之○兵部議准鴻臚寺卿江蘭奏稱向例營伍廢弛該將備等議處皆由提鎮揭參是以免其處分至各省巡查之年經督撫查閱奏奏者並不由提鎮題揭自應與將備等一體分別議處嗣後如提鎮本標將備有廢弛營伍者即將該提鎮照不操練軍士例降二級

留任如係督撫本標將該督撫照急忽因循例降一級留任至提鎮標將備內有年力衰頹弓馬不堪之員該提鎮不豫行題參照徇庇例降三級調用從之○辛卯

上詣暢春園問

皇太后安○遣官祭

關帝廟○諭據徐績覆奏體訪該省學政一摺內稱現任學臣莊存與抵豫未久容悉心體訪屆期據實具奏等語殊不曉事朕前諭

各督撫於學政差滿回京時各就所見秉公據實密奏原指四品以下之翰詹科道部屬等員或其才具有可備道府及兩司之用者而言若侍郎閣學及三品以上京堂皆朕所簡擢其平日能否辦事素所深知又何必復藉督撫之體察况三品以上官階已崇亦斷無因督撫奏其嫻於吏治轉用為道府及兩司之理今徐績既有此奏恐他省督撫亦有似此未能體會朕意者著再傳諭各督撫嗣

後各省學政如係四品以下人員均於其任滿時據實察覈分別密奏若係三品以上大員如考試不公不法之事即隨時糾參不得稍存瞻徇至其任滿回京祇敘其在任聲名若何毋庸將其才情是否堪勝外任之處瑣屑敘入○兵部侍郎高樸軍機章京永保會同署山西巡撫已延三覆奏孔傳章控告逆黨一案臣等遵旨於正月二十六日同抵汾陽提犯審問據王老嫗兒供係東阿縣人向在壽張縣武接武當舖傭工因王倫起事與街隣徐大振等約同逃往山西至武鄉南關遇見武接武告知當舖被搶緣由武接武因係本鋪雇工即帶回家路遇孔傳章盤問聞係姓王又從壽張逃來即指為逆黨扭稟巡檢巡檢即訊供解縣該縣復詳加審訊委係良民遂行保釋等語臣等調閱縣卷查照巡檢申解印文及該縣審斷判案與所供相符且據東省咨稱徐大振王燦禮係壽張退役

張宏斌陳朗向業縫衣生理俱安分良民並非從逆之劉煥冀盤佑二犯因復提孔傳章詰問所控各情有何證據該犯神色倉皇無可置喙其為虛捏無疑得旨看來此事係屬誣告但孔傳章因何如此誣告之故則應究明不可含糊尋奏據該犯供稱上年首告時原圖得賞嗣經地方官審虛未敢再控後因毆傷文水縣人李廷懼罪潛逃至京與素識之武有太武元宰張克功等商量令其代寫呈狀捏造虛詞希冀告准可以免罪是該犯平日本非安分之人又敢誣良妄控例應照律反坐但現值嚴拏逆黨之時遽將孔傳章按律擬罪恐愚民疑懼反致不敢出首請將該犯照先惡棍徒例改發烏魯木齊給兵丁為奴其訟師武有太等並請就近查拏治罪以儆刁頑下部議行○壬辰

上御勤政殿聽政○遣官祭黑龍潭

昭靈沛澤龍王之神玉泉山

惠濟慈佑龍王之神○刑部議覆浙江巡撫三寶奏稱竊盜連犯兩案情罪相同者既於一案內從重問擬斬絞具題又將該犯另案情罪於本案內聲明則另案不過虛擬罪名向來分案具題實屬因循舊例嗣後請照二罪俱發各等者從一科斷之律歸於一案具題另案咨部完結應如所請從之○癸巳

上命

皇十五子錫祺奏奠酒○諭曰畢沅奏陝西關中書院延請掌教一摺據稱訪察各屬院長向來多係上官同僚互相推薦遂至徇情延請有名無實現飭各屬務選端謹積學之人加意振作將所請院長姓名籍貫更換到館日期造冊詳報撫藩衙門察覈等語所辦好已於摺內批示書院為作育人材之地如果院長得人實心課導自可冀造就英才以收實效如江蘇紫陽書院之沈德潛彭啟

豐尚堪稱師儒之席。各省類此者。自不乏人。而如畢沅所稱上官同僚互相推薦。遂爾瞻徇情面。委曲延請。不問其人之是否文行兼優。而各院長等亦惟以脩脯為事。不以訓迪為心。甚有視為具文。講席久虛。並不上緊延師。以致師徒星散。有名無實者。所在諒皆不免。其事自當責成督撫。以期實濟。著傳諭各督撫。嗣後無論省城及各府州縣大小書院。務訪學行兼優者。俾主講席。其一切考覈稽

重刊書

十一

查之法。並照畢沅所奏辦理。著於各督撫奏事之便。傳諭知之。○又諭曰。李湖前在直隸道府任內。辦事頗屬認真。朕特加賞識。彼時直隸大員。如方觀承。周元理。於實力辦公之外。尚各兼辦差務。惟李湖在直。則專留心地方吏治。似不以辦差為急務。而其受朕鑒賞。轉在此也。是以加恩擢用。自應倍加奮勉。以副委任。乃自簡任滇撫以來。諸事遠遜於前。即如籌辦銅餉酌撥銅款等案。屢經戶部指

駁。其不能實心任事可知。雖節次傳旨申飭。念其尚屬因公。錯誤暫為姑容。今彰寶於保山縣王錫。取用什物等項。計銀至四萬餘兩之多。李湖同在滇省。豈竟漫無聞見。乃隱忍緘默。從無一字奏及。其心尚可問耶。各督撫在任。如有貪婪劣蹟。固不能掩兩司耳目。然朕亦不肯以此事責之兩司。若督撫同在一省。則彼此皆當互相稽察。今彰寶在滇。狼藉若此。李湖不據實劾奏。實難辭咎。吏部議以

重刊書

十一

革任。自屬分所應得。李湖著革任。帶布政使銜。自備資斧。前往四川軍營。會同鄂寶等辦理軍需奏銷事務。以觀後效。其雲南巡撫員缺。著李瀚補授。所遺江西布政使員缺。著楊魁調補。安徽布政使員缺。著李質穎補授。其巡視兩淮鹽政。著伊齡阿去。准關監督事務。著寅著管理。○戶部議覆。兩淮鹽政李質穎奏稱。江都。甘泉。二縣。食引滯銷。乾隆三十五年。奏准自庚寅綱起。於額銷數內。融出五分。

在於江西湖廣行銷迄今已閱四綱積鹽帶銷將及一半商本已得歸回其融綱之引賣給綱商復得富價該商等情願將引價銀兩自甲午綱起按年呈繳充公應如所請從之

實錄卷九百七十六

三

大清高宗法天隆運至誠先覺體元立極敷文奮武孝慈神聖純皇帝實錄卷之九百七十六

大清高宗法天隆運至誠先覺體元立極敷文奮武孝慈神聖純皇帝實錄卷之九百七十七

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文學士大學士文淵閣領閣事務稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆四十年乙未二月甲午遣官祭昭忠祠

○諭軍機大臣等李瀚已授為雲南巡撫其江西布政使員缺業將楊魁調補著傳諭楊魁令其速赴江西任事李瀚於楊魁到任後即速交代起程赴新任其安徽布政使印務著高晉委員暫行署理寅著已調管淮關著速赴淮安任事更換伊齡阿來京請訓再赴兩淮新任李質穎俟伊齡阿到任後即行來京請訓再赴新任○又諭各處設立驛站原為遞奏要事起見今申保接奉往噶什喀爾

更換福森布諭旨。謝恩奏摺。有何緊要。亦由驛遞具奏。殊屬不曉事體。申保著傳旨申飭。並通諭新疆駐劄將軍大臣等知之。○吏部議准。山東巡撫楊景素奏稱。東昌府屬之冠縣。於乾隆七年。定為簡缺。查該縣地廣人稠。民刁俗悍。兼與直隸。河南等省接壤。政務繁劇。請改銜繁難。三項相兼要缺。在外揀員調補。從之。○乙未。

上詣暢春園。問。

皇太后安。○諭。朕於三月初四日。啟鑾前往湯山。即由彼處幸盤山。所有應行豫備之處。著各該處豫備辦理。○諭軍機大臣等。富德自到緘布以來。為日已久。乃每次奏稱殺賊。而仍然株守。其所奏痛殲賊衆。特不過虛張粉飾之詞。敷衍塞責。於軍事全然無益。而阿桂調兵。又不肯如數發往。是誠何心。富德。乃獲重罪之人。朕曲加寬宥。復畀以叅贊大臣重任。伊自當感激朕恩。協力同心。不存私意。以

冀成功。乃祇為一身之計。殊屬不堪。富德著傳旨嚴行申飭。○定西將軍尚書阿桂。定邊右副將軍尚書公豐昇額。叅贊大臣領侍衛內大臣色布騰巴勒珠爾。都統海蘭察。副都統額森特。奏官兵於二月初七日。分路進攻勒吉爾博山梁。及羣尼擦庸各碉寨。拋擲火彈。並用木梯。直撲碉頂。賊番施放鎗礮。竭力抵禦。我兵暫撤。賊復逸出數百人。分路來攻。喇穆喇穆等營卡。均被官兵擊敗。殲斃甚衆。

諭軍機大臣等。阿桂等奏。分攻勒吉爾博等處碉寨。並痛殲喇穆喇穆偷刼營卡賊番情形。將領官兵等。可謂實力奮勉。再能如此認真攻勦。數次。賊番殲戮愈多。賊衆必惶懼難支。敗亡尤速。閱所擒活口供詞。賊中火藥無多。糧食亦乏。並選婦人穿男衣。假充兵數。其窘迫可知。即所云對衆人言。圖刼官兵後路營盤。搶些口糧火藥之語。亦非捏飾。並述其土司言。官兵一到勒烏圍。我們祇好走到噶

喇依官寨。自己放火燒死。這官寨就是我們墳墓等語。固屬激勵番衆之詞。而其窮蹙恐怖之情。亦可概見。賊番狡詭。惟以遮截後路為長技。今護軍校德克精額。都司馬定鼎。遊擊明安圖。副將豐盛。阿。遊擊巴達瑪圖等各營卡。均有賊衆潛來滋擾。經官兵盡力勦殺。不但不能得手。且大喫虧。其伎倆已無可施。愈覺勢窮計竭。攻取尤為易易。更宜及早圖之。此五人均應獎賞。至聞逆酋索諾木。湊集

番衆。親帶至拉枯喇嘛寺等處。以希圖僥倖於萬一。固屬可恨。但索諾木此時。同其助惡頭人丹巴沃咱爾等。前至勒烏圍一路。即充其力量。亦何能為。自係逆酋等罪惡貫盈。上天隱奪其魄。驅攝聚於一處。以供官兵擒縛。其來實係極好機會。阿桂等即當設法掩捕。將逆酋及其兄弟頭人。一併俘獲。則成事尤為迅速。全完就各路情形而論。惟阿桂一路。專為可恃。朕亦惟於阿桂是賴。阿桂務當努

力籌辦。速成大功。以膺懋賞。同日據富德奏到之摺。不過敷衍塞責。斷不能復有寸進。徒擁一萬三千餘兵。在彼實屬無益。竟當照阿桂原奏。令其即於一萬三千兵內。抽撥健兵六千。速派領隊人員。帶往明亮軍營應用。明亮俟兵一到。即將帶石一路。交舒常駐守。並於奎林和隆武三保內。酌派一人。同其統兵防守。以綴賊勢。明亮統領南路撥到之六千兵。并於帶石現有兵內。酌選數千。帶同端赴

宜喜一路。速圖進取。自可望其得力。若慮官兵撥去六千。南路未免空虛。賊首窘迫之時。或從此軼出。果爾。亦不過逃往革布什咱。及綽斯甲布等處。現在綽斯甲布土司雍中旺爾結等。隨營効順。方冀成功受賞。設索諾木等果竄其境。自必立時擒獻。斷不敢藏匿逆酋。自干重戾。至革布什咱土司。經金川殘害之餘。勢已孱弱。即或逆酋遁至彼處。該土司亦必不敢容留。萬一逆酋等強行占據其地。

無險可憑。官兵合力追擒。無難立時縛繫。此等情節。俱無可虞。仍著傳諭阿桂。即速悉心熟籌。一面札催富德辦理。一面奏聞。○戶部議覆署貴州巡撫布政使韋謙恒奏稱武職都司以上。均有經管兵馬錢糧。及一應公糧賞項。向例祇造冊申報。並未定交代限期。亦無咨部之例。未足以昭慎重。嗣後請照文員交代例。勒限取結。以憑考覈。應如所請。從之。

○以熱河總管福海為杭州織造兼管北新關事務。○丙申。諭前經降旨。令已延三將山東咨掣劉煥公文。因何遲延破損之處。查明覆奏。今據奏到。查看封袋背面有直縫一條。並註明長平驛破字樣。業經飛提長平驛夫等。嚴訊有無拆看情弊等語。已延三何不解事。若此。此件咨文。如係長平驛拆破。豈肯自行填註。以取罪戾。顯係長平以下之站。私自拆破。委咎於上站之長平。自無疑義。著傳諭已

延三。從此詳細根究。不應於長平驛夫等是問。至檢閱封袋正面直縫一條。竟係割破。並非擦損。偷看情弊。又屬顯然。事關緝犯緊要公文。豈容奸徒中途私拆。尤不可不嚴切查究。著已延三悉心嚴訊。務得實情。毋得任其推委狡卸。將此傳諭知之。仍令即行回奏。○諭軍機大臣等。南路調兵一事。昨已詳晰飭諭富德。並令阿桂一面妥酌辦理。一面奏聞矣。阿桂請調南路兵六千之摺。於二月初一

日奏到。隨即傳諭富德遵辦。乃於二月十四日據富德奏。南路祇能抽兵三千名。若令其自行帶往。止須兵二千。已隱然有不願抽撥之意。同日復據奏。攻碉殺賊情形。尚冀其或可由馬爾邦采入。若竟能得手。原不必拘定何路。因諭令再行酌量。如自度能從馬爾邦直進。即三千兵亦不必撥。否則速行如數撥往。宜喜應用。計此數次奏摺。與諭旨往來。輟轉。已一月矣。行軍勢懸呼吸。豈容如此羈延。

計富德初接阿桂調兵之札。不過在正月二十以外。彼時即不能照依所調全數撥往。亦應一面迅速具奏。一面抽兵三千。即行發往。若果如此。則是以國事為重。不存畛域。朕必嘉許之。乃富德不但。不即奏辦。且於三千二千雙請之時。似欲候朕批答。再行照辦。似此延誤匝月。富德已咎無可辭矣。叅贊大臣遇應辦軍務。原不妨與將軍彼此商酌。若叅贊有觀望誤公之處。將軍亦應隨時劾奏。乃阿

桂奏。止言富德混撥兵數之非。而於此一節。轉不查叅。實屬非是。著傳諭阿桂。將富德不即發兵前後遲誤緣由。迅速查明。據實叅奏。現在各路進攻。實惟阿桂一路。最為可恃。且阿桂所攻之西路。硯非不多。路非不險。而阿桂節節仰攻。層層越險。所至克捷。今距噶爾丹廟。及勒烏圍。不過七八里。實非明亮富德等所能及。伊等返衷自思。亦當各知愧惡。設使阿桂此時頓兵不前。并羅博瓦。格魯瓦。覺

尚未能過。亦如富德之阻於庚額特而不進。朕必治阿桂之罪。功過具在。難掩衆人耳目。並非朕偏向阿桂。過於獎譽之也。朕此時所盼。實惟阿桂一路。統兵速進。擣穴擒渠。著傳諭阿桂。即速妥籌進剿。迅成大功。以膺懋賞。○吏部議奏。原任湖南按察使農起。於全與伯誣告全叔士。踢死伊母一案。錯擬絞罪。請照失入例。降二級調用。得旨。向遇吏部議處。司道等降調之案。俱量予從寬。留任者多。此

案全與伯誣告全叔士。踢傷伊母身死。該縣率驗屬實。錯擬絞罪。由州申解。該司農起。並不詳加確勘。率行轉申。若非全叔士翻供。經撫臣駁飭。全與伯自行投首。則幾成冤獄。人命重情。失入較失出尤重。臬司為刑名專責。錯誤若此。咎無可辭。農起。即著照部議。降二級調用。以示懲儆。且使凡為臬司者。聞之咸知詳慎自凜。克副明刑。○蠲緩甘肅靜寧鎮番。二州縣。乾隆三十九年。水旱風雹災田額

賦並給籽糧如例。○旌表賊逼捐軀之山東臨清州監生胡師忭同妻劉氏給銀建坊入祀忠義祠。○丁酉諭據派出驗看本年會試舉人騎射王大臣等奏稱應行考試者一百二十五人內報近視眼者七十三人已揀令二十人照常騎射外其餘實屬不能之五十人俱未令其騎射等語馬步騎射係旗人根本即讀書人亦不可不學今考試者一百二十餘人內報近視眼者竟有七十餘人之多明係捏報希圖規避滿洲習氣竟至若此實堪憤恨若以近視眼不能騎射哈達哈即係近視眼此衆人之所共知伊何以隨朕畋獵打牲乎此輩因不能騎射遂藉口以圖僥倖甚屬不堪滿洲臣僕甚衆豈必賴此數人況此等無用人內亦斷不能得人所有不能騎射之五十三人俱著停其考試豐訥亨等並未奏及惟請嗣後交該旗大臣詳查報部派出大臣驗明後方准免其騎射所奏殊屬

姑息嗣後考試人內若有似此不能騎射者俱著停其考試著為例再此輩明係捏報該旗大臣等所司何事因何出結送部著軍機大臣查明奏聞○又諭曰邱日榮於朕面詢時將曾奉申飭之事不據實奏出部議降一級調用固屬應得處分但科道於召對時問及條奏如係准行或僅由部駁者尚多陳述若遇有申飭及議處之事多隱而不言所謂揜其不善而著其善比比而是亦不獨邱日榮一人邱日榮特因諭查原案遂爾底裏畢露耳邱日榮著加恩改為降二級從寬留任○又諭前據戶部代表郎中楊嗣曾呈請仍從伊父所嗣徐姓為後曾降旨令薩載確查徐姓有無應繼宗支今據薩載覆奏故監徐沂實無嫡派近支亦無產業等語是楊嗣曾所請仍嗣徐姓之處尚有良心著准其改嗣徐姓為後該部知道○諭軍機大臣等前因阿桂等奏請於隣近川省之陝甘貴州三省

挑兵六千名應用。雖經降旨允行。繼思阿桂所稱。現調之兵。仍係各省咨回空缺。未必能募補足數。至舊兵傷病回營者。亦未必即能就痊充用。今據富勒渾奏請。於各省挑兵五六千名。迅往川省軍營應用。其言未當於理。固不足信。但前日阿桂既請調兵。今富勒渾復有此奏。或各該省。果有堪調之兵。即料理發往。亦無不可。著傳諭勒爾謹。單沅。韋謙恒等。務令就該省實情。迅速熟籌。如尚有可撥

之兵。趕緊選派起程。仍咨阿桂聽其派赴何路備用。○四川總督富勒渾奏。二月初六日夜。賊番數百人。來撲格魯瓦覺糧臺。官兵奮擊。奔竄。臣查後路一帶。山徑延長。處處與賊毗連。應請酌調官兵數千。分布駐守。諭軍機大臣等。富勒渾所奏。殊不可解。昨歲阿桂自谷噶一路進攻。業將各後路應行防守之兵。分撥周妥。且阿桂屢次克捷。深入賊境。止須扼要堵禦。向者所慮賊匪潛軼分歧之路。自

應漸減於前。何轉欲添兵分守。況現在功屆垂成。復於後路添調防兵。殊非情理。若因初六夜。賊番數百。潛撲格魯瓦覺糧臺。遂籌及加添兵力。尤為可笑。賊番偷刳臺卡。乃其長技。各路軍營皆有之。今勢當窮蹙。不過為鋌而走險之計。亦類於窮獸反噬。更無足怪。昨阿桂一路。即有五處同時滋擾。俱經官兵勦擊殲斃。今格魯瓦覺之賊。復經官兵奮擊。生擒其二。殺傷者亦多。賊衆自益計窮膽落。富

勒渾。惟當嚴密防守。勿稍疎懈。若因此遽議添兵。幾成風聲鶴唳。不且為賊番所竊笑乎。富勒渾。本係拘謹之人。未諳軍旅。此等調兵奏牘。宜竟未商之阿桂耶。前日阿桂請調兵六千。係備宜喜進攻之用。今富勒渾復請調兵五千。分布後路。又在阿桂所調六千之外。各省安得如許兵丁。供川省調派乎。設使後路果欲添兵。昨歲即當籌議。不應遲至大功將成之際。復計及此。總覺不成事體。著傳諭

阿桂。即速查明富勒渾因何忽有此奏。并查後路有無另須抽減增併之處。悉心熟籌。妥辦具奏。○戊戌春分朝。

日於東郊。遣信郡王修齡行禮。○諭。朕偶閱宋范鎮東齋記事。內載成都府學有周公禮殿。及孔子像。其上壁畫三皇五帝及三代以來君臣。即晉王右軍與蜀守帖所求三皇五帝畫像一則。其制相傳始自秦漢。至北宋閱一千五百餘年。歷久尚存。范鎮此書。作於宋元

豐中。至今不過六百餘年。不應跡竟湮沒。著遇便傳諭文綬。令其就近查訪。如該處畫壁現存。即照樣摹繪呈覽。如或舊跡難稽。亦即據實覆奏。尋奏。周公禮殿遺址。據志書昉於西漢。東漢時蜀守高朕有禮殿。記刻柱上。壁畫三皇五帝。三代聖賢。及兩漢君臣像。歷宋元尚存。明末學宮燬於火。范鎮所記石室碑柱。無考。報聞。○吏部議覆。署江西巡撫布政使李瀚奏。稱。教職俸滿保題。與佐雜事同一

例。各省佐雜。均俟部覆到日。始行給咨送部。獨教職人員。一面保題。一面給咨。辦理似未畫一。嗣後請照佐雜人員例。俟部覆到後。給咨。應如所請。從之。○己亥。

上詣暢春園。問。

皇太后安。○還宮。署馬蘭鎮總兵滿斗奏。馬蘭峪新城。舊設漢學二所。教習八旗子弟。今查官學內。並無學習上進之人。教習等亦皆年老。不堪表率。未免有名無實。請改設滿學

三所。於章京驍騎校。領催人等內。挑選通曉滿漢文。熟習清語。兼能騎射之教習三名。就近分設管理。每名按月支給薪水紙筆銀三兩。課以成效。俾知勸勉。得旨。好如所議行。以雲南騰越協副將劉國樑。為陝西延綏鎮總兵。○豁四川奉節縣地方沉溺雲南委員孫枝桂運銅六萬八千觔。○庚子。諭。據直隸總督周元理奏。稱。拏獲紅陽邪教人李瑚。訊供係奉天正白旗莊頭所屬夫役。隨武清縣

民張樊山入教等語。盛京乃根本之地。何得亦有邪匪。該處聚集民人甚多。著傳諭將軍弘昫務須留心密訪。如果有邪匪。即行拏獲。從重治罪。毋得姑容。○辦理糧餉三等侍衛桂林奏。二月十三日。接富德札稱。南路抽兵三千名。交興兆帶領。前赴宜喜。軍行必須糧隨。查自絨布啟行。往章谷之格藏橋等處。以達吉地。丹東均有糧站。應令按站支領。以免長途攜帶。不礙進行。諭軍機大臣等。桂林奏

沿途備給軍糧。所辦甚好。此項抽撥之三千兵。想已自絨布起行。又據文綬奏。川省存營兵三千。亦已如數挑足。並據畢沅奏。西安挑兵二千。現已足數起程。看來甘肅、貴州兩省之兵。諒已挑派發往。通計添兵。又有九千。阿桂惟當妥速籌辦。以副廑念。至明亮等一路。既有南路兵三千。再添川兵三千。合之宜喜。日旁原有兵內。抽撥數千。得兵約可滿萬。如阿桂前日所籌。繞越截攻之計。自非難事。明

亮等惟當竭力速辦。剋日集勲。○辛丑吏部議准。宗人府奏稱。左右兩翼宗學管長等五年期滿。均准題陞本衙門主事。但數年來並未題補一人。且正副管長亦不分別陞用。請嗣後副管長先由閒散宗室挑補。由副挑正。遇主事缺出。先將應陞筆帖式。陞用三人。再將正管長保題一人。其正管長係由官員題補者。酌量議敘。給予紀錄一次。以昭平允。從之。○旌表守正被戕之湖北鄖陽縣民許正

坤妻王氏。○壬寅祭

歷代帝王廟。

上親詣行禮。○詣暢春園。問

皇太后安。○辛圓明園。○諭軍機大臣等。前因將楊魁調任江西布政使。已降旨交高晉傳諭楊魁。令其速赴新任。俾李瀚交代後。即可星赴滇撫之任。今據楊魁奏請陞見。已批諭准其來京。但恐其接到批摺。或因與前旨未符。稍有遲疑。著再傳諭楊魁。令其仍先速赴

江西新任俟辦理一兩月稍有端緒後再行起程來京陛見○癸卯

令懿皇貴妃行大祭禮

上命

皇十五子○奠酒○遣官祭賢良祠○甲辰

孝昭仁皇后忌辰遣官祭

景陵

上詣

雍和宮行禮駐蹕○乙巳

上至靜安莊

令懿皇貴妃殯宮奠酒○幸圓明園○諭軍機

大臣曰據富德究出假詐細作賊番訊供奏

聞所辦甚好各路投出番人頗多惟阿桂前

日盤獲奸細一名今富德又盤獲二名此等

賊番蹤跡詭秘甚難辨別富德於降番到營

察其詞色可疑即詳悉根究果得實情甚屬

可嘉富德著賞給小荷包四枚以示優獎至

前此因富德不即撥兵前往宜喜曾傳旨申飭今據奏已抽兵三千派員帶領陸續起程是南路之兵已經抽撥三千富德於此事尚無過誤至南路抽撥兵三千計可漸次到明亮處其丹東吉地章谷等處亦得兵七百五十餘名若將所派川兵三千一併調往約可得兵七千再將帶石等處之兵抽選數千帶往幾可滿萬宜尚不能由宜喜進攻明亮自應及早籌畫令舒常統兵留駐帶石親身遙

往宜喜速圖進取又閱僧格等供詞稱逆首等遣令來營密囑觀看虛實及堆放米糧鉛彈之處以備偷刦放火其情已屬可惡並稱逆首囑以若將汝交給巴旺布拉克底即向土司土婦處叩頭并令向土婦說我兩家原是親戚因何隨天朝大人各處散給字帖將我百姓擾亂此時若不回顧我們將來大兵撤去便來勒滅等語其意竟欲恐嚇巴旺布拉克底之人暗懷疑慮不肯認真出力賊計

險毒實堪切齒。幸而早經破露。未能隱售其奸。否則大有關係。可見金川賊衆。必當速滅。斷不可稍存姑息。將軍叅贊等。宜共知此意。努力速辦。所有盤獲之僧格。舍邦。二名。現無可質訊之處。著富德。將二犯即在營外凌遲處死示衆。令賊知奸細被獲正法。以破其膽。又訊供有派撒爾里寨番人一名。得木通普魯。一名實格里讓綢。又派布拉克底寨番人一名。扎木則普魯。一名格什古木爾甲。現在欲往西路北路。探聽事情等語。阿桂一路。如果奸細前往。自能立時盤獲。惟明亮舒常處。從未曾盤獲一人。總由素未閱歷。不能察見奸究。恐果有奸細往彼。明亮等為其所愚。關係非小。此等奸細到營投降。其誠偽情節。在微芒之間。然與其過信。無寧過疑。若見有形蹤可疑者。細詰不吐實情。即當加以刑訊。設或慮降番聞而畏阻。亦屬無妨。大兵既已逼近賊巢。即日掃穴擒渠。所有逆黨諸番。更

不慮其他竄。又何必爭一時之急於降附乎。著傳諭明亮舒常。加倍留心盤詰。毋稍疎忽。○禮部等部議覆。著江西巡撫布政使李瀚奏稱。欽天監所頒時憲書。按省次序。如盛京所屬地方。及各蒙古扎薩克。併平定之準部。回部等處。均分別刊載。今江南已分為江蘇安徽湖廣。已分為湖北湖南陝西。已分為甘肅。其太陽出入晝夜節氣時刻。恐各省不同。請照盛京所屬。尼布楚城等處之例。各按分隸省城之地圖。北極高度定緯。及地之經度所列。於時憲書內。添註省名。分晰開載。以歸畫一。應如所請。從之。○旌表守正被戕之廣西全州民唐汝孟妻吳氏。○丙午。諭明亮等奏。據緯斯甲布土司雍中旺爾結稟稱。前歲仰蒙恩典。賞令承襲土職。尚未換給印信。號紙。懇求恩賞。查該土司承襲伊父土職。現在軍營助勦。促浸甚為出力。請旨加恩賞給等語。著照所請。交該部即鑄宣撫司印信。并頒

賞號紙一併由驛發給以示獎勵。○禮部尚書管國子監事蔡新奏請補裁大成門外回乾樹株。諭交總管內務府大臣補栽。嗣後壇廟等處遇有回乾樹株俱著各該管衙門具奏。交內務府辦理。○豁湖北歸州大冶地方沉溺貴州委員張鳳枝運鉛九萬七千觔。○丁未。

上詣暢春園問

皇太后安。○還宮。○以故四川建昌道屬河西

土百戶喳拉保姪衣祖襲職。○旌表守正捐軀之四川鄧都縣民蘇巨清妻龐氏。○是月河東河道總督姚立德奏東省今春雨雪深透湖水鋪足南自韓莊北至臨清各開塘水均有六尺以上。現今層層下板以資攔蓄。並飭加河廳開放湖口開壩俾微山湖水由韓莊開下達江南邳汛資其浮送得旨好。比舊年此際水勢如何。尋奏去歲開放南旺大壩時汶水未旺至二月底始能南北鋪勻。今春

開壩後半月內各開塘均已鋪足。各湖蓄水尺寸亦較上年多二三寸至尺餘不等。淮輸實為充盈。報聞。○署四川總督湖廣總督文綬奏嚴查保甲密訪邪教各事宜。一交界地方飭各州縣分月輪查親身稽察不致彼此推諉。匪徒自難託足。一囑匪入境奸民倡教除地方官自行密拏外應明立勸懲責成保甲舉首。一流寓客民蹤跡靡常應於一甲之內專設客長一人給循環簿令將姓名籍貫逐一登記按季繳官查覈以補保甲所不及。一戶口遷移向例換給門牌地方官於每年農隙時清查一次恐有遺漏舛錯亦應設立循環二簿交保長隨時登記地方官按季抽查再於因公下鄉時留心稽覈庶無混雜得旨實力行之。然此非川省目下急務。○辦理糧餉浙江布政使郝碩奏內地州縣向來解送口外各站里夫均係按糧照派每站數百名及千名不等。但州縣派夫時有里夫不願

出口。私行雇替。或押差夫頭於本地起解時。聽其存留。沿途冒支空夫口糧。一到本站。託詞在途逃走。或臨期雇募客夫。冒名充點。解到時不能如數。現飭各州縣。嗣後起解人夫。查明實在里夫。始准派撥。並責成押差夫頭。管解出口。沿途各站支領口糧。亦須按冊點名。倘到本站點收時。人夫逃散。至二成以上者。將該押差夫頭枷示。所有沿途支過口糧。並著落本籍州縣官。照數賠補。得旨。是。知道了。○湖北巡撫陳輝祖奏。湖北武昌等六衛屯田被旱成災。新漕長運。無力幫濟。請於三十八年分。徵解添辦漕船大修銀兩內。撥給銀五千九百四十兩。以濟本年長運。下部議行。

大清高宗法天隆運至誠先覺體元立極敷文奮武孝慈神聖純皇帝實錄卷之九百七十七

大清高宗法天隆運至誠先覺體元立極敷文奮武孝慈神聖純皇帝實錄卷之九百七十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事務稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德齡經筵講官太子少保工部尚書紀錄六次臣曹振鏞等奉

敕修

乾隆四十年乙未三月戊申朔諭軍機大臣

等據巴延三奏。私拆山東省咨。拏劉煥公文一案。究係該省武鄉縣南關驛。號書巨如琮拆看。並提訊馬夫杜奎。供亦相符等語。此案前據該撫查奏。朕覈其情節。必係長平以下之站。私自拆看。諉過於長平。今據查訊。果不出朕洞照所訊。巨如琮供稱。裂口原係裱紙接縫。細閱前所送原破印封。其破處實係割開。並非接縫磨損。形跡顯然。朕親看出。巴延三前此接收封套時。竟全未寓目。任該犯如

此狡供。有是理乎。況現在川省軍營往來公文。并有六百里加緊者。俱係經由晉省。從未聞有損破偷看之事。何此件緝犯公文。獨有裂口。必係巨如琮與劉煥等熟識。是以偷看公文。豫行送信。令其藏匿。著傳諭巴延三。即將巨如琮杜奎。迅速派委妥幹員役。押解來京。交軍機大臣會同刑部。另行嚴審具奏。並飭解員沿途小心管解。如有疎脫。惟該撫是問。至劉煥等蹤跡。山西省固當切實根究。但各犯既聞巨如琮漏洩查拏之信。諒不敢仍在晉省逗留。自必潛竄隣近之直隸河南境內。匿跡稽誅。或仍回山東本籍。隱為藏躲。均未可定。著傳諭周元理。徐績。楊景素。派委明幹員弁一體留心訪緝。毋任逆匪遠颺漏網。將此由五百里一併諭令知之。仍各將查辦緣由。迅速覆奏。○八旗都統等議覆工部侍郎署副都統德成奏稱。近日八旗操演。閱看大臣。往往因公不到。祇派章京代看。未足以

昭懋勸嗣後閱射請改辰刻於午刻俾在內當差各大臣皆得親到無所推諉等語查驍騎營官員每日俱須進署辦事若將閱射改至午刻恐轉貽誤公務應毋庸改至每逢操演日期都統副都統內必令一人前往責成查旗御史臨時稽察如有託故不到者即行叅奏從之○鑄給哈密協標中軍都司關防從哈密辦事大臣明琦請也○已酉

上御乾清門聽政○幸圓明園○禮部議覆御

史孟邵奏請禁鄉會試撥房分中以杜通融囑薦情弊查撥房之例原因分校各房闡卷優劣不同若因限於房數稍存遷就轉致屈抑佳文是以准就中卷內通融分撥且由主考官酌分並不假手房考何至有越俎囑薦等弊應照舊遵行至所奏入闈經頭人等歷年承辦明比為奸請嗣後仍令地方官選送謄錄書手正身入場分派受卷彌封謄錄對讀四所每十名內選取總書一名責令稽查經

頭人等不准混入以杜藉端包攬應如所請從之○庚戌諭據敬善叅奏前任蒲州協副將郝開甲於護理太原鎮總兵任內將巡撫賞項公糧三百六十五兩私行濫用並將地租銀八十四兩有零私事開銷等語郝開甲已陞授雲南永順鎮總兵著革職解京交與刑部審明定擬具奏○又諭山東臨清協副將烏大經著該部行文調取來京引見○辛亥

上詣暢春園問

皇太后安○自圓明園啟鑾幸盤山○諭上年直隸天津河間等府各屬倉穀因賑動用者例應買補但恐一時官買過多致市間糧價稍昂於民食未免有礙著加恩截留豫東三省漕米十萬石暫貯北倉交該督周元理酌量領運撥補俾民間多留蓋藏以示優惠該部即遵諭行○又諭上年順天河間天津等屬偶被偏災其勘明成災之霸州文安大城

寧河天津青縣靜海滄州南皮鹽山慶雲獻縣交河東光武強武邑十六州縣及毗連災地之景州河間肅寧阜城四州縣所有乾隆三十九年分應徵錢糧已照例緩至今年麥熟後開徵今歲春雪優霑二麥自可望豐稔但昨秋歉收之地雖有麥熟接濟未必能俯仰裕如即毗連災地之區亦當使之稍有寬餘以備貧家緩急著加恩將此二十州縣無論成災及毗連災地應徵上年錢糧概緩至

本年秋成後徵收俾得從容完納閭閻生計益紓以副朕惠愛畿民至意該部即遵諭行○又諭昨據敬善奏總兵郝開甲前於護山西太原鎮任內濫用賞項公糧及冒銷地租銀兩已降旨將郝開甲革職解京交刑部審訊矣外省後任接代每於前任之事曲為瞻徇不肯舉發者多今敬善於郝開甲護總兵任內侵用公項之事一經查出即具摺參奏尚屬公正可嘉敬善著交部議叙朕辦理

庶務一秉至公賞罰惟聽人之自取若後任於前任有意苛求挾嫌叅劾斷難逃朕洞鑒必重治其罪似此據實劾叅不徇情面其長亦不可沒將此一併通諭知之○諭軍機大臣等據文綬奏郭羅克賊番搶劫青海蒙古牲畜一案飭委松茂道查禮等前往查辦據該土司擒獻賊番扎舍特六惹二名並繳賊畜五百四匹經查禮等隔別研訊該二犯俱不承認供係納福旦為首糾眾前往後來不知逃往何處查禮等復嚴飭該土司將納福旦并夥犯概行縛獻詎該土司延挨累月若不加兵威嚴行懲創實不足以彰國憲而儆兇頑等語文綬所奏亦是但此時征勦促浸成功在邇自不值因此復分兵力若派兵太少又恐無益於事而以此與促浸相權輕重此事又不妨畧緩著傳諭阿桂俟大功告竣即於勝兵內選派滿漢兵五六千名令明亮富德統領仍帶查禮前往郭羅克地方勒

拏納福旦并其餘夥犯務必全數擒獲。明亮等到彼時如郭羅克土司先來迎謁。明亮等即應相機設法將該土司扣留勒令差人擒送納福旦并全案夥犯到營。即將該土司釋放回巢如仍延挨不即擒送或僅拏餘犯塞責即將該土司解送內地奏聞辦理。若該土司竟敢潛匿不出或稍露抗拒形跡明亮富德即領兵將郭羅克勒平速行擒獲要犯並該土司一併治罪以除後患。郭羅克之事阿

桂前署川督時曾經辦及其詳細皆所深知。阿桂務須妥協辦理其事既交阿桂籌辦此時文綬且不必輕露端倪致為賊番窺伺查禮亦著仍回西路辦理糧務毋庸在彼久羈將此并諭文綬知之。○以圓明園副將銜參將閻正祥為雲南永順鎮總兵。○是日駐蹕湯山行宮。○壬子諭曰閻正祥昨已有旨補授雲南永順鎮總兵今來行在謝恩詢知伊母年逾八旬難以迎養閻正祥著以陞銜留

伊原任仍戴花翎其雲南永順鎮總兵員缺著阿桂於軍營出力副將內揀選奏聞陞補現在該鎮印務並著圖思德揀選副將一員奏明委署。○是日駐蹕三家店行宮。○癸丑清明節遣官祭

永陵

福陵

昭陵

昭西陵

孝陵

孝東陵

景陵

泰陵。○遣官祭

孝賢皇后陵

端慧皇太子園寢。○諭軍機大臣等明亮等奏進攻喀爾西科拉木達一摺雖亦殲賊十餘究未得有寸進看來此一帶進攻徒勞無益不如徑赴宜喜為是通計所調之兵及帶

石挑用數千。合之宜喜原有之兵可得萬餘。兵數已不為少。就圖中形勢而論。若從達爾圖山梁下壓。可得斯達愛卡寨。並可旁攻特朗賊碉。即至噶爾丹寺對河。與阿桂夾攻。似覺直捷。其帶石一路。仍留舒常在彼。並於奎林。和隆武。三保三人內酌派一人。同駐防守。牽綴賊勢。至於宜喜進兵。雖亦可備出奇制勝。但究如治病偏方。不能專恃。其實在可望進攻得手。仍仗阿桂一路。所有現調之陝甘貴州官兵。據各該督撫奏稱。均係揀派精銳可用者。令其遄程赴川。此六千新兵。諭令全數前往阿桂軍營應用。阿桂接奉前旨。自應飛飭各省帶兵之員。遵照迅速。營中添此六千新銳之兵。即可多添一兩路進攻。自更易於集事。但阿桂現在仍須隨時設法進取。不可俟新兵到齊再辦。又據明亮奏稱。投出金川番衆。有可隨征出力者。即留營差遣等語。所辦甚謬。此等賊番。狡詐巨測。留之營中。實

無益而有損。若欲藉其留營號召番衆。更可不。必。昨歲賊番勢整。或須設法以潰散其心。今既紛紛投出。何藉復為號召。即或觀望不來。我兵攻破賊巢之後。無難悉行擒戮。更無庸豫為招致。如以此輩悔罪來投。姑貸其死。亦祇應交綽斯甲布等土司處安插。不宜留在營中。況阿桂富德兩路來投之番。俱經盤獲奸細。惟明亮一路。獨無安知。現在所留番人。不即有奸細在內。萬一勾連滋事。所關非小。現在功屆垂成。尤當詳慎。此皆明亮舒常未曾閱歷所致。朕深為懸念。況據富德處盤獲奸番僧格等。供土司派人分往西路北路探聽事情。曾諭令明亮等留心體察。切勿為其所惑。誤墮賊人術中。著諭明亮等。將所有留營降番。除霍爾甲阿咱拉二人外。餘悉分派各土司安插。勿令存留貽患。如有續行投降形跡。稍可疑者。即當嚴加刑訊。務得確情。毋使賊番逞其鬼蜮伎倆。至各路軍營。或亦

有似明亮處將降番留營隨征者並著分遣各土司處妥為安插○以禮部左侍郎李宗文為會試知貢舉兵部尚書嵇璜為正考官刑部右侍郎王杰左副都御史阿肅為副考官○是日駐蹕大新莊行宮○甲寅諭軍機大臣等前歲發往廣東之厄魯特巴雅爾迄今已隔年餘未知其人是否尚存在彼是否安靜著傳諭李侍堯查明附便覆奏尋奏巴雅爾自乾隆三十八年遞解來粵即交左司

協領等嚴為約束平時但誦蒙古佛經不敢擅自出外尚屬安靜守法報聞○山東巡撫楊景素疏報膠州鼇山衛報墾旱田一項二畝有奇○是日駐蹕盤山行宮至庚申皆如之○乙卯諭軍機大臣等三寶奏訪獲無為邪教之蔡立賢魯聖先等一摺已批交該部覈議具奏矣摺內據稱蔡立賢魯聖先二犯俱向在松陽遂昌傭工耕種嗣因魯聖先在仙巖寺充當廟祝於乾隆十一年有福建上

杭縣故民鄭統遷至遂昌自稱係已故無為教首張普天即張玉桂之徒勸人持齋念佛可以祈福消灾每年正月二十九二月二十八八月初四十二月初一日凡同教之人各出銀六分在鄭統家擺設蔬果并空椅一把指為無為教主羅祖懸掛天地君親師畫像祭獻誦經於乾隆十六七年間誘令蔡立賢魯聖先等入教嗣該二犯復行陸續收徒希圖騙積錢文等語邪教傳播惑眾最為風俗

人心之害不可不盡力根求鄭統既由福建至浙傳教所稱教首張普天即張玉桂又係閩人是閩省邪教流傳已非一日鄭統未到浙省以前必有在閩傳授徒眾之事而張玉桂既係無為教首亦斷無止傳鄭統一人不及他人之理均當徹底嚴查著傳諭鐘音等即派委妥幹之員在閩省各屬嚴密察訪張玉桂傳教蹤跡並飭於鄭統原籍之上杭一帶詳細確查有無邪教支派妥速嚴辦毋使

餘黨蔓延漏網亦不得稍涉張皇滋擾仍即據實覆奏將此由四百里傳諭知之○又諭據富勒渾奏據建昌道白瀛稟稱聞得日旁軍營明將軍處訊得賊番供稱促浸因硝磺缺乏差出奸民五人潛赴內地採辦明將軍差遣外委帶兵查拏等語此事何以未據明亮等奏及是否如白瀛所訪情節著明亮等即速覆奏至促浸賊衆硝磺缺乏恐其探聽軍營存貯火藥處潛出偷竊不可不實力嚴防至內地出產硝磺之地不許民間私售例禁茶嚴況現當進剿賊番之時尤宜嚴密查禁自不應更有偷竊情弊但賊番詭詐百出其所遣奸民五人或如張坤忠一類由內地逃往及被羈兵民皆不可知倘或潛赴硝磺處所勾通經管兵役私行偷售大有關係今既有所聞寧信其有富勒渾等自應加意防範至該督等行文以後曾否查看奸民蹤跡現在該處硝磺作何辦理著富勒渾文綬即

行覆奏至各軍營後路所貯火藥甚關緊要務各實力防守勿稍疎懈並諭富勒渾文綬及管理糧站之鄂寶郝碩顏希深李世傑桂林劉秉恬李本一併知之○丙辰諭禮部奏前日議覆御史孟邵條奏一摺未將臨場不准條奏料場事宜之例查出請將從前遺漏未載條例之堂司官及此次未能查例呈明之司員並違例條奏之御史交部分別察議等語禮部既奉有料場事宜諭旨自應刊入條例遵行前既遺漏未刊今又疎忽不能查出均難辭咎所有禮部應議之堂司各官俱著交部分別察議至御史孟邵未能諳悉舊例情尚可原且其陳奏二條已議覆准行一款所言尚非無當著從寬免其交部○諭軍機大臣等上年秋間外河廳屬老壩口漫工該督等上緊堵築於兩旬之內即行合龍辦理頗為迅速但恐過於趨辦工程或未堅實不知合龍以後曾經加餞厚培以資鞏固否

又聞該處尚有二壩三壩亦關緊要未識現在工段若何是否足資捍衛或有應需培修之處該督等曾否籌及以期枕伏秋三汛可慶安瀾先事綢繆較之臨時葺補自屬事半功倍著傳諭高晉吳嗣爵即將該處現在情形查明據實覆奏再上年據高晉等奏高堰山盱一帶臨湖隄工磚石塌卸一摺曾降旨傳詢旋據覆奏該處各工先後屢遇風濤撞刷緣由并稱督令承辦各員務於春汛前趕

辦完竣此時曾否完工修築能否堅實並著一併查明覆奏○丁巳祭

先蠶之神遣妃行禮○諭昨日湖廣鎮守鎮總兵楊大業以陛見至行在即予召見於詢問奏對畢諭以出去而楊大業遽請即回本任殊屬非是該鎮既請陛見而來自應望多留數日冀再得面聆訓示無論未遣其行不應輒萌歸志即果令其回任亦應面為叩懇外省提鎮來京每有於諭令回任時再三叩

請多留數日者雖未必出於中誠朕亦不因此即加許可然在臣子依戀之忱自應如此且提督李國柱於昨歲臘底來京陛見於召對時命之去伊輒於新正初二日具摺請假省墓回任曾降旨交部議處其事距今不遠且係湖南本省之事楊大業豈竟毫無聞見復為此奏耶朕宵旰勵精從不稍自暇逸現雖駐蹕靜寄山莊每日理事宣召臣工仍與常時無異如該鎮來至行在即令多待數日

召見亦不為過然朕一聞其來即至前宮召對朕勤政如此楊大業豈尚不當稍知感奮顧甫經瞻覲急遽請回有是理乎其意不過以多住一日恐費一日用度遂覺有刻不容緩之勢似此見小不知大義豈稱專閫之寄楊大業著交部議處○又諭福僧阿病故所遺西安將軍原缺著傅良調補傅良所遺寧夏將軍員缺著三全補授三全所遺熱河副都統員缺著多鼐調補多鼐所遺江寧副都

統員缺著明員補授○諭軍機大臣等楊景素奏派委員弁查拏劉煥一摺據稱恐劉煥潛回東省本籍隱藏密飭各委員及該地方官在該犯原籍認真訪緝等語本籍緝拏仍照常查辦恐此等逆犯自揣罪大惡極為國法所不容必常在本地嚴切根究諒不敢仍回原籍逗留即附近省西之充曹各屬地方亦查察所易周並不敢在彼藏避或竟竄至省東之萊登各府匿跡稽誅久或溷托名籍航海至奉天等處偷生倖免均未可定著交登州鎮總兵李奉堯選派明幹員弁於所屬山海隱僻處所設法偵緝如有劉煥及歸太冀盤佑等要犯蹤跡立即購線嚴拏務獲委員嚴押解京審辦毋任遠颺漏網并著楊景素選派能事之員前往該處一體嚴緝將此一併傳諭知之○旌表守正捐軀之河南鄧州民王國旺女王氏○戊午

孝賢皇后忌辰遣官祭

陵寢○已未諭軍機大臣等刑部奏逆匪王倫案內緣坐家屬賞給大臣官員家為奴之各犯現據各旗報稱所賞二等侍衛巴圖保家閻吉瑞之妻路氏護軍叅領德陞家郭濟美之妻孔氏并五歲幼子三全叅領海靈家趙大坊祖母張氏副前鋒叅領巴哈布家王經隆之妻劉氏俱行逃走現在嚴緝等語已交步軍統領衙門嚴切查拏矣但思此等犯屬皆係女流乃逃走至四名之多並攜有幼孩且趙張氏年已八十餘歲何能獨自逃竄必有勾引窩留之人并恐其潛行送回東省本籍藏匿不可不切實根究此等逆犯家屬原應概予駢誅今賞給大臣官員為奴宥以不死已屬格外寬典尚敢違法潛逃實與尋常逸犯不同緝獲之日必須即行正法不可復存姑息至其窩藏之家非係逆匪同教即其餘黨搜捕到官必須嚴訊確情從重治罪不得僅照尋常窩留逃犯問擬除各逃犯應行

經過直隸地方就近交周元理飭屬實力躡緝查辦外著傳諭楊景素於各犯屬原籍及附近地方嚴飭該管州縣并選派明幹員弁購線擒拏務獲毋任潛蹤漏網拏獲之日一面委員嚴押解京正法示衆並將引送窩留之人一併解交刑部嚴審治罪○蠲江南句容江浦六合山陽阜寧清河鹽城泰州東臺興化寶應武進陽湖江陰宜興荆溪丹徒丹陽金壇等十九州縣淮安大河二衛乾隆三十九年水旱災額賦並緩漂陽高郵儀徵甘泉四州縣鎮江揚州二衛應徵漕項均予分年帶徵○庚申諭曰富勒渾奏總理北路糧運道銜寧遠府知府盛英患病身故等語盛英在軍營辦事數年頗為出力尚欲俟功成後厚與恩施今忽聞病故深堪憫惜著加恩賞給按察使銜以示優卹○諭軍機大臣等據巴延三奏提到私拆東省咨文之武鄉縣驛書巨如琮等一面委員押解赴京並訊據

巨如琮供稱封筒係指甲劃開並無洩漏等語巴延三竟為該犯瞞過殊屬糊塗閱前此奏到封套破損之處割裂形跡顯然斷非指甲所劃豈可任其狡飾今該二犯業經起解計日內即可到京著傳諭舒赫德等於巨如琮解到時嚴加刑訊務得私拆洩漏實情從重問擬毋任詭詞抵賴將此並諭巴延三知之○又諭今日刑部奏到二摺所有審擬旗人龐蓋臣窩竊分贓一案該犯不過安郡王莊頭且係漢軍該部擬以銷去旗檔刺字鞭責發遣黑龍江兵丁為奴自足蔽辜已依議行矣至所審錦麟即金鍋鍋一案該犯係滿洲正身且當前鋒乃頂充丐頭已屬恬不知恥甚至窩留多賊肆竊分贓並聽高三賄囑主使王四等挾嫌放火尤為兇惡豈可不置之於死該部與龐蓋臣之案一例問擬殊失平允刑部堂官著傳旨申飭原摺發還另行改擬具奏并著存記入於秋審情實除另降

清字諭旨通行各旗外將此諭令刑部堂官知之○又諭據直隸總督周元理奏稱正藍旗滿洲福亮佐領下前鋒錦麟充當丐頭窩留張九等肆行竊盜一案刑部審明定擬請將錦麟削去旗檔發往伊犁等語刑部所辦過於從輕已降旨另行改擬矣該犯係滿洲前鋒該大臣章京等平時不能覺察至周元理等獲後始行奏報咎實難辭著一併交部議處并將此通諭八旗大臣等嚴飭該管人員嗣後倘有似此無恥不法者即行從重治罪○定西將軍尚書阿桂定邊右副將軍尚書公豐昇額叅贊大臣領侍衛內大臣色布騰巴勒珠爾都統海蘭察副都統額森特奏官兵前於沿河羣尼等處連拏木柵三十餘座並設礮臺竭力攢轟礮寨漸次坍塌因派副都統瑚尼勒圖等分路進攻并令總兵達色等攻打向南來珠寨落以綴賊勢得式梯等處賊番及沿河各卡之賊悉來策應礮內

賊衆守禦益力因復派官兵運礮轟擊大戰礮及拉爾甲礮卡相機進攻以期深入諭軍機大臣曰阿桂等奏攻打沿河礮寨並現在籌辦相機采入情形所籌甚好又覆奏所以請調陝甘貴州三省官兵之故惟恐將來大兵攻破勒烏圍賊人尚為退守噶喇依之計則於功噶爾拉等處另添一路兵丁可期速即嚴事等語此計殊可不必前已屢次傳諭阿桂令將新調之六十兵概行調赴西路軍營分派合勒阿桂處添此兵力自更有益若功噶爾拉等處山險路長雖派五六千兵前往亦恐未必得濟即官兵攻破勒烏圍之後賊果退守噶喇依阿桂亦惟當與明亮通計所有兵衆設法分路攻剿或派兵於馬爾邦一帶夾攻引進富德并力勦擊噶喇依或派豐昇額帶兵徑赴喀爾薩爾一路共籌合剿均屬直捷穩妥且俱易於照料何必自外繞赴功噶爾拉轉置新兵於無可把握之地乎

阿桂自當斟酌妥辦。勿再拘泥前說。又據稱令南路挑撥之兵。於相近日旁處所暫為存駐。俟新調川兵全至。突然統領進攻。并稱札致明亮。即日來營。面籌一切等語。籌畫可謂盡心。明亮亦奏及此事。自應如此辦理。至川兵於三月初旬。可以全赴宜喜。其時明亮亦當由阿桂處面商。回營自應即速相機進攻。以期合力集事。○辛酉。諭曰。三全現在熱河。承辦園場樹木事務。俟多爾到彼交代後。再來京請訓。前赴寧夏將軍新任。○又諭曰。英廉奏。查辦逃匿逆犯閻吉瑞等妻。不論旗民之家。典雇婦人內。有年貌相似者。一體訪查等語。殊甚舛繆。此等婦人脫逃。明係同類邪教勾引。或係親屬容留。斷非典雇與人。著英廉。務飭妥員。實心查拏。並傳諭舒赫德。訊問逃犯之原賞主人。其平日有無來往行走之人。加意辦理。○諭軍機大臣等。據圖思德奏。拏獲緬匪。訊供解京一摺。亦祇可如此辦理。

閱孟覺供單。據稱聞得魯蘊要打發人到天朝來求開闢。有兩條象從猛密一路來等語。緬匪狡惡百端。即或訪有尋常信息。自當置之不理。若果如所供。差人到關貢象。竟當將差來之人。及所貢象隻。俱行留住。派委妥員押解送京。於其中擇一無用跟役遣回。諭以緬酋如果誠心悔罪。即應將所留之蘇爾相及楊重英等。全行送回。以申畏罪懇恩之誠。或可代為轉奏。若不過如此進貢中國何所不有。豈貪爾等貢物之利。况前督院差往問信之蘇爾相。爾等竟敢羈留老官屯。至今並不送還。則爾等差來之人。亦斷難釋令回巢。是以本部院將其拘禁。遣一跟役先回。諭知懾駭。如將楊重英。蘇爾相等。俱即送回內地。方能將爾來人放還。其開闢之事。另講。若敢仍前羈留不送。雖進貢亦屬無益。一面如此檄示。一面將來人先行解京備訊。並將象隻隨後送京。若差來進貢人內。無可遣回者。即

留住不必給以回文。俟匪酋等著急遣人到關探信。再將前說申諭。使緬匪稍知畏懼。或不敢巧為嘗試。仍飭各關隘嚴行防詰。勿使奸民得以往來偷漏貨物。及內地消息。將此由五百里傳諭知之。如緬匪果有貢象之事。即將如何進貢情形速行具奏。○是日駐蹕大新莊行宮。○壬戌直隸總督周元理疏報正定府屬阜平縣報墾荒地二頃十畝。○旌表守正被戕之湖南衡陽縣民聶以德妻常氏。○是日駐蹕三家店行宮。

實錄卷九七九

壬戌

實錄卷九七九

壬戌

大清高宗法天隆運至誠先覺體元立極敷文奮武孝慈神聖純皇帝實錄卷之九百七十八

大清高宗法天隆運至誠先覺體元立極敷文
奮武孝慈神聖純皇帝實錄卷之九百七十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未三月癸亥祭

先農之神遣理郡王弘曉行禮○

上詣暢春園問

皇太后安○還圓明園○浙閩總督鍾音奏福

州駐防水師旗營原為操演水軍彈壓防守

要地遇有坍塌損理應勘估題修但無公款可

支亦未便派扣兵餉查將軍衙門向有操賞

房租等項為八旗辦公之需水師同屬旗營

應請通融辦理至火藥軍械庫演武廳等處

亦係公所均請歸將軍查明籌辦以杜派累

得旨自應免扣剋兵丁之苦但因此開冒銷

之路則不可將此旨令將軍衙門記明○甲

子諭據顏希深奏寧遠府知府一缺總理綽

斯甲布糧運責任頗重驟易生手恐難勝任

請旨簡補等語工部員外郎祥鼎現隨鄂寶

辦事於該處情形熟諳所有寧遠府知府員

缺著祥鼎補授仍總理北路糧運並令駕馭

土司該部知道○辦理糧餉河南布政使顏

希深奏前因大軍進攻帶石宜喜一路將北

路卓克采之米儘供帶石南路木池之米協

濟宜喜並徹呀嘴站改設石包以利轉輸今

官兵乘勝采入北路軍糧應仍由周叟運供

計周叟至呀嘴祇二站比石包為近將石包

站改設呀嘴較為省便報聞○豁四川忠州

地方沉溺雲南委員王曾厚運銅三萬五千

餘觔○乙丑

上詣

安佑宮行禮○諭據總兵瑪爾清阿奏稱東昌

營都司多奇納年力就衰騎射平常兩耳重聽辦事遲滯請將多奇納原品休致等語朕用滿洲為綠營官原使為綠營表率並非令其多有所得也八旗各營大臣等保送時自應揀選年力精壯騎射兼優堪為表率之員始副朕錄用滿洲為綠營官之本意乃大臣等竟護庇如此殊失朕用滿洲為綠營官之意著交八旗各營大臣等嗣後凡保送應用綠營人員務遴選年壯騎射技藝兼優堪為

表率者帶領引見其五十五歲以上騎射技藝平常者不得保送若仍有似此者朕必將原保大臣嚴加治罪並將滿洲官員補用綠營之例永行停止多奇納身係滿洲不能騎射庸懦已極甚屬不堪僅令其原品休致不足示儆多奇納著即行革退他省如有似此者著該管大臣即行叅革斷不可以原品休致奏請將此通諭知之○又諭原任荊州副都統書明阿因訓練荊州兵不善將伊革職

留於軍營効力贖罪後因年老在軍營不甚得力令伊回京書明阿不能訓練兵丁雖罪無可逭但訓練兵丁尚有將軍非止伊一人之事係屬公罪情有可原惟書明阿身係滿洲曾任副都統乃在軍營並未與賊打仗其不自奮勉甘為無用之人顯然可見若令其閒居轉得優游書明阿著降為三等侍衛令在軍營効力行走○又諭本日引見之正黃旗滿洲驍騎校塔清阿奏稱高家氏多隆額

奏稱楊家氏俱係漢姓伊二人係屬盛京義州包衣佐領盛京乃根本之地似此沾染漢習滿洲舊姓將來必至泯沒即如瓜勒佳氏呼為關家氏富察氏呼為傅家氏大闕滿洲風俗著傳諭弘晌妥為留心辦理○丙寅上詣暢春園問

皇太后安○諭軍機大臣等前據文綬奏川省現調之三千兵於二月二十七八至初一等日起程著傳諭文綬此項川兵用之攻剿或

未能得力。但與富德令其同舊有之兵看守營卡。似屬力所能為。若此時尚未至宜喜。或可令其就近前往南路備用。即或全至宜喜。亦著明亮於此內酌撥二千。速往南路。聽富德遣派守卡。再甘肅兵二千五百。陝西兵二千。現俱赴川。若於過成都省城時。酌留千餘。令其馳赴南路軍營。較為便捷。著傳諭文綬。即速妥辦。仍將撥往陝甘兵若干。迅速通知明亮。其餘仍著明亮於新調川兵內撥往。以

足三千之數。○旌表守正捐軀之湖北竹谿縣民鍾廷發妻劉氏。直隸景州民高殿美妻霍氏。江西龍泉縣民劉嘉德妻郭氏。○丁卯諭軍機大臣等。本年三月初九夜至初十日。朕駐蹕盤山。春雨應時。頗為霑渥。同日京城及保定。天津。古北口。永平。各等處。均為霑溉。本日又據李奉堯奏。登州於初九日。得有甘霖。又姚立德奏。初十日於中牟。工次喜逢雨澤。是初九初十等日。雨勢廣遠。各處普霑。且

濃雲密布。自北而南山東省城。不應獨缺。而中牟至開封省城。隔一站。陰晴諒不至大異。何楊景素。徐績。均未見奏。及著傳諭詢問楊景素。徐績。將省城是日曾否得雨之處。據實覆奏。○又諭阿桂等。奏明亮於初三日至西路軍營。會籌攻壓。宜喜。明亮已於初六日。馳回日旁。約計二十日左右。各兵齊集。即可統率進攻。此時正當明亮等進兵之期。佇盼捷音。至阿桂一路。擬於安吉寨。達佳布。兩處。派

兵分路攻勦。所籌甚好。阿桂惟當努力迅辦。以副朕懷。至於陝甘貴州。所謂之六千兵。自應令其全赴西路。合力助勦。業已屢次傳諭。令阿桂奏。如其剋日。擣巢三省之兵。即當飛檄停止等語。不應如此辦理。現在大兵尚未直抵賊巢。即於日內攻克勒烏圍。仍須進勦。噶喇依。將逆酋賊目。全行擒捕。方能蕺事。且阿桂。明亮。各後路。如遜克爾宗。榮噶爾博。及喀爾西。甲索等處。未經潰散之賊。必當留兵

搜洗淨盡。然後可進。勦噶喇依而馬爾邦一帶。必須分兵夾擊。引進富德。共擣賊巢。其喀爾薩爾一路。臨時亦應酌量派兵截擊。是勒烏圍得勝以後。需兵處尚多。此六千兵。正可資其用。俟大功告成。再令回營。未晚。何必於此時遽行遣回乎。又另摺奏。小金川頭人僧格太。帶妻子家人投出。訊明父子情罪。均無可宥。但若即行正法。恐適以堅番人死守之力等語。所見非是。此時官兵將抵賊巢。番衆已紛紛投出。與去冬情形不同。無庸復為招誘。即或疑畏不出。亦有何礙。況此等助逆賊匪。敢於抗拒官兵。若至我師直擣賊巢時。雖出降亦不可宥。又何在此時必欲其來。且僧格太。阿濟二犯。其罪惡既已訊明。不得因其自行投出。稍為寬宥。著傳諭阿桂。將阿濟即於軍營正法。並申其前次從逆謀害已圖等之罪。使共知儆戒。至僧格太。現在安置何處。即著文綬。派員往彼。拏至省城。正法。其家屬

仍分賞內地土司為奴。○吏部奏。六部堂司主事。額設一百四十缺。內滿洲蒙古八十五缺。並無壅滯。漢主事五十五缺。吏。戶。禮。兵。工。共三十七缺。向係七缺歸題。三十缺歸選。惟刑部十八缺。不分題選。通計郎中員外二項。咨。二。留。二。定例本屬均平。嗣因各部學習期滿人員較多。遇有選缺。亦准扣留保題。以致歸選缺少。請嗣後除原定題缺。仍歸各部咨留外。其餘應選之缺。通計六部題補至第四缺。即截留一缺。歸部銓選從之。○又議覆陝西巡撫畢沅疏。稱漢中府留壩通判請改為撫民同知。兼管捕盜水利。換給關防。並請添設經制書吏四。驛書二。應如所請。從之。○軍機大臣等議。覆勦辦逆匪王倫案。內軍需各款。除正項例准開銷外。餘無著銀七萬餘兩。皆因前撫臣徐績等辦理不善。以致糜費。應酌分兩股。令徐績分賠一股。藩司國泰賠十成之六。臬司孫廷槐賠十成之四。以清款項。

至錯給官兵鹽菜口糧共銀一萬六百餘兩。係由戶部先將出征條例頒發該省遂照軍需例支給應分作三股令行文之戶部各官及該省撫藩均攤賠繳得旨此項分股攤賠銀兩俱屬咎所難辭但徐績現有另案應賠銀三萬五千餘兩較國泰應賠之數尤多所有伊名下分賠一股銀三千五百餘兩並著於行文錯誤之戶部堂官名下均攤分賠。○直隸總督周元理疏報順天永平保定河間

深州五府州屬勸墾荒地並水旱田一百六項有奇。○旌表守正捐軀之山西太原縣民張廷元妻劉氏。○戊辰諭曰富德奏遊擊田藍玉因太約山梁第七卡屯兵營盤失火燬燒更棚四座田藍玉不行稟報擅用雙條合并將該土弁目兵丁重責致土目庫思爾結因傷重身死殊屬乖張專擅當將該員責罰示衆并請將田藍玉削去巴圖魯名號革職作為馬兵効力贖罪等語所辦是田藍玉著

革職并削去巴圖魯名號作為馬兵仍留軍營効力贖罪以示懲儆。○又諭國史館進呈所纂王鴻緒列傳於左都御史郭琇劾鴻緒與高士奇招納賄賂等案僅敘大畧而郭琇原疏未經載入恐傳之後世其不知鴻緒輩之罪狀者妄疑一劾即去或有屈抑其知者又疑秉史筆之人意存袒護不肯顯暴其短豈朕特命另修史傳之意乎夫王鴻緒高士奇與明珠徐乾學諸人當時互為黨援交通

營納衆所共知如郭琇所劾諸事並不為枉而我

皇祖不加窮究僅予罷退蓋於明珠念其曾有襄辦討平吳逆之勞而王鴻緒高士奇諸人則因文學尚優宣力史館是以屢下

明詔剴切曉諭曲予矜全實由我皇祖聖德然即以諸人事蹟而論雖有交結納賄之私亦止於暗為關照不至勢焰薰灼生殺擅專如前明嚴嵩輩之肆奸蠹國陷害正

人此亦人所共知也。即如郭琇奏劾明珠王鴻緒諸人後旋經

皇祖特加任用。未聞有能稍事排擠者。即其後郭琇於巡撫任內。因他事罷官。亦由其自取。並非諸人之所能媒孽。又實由我

皇祖聖明。是郭琇原疏於諸人被劾款蹟。皆當據事直書。不必稍為刪節。使天下後世曉然於王鴻緒輩之罪狀如此。郭琇之鯁直如此。其後之自取罪戾如此。並敬悉我

皇祖之仁智。並用措置得中。又如此。既可令海內傳為美談。且足令朝臣共知鑒戒。其於世道人心。甚為有益。何必曲存隱諱乎。其明珠本傳。前已降旨改修。外著交該館總裁將王鴻緒徐乾學高士奇等列傳。覆加覈訂。所有郭琇原劾諸疏。悉載入傳內。另繕呈覽。其餘有類此者。並著一體詳載。以示大公。而昭傳信。○又諭。八旗兵丁操演。向例俱定於每月三。八日。大臣等恐不能徧到。嗣後左翼。仍於

三。八日。右翼改於二。七日。閱射。○又諭。伊犁烏魯木齊等處。駐防滿兵。現俱開設官鋪。分派貿易。殊失防守邊疆之意。且滿洲兵丁。自幼專習騎射。不諳生理。日久必至生嫠。尤關風化。其如何辦理。盡善之處。著軍機大臣悉心妥議具奏。尋奏。伊犁等處。開設鋪戶。雖兵丁滋生利息。起見。久之恐效漢人。好逸惡勞。技藝轉致荒廢。自應嚴行禁止。但該處開鋪已久。一時未便盡撤。應飭令伊勒圖。索諾木

策凌。於烏魯木齊。巴里坤。哈密等處。招募殷實商民。貿易每年所得利息。仍可分給兵丁。俾資養贍。從之。○諭。軍機大臣等。前因富德續派兵三千往宜喜。恐南路存兵太單。或致賊人窺伺滋擾。深為慮念。隨諭令明亮。於新調川兵到營後。酌撥一。二千。速赴南路。並令文綬。於陝甘調兵過成都時。量撥千餘。迅往緘布軍營。補足續撥三千之額。今富德既將該處續派之兵留住二千。是防守已足。數用。

所有已到明亮處之川兵。及過成都之陝甘兵。俱可無庸撥往絨布○已已。諭軍機大臣等。前日因李奉堯奏登州於初九日得有甘霖。又姚立德奏。初十日於中牟工次喜逢雨澤。曾降旨傳詢楊景素徐績將該省城初九初十等日。曾否得雨之處。據實覆奏。今日據徐績奏。豫省各屬。於初十日。各獲好雨。二三寸。至五六寸不等。復於十六十七兩日得雨稠密等語。同日楊景素亦有奏到十七日所

發之摺。未將雨澤情形入告。因令傳詢齋摺外委。據稱此次奏摺係十八日早發交。外委於午刻起程。其時剛值下雨。二更時候行至禹城縣。雨止。至初九初十兩日內。記得曾有小雨一陣。時候却不多等語。是東省雨澤似覺稍稀。現在麥田正待澤之時。未知近日曾否續得霑足之雨。著再傳諭楊景素。即將該省近日雨澤情形。速行據實覆奏。以慰殷注。尋奏東省初九初十等日。得雨不過一二寸。

嗣於二十二三兩日。甘霖普渥。各屬均霑耕作。不致後期報聞○旌表守正捐軀之山西榆次縣民楊二黑妻李氏○庚午

上詣暢春園問

皇太后安○諭軍機大臣等。據軍機大臣會同刑部。審訊山東歷城縣。錯遞咨掣劉煥六百里公文之驛書。劉士英等供稱。歷來俱由長清縣崗山驛遞送。並無由齊河直隸一路等語。已行文直隸豫東各督撫。提取歷年號簿送京查覈。並令楊景素。確查覆奏矣。東省移咨晉省公文。如果向由河南一路遞送。則自豫至晉各站。即係通行驛遞大道。何以巨如琮前供。有武鄉驛地處偏僻。接遞六百里公文之事甚少。是以祇設有驛馬八匹之語。是否該犯所供不實。抑或山東由河南遞送山西公文。另有驛站正路。此次係豫省誤發僻徑。以致由武鄉等處接遞。輾轉遲延。亦未可定。著傳諭徐績。已延三即查明東省至晉省

馬遞公文往來究係何路為正站并按照各州縣驛遞逐一查開據實覆奏至武鄉南關驛若果係通河南山東正站何以止有馬八匹其上下站所設之馬較此多寡若何並著已延三一併查明覆奏至劉士英等所供山東移行山西公文向由崑山驛一路遞送如果查覈歷年號簿屬實則其誤不始於此次何以楊景素前奏稱東省馬遞晉省公文例由直隸轉遞前項公文實由誤遞以致遲延等語與劉士英等現在所供全不相合該犯等一面之詞原難盡信今既挨查各省自不能復有遁情著傳諭楊景素將前奏所云馬遞晉省公文例由直隸轉遞之語係何憑據即速查明據實覆奏并諭周元理徐績知之尋奏東省至晉省馬遞公文例由歷城至德州經直隸之獲鹿并陘入山西平定州為正站其由河南之河內縣遞入山西鳳臺一路係豫晉公文往來之道並非衝衢是以南關

驛及上下各站額設馬匹較以前項公文實因歷城縣驛書並未細查混遞致誤報聞○戶部議准侍郎金簡奏稱滇省運解京銅自瀘抵通統限十一個月程限本寬運員往往任意遲延託名沿途守風守閘取有地方官印結可以扣算日期不致有干處分請嗣後自瀘州至儀徵責成督撫委守備以上武員沿路催趲如遇守風守水會同地方官具結申報自儀徵以北俱係內河責成巡漕御史督催如有守閘起剥日期亦不准扣除至頭運例限八月自瀘開行凍河以前儘可抵通與二三運在後者不同如在山東天津守凍者應令自出腳費陸運交局並照逾限之例分別議處從之○豁江西鄱陽湖遭風漂沒漕糧一千一百四十石有奇○辛未署四川總督文綬奏此次新調川兵及各省兵統計幾及一萬現在西路軍營存米五萬餘石甚為充足惟北路添兵較多需糧較廣查卓克

采存米一萬餘石。從噶克存米五千餘石。周
豐存米四千餘石。南路協濟之米。又經撥吉
地米二千石。打箭鑪倉每月撥米五千石。運
交木池。並令楸枰多為滾運北路。以資接濟。
報聞。○以故四川松茂道屬梭磨安撫司諾
爾布姪丹津襲職。○壬申。禮部以會試中額
請得旨。這會試滿洲蒙古。取中三名。漢軍。取
中一名。直隸。取中十六名。奉天。取中一名。山
東。取中十一名。山西。取中九名。河南。取中十
一名。陝西。取中五名。江南。取中二十九名。浙
江。取中二十四名。江西。取中十七名。湖北。取
中四名。湖南。取中三名。福建。取中三名。廣東
取中三名。廣西。取中二名。四川。取中三名。貴
州。取中二名。雲南。取中二名。○蠲長蘆屬滄
州。南皮。鹽山。慶雲。青縣。衡水。六州縣。嚴鎮。海
豐。興國。富國。豐財。蘆臺。六場。乾隆三十九年。
旱災。竈地額賦。並緩勘不成災地。應徵銀兩
有差。○蠲河南信陽羅山。光州。光山。固始。五

州縣。乾隆三十九年旱災。額賦並緩各項舊
欠銀兩有差。○癸酉。

上御勤政殿聽政。○諭軍機大臣等。本年三月
初。朕駐蹕盤山。初九夜至初十午間。膏雨優
渥。畿輔普霑。且遠至山東登州。並河南各屬。
亦奏報同時得有雨澤。本日又據畢沅奏報。
西安省城。於三月初九日。澍雨霑灑。至次日
卯刻方止。入土四寸有餘。是直隸各省。渥澤
俱已同霑。山西在陝西之左。不應獨缺。何以

至今未據該撫奏及著傳諭已延三。於該省
曾否得雨之處。即速據實覆奏。○豁江蘇阜
寧縣。丹江民田二十四頃七十九畝。有奇額
賦。○陝甘總督勒爾謹疏報。巴里坤屬三道
溝地方。回民馬世友等報懇地四百二十畝。
○甲戌。

上詣暢春園。問

皇太后安。○諭軍機大臣等。本年三月初九。初
十等日。膏雨應時。所有直隸毗連各省。均已

一律普霑。昨畢沅奏。西安各屬亦同時得雨。晉省在陝西之左。不應獨缺。現已傳旨詢問。已延三。令其即速覆奏矣。但思已延三。現往察哈爾。會勘平頂山採煤事宜。並就便查閱省北一帶營伍。是三月初旬得雨時。已延三尚未回省。朱珪黃檢。係藩臬大員。俱有奏事之責。春雨關係農功。理應入告。巡撫既因公他出。此等應奏事宜。兩司更無可議。豈畏憚巡撫不敢具摺耶。抑因視其事為巡撫專責。置之不問耶。著朱珪黃檢。即將三月初九等日。該省曾否得雨。并如何不即具奏之處。速行據實覆奏。將此傳諭知之。尋奏。晉省入春以來。雨雪頻霑。復於三月初九。初十。至二十。二十四等日。大同太原等府。得雨自三四寸。至五六寸不等。甘雨應時。足資耕種。至臣等因撫臣公出。未將各屬雨水情形。專摺具奏。實屬糊塗。請旨交部議處。得旨。亦不至議處。知道了。○又諭曰。陳輝祖奏查繳禁書鳥

鎗。請統歸編保案內清辦。一摺。據稱查繳禁書。責令印佐官員於編查保甲時。將不經見之書。諭令當面呈繳等語。此事尚屬可行。但須嚴飭胥役地保等。不得藉端需索。致滋擾累。至收繳鳥鎗一事。欲令編保各員於半年內挨查繳出。此在內地居民。或可遇便挨查。然尚恐其有名無實。至苗犵僻處巖洞。若責令碉長收買。非但不能查收淨盡。或致轉涉驚疑。且苗碉各藏鳥鎗。多屬防身殫獸。刻不可離。亦如蒙古之挾鎗打牲者。相類若欲盡行收買。致苗民一旦頓失其業。既於羣情大有不便。且蠢苗帶鎗自隨。相安已久。今忽以其為應禁利器。收之以防抗逆之端。轉類教猱升木。所謂民可使由。豈未之前聞耶。況如此查辦。勢不能不假手吏胥。倘有不法奸蠹。從中需索。釀事啟釁。尤屬不成事體。莫若聽其自然。無庸查辦之為愈也。著傳諭陳輝祖。如尚未辦及。不必復露端倪。若已有出示行

文之事亦即速行停止。仍將奉到諭旨後作何辦理之處據實覆奏。○又諭曰。阿桂等奏攻打達佳布安吉等處。碉寨殲賊。賊番情形。此次雖殲賊二百餘生擒賊番六名。而攻得之碉因難以駐守。復行拆毀。仍與未得無異。殊覺可惜。自是兵數不多。未能分路襲擊之故。今陝甘貴州所調兵六千。據各督撫奏均係揀派勇壯者。令其遄赴軍營。前往西路約計陸續可到。阿桂處添此生力精兵。聲勢更盛。於攻勦尤為有益。自應分路派兵進攻。必更易於得手。且攻勦之外。可派吉林索倫兵。豫伏中途截殺應援之賊。此等賊衆一出。阿外已自失其險。尤可儘力多殲。使之膽落。阿桂當努力為之。至明亮處所調南路兵四千。又吉地等處兵七百五十名。計將及五千。今川兵三千。又俱全赴宜喜。若再於宜喜現有兵內抽選數千。約可滿萬。自當急籌攻取。明亮現於何時進兵。著即速覆奏。以慰懸注。但

明亮此路進兵。係攻其無備。果能得勝。自屬甚善。但宛如治病。偏方難於實有把握。仍當以阿桂處為正路。朕亦惟阿桂是恃。不可稍有疎懈。○乙亥。以故貴州貴陽府屬定番州麻响土司得子民子玉錦黎平府屬湖耳土司楊勝槐子秀達均襲職。○豁江蘇上元縣占廢坍漲民衛田二十九頃五十九畝。有奇額賦。○旌表守正捐軀之廣東東莞縣民詹進傳媳封氏。○丙子。諭軍機大臣等。據高晉覆奏老壩大工久已餞填堅實。即二壩亦於二月初四開工。四月內可期告竣。至高堰山盱一帶。磚石各工。其坍卸到底者。必須築做排椿越壩。將水庫乾方。能打椿修砌。水深壩高。偶遇風暴。即被汕掣。因磚石未能辦運迅速。現在嚴加催趲。約計四月底可以完工。等語。同日吳嗣爵覆奏。亦大畧相同。二壩工程既已鑲填堅實。自可無虞。惟高堰磚石各工所闕甚鉅。據稱二月間始行購料。且必須築

壩岸水方可興修其工頗不易辦。安能於四月內全完。高堰界格河湖為淮揚一帶保障。上年黃水漫堤。淮安板閘等處民舍田廬已多受患。若高堰之工或有疎失。民何以堪。若不及早修築堅完。遇夏秋雨大漲盛。衝嚙恐有未便。又或工員因迫於期限。潦草趕完。致工段有名無實。其為弊更大。著傳諭高晉吳嗣爵將應辦之高堰山盱一帶工程。上緊董催。實力如法修砌。務期經久鞏固。永衛民生。方為妥善。設或工程艱鉅。需費較多。轉不妨確實勘估。奏明動帑。朕惠愛閭閻。惟冀瀕河億兆咸資安堵。即或因要工稍有費用。亦所不靳。若高晉等不能實力奉行。惟憑工員估作。草率報完。雖存隄堰之名。而不能得捍禦之力。倘有疎虞。恐高晉吳嗣爵不能當其罪也。將此由五百里傳諭知之。仍將如何覈辦情由。即行奏覆。○又諭各省年終彙奏事件。前經諭交軍機大臣酌定條款。令各督撫於

封印開印前後。分別陳奏。其有無逾限之處。統於三月內。較覈辦理。此等彙奏事件。理應依限入告。即如甄別教職佐雜及盤查倉庫扣展公出日期各條。俱截至封印為止。並非難辦之事。乃逼近歲除。始行具奏。雖未逾年內之限。而必待期滿始辦。非但羈延。亦太拘泥矣。前因敦福具摺過遲。曾經降旨申飭。今統覈各省彙奏日期。陳輝祖畢沅韋謙恒亦與敦福相同。陳輝祖畢沅韋謙恒俱著傳旨申飭。○命內閣學士彭元瑞充三通館副總裁。○以故奉恩將軍綽和諾子愛新泰襲職。○丁丑

上詣暢春園。問皇太后安。○諭軍機大臣等。前日據熊學鵬奏查出字句違礙。不應存留各書。進呈銷燬一摺。隨於摺內批示。以粵西此等事。少不必過求矣。今閱繳到書籍內。高能徵鈔本文集。其平滇三策。尚屬有見。即其中簽出各句。亦係

設為賊意詰難之詞。並無關礙。所云昭義將軍。係馬承廕曾經襲封伯爵。後降順逆藩黨。惡為虐。原屬反覆無良之人。但熊徵致書於彼。勸其歸正。非與私通。此外諸篇。雖間有激烈過甚之詞。並非謬妄。不在應燬之列。至陸顯仁。格物廣義一部。多係剽竊前人講學虛言。雜以一己拘墟之見。所論多踳駁不純。留之恐貽誤後學。其書板書本。自應銷燬。并書名亦不必存。至其書內所簽各處。均非訛詆。

書錄卷之九

七

之語。不得謂之悖逆。竟可無事苛求。恐熊學鵬。因查有應燬書籍。輒將其家屬拘繫。致愚民畏懼驚惶。則過當矣。著傳諭熊學鵬。如查書之家。其子孫有拘繫者。即行釋放。寧家。但諭以向後勿拾唾餘。妄有著述。致干不遵教令之咎。熊學鵬。即速妥協辦理。毋致稍涉滋擾。將此諭令該撫知之。仍將如何遵辦之處。附便覆奏。○是月。署山西巡撫巴延三奏。查平頂山。坐落察哈爾地方。曾經都統常青勘

明煤苗顯露之處。可得窰二十八座。既與游牧無妨。並於附近歸化城之蒙古民人均有裨益。應請招商試採。以收地利。報聞。○河東河道總督姚立德奏。徐州黃河誌椿。桃汛長水至一丈二尺。較上年多三尺六寸。一切掃壩工程堅實。足資抵禦。南岸毛城鋪滾壩。因上年衝刷寬深。難以再為開放。前經奏請於唐家灣地方。將河頭淤高處。挑挖深通。以備宣洩。北岸潘家屯引河。現已趕辦堵閉。黃水

書錄卷之九

七

亦漸次消落。各工俱極平穩。惟邳睢廳屬南岸陳家莊地方。河溜衝刷外灘。漸近隄根。現飭工員趕築壩臺。以防汎水。至洪澤湖禦黃濟運。甚關緊要。現屆桃汎水長。必須豫騰湖面。以為容納之地。因將清口東壩。啟拆八丈。連舊存口門。計寬二十八丈。湖水極為暢達。得旨覽奏。欣慰。○署湖廣總督陳輝祖奏。湖北武昌省城金沙洲。太乙宮等處濱江石岸。迎溜衝刷。坍塌正岸八十丈。護岸七十七丈。

急應修築以防汎水報聞○署雲貴總督圖思德奏各關隘出防官兵向於春深瘴發時酌移水土平善地方以資防守現擬於叢宋關扼要處酌留兵二千名屯劄大營杉木籠黃林崗關邦中山等處均設總卡遴選將備駐守稽防至龍陵關路通木邦腊戌亦酌留防兵五百名派員管領餘俱撤回原營差操又普洱地方地氣炎熱烟瘴早透所派駐防兵七百名亦即同期陸續撤回報聞

大清高宗法天隆運至誠先覺體元立極敷文奮武孝慈神聖純皇帝實錄卷之九百七十九

大清高宗法天隆運至誠先覺體元立極敷文奮武孝慈神聖純皇帝實錄卷之九百八十

監修總裁官經筵講官太子太傅文淵閣大學士文淵閣領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷總載官經筵講官太子太傅文華殿大學士文淵閣領侍衛內大臣稽察欽奉 上諭事件處管理刑部戶部三庫事務世襲騎都尉軍功加九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞尋奉

敕修

乾隆四十年乙未夏四月戊寅朔享

實錄卷九百八

太廟遣誠郡王弘暢恭代行禮○諭朕於五月二十六日恭奉

皇太后安輿幸避暑山莊著派顯親王裕親王大學士舒赫德協辦大學士尚書官保留京辦事所有吏兵二部應行引見官員文職知縣以上武職守備以上著於未啟鑾往木蘭之前每月彙齊派該堂官一員輪流帶赴熱河引見其文員內佐雜等官武員內八旗護軍校驍騎校及外省送到之補放水手官驍

騎校並年滿千總等官弁仍著王大臣照例驗放至八月以後月選等官亦照向例辦理其外省督撫提鎮等官奏摺朕駐蹕熱河時著齋摺人赴熱河投遞至進哨以後著兵部選派司員二人住於哨門外經營臺站各省齋摺人赴哨門外即交兵部司員接收按日由臺馳送行在批覽發回仍由該司員付各齋摺人領回該部通行傳諭知之○諭軍機大臣等阿桂派令海蘭察前往宜喜會同察看進兵路徑約期會攻深合行軍機要而海蘭察往來相度實為出力著將營中所有大緞賞給二匹以示獎勵至舒常請同赴宜喜進攻亦屬甚好其日旁一帶據奏留舒景安都爾嘉駐彼照應雖係牽綴賊勢但亦須熟悉地利之人方於事有益因思永平馬彪二人在宜喜駐兵已久於防範情形必能熟悉著明亮於此二人內酌派一人同舒景安都爾嘉在彼防守似更妥協仍將派出何人之

實錄卷九百全

三

處附便奏聞○已卯蠲免安徽合肥壽州宿州鳳陽懷遠定遠霍邱六安霍山泗州盱眙天長滁州全椒等十四州縣并廬州鳳陽長淮泗州四衛乾隆三十九年旱災額賦其被災較重者給賑一月○旌表守正捐軀之安徽宿松縣民龔廷翰女龔氏庚辰上詣暢春園問

皇太后安○還宮浙江巡撫兼管鹽政三寶

疏報乾隆三十八年寧波府慈谿縣鳴鶴場

實錄卷九百全

三

報升沙塗五百畝○旌表守正捐軀之順天大興縣民阮保兒妻蔡氏○辛巳諭向來馬蘭泰寧二鎮標遇有千把總員缺俱由各該鎮擬定正陪送部引見候旨簡補未經補用之擬陪各員下次雖得擬正亦尚須赴京引見今思此等微弁既經挑選擬陪原係可供錄用之人若下次遇缺擬正再令來京引見未免復勞跋涉嗣後馬蘭泰寧二鎮墾補千把總所有擬陪未用之員著該部記名下次

遇有應補缺出。即按次補用。無庸再行送部。著為令。○諭軍機大臣曰。阿桂奏挑選吉林索倫等勁銳兵千名。令海蘭察、福康安等帶領前往。宜喜以資分頭督率。阿桂不分畛域。派兵往助。明亮所見極是。但西路兵數亦不甚多。今復分減千名。兵力似覺稍單。又海蘭察、福康安均係阿桂處得力之人。今將伊等派往。宜喜必見及宜喜情形緊要。故如此派調。若果能從宜喜。歷至瀕河。自以設法渡河。抄截為要。明亮等久經奏及籌備渡河之事。臨時諒必應手。誠能抄出得式梯之後。與阿桂會兵夾攻。則勒烏圍已在掌握之中。此舉實為事半功倍。至另摺所奏籌辦降番之法。以留數人在營。使共知其不殺。似更可速。渙賊眾之心。亦不無所見。但此輩情性叵測。即或留其在營。不可不嚴防密察。而明亮處從未盤獲奸細一人。深恐其為點賊。朦混。明亮倍宜留意慎防。毋稍疎忽。貽誤。至小金川頭

人僧格太。及伊子阿濟二犯。罪惡昭著。法所不貸。但據阿桂奏。阿濟從前雖隨賊搶占地方。茲同其父母兄弟投出。即請隨征。自効打仗殺賊。因手腕中鎗被賊搶去。仍從礮跳下。逃出等語。有此一節。尚可貸死。且暫留營中。阿桂仍留心防察。并觀其向後出力與否。再行定奪。其僧格太一犯。亦可無庸辦及。並其家屬。且不必分賞土司。為奴。統俟將來再辦。不遲。將此并諭文。綬知之。○調陝西延綏鎮總兵劉國樑。為雲南永順鎮總兵。以廣西梧州協副將烏爾納。為陝西延綏鎮總兵。是日起。上以常雩祀。天於。園丘齋戒三日。壬午。戶部侍郎管錢法堂事。金簡奏。查現存局錢。甚屬充裕。市價亦平減。每銀一兩。值制錢九百五六十文。請將本年閏月加鑄四卯。暫徹從之。○癸未。

上詣

南郊齋宮齋宿 諭軍機大臣等前因富德奏
續派之兵業經阿桂停調二千則馬尼僅多
派一千餘存之兵尚足敷用所有陝甘及川
兵均可無庸撥補南路隨即諭知明亮文綬
等矣此旨文綬處不過二十七八日間可以
接到若陝甘兵彼時尚未過省自可停其撥
赴馬尼若已經派撥起程即聽其前往亦無
不可現據富德奏有相機進勦之事即添此
一千兵亦屬有益不必令僕僕道途轉疲兵
力○甲申常雩祀

天於

園丘

上親詣行禮 詣暢春園問

皇太后安○幸圓明園 命皇子觀親祀禮儀
諭朕每遇

郊壇大祀必親詣行禮歷四十年如一日弗敢
稍有懈弛一切儀文典禮悉本誠敬之心仰

期

昭格凡諸升降拜獻弗愆於儀實有可以自信
者惟是行禮時諸皇子向不在陪侍之列無
由知朕恪恭將事之忱著於本年冬至
南郊令諸皇子在旁侍立敬謹觀瞻祀事既歲
並令就
壇位前恭閱朕所進之爵皆安奉端正無稍偏
敬俾共體朕所以展
精裡而答

鴻臚者實在乎是其敬承毋忽○又諭去年九
月朕召見宗室公寧僧額不能清語朕於尋
常宗室尚教以清語騎射況王公子弟乎因
降旨命宗人府查明伊等力能延師者令其
在家學習無力者令其入宗學學習嗣後著
管理宗人府王公每季考試一次每年四十
兩月由宗人府奏請簡派阿哥王大臣等將
騎射清語一併考試一次如有不能清語者
在學則將管理宗人府王公教習治罪在家

則將其父兄治罪。將此通諭阿哥王公宗室等。使知朕欲宗室不失滿洲舊俗。各宜用心習學。務使清語騎射精熟。斷勿任其生疎。○乙酉。諭曰。額駙色布騰巴勒珠爾。自往四川軍營以來。帶兵打仗。甚屬奮勉。所有色布騰巴勒珠爾親王之爵。著加恩賞還。又諭曰。額駙色布騰巴勒珠爾。在四川軍營患病。著派御前行走科爾沁貝子鄂勒哲特穆爾額爾克巴拜。乾清門三等侍衛阿彌達。帶領御醫。馳驛前往診視。諭據畢沅奏。陝省赴川官兵。三月二十七八日。已全數出境。甘省兵亦陸續入川。其貴州兵丁。先經該撫奏報。已入川境。此次續調三省兵丁。赴川助剿。以期剋日藏功。勒爾謹。畢沅。韋謙恒。同各該提督及承辦兵差之地方官。辦理皆妥速。可嘉。俱著交部查明議敘。○丙戌。

上詣暢春園問

皇太后安。○幸靜宜園。駐蹕至己丑。皆如之。○

諭曰。色布騰巴勒珠爾。以固倫額駙。久侍禁廷。稟性篤誠。恪勤夙著。前者西陲底定。懋建功勳。此次派往川省軍營。為叅贊大臣。董率將弁。奪隘攻碉。屢彰勞績。擬俟奏到。日茂賞策。勲昨聞其舊疾復發。勢甚委頓。實切廛懷。因復其親王封爵。用昭恩眷。並遣乾清門侍衛。偕伊子鄂勒哲特穆爾額爾克巴拜。帶同御醫。馳往診視。以冀速痊。茲遽聞其溢逝。深為軫惜。著加恩賞內庫銀三千兩治喪。派總

管內務府大臣。都統邁拉遜。經理其事。仍著伊子前往迎喪。其歸櫬所經。並著沿途地方官。照料護送。○以正黃旗蒙古都統拉旺多爾濟。為領侍衛內大臣。旌表守正捐軀之河南修武縣民牛世有妻郭氏。○丁亥。諭軍機大臣等。據高晉奏。請將革職道員李奉翰。發往江南河工。令其自備資斧。効力等語。所奏尚是。著送部引見。再降諭旨。高晉與李宏同事日久。其諸子才具。自所深知。至李奉翰

為人尚有出息。朕特加恩擢用。而此次獲咎之由。亦不甚重。高晉所請。尚不為過。是以准行。他人即不得援以為例也。至李奉翰。將來發往江南時。高晉宜留心察看。如能倍加感激。奮勉實心任事。數年以後。即當據實奏聞。倘心生懈怠。遇事不肯出力。亦當劾奏治罪。高晉不得因曾經保奏。稍有迴護姑容。致干咎戾。將此傳諭高晉。並令吳嗣爵知之。○又諭。據徐績奏。訪獲鹿邑縣民樊明德。邪教騙

錢一案。又究出案犯三十餘人。名混元教等語。混元教。即收元教。又名無為。與白蓮同係一教。雖各編立名目。其誘惑愚民。招引徒眾。實無二致。倘聽其日久蔓延。實為世道人心之害。若壽張之逆匪王倫。則養癰之尤甚者。故此等案犯。一經訪得。不可不上緊根尋。著傳諭徐績。即飭屬迅速查拏。首夥各犯。嚴究根由。盡法懲治。務絕根株。不得稍有寬縱。致留餘孽。徐績不可不有鑒於前任山左之覆

轍。力圖自贖。並當嚴飭地方官。不可縱容。胥役。借端滋擾。○戊子。廣西南丹州土知州莫遐齡。病休。以其子汝明襲職。旌表守正捐軀之山西榆次縣民牛成。會妻張氏。○己丑。上閱健銳營兵。諭曰。託雲駐劄烏里雅蘇臺辦事。已四載有餘。著授明山。為叅贊大臣。賞戴花翎。前往烏里雅蘇臺。更換託雲回京。○諭軍機大臣等。前日據徐績奏。訪查鹿邑縣有混元邪教。拏獲樊明德等。訊究一摺。因混

元教。與收元無為。及白蓮等。均屬同教異名。已諭令徐績。嚴究根由。速拏要犯。盡法懲治。不得稍存寬縱。今日又據榮柱奏。審訊樊明德等。已經輾轉供出。入教者三十七人。所有毗連鹿邑之安徽亳州民人丁洪奇。張菊業。經該州拏獲。其餘夥黨。仍彼此關會。互相躡緝。並據裴宗錫。同日奏到。訪獲丁洪奇。張菊二犯。搜出鈔經一本。究稱。得自河南樊明德所傳。復拏獲夥犯丁本禮等五名。現在嚴行

審訊等語是樊明德實為此案首犯不可輕縱其安省已獲各犯即應先行訊究未獲案犯仍著兩省巡撫飭屬不分畛域上緊查拏務獲毋任漏網至其鈔經內有換乾坤換世界反亂年未結年等悖妄字樣與山東逆匪王倫等編造惑衆之語大畧相同非尋常邪教經卷可比著傳諭徐績裴宗錫榮柱將此案要犯各就現獲地方速行嚴訊從重問擬不得稍存姑息並當實力窮究未獲各犯一

併緝拏重處務絕根株勿留餘孽滋患○福建巡撫余文儀疏報乾隆三十八年侯官福清羅源古田同安龍溪建安甌寧泰寧連城霞浦福鼎福安壽寧大田龍巖淡防廳等十七州廳縣開墾水旱民屯田地十七頃十二畝有奇旌表守正被戕之河南淮寧縣民張喜妹張氏○庚寅

上詣暢春園問

皇太后安○迴圓明園諭曰僧人悟明扎傷

行濟身死一本因在保辜限外照例減等杖流所擬未為允協此案悟明先用刀扎傷行寬及行濟聞喊趕往悟明復持刀連扎行濟頂心肩背項頸咽喉左右多傷行濟旋因咽喉潰爛殞命其死既由於致命重傷且逾辜限僅止四日未便照常減況悟明既係僧人即應守戒乃逞兇連扎二人一死一傷實為很惡悟明仍著問擬絞監候並入本年秋審情實以示懲儆嗣後內外問刑衙門遇有

僧人行兇斃命之案俱不得輕議寬減○諭軍機大臣等前遣劉浩往昌平閱看明十三陵情形回程時曾奏稱該處牆內有諸王園寢二處朱紹美因有回乾樹株欲行變賣另蓋看守房屋並稱朱紹美云曾經奏聞等語因令軍機大臣傳詢朱紹美據稱膝懷王墓旁並無房屋雖官設看守人戶住居遙遠難以照料紹美擬欲就近添蓋小屋六間並築圍牆約需銀八九十兩因查晉獻王墓旁有

回乾柏樹大小三十餘株已皆枯朽是以奏明將此項樹株變價以為蓋造房屋之用並經告知昌平州將樹株查估其房屋現在興工尚未完竣樹株亦尚堆墓旁曾有人還價六十兩因價少未經賣去等語滕懷王墓旁無屋並非急於應辦之事朱紹美何必將回乾樹株籌辦即因所費無多轉移甚便亦當告知官為經理不應自興工作恐其借售樹蓋屋為名將牆內樹株影射夾帶或有奸商

向其愚惑藉端私買等弊皆不可知勝國陵園現在為之設守戶禁樵採實屬我朝仁政豈可聽人傷其樹木若其後裔自行戕伐尤為不可著傳諭周元理密飭霸昌道盛住就近查明朱紹美所稱是否實情此外有無情弊即行據實覆奏尋奏查晉獻王墓牆屋坍塌存有柏樹大小三百餘株其砍伐之三十九株實係回乾之樹又查滕懷王墓並無牆屋亦無樹株朱紹美於墓旁新蓋屋六間詢

據陵戶稱朱紹美欲蓋此屋因將晉獻王墓乾樹砍伐變價以為起屋之費並無別情報聞又諭據德風等奏海城縣訪獲旗人劉得智等私立混元紅陽會邪教又錦縣承德縣及牛莊巡檢訪獲一炷香如意會及天主等教拏獲案犯送交盛京刑部審擬等語所辦甚好邪教煽惑愚民最為世道人心之害不可不嚴切根查況盛京根本重地風素淳樸尤不宜聽其蔓延滋事該侍郎府尹等當

徹底研求逐一嚴究務絕根株至劉得智身係旗人不知守法膽敢私立邪教更非事理所應有情節甚為可惡著傳諭喀爾崇義將該犯審明從重究治不得僅照民人倡教之例問擬工部議准閩浙總督鍾音疏稱各營操演并傾銷糧餉需硝十四萬九千八百勅請委員赴山東省採買從之豁免外洋遭風漂沒之福建船戶陳義興等承載兵米兵穀八百六十一石有奇 辛卯

上御勤政殿聽政。諭三法司覈擬剄墳絞犯。逃後二三年被獲之王學孔教子明仿照上年諭旨擬改立決一本所辦未免誤會朕意。前旨所云凡有重罪應入情實人犯經二三年後始行就獲均改為立決者原指謀故殺等犯情罪重大者而言以其事關人命應即抵償若復潛竄稽誅其情尤為可惡一經弋獲自應決不待時以戢兇惡而申憲典若此等剄墳人犯雖例應擬絞入情實然皆貧民

無奈為此有司牧之責者當引以為愧而其犯實無人命之可償也即入本年情實足矣有何不可待而改為立決乎朕辦理庶獄凡權衡輕重一準情理之平從不肯稍有過當王學孔教子明即著照此辦理嗣後問擬斬絞監候之犯經二三年後始行就獲者何項應改立決何項應改監候並著刑部悉心覈議酌定條例具奏尋議罪犯有關人命應擬斬候絞候及拒捕殺人與謀故殺情罪相等

者若脫逃二三年後始行就獲均改立決至尋常命案共五十五條另單開列進呈如此等案原其初意本非有心藐法則脫逃被獲後仍照本律擬以監候俟秋審時入於情實辦理從之。御史穆隆阿奏向來考官在場閱卷時向家中取送什物例無明禁難保無弊請嗣後自初八日舉子進場後不得仍向家中取物并請交稽察外場御史遇有考官家中送物者不准放進得旨所奏是如所議

行。浙江巡撫兼管鹽政三寶疏報乾隆三十九年蕭山縣錢清場西興盈園報升沙漲地十五頃五十三畝有奇。旌表守正捐軀之山西鳳臺縣民趙二鐵妻林氏。壬辰諭曰御史穆隆阿奏請復考試繙譯舉人進士一摺所奏不可行已於摺內批示矣從前令旗人考試繙譯舉人進士原以清書為滿洲根本考試繙譯使不失滿洲本業也後因應試人員每以尋章摘句為事轉失繙譯本義

殊屬無益。因諭令軍機大臣等詳加定議。除
繙譯生員。仍行考試。以為考試中書筆帖式
之階。其繙譯舉人進士。俱停考試。若謂考試
繙譯舉人進士。旗人始能學習清書。精通繙
譯。則前此繙譯鄉會試。未舉行時。通繙譯者
又豈乏人。可見凡事惟在務實。滿洲人等果
能不失根本。不尚虛文。於滿漢諸書。勤加肄
業。精通繙譯。則生員筆帖式中書。皆可考試。
何必舉人進士。始得謂之出身乎。穆隆阿此
奏。與朕教養旗人。勤習滿洲本業之意。不相
符合。不可行。著將此通諭知之。○旌表守正
捐軀之河南永寧縣民曲廷順女曲氏。山西
寧鄉縣民王桂妻楊氏。

大清高宗法天隆運至誠先覺體元立極敷文
奮武孝慈神聖純皇帝實錄卷之九百八十

大清高宗法天隆運至誠先覺體元立極敷文奮武孝慈神聖純皇帝實錄卷之九百八十一

監修總裁官經筵講官太子太傅文淵閣大學士文淵閣領事侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

校修

乾隆四十年乙未四月甲午

孝端文皇后忌辰遣官祭

昭陵○定西將軍尚書阿桂定邊右副將軍尚書公豐昇額參贊大臣副都統額森特奏自三月至四月宜喜沿河一帶大雪臣等冒雪攻打不使賊人得以休息臣額森特率同侍衛伊里布等直取羣尼碇寨並令翼長六十等攻其左遊擊表敏循田礮而進攻其右來珠碇寨則令侍衛彰霽總兵仁和等攻打又派副都統額爾特侍衛那木扎等從碇寨

中間前進以斷賊彼此往來之路並截殺各處來援之賊其章京納亨保等帶兵為各路接續於初五日同時並進帶板片木梯度溝上碇碇寨上賊人合力抵禦得式梯以及各處賊又復合力來援官兵施放鎗礮打中皮船賊俱墮水餘賊入羣尼寨內據守復於噶喇依等處兩路悉心守禦急切難以取勝臣等公議為此時計須多方以誤之因令長清旺保祿王進泰抽出官兵於簇拉角克察爾覺兩路前進相度賊人望見之地多燃烟火作為進攻之狀其南路納木覺爾宗一帶計有防兵三千餘並令侍衛哈清阿於當噶爾拉等處酌量前進一同牽綴賊勢再渡河船料前此早經豫備因對岸崖陡道窄是以未能辦理今宜喜官兵來至河邊即當來往過渡需渡必急因將豫備船料越過格魯克古山梁擡至河濱成造使賊人望見又疑官兵或將過河截日旁之後或將順流直下相機

槍殺更可亂其心目。臣等逆料賊人必來侵擾。飭令官兵。豫為設伏。初四日夜半。果有二十賊。用船過渡。前來伏兵出擊。賊人大半淹斃。土兵止有受傷二名。得旨勉勵。速成功實。盼望不安寢食矣。○豐昇額又奏。德爾格忒土司魯珠布嘉木差病故。伊妹洋湛卓爾瑪。遣其頭人來營。稟稱該土司之子。年甫八歲。不能管事。伊大小頭人百姓。俱願洋湛卓爾瑪護理等語。查該土女自幼為尼。並無夫

家。歷來協辦土司事。衆番推服。現在宜喜一路運糧所需烏拉。大半取給於彼。該土司之子年幼。自應令該土女暫管報聞。○乙未上奉

皇太后幸萬方安和侍膳奉

皇太后還暢春園。諭昨據伊勒圖解送由俄羅斯逃出投誠之緯羅斯台吉色凌土爾扈特台吉敦多克車琳到京時。朕曾降旨將伊等屬人一併令在察哈爾安插。但伊等由俄

羅斯逃出時。並未攜帶家口。其妻子仍留在俄羅斯。恐伊等乘便逃回。著傳諭常青安插色凌敦多克車琳後。留心密訪。毋任逃脫。再此二人俱無妻室。察哈爾地方安插厄魯特頗多。若酌准伊等有妻室。亦可牽制其心。將此一併傳諭。常青遵照辦理。○以廣西新太協副將湯大齡為右江鎮總兵。山東巡撫楊景素疏稱。乾隆三十四年。博興縣首壘水地。三十五畝有奇。○旌表守正被戕之奉天

鐵嶺縣民李文美女李氏。○丙申

上詣暢春園問

皇太后安。諭據劉秉恬奏。此次續調赴川黔兵二千名。每日趕行三四站。或四五站。情形甚屬踴躍等語。黔兵行走迅速。兼程邁赴軍營。實屬可嘉。且向來黔兵在營。亦甚得力。所有此項黔兵。著加恩賞給一月錢糧。以示鼓勵。○又諭曰。成方身為佐領。曾充丐頭。本應照刑部所擬。發往伊犁充當苦差。但據供稱

其母伊爾根覺羅氏。一聞成方頂充丐頭。即將鞭桿對牌劈毀。不許再當。是該氏尚知顧惜滿洲顏面。殊屬可嘉。著賞給大緞一匹。以示獎勵。且念其能明大義。今已年逾七旬。並著加恩。將成方免其發遣。准留侍養。俾八旗男婦聞之。共知勸勉。○丁酉。諭曰。積福著來京。策伯克多爾濟游牧。伊弟兄今閱五年。均已服習。毋庸專派大臣駐劄照料。著寄詢慶桂。策伯克多爾濟游牧。現在應否派人。如仍

需人照料。於彼處侍衛官員內。著慶桂選員遣往。若不需人。則止。再色凌游牧。距科布多較近。伊等亦已服習。與都爾伯特。烏梁海同班游牧。如偶有事故。僅可咨報科布多叅贊大臣辦理。亦不必專派人照料。鑒儀使阿王什。及理藩院司員。均令回京。著多敏遵照辦理。外。并傳諭將軍伊勒圖。瑚圖靈阿等知之。諭軍機大臣等。裴宗錫奏據懷寧縣知縣陳瑞。面稟安徽省城福興號茶果店之金懋

明稟稱。有船戶王在祥。從江西帶來信一封。篋篋一個。信上寫王坤治元棟拜託。背面混寫坤治元年。伊一見駭異。不敢開拆。將原書呈首。及開拆閱看。書共大小四封。多有悖逆字句。篋內係符紙粗石。隨訊據金懋明供。上年曾有江西人王才宗。在伊對門居住。其兄王作梁。忽得瘋病。十月間帶領回去。求提王作梁究問。現在飛咨海成嚴拏。王作梁兄弟解安收審。並查拏單內有名各犯。嚴行究辦等語。各書雖有狂悖之詞。而語無倫次。頗似瘋人所為。至單內臚列多人姓名。或欲藉此陷害。亦未可定。但各項人犯。多在江西自應咨明海成。聽其就近拏訊。乃轉移提人犯。未免拘泥迂緩。且恐各犯在途。或有疎虞之處。更屬不成事體。又據船戶王在祥供。此書係江西省城王興懷行內幫夥吳坤託寄等語。吳坤託寄。必知書所從來。一經提訊。即可得其根據。是吳坤係此案必應質訊之人。何以

轉置不問。至店戶金懋明。接有逆書。不敢開封。即行呈首。尚屬知分守法。不應將伊拘禁。裴宗錫所辦。甚不曉事。著將金懋明。即行釋放。罰裴宗錫。賞伊數十金。著再傳諭海成。如安徽所提各犯。已經拘解安省。則聽裴宗錫審辦。若尚未拘齊起解。即著海成。將各犯提至江西省城。親行研鞫實情。定擬具奏。至其符單內。有安徽裴布政。心意不堅之語。果何所指。如各犯尚在江西。即著海成。一併訊明覆奏。如已解赴安徽。即著裴宗錫。訊取該犯。因何填寫此句緣由。確供具奏。如裴宗錫因與已有干涉。稍存含糊諱飾。經朕看出。無難令其將該犯解交刑部覆訊也。將此由五百里傳諭知之。仍各將如何查辦之處。即行奏覆。○命大學士舒赫德。協辦大學士吏部尚書程景伊。內閣學士嵩貴。董誥。吏部侍郎曹秀先。戶部侍郎梁國治。內閣學士署工部侍郎彭元瑞。左都御史張若淮。充殿試讀卷官。

○戊戌策試天下貢士嚴福等一百五十八人於太和殿前。制曰。朕凝承景貺。式於九圍。夙夜欽虔。單心無逸。緝熙光明。以釐庶績。仰荷

上天

祖宗眷佑。宅中臨馭。今四十年矣。懔懔危懼。恒思久於其道者。安在。益厯保泰。彌佇嘉謨。矧髦士觀光。尤徵謹論。其敬聆諮問。贊我大猷。董仲舒言。以一貫三為王。謂王者父天母地。中立人極。呼吸感通。為至近也。洪範以五事配五行。以庶徵配五事。寓訓至深。劉向劉歆之流。揣測陰陽。穿鑿事應。班固五行志。馬端臨祥異考。皆沿其說。未免支離附會。不足與言欽崇之學。月令稱政事不以其時。則有某某之應。又小異洪範之說。其書源出呂不韋。未足深據。而周禮布政多順四時。是固聖人之典也。又何以稱焉。書曰。欽崇天道。永保天命。格天之學也。夫應天以實。不以文。古帝王

昭事之忱必有超於術數推測之外者其陳厥指歸以明其要伊古言心始禹謨言性始湯誥言學始說命儒者類能言之非獨詞章訓詁無益實用即研究理氣之精微辨別心性之存發亦未切躬修然則大學由格致以治平中庸本中和以位育必有更進乎儒生所談者能畧指其樞要歟六經言中言一言敬言仁義雖意指各殊實則同條共貫也可約畧言之歟宋儒程子朱子所以啟沃其君者至為純密堪與經訓相為表裏而范祖禹帝學一書指陳實事真德秀大學衍義參證史書其亦有可以互相發明者歟今將行往聖之心傳粹然一出於正其道安在洪範八政食居其首儲蓄素具以待不時有備無患之道也常平社倉二法迄今並行成規具在多士諒聞之熟矣惟是常平之法恒待穀貴出糶抑其價而使之減乃宋張詠於年荒米少之時則大增市價恣其多售而運販雲集

其價轉平民食以裕將出奇而偶中乎抑深籌乎盈虛消長之勢而欲取姑與可操勝得乎朱子行社倉法世號良規其春借秋歛加息以償疑與熙寧之青苗約畧相似而利病迥殊其得失之故能一一指陳歟朕蠲漕截糧為民足食計者至周且裕有經理常平社倉之責者宜何如共體朕意實力奉行使德澤下究歟朕表章經籍用光文治蒐羅遺典咸集石渠特簡儒臣俾司編纂亦既具有條理矣顧四庫之藏浩如淵海必權衡有定去取乃精昔董仲舒請罷黜百家專崇孔氏陶宏景則一事不知引為深恥今將廣收博采而傳注時多曲說裨官不免誣詞異學混儒墨之說偽體濫齊梁之艷於人心世教未見有裨如但墨守經師胥鈔語錄刊除新異屏斥雕華則九流之派未疏七畧之名不備抱殘守匱亦難語該通至於忠臣孝子或拙文辭宵小僉壬間工著述文行相左彰瘡安從

他如畧藝編摩以後晁陳著錄以前門目各殊規條歧出此增彼損甲合乙分不有折衷孰為善例多士下惟有日宜以知人論世為先務其各區陳醇駁以徵稽古之功夫本敬天以勤民念典學以積道養民而功惟敘觀文而化以成斯黼宸出治之源宜草茅家修所裕也爾多士其誦言夙昔所學臚著於篇毋隱毋汎朕將親逮焉以山東臨清協副將烏大經為江西南贛鎮總兵庚子諭據

伊勒圖奏塔爾巴哈台等處綠營屯田准各該處辦事大臣按照地方情形查覆請仿照伊犁烏魯木齊等處議定分數分別辦理其巴里坤哈密遣犯種地交糧應照該處兵丁一例勸懲等語著照所請行○以故雲南開化府土經歷周震子尚德襲職辛丑上詣暢春園問

皇太后安○還宮御乾清宮召讀卷官入親閱定進呈十卷甲第諭軍機大臣曰富勒

渾所奏沙壩地方賊番施放夾壩多不過二十餘人兩次潛來俱經官兵擊退且有殲斃之人窮番自必畧知敬畏不敢屢出嘗試所奏向內地撥兵添設之語殊可不必後路糧臺安設已久各處防兵本自敷用其間或有今昔異宜之事原可因時調劑酌量抽派況前經傳諭該督等令各營夫役自行練習技藝以資防護此次即有壯夫馬成龍等擊斃賊番之事可見臺站夫丁業已各知自衛再

於附近處所量為抽撥惟當嚴飭各路員弁督率兵夫實力防禦又何必於大功將成之際復向內地州縣紛紛添撥乎並著傳諭知之○以盛京工部侍郎景福為兵部右侍郎壬寅

上御太和殿傳臚賜一甲吳錫齡汪鏞沈清藻三人進士及第二甲王春煦等五十二人進士出身三甲張士凱等一百三人同進士出身○幸圓明園定西將軍尚書阿桂定邊

右副將軍尚書公豐昇額。參贊大臣副都統額森特奏。宜喜進攻一局。為此時緊要關鍵。必須木思工噶克及得式梯。兩處同日攻打。賊人必難接應。勒吉爾博山梁。自上而下。過木思工噶克了口。突起一峯。上有木城一座。大礮三座。互為犄角。一得此處。則其下山脊之各礮。即可順梁下壓。臣等於十三日。派書麟。格勒爾德等。攻木思工噶克了口礮卡。又派副都統額爾特。侍衛那木扎等。攻羣尼正面礮座。侍衛巴三泰等。從旁攻打。賊人悉力抵禦。而勒吉爾博山梁。及沿河一帶之賊。齊來救援。官兵攻至辰刻。始行酌撤。是日。臣阿桂。即將攻打木思工噶克了口。官兵部署。派烏什哈達瑚尼爾圖等。攻搶了口山峯木城礮座。副將曹順等。攻取山右礮座。侍衛穆哈納等。攻取山左礮座。副都統福珠里倭昇額。書麟。總兵特成額。海祿等。帶兵各路接應。總兵官達色。劉國樑。烏爾納等。截殺各處來援。

賊衆富興。保寧等。攻打勒吉爾博山梁中間塞古羅木礮寨。以為牽綴。並豫備木植一俟官兵得手。趕掣木柵。臣豐昇額。額森特。亦於是日。將沿河官兵部署。臣額森特。同侍衛那木扎等。攻搶羣尼礮寨。副都統額爾特。侍衛彰露等。從左合攻。總兵仁和。攻打來珠寨落。副將西德布等。從旁攻打。遊擊靈山等。攻打沿河各寨。均於十四日子刻前進。臣阿桂。豐昇額。分路督率調度。其攻打木思工噶克山峯各官兵。烏什哈達等。潛越攀登。鎗石齊發。遊擊梁朝桂等。先搶東北隅大礮礮。一齊擁入。參將國興等。衝入勦殺。亦將木城攻獲。穆哈納等。又將山峯左礮座。曹順等。將山峯右礮座。同時攻克。殲賊甚衆。其餘官兵。即從康薩爾。直至了口山峯一帶。連掣木柵。占據至。攻打沿河礮寨之兵。均攜帶木柴。堆積羣尼寨下。放火延燒。賊人多被燒斃。至北路官兵。先於十二日。進攻甲索。搶獲大礮九座。石卡。

一座至了口正路上雖有賊人碉卡將大礮運往轟推不難克取一得此數處礮寨竟可直壓勒烏圍諭曰阿桂等奏分攻榮噶爾博下面木城又攻克木思工噶克了口礮座官兵即從康薩爾直至了口一帶山峯連擊木柵占據至北路明亮之兵先於十二日進攻甲索搶獲礮座一日而收三年未竟之功將軍等調度有方將領弁兵亦俱實心奮勇甚屬可嘉所有阿桂豐昇額等及在事出力之

將弁兵丁俱著交部查明議敘其尤為出力之三等侍衛穆哈納叅將國興遊擊梁朝桂俱著加一等即行陞用○癸卯定邊右副將軍廣州將軍明亮叅贊大臣內大臣都統海蘭察副都統舒常奏自初九日天氣放晴酌派教成帶漢土兵二千五百名於十二日先攻甲索一面即派叅領噶塔布帶兵接應旋據教成稟稱五更時將到山頂督同副將常泰叅將瑚圖禮哈芬布遊擊銜馬應詔都司

彭承堯等分作三路直逼礮根將要隘三礮立時攻破又搶占左右兩山賊礮七座已刻以後將接連俄坡之東山賊礮四座亦經占據統計前後奪取戰礮一十四座等語甲索既經得手則宜喜一路更覺勇氣倍增臣等查達爾圖以下得楞一帶山岡綿延二十餘里其上礮卡甚多隨派科瑪進財保分攻得楞大礮三保和隆武奎林珠爾格德等分隊取路上攻烏爾圖那遜帶兵在後接續其向

東山腿下臨河之處尚有賊礮聯絡其間派令福康安佛倫泰泰斐英阿帶兵攻取至十三日子刻陸續進發臣海蘭察帶兵策應得楞各隊臣明亮舒常於達爾圖木克什等處分頭督率旋見三保和隆武等官兵各將所指之礮先後攻克併奪獲附近石卡數座而福康安等搶奪石卡二座之後即乘勢壓下復搶奪石卡一座各處賊人紛紛奔潰被我兵擊斃約有二百餘人生擒賊番七名現在

官兵各將所得地方嚴為守禦及從溝內前去之路當即共拏木城九座以便運送火藥口糧惟達爾圖前廠以至得楞實因濠深地險俱難克取然得楞以下各碉卡全被我兵搶占賊人失勢臣等一面將末後兩起新調川兵於十三日已到橋頭催集上山尅日直下河沿非惟達爾圖等處賊人立見竄散即沙壩山喀爾西等處皆已攔截在內自可不攻而得諭曰明亮等奏攻克甲索宜喜並統

衆下壓各情形將軍叅贊等調度有方將領弁兵俱能奮勇出力甚屬可嘉著交部查明議敘總兵敖成統兵攻克甲索尤屬勇往超羣著賞給僧格巴圖魯號以示獎勵○諭軍機大臣曰明亮北路情形與阿桂西路不同西路雖避克爾宗等寨未經攻得然其地尚隔一峯即得式梯韋尼等寨亦在河沿並居丫口之下今阿桂從丫口山梁下壓賊人自無由在後抄襲至北路之達爾圖喀爾西等

處現為官兵截住其賊諒可不攻而潰但各處賊衆尚多設或乘我下壓之時從後路潛出滋擾不可不慮此等機宜明亮自能見及但恐伊等銳於進取防範或不免稍疎所關匪細著傳諭明亮等將達爾圖等處後路留心防護勿使賊人得以窺我之隙稍滋事端○旌表守正捐軀之山西偏關縣民楊正妻黃氏○甲辰

上詣暢春園問

皇太后安○四川總督富勒渾奏沙壩為糧運正路將來合兵進攻運道亟宜肅清臣於梭洛柏古喀爾西大板昭撥兵一百名暫赴該處但大板昭一帶亦係糧運要地前撥之兵不能久留沙壩現在咨商提臣長青將馬爾當一帶官兵酌調安設沙壩之松坪等處諭軍機大臣等大板昭一帶為糧運正站防守尤宜嚴密現在富勒渾等酌將後路官兵抽撥安設自應如此辦理仍著富勒渾旺保祿

王進泰長青等督飭各卡隘一體嚴密防禦勿使稍懈○乙巳內閣翰林院帶領壬辰科散館修撰編修庶吉士引見得旨此次散館之編修俞大猷業經授職其清書庶吉士黃壽齡平恕李堯棟茅元銘許兆椿周厚轅俱著授為編修王坦修著授為檢討漢書庶吉士余集沈孫璉朱紱潘曾起蘇青鰲裴謙百齡李鎔莊通敏鄒炳泰邵晉涵方煒莫瞻萊朱攸閔惇大周永年俱著授為編修彭元琬蕭九成圖敏王汝嘉黎溢海張家駒王福清俱著授為檢討王兆泰陳國璽陳科錫俱著以部屬用此次因辦理四庫全書需員纂校是以散館人數較上次少而留館者轉多後不為例○定邊右副將軍廣州將軍明亮參贊大臣內大臣都統海蘭察奏十四日臣海蘭察及奎林和隆武福康安等率同侍衛章京及綠營將弁分路從薩克薩谷同時並進我兵躍入賊卡所向無前將薩克薩谷山

梁全行攻獲復於各要隘分布埋伏番衆乘夜上山搶奪新立營盤俱為我兵擊退至十五日達爾圖得楞沙壩山各處賊人俱棄碉潛竄我兵追殺殲斃無算是日辰刻阿桂將豫備船隻運至河干往來渡載當經福康安佛倫泰等帶兵將斯年木咱爾及斯聶斯布羅兩處寨落悉皆攻克自東至西環山五十餘里各處寨落搜檢無遺現又飛調日旁留守舊兵以便併力前進諭軍機大臣等此次攻勦得勝明亮調度有方海蘭察福康安尤為出力均屬可嘉明亮福康安俱著授為內大臣海蘭察前此已授內大臣著賞給御用荷包以示鼓勵俟大功成時自有殊恩懋賞現據明亮等搜查該處五十里內所有數百餘寨落並無糧石存貯賊衆之乏食可知今兩路大兵會合自即乘勝深入掃穴擒渠佇聽捷音督理糧餉前任四川總督劉秉恬奏臣於十七日見將軍明亮等十四所發之

摺傳牌內填寫。自基本斯丹當噶拜發。是必我兵下壓。業已得手。查從前西北兩路軍營。雖乘船過渡。亦時可往來相通。因日旁宜喜沿河賊人。尚未廓清。是以糧石須兩路分運。今我兵得勝。知此一帶已無賊人拒守。一切糧餉軍火。自應由西路之格魯克古等處渡河。遞運北路。不必仍繞北路。從噶克等處轉致紆折多費報聞。丙午諭曰。御史孟邵奏會試磨勘簽出應議之許士煌一卷。原係詩三房李殿圖呈薦。經主考取中。撥入詩四房白麟名下。今白麟固應照例處分。其原薦之房考。轉得置身局外。似覺偏枯。請勅部釐定處分。以昭平允等因。一摺。朕初閱之時。以其言為近理。及召見軍機大臣。詢以此事。據大學士于敏中奏稱。向例撥房之卷。原儘受撥之房考覆閱。必其文果當意。方交內監試。改用薦條。如閱有疵類。不願受撥。主考官亦不能相強等語。改撥之卷。既由受撥房考閱定。

方換薦條。即與本房呈薦無異。且聽其自擇。並非主考所能抑勒。無虞滋弊。至受撥以後。即認該房考為房師。與原薦之房無涉。則功過皆當任之。遇有處分。乃所應得。更不得謂之偏枯。是此事惟在各房考慎之。於始勿以貪得門生。率意濫受。自不致輕罹處分。譬之各部院辦事司員。如實有所見。不妄畫策。或與他人兩議。原所常有。若其言果是。堂官亦當從之。房考之於改撥試卷。事正相類。即有處分。仍由其人之自取耳。科場中委曲事例。朕實不知。而辦理庶務。一衷於理之至。是從不稍存成見。如此。孟邵此奏。不必行。並將此通諭知之。又諭。據管理和郡王家務額駙福隆安具奏。和郡王馬廠蒙古吉里克控告王府首領太監李雲。去年同護衛費爾蘇什長定保。前赴邊外查看馬廠。婪索達實什物一案。朕已交內務府大臣等審理矣。王府太監出外滋事。最為惡習。伊等出外滋事。反致

伊主被累。不可不嚴加懲治。著交宗人府傳諭各王公。嗣後務各約束太監。不得輕遣出口。倘有違制者。朕將伊主一併治罪。並通諭各關口。嗣後王公府之太監。若有並無執照。私出關口者。一面擒拿解京。一面奏聞。併令宗人府。不時稽查。惟是當朕駐蹕避暑山莊。木蘭行圍之際。其京中公主。格格。福晉。及居住蒙古地方之格格等。特遣請安太監。亦難禁止。其應如何定例稽查出入之處。著軍機大臣。會同理藩院內務府議奏。尋議。向來游牧地方之公主。格格。遇有遣太監進京。均自扎薩克。支領印憑。京中之公主。格格。遇有遣太監出口。均呈報理藩院轉行兵部。支領印憑。惟當

皇上駐蹕熱河。木蘭行圍之際。京中公主。格格。福晉等。俱任其差遣。不給印票。難以稽查。臣等酌擬。口外游牧之公主。格格。遣太監進京請安。仍照舊例。呈報扎薩克。支領印票。外京

中居住之公主。格格。遣太監前赴熱河請安。亦呈報理藩院轉行兵部。支給印票。王公福晉等。遣太監赴熱河請安。各呈報本旗轉行兵部。給與印票。從之。軍機大臣議覆。署禮部尚書素爾訥奏。已里坤理事通判。與領隊大臣。向未定有文移儀注。請嗣後往來文移。照府廳申詳司道之例等語。查府廳為司道專屬。與領隊大臣之僅有旗務交涉者不同。素爾訥所奏。未為平允。領隊大臣。係特旨派

往之員。與奉差各省學政相倣。向例學政如係三品大員。府廳謁見。與督撫同。至四品以下之學政。府廳文移。例用申詳。其學政接見府廳之儀。與督撫見司道同。領隊大臣。與理事通判。文移儀注。請照府廳見四品以下學政例從之。調鑲黃旗蒙古副都統額森特。為鑲藍旗滿洲副都統。以鎮國將軍弘嵩。為鑲黃旗蒙古副都統。以故達爾漢親王固倫額駙色布騰巴勒珠爾子鄂勒哲特穆爾

額爾克巴拜襲爵。蠲緩甘肅皋蘭金縣狄道安定會寧山丹東樂古浪平番寧夏西寧大通肅州王子莊高臺等十五州縣旱災額賦被災重者分別賑恤并借給籽種旌表守正捐軀之河南內鄉縣民李桐妻程氏河內縣民張王受妻王氏是月署湖廣總督湖北巡撫陳輝祖奏查定例運解餉鞘數至十萬兩以上酌派該營汛附近之將備分起護送竊思護餉專派將備固屬慎重第千把亦係管兵之員果遴委得人原多可用請嗣後楚省衝途各營遇解十萬兩以上餉鞘除責本營將備遵例親押外若鞘多照料難周或往返不及者仍准選派本營千把帶兵將後起押送得旨此在汝酌行耳

大清高宗法天隆運至誠先覺體元立極敷文奮武孝慈神聖純皇帝實錄卷之九百八十一

大清高宗法天隆運至誠先覺體元立極敷文奮武孝慈神聖純皇帝實錄卷之九百八十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部二庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲黃旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將等奉

教修

乾隆四十年乙未五月丁未朔諭軍機大臣

等戶部奏鳳陽關乾隆三十九年分征收贏餘比較上年短少七千八百餘兩請交該督撫委員徹底清查一摺已依議行矣該關歲收銀兩向俱有盈無絀乃自乾隆三十七年以後短收銀七萬餘兩三十八年較常仍有短缺今三十九年較之七年復短收七千八百餘兩是該關自三十七年缺少過多以來不但不能少復且有年虧一年之勢又將何所底止至查上年所少銀數棟文任內尚止

缺銀八百十兩零而狄咏箎署任不過三十

八日竟短少至七千餘兩之多雖稱因上游

水淺重載難行何以狄咏箎署任時適逢其

會所言殊難深信况狄咏箎之為人顛頑而

滑向在直屢經方觀承保薦及用為知府以

後細察其人頗無足取恐其在直心有所恃

於吏治無益是以調任安徽前歲昨歲俸滿

卓異兩次引見朕留心察看並未見其少有

出息今伊署任內虧缺如許恐其中或有別

項情弊亦未可定著傳諭高晉派委誠幹大

員前赴該關密行查訪如狄咏箎有徵多報

少及捏稱缺短情節即據實奏毋稍徇飾

○旌表守正捐軀之河南魯山縣民崔呼吃

妻張氏○戊申

上詣暢春園問

皇太后安○給陝西寶雞鳳縣留壩廳褒城沔

縣寧羌等六廳州縣水衝房屋修費銀四千

九百九十兩有奇○旌表守正捐軀之河南

內鄉縣民馬誨妻陳氏○已酉

孝誠仁皇后忌辰遣官祭

景陵○諭曰朱珪現准來京陛見俟到京後另降諭旨其山西布政使員缺著黃檢補授農起前因湖南臬司任內審詳全淑士命案率轉錯誤部議降調其處分本屬因公此案經撫臣飭駁後農起因接署藩篆未及更正免議今觀其材具尚屬可用所有山西按察使員缺即著農起補授仍將降級之案帶於新任

任○兵部議准山東布政使國泰奏東省逆匪滋擾後現在嚴查餘黨陸路易稽水道難周請添設巡船三十隻從之四川總督富勒渾奏查沙壩現在安設糧臺小沙壩係在沙壩薩拉通中之地均關緊要至三松坪為沙壩上站糧臺並應添兵防範現抽兵二百四十名於小沙壩安設一百名沙壩一百名三松坪四十名臬司李世傑復撥民壯六十名協守三松坪臣等仍督率巡防嚴堵得旨

嘉獎○庚戌

上御勤政殿聽政諭前總管內務府衙門奏商人義和泰呈請展限交銀一案因其事尚屬可行已依議矣是日召見金簡詢係何人收呈奏稱不知何人接收數日後召見邁拉遜詢及此事奏係六阿哥收呈交衙門公辦又數日復詢之英廉則稱忘係何人所收各等語衙門中同辦一事豈有不知呈所從來及遺忘何人收呈之理不過邁拉遜據實覆奏而英廉金簡不免含糊隱諱耳蓋英廉金簡在內廷年久心靈曉事明知阿哥不應收呈恐言之與阿哥有礙故不肯明言殊屬非是英廉金簡俱著交部嚴加議處皇子派令辦事如無過失大臣等必不能造言誣陷設有其人斷難逃朕洞鑒亦無從逞其伎倆若行事稍有不合又豈大臣等所能瞻顧隱瞞至六阿哥派管內務府事收呈本非其所應為恐相沿日久跟隨阿哥人衆或有潛行藉

端需索之事。究與阿哥聲名有損。不可不防其漸。並將此通諭知之。○蠲免直隸霸州保定。文安。大成。寧河。河間。獻縣。阜城。肅寧。交河。景州。東光。天津。青縣。靜海。滄州。南皮。鹽山。慶雲。天津府同知。冀州。武邑。衡水。武強。安平等二十五州廳縣。乾隆三十九年旱災額賦。

辛亥

上奉

皇太后幸萬方安和侍膳奉

皇太后還暢春園。○壬子

上詣暢春園。問

皇太后安。○定邊右副將軍廣州將軍明亮奏。本月十六日。由基木斯丹當噶下壓東南。因連日大雪。暫停進兵。於二十一日。派奎林等分路進發。我兵奮勇爭先。賊人殲斃逃散甚衆。各處山腿寨落焚燒一空。至教成現在甲。索帶兵下壓。將俄坡木克什一帶碉卡占據。海蘭察等復帶兵赴西路協勦。從此可以迅

擣勒烏圖。諭軍機大臣曰。明亮等奏攻克基木斯丹當噶山腿賊碉。所辦甚好。奎林等攻碉出力。均屬可嘉。統俟攻得勒烏圖一併交部優敘。現在阿桂等統兵自木思工噶克下壓。計日可得噶爾丹寺。明亮進至臨河。自必於勒烏圖對面搭橋過河。兩路會合夾攻。勒烏圖自可剋期攻克。佇聽捷音。○癸丑

上命

令懿皇貴妃行百日祭禮

皇十五子額駙奠酒。○諭黔省兵丁。節次調赴川省。征勦金川。在營打仗攻碉。最為得力。屢經酌加獎賞。今大功計日可成。伊等家屬在黔。雖有月糧足資養贍。朕今軫其勞績。宜昭逾格優施。著加恩將貴州各營前後調赴川省兵丁家屬。各賞給半月錢糧。以嘉勤事。而示體恤。該部遵諭速行。○諭軍機大臣等。貴州調赴川省之兵。在軍營最為得力。是以明降恩旨。格外優賞。但邇年調撥黔

兵為數稍多。該省地係苗疆。恐營中存兵較少。不足以資彈壓。甚有關係。今圖思德現在雲南署理督篆。於黔省諸事。難以兼顧。韋謙恒。又係書生。雖於地方事務。尚能認真辦理。而軍務素所未嫻。寶瓊現署提督苗疆重任。乃其專責。不可不加意經理。苗民久遵王化。漸習馴良。果能駕馭得宜。自皆寧帖。至各處附近苗疆防守兵丁。俱應選補足額。且擇勇銳嫻習者。撥往。仍宜隨時訓練。并查各營有缺額應挑者。即行募選補足。並當嚴飭兵役。勿至苗峒。稍有需索滋擾。違者盡法懲治。則苗衆自各相安。仍以此次加賞赴川兵丁眷屬錢糧之事。曉諭在營各兵。俾知効力行間。勉著勞績者。不但本身受賞。兼且優恤其家。使各兵倍知觀感鼓舞。該提督辦理此事。尤宜不動聲色。勿稍露整飭防閑之迹。將此由六百里傳諭寶瓊。並韋謙恒知之。仍各將作何辦理緣由。即行覆奏。○甲寅。諭據阿桂等

奏官兵攻克下巴木通碉柵。將勒吉爾博一道山梁。上下碉卡掃清。及乘勝占奪得式梯官寨。並分兵攻克榮噶爾博山梁。碉卡焚搶噶郎噶勒赤爾等處寨落。共計攻克大碉一百數十處。木城數十座。寨落二百餘處。寨房一千數百間。殺賊三四百名。生擒賊十名。奪獲礮四位。及牛羊鳥鎗等物。現在連奪木柵。用礮轟摧。自可即日掃蕩等語。阿桂等督率將士奮勇進攻。所至克捷。甚屬可嘉。所有將軍。叅贊及領隊大臣等。統俟攻得勒烏圍時。一併交部優敘。其在事出力之將領弁兵等。即著阿桂查明。分別等第。咨部議敘。○又諭。據楊景素奏。東省勦平逆匪。案內所有陣亡兵丁。蒙恩卹賞者。共六十八名。除子弟現已成丁。准其入伍食糧外。尚有五十三名家屬。現皆養贍無資。懇恩酌籌優卹等語。此次兵丁究係奮勇効命。其眷屬或老幼無依。難以自圖存活。情亦可憫。著加恩於建曠項下酌

給守餉半分以示矜卹餘亦照所請行○四
川總督富勒渾奏查我兵攻獲木思工噶克
等處均須建豎木城挖掘深濠急需兵力自
無暇復令炊爨隨飭知糧員買辦燒餅一萬
餘復撥運灰麪一萬餘觔分發各鋪戶令趕
做麪餅運交軍營如遇官兵打仗時即將此
分給可省兵丁另自炊爨兵行益速再查日
旁宜喜一帶山梁全行攻得所有作固頂山
梁官兵業經徹赴前敵而隨營糧站道遠難

於運米今將格魯克古一站移設前敵適中
之地以便分運現在我兵乘勝長驅一經攻
獲勒烏圍即須添站現於附近軍營各站先
備夫三千名並採辦臺馬數十匹以備添設
新站至宜喜一路官兵既進至河岸不日兩
軍會合其糧運臺站自應就近併路運供得
旨嘉獎○乙卯

上詣暢春園問

皇太后安諭曰汪鏞傳臚不到固有應得處

分但究係新進且實因墜馬尚非有心遲誤
著從寬免其罰俸○諭軍機大臣曰高晉等
奏高堰山圩一帶臨河磚石隄工併力補修
俱四月二十五六七八等日一律告竣其排
椿越壩此時應暫留外護俟灰石牢固然後
起拆所辦甚是至所稱洪湖水勢若長至九
尺以上每遇風浪搏激堪虞水過隄頂人夫
不能站立風浪過後石上眉土多致汕掣隄
面浪拍之水不無停積現飭道廳營汛加謹

防守上下查勘隨時修補疏消不使稍有殘
缺等語高堰隄工原以防抵洪湖為淮揚一
帶保障所係綦重若湖水過長即虞撞擊汕
掣則此一綫危隄尤關險要高晉等雖嚴飭
在工員弁防查遇有被汕之工立即修補亦
不過補苴罅漏之計未能一勞永逸且恐工
員等修補之段仍屬有名無實設遇湖波增
漲隄堰難以抵當不可不先事周防期無疎
誤如所稱夏家橋一帶五滾壩之內從前湖

水長至八尺五寸及九尺以外各壩任其次第過水減洩分勢等語是該處湖水原不容長至九尺但據稱從前如此近日是否仍照前辦理他處是否與此相同未能明晰或可酌定減洩水誌勿使長至九尺自不至因風汕隄抑或洪湖蓄水不宜過弱九尺以上尚係應存之誌又不便輕議過減莫若將高堰隄工加高尺餘則雖遇夏秋盛漲不虞水長衝刷自可永資鞏固朕愛民念切時屢如傷

凡有保衛閭閻之事從不稍為靳費此項隄工加高培築果於瀕水居民有益即用至數十萬或百餘萬亦所不惜況現在征勦促浸大功指日告成無須復撥軍需於籌辦湖隄之事尤易為力著傳諭高晉吳嗣爵即速將洪湖高堰情形會同悉心籌度通盤計畫如何方為盡善永無後患之處據實覆奏該督等固不可游移遷就亦不得畏事因循若此時不實心酌籌將來稍有疎虞惟高晉吳嗣

爵是問恐不能當其罪也如果應加築隄工即一面先行具奏一面勘估奏聞候朕降旨撥帑尋奏洪湖來源甚大夏秋水發水勢大小不一歷年來水小在一丈以內水大則長至一丈四五尺勢難豫定水誌查舊有仁義禮智信五壩近年並俱封土其仁義禮三壩舊制原以宣洩八尺五寸及九尺以上有餘之水今請止將智信二壩封土如遇盛漲酌量放開其仁義禮三壩無庸封土俾洪湖有餘之水聽其以漸分洩至高堰大隄本屬寬厚土性堅凝如再加高恐遭風浪撞擊似可無庸議加惟有將各引河疏濬深通并將清口東西壩創挖到底俾湖水源源暢出力足抵黃設遇盛漲清口宣洩不及則有仁義禮三壩聽其過水以資宣洩得旨覽所奏情形畧慰亦不必更張多費矣旌表守正捐軀之河南修武縣民牛世有妻郭氏丙辰諭向來旗丁餘米准在通州變賣以資日用現

在各省糧艘陸續抵通。若旗丁於兌足正供之外尚有多餘米石情願出售者仍著加恩准其在通糶賣在旗丁等既所樂從而地方糧石益充於市價民食均為有益該部即遵諭行。○諭軍機大臣等據海成奏接准裴宗錫咨文業將王作梁等拏獲并稱此案要犯未便長途遞解致有疎虞現將各犯監禁嚴究等語所見甚是該撫發摺時尚未接奉前旨而辦理適合是裴宗錫之不曉事體相形

之下寧不有愧乎所有海成原摺著鈔寄裴宗錫閱看至王作梁訊明實係瘋病但所造逆書語多悖妄自應按律正法其所供安省各姓名係該犯妄想誣扳本無干涉且安省如店戶金懋明一接逆書即不敢開封據實呈首是該省民風尚屬安分守法所有王作梁供招之人均無庸拘訊以免拖累至王作梁因瘋經伊母鎖錮其編造逆詞伊兄王才宗自不知情竟可毋庸問及其單開裴植建

等十六人尤屬毫無干涉更不應稍有株連海成照單查拏尚不免稍過如已拘提到案即著省釋其未獲者亦不必再辦止須將王作梁一犯辦理即可完案將此一併諭令裴宗錫海成知之。○督理糧餉山西巡撫鄂寶河南布政使顏希深奏從前大兵分路進剿軍糧分路運供北路自楸砥分運至宜喜遠至三十九站加以新安之得楞基木斯丹當噶二站共四十一站今北路兵已攻克得楞

一帶獲地甚廣若將北路軍糧改由西路之博楞古止須設六站即可直抵基木斯丹當噶新營每站用夫六百名共三千六百名其博楞古內即可就西路現有之臺站併運其自達思滿起至得楞三十站均可裁撤現已一面飛飭楸砥站員將北路軍糧概停一面飭將達思滿至馬鳴橋一十二站內軍糧等項儘數裁撤其自孟固至博楞古共一十八站既兩路合運軍糧軍火較多原設夫數不

數請每站加夫五百名。共加夫九千名。連前新設站夫一萬二千六百名。除裁去之站。合計省夫五千四百名。至北路卓克采等站之月米。即改運校洛柏古交收。程站既近。腳價亦省。報聞。予故科爾沁親王固倫額駙色布騰巴勒珠爾祭葬如例。謚曰毅。丁巳。諭前以促浸賊番黨助逆。暨抗拒王師。均屬罪大惡極。曾屢諭將軍。叅贊若我軍業已乘勝果入賊番窮蹙難支。而出乞命。雖投降亦不可輕宥。今阿桂明亮兩路官兵。計日可以合力會勦。迅掃勒烏圍。兼可直擣噶喇依鼠黨狐羣。自必立就駢戮。但為數究不免稍多。朕仰體

上天好生之心。有所不忍。且此輩番人。勢窮食乏。尚為其首捨命固守。亦頗足取。是用網開一面。施法外之仁。著將軍等於進兵時。豫行宣諭。賊衆如有能畏罪出降者。仍從寬免死。倘或怙終不悛。於掃蕩賊巢時。玉石俱焚。難

以復還。並將此通諭知之。又諭近日京師糧價較上年四五月稍增。自因昨秋天津河間一帶地方歉收所致。現屆青黃不接之時。宜使市糴價平。俾閭閻不虞穀貴。查照向例。於京倉內量撥米石。分給五城設廠平糴。以裨民食。所有辦理章程。著該部詳悉妥議具奏。○定邊右副將軍廣州將軍明亮叅贊大臣副都統舒常奏。本月二十三日。派令奎林等帶兵分為左右兩翼。攻破沿河賊碉。副將圖欽保又帶兵攻克茹寨。縱火焚燒沿河各寨。賊番死者甚衆。麥田十餘里。盡為我得。至甲索碉卡三十餘座。均經教成逐漸攻克。該處守兵不數。臣等在大營抽撥四百餘名。前往協守。不日即可蕺事。諭曰。明亮等奏茹寨以前一帶平壩寨落全行攻克。官兵現已截出臨河等語。明亮等董率勁旅所向克捷。甚屬可嘉。總兵教成副將圖欽保尤為奮勇出力。教成前已賞給巴圖魯號。著俟攻得勒烏

圍時同將軍參贊領隊大臣等一併交部優敘。圖欽保著交將軍等記名。遇有軍營總兵缺出即行奏補其在事出力之將領弁兵等著明亮查明分別等第交部議敘。○陞任江西布政使署巡撫李瀚疏報乾隆三十六年新建萬載新淦吉水泰和新城永新鄱陽建昌會昌興安等十一縣開墾老荒及額外新生田地十五頃一畝有奇。戊午諭向來滿洲人員簡放綠營將佐者遇有應得卹廕其

子弟照綠營例應以營員補用上年經侍郎阿揚阿條奏以此等人員若概以營員補用恐少年易染習氣弓馬轉致生疎請由部帶領引見分別旗營兩用業經八旗大臣會議准行。今思此內經引見朕定以綠營錄用者究屬年幼未經諳練驟放外省既於營務未諳一時不能得缺在家守候仍不免閒曠莫若令伊等在京營等處學習當差以資造就其應如何酌定章程之處著軍機大臣會同

該部詳悉妥議具奏尋議八旗應廕綠營都司守備及千把總等官其引見內用者請照例以旗員對品補用外用者請發交巡捕營學習三年期滿該管大臣詳加考驗如人材弓馬堪列一等者留於該營遇缺即補二等咨送兵部發往直隸督標補用三等由該營帶領引見恭候欽定至都司一項巡捕營無應補之缺如有外用都司者仍請發交巡捕營學習年滿留於巡捕營以守備借補再過

三年如果技藝出衆即以遊擊題補其平庸者亦由該營帶領引見候旨至學習各員請照例賞給馬甲錢糧一分以資差操從之○諭軍機大臣曰徐績奏河南彰德衛輝懷慶汝州五府州所屬雨勢稍微現飭該守令設壇虔誠祈禱一得甘霖即當星馳具奏等語是豫省河北一帶現在缺雨該處與直隸接壤情形諒亦相同何以周元理未經奏及著傳諭該督將各處現在有無望澤及曾否得

雨之處。即速據實覆奏。尋奏查通省入夏以來。惟四月二十四日。得有透雨。永平宣化熱河。更為優渥。餘俱未透。現在各處望雨。麥收大局已定。秋稼亦已種齊。若得甘霖。普被自必暢遂。現在虔禱雨澤。日來雲氣連陰。佇有甘霖大需。報聞。○又諭現在阿桂明亮兩路屢次克捷。計日合兵進剿。自可迅掃勒烏圍。即乘勝攻圍噶喇依。諒逆酋等不能久為支拒。但賊番狡詐百出。恐其勢當窮蹙。別施鬼蜮伎倆。或假裝逆酋兄弟。詣軍門捏稱投降。暗藏叵測。將軍等不察虛實。輕率出營相見。設或誤墮術中。所關匪細。此時務期掃穴擒渠。所有逆酋兄弟及濟惡之頭人。雖降亦斷不可恕。但彼既稱來降。即可誘而擒之以藏斯役。惟當慎之又慎。勿稍大意。所謂受降如受敵也。○四川總督富勒渾奏西路糧運向由凱歌坪直達密拉噶拉木。作為半站。大兵現攻獲木思工噶克勒吉爾博。得式梯等處。

其格魯克古一站。請裁。移設木思工噶克山梁了口。其北路餉道。由密拉噶拉木至得式梯為一站。由得式梯至色仰木扎拉為站。半其北路達思滿各站均裁。原派卓克采月米即改運梭洛柏古等處。西路米由梭洛柏古直運薩爾赤。得旨嘉獎。○命修撰張書勳編修徐天柱尚書房行走。○授一甲一名進士吳錫齡為翰林院修撰。一甲二名汪鏞。一甲三名沈清藻為翰林院編修。○陝甘總督勒爾謹疏報巴里坤屬奇台地方招徠民人三百戶認墾地九千畝。○旌表守正捐軀之山東濰縣民李向妻王氏。○己未遣官祭關帝廟。○諭今年春雨應時。遠近霑被。惟入夏後京畿雨澤稍稀。雖得雨亦未能透足。現在節逾芒種。大田望澤甚殷。自宜虔誠祈禱。以迓甘霖。著該部即速察例敬謹舉行。○又諭今日據護浙江溫州鎮印務副將弓斯發奏到巡洋會哨情形等摺。俱經展閱批發矣。

該員以副將護理總兵於例不應具摺朕非倦於披覽但體制所關不可不示以界限致啟越分之嫌嗣後各省總兵缺出有奉特旨令副將署理者即與實放人員無異原可照例奏事若由督撫奏署及派委護理者止可於接印時循例題本不得擅陳奏牘如遇巡閱營伍情形事有必須陳奏者俱著稟詳該管總督及兼提督之巡撫轉行入告將此通諭知之○蠲緩山東王家岡官臺二場竈地

乾隆三十九年水災額賦 庚申

上詣暢春園問

皇太后安○還宮 內閣翰林院帶領新進士引見得旨新科進士一甲三名吳錫齡汪鏞沈清藻已經授職王春煦戴心亨翟槐張慎和嚴福徐如澍王念孫曾廷樞于鼎戴聯奎陳宗本陳文樞許烺李廷敬章宗瀛梁上國何循羅修源戴均元徐立綱王晉吳錫麒毛鳳儀盧遂周瓊曹錫齡陳墉周宗岐汪如藻

范來宗谷際歧王允中孫玉庭饒慶捷五泰德昌戴震瑞保程光琿何思鈞俱著改為翰林院庶吉士方林憚燮胡世埏胡文銓李遽陳筆鋒沈丙覺羅長麟俱著分部學習趙鈞彤申允恭俱著以知縣即用餘俱著歸班銓選 辛酉

上御太和殿視朝文武陞轉各官謝恩 辛酉明園 諭前曾命仿朱子通鑑綱目體例纂為明紀綱目刊行已久茲披閱葉向高集見論福藩田土疏所敘當日旨意之養贍地土原給四萬頃卿等屢奏地土難以湊處王亦具辭今減去二萬頃云云則福王當日所得之田僅二萬頃今綱目載福王常洵之國條云賜莊田四萬頃中州腴土不足取山東湖廣田益之與向高言不合又所載青海朵顏等人名對音沿用鄙字與今所定同文韻統音字及改正遼金元國語解未為畫一是張廷玉等原辦綱目惟務書法謹嚴而未暇考

覈精當尚不足以昭傳信著交軍機大臣即交方畧館將原書改纂以次進呈候朕親閱鑒定其原書著查繳○大學士伯兩廣總督李侍堯奏查安南國與廣西之南寧太平鎮安等府土司地方毗連乾隆九年前督臣馬爾泰奏請開放由村隘口以通商旅自此內地人民得以出入貨販惟是愚民趨利如鶩往往滋生事端若不立法防閑內地匪徒頻往外藩滋事請嗣後給照出入止許殷實良民挾有資本者由平而水口兩關驗照放出其由村一隘照舊封禁至小販及挑夫人等仍禁止出關得旨是依議諭軍機大臣曰李侍堯請定安南邊禁一摺所奏尚是已批示依議矣外夷邊界本不應容內地人民擅出此等奸徒越境潛往每每滋生事端已往者固難以追求未然者當嚴為申禁至屬國動輒用兵勦捕雖屬奸民自取於理究屬非宜而編氓牟利異域久假不歸亦覺非體前此

由村隘口給票聽民出入一事原係馬爾泰辦理之誤至今三十餘年日積日多致內外界限不清奸良相混甚有關係今李侍堯請將由村一隘仍行封禁其單身小販挑擡腳夫停止給照驗放之處固屬去其太甚而於殷實良民挾有資本者尚准其給照出入意在使民通商但此等挾貲殷實之人必有同行夥伴難保其中無夾帶偷越者且既云貿易自必有去有來亦當如海口洋船往返皆行稽覈若僅驗照放出而不言如何定限驗回仍恐有去無還逗留外地其弊尚未能盡除又聞粵東西與交趾接壤之處除正口關隘外其餘並未設有藩籬出入無從攔阻果爾亦未妥協此等私越邊界之衆大都無業遊民該督所云如果安分謀生內地儘堪營趁自屬正理皆由歷任督撫不以邊地情形為重遂爾日就因循李侍堯堪以任事之人其經畫必能周到著傳諭該督將如何設法

禁防之處確實妥辦但其事弛懈日久今整飭伊始若稍涉張皇紛擾恐愚民易致驚疑惟當不動聲色善為措置施之以漸而要之以久於事方有實濟○定西將軍尚書阿桂定邊右副將軍尚書公豐昇額奏榮噶爾博之第八九峯下即係勒烏圍中隔噶爾丹寺及噶朗噶兩處形陡地險若於第三條山腿連弩木柵而下一到河邊則噶朗噶及噶爾丹寺不攻自破遂於二十九日一面督兵砍木植接弩木柵一面分兵擊賊殲斃甚多我兵連弩木柵十七座已至山腿中間焚燒餘剩碉寨十餘座復派伍岱等帶兵由噶爾丹寺上面分路攻噶朗噶官兵所至騰躍而登進至噶爾丹寺初二日復接弩木柵九座至沿河平壩痛勦賊衆一兩日內即可掃淨噶爾丹寺噶朗噶二處從此攻克榮噶爾博第八九峯順下直逼勒烏圍賊巢矣諭軍機大臣曰阿桂等奏官兵接弩木柵直趨河沿截

斷噶朗噶噶爾丹寺以期迅擣賊巢所辦甚好官兵屢次克捷勇氣倍增攻勦自非難事惟是賊人勢處窮蹙正如困獸之鬬以搜噬自衛其死此時功逮垂成諸宜謹慎遇有賊寨鎗石密施之處均勿冒險輕進然亦不可過於持重致涉因循將此傳諭知之

大清高宗法天隆運至誠先覺體元立極敷文奮武孝慈神聖純皇帝實錄卷之九百八十二

大清高宗法天隆運至誠先覺體元立極敷文奮武孝慈神聖純皇帝實錄卷之九百八十三

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奉常加二級軍功紀錄五次慶豐

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未五月壬戌諭曰李瀚現在

病故雲南巡撫員缺緊要著裴宗錫即由安省前往署理不必來京請訓其安徽巡撫印務著李質穎護理李質穎現請來京陛見所有安徽巡撫印務著高晉暫行兼署又諭曰薩哈岱年老著來京候旨其福州將軍員缺著承德補授軍機大臣等議覆伊犁將軍伊勒圖條奏一土爾扈特汗策凌納木扎勒遊牧請授策凌納木扎勒為盟長貝子恭坦為副盟長親王策伯克多爾濟遊牧請授

策伯克多爾濟為盟長其副盟長現無合例之員請暫停補授郡王車凌德勒克遊牧請授車凌德勒克為盟長貝子奇布騰為副盟長貝勒們圖遊牧以默們圖為盟長其副盟長無合例之員亦請停補授和碩特遊牧請授貝勒德勒克烏巴什為盟長貝子布彥楚克為副盟長等語查策伯克多爾濟乃一大遊牧非默們圖可比請令伊弟奇哩布為副盟長餘均如所請行一正盟長俱經授給印信汗策凌納木扎勒親王策伯克多爾濟均蒙賞給烏諾恩蘇珠克圖舊土爾扈特部落字樣和碩特貝勒德勒克烏巴什賞給巴圖色特啟勒圖和碩特部落字樣頒發伊等印信請即照欽賜字樣鑄給至車凌德勒克默們圖止賞郡王貝勒品級未蒙賞給部落字樣頒給盟長印信請亦用烏諾恩蘇珠克圖舊土爾扈特部落上加東西字樣一請將汗策凌納木扎勒親王策伯克多爾濟郡王

車凌德勒克。貝勒。默們圖。德勒克。烏巴什。貝子。布彥楚克。奇布騰。恭坦。公拜濟瑚等九遊牧。台吉。扎薩克。頭等。台吉。伯爾哈什哈諾海等。均為扎薩克。策伯克多爾濟之弟。閑散頭等。台吉。奇哩布。阿克薩哈勒。屬下。均有五百餘戶。尚各編為四位領。今策伯克多爾濟遊牧。更無別扎薩克。再和碩特閑散頭等。台吉。齊葉齊。屬下。亦幾一百五十餘戶。儘數編設旗分佐領。請將奇哩布。齊葉齊。並作為扎薩克。均應如所請行。一。扎薩克等請各給印信。蒙古等嚮分東西南北左右翼。照厄魯特之例。以右為大。左為次。請將土爾扈特和碩特汗策凌納木扎勒。作為舊土爾扈特南部落管理。扎薩克印信。恭坦。為南中拜濟瑚。為南右。伯爾哈什哈。為南左。策伯克多爾濟。為北奇哩布。為北右。阿克薩哈勒。為北左。車凌德勒克。為東右。奇布騰。為東左。默們圖。為西。和碩特貝勒。德勒克。烏巴什。為和碩特部落管

理。扎薩克印信。布彥楚克。為中。諾海。為右。齊葉齊。為左。均請鑄給印信。併盟長扎薩克印信。兼用滿洲蒙古字鑄給。又稱已及歲之扎薩克。請即頒給印信。未及歲之扎薩克。現有照料大臣。侍衛。請暫存部。無庸頒給等語。查既將土爾扈特和碩特一體授為扎薩克。若先頒給及歲者。恐未及歲者。不知不無生疑。况各遊牧均有照料大臣侍衛。請將未及歲盟長印信。一體頒給。遇應行印用處。令照料大臣等監視。一。請揀放協理台吉。策凌納木扎勒之弟。阿喇布坦。多爾濟。恭坦之弟。阿都齊。默們圖之子。額爾德尼德勒克。烏巴什之弟。薩克遜。均尚年幼。俟及歲後。再授為協理台吉。策伯克多爾濟。並無子嗣。亦無庸揀放。車凌德勒克之弟。巴彥達里。布彥楚克之弟。鄂齊爾。均年已及歲。俟咨部辦給等第。後再授協理外。請將閑散頭等。台吉。阿喇克巴。為公拜濟瑚。協理台吉。閑散頭等。台吉。博羅。為

扎薩克台吉伯爾哈什哈協理台吉。閑散二等台吉裕增。為奇哩布協理台吉。閑散四等台吉羅布藏巴勒珠爾。為阿克薩哈勒協理台吉。閑散頭等台吉策登。為奇布騰協理台吉。閑散頭等台吉博克班。為諾海協理台吉。閑散二等台吉巴特瑪。為齊葉齊協理台吉。一。編立佐領。約束成丁屬人。按各遊牧台吉戶。年屆十五歲。丁數以一百五十人以下。百人以上。編一佐領。未及百人者。編一管領。統計應設管旗章京。副章京各十九員。叅領二十六員。佐領。驍騎校各九十二員。每佐領設小領催四名。每管領設小領催二名。每十戶。設十戶長一人。均應如所請行。其應補人員。請飭各遊牧照料大臣。侍衛指補。造冊咨部備查。三年一次。冊封汗王貝勒貝子公等勅書。及封汗王貝勒貝子公妻室。按年頒給憲書等件。均請查例遵行。從之。以原任山西布政使朱珪。為侍講學士。癸亥。諭軍

機大臣等十五日未時以後京城得雨五寸有餘。今據順天府秦昌平良鄉兩處分寸相同。而涿州則僅得雨二寸。看來向南之雨似覺畧小。昨據周元理奏。安肅於十四日得雨八寸。其附近處所似未普遍。再十五日下午之雨。保定省城若亦均霑。周元理自即具奏。今早未見奏到。似尚未能霑被。著傳諭周元理。即將省城及畿輔各處近日得雨情形。若何據實迅速具奏。以慰廑念。尋奏十四日以來保定省城連日得雨。外府州縣陸續報到。亦俱得有雨澤。田禾長發。現在地氣潮蒸。可冀甘霖續沛。報聞。甲子。

上詣暢春園問

皇太后安。諭昨因明紀綱目考覈未為精當。命軍機大臣將原書另行改輯。候朕鑒定。因思綱目三編雖曾經披覽。但從前進呈之書朕鑒閱尚不及近時之詳審。若通鑒輯覽一書其中體制書法皆朕親加折衷。一本大公

至正可為法則。此次改編綱目。自當倣照辦理。又明史內。於元時人地名對音訛舛。譯字鄙俚。尚沿舊時陋習。如圖作為冕之類。既於字義無當。而垂之史冊。殊不雅馴。今遵金元史。已命軍機大臣改正。另刊明史。乃本朝撰定之書。豈可轉聽其訛謬。現在改辦明紀綱目。著將明史一併查改。以昭傳信。朕非於此等音譯字面有所偏袒。蓋各國語音不同。本難意存牽合。即如滿洲蒙古文。譯為漢文。此音彼字。兩不相涉。乃見小無識之徒。欲以音義之優劣。強為分別軒輊。實不值一噓。朕每見法司爰書。有以犯名書作惡劣字者。輒令改寫。而前此書回部者。每加大作細。亦令將犬旁刪去。誠以此等無關褒貶。而實形鄙陋。實無足取。況當海寓同文之世。又豈可不務為公溥乎。將此通諭知之。所有原頒明史及綱目三編。俟改正時。並著查繳。又諭曰。李中簡前在山東學政任內。因失察劣生從賊。

之案。節經吏部議以降九級調用。固屬咎所應得。但念該員銓補無期。事由公錯。情尚可原。李中簡已令其在阿哥書房授書。著再加恩賞。給翰林院編修上行走。署山西巡撫。已延三。查閱營伍。叅奏陽和城都司楊國明。年老技庸。兵部議將該管總兵哈攀鳳。照例庇例降三級調用。諭此案係因鴻臚寺卿江蘭近日條奏定議。其例未免過嚴。各省提鎮所轄將備。如果年力衰邁。弓馬不堪。並不豫行叅劾。原應酌予處分。但各標營員甚多。督撫於巡察營伍時。必不能不察出一二以塞責。若因此一二將備。即將提鎮實降。則應降調者。歲不知凡幾。安得如許堪勝提鎮者。而易之人材難得。亦殊可惜。且恐督撫等因立法過嚴。慮提鎮之輕罹叅處。即實遇衰頹庸劣之員。亦竟姑容不劾。日久流弊。轉致營伍廢弛。甚有關係。并恐督撫與提鎮或有嫌隙。即藉此為挾私報復之計。亦屬非宜。此案著

交部另行酌議不必定以實降處分。所有哈攀鳳應得議處即照此新定之例辦理。尋議請照不應重公罪例降二級留任從之。諭軍機大臣等昨日徐績奏覆綠營演習連環鳥鎗一摺。據稱臨陣制勝。鳥鎗之外莫過長鎗。訪聞少林寺僧人鎗法夙有傳授。現在招取數名來省發令各營兵丁留心學習等語。殊屬非是。少林拳棒向日雖有此虛名。但僧人既經出家。即應恪守清規。以柔和忍辱為主。豈容習為擊刺。好勇逞強。有地方之責者聞之。尚當設法潛移默化。何可轉行招致傳授。令售其技乎。且以僧人教習營兵。既屬非體。且使人傳為笑談。徐績何不曉事。若此著傳諭申飭。並令將招致各僧即行遣回。定邊右副將軍廣州將軍明亮奏初三日派奎林和隆武等帶兵由達爾圖山梁遠行分路進攻。隨密扎教成即在甲索挑派壯勇數百同時夾攻。據教成稟稱初五日統兵直抵巴

布里山脊。碉卡雪大作。我兵冒雪攻打。搶占卡隘四座。碉內賊人四散。再查宜喜克捷以來。得地甚廣。現將後路各要隘分段派員專管。自覺木交至宜喜山梁。李時擴專管。得楞以上至達爾圖山梁。並木克什巴舍什等處董果專管。得楞以下至前敵各營盤。馬彪專管。諭軍機大臣曰。明亮等奏攻獲巴布里地方。碉卡殺賊情形。教成於大雪中奮勇攻克賊碉。追殺賊衆。甚屬可嘉。著明亮等查明出力之弁兵一併咨部議叙。又所奏自覺木交起至宜喜山梁。派令李時擴專管。恐尚不足恃。宜喜軍營原留馬彪都爾嘉帶兵駐防。應令馬彪都爾嘉妥協嚴防。毋稍疎懈。命誠郡王弘暢管理圓明園八旗官兵。以故喀喇沁扎薩克公齊齊克子瑪哈巴拉襲職。

乙丑

上御勤政殿聽政。以護軍叅領阿爾薩朗為正紅旗蒙古副都統。丙寅諭今日吏部帶

領引見之盛京兵部送到指缺補放戶部筆帖式果爾敏除履歷外詢以清語全然不能果爾敏係考取筆帖式又係盛京本地之人清語自當熟練乃至全然不能實出意外盛京乃滿洲根本之地風氣日下至於此極尚可問乎況盛京設立官學原有教習果爾敏又係考取繙譯之人伊等平素如何教訓考取時又如何取中著傳詢伯興將果爾敏係如何考送之處令其明白回奏盛京將軍亦係專司教養之人如果以此為事嚴行所屬何至如此此事所關甚大並著傳諭弘昫嗣後務須加意訓飭令滿洲等學習清語以復滿洲本業若仍任其如此日就廢弛斷不姑貸命大學士舒赫德協辦大學士吏部尚書程景伊教習庶吉士丁卯諭軍機大臣等富德奏抽撥官兵二三百名前往馬尼駱駝溝一帶協防富德一路現兵甚少只可俟阿桂明亮等攻克勒烏圍時分兵往會夾攻

馬爾邦引進南路之兵會攻噶喇依自更得力又所奏逆首索諾木弟兄遣賊番在卡外喊叫投稟譯出稟詞進呈今閱其稟內所稱懇求大皇帝在我們地方上也照西藏一帶安大人官兵等語金川番衆微若蟲蟻乃妄思比之西藏佛地乎況逆首兄弟罪大惡極斷難輕宥今復敢如此措詞狂誕將來蕩平噶喇依不但其大小頭人不可寬減即散番中之稍覺桀驁者亦當察明正法以靖兇孽著將此傳諭阿桂等知之○又諭前據鄂寶等奏西北兩路大兵會合所有糧運臺站應行歸併一路已經批准允行今據富勒渾劉秉恬奏稱請將自卓克采至達斯滿十三站仍照舊安設等語富勒渾等就現在情形通盤合算較之鄂寶所籌尤為周到所有卓克采一帶糧臺著照所奏仍行酌留並即諭令鄂寶文綬等一體妥為辦理 戊辰上詣暢春園問

皇太后安。還宮。定西將軍尚書阿桂、叅贊大臣副都統額森特奏查第三條山腿將至平壩。為赤布寨有戰礮七座。回環互守。必須攻克此寨。直下河干。始無阻礙。順溝下至瀕河。則噶朗噶及噶爾丹寺俱攔截在內。初七日。派兵沿溝潛進。分頭搶入。將得思古各寨占住。由得思古寨遙而西北。有寨落數處。初九日乘勢攻獲五福等。亦從安吉山腿。迤邐下攻。克取大寨二座。因思赤布寨在山腿盡處。形勢甚陡。今官兵既克得思古。可以抄出其後。因於初十日前後合攻。將赤布寨即行攻獲。是日各領隊等又帶兵將噶爾丹寺南面寨落三處相繼攻克。伍岱等又將噶爾丹寺東西寨落並水碓一併攻得。至戌刻。於風雪中官兵設伏防範。鎗箭斃賊甚多。比至天明。即將其寺焚燒。以絕奔布爾雅教查噶爾丹寺。本係金川著名地方。而噶朗噶尤為賊人最大聚落。今統計官兵竭三日四夜之力。

將噶朗噶一帶寨落一百十餘處。戰礮三十餘座。寨房二千餘間。盡行奪獲。掃除而噶爾丹寺亦不攻自潰。前至勒烏圍。不過數里。現在趕緊添斂木柵。直至河沿。即與明亮基木斯丹當噶新營隔河相對。其榮噶爾博第八九峯賊雖死力拒守。然山上山下皆可覓路進兵。臣等相度機宜。惟期迅速集事。先掃勒烏圍巢穴。諭曰阿桂等此次攻克噶爾丹噶朗噶等礮寨。將軍叅贊調度有方。領隊大臣奮勉出力。甚屬可嘉。俟即日攻得勒烏圍後。一併優叙。至在事之將佐弁兵。並著阿桂等查明咨部。分別議叙。諭軍機大臣等。官兵全克噶爾丹寺及噶朗噶各寨。現距勒烏圍不過數里。兩路夾攻。不能久拒。但賊人平日業將各處糧食什物運往噶喇依。尚恐欲恃為負隅固守之計。今官兵乘勢進攻。一得勒烏圍。賊眾必相率竄回噶喇依巢窟。現在明亮帶兵進駐河干。若望見隔河賊眾陸續潰

竊即當酌用鎗礮在對河截擊使賊衆無所免脫至該處所有喇嘛黨助逆酋念經逞術情甚可惡除臨戰殲殪外其餘大小喇嘛均不應稍存姑息並著將軍等查明應正法者正法其餘概行鎖押解京聽候訊明辦理又諭上年逆匪王倫案內有各犯緣坐家屬賞給大臣官員家為奴者今年二月間據各旗報逃犯婦共有四口隨即嚴飭各處查拏旋經步軍統領衙門先後拏獲閻路氏郭孔氏並其幼孩三全分別正法辦理其王經隆之妻劉氏趙大坊祖母張氏至今未獲該犯屬身係女流而趙張氏并已年過八十何能獨自逃竊其中必有勾引窩留之人恐其見近京查拏緊要料難藏匿或將該犯婦潛行送回山東本籍亦未可定前經諭令楊景素就近訪拏尚未據弋獲具奏今又數月矣該犯婦究竟作何下落著再傳諭楊景素嚴飭該二犯原籍地方官及附近州縣上緊購線

躡緝務獲毋任漏網一經拏到即委委員嚴押解京交刑部審明正法並將窩藏之人一併交刑部治罪將此諭令知之仍將作何查拏情由迅即覆奏尋奏據分緝員弁稟報五月十一日在壽張地方拏獲趙張氏解省續將趙張氏之媳趙崔氏外甥孫吉族姓趙極一併獲解現在嚴訊張趙氏尚未得確供俟訊明將各犯一同解京審辦未獲之王劉氏仍嚴飭實力緝拏務獲得旨即速解京無致復脫是日起

上以夏至祭

地於

方澤齋戒三日已已

孝恭仁皇后忌辰遣官祭

景陵庚午諭曰楊昌霖因在四庫全書館纂

校書籍是以欽賜進士准其一體殿試昨進士引見該員甲第在後而江蘇省館選者已多是以未經錄用茲閱館中所進由散篇哀

輯書內春秋經解一種編校頗見實心即係楊昌霖所辦是其學問尚優楊昌霖著加恩授為翰林院庶吉士○以故奉恩將軍托錫子和倫泰襲職 辛未夏至祭

地於

方澤

上親詣行禮○詣暢春園問

皇太后安○幸圓明園 壬申

上秋獵木蘭自圓明園啟鑾奉

皇太后鑾輿幸湯山行宮駐蹕 諭此次巡幸

木蘭所有經過沿途地方本年地丁錢糧著

蠲免十分之三○又諭現在阿桂明亮兩路

軍營屢次克捷計可指日蕞功節次所撥軍

需銀兩已足敷用但平定促浸後一切善後

事宜亦不無尚需經費尤當多為儲備使諸

事倍加寬裕著於部庫內再撥銀五百萬兩

仍照上年戶部奏准之例令經由各省督撫

派員承管遞行轉解交川省藩庫收貯備用

該部即遵諭行○定邊右副將軍廣州將軍明亮奏本月初七日臣等由基木斯丹當噶迤西山腿進攻巴舍什下掃曲碩木一帶碉寨同時奎林督兵將大戰碉兩處攻克和隆武所攻碉寨賊人衝圍逃逸兩路官兵會同珠爾格德直下溝底殲賊甚多賊人復擾荊州營盤及茹寨街上我兵擊殺數十人餘俱竄走臣等於隔河用鎗礮擊打來往賊人今阿桂等已將噶爾丹寺及左右寨落勒洗則茹寨對河亦已肅清現因雨阻少晴即當整兵速進諭軍機大臣曰明亮等奏由巴舍什分路進攻奪取賊碉所辦尚好賊人當窮蹙之時仍敢夤夜潛出連擾營卡此時功速垂成諸宜倍加謹慎勿稍疎懈至所稱派都司衆神保在對岸趕築礮臺晝夜轟摧并派屯土兵用烏鎗擊打籌辦甚是前曾計及官兵攻打勒烏圍時諭令明亮於隔河用鎗礮截擊以斷賊人歸路今明亮等所奏情形與朕

前旨恰令惟當努力妥為之。至平定金川以後一切善後事宜亦需經費。今諭戶部再撥庫帑五百萬兩。此事辦成實屬一勞永逸。雖多費亦所不靳。是日駐蹕南石槽行宮。

癸酉諭軍機大臣等。前曾諭令將軍等於掃蕩賊巢時將該處所有喇嘛除在彼正法外其為首及罪大者俱解京嚴行訊辦。金川與綽斯甲布向來俱奉奔布爾喇嘛教。恐綽斯甲布土司念同教之故見將軍欲將衆喇嘛正法為之求免。著將所有喇嘛除臨陣殲戮外其就擒及投出者俱派妥員管押來京辦理。是日駐蹕密雲縣行宮。甲戌。

上遣皇六子永璿赴湯山

皇太后行宮問安。諭軍機大臣等。前據鄂寶顏希深奏徵站加夫各事宜業已允行。嗣據富勒渾劉秉恬奏將原有糧臺酌留十三站俾分路運供所籌似更周密。是以即照所奏諭令妥辦。今鄂寶等仍請照前奏辦理。或果

係各站實在情形或不免拘泥前奏意存迴護。富勒渾劉秉恬如確見前奏存留十三站及添設二站之處供應萬安原不必因鄂寶之說輕事更張。若鄂寶等所奏實為省便當行則又不可偏執已見致誤軍儲要務。總之此事功過皆富勒渾劉秉恬任之。如稍有未妥惟伊二人是問。此時俱屬空言難以折衷。歸一著阿桂將富勒渾劉秉恬及鄂寶顏希深兩路奏事之處孰得孰失秉公據實查奏。

○是日駐蹕要亭行宮。乙亥。

上遣額駙扎蘭泰赴羅家橋

皇太后行宮問安。諭據富勒渾奏前經管理松岡站員通判冀國勲擅詳雇募夫役每名日發工價一兩或五錢不等。口糧或二升或升半不等。明係有心侵欺。因委知府王立柱嚴查。茲據詳報冀國勲虧缺軍需銀八萬九千餘兩。經管積貯米石又有黷爛及騾夫領運虧短米二千餘斛。請旨將冀國勲革職拏

問並請將王立柱一併革職審訊等語。侵虧軍需情罪最為重大。今冀國勲竟敢借加給為名。以致缺短銀米累萬盈千。藐法侵帑。實出情理之外。冀國勲著革職。拏問交與署川督文綬。即速提集經手書役人等。嚴行審擬具奏。其北路總理龍安府知府王立柱。平日豈毫無聞見。直至富勒渾批查後始行詳揭。顯係知情徇隱。亦屬罪無可寬。王立柱並著革職。併案審訊。又諭淮南各商應繳歷網提引餘利。尚未完銀五百九十八萬三千一百三十八兩零。今據伊齡阿奏。自甲午七限起計十限。每限應繳銀四十六萬二百餘兩。現將甲午首季徵齊起解。其下剩未完一半。各商限於九月全完等語。此項銀兩原係普福高恒聽各商從前妄用。理應賠繳。但為數過多。雖節經展限。每年尚應完銀四十六萬有零。商力不無竭蹶。因念伊等前此之誤。尚非情不可原。而各該商近年承辦諸務。實屬

急公謹飭。且共知安分抒誠。殊堪軫念。著再加恩。將未完之項展作二十限。如甲午應完下剩一半銀兩。未能依限完清。即自午甲起限。若能如數全完。即自己未起限。俾得從容措繳。以示優恤。著伊齡阿將朕此旨傳示各商。俾益知感奮。定西將軍尚書阿桂。定邊右副將軍尚書公豐昇額。奏十四日早。臣等分兵兩隊。派總兵成德遊擊普吉保等。分路進攻。衝霧越險。潛抵了口。立將石碣八座。木城四座。悉行攻克。查遜克爾宗在榮噶爾博山陽第七峯後。隨派曹順領土兵循山陽而下。與豐昇額之兵合力併進。賊眾由牆後竄逸。遂將石寨六處。石碣十二座。平房七處。亦皆克取。臣等復督兵將第三條山腿上之柵盡行架起。並將伍岱等勒吉爾博之兵。徹至第三條山腿。換出臣海蘭察額森特之兵。併力進攻。至榮噶爾博之第八九峯。地勢更險。臣等公商。若從半山拏柵踰溝而進。用礮攻

摧即可斜上八九峯攻搶巴占。從此抵勒烏圍可無阻礙。現在應用木植砍伐運往以備應用。諭遜克爾宗一帶我兵攻取年餘尚未得手。若不將此處攻克。後路究未掃淨。今豐昇額全行奪取。實為奮勉出衆。豐昇額乃巴圖魯額宜都之孫。其果毅公爵即係額宜都傳襲。前將軍兆惠因平定準噶爾回部曾於公爵上加封四字。今豐昇額能繼其祖著於果毅字下。再加繼勇二字。以示優獎。又

諭曰。阿桂等奏攻得遜克爾宗碉寨甚多。現籌從榮噶爾博進兵。直擣勒烏圍賊巢。所辦甚好。遜克爾宗為阿桂緊要後路。今將所有碉卡盡行攻克。則西路官兵後路更覺清肅。深為欣悅。此次攻碉得勝。係豐昇額帶兵奮勇所致。甚屬可嘉。已另降諭旨優獎。總兵成德遊擊普吉保亦俱勇往超羣。各立功績。統俟攻得勒烏圍時。交部一併優叙。遊擊普吉保著加恩以副將用。遇缺即補。其餘在事出

力之將佐弁兵並著阿桂查明交部議叙。諭軍機大臣曰。阿桂等奏自榮噶爾博由直古腦一帶拏柵下壓。固屬得勢。但閱圖內情形。若由赤布寨至冷角寺沿河直進。逕抵勒烏圍。似較直捷。著詢問阿桂。此旨到時如勒烏圍尚未攻克。或照此籌辦如何。又曹順屢次出力。自應格外加恩。除交軍機處以總兵記名外。著傳諭阿桂。如軍營遇有總兵缺奏請陞補。是日駐蹕兩間房行宮。丙子諭

軍機大臣曰。竇瑣覆奏彈壓苗疆各事宜一摺。已於摺內批示。據稱今春添派赴川兵丁。所有苗疆各營均係分別地方緊要次要酌量辦理。其次要者兵雖多亦令減派緊要者並未派及。仍嚴飭各協營遵照部行演習進步連環鎗法。而於苗疆尤令勤練。總以不動聲色密為彈壓。並嚴禁兵丁入寨滋擾。以期寧謐。各等語。所辦深得竅要。惟當實力行之。至韋謙恒覆奏防範苗疆一摺。請將黔省停

補名糧四百餘名。全數賞給古州一帶標營。均勻募補。以資防守等語。此事可以姑緩。現在征勦金川。大功指日告蒞。衆兵凱還。在邇其苗疆各營兵丁。有曾經挑派者。彼時即可補還。設或尚有缺額。亦可至期再行補足。毋庸豫為籌及。若以通省停募之額。全數增給苗疆。無故添兵。恐苗人聞之。轉生疑畏。非所以示鎮靜。將此諭令韋謙恒知之。又諭噶爾丹寺。為金川第一大廟。喇嘛衆多。莎羅奔在彼聚集念經已久。意在詛呪官兵。其地必有鎮壓之物。阿桂等留心察驗。於寺基內外及附近方圓地面。如有可疑形迹。即行剗挖。剗得鎮物。即速投之水火。以破其法。此等原屬邪不勝正。本無能為。今若掘發而盡除之。自足使人心暢快。設或無實迹。可憑。即將寺内外地皮剗起數尺。遇有木石等物。形迹可疑者。悉行取出焚燒。亦足以釋衆人之疑。而壯其膽。於進軍自更有益。○是日駐蹕常山。

峪行宮。○是月河南巡撫徐績奏鹿邑縣拏獲樊明德邪教一案。各屬先後獲解人犯九十三名。逐一嚴訊。據供樊明德本係農人。因病延楊集醫治。自此往來甚密。楊集傳給樊明德混元點化書。并大小問道經。囑勿宣露。楊集故樊明德遂倡立混元教名目。誘人學習。圖騙錢財。令胞兄樊成德姪樊世甫等。一併入教。嗣是辛永祿胡添文歸教送錢者紛紛。遂議定每年清明五月十五九月初十。二月初一等日。聚會樊明德家念經。又編出波彌斟波彌天口訣。令辛永祿秦玉樓等各自收徒數十人。或數人不等。本年三月內經鹿邑縣知縣沈佐清訪聞。當將樊明德等密拏。取出全書到案。語多悖逆。嚴訊樊明德係何人編造。該犯堅供實係楊集所傳。其中語句率多豫防荒亂。嚇人修善之意。並無謀為不法情事。復嚴訊各犯供並相符。但樊明德倡立邪教惑衆斂錢實屬罪大惡極。應照大

逆律定罪。餘犯各分首從定擬。下三法司覈擬。尋奏入。得旨。樊明德著即凌遲處死。楊集著戮屍。俱著梟示。辛永祿樊成德樊世甫樊世貴樊世正樊世祥樊世太均著即處斬。胡添文王廷亮著即處絞。樊宗年秦玉樓劉文炳俱依擬應絞。著監候。秋後處決。督理糧餉前任四川總督劉秉恬奏。四月二十八日西路軍營牌傳各站催調裹帶麵觔。隨令揪一砥糧員在附近各店收買。即日買得麵八千

觔。並三松坪糧員稟報。共採買二千餘觔。合計一萬餘觔。於二十八、九兩日運往。又據維州運到五千觔。一併發往西路軍營。嗣後再有運到之麵。臣已飭知各糧員酌量分運。務期兩路裹帶均無缺乏。至軍營需用銅觔。查日爾拉之山腳站原有存銅一千五百觔。當經發往。並查揪砥有存銅一萬八千七百餘觔。即於此內先撥出一萬觔發運前進。再軍營既需銅製礮。自必需鐵鑄子。查撲頭站存

有生鐵十餘萬觔。現已飭知各糧員每日搭運四五千觔。以資接濟。得旨嘉獎。○又奏。查沿途各站米數。從前自大板昭起至軍營止。共存糧五萬餘石。嗣後因各站料理兵行發運較少。今計存糧止四萬餘石。現在北路軍糧歸併西路需用浩繁。况當大兵乘勝深入之際。事關兩路儲糈。尤不得不豫為籌備。臣隨於十六日自營回至揪砥。加緊查催。務期軍糧充裕。得旨嘉獎。

大清高宗法天隆運至誠先覺體元立極敷文奮武孝慈神聖純皇帝實錄卷之九百八十三

大清高宗法天隆運至誠先覺體元立極敷文奮武孝慈神聖純皇帝實錄卷之九百八十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履程

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書鑲黃旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將尋常

救修

乾隆四十年乙未六月丁丑朔蠲免湖北漢

陽孝感安陸雲夢應城應山隨州京山鍾祥

荊門天門黃安襄陽宜城棗陽十五州縣并

武昌武左荊州荊右荊右襄陽六衛德安一

所乾隆三十九年旱災額賦是日駐蹕喀

喇河屯行宮戊寅諭朕此次臨幸熱河自

石槽至密雲及常山峪至喀喇河屯兩程所

有著雨清道兵丁每名著賞一兩重銀鏢一

個○是日駐蹕避暑山莊至八月庚寅皆如

之○已卯陝甘總督勒爾謹疏報巴里坤新

設宜禾縣西大墩地方新招人民三十戶墾地三千畝○庚辰予故輔國公弘曉及西安將軍富僧阿祭墓如例○辛巳諭軍機大臣等前以逆匪王倫案內賞給為奴之女犯劉氏趙張氏等脫逃未獲傳諭楊景素於本籍嚴拏茲據楊景素奏到五月十一日在壽張縣趙家壩堆地方將趙張氏拏獲現已批令即速解京嚴訊矣趙張氏身係女流又復年逾八十本屬易於蹤跡之人其自京逃回東

省必由直隸地方何以沿途毫無盤詰一任該犯逃回本籍著傳諭周元理查明趙張氏自京至壽張縣所有經過之州縣地方何以未將該犯婦盤獲之處即行據實奏○又諭據鄂寶顏希深奏松岡站員冀國勲侵虧軍需銀兩一摺內稱不敢以事隸川省咨明督臣查辦所奏甚屬取巧已於摺內批示此事前據富勒渾參奏冀國勲藐法侵帑至八萬九千餘兩實出情理之外已諭令文綬將

冀國勲革職迅速嚴訊。審明之日。即將該犯正法。俾衆知儆戒。所有冀國勲任所原籍資產。嚴行查抄。並將北路總理知府王立柱革職。將任所及在京貲產一併查封。以備抵補。冀國勲貲財之不足。但該犯侵虧銀米。為數甚多。恐王立柱查封貲財。不敷抵補。鄂寶顏希深。係北路總理糧餉大員。稽查是其專責。况該犯冀國勲承辦松岡站務。已歷三載。似此侵虧至累萬盈千。鄂寶等豈竟毫無見聞。直至富勒渾查叅。始為此奏塞責。伊等在彼所司何事。至鄂寶顏希深二人。各有分管地方。松岡站究係何人所管。自應該本管大員出名具奏。何以鄂寶顏希深二人聯銜具摺。顯有諉過卸責之心。殊屬非是。著文綬即行查明。松岡站係鄂寶顏希深二人何人所轄。據實具奏。至各路派出管理糧站大員。並非止稽查糧運遲速。凡銀糧各項有無虧短之處。皆其責成。今冀國勲虧至八萬九千餘兩。

鄂寶等豈能脫身事外。至該省督臣糧務。雖其統轄。但相隔尚遠。非若該管大臣之可以就近稽查。自應稍示分別。所有冀國勲虧短銀兩。如該犯家產及王立柱貲財。不敷抵補。即將所餘之數。著鄂寶顏希深分賠十分之七。富勒渾文綬分賠十分之三。若西路糧臺則係富勒渾劉秉恬專責。將來設有虧缺等弊。除本犯及該管之員查抄賠補外。亦著將不敷之項。令富勒渾劉秉恬分賠十分之七。文綬分賠十分之三。以昭平允。著傳旨申飭鄂寶顏希深並令文綬詳晰查辦。兼諭富勒渾劉秉恬知之。尋文綬奏查顏希深駐覺木交一路。距松岡較遠。鄂寶駐卓克采一路。距松岡甚近。是松岡站應以鄂寶為專轄。得旨知道了。如應分賠。汝即照此辦理。咨部可也。○定邊右副將軍廣州將軍明亮奏。查有額爾替一山上與基木斯丹當噶相連。下界平坡賊人據此山頂。前則設立石城。周圍木柵。

其外深挖濠溝。旁有戰礮擁衛。其後復安大石卡。戰礮各一座。為併力聚守之計。臣等隨派德赫布等。由右手壓梁。以防曲碩木賊人救援之路。舒景安等。由左手壓梁。以防克爾瑪斯底葉安賊人救援之路。隨令和隆武等。攻其前奎林等。攻其後。於十九日黎明。分隊前進。和隆武所領官兵。呼聲並起。搶近石城。賊衆鎗石如雨。遊擊范宜申陣亡。我兵力攻愈急。奪取兩礮。賊番全行殺斃。其時左右兩旁之賊。捨死來援。俱為德赫布、舒景安等四面截殺。旋即潰竄。至奎林所攻石卡戰礮。因賊番救援愈聚愈多。俱竄入礮內。抵死拒守。攻至未刻。臣等恐致多傷。令官兵撤回。其所得地方。趕建木城。派兵駐守。現運大礮轟摧未得之礮卡。俟少有殘毀。即乘勢搶奪。由此下擊木柵十五六座。即穿過平坡。擣其腹心。無難立破。諭軍機大臣曰。明亮等進攻額爾替山梁。搶奪石城礮座。並痛殲賊衆。雖未即

行攻克。亦足以壯官軍聲勢。而破賊人之膽。此次和隆武所領之衆。尤為出力。明亮當查明記檔。俟攻得勒烏圖。一併交部議敘。至遊擊范宜申。身冒鎗石。踴躍直前。以致陣亡。甚為可憫。著查其有無子嗣。另行加恩。現今大功告成。在邇。凱旋後。當照平定準部回部之例。於紫光閣圖畫功臣像。並繪戰圖。以垂示永久。番地山川險隘之處。未能悉其形勢。難於著筆。著傳諭阿桂將節次打仗攻獲之賊寨。如近時攻得之遜克爾宗。及前次攻得之谷噶喇穆喇穆。色溯普康薩爾。木思工噶克等。及明亮一路之達爾圖。至茹寨一帶。凡有經將士等實在出力奮勇勦殺而得者。查明各畫一圖。並將帶兵大臣及勇銳將領。於圖內注明。附便進呈。俟朕閱定。旌表守正捐軀之直隸南和縣民趙新年妻張氏。壬午諭軍機大臣等。官兵從榮噶爾博第八峯。並巴占礮寨進攻。現已用礮轟摧。并派將領。每

日更番帶兵搶擄以疲其力。賊衆自難久於存住。即偶因風雨。畧羈時日。亦無足慮。現又添撥部庫銀五百萬。解川貯備。軍需儘屬寬餘。阿桂等。惟當努力攻勦。速成大功。以膺茂賞。至逆酋索諾木兄弟。及黨惡之大頭人。如丹巴沃咱爾等。自揣罪重。難逃法網。必然捨死抵禦。但未必如山東逆匪王倫之情急自焚。或於進攻噶喇依時。將軍等乘其窘迫。誘諭招降。逆酋未必不妄冀倖免。如果來投。亦稍省我兵攻圍之力。而逆酋仍無所逃罪。所謂兵不厭詐。原屬無妨。阿桂等酌量行之。但不可墮賊詭計耳。○以福建臺灣協水師副將金蟾桂。為金門鎮總兵。○癸未

上奉

皇太后駐蹕避暑山莊。○甲申

上奉

皇太后幸一片雲侍膳。戶部議准。閩浙總督鐘音疏稱。寶福局鑄錢。需銅六十萬。勛請委

員往滇省採買。從之。○陞任江西布政使署巡撫李瀚疏報。乾隆三十八年新建豐城進賢宜春。分宜萍鄉萬載清江新淦新喻萬安安福永新宜黃南豐上饒玉山廣豐弋陽貴溪興安鄱陽皇子南康上猶崇義定南信豐寧都等二十九州縣。勸墾老荒。及額外新生田地山塘三十六頃九十六畝有奇。○豁除江蘇上海縣坍沒廢田三頃八十五畝有奇。額賦。○旌表守正捐軀之河南息縣民盛典

妻李氏。○乙酉諭軍機大臣曰。富德在絨布一路。原不過為牽綴賊勢之計。未必即能攻進。此時亦不宜輕舉妄動。俟阿桂明亮攻至噶喇依。其南路一帶之賊。自必窘迫。富德若察見馬爾邦等處賊人。有抽撤慌亂情形。即相機設法打進。又可添一路。攻勦噶喇依。自屬有益。富德可借此立功。務當努力。○丙戌諭軍機大臣曰。已延三奏。查抄虧缺軍需站員冀國勲家產。訊據伊親弟冀國維供稱。伊

弟兄四人。長國勲次國猷。嫡出次國維。國紀。庶出。國紀早故。國勲於乾隆十六年分析家產。國猷挈家赴京。在胭脂衛衙放賬生理。國勲將所有家私。於十七年變賣。攜帶眷口。赴京選官。歷任山東縣丞。貴州州同。四川通判。從未回家。總於京城居住。原籍並無財產存留等語。冀國勲虧缺軍需。至八萬九千餘兩之多。必有隱匿寄頓情事。今查封本籍。祇有伊庶出分居之弟國維在家。所存僅破屋數間。而國勲所有田產。久經典賣。是冀國勲現無本籍貲財。據冀國維供稱。國勲久住京師。伊同母之胞弟國猷。亦挈眷在京放賬生理。冀國勲家屬。或現與伊弟同住。或各有住宅。託國猷為之照料。甚至侵蝕軍需銀兩。暗中寄京。交國猷代為收存營運。均未可定。著傳諭英廉。即速確查冀國勲在京家產。并拘冀國猷到案。嚴切訊鞫。一一究追。毋得稍有隱匿。仍即據實覆奏。至冀國勲侵虧累萬。或因

川省程途遙遠。仍在任所藏匿寄頓。亦情理所必有。並傳諭文綬嚴密究追。毋使貪黷之人得遂侵虧私計。巴延三奏摺。並著鈔寄閱看。命編修湯先甲提督廣東學政。丁亥上奉
皇太后幸卷阿勝境侍膳。吏部議准。署山西巡撫覺羅巴延三奏稱。山西省豐鎮廳所屬張臯兒地方。路當孔道。五方雜處。向無專員駐劄。距該廳等衙門甚遠。查察難周。查有豐鎮廳所屬高廟子巡檢。缺簡事閒。請移駐張臯兒適中要地。以資彈壓。再寧遠廳所屬地方。惟東鄉最要。距該廳一百八十里。管轄難周。東鄉之後營子村。人多事冗。必須專員分駐。查寧遠廳及巡檢同在一處。又有司獄管理雜事。巡檢甚閒。請移駐後營子村。分防稽察。從之。工部議准。兩江總督高晉疏稱。海門同知在裙帶河茅家鎮適中之地。建蓋衙署庫獄。較官河汛更要。請將官河汛千總移

駐海門廳署旁。即於官河汛防兵內。抽兵二十名。同原派茅家鎮防兵十名。共三十名。以資戍守。其官河汛。即以協防大港之外委移駐。所有原防茅家鎮之外委。徹調回營。從之。

○戊子。諭軍機大臣等。前楊景素奏。於壽張縣趙家壩堆地方。拏獲犯婦趙張氏。因思該犯婦自京逃回東省。必由直隸地方何沿途毫無盤詰。隨諭周元理查明參奏。茲據覆奏該犯婦若由陸路逃回。則經良鄉涿州。至景州一帶出境。如由水路。則係通州天津運河一路潛回。并大道以旁僻路尚多。亦可繞抵東省。俟其解京。訊取確供。按其經由路徑。月日。即當分別查叅等語。前楊景素奏報拏獲趙張氏。已批令即速解京嚴訊。計日即可解到。著傳諭大學士舒赫德等。於該犯婦到案時。嚴行訊究。其自京脫逃後。係由何路潛回東省。及在何處逗留。并經過月日。逐一訊取確供。覆奏。以便飭交周元理查辦。○又諭據

巡漕御史邱日榮奏。滇省運員張綬佩。委運銅觔抵津。理應於起剝後。迅速北上。乃該員因乏運費。任意稽延。除一面移會地方官查照辦理外。應請勅下直隸總督倉場侍郎。細加盤驗。逐一查明具奏等語。著照所請。令周元理富察善等。派委明幹大員。詳查張綬佩在津剝運稽遲緣由。並前領水脚銀兩。是否因公實用。其所運銅觔。有無虧缺。即行據實查辦具奏。並諭邱日榮知之。尋奏查雲南委員張綬佩。領運乾隆癸巳年二運一起。正銅七十二萬觔。餘銅一萬六千三百觔。於六月十九日。全數運抵通州。當經盤驗。正銅無缺。僅少餘銅一千五百餘觔。面詢該員。據稱係沿途搬運起剝。磕碰零星折耗。似屬實情。又查該員於雲南湖北江南三處。共領得水脚銀六千四百八十二兩四錢。為沿途船戶支領之用。又領有雜費銀九百五十八兩。為置備筐篋繩索。夫工犒賞等用。至途中起剝。守

陳等費俱應運員墊用。差竣旋滇補領該員墊銀一千五百餘兩。俱有所在。地方官印結為據。運抵天津。無貲可墊。在津竭力設措。始得開行。查該員自瀘開幫。迄今抵通。其實歷行程尚在定例十一箇月之內。亦未逾限。是該員並無情弊。請交戶部查覈下部知之。

己丑諭曰。陳輝祖奏兩湖在川征兵有解川添整衣裝之項。應於各名下坐餉內扣還。今在楚未派出師各兵。因未得効力行間。願將伊等月餉一體均攤還款。察其情出於誠。奏請俯允等語。所奏殊屬見小。征兵借製衣裝之項。皆其本人自用。例應於各人名下扣還。或念征兵等接扣數項。生計未免拮据。奏請寬展期限數年。使每月扣數無多。自不至過形竭蹶。其中或有亡故之人。并可令其子弟頂充接扣。設故兵係孑身無著者。並當恩予蠲除。國家軫恤戎行。亦斷不肯靳惜錙銖。即慮應扣之項過多。兵丁雖展限分完。尚未能

即為歸楚。或就督撫提鎮藩臬及副叅遊都以上。於養廉內酌為代扣十分之幾。尚覺愜情順理。豈兵丁知此義而大員反不知乎。督撫藩臬養廉較優。而遊都以上武職大員。均有撫馭兵丁之責。果欲克己以恤下。自屬分所宜然。若陳輝祖所奏以通省未派之兵代為征兵還項。則瑣屑不成。事體斷不可行。朕於簡調兵丁。經行供饋所需一切官為支給。絲毫不擾閭閻。又豈肯以征兵借項致扣在家未出征之卒伍乎。即以征兵而論。其奮勇超羣者。即可優加拔擢。實心出力者。亦常賞給月糧。至將來凱旋歸伍。並可仰邀錄敘。是征兵為國宣勞。已屬體恤備至。又何必為此總總過計乎。各省調派之兵。不及營額之半。而陳輝祖籌為代扣。乃及通省之全。徒使無知者譏其波累衆人。將謂抽調兵丁。即闔省之兵丁皆出征矣。此乃大有關係。何可為訓乎。陳輝祖著飭行。恐各省尚有類此籌扣者。

著併通諭知之。○諭軍機大臣曰。阿桂等奏連次攻打巴占碉寨。尚未能克。賊人日就窮蹙。竭力自護。冀緩須臾之死。勢所必然。亦斷不能久拒。而我官兵乘勝深入。掃穴擒渠。無難立待。又稱河西沙爾尼一帶碉寨。若明亮處移往礮位。自上下轟。並令伍岱在赤布寨以前。趕斃木柵。運大礮隔河夾擊。賊必不能存站。此計甚善。朕前此展閱阿桂進到地圖。曾指沿河一帶。似可進兵。隨傳諭商酌辦理。

今阿桂於奉朕旨以前。所籌適與朕意相合。自可望其有成。又據明亮等奏。攻克額爾替碉寨。現擬於平坡之下。趕立木柵。辦理亦好。明亮所稱平坡之下。似即沙爾尼一帶。若能如阿桂所籌。隔河夾攻。自為得力。明亮等即妥速為之。又諭前據章謙恒奏。請將黔省停補名糧四百餘名。概於苗疆募補。其事不可行。是以未允所請。因思此項停補缺額。不獨黔兵為然。其陝甘湖廣雲南四川等省。停

補名糧若干。自亦有數可考。令軍機大臣查詢。旋據戶兵二部。於近年兵馬奏銷冊內。逐一詳查。惟貴州省將停缺馬步守兵四百三十五名。分晰開造。其餘陝甘各省。祇係籠統開報。並未註明停補數目。致難查覈。此事前年於川省軍營潰逃兵丁案內。特傳諭調派川兵省分各督撫。及原撥綠營各提督。將此等在營脫逃兵丁。所有名糧。不但不當補其子弟。並不當仍令人頂補。並令富勒渾文綬

查明詳晰造冊。移知原撥之省分。各標營存記。其懸缺。統俟大功告成後。另行覈辦。各省自應一體照辦。詳晰造冊咨部。何獨黔省具款造報。而陝甘各省。仍未分晰聲明。是否富勒渾文綬等。未經查明造冊。遺漏移咨。抑係各該省竟未遵辦。著傳諭勒爾謹。畢沅。陳輝祖。敦福。圖思德。富勒渾文綬等。據實查明覆奏。仍著將各該省停補名糧。分晰馬步守兵缺若干。每兵扣存名糧若干。及於何年月日

停止補缺。現在扣存銀糧若干。逐一開列清單具奏。並造冊咨明戶兵二部存案備查。毋得再滋舛漏。庚寅。予故恒親王弘暉祭葬。如例。謚曰恪。旌表守正捐軀之河南嵩縣民賀萬清妻張氏。辛卯。諭軍機大臣等。據刑部奏。逆匪王倫案內緣坐家眷賞給二等侍衛伊林為奴之犯婦王張氏。於本月初十日攜帶八歲幼子三兒逃走等語。此等逆犯家屬。原應概予駢誅。經朕格外加恩。賞給大臣官員家為奴。貸以不死。伊等自應知感。乃今春閩路氏郭孔氏趙張氏等相率潛逃。雖迭經緝獲正法。惟有王經隆之妻劉氏未經弋獲。今復有王經隆族姪王宗興之妻王張氏。慙不畏死。攜子脫逃。恐王經隆或有親故潛留暗中勾引。各該犯婦竄回原籍。隱匿藏蹤。亦未可定。著傳諭楊景素。即於該犯本籍附近地方。選派妥幹員弁督同地方官上緊迅速密拏務獲。並嚴究誘引窩留之人。一併

治罪。一面奏聞。一面即行解京嚴訊。從重辦理。以儆奸頑。而申國憲。至該犯婦逃回東省。直隸乃必經之路。並著周元理飭屬實力躡緝。毋任潛蹤漏網。將此一併傳諭知之。

大清高宗法天隆運至誠先覺體元立極敷文奮武孝慈神聖純皇帝實錄卷之九百八十四

大清高宗法天隆運至誠先覺體元立極敷文
奮武孝慈神聖純皇帝實錄卷之九百八十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉

上諭事件處管理刑部戶部三庫事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未六月壬辰

上奉

皇太后幸卷阿勝境侍早晚膳○諭前因巴里
坤烏魯木齊等處大臣作為額缺其所兼之
銜俱令出缺另補現在伊犁將軍亦作為額
缺亦應將所兼之銜出缺另行補放伊勒圖
所兼鑲黃旗領侍衛內大臣員缺著豐訥亨
補授兵部尚書員缺著豐昇額補授伊勒圖
於衆外藩處行文時久經書寫領侍衛內大
臣兵部尚書官銜著仍照舊書寫癸巳諭

軍機大臣等前因五月間京城望雨米價未
免稍昂是以降旨令於五城設廠平糶以裕
民食近來甘肅疊沛遠近一律普霑秋成可
望米價自應日有減落何以市值未見漸平
即或因近京二麥稍歉而河南山東兩省據
該撫臣奏報麥收豐稔商販自即源源北上
京城糧價不應尚未就平或究因上年河間
天津一帶歉收較甚而地方官所辦未盡確
實致商運多趨該處未能直達京師否則必

係在京鋪戶囤積居奇致五城雖平糶月餘
市價未能平減大抵不出此兩者著傳諭周
元理即將河間天津等處現在民食是否缺
乏并查近日曾否一體得有透雨秋田光景
若何據實覆奏不得稍有粉飾並著傳諭舒
赫德英廉於京城內外嚴密飭查如訪有囤
積射利奸徒即行嚴拿到案從重治罪勿稍
寬縱尋周元理奏自五月十五以來得雨七
八次二十五及六月十四之雨更透秋田

暢發糧價日。平民食並未缺乏。不敢稍有粉飾。仍嚴查商販。不得居奇囤積。得旨。去歲旱災。未免稍粉飾矣。又諭。現在京城平糶錢文。前已有旨。交工程處。及步軍統領衙門。隨時領用。俾錢文常得流通。今自開糶以來。已及一月。糶出錢文。各該處曾否隨時領取。設或存積過多。致有壅滯。是糧價未能驟平。錢價轉因而增貴。非所以便民利用也。聞工程等處。每樂於領銀。而憚於領錢。蓋因銀兩或有稍獲平餘微利。而錢文自有一定之數。無從得沾餘潤。以致心存觀望。此大不可著舒赫德、英廉。即飭各該處。迅速開領。毋得再為延緩。至步軍統領衙門。向來領用銀兩事竣。每以所剩平餘。留備賞給之用。茲承領錢文。自無餘剩。即或賞項不敷。另行籌備。亦屬無妨。不必因此致有拘泥遷延也。又諭。日李侍堯奏。查驗軍裝一摺。據稱綠營咨送軍裝保固冊內。註有年久舊壞。與歲底保題之意。

名實不符。非承辦時經手員弁侵漁工價。物料不堪。即平時不能加謹收藏。任意暴殄所致。隨飭鎮將親驗稟覆。已據近省標營呈稱。各項軍裝。現皆完好。其已逾修造年限者。尚有五六分成色。原冊所註舊壞字樣。係從前造冊之員。相沿登註。一營如此。各營可知。現將冊籍駁回。另查。仍俟稟覆到日。再行覈辦等語。所辦甚好。此等綠營積弊。自應實力整飭。各省何以從未見如此認真查辦。著將李

侍堯摺鈔寄各省總督。及兼管提督之各巡撫。一體做照。覈實辦理。○乙未

上詣

皇太后行宮問安。諭軍機大臣等。據周元理奏。接徐績咨開。汲縣民人王三才。拾獲書包。係屬逆詞。內稱王倫名字。所開豫省懷慶等處。及直隸大名。羅列多人。且語甚悖逆。荒誕不經。現飭大名道府副將督同兵役。按名密拏。并委達爾吉善。迅往督辦確查等語。此案

必係誣陷。已於摺內批示矣。上年辦理東省逆案。勦捕追緝。按法嚴懲。所辦不為不多。小民自知畏懼守法。未必敢復萌逆志。即或歸太。劉煥。冀盤佑等要犯。在近省潛竄偷生。方且匿跡深藏。懼于擒戮。豈敢復糾約多人。借王倫之名。復逞報復。其為奸徒挾仇誣害。冀將被指之人。拿訊洩憤。已屬顯然。今單內開列多人。固不便竟置不問。但只可不動聲色。密為查辦。斷不宜稍涉張皇。周元理既派達爾吉善前往。當令其在大名等處。先查所開各名。有無其人。訪其平日。是否形跡可疑。及有無聚黨立教情事。逐一確查。其真偽即可立辨。如所許稍有蹤影。自當切實根求。若全屬子虛。切不可輕累無辜。轉使奸徒暗中逞願。至造作匿名揭帖之人。情節甚為可惡。不可不實力窮究。只須將所開姓名。傳喚到案。隔別訊其平日。與何人有仇。只須數人供指相同。便可得其大概。即將其人拿獲到案。設

法嚴訊。自無難水落石出。著周元理。即傳諭達爾吉善。妥協辦理。務得實情。即行覆奏。至其所寫逆詞。係何語句。並著周元理。及徐績。即將原書。及鈔錄之件。一併封固進呈。○丙申。諭軍機大臣曰。阿桂等奏稱。現拿木柵九座。距賊礮不過半箭之地。並稱在巴占下手。賊人木城對面。逼近拿柵兩座。運礮轟摧。官兵攻逼漸近。自可迅速得手。乃因大雨阻滯。未能即克。又奏到盤獲逆酋。遣赴西藏之喇嘛等犯。在事番目等。甚屬可嘉。明亮等分別賞給。所辦甚是。自應如此獎勵。因思賊酋既從此路遣人赴藏。或於我師攻勦。噶喇依時。逆酋窮蹙。無計竟親身由此投藏求生。亦未可定。著傳諭永平。李本。加意嚴防。毋使免脫。又諭。據阿桂等奏。領隊大臣額爾特。目無法紀。在叅贊大臣額森特前。持刀妄動。甚屬乖張。請將額爾特革職治罪等語。額爾特以乾清門侍衛。且係副都統領隊大臣。迺敢持

刀妄動實屬乖張。漫無法紀。斷不可留於軍營。額爾特即著革職鎖拏。委妥實人員馳驛押解來京。丁酉。

上奉

皇太后幸卷阿勝境侍膳。諭軍機大臣等。前據周元理奏接准豫撫徐績咨文有匿名帖開大名府前蘇有義弟兄等姓名。隨派達爾吉善前往查辦等因。一摺。朕以其事必係挾嫌誣陷。諭令周元理轉飭達爾吉善妥協辦理。茲復據徐績奏到此事。則其帖內所開之人甚多。而於懷慶府城內東街郭宗智父子四人尤所注意。若喚郭宗智等到案。詢其有無警人即可從而蹤影。似無難得。捏造逆詞正犯。其送出之王三才亦當細加根究。若果係路旁拾取。則鄉村愚民檢拾遺失書函有何關係。而必欲親送門兵。其情節不無可疑。就彼悉心盤詰。自可畧尋端緒。但不得遽事刑求。至其單內有王倫姓名。更屬誕妄。該逆

犯昨歲自焚斃命。衆所共見共知。焉得至今尚在。即或該逆犯彼時竟狡脫倖免。亦必當匿跡銷聲。豈敢復自表著。況王倫前此敢作不靖業已僭妄尊稱。今忽退而稱臣。其所謂主公者。又何所屬。且去年拏獲全案逆犯。嚴加訊究。並不聞王倫之外。別有渠魁。何以此時忽有王倫推奉之人。尤非情理。自係捏造逆書者。借名聳聽。至所稱劉先生似因劉煥之名而傳會。或果歸太。劉煥等竄跡河南。妄思煽惑。今天網恢恢。合當敗露。從此案逐一根尋。竟得逆案未獲諸要犯。亦不可知。但難必其適如所期耳。總之此事無論虛實如何。但宜不動聲色。迅速辦理。昨周元理派往之達爾吉善。其為人拘謹有餘。遇事當前。是非真偽。猝難決斷。恐未能妥辦此事。周元理所派未為得當。直隸查辦或派單功擢前往。或竟係周元理親身赴彼。方為妥協。周元理雖即屈防汎。但河工現有滿保在彼。似無必

須該督之駐防也。至徐績奏帶往查辦之署臬司周於智亦非明練果斷之才。自不及榮柱曉事。徐績於查訊事件既非所長。而所帶之周於智又不能相助妥辦。自應令榮柱馳赴該處查辦。換周於智即回省城。較為有益。著周元理、徐績遵照妥辦。仍即速奏聞。至其所稱不若由大名。仍至臨清州。薛浩薦臨清城內有五人。已經有書往來等語。薛浩據開係大名人。現當府快手。自應解直查辦。而所稱臨清五人並無指名。著楊景素密為查察。有無蹤影。一一安堵。辦理不得稍涉張皇。又據稱前差柳德普赴北京探路之語。雖未必實有其事。但王倫去歲曾差歸太到京探信。此等語寧信其有著。傳諭舒赫德、英廉於京城內外嚴加體訪。如有蹤跡可疑之人。即留心根究。但不可虛張著相耳。戊戌諭據楊景素奏。拿獲在京脫逃之犯婦趙張氏。詳悉研鞫。係五月初九日逃至伊甥孫吉家。留住

兩日轉送至該犯婦族姪趙楹家等語。此案前經傳諭舒赫德俟該犯婦解到時嚴加刑訊。今既經楊景素將趙張氏及孫吉趙楹一併解京。著傳諭舒赫德於解到時將各犯隔別嚴加刑訊。務得實情。仍即據實覆奏。己亥遣官祭

火神廟 庚子

上詣

皇太后行宮問安 諭據索諾木策凌奏稱管

理烏魯木齊厄魯特部落請專設領隊大臣一員。管理稽察孳生牲畜及屯田派差等事。將協領全簡等三員開列職名請旨等語。即照所奏全簡著賞給副都統銜。授為管理烏魯木齊厄魯特部落領隊大臣。又諭熱河引見吏部月選等官。應有諳習清語之堂官承旨著仍照上年之例。派福隆安一體帶領引見。又諭河北鎮總兵黃模奏汲縣民人王三才拾獲逆詞等因。一摺所辦殊屬非是。

此事徐績先據該鎮咨報具摺奏聞業經飭令據實查辦距今已越三日黃模始行奏到所遣齎摺之人已屬遲緩之至總兵為專閫大員凡地方尋常事件固不應干與越俎如遇此等要務一面知會撫臣一面即應就近查辦方識事理輕重雖此案情節大半出於誣捏徐績等往辦尚不至羈時貽誤設有刻不容緩之事亦以一報撫臣遂為塞責則國家又何藉有此總兵為耶況黃模為大學士黃廷桂之孫尤宜與他人之任總兵者不同更不宜諉事膜視若此黃模著交部嚴加議處○辛丑諭軍機大臣等前以河南汲縣民人王三才拾獲逆書一案必係挾仇誣陷但既開列多人且有牽連大名府之語恐達爾古善為人拘謹未必能迅速查辦因諭令或改派單功擢前往或周元理親赴該處妥辦周元理接奉前旨自必即行起程今日據徐績奏親詣衛輝查訊逆案其為捏詞誣陷已

畧有端倪現在竭力查辦果不出朕所料已諭令徐績迅速嚴究完案此時周元理自可無庸往大名查究且正當永定河伏汛之期周元理奉到此旨仍當照向例速赴固安防汛連日雨水較多潮白二河俱各增漲未知永定河水尺寸若何其溜勢仍循中泓與否並著周元理即速查明覆奏徐績摺著鈔寄閱看尋奏查入伏以來各汛長水三尺南北各工隨時加鑲防範河槽刷深數尺溜勢仍走中泓隄工鞏固永定河上游工程均可無慮但已屆伏汛防守緊要臣遵旨不赴大名親往永定河督率防護報聞○河南巡撫徐績奏覆匿名逆詞案內所開各府州縣人名徧查懷慶府並無郭宗智等大名府亦無薛浩及蘇有義弟兄山東撫臣楊景素咨覆臨清五人亦無影響臣現到衛輝據該守陸允鎮稟稱惟輝縣徐廷楷等四人均已拿獲訊無不法情事及盤詰徐廷楷平日有無仇人

據供。惟有現與構訟之鹿來相係輝縣生員與同縣郭濟民等夥開煤窑。窑廠地基係徐良墳地。挖煤傷及伊墓。因而涉訟。徐廷楷為之主謀。自此成隙。隨拘鹿來相鞠訊。初不承認。及喚伊二子鹿韓快。鹿韓忭訊究。據供。伊父與徐良構訟。深恨徐廷楷助謀。恐不能勝意。欲捏為王倫叛黨。希圖洩忿。鹿韓快等勸阻不從。因寫造一信。令雇工余素忠拋置大路等情。隨拘問余素忠。供認不諱。鹿來相不能置辯。究其同謀及書寫之人。堅稱出自伊手。並無同謀。懇恩檢發原書。以便查對筆迹。諭軍機大臣等。此案奏到之日。朕即料其必係捏詞誣陷。今既訊有端倪。而拾字之王三才。又復語言閃爍。即可從此切實根求。嚴究編造之人。從重審擬。著將黃模奏到逆詞原紙。即由六百里發交徐績辦理。務須迅速查訊。勿致奸徒竄逸漏網。亦勿稽遲拖累無辜。仍將審辦緣由。即速由驛覆奏。尋奏據鹿來

相供。實因徐廷楷為徐良主謀。是以起意編造逆書。誣為王倫叛黨。又思人少不能動聽。將各府縣人名真假混開。希冀聳動當道。自行騰寫封固。標朱貼紅。付雇工余素忠拋在大路。實出一手。別無代書之人。復訊王三才。何以徑送總兵衙門。據供。因封面有總鎮字樣。是以送去查鹿來相。以開煤構訟。誣人大逆。實屬罪大惡極。請照反坐律問擬。二子鹿韓快。鹿韓忭應緣坐斬決。下行在軍機大臣。及三法司覈擬。尋奏入。得旨。鹿來相著即凌遲處死。伊子鹿韓快。鹿韓忭。固律應緣坐斬決。念其曾向鹿來相勸阻。著從寬改為應斬監候。秋後處決。壬寅軍機大臣議覆。署雲貴總督覺羅圖思德奏稱。永昌府屬龍陵騰越二廳州。接壤緬境。騰越控制八關。龍陵路通宛頂。均屬重地。向例每年秋防於通省各標鎮協營內調兵四千五百分撥巡防。春深瘴發。留兵二千五百移駐曩宋龍陵二處。餘

二千名徹回本營竊思各路調兵所費既繁且該兵丁等往返跋涉心懸兩地莫若量移腹內之兵攜家常駐尤於邊地有益並條列移駐營制一永順鎮舊設鎮將備弁等共四十員請全數移駐騰越改為騰越鎮其額設兵丁除騰越原設兵一千五百外再於永順鎮標裁撥兵一千五百共足三千名以備分派曩宋以外各關隘防守一騰越原設將備千把共十九員請全行移駐龍陵改為龍陵協其額設馬步兵除龍陵原設兵六百外再於永順鎮標裁撥兵八百四十提標裁撥六十共足一千五百名以備分派三台山一帶防守一永順鎮既移駐騰越應另撥兵移駐查楚姚協設有督撫提標重兵分布毋庸設協所有該協將備千把共二十八員全移永昌府城其馬步兵一千五百酌留八百作為楚雄營兵額餘兵七百名再於督標裁撥兵四百撫標八十提標二百八十鶴麗鎮三百

四十昭通鎮二百共足二千名之數移駐永昌改為永昌協一楚姚協既移永昌楚雄府城應改設專營請將龍陵營舊設遊備千把移駐楚雄改隸楚雄營管轄裁協兵八百名歸提標統轄均應如所請行至新改之永昌協應否并隸新設之騰越鎮管轄抑歸提標統轄之處未據聲明應令該撫查明又稱騰越龍陵永昌各鎮協移駐將弁及兵六千五百名每歲出防四千五百尚餘兵二千足資控禦如屆秋深應聽該督率同提鎮酌撥各關隘分防其兵丁就近調撥並請照土練出防之例每日給米一升折銀二分亦應如所請行得旨依議速行○癸卯大學士伯兩廣總督李侍堯奏廣州省城東北一帶於六月二十三、四連日大雨平地水深數尺八旗兵丁居處窪下者積水尤深所有堆撥住房租房馬廄多被水浸修理此項房屋本有動用公款現在分別查明報部查兵衆住房倒塌

者共五百八十九戶。兵丁眷口無依。暫令各依親戚權住。此內稍有力量者。尚能自行辦理。其實無力者。若非官為籌辦。必致失所。查八旗漢軍有支借差遣官兵馬價銀一萬兩。請將此項銀兩。每戶借給修理銀三兩。通計需銀一千七百六十七兩。請分為二年。於各兵名下扣還。得旨一半賞給一半坐扣。甲辰諭軍機大臣曰。熊學鵬奏據太平府稟報安南送星廠有內地民人張德裕李喬光在彼生嫌械鬪。聞有夷官帶兵。並經督臣李侍堯知會。此事現在加緊查辦等語。此案前據李侍堯奏到業經傳諭該督將如何設法禁防之處。確查妥辦矣。內地民人擅越外夷地界。呼朋引類。日積日多。其始不過趨覓微利。久之滋釁生事。無所不至。最為邊境之患。從前任其往來。毫無限制。原屬歷任地方官辦理不善所致。即如滇省騰越等處。與緬匪接壤。向聽商販往來。以致奸民尹士賓李萬全

等輩潛留該處。轉為緬逆所用。暗通消息。不可不引以為戒。安南久奉正朔。誠心嚮化。固與蠻陬逆匪不同。然撫馭外夷。凡事當豫防其漸。粵西與安南接壤。近邊游手之輩。出入自由。恬不為怪。亦由向無禁約之故。自當立法嚴防。俾無竄越。除從前往安南之人在外。已久。毋庸追辦。外嗣後凡一應商民。概不許其擅越邊境貿易。以弭患於未然。蓋內地百姓。不過圖便尋覓蠅頭。並非必須取給於外國。若安南地方或有仰藉中國貨物。原不妨准其來至邊界。與內地民人彼此交易。但須酌定通市日期。派官在彼彈壓稽查。毋許滋事。既可俯順夷情。不改通商之例。並可杜絕奸宄。永嚴中外之防。是在該督撫不動聲色。悉心措置。切勿因循玩忽。視為具文。亦不得稍涉張皇。致滋紛擾。李侍堯並當行文安南國王。諭以該國服事天朝。最為恭順。是以向來商民出口貿易。以濟該國之用。原所不禁。

第此輩無知之徒。往往不安本分。藉端搆釁。轉不免在外生事。本閣部院現已飭禁內地。民人不許仍前擅越邊境。并酌於關口適中之地。仍聽內外民人在彼交易商貨。該國王酌定日期。豫行呈報。本閣部院酌定每月通市日期。即令彼此商民齎貨會集該處市易。中國仍派官在彼彈壓稽查事畢。即仍令百姓入口。毋許潛留滋事。在該國需用貨物。仍可照舊流通。而內地奸民不能潛越。飢法於該國更有裨益等因。如此明切諭知。使曉然天朝立法周詳。實為利庇屬國起見。自必益知感戴。方為妥善。著傳諭李侍堯會同熊學鵬。妥協熟商。善為經理。仍將如何籌辦之處。即行覆奏。尋奏安南僻處遐荒。不無仰藉內地貨物。是以恩准定地互市。原為俯順夷情起見。但查該國貨物海道久通。毋須再於邊關交易。現將臣李侍堯已意行文該國王。彼似無可藉口。但奸民貪利。恐尚不免偷越出

口。必須明定章程。責成地方官。嚴行稽察。請嗣後再有偷出口隘。究明由何關口。將專管文武該管上司。照例叅處。督察不力之道員。將領一併嚴叅。偷越出口之人一名至五名。罰俸一年。六名以上。降一級留任。十名以上。降一級調用。庶各員自顧考成。不敢玩縱。下部議行。○乙巳。諭軍機大臣等。據吳嗣爵奏查勘河工情形一摺。內稱瓜州城外迴瀾壩及大莊等處。從前拋填碎石抵禦江潮。現在石塊擁護埽根。甚為穩固。毋庸再為添辦等語。此項碎石工程。前經諭詢高晉查其是否有益。據覆奏每歲拋填碎石。藉以擁護城根。相沿已久。是以仍聽其照舊辦理。今吳嗣爵以埽根穩固。已有成效。請嗣後毋庸添辦。不知何所見而云然。或係未悉從前立法之由。遂欲省工惜費。輕易更張。萬一停止之後。江湖復有衝嚙。漸致侵及城根。又不免將來之另辦。是每年所省者少。而日後所費者大。殊

為非計。著傳諭高晉將此項拋填碎石工程詳加察覈。每歲有無開銷於瓜洲城岸有無裨益。及是否可停並應照舊辦理之處。逐一查明據實覆奏。並諭令吳嗣爵知之。尋奏查拋填碎石工段亦不止迴瀾壩一處。如江安壩查子港大莊蓋壩等處均有碎石工程。數年以來俱係彙入庫貯辦理。並不另議錢糧。上年及本年江水安瀾各工穩固。是以未曾添辦碎石工程。原非長行停止。河臣吳嗣爵

驗看埽根穩固。故云毋庸添辦。未將嗣後仍須照舊辦理之處分晰聲明。臣赴工防汛親勘各壩拋填碎石處所一律穩固。第江岸坍塌靡常。設有坍塌下埽必多糜費。且不能堅固。惟碎石之工歷來有效。今若不添辦。恐江潮衝嚙侵及民廬。轉致多費。則碎石工程自不便議停報聞。又諭據嘉謨等奏重運漕船全過臺莊等因一摺。似仍以運河水小為言。今春湖河水勢較上年為旺。糧艘並未稽

遲。現據嘉謨等奏各幫已全數入臺莊境。愈可資灌塘之益。昨姚立德奏刻下開河水勢充裕。俟尾幫進臺莊後即閉閘平溜行走。更可迅速等語。是八閘現亦無虞阻滯。惟是微湖蓄水最關緊要。前據姚立德奏本年微湖因濟運日久底水止存七尺餘寸。俟全過韓莊即速堵閉。其濟寧上下各湖亦消落二三寸不等。如遇汶泗水發亦當次第收蓄等語。所籌頗為得要。目下幫船陸續出閘正當趁

伏秋雨水較盛之時將微山等湖多為蓄納以濟來年春運。著傳諭姚立德豫行詳悉籌辦。妥為經理。仍將辦理情形覆奏。並諭嘉謨知之。尋奏濟寧州一帶於七月初十前連日得雨各河長水數尺。現在漕艘尚未出境。不便全收入湖。今尾幫已過韓莊即堵湖口。閘壩微山湖水不使外洩。俟尾幫趲出臨清將蜀山馬踏南旺等湖臨汶臨運各斗門閘悉行開放。俾汶泗之水隨長隨收入微山湖以

濟來年重運得旨覽奏俱悉。又諭賊人此時守拒益堅。不過因距巢甚近。自護其死無足為異。現在各處敗回之賊。退聚一處。又無積糧可恃。勢必不能經久。今明亮等奏擬從石真噶山腿乘虛進擊。亦是一策。至軍營因雨稍阻。亦無足慮。六月本大雨時行之候。向來番地情形。秋令雨水較少。明日已入新秋。天氣高爽。晴霽必多。自可剋期奏績。將軍等毋負朕懸望。廣西巡撫熊學鵬疏報乾隆

三十九年永康。還江天保歸順奉議五州縣開懇水旱田一十五頃八十八畝有奇。又下則田四頃六十七畝有奇。是月直隸總督周元理議覆據倉場侍郎富察善奏稱京通倉米除本年額支外。尚敷二年支放。嗣後請停各省截漕。如遇偏災賑糶。即動常平倉穀。或照例銀米兼賑等語。實為慎重太倉起見。計每歲漕糧全行抵通。除支放外。原有贏餘。漸可益臻充裕。應如所奏。行至所稱動撥地

丁銀每年委員赴奉天採買粟米十萬石。由海運赴天津北倉一半。運京平糶一半。撥貯沿河州縣備用。如積至數年。並無需用。酌量平糶等語。查從前直隸歉收年分。屢經委員赴奉天採買。由海運津撥補倉儲。以資借糶。後因本省買米較易。是以停止海運。查奉天米價比前較昂。若再加運費。恐逾部定每石七錢之價。且海洋風信無定。亦難歲以為常。不如就近採買。較部價或有節省。嗣後有必

須赴奉天買補之處。先行咨詢奉天糧價。遇價值賤時。臣即奏明委員前往採辦。至如市糧小有缺乏。即動撥京倉米石為數有限。諒於太倉亦並無盈絀。所有奉天米石定以常年採辦之處。無庸議得。旨所議是。依議。江西巡撫海成奏遵旨審訊王作梁即王元棟又名坤治南昌人。粗知文墨。伊胞兄王才宗在安慶省城開翠花店。去年五月王作梁往兄店學業。七月間王才宗回籍置貨。命伊看

店八月中旬夜半忽然心迷出外叫號稱神說夢地鄰將伊鎖錮值王才宗自籍回皖即行收店帶回復至九江府城開店其母何氏將王作梁闕鎖空屋今年三月內該犯在房內寫信四封并作一包寫明寄金懋明等又檢小石封置一簍裂鎖逸出至船行託馮盛明交船戶吳坤帶寄安慶嗣經金懋明接字首報臣即委員搜查該犯家中並無逆跡詢之鄰族人等僉稱王作梁瘋病常發嚴詰書

內所開在江西之張正順等十三人供詞顛倒荒唐並無仇害亦無邪教煽惑訛錢情事至寫安徽裴布政心意不堅降罰速香三千之語細加研訊據供曾走過安徽布政衙門見告示有裴姓是以知為裴布政因其祈雨不下心意不堅故要罰伊係神道向伊說知因籤經上有心意不堅罰香三千之語是以照寫又詰以裴是巡撫何以說是布政堅稱是布政再四究詰語言顛倒全無倫次瘋邪

無疑但該犯書符寫怪妄稱年號不法已極未便因瘋曲貸請照大逆律辦理犯兄王才宗應緣坐斬決其牽連多人實係瘋攀應毋庸議下三法司覈擬尋奏入得旨王作梁著即凌遲處死其緣坐之王才宗著從寬改為應斬監候秋後處決○定西將軍尚書阿桂四川總督富勒渾督理糧餉前任四川總督劉秉恬等奏臣等遵旨將各站輓運情形公議查鄂寶所奏請裁北路各站固不無節省

但從前西北兩路軍糧一由楸砭一由卓克采今將卓克采運道停止歸併大板昭一路設遇山水陡發難保無誤若從卓克采大板昭兩路運供即有一路阻礙一路仍可通行所有富勒渾劉秉恬請留卓克采等十三站由腊覺溝孟拜拉滙入西路轉輸之處自應如此籌辦從之

大清高宗法天隆運至誠先覺體元立極敷文奮武孝慈神聖純皇帝實錄卷之九百八十五

實錄卷之九百八十五

三

大清高宗法天隆運至誠先覺體元立極敷文奮武孝慈神聖純皇帝實錄卷之九百八十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶經

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級 臣董誥內大臣戶部尚書鑲藍旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十年乙未秋七月丙午朔享

太廟遣理郡王弘賜恭代行禮○諭行在戶部

議駁嘉謨奏請緩交餘米一摺自屬照例覈辦但念該丁等一年并交兩年之項未免稍覺拮据著將未經抵壩之江浙各幫本年應交三升八合餘米准其先交一半其餘著加恩緩至次年一併帶交以示體卹嗣後不得援以為例該部即遵諭行○丁未

上奉

皇太后幸卷阿勝境侍早晚膳○戊申諭軍機

大臣等據高樸等奏查審義寧更換乳牛冒支口分一案現在查審其牛吏喜德告假回京冒領錢糧一案訊據喜德供自乾隆三十五年五月告假進京錢糧銀兩係前任員外郎保成每季令已故院戶周建善帶京給我等語現已咨明舒赫德將保成查拏革職就近交刑部審辦等語此案既始於保成自應將其徇情舞弊緣由嚴切根究但案犯俱在馬蘭鎮恐交部審訊無人質證易致狡展著

傳諭舒赫德即將告休員外郎保成查拏革職委員解交高樸併案嚴審定擬具奏高樸摺並著鈔寄舒赫德閱看○又諭曰高樸等奏義寧更換乳牛冒支口分轉賣分肥一案現在嚴加鞠訊等語自應嚴切根究務令水落石出至此項備用乳牛自有定數今藉名更換者至十六隻之多其現存牛隻諒仍不少似係原定額數過濫致承辦劣員得以任意侵肥著高樸即速嚴訊偷冒確情按律定

擬並查明實需乳牛若干備用若干一併具奏至喜德告假進京事在乾隆三十五年其串通冒領係前任員外郎保成任內之事自應從保成切實根究若僅將保成交刑部審辦恐其在京因無質證或致狡展現已傳諭大學士舒赫德將保成革職解交高樸併案訊究至喜德告假冒領既始自三十五年弊混至今其歷年該管之員予令及總管內務府大臣等均有應得處分即滿斗亦在彼兩

三年此次雖伊查出叅奏其前此之漫無覺察亦難辭咎並著高樸一併查叅請交各該衙門分別議處將此傳諭知之○江蘇巡撫薩載疏報靖江縣乾隆三十九年分新漲田一項三十一畝有奇豁除水衝田八頃六畝有奇額賦○豁免湖南漕船遭風漂沒米九百十一石有奇并淹斃水手王志賞卹如例○已酉諭軍機大臣等兵部叅奏候選衛千總法保年已六十八歲而投供單內止開五

十三歲希圖朦混請將法保革職等語法保著革職但該員少報年紀至十餘歲之多其衰老情形無難一望而知該員在部投供諒非一次該堂司等官何以漫無覺察直至旗咨到部始為叅奏耶著傳諭兵部堂官將法保投供時因何未經看出緣由據實回奏尋奏投供時未經看出係不留心所致除請交部察議外查赴選人員向齎本籍文結送部其中少報年歲在所不免請嗣後在部投供之外省候選營衛各員弁兵部司官將文結年貌察覈如有虛捏呈堂據實叅奏其八旗在部候選之員弁近在同城本旗文結尤易咨取請嗣後將履歷先行送部以便於投供時覈對如有隱匿年歲將該員及本旗出結之員從重叅處報聞○庚戌

上詣

皇太后行宮問安○諭據阿桂等奏訊據脫出之劉均祥供稱係甘肅兵前往四川軍營充

當德爾森保親隨在木果木後山防守賊衆前來衝突德爾森保被圍尚射賊五六名又有一賊拉伊馬尾德爾森保僅餘一矢仍將此賊射死後被賊鎗傷咽喉旋即墜馬被賊衆砍死經伊親見等語前因德爾森保係特派駐防木果木後山之人所守山梁被賊奪去以致將軍大營潰亂情罪重大且賊人衝突之時究不知伊作何下落恐係被賊擒獲是以將伊子俱拏交刑部監禁今覽劉均祥

供詞德爾森保於潰亂之際打仗陣亡屬實德爾森保如果失陷緊要地方又不奮勇打仗縱捐軀亦不足蔽辜即將伊子一併治罪亦屬當然今伊打仗陣亡屬實其罪止於失陷地方不過停其議卹尚不至將伊子一併治罪著加恩將刑部監禁德爾森保之子即行釋放伊等既屬無罪之人所有應當差使著交該旗大臣照閑散滿洲例一體挑取行走朕辦理庶務一秉大公功罪皆由人自取

即如德爾森保前此失陷地方情罪重大。身死又不分明。即將伊子監禁。今既陣亡屬實。不至將伊子一併治罪。即施恩寬免。毫無偏倚。將此交將軍阿桂通行曉諭軍營官員兵丁外。並著通諭八旗知之。○諭軍機大臣等。據阿桂等參奏圖思德將應行立即正法之逃兵王天惠援照自首舊例。枷責發落。取巧沽名。殊屬舛謬。請將圖思德及審辦之王太岳永慧明安並軍需局官員等一併交部嚴加議處等語。所奏甚是。已交該部速議具奏矣。征兵在伍脫逃情罪最為可惡。拏獲之日。即應立正典刑。以示懲儆。歷來無不如此辦理。即圖思德擢任封疆以來。辦理此等案件。亦非一次。何獨於該犯王天惠脫逃。乃援遠年從不引用之律。曲為寬貸。實出情理之外。著將阿桂參摺鈔寄圖思德閱看。令其明白回奏。○定西將軍尚書阿桂定邊右副將軍尚書公豐昇額參贊大臣內大臣都統海蘭

察副都統額森特奏。臣等派兵力攻巴占寨第八九峯。碉卡賊衆悉力抗拒。不能前進。因暫撤兵。查巴占為勒烏圍門戶。故賊衆堅守此山。梁為捨死護巢之計。臣擬於次日五更進攻。以期必克。諭軍機大臣等。巴占一道山梁實係勒烏圍緊要門戶。賊人於此捨死護巢。或恐猝難得手。前此阿桂曾奏。若從沿河直上攻占。亦屬可辦。但河西沙爾尼溝一帶。碉寨明亮。處尚未掃除。若攻得沙爾尼。即可於河東攻搶巴占。圖仰木半山碉卡。亦能截出第八九峯之後。直壓賊巢等語。似亦係進攻捷徑。何以尚未見如此辦理。想因明亮未能攻至河沿之故。今阿桂一路屢攻巴占。未克。若不另辦分勦。徒致耽延時日。阿桂此時若已攻克巴占。則勒烏圍可席卷而得。自屬甚善。否則派兵數千。令海蘭察豐昇額帶領往助明亮。將沙爾尼一帶碉卡盡行攻克。亦可合阿桂沿河進搆賊巢之計。較為便捷。著

即速妥酌而行○又諭前據投番供索諾木住甲雜官寨閱圖內地形甲雜通吉地一路現據供稱索諾木撤回噶喇依賊酋往來無常正為將來脫逃地步其逃竄必不能離此一路因思吉地惟有副都統永平及道銜李本在彼駐守雖曾盤得逆首遣赴西藏之喇嘛等解營但喇嘛等同行不過四人無難緝獲若索諾木欲從此路脫走其隨行之賊必多且必攜能打仗者以自衛妄冀遇見官兵

儘力衝出現在吉地兵數無多永平李本亦尚不足堵禦竟當令舒常帶兵四五百往彼駐劄○壬子諭曰郝碩奏據雪山根站員具報崇慶州兩次撥往北路換班站夫共四百餘名到站後俱陸續逃散現止存夫八十餘名由該州原撥時並未認真取保押差所致除稟知文綬查辦外請將逃夫沿途所支口糧著落崇慶州賠補並請將該州交部議處等語所辦甚是著交文綬查明崇慶州知州

現係何人即行據實參奏交部嚴加議處並查明逃夫沿途所支口糧著落該州照數賠補以示懲儆尋奏查原派之員係署崇慶州事候補知州潘成棟例有處分至沿途支領口糧請照例將未到站之逃夫著落如數賠補得旨該部嚴察議奏○諭軍機大臣曰傅良等奏八旗馬廠地內酌將餘地四百八十頃交地方官招民墾種陞科以作兵丁紅白賞卹之需一摺事屬可行已批交該部議奏

矣此項牧廠當官兵移駐新疆之後即有空閒彼時早應查辦何以直至今日始行具奏傅良到任不久於該處情形未必即能周知想畢沅言及是以會銜奏辦前任將軍福僧阿在西安數年何竟置之不問抑或畢沅曾向福僧阿商及此事福僧阿不願辦理耶著畢沅於奏事之便據實覆奏尋奏傅良到任臣與之商酌意見相同至福僧阿在任時臣曾商及馬廠伊恐將來添駐官兵需廠牧馬

因遷延未辦。批是人原不曉事。○戶部議覆湖北巡撫陳輝祖奏稱武昌等衛所清出典賣屯田請加津贍運查典賣屯田與受各戶均應照例辦理特以典賣者未必盡係現運之丁執業者亦恐非起首承買之戶從重加津免其徹田歸運則私相授受者知戒而仍不至失業向後典賣之弊可除應如所奏從之。○癸丑

上奉

皇太后幸卷阿勝境侍早晚膳。○甲寅諭軍機大臣等據熊學鵬奏尙隆隘有安南廠徒擁入共三百二十名稱係內地廣東民人在送星廠傭工度日今因廠衆星散奔回逃生形同乞丐現在派委知府趙由儼分起解送東省聽李侍堯審辦等語所辦尚好已於摺內批示此等游手無藉之徒擅越外夷地界日積日多最易滋生釁端為患邊境前據李侍堯熊學鵬先後奏報安南送星廠有內地民

人張德裕等在彼械鬪並有夷官帶兵之事已屢諭該督撫等會同商辦設法禁防毋許再有竄越並酌定貿易章程明切曉諭該國以期妥善此次尙隆隘逃回之人俱係該處廠徒多至三百餘人實由從前辦理不善所致既據熊學鵬委員押赴粵東審辦著傳諭李侍堯即行切實查訊此內如訊有張德裕李喬光等起釁滋事之犯另行按律辦理若果係無處覓食奔回內地之人訊無別項為

匪情節自當分別安插但此等不安本分之人若仍留於兩粵日久故智復萌仍難保其不再外竄生事莫若分起發往烏魯木齊等處令其屯種營生較為兩便並著李侍堯曉諭各犯以爾等原係游手無業貧民難資餬口今發往新疆種地各有沃壤耕獲謀生便得安居樂業務須安靜守法以副優卹之仁倘中途及到配後敢有脫逃等事立即擒拏到案照發遣新疆人犯在逃之例於拏獲處

即行正法各宜凜遵勿自取死庶衆犯共知
儆戒仍即通知經由各省督撫令其撥兵護
送勿致生事將此由四百里諭李侍堯遵照
辦理並於辦畢時覆奏熊學鵬摺鈔寄李侍
堯閱看亦諭熊學鵬知之○又諭據刑部員
外郎塔琦奏查審錦縣陳自發店內客民康
福等被竊銀錢等物一案事主於二月呈報
該縣阿清阿先委典史會同旗員勘驗取供
該縣於三月初覆勘乃並未將陳自發等有

無偷竊夥竊之處詳細研鞫迨該府尹批飭
確審始於四五月間傳訊錄供詳報實屬遲
延請將阿清阿交部議處等語竊賊案件若
初報時即上緊查追或可冀賊並獲乃該
縣距事主報竊兩月後始行具詳緝賊是其
審辦遲延之咎實無可辭若僅將該縣照例
議處而康福等被竊贓物終歸無著仍屬向
隅此案贓賊無獲實由阿清阿所誤著將康
福等被竊銀錢各項令阿清阿照數賠還轉

不必交部議處著德風等即勒令阿清阿作
速全數賠出交將軍弘昫傳集事主康福等
當堂給領其餘各犯俱著照塔琦所擬辦理
塔琦原摺并著鈔寄將軍等閱看將此諭令
弘昫等知之○又諭熱河自初七日以來雨
水稍多昨晚至今晨尤覺綿密未知口內各
屬及京城陰雨情形若何是否不覺過多莊
稼有無妨礙永定河水勢有無增長是否不
致出槽深為厪念著傳諭舒赫德英廉及周

元理即速確查據實具奏○乙卯

孝懿仁皇后忌辰遣官祭

景陵○諭騎射係滿洲本業前因八旗官兵廢
弛本業不肯用心學習經朕屢加訓飭今日
閱在京八旗大臣等送到引見人員步箭甚
屬不堪且有年歲尚輕所射非不至布把即
擦地而去甚至有任意放箭幾至傷人者成
何事體此內應行補放之人步箭平常將擬
陪者補放以示懲儆外至八旗大臣等所司

何事送來引見之人伊等豈未先期驗看如果曾經驗看何以竟將此等人員挑送總由大臣等全不以事為事所致所有此次在京挑送引見人員之都統副都統等俱著交部議處併將此通諭八旗官兵等嗣後若仍有似此者不惟將該管大臣議處必將伊等從重治罪○丙辰

上詣

皇太后行宮問安○吏部議覆浙江巡撫三寶

咨稱捐納運副朱璋分發來浙現出有寧紹運副缺應補該員由江蘇長洲縣原籍改入順天大興縣寄籍寧紹運副缺在伊原籍五百里內應否以原籍計算迴避等語臣等酌議如原籍寄籍俱有親屬房產自應兩籍接壤五百里內俱令迴避若止一籍有親屬房產未便無所區別應查明何處現有房產及本宗有服親屬之處令其迴避朱璋即照此辦理從之○直隸總督周元理奏七月初七

初八日雨勢甚密永定河水益長各工幸搶護平穩得旨覽奏欣慰但不知初九雨勢如何速奏來○丁巳諭軍機大臣曰阿桂奏現於舊則大海山梁之西探有昆色爾及章噶兩處若能直占其地可繞出勒烏圍之南以斷噶喇依往來之路所籌甚好海蘭察已統兵前往進剿自可迅望得手又據奏軍營馬匹自將軍叅贊領隊大臣而下各有自備之馬約計追擒賊酋賊目時可得二百餘匹無

虞臨時拮据所辦甚是明亮處昨歲即經阿桂知會自必遵照辦理舒常一路亦然至富德南路情形大畧相仿自應照阿桂處章程一體妥辦阿桂籌辦軍營大小諸務實為盡心今時當盛夏統衆攻堅賢勞足念因御製詩六韻親書箋頭賜之以示嘉獎詩曰掌握師行掄俊豪事無巨細一心操功成九仞尤應慎志洽諸軍實所褒探路欲因乘急隙攻碣直可壓危撓我居避暑原無暑卿效賢勞

真是勞嘉予七言錫書扇。凱歌三捷換征袍。勉之指日親郊勞。紫閣銘勲崇爵叨。○以太僕寺少卿明通為奉天府尹。○戊午諭烏魯木齊提標攜眷屯兵。支給鹽菜銀兩。已經數載。例應停止。前因該兵等眷屬在城居住。隻身在屯耕作。生計不無拮据。特降旨將伊等應支鹽菜銀兩。施恩再展限二年。今歲又已屆滿。所有鹽菜銀兩。即應裁汰。但念各兵每歲額支本折糧銀。尚有應扣節省之項。恐不敷養贍當差。未免稍覺竭蹶。著加恩將該處提標所屬馬步屯兵。原支四箇月本折糧石。悉照安西舊例。統按原估。每石二兩二錢。全數折銀實給。令其自行買食。俾得通融日用。衣履有資。以示體卹。邊屯至意。該部即遵諭行。○又諭據明亮等奏。進財保自授為二等侍衛以來。凡遇打仗。奮勇直前。此次又攻獲賊卡受傷。可否賞給巴圖魯名號等語。進財保此次打仗登卡。擊敗賊人。攻得賊卡。甚

屬勇往可嘉。著施恩賞給進財保扎拉克巴圖魯名號。仍照例賞銀一百兩。○諭軍機大臣等。據高樸奏。審擬義寧更換乳牛。侵冒錢糧一案。將義寧輒照盜官畜產侵欺錢糧律擬以絞候。所辦非是。義寧之罪。尚不在通同喜德冒領錢糧。乃在主使盜賣備用乳牛一事。自應照盜大祀神御物律。擬以斬決。閱義寧供單內。有今年中元大祭。輪該我去更換乳牛之語。既云大祭。非大祀而何。况律文明載有饗薦牲牢饌具之屬。與義寧所盜正合。乃捨此不引。轉引盜官畜產常例。擬以絞候。殊屬錯謬。著將原摺發還。令高樸仍回該處另行定擬具奏。至前項備用乳牛。私賣至十六隻之多。自係原定額數過濫。致承辦劣員得以任意侵肥。是以諭令高樸查奏。自應查明實用若干。備用若干。據實聲覆。以憑覈辦。乃高樸覆奏。僅檢查案卷數衍含糊。所對非所問。亦屬糊塗。並著高樸於回至馬蘭峪時。

再行確切查明據實詳晰覆奏○大學士舒赫德刑部尚書英廉覆奏京城近日雨勢雖密無礙田稼十一日天已開霽報聞○予金川陣亡副都統佛倫奏副都統銜科瑪祭葬如例入祀昭忠祠○旌表守正捐軀之江蘇鹽城縣民郭調鼎妻史氏○已未

上奉

皇太后幸卷阿勝境侍早晚膳○諭軍機大臣曰周元理奏永定河南北隄岸俱有漫口現

在加緊堵築情形一摺深為厯念前據該督奏本月初七八日雨勢及永定河水陡漲搶護平穩情形彼時即慮及初九之雨甚大雨岸隄工是否不致疎虞迅諭該督即速查奏今據周元理奏初八日密雨竟夜初九夜雨更大北岸三工於初九丑時漫口二十餘丈南岸頭工於初十卯時漫口六十餘丈業已飛調滿保董率員弁多集兵夫運料趕築仍親赴該工嚴催督辦務令剋期妥竣等語看

來此次漫工光景較之乾隆三十五六年情形稍輕周元理在直年久修防事宜尚所諳習且親身在工督辦自可易於集事著傳諭詢問周元理現在堵築漫口如無庸派人幫辦即著該督上緊趕築剋期竣工若或需人商辦亦即據實奏聞朕當特派大員前往會同妥辦又閱進到圖說北岸漫水洩入隄外減河仍達鳳河歸淀自可無虞旁溢南岸漫水雖由舊河溝一帶趨琉璃河至白溝河入

淀亦可不虞泛溢但自漫口至歸琉璃河處計二十餘里所過村莊未免稍被淹浸田廬有無傷損是否或有偏災該督即應飭委妥幹大員迅往據實履勘如有應行撫卹者一面奏聞一面辦理務使均霑實惠其積水處並著加緊疏消俾得無誤秋麥至南北運河雨後情形若何並切軫念雖南運河自興濟捷地改閘為壩得以暢洩夏秋盛漲不致漫溢為虞而北運河自修葺王家務窪兒港減

壩以來漲水易消隄岸連年鞏固但今年七月初七以後雨勤而大各處漲水必多且潮白諸河俱漲亦歸於運恐諸水併集勢較浩濶能否循軌順下不致衝突隄工所關甚為緊要而天津一帶尤係水鄉是否不致成勞倍切繫懷並著周元理即速查明一併據實覆奏尋奏永定河北岸三工漫口隄基已築祇須加高培厚一二日內即可竣事南岸頭工先將漫口兩頭輟鑲逐段加樁仍於鑲外加土培厚一路接連築墊留出龍口走溜俟將次合龍之前於中泓開引河一道分溜歸槽使龍口水勢平緩即可下埽堵截臣等熟籌已定夫料亦已齊集似無需派人幫辦其南隄漫水淹及沿邊窪地幸水退甚速禾稼無礙村莊廬舍亦無損傷惟琉璃河下游之白溝河被水較重已委員往勘南運河各工平穩天津一帶地畝亦無淹浸北運河張家王甫土隄現經漫口二十餘丈據稟水入鳳

河並未奪溜已派員督率兵夫剋期堵築至本月之雨直屬各河俱報漲發下游州縣有漫淹之處俟勘明後奏聞得旨究屬成災幾分尚易辦否查明大約速奏來○又諭本月初八日據勒爾謹奏五月中旬以來省城以西各屬得雨未能一律霑足而阜蘭等十四處已有受旱情形現在設壇祈禱等語是該省夏間雨澤較稀省西各屬已露旱象此時得雨若何朕心實深廕念乃本日藩司王亶望祇奏捐監交代等事雖所辦尚好而於地方雨水情形未經奏及臬司圖桑阿亦祇循例奏報回任交代無一字及於雨水殊不可解甘省現在如已成旱象自應據實奏明即或續得優膏亦當附摺具奏以慰朕念藩臬為地方大員於通省雨暘水旱情形例得隨時入告况有奏事之便更無難隨摺附陳乃竟不著一語豈以此事為總督專責與伊等毫無關涉耶王亶望圖桑阿俱著傳旨申飭

仍著將近日曾否得雨。或尚覺缺雨。各屬有無偏災之處。詳悉據實覆奏。尋王亶望奏。六月二十六七日。省城及附近地方得雨。而為時較遲。阜蘭等處俱成偏災。七月中旬後。各屬得雨一二寸至深透不等。圖桑阿奏。六月下旬。蘭州等處始經得雨。各屬不免旱災。七月望後。陸續俱已得雨。報聞。○定邊右副將軍廣州將軍明亮。叅贊大臣副都統舒常。奏石真噶為守護沙爾尼要口。礮卡嚴密。官兵每當前進。少有聲息。賊即鎗石如雨。因思向來運礮人聲喧雜。賊習慣而不設備。適新鑄大礮成。飭令星夜運赴石真噶。乘運礮聲。礮之際。分兵前進。連克礮卡。遂進據該處。石包雖山腿賊礮聯絡。亦不憂下壓之難。是沙爾尼一帶賊已無險可恃。諭軍機大臣等。明亮等自攻額爾替以來。久未能進。甚為屢念。今乘運礮人聲喧雜之時。派兵分路潛進。奮勇直入。連占大礮。追殲賊衆。自足令賊人喪

膽。且官軍連據石真噶石包。其下山腿賊礮。無難攻壓。而得即沙爾尼一帶之賊。亦俱可趁勢掃除。其距勒烏圍雖隔一河。而為地甚近。自可即與阿桂等合力奮勦。看來賊勢日益窮蹙。今降番男婦各路紛紛投出。賊中乏食。慌亂情形。大概可知。惟在各路將軍等設法上緊妥辦。迅奏膚功。共膺懋賞。○庚申中元節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○刑部議覆陝甘總督勒

爾謹疏稱奇台廳向無監獄遇有應禁命盜等犯僅令差役看守恐致疎虞請在廳署內建監獄一所計房十五間動項建造應如所請從之

大清高宗法天隆運至誠先覺體元立極敷文奮武孝慈神聖純皇帝實錄卷之九百八十六

大清高宗法天隆運至誠先覺體元立極敷文奮武孝慈神聖純皇帝實錄卷之九百八十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未七月辛酉諭曰御史費南英奏月選知縣等官有因親老願改近省者令於本籍地方官起文時先為取結申敘到部吏部即將遠缺另扣等因一摺所言非是親老准改近省之例本屬國家格外深仁然亦必示以限制不可太過是以令各該員在部具呈必俟簽掣遠缺後始扣除行查另選且此等掣遠改近人員將來養親事畢仍應坐補遠省原缺是於體恤之中仍寓豫防規避之意立法至為妥善若如該御史所奏則

凡有老親者俱得近缺日後更無復得遠缺之人不但變更成例且開人以取巧之門殊屬未妥臣子受恩亦當各知分量豈可因有親老改補近省之例轉生此無厭之希冀乎費南英所奏不可行原摺著發還○諭軍機大臣等工部議駁姚立德咨蜀山湖收蓄伏秋汎水一摺據稱每年例於十一月熬壩收蓄汶河清水若將伏秋渾水收蓄恐水過沙停淤墊漸高不得不另議開挖不特錢糧多有糜費於湖河全局亦有關礙等語雖屬近

理但蜀山湖每年收水以九尺七八寸為度在伏秋大汎正當汶水盛漲之時堪供收貯若至十一月間水落歸槽始行收蓄恐汶水漸微不足以資存儲於來年濟運不能有益但該處實在情形未能深悉必如何方為有利無患難以懸斷高晉於河防事宜素所熟悉前往山東會同勘議必能妥協但此時姚立德正在河南防汎難以分身著俟秋汎一

過姚立德即回至濟寧一面通知高晉速至東省親赴蜀山湖一帶會同姚立德楊景素詳加確勘將應作何定立章程之處悉心妥議具奏工部摺暫存著鈔寄高晉等閱看俟覆奏到日再降諭旨○以前鋒叅領噶塔布為鑲白旗蒙古副都統○壬戌諭軍機大臣曰阿桂等奏從舍圖枉卡繞截圍攻將昆色爾山梁奪據並將果克多山峯戰碉攻克旋進克拉枯喇嘛寺及舊則大海各碉此次官

兵等繞道奮攻奪碉殲賊實屬勇銳可嘉所有將軍叅贊等統俟攻克勒烏圍時一併從優議敘其打仗出力之將領弁兵等著阿桂查明咨部議敘額爾特出力尤多功罪足以相抵著賞給三等侍衛令其益加感奮以勵後效至攻奪碉卡將士踴躍倍常其中多有勇銳出衆之人著阿桂查明如係未得巴圖魯號者即奏請賞給其已得者奏明量加賞賚俾將士倍知鼓舞速成大功又聞進到地

圖已經攻克者頗為不少。若能將章噶速行
攻獲。即可截出勒烏圍以南。固屬甚善。或賊
人守拒尚堅。未免畧需時日。閱圖內新得之
魯克塔爾地方。可通勒烏圍大路。若從魯克
塔爾山溝而出。至托古魯對面過河。由布勒
一帶至勒烏圍。可順壓而下。似屬直捷。今用
硃筆點出。著發交阿桂。令其悉心酌辦。○癸
亥。

上詣

皇太后行宮問安。○諭軍機大臣曰。明亮奏。由
石真噶分路下壓。連克碉卡木城。並攻獲噶
西喇嘛寺。將士等奮勇直進。均屬可嘉。而和
隆武尤為超眾。國家又得一出力好大臣。為
之喜慰。明亮等現在乘勝下壓。自可迅勦沙
爾尼一帶。進擄賊巢。佇盼捷音。又據奏金川
頭人阿布僧格太。攜眷來投。隨營打仗。實出
至誠。其所屬之霍爾甲。阿咱拉。俱經賞給藍
翎。此人竟應賞給二等待衛。以示嘉獎。俾其

益生感奮。番人男婦各路投出者紛紛。而頭
人來降。則自此人始。今加恩授職。並賞花翎。
賊眾聞知。或應相率來降。未嘗不可以。此為
招徠之計。前次傳諭。以頭人如有出降者。俱
當解京治罪。原指大頭人如丹巴沃咱爾等。
黨助惡逆者而言。若如阿布僧格太輩。果能
竭誠投降。原可恕其已往。若再能出力。並當
逾格施恩。且不獨此時為然。即攻克勒烏圍
以後。有頭人望風來降者。尚可一體收用。若

大兵已抵噶喇依。賊眾窘迫之時。始出投降。
則非此時可比。只應暫留營中。解京辦理。○
甲子。諭民間私藏烏鎗。雖例有明禁。日久已
屬相沿。具文昨歲大學士舒赫德奏請查禁。
烏鎗意在戢暴安良。是以准其通行各省。然
亦不過內地為然。若口外蒙古地方。本不當
在禁止之列。昨據福隆安具奏。曾降旨將口
外查禁烏鎗之事。概行停止。今思內地烏鎗
亦不必查辦。即如深山防虎。村莊防盜。民間

製鎗備用亦不可無。若一旦概行收禁。則閭閻頓失自衛之資。轉多未便。且地方官奉行原亦不過有名無實。恐辦理不善。胥吏因緣為奸。需索滋擾。弊且百出。是欲安民而適以累民。更何足取乎。況去歲山東逆犯王倫聚眾不法。並未挾有烏鎗。是小民之守分與否。更不在烏鎗之有無。又何必因此而施之厲禁乎。所有內地查禁烏鎗之事。並著無庸辦理。該部即遵諭行。○諭軍機大臣等。前據熊

學鵬奏。尙隆隘有自安南逃回。厥徒三百餘名。已分起解東省。聽李侍堯審辦等語。辦理尚好。此等皆係不安本分之人。若仍留兩粵日久。難保其不再外竄。是以諭令李侍堯。訊明其中如有起意滋釁之張德裕、李喬光等。要犯即當從重懲究。若果係無處覓食貧民。訊無別故。即分起發往烏魯木齊等處。令其屯種營生。如有脫逃者。拏獲時。照發遣新疆人犯脫逃例。即行正法。今復據熊學鵬奏。小

鎮安百色歸順州三處。已至一千一百餘名之多。因率同署按察使周升桓親往南寧駐劄督辦。所辦亦好。昨據李侍堯奏。以人數眾多。長途押解。恐有疎虞。令右江道黃邦寧馳赴鎮安查審。摘提要犯解東。亦屬簡便之法。今人犯至一千一百餘名。較前幾多三倍。解赴粵東。自更不易。該撫既親赴該處。且有署臬司該道在彼就近查審。更覺省力。惟是人數愈多。愈不便存留本地。自必須分發烏魯

木齊等處種地。使不致復貽後患。但此等匪徒大都遊手無賴。聚集一處。不可不留心防範。若使其明知改發新疆。恐憚於遠涉。別滋事釁。必須處以鎮靜。行所無事。切勿稍露張皇。方其分起押解時。只可稱分發鄰省安插。俾資衣食。使其心不生疑。並須派員分起管解。令其在途。告以此乃皇上為爾輩籌畫生計。使各餬口謀生。安居樂業。實乃爾等之福。爾等若不知守法自愛。或於中途乘間脫逃。

無不即時拏獲。必照新疆例。立時正法。爾等切勿自取重戾。直待離鎮安漸遠。不能逃回。方可畧露端倪。如此辦法。較為妥協。著傳諭熊學鵬。務須不動聲色。妥妥辦理。切不可稍近矜張。但須通知沿途經過各督撫。撥兵護送。并知照烏魯木齊都統。俟各犯解到時。分別烏魯木齊各等處安置種地。勿令聚於一處滋事。將此由五百里發往。傳諭李侍堯。熊學鵬知之。熊學鵬摺并鈔寄李侍堯閱看。仍各將辦理情形。即行奏聞。○又諭。本日據留京辦理王大臣奏到。京師於十七日辰刻。得有大雨一陣。旋復時落時止。至十八日巳刻方歇。但天氣尚未開霽。現今回子祈晴等語。十七日早。此地雖亦密雨半日。而過午即晴。看來京城之雨較大。是否不致過多。與莊稼有無妨礙。著由四百里寄信留京辦事王大臣。即速查明。仍由驛覆奏。以慰廛念。尋奏京城天氣已開霽。擬於二十一日停止祈晴。報

聞。命內閣學士錢載在尚書房行走。○乙丑。諭據伊勒圖奏達色接得勒爾謹查收烏鎗咨文。除哈喇沙爾民人回子等烏鎗另辦外。將土爾扈特和碩特等之烏鎗。應否查收等因。請示前來。當即查得土爾扈特和碩特皆係新歸之人。將伊等烏鎗不可查收之處。行文達色。並行文各游牧處一體辦理等語。伊勒圖所辦甚是。土爾扈特和碩特皆係新歸之人。行獵牧牲防備惡獸。烏鎗在所必需。若概行禁止。於伊等無益。反致生其疑心。非惟此處難行。即新疆回人商民。近京邊外蒙古民人。亦不可禁止。因此昨降諭旨。邊外蒙古民人烏鎗不必查收。通行在案。此一事原議不過引舊例。指邊內民人而言。並非令新疆一併辦理。勒爾謹乃總督大臣。身膺新疆要任。當量事體輕重。不當似轉行文書衙門附從辦理。勒爾謹接准部文。並不揆度。即通行於新疆。殊不曉事體。甚屬非是。而達色乃

住居回地辦理土爾扈特和碩特之人於彼處情形未嘗不知乃仍含糊欲辦理回子商人等烏鎗又以土爾扈特和碩特烏鎗應否查收之處行文請示更屬糊塗悖謬之極勒爾謹達色均著交部議處尋議勒爾謹降三級調用達色革職得旨勒爾謹著改為革職從寬留任達色著革職開缺仍留該處効力○又諭據英廉奏重修布達拉廟工程應令原辦之匠頭等按照成數分賠即於應領工價內次第扣除等語該匠頭等辦工草率致有坍塌閃裂等事按例分賠實屬咎無可辭第念伊等執役營生小人牟利乃其常態監督等每日在工董察匠役等做工如何皆可真知灼見如查有偷工減料之處即可隨時責懲駁斥另做伊等自皆盡心供役不敢任意侵肥草率貽誤是布達拉工程從前辦理不能堅固罪在監督人員而不在匠頭人等所有英廉奏請將原辦匠頭等派令重修於

應領工價內扣除賠繳之處著加恩寬免該匠頭等自應感發天良實心承辦以期工程經久完善倘敢復蹈前轍致所做工程仍不堅久則是伊等不復具有人心必令照數分賠按名追繳並當查明重治其罪以示懲儆著福隆安將朕此旨出示曉諭工匠人等知之○諭軍機大臣等熱河布達拉廟月臺紅牆閃裂坍塌現將承辦之大臣監督等分別議處責令按股賠修如永和什寶薩哈亮等皆革去頂帶効力寅著全德均係始終承辦之人現據英廉奏請將二人革職回京候旨亦屬罪所應得即不然亦應照內務府官員之例革去頂帶留任但念伊等現在外省管理關務若身無頂帶於外省體制攸關且恐一切呼應不靈於公事無益寅著全德均著加恩免革頂帶並免其革職至其應賠之項伊等所得外任養廉本優尚屬力能賠繳俟賠修工程估有成數即著寅著全德於此內

分賠十分之四。如別股有不能賠完者。仍應在英廉及伊等名下攤賠。實著全德各宜知朕格外從寬恩意。倍加感發。天良。勉賠繳庶可稍贖前愆。倘或觀望逡巡。不思効誠竭力。即屬毫無入心。仍必將伊等重治其罪。明山保原係兼管照料。並未經手工程。所有此次應賠銀兩。著加恩免其分賠。并不必治罪。至現在修葺工程。有應需人夫車輛。及巡緝賊匪事宜。本係地方官之責。仍令明山保照

上屆兼管照料。倘明山保意存觀望。不肯實心料理。經朕聞知。即將應賠之項。令明山保一體分賠。○叅贊大臣副都統富德奏。探察賊勢。此時河水漸涸。顯露石灘。若暗創地道。直抵噶咱普。用火藥轟陷賊碉。搶據要隘。進取馬爾邦。最為得力。現選兵密辦。功已及半。報聞。○丙寅

上奉

皇太后幸卷阿勝境。侍早晚膳。○旌表守正捐

軀之安徽廬江縣民楊建。由妻胡氏。山西長子縣民李八孩妻王氏。○丁卯。定西將軍尚書阿桂。定邊右副將軍尚書公豐昇額。叅贊大臣內大臣都統海蘭察。副都統額森特。奏攻克章噶等處碉寨。賊甚多。又額洛木寨頭人革什甲木叅喇。喇科爾頭人雍中。什爾德寨頭人丹比西拉布等三人。率領戶衆來降。經臣等面詢。均稱金川地方民多乏食。而伊等口糧。尚不至乏絕。實出誠心納款。即將

該番衆發往附近內地土司安插。其尚可用者。將伊眷屬遷移向內。留該番隨營勦賊。諭軍機大臣等。此時章噶既得已。拊勒烏圍之背。或先截斷勒烏圍通噶喇依之路。或自上下壓直擣勒烏圍。均可計日而待。設或賊衆自揣力不能支。逃回噶喇依。即未能多殲賊衆。而業已掃其一穴。自益見窘蹙。看來賊衆即或聚守一隅。而敗回之賊愈多。口食愈形竭蹶。其勢斷難久拒。但恐賊人外竄。未免又

羈時日不可不多方設法廣為攔截又據奏頭人等率領戶衆來降其慌亂情形大概可見自是極好機會至該頭人三名誠心納款尚非窘急求免情較可原如果認真出力應賞以藍翎頂帶俾倍加感奮報効且使番衆聞知益堅其投出之心賊勢更易於潰散阿桂等即當妥酌而行○刑部議覆陝西巡撫畢沅奏稱直省立決及由立決改為監候等犯請照秋審勾到例勅部摘敘情由頒發榜

示查秋獻歲一舉行錄由榜示皆係勾到時面奉諭旨至立決案件隨時常有其中或即行正法或改為監候均隨本批發未經面奉指示何敢懸擬應令各該督撫於奉旨後將該犯應處決應末減之處就案情摘示從之○辦理糧餉河南布政使顏希深奏軍營屢捷指日可抵勒烏圖現在北路軍糧足以敷用若存貯過多恐一時移營致糜運費臣已飭附近之茹寨薩克薩谷兩站各設倉房十

餘間截存米三四千石以備移營時就近供運報聞○戊辰諭曰三阿哥之格格指與丹巴多爾濟為婚完姻在邇恐伊等念係朕之孫女於一切典禮俱按公主一體舉行亦未可定朕之孫女較之公主又隔一輩自不應按照公主仍行主僕之禮即如扎拉豐阿所尚係

皇祖之孫女伊於姑前如何行禮之處三阿哥之格格自應仿照而行如果能按家禮克盡婦道朕方為之欣悅倘必欲固執以為朕之孫女應照公主禮相待反與朕之施恩指婚本意不合再羅布藏多爾濟之子旺沁班巴爾曾將五阿哥之格格指與為婚俟完姻時亦應一體遵行嗣後朕之孫女指婚後俱照宗室格格禮行毋違朕諭○己巳諭軍機大臣曰明亮等奏由石真噶下壓攻克沙爾尼溝達思拉木一帶碉卡所辦甚好至新降頭人阿布僧格太此次招降頭人絨布僧格並

策旺寨內衆番頗屬誠心効力著明亮酌賞緞疋傳旨嘉獎以示鼓勵又章京孟德用鎗擊仆策旺甚屬得用又奎林等派令圍裹木城之都司沙津岱及教成進攻碾占時帶兵從礮後抄截進勦賊衆之遊擊銜馬應詔守備孟洪翼均各奮勉並著明亮確查各該員等此次勞績及平日勇幹勤勉若何奏明請旨○工部等部議覆直隸總督周元理疏稱北運河楊村廳所轄之王甫汎工長二十五里甚為緊要該汎距楊村通判駐劄處六十餘里距務關同知駐劄處僅三百步應改隸務關同知就近管理并另立界牌將該汎與楊村汎接壤之草壩月隄俱歸王甫汎經理其楊村汎縣丞與要兒渡縣丞催趲漕運即於新設界牌處為限應如所請從之○蠲免甘肅皋蘭武威鎮番寧朔靈州平羅等六州縣并沙泥州判乾隆三十九年分水災旱災額賦并豁免鎮番平羅二縣水衝沙淤地一

百六十六頃九十畝有奇額賦○以故雲南廣通縣屬回蹬關土巡檢楊恒弟怡襲職○
庚午

上奉

皇太后幸卷阿勝境侍早晚膳至甲戌皆如之○賜扈從王公大臣及蒙古王公台吉等食翼日如之○諭軍機大臣等據管理錢法侍郎金簡等奏請飭催京局銅鉛一摺若照常依議發行該督撫等接奉後仍未必經意尚

恐有名無實運京銅鉛一事朕曾屢降諭旨令該督撫等實力妥辦無許遲延兼令沿途督撫實力催趲並令將入境出境日期隨時具奏邇年以來滇省督撫於起運開幫未嘗不如期奏報各省督撫於銅鉛過境亦未嘗不照例奏聞而各運船隻違限如故皆由各督撫視為具文不實心辦理所致而其弊大率藉守風守水為由任意稽延習而不覺在本省督撫委運既不派明幹之員且一經起

程即藉以卸責其在川省瀘店裝運每不免耽延之處又以事非專責亦聽其稽遲至於沿途督撫遇有運官到境雖查報出入日期總以非其統轄之員不肯認真催督及開報守風守水日期又多拘於向來之例不肯切實稽查銅鉛違限之故大概不離此數者試思江湖即有大風多不過三日四日或為水阻亦何至半月經旬督撫等豈可率意徇情致令藉端違限乎著嚴切傳諭各該督撫嗣後領運銅鉛之事各宜加意經理仍將遵照此旨辦理緣由各據實奏聞此次傳諭之後若委員庸劣致誤運限者惟滇省督撫是問若瀘店耽延致逾定期者惟川督是問若仍照前妄報守風守水聽其任意逗遛者在何省違限即惟該省督撫是問該部嗣後遇銅鉛到局均照此覈計如或遲逾程限即據實叅奏將此傳諭各該督撫並令戶工二部堂官知之又諭今日本報到據袁守侗等奏

連日天氣清明積水自可易消等語熱河自十八日以來俱極晴爽惟二十五日辰刻微雨時零至未刻始止雖勢尚悠揚口外並無關礙但雨勢自西南而來且為時稍久恐京畿一帶雨或較大於田禾不無妨礙深為廑念著傳諭大學士舒赫德及順天府尹等查明二十五日晴雨莊稼情形即速據實由驛覆奏以慰惓注又永定河築口昨據該督奏定於本月二十六日合龍今日之雨於河流有無增長不致有礙堵口否甚為廑念至前永定河漫水所經地方究係成災幾分曾有定局否並著周元理即速查明據實覆奏又諭曰阿桂等奏將直古腦榮噶爾博一帶碉寨及冷角寺等處悉行攻克已直壓勒烏圍之上現派官兵圍其兩面勢若建瓴自可唾手而得惟據楊中爾甲木燦供稱老土婦阿倉及僧格桑之妻得什爾章用皮船過河而去莎羅奔等隨後亦從各路逃竄等語賊

酋賊婦諒不能逃回噶喇依計官軍掃穴擒渠自斷不能漏網惜此時未能即行擒獲耳又閱圖內甲爾日碌橋一處在勒烏圍西南通噶喇依要路若能先將此處攻得斷賊往來之路賊衆自無可逃阿桂現尚未能得必須設法先行攻占則勒烏圍之賊更難自存勒之尤易為力朕於圖內用硃筆標記發交阿桂速為籌辦同日明亮等奏現在已攻扎烏古山梁隨將丹扎木寨落焚燒等語明亮

若能攻得扎烏古即可與阿桂并攻勒烏圍更為得勢佇盼捷音○辛未刑部議覆兵部侍郎高樸等審擬盜賣乳牛冒支口分之革職員外郎義寧通同分肥之革職郎中雙舍革職員外郎海林照盜大祀神御物律不分首從擬斬立決牛吏喜德曠役冒領擬絞監候秋後處決革職員外郎保成徇情故縱復轉託義寧照應喜德擬發遣伊犁該管之貝子允祁公寧成額總管內務府大臣公盛昌

署馬蘭鎮總兵滿斗漫無覺察交各該衙門分別議處均應如所奏得旨義寧著即處斬雙全海林本應按律不分首從斬決但此案主使盜賣究係義寧為首雙全等聽從分贓於法雖亦難寬尚與首犯有間雙全海林俱著從寬改為應斬監候秋後處決看來此等抵盜情弊相沿日久不獨義寧為然他處特未經敗露耳此時姑免概行追究該官員人等當以義寧為戒各知警凜倘再有踵其覆

轍軌法舞弊者一經發覺定照律不分首從即行正法不能復如此次之分別辦理也著交內務府轉傳各該處官員人等知之餘依議○壬申兵部議覆盛京戶部侍郎兼管奉天府府尹德風奏稱奉天省凡押解拿獲新疆逃遣及逆倫先盜重犯惟復州寧海錦縣寧遠四屬移旗撥兵護解其餘各屬並不撥兵請嗣後奉天各該州縣一體移旗護解每犯一名移旗添派兵二名遇有疎虞旗員照

綠營武弁一例議處。應如所奏。從之。○旌表
守正捐軀之河南上蔡縣民劉合羣妻翟氏。
○癸酉。賜扈從王公大臣及蒙古王公台吉
等食翼日如之。○命重刊金史。成序曰。遼金
元三史。人地名音譯訛舛鄙陋失實者多。因
命儒臣按同文韻統例。概行更錄。蓋正其字。
弗易其文。以史者所以傳信示公。不可以意
改也。茲閱所進金史。見其中文法乃多有未
當者。如稱元兵為大兵大軍。以元臣修金史。
理固宜。然而於大兵大軍等句下。或接稱上。
或稱朝廷。則又皆敘金朝事。畧無界限分別。
使淺學者觀之。幾不能辨其為何代語。是乃
文義不佳之故。然此猶小疵。非若人地名之
謬誤宜改。仍其舊可也。至若崔立傳贊云。其
志方且要求劉豫之事。我大朝豈肯效尤金
人者乎。金俘人之主。帝人之臣。百年之後。遂
啓崔立之狂謀。以成青城之烈禍云云。直是
痛加詆斥。實為非體。夫一代之史。期於傳信。

若逞弄筆鋒。輕貶勝國。則千秋萬世之史。皆
不足信。是則有關於世道人心者甚大。推之
明修元史。類此者應亦不少。然史書流傳已
久。難以釐正。亦不得不仍其舊。若我本朝修
明史。於當時賢奸善惡。皆據事直書。即各篇
論贊亦皆覈實立言。不輕為軒輊。誠以作史。
乃千秋萬世之定論。而非一人一時之私言。
予向命纂通鑑輯覽。於明神宗以後。仍大書
明代紀年。而於本朝定鼎燕京之初。尚存福
王年號。此實大公至正。可以垂示天下後世。
豈若元托克托等之承修金史。妄毀金朝者。
之狃於私智小見。所可同日語哉。書此以揭
重刊金史之首抑。亦有慨於前。而所以深誠
於後也。○諭軍機大臣曰。李侍堯奏。安南陸
續竄回。廠徒共計千有餘名。已檄飭分起解。
至南寧。派委道員吳九齡。黃邦寧等。悉心訊
辦。如究出附和滋事之犯。迅即押解東省覆
鞫。餘俱訊明原籍住址。解交地方官管束等。

語此等竄往安南各犯原係不安本分游手無藉之人。若仍留本地必致日久滋事。前已傳諭李侍堯及熊學鵬令其於訊明後分起押解烏魯木齊等處屯種營生。分地安插。並令不動聲色。妥為經理。勿使各犯起解時知係外遣。方為妥協。李侍堯尚未接奉前旨。故有此奏。所有應行押解粵東審訊之犯。諒亦無多。自可照所奏辦理。其餘衆犯應仍照前旨妥辦。陸續解往烏魯木齊。不可稍涉張皇。

亦不可少有疎忽。將此由五百里傳諭李侍堯並熊學鵬知之。○戶部議覆署雲貴總督圖思德咨稱。各省委員採買滇銅。自行赴廠領運。廠地遠近多寡不一。或一員而領數廠之銅。輾轉轉運。以致逐廠分扣限期。殊非省費。速運之道。請將出銅較少之大美香樹坡馬龍寨等廠。令廠員將銅雇運省城。交雲南府接收轉發。其程站最遠之得勝。白羊。日見汎等廠。令廠員將銅遞行運交大理府收存。

轉發各省委員領運。各按銅數總扣限期。毋須逐廠分扣。至義都青龍兩處。廠銅較多。及下游銅廠程站較近。易於雇運者。仍令各省委員赴廠自行領運。所需運費。上游自廠至省。歸滇報銷。下游歸各省報銷等語。應如所咨。并飭令各廠員先期運往存貯。如各省委員已到該處無銅可兌。即將辦運遲誤之廠員查叅。並將各委員守候盤費著賠。至銅多路近各廠。外省委員自行赴領者。仍令該地

方官協同雇募。催趲起程。從之。○大學士舒赫德順天府府尹劉純煒覆奏京城本月二十五日早間陰雨至晚方止。現在雲氣尚未盡開。窪地禾稼不無傷損。高阜仍可豐收。報聞。○甲戌諭軍機大臣曰。高晉覆奏鳳陽關狄咏箎署任內短缺稅銀。查明無弊。一摺。既請將所缺銀兩著落辦理不善之狄咏箎賠繳。已足示儆。即可無庸交部議處。業於摺內批示矣。至另摺所奏棟文管辦關務竭蹶。請

另行改補之處。且可不必。棟文係小心謹慎之人。歷任兩江府道。均能實心辦事。至其鳳陽關任內。少收稅銀。既據查因過關米豆短缺。似係實情。此時即另易他員。亦未必能較棟文遽有起色。因思李質穎前在鳳陽關辦理關務。頗為妥協。著將此事交與李質穎令其幫同棟文設法管理一年。再行酌看。如棟文實有不能辦理情形。即著李質穎據實奏聞。候朕另為酌奪。高晉摺鈔寄李質穎閱看。并將此諭令高晉知之。○乙亥。諭軍機大臣等。據陳輝祖奏。拏獲鄰境劫掠兇盜之漢陽縣知縣孟秉堅等。應否送部引見一摺。已照所請批示矣。各員實力緝捕。使兇盜不致漏網。自應送部引見。以示獎勵。但各案盜首。自乾隆三十八年以來。膽敢出沒江蒞。在湖南湖北地方。肆行竊劫。已非一日。所在州縣。何以不即時稟報。上緊嚴拏。至數年之久。始行就獲。則前此未辦之地方官。均不能保無諱。

匿情事。其咎并不止於失察。今陳輝祖既將出力查拏之員奏請引見。其前此未經查緝之員。自應一併附參議處。乃止將獲盜各員專摺保奏。其應行處分者。僅於審案摺內附稱三十八年起有無報案。及此案失察之文武查明効參。並未專摺參奏。是陳輝祖之意。惟急於有功者行賞。而緩於有罪者示罰。何以飭吏治而昭勸懲。陳輝祖著申飭。並著將三十八年起各盜犯案州縣。有無報案。及是否諱匿情形。迅即確查。據實分別參奏。毋得稍有瞻徇。將此諭令知之。○又諭。前據周元理奏。永定河南頭工漫口。定於本月二十六日合龍。如果依期竣事。自當迅速奏聞。乃待至今。早未見奏到。或該處漫口。尚未堵築齊全。深為廛念。前因二十五日熱河微雨。半日雨勢自西南而來。恐口內之雨更大。於合龍稍有稽阻。並恐礙及田禾。曾傳旨詢問。昨早及今早。此間又頻得雨。未知關內雨勢若何。

著再傳諭周元理將永定河究於何日合龍。並近日雨水莊稼情形及被水地方成災分數一併詳悉查明據實迅速覆奏。將此由五百里諭令知之。尋奏永定河南頭工漫口。因二十五六日雨大水漲。直至二十九日已刻合龍。不期是日午後復雨。至三十日更大。復衝開原築口三丈。趕緊接築。幸值天晴水落。一二日內即可築竣。至各屬被水地方成災輕重不等。現委員分路確勘。其田禾高阜地畝及上游未被水淹者俱極豐茂。得旨覽奏俱悉。○是月直隸總督周元理奏。現在紅旗將到。軍報緊要。滹沱河山水陡發。舟莫能渡。辦有皮袋水帶等物。令習水者束皮袋於肩。繫水帶於兩腋下。外添習水者四五人。於波浪中夾護而渡。雖不無稍遲。而涓滴不漏。得旨嘉獎。○又奏直隸通省州縣豐收者多。所報水災不過一隅。亦未及十分之二。批。辦理尚易否。又稱本年十月遇閏。距大賑之期尚

遠。恐被災重者覓食為難。已令查賑各員於清查戶口時。遇有貧民。先行登記。於九十兩月酌量摘賑。得旨覽奏俱悉。一切妥為之。○湖廣總督署四川總督文綬奏。南路章谷一帶存糧甚裕。應將供運站夫酌減。查南路自雅安至打箭爐十七站。每站設夫三百名。今於十七站中。將富莊至打箭爐十一站。每站裁夫一百。雅安榮經清溪三縣。每站亦裁夫一百。惟觀音鋪黃泥鋪長老坪三站。山高路遠。站夫仍循舊額。合計裁站夫一千四百。得旨嘉獎。○廣西巡撫熊學鵬奏。安南竄回內地。嚴徒一案。緣前次奏開。由村隘通商。是以前往者衆。現今督臣李侍堯將由村隘封閉。又將給照之例暫停。防守甚嚴。報聞。○定西將軍阿桂等奏。西路受傷患病各兵。留營調治。轉需官兵照料。且糜糧餉應分別查驗。令各回旗籍調理。現已分起啟程。得旨嘉獎。

大清高宗法天隆運至誠先覺體元立極敷文
奮武孝慈神聖純皇帝實錄卷之九百八十七

實錄卷之九百八十七

三

大清高宗法天隆運至誠先覺體元立極敷文
奮武孝慈神聖純皇帝實錄卷之九百八十八

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級奉常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

奉常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未八月丙子朔日食○諭軍

機大臣等據留京辦事王大臣及順天府尹
等奏七月二十八日酉戌刻京師仍復下雨
雖不甚大頗覺綿密二十九日晚暫停夜間
時雨時止迄今尚未開霽等語是京城雨勢
較熱河稍密為時亦較久本日此間天氣已
覺大晴不知京城本日晴雨情形若何莊稼
有無妨礙深為厯念著傳諭留京辦事王大
臣即速查明據實由驛覆奏此旨著由四百
里發往○留京辦事王大臣會同宗人府議

覆御史宗室炳文奏稱定例宗學學生內挑取十二名為貼寫筆帖式不開原缺仍領公費俟補實缺後再行開缺另補因此出缺甚難挑補阻滯請照八旗官學生例凡考取筆帖式者即開缺另補亦不得仍領公費再宗室實缺筆帖式二十四員貼寫筆帖式僅十二員似未盡一請再增設貼寫筆帖式十二員均應如所奏惟所稱挑取貼寫筆帖式後即不得支領公費一節於辦公不無拮据應

仍照原例年終每人支銀三十兩再照實缺例每月支公費一兩從之○丁丑祭先師孔子遣協辦大學士官保行禮○諭軍機大臣等前因七月初旬以後雨水稍多恐於莊稼不無妨礙又因永定河漫口恐被水之處不免成災屢經傳旨詢問該督茲據覆奏七月間各河泛漲近淀之霸州等七處俱有低窪村莊積水未消成災較重其餘宛大等十九州縣又續報之趙州等九州縣又漳

河漫入之大名元城二縣被水等處現在委員確勘等語此次被潦各屬計有三十餘處似較上年天津河間二屬被災之處稍多但上歲係旱災到處皆同此次被水惟低窪當之其高阜處仍可無恙以此較彼未知成災分數比上年孰輕孰重賑恤所需孰少孰多著周元理將實在情形即速覈明覆奏其應行撫卹之處並著董察所屬實心妥協經理毋致被潦村民稍有失所將此諭令知之○

又諭曰阿桂等奏攻克隆斯得賊寨係賊藏貯鉛藥之所現獲其火藥一百餘簍其鎗子堆貯屋內自數寸至二尺餘深此必係賊人前歲在木果木剗取者今經官兵收得實為快意此寨一得賊人鉛藥無資自更難於守拒官兵攻勦尤當迅捷至明亮處攻奪扎烏古山梁派委之屯土兵丁及引路之降番阿布僧格太霍爾甲阿咱拉等甚為出力自應予以獎勵著明亮即傳旨將阿布僧格太霍

爾甲阿咱拉三員酌賞緞疋其屯土勇銳兵丁著各賞一月錢糧俾伊等益知鼓舞至於番地路徑土兵固所熟悉然用為嚮導則可若攻堅越險則索倫吉林兵丁皆所優為即綠營中亦有可供驅策者遇攻打碉寨之事自應將滿漢兵丁與屯土各兵一體選派業已節次傳諭何以明亮此次進攻仍專選屯土兵四百名獨當一面並不派令索倫吉林及綠營精銳兵丁合力前往殊屬非是又明亮摺內稱後隊官兵進攻倘少存畏難之見則在內屯土兵丁竟無一人得脫等語是明亮未嘗不知此地之危險而令降番土兵前往嘗試倘使若輩窺破必私相抱怨謂將軍不惜伊等身命令其前驅冒險豈肯復安心出力且同係番人其為賊死守抗拒者實堪切齒必當殲戮無遺若既已投誠即與內地之人無異自當一視同仁至屯土兵眾均係効力隨征尤不應稍存歧視將軍等若專於

滿漢兵丁優加體卹而於降番土練視為無足重輕不稍顧惜如此即為不公此事甚有關係著傳諭阿桂等一體遵辦○戊寅祭大社大稷遣怡親王弘曉恭代行禮○上奉皇太后幸卷阿勝境侍早晚膳至壬午皆如之○賜扈從王公大臣及蒙古王公台吉等食至壬午皆如之○諭軍機大臣等前據嘉謨奏重運全過臺莊一摺似以運河水小為言因正當伏秋水較盛之時曾傳諭姚立德將微山等湖多為蓄納以濟來年春運旋據姚立德覆奏據運河道陸燿稟稱濟寧一帶於七月初六七八等日連得大雨汶河報長水四尺七寸泗河長水尺餘府河長水二尺五寸俟尾幫挽過南陽暢開西岸十四單閘俾汶泗入運之水由各單閘分洩以達微湖務使多為蓄納以濟來年重運等語似姚立

德已飭該道陸燿籌辦。今據嘉謨奏。韓莊逆上長河水有來源。無虞淺小。而八閘全賴微湖之水下注。本年底水無幾。目下雨水調勻。曹單金鄉一帶必有坡水下注。微湖若能敷定制一丈一尺之數。籌蓄深暢。來歲重運得資利賴等語。是嘉謨仍以微湖蓄水為言。著再傳諭詢問姚立德。將微湖現在存水尺寸若干。是否足敷嘉謨所奏之數。即行查明。據實覆奏。尋奏。湖中原蓄存水。因接濟漕運。宣洩日久。止存底水七尺一寸四分。臣復令運河道陸燿。於西岸十四單閘開放外。又添啟水口七處。引東岸獨山湖水穿運入微湖。七月下旬。連值陰雨。汶泗河水增長。曹單金鄉魚臺一帶坡水下注。現在連底水已有八尺一寸七分。若此後水勢加增。益形寬裕。得旨。好。又諭。據嘉謨等奏。七月二十一日。已將全漕幫船催過濟寧。仍由水路分頭嚴催前進等語。向來重運全抵天津。漕臣例赴行

在陸見目下已屆八月初旬。計嘉謨到熱河時。朕已啟鑾進哨。著傳諭嘉謨。俟漕艘全數抵通後。即由該處督飭回空各幫南下辦理。冬間受兌等事。毋庸前赴行在。又諭。據留京辦事王大臣覆奏。京師於八月初二日早天氣涼爽。晴象大定。擬於初三日停止祈晴等語。所有派令祈晴之回子等。應各賞紗一疋。著傳諭舒赫德。即向總管太監王成傳取賞給。○吏部議覆署山西巡撫已延三奏稱。朔平府理事同知握陞額。係署布政使農起胞弟。例應迴避。請照例由部掣定省分。咨發到日。給咨赴補等語。握陞額應令迴避。至由部掣定省分一節。查理事同知額缺甚少。不同撫民同知。若一體改發。如籤掣缺少。省分竟至補用無期。應令給咨握陞額赴部。俟有各省理事同知缺出。吏部帶領引見補用。嗣後理事同知迴避。照此辦理。從之。○已卯。諭據鐘音奏。溫州鎮總兵林俊染患腿疾。非數

月可以就痊請予回籍調理員缺另行簡放等語林俊著准其解任回籍調理所有浙江温州鎮總兵員缺著孟兆熊補授所遺員缺著洪元補授○諭軍機大臣等據順天府尹奏自八月初一日起天氣開霽現在風日高爽從此晴明旬日高低田畝結實益當飽滿即低窪被水之區疏消更易等語此次直隸被水之地較多並經周元理奏低窪處不免成災今摺內但稱被水之區易於疏消而於各該處成災與否及輕重分數若何未據詳悉奏及著傳諭該府尹等即速確切查明據實覆奏○又諭昨因周元理奏霸州等三十餘州縣被潦之處較多已諭令確查與上年河間等處旱災輕重若何據實具奏茲據奏稱霸州等七處被災較重約有八九分不等其大興等十九州縣及續報之趙州等九州縣又大名玉田元城三縣已報成災者大約六七分居多稍重者不過八分等語看來此

次被潦情形似覺稍重但未識與乾隆三十五六兩年被災輕重若何前此三十五六兩年放賑因直隸留備銀數不敷曾撥部庫銀兩協濟今歲應需賑卹銀兩比前此兩年約計多寡若何藩庫現銀是否足用著傳諭周元理一併查明迅速據實覆奏尋奏本年被災州縣不及三十五六兩年之重將來賑濟所需亦不比前此之多藩庫現銀五十餘萬可先撥用得旨覽○又諭前據御史戴翼子奏自縊命案緝兇請仍照定例勒限開叅一摺所奏已未能明晰因交該部查奏今吏部議覆祇稱遵照成例辦理並非另有更改等語所言仍不明晰若吏部原辦並無錯誤則係該御史條奏未當如該部所辦與成例不協即係該部之誤自應據實具奏改正二者必有一是豈得語涉含糊著傳諭該堂官等即將此案孰是孰非之處另行詳悉查明覆奏○庚辰土爾扈特郡王車楞德勒克及年

班貝子沙喇扣肯等入覲

上御卷阿勝境召見賜食○遣官祭黑龍潭

昭靈沛澤龍王之神玉泉山

惠濟慈佑龍王之神○諭軍機大臣等昨歲

山東逆犯王倫案內尚有逸匪歸太劉煥冀

盤佑未經弋獲三犯俱係罪大惡極不容漏

網之人前曾諭令該將軍府尹等留心查緝

至今尚未就獲或係奉行不力視為具文歸

太向曾販馬營生於口外路徑皆所熟悉恐

其慮伊本籍及內地各省躡緝必嚴難以潛

避不敢存留因奉天地方山東百姓流寓耕

作者多或可改名匿跡劉煥冀盤佑或相依

同竄亦未可知著再傳諭將軍弘晌管府尹

事德風等飭屬設法躡訪上緊嚴緝務獲勿

使要犯日久稽誅仍將作何辦理緣由即行

覆奏○又諭曰德風奏據義州知州燕都詳

報直隸民人李相時項現有刀痕復將頭顱

打破跳入井內經衆救出隨於李相行李內

搜獲結拜盟單現在查辦等因一摺結盟滋

事之犯自應查訊明確照例辦理至該知州

燕都身係滿洲其音寫漢字名竟似燕姓漢

人在京住久故名燕都以取文義聯絡此等

陋習實為可鄙滿洲成語可以取名者甚多

其音漢字樣不致牽混者亦復不少何必用

燕都二字以與漢人姓名相混乎著傳諭德

風諭令該知州即另行改名附便奏聞並咨

部旗存案尋奏該知州遵即改名克昇額得

旨覽○辛巳賜沙喇扣肯等食翼日如之○

壬午遣官祭

關帝廟○諭曰徐績奏河南武陟縣沁河前

因驟漲漫開張村民堰由班家溝入黃今漫

口已經堵閉而被水低窪處所收成未免歉

薄水涸後只可趕種秋麥以備春收等語武

陟被淹地畝雖僅五百餘頃不過一隅偏災

但該處民人秋成既歉於購備籽粒不無拮

据且有經水衝塌草房修葺亦復不易殊堪

軫念著徐績即查明武陟縣被水之地每畝先借給籽種六分俾得及時種麥並照例賞給修房銀兩並撫卹一月口糧以示朕體恤窮黎至意該部遵諭速行○又諭據富勒渾等奏川省報銷款項繁多必須熟於銷算之員方為得力前於李湖到川時詢有原任大關同知余慶長向辦雲南奏銷甚為實心該員服闋候補現在調取來川入報銷局辦事實能細心綜覈請旨將余慶長留川補用等語著照所請余慶長即留於川省辦理奏銷事務遇有相當缺出即行奏請補用○癸未遣官祭昭忠祠○諭曰富德奏創挖地道運貯火藥將噶咱普山腿下碉卡木城立時轟塌斃賊甚眾富德調度有方將升等亦各實力奮勉均屬可嘉富德俟大功告成一併優敘所有在事出力之將領弁兵等並著交部查明議敘○諭軍機大臣等前據熊學鵬續奏小鎮安等處自安南逃回厥徒已至一千

餘名較初次所奏幾多三倍更不便存留本地是以諭令該督撫將此等厥徒分發烏魯木齊仍曉諭以謀生之處切勿稍露端倪妥為辦理今據李侍堯奏竄回民人現已二千有奇嚴究滋事要犯從重定擬如止係附近貿易傭工之人訊明原籍住址解交地方官嚴行管束等語所辦未妥計李侍堯拜發此摺時尚未接奉前兩次所降諭旨故為此奏此等匪徒大都皆游手無賴不安本分之人若使仍留本地伊等於安南道路熟習日久必潛越夷境仍滋事端惟是人數已至二千餘為數太多非但烏魯木齊一帶難容如許匪徒即沿途遞解人數太多照料亦殊不易自應分別妥辦但其事頗有關係恐非熊學鵬所能經理著李侍堯迅即親赴粵西細查此項竄回人眾內如有在安南滋事不法之犯即應照例另辦其中如有蠢笨無能及有親族產業可依者尚可飭發各本籍交地方

官嚴加管束。令在境內傭耕手藝營生。毋許再行出境滋事。日後如有違犯。加倍重治。其罪若隻身無籍之徒。斷不可仍留本地。致令日久復萌故智。李侍堯當詳加察勘。視其形迹稍覺獷悍者。即發往烏魯木齊等處。令其屯田出力。其人尚馴懦者。酌量於內地省分安插。聽其各謀生理。但不可令在沿途及苗疆省分并毗連兩廣地方。致使日後復得逃回滋事。並於起解時。明切撫諭。此係特旨。念

其貧苦無依。授以自謀之地。並非發遣。並飭解員妥為防範。勿使中途竄脫。若有在路逃遁者。拏獲之日。即照遣發新疆例正法。仍於近邊各處嚴密防衛。酌定善後章程。毋許再復有人竄至安南滋事。李侍堯於辦妥時。即行覆奏。先將奉到此旨起程。前赴粵西日期。即行奏聞。李侍堯未到之前。熊學鵬務須處以鎮靜。不可因人多事大。稍涉張皇。至所稱安南國王。拏獲首犯張德裕等三名。從犯張

學昌等十五名。解送前來。現飭左江道接收。解赴粵東審辦等語。自應按照律例辦理。毋稍姑息。如已趕解赴東。即在東省監禁。另辦不必因李侍堯現赴粵西。復行解往。若尚未起解。即可候李侍堯到時。一併審辦。但現在南寧地方。所有竄回各犯。皆聚於彼。此等首從要犯。不宜復解彼處。致令餘眾驚疑。若李侍堯另酌於經途。妥當府分。嚴行監禁。俟辦完全案。回程再行審訊辦理。至閱安南國王原咨。有請將進口散眾。求矜容免究之語。雖屬該國王美意。但內地民人。越境滋事。自當分別繩以內地之法。未便概為姑寬。應將此檄示該國王。俾知天朝德威所在。不容絲毫假借。現今軍機大臣代擬李侍堯檄稿。諭以接准該國王來咨。將在厥滋事之張德裕。古字湯李喬光。三犯并夥徒十五人。委員押解進關。咨內聲明該犯等。首服認咎。投納兵器。聽候處分。又稱夥伴合力營生。非是生事。為

匪如進口回籍。上憲自廣矜容。免其究處等因。固是該國王美意。代求曲予。矜全接閱來咨。深為嘉悅。惟是內地民人。敢於越境滋事。天朝律有明條。難於輕宥。不但所執首從十八犯。應按律從重究處。即竄回人衆。本閣部堂現亦親赴粵西省。就近詳細研求。若其中尚有與首犯附和不法者。仍須依律懲治。即係一時烏合。聞拏投仗而散者。雖與持械拒捕有間。但既至外國生事。即不便概置不問。

今本閣部堂逐一查訊。視其情節輕重。分別內遣外遣。及發回原籍羈管。不許復出生事。違者加倍治罪。現在奏聞大皇帝。候旨遵行。中國法度所在。從無絲毫假借。不便因該國王之申請。曲法徇情。且本閣部堂所以按律嚴懲之故。亦欲儆戒將來。不使匪徒復至爾國滋擾。仍是保護爾國之意。該國王必能深體本閣部堂執法防弊之深心也。再本閣部堂現在嚴定章程。不許內地民人再至該國。

邊境居住滋事。嗣後如有沿邊百姓私越邊界。潛居該國者。該國王務須隨時報聞。以便檄令拘解究治。更為妥協。著發交該督繕寫回文。行知該國王遵照。仍將安南原咨發回。該督存案。將此由六百里傳諭知之。○以署雲南昭通鎮總兵斐慎。為甘肅寧夏鎮總兵。○甲申。

太宗文皇帝忌辰遣官祭

昭陵。○定西將軍尚書阿桂。定邊右副將軍尚書公豐昇額。叅贊大臣內大臣都統海蘭察。副都統額森特奏。官兵連夜攻勒烏圖。轉經樓附近寨落。賊窘迫抗拒。官軍連拏木柵。槍占賊寨。其地有高礮五層。須逐層攻克。現已至第四層礮下。擬用鎗礮轟擊。諭軍機大臣等。賊衆當此窘迫之時。尚敢捨死抗拒。實為可惡。然亦不過護巢情急。暫緩須臾。官軍奮力圍攻。蟻輩豈能經久。況我兵接拏木柵。已至第四層礮下。用礮轟摧。尤為得力。自可剋

期而得。乙酉浙江巡撫三寶疏報。仁和餘杭。嶧縣。蘭谿。開化。樂清。瑞安。海寧等八州縣。乾隆三十九年。分開墾田地山池二百四十頃。四十四畝有奇。丙戌。

太祖高皇帝忌辰遣官祭

福陵。諭軍機大臣等。安南竄回內地。厥徒一事。已屢諭李侍堯。熊學鵬。令其不動聲色。妥為查辦矣。今據熊學鵬奏。摘取要犯解赴東省。其餘分別被拏而逃。及被夷官逐出並聞

風逃避各種現在西省管押。聽候督臣酌覈等語。昨李侍堯奏到此項人犯約二千餘。因人數過多。曾令李侍堯親往粵西酌量分為數等辦理。今據熊學鵬所奏。則各犯情節輕重本有等差。即可照此覈定。如係在廠滋事。於緝拏時逃走者。其人必皆桀驁難馴。斷不宜仍留內地。自應發往烏魯木齊等處種地。其中或有悍黠尤甚者。并當發往伊犁。其實係被夷官逐出廠者。雖與滋事被緝者有間。

然究非安分之徒。亦不便留於本省。致日久復萌故智。應遵前旨。分發各省安插。聽其自行謀生。其並未在廠。祇係附近貿易聞風逃避者。其人尚屬無過。查訊得實。仍可留於本籍。交地方官嚴加管束。令其傭耕小本營生。不許復行出外生事。若查訊其人並無親族行業可依。或素係游手無藉者。留之恐蹈前轍。亦應酌發各省安插。餘仍照前諭妥酌而行。此旨著由六百里發往。傳諭李侍堯。熊學鵬知之。仍即將作何辦理之處。由驛覆奏。入諭曰。高晉奏黃河汛水情形一摺。據稱黃水勢盛。倒灌現在收束清口壩。分別挑濬。引河淤淺等語。今歲自六七月以來。據吳嗣爵奏報。黃水時長時落。並稱清水暢出。直抵惠濟祠。初不聞有倒灌之事。今高晉所奏。在清口時水勢情形。則黃水倒灌。引河淤淺。似非一日。何以吳嗣爵並未奏及。著高晉。吳嗣爵。即速查明。據實覆奏。至清口引河淤淺湖水。

宣洩不能通暢所關非細自當亟為籌畫分別挑濬著高晉等即速確勘妥辦具奏再從前黃河安設木龍挑溜最為得力後將西邊者移徹向東年來著有成效現在東邊應否再為添設木龍俾大溜不致逼近清口並著高晉悉心酌量妥辦具奏尋奏江南河工自七月二十三以後黃水盛漲以致清口倒灌臣吳嗣爵隨於七月二十五日會摺奏聞迨八月以來清水漸旺當即將各引河盡力疏濬湖水隨暢出清口仍直達惠濟祠會黃東注至黃河木龍現有六架每年修理本年六木龍運下長有新灘百餘丈儘可添設木龍但灘勢未定俟霜降水落後相機辦理得旨覽奏稍慰○定邊右副將軍廣州將軍明亮奏扎烏古之北為琅谷如得據此則後路已俱肅清現派兵進剿又奏舒常奉旨令其帶兵赴吉地駐劄業已起程但舒常在緯斯甲布日久難以驟易生手可否另委員前往

更替回營或懇另派叅贊前來諭軍機大臣等明亮奏設法從琅谷一路進兵果能如此辦理則後路尤覺肅清於攻取自更有益又據奏舒常在緯斯甲布日久得駕輕就熟之益或另委大員更替回營或懇另派叅贊等語現在大功指日告成自不值另派叅贊前往且更易生手亦未必悉合機宜是北路軍營應令舒常仍回叅贊為妥但吉地防守匪逆外逸之事亦甚緊要必得可恃之人獨當一面方妥因思桂林熟悉番地情形遇事亦能籌度其所駐之章谷現無必需應辦之事該處又與吉地相近且前據稱尚有兵七八百名莫若即令桂林於此內選兵三四百名迅速帶往吉地駐守其章谷僧格宗一帶地方即交哈清阿同李世傑照桂林所辦章程妥協經理舒常於桂林到彼時將一切要領面為講究交辦仍即回北路軍營與明亮迅速商同進剿○又諭美諾布朗郭宗等處幾

如內地可不似從前之防守長清此時無庸
仍駐布朗郭宗著抽兵一千帶領前往至僧
格宗暫駐察勘情形若功噶爾拉當噶爾拉
兩處賊人不似從前之看守長清竟可帶兵
直進出其不意殲賊克碣亦足令逆酋喪膽
即使不能采入而添此一路之兵使賊人猜
疑驚怖亦可奪賊人之氣而分其勢富勒渾
屢次摺來俱係隨阿桂軍營行走今大功指
日告成富勒渾隨營並無必需伊專辦之事

莫若令其在布朗郭宗代長清駐守將此一
併諭令知之○以山東督糧道汪圻為雲南
按察使○丁亥

上奉

皇太后幸卷阿勝境侍早晚膳至庚寅皆如之
○賜扈從王公大臣及蒙古王公台吉等食
至庚寅皆如之○諭軍機大臣曰圖思德奏
廣南府與廣西小鎮安交界地方拏獲竄入
滇境匪徒古鴻偉等十八人訊係從交趾送

星廠逃回等語此等竄回廠徒與粵西所獲
無異其桀驁者斷不可留於內地即游手無
依者亦不便仍留本籍曾屢諭李侍堯等細
覈各犯情節輕重分為三等重者發往烏魯
木齊等處種地輕者在各省安插其無罪者
仍留原籍交地方官嚴行拘管并令嚴定章
程勿使此後內地民人復得竄越外境而沿
途押送並令小心防範勿致疎虞滇省亦當
仿照辦理著將屢次寄諭李侍堯等諭旨鈔

寄圖思德閱看該署督即可詳覈妥辦○兵
部等部議覆西安將軍傅良陝西巡撫畢沅
奏稱駐防西安八旗官兵牧馬廠地九百六
十頃自節次移駐新疆等處現僅存馬三千
五百留四旗廠地四百八十頃足備牧放其
餘四旗廠地四百八十頃請交地方官招民
墾種陞科以作官兵紅白賞卹之需應如所
請從之○戊子

萬壽節遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵○遣官祭

顯佑宮

東嶽廟

城隍廟○

上詣

皇太后行宮行禮○御澹泊敬誠殿。扈從王公大臣官員及蒙古王公台吉等行慶賀禮○諭軍機大臣等前曾傳諭嘉謨於漕艘全數抵通之後即由該處督飭回空南下料理受兌事宜不必前赴行在。今據嘉謨等具奏通

漕尾幫於八月初六日全數催出德州王猷

即由陸路星馳復命嘉謨督催全抵天津即

赴行在等語該督等具摺時想尚未接奉前

旨故有此奏著再傳諭嘉謨仍照前次傳諭

不必前赴行在至王猷於八月初六日從德

州起程亦未必能於朕啟鑒幸木蘭之前趨

赴熱河若朕已經進哨渠來亦無益著併諭

王猷及巡查天津通州漕務之卹日榮色爾

布竣事後即行回京俱不必馳赴行在候朕

回鑾時隨衆接駕可耳將此一併傳諭知之

○已丑定邊右副將軍廣州將軍明亮奏琅

谷上連扎烏古臣派兵進擊碭內賊人鎗石

如雨適降番阿布僧格太喊諭守卡之賊賊

奔潰遂克琅谷諭軍機大臣等明亮之兵若

能從扎烏古下至河沿即與勒烏圍緊對於

隔河用礮轟擊賊衆自難久支亦足為阿桂

之助阿桂此時如已攻得勒烏圍自屬甚善

否則帶兵速往河西北岸將沿河一帶礮寨

盡行攻克即在隔河攻打勒烏圖可不虞賊人隔岸鎗礮阻攔即扎烏古賊衆亦難占據并可引明亮之兵下至河岸合力進攻實為兩便阿桂等當即安速為之至明亮攻打琅谷賊碉時降番阿布僧格太喊諭守卡之賊甚為出力著明亮即傳旨賞給緞二疋以示獎勵庚寅諭據敦福奏城步縣江頭司巡檢黃時御盤踞縣城誤公派累苗民請將該巡檢革審其該管知縣白永亮等不飭令回汛反批發案件委辦以致恣意擅受並請革職等語黃時御著革職交與該署撫嚴審究擬其前署知縣白永亮現任知縣張廼紱並著革職敦福奏此事甚當但將該管知府刁玉成與司道一併列入揭報之內殊屬非是該上司如藩臬及長寶道俱遠隔省城耳目或有未周至寶慶府刁玉成係本管知府乃一任該巡檢盤踞縣城經年種種妄為並該縣正署各令批委案件以致黃時御恣

意擅受該府豈竟漫無見聞朕每於知府請訓時不憚諄諄告誡令其察吏安民實心整頓今於此等劣員毫無覺察其何以稱表率之任乎況此案明係敦福巡察至彼有所風聞飭查發覺者何得稱自刁玉成之揭報冀為倖免處分之地刁玉成著交部嚴加議處敦福輒將該府列入揭報亦屬不合並著交部察議兵部議覆鴻臚寺卿江蘭奏稱會試武舉分派四圍大約漢軍直隸居前雲貴等省居後易啟豫為揣摩之弊請於試期前一日按各省人數分冊封固臨期籤掣分圍考試應如所奏又奏稱中式武舉之弓刀石請於殿試時覈對查殿試時始行覈對恐難詳晰應先期請簡員演試如前後參差將該武舉照文會試磨勘例罰停殿試一科原挑取之監射大臣交部議處從之又議覆御史李廷欽奏稱武圍外場箭冊記載最關緊要監射大臣毋得隨帶多人以防洩漏應如

所奏除箭冊自行登記無庸假手官員概不准隨帶外其隨旁跟役亦不得過四名又據奏稱監射大臣不准晚歸私宅請於外圍附近處住宿查應試武舉皆係聚處外圍之旁恐易探聽消息應於城內距外圍稍遠處住宿並請嗣後武闈鄉試亦照此例從之

大清高宗法天隆運至誠先覺體元立極敷文奮武孝慈神聖純皇帝實錄卷之九百八十八

大清高宗法天隆運至誠先覺體元立極敷文奮武孝慈神聖純皇帝實錄卷之九百八十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲都統世襲騎都尉軍功加七級隨帶加一級參領加二級軍功紀錄一次臣慶桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部工部事務總管記錄十四次臣德瑛經筵講官太子少保工部尚書紀錄六次臣曹振鏞等奉

效修

乾隆四十年乙未八月辛卯

上詣

皇太后行宮問安 自避暑山莊啟鑾幸木蘭諭兵部議覆鴻臚寺卿江蘭御史李廷欽各條陳武闈外場事宜二摺已依議行矣科場定例毋許臨場條奏如臣工果有見於考試規條未盡妥協之處即當早行入告文會試不得過上年冬月武會試不得過本年春月何必於考試臨期紛紛陳請此次姑免置議嗣後如有違例臨期陳奏者該部將其

事議覆摺內一併將該員察議具奏將此再行傳諭知之○又諭滇省辦理逃兵王天惠一案將應行立即正法之犯援照自首舊例加責發落錯謬已極然圖思德之咎止於革任註冊至審辦此案係署臬司王太岳專責乃竟妄為援引舛謬若此其罪難以輕逭王太岳人本平常且由翰林簡用道員復洊擢至藩臬從未見其實心妥辦一事在任一味模稜今於此等逃兵猶欲意存寬縱取巧沽名實屬有負任使王太岳著革任發往軍臺効力贖罪以為大員旅進旅退者戒○又諭據富德奏甘肅寧夏鎮總兵劉輝祖因穆谷地方緊要特派在彼防守因病調回軍營身故等語劉輝祖在川省軍營四載帶兵打仗尚屬出力今因病身故亦屬可憫著加恩照病故總兵王萬邦之例交該部議卹具奏○是日駐蹕中關行宮○壬辰諭著派阿思哈馳驛前往盛京查辦事務○又諭據弘昫奏

稱承德縣知縣福綱任意勒索商人銀兩等語著交弘昫喀爾崇義將福綱革職拏問在盛京刑部監禁嚴防俟阿思哈到時審訊○山東巡撫楊景素奏夏津縣民王二英商同劉戕拐賣臨清州民李亮幼女因被李亮訪知聲言欲控遂捏造匿名帖投擲誣李亮為逆應將王二英照大逆律劉戕照妄布邪言律各定擬再王二英弟三英因伊兄素行不端各自居住但係逆犯之弟律內無論已未析居俱應緣坐下三法司覈擬速奏尋奏入得旨王二英著即凌遲處死劉戕著即處斬其緣坐之王三英著從寬改為應斬監候秋後處決○以廣西按察使朱椿為雲南布政使○是日駐蹕波羅河屯行宮○癸巳上遣額駙扎蘭泰赴避暑山莊皇太后行宮問安○諭曰周元理奏永定河歲搶修等工請仍循舊例一摺因乾隆三十八年報銷疏濬搶修等工銀兩工部以所報之

數與尚書表曰修議定大工程案內較有浮多駁令刪減周元理復將歷來通融辦理緣由據實聲明籲請仍舊朕閱此案工部之駁固屬照例而周元理之請自亦實情今朕為之準酌折衷所有此案動用工程銀兩仍准其照舊報銷不必復行駁減惟是永定河歲搶修疏濬等工每年定額三萬四千兩並准節年通融辦理不逾此數雖若示以限制實聽儘數開銷未為允協夫永定河水勢靡常工程亦因而增減即如歲修一項水大之年粘補必多水小之年費用較省此理之一定者又如搶修量工之平險疏濬視淤之淺深亦難繩以一律若如向時所定籠統發銀不問工之鉅細多寡任其牽勻銷算則與庖人攬辦筵席何異殊非覈實辦工之道治河所以衛民果屬緊要工程於閭閻實有裨益經費原所不靳若永定河舊例未妥以致每年浮耗久之不但用涉虛糜且恐工無實濟

何如隨時確覈實用實銷之為愈乎除業經辦過工程事屬已往毋庸另議外嗣後應如何刪去舊額覈實辦理酌定章程之處著軍機大臣會同周元理悉心妥議具奏尋奏永定河每年歲需銀三萬四千兩定額永遠刪除嗣後每年於秋汛後先令永定河道將下年歲修疏濬各工細勘確估督臣再親勘覆覈將銀數先行奏明領項備料於次年開凍後興工照估辦理其搶修一項係臨時相度難以豫估應請先發銀一萬兩存貯永定河道庫令其酌量工程派員辦料備用倘有不敷一面具奏一面將庫項墊發至於另辦加培土工不在歲修鑲埽之列仍照舊另案奏辦從之又諭御前侍衛都統安泰向在內廷行走多年茲聞溘逝深為惻念著加恩賞銀五百兩辦理喪事送柩回京○內務府大臣議覆侍郎高模等奏稱東陵奉祀向來額設備用牛羊為數過多量請

裁減一摺據稱額設乳牛不過取乳充饌祇期數用何在多餘查原備五牛之處已足數用其多至二十者應各減十五又原備二牛之處有多至四隻者應各減半等語查取乳充饌之牛非應薦犧牲可比果能實心照料餵養得宜自敷應用從前原設牛隻未免過多與其寬餘額數致不肖劣員如義寧等之得以乘機舞弊藉端分肥誠不如覈明撙節以歸實用該侍郎等按數議減均為允協應如所請行至原額間有不敷之處應即於所減數內撥補並請飭該總管等將來遇應行更換之期遴派妥員查驗如實不堪用者方准抽換但每牛十不得過六以杜冒濫倘查驗涉虛將該司員等嚴行叅處又據稱備用黑牛及羊隻亦應酌減等語查奉祀牛羊係陸續供用原可隨時添補即稍需豫備亦毋庸過多以致滋弊亦應如該侍郎等所請將備用黑牛五十五隻內酌留二十五隻羊一

百三十三隻內酌留六十七隻餘俱裁撤以省浮多再此項額設牛羊數目

東陵現經酌減

泰陵應一體覈辦臣等交查該處據覆稱乾隆三十四年曾經德保奏明酌減查與臣等所定數目多寡未符請照現議章程應增應裁之處畫一辦理從之調福建按察使廣德為廣西按察使以福建汀漳龍道蔣允焄為福建按察使以署鑲紅旗漢軍都統弘旿為正紅旗漢軍都統是日駐蹕張三營行宮甲午諭軍機大臣曰阿桂等奏連夜分攻各碉寨沿河接擊木柵已與勒烏圍東西平對如此兩面合圍賊衆斷難支禦諒可立時攻克乃賊人猶復悉衆死守固屬護巢力拒亦由其罪孽深重必待盡殲而後已至既得勒烏圍則轉經樓之賊自難存住即甲爾日礮橋亦當自潰其科布曲賊寨據脫出番人供稱莎羅奔弟兄三人現俱在彼自即應

乘勝攻克。悉行擒獲。從此進攻更不慮後路有賊滋擾。至於索諾木現住甲雅阿桂進攻時。自當分兵兩路。一由雅中喇嘛寺攻打噶喇依。擣其巢穴。一派兵徑赴甲雅官寨。擒其逆酋。方為妥協。○吏部覆奏御史戴翼子奏稱五城自縊命案。承緝兇犯。請照定例。勒限開查。查例載命盜兇犯在逃。承緝官按限處分。係指因傷斃命。實有兇犯。例應緝獲抵償者而言。至帶傷自盡等案。如自行跌蹠等傷。本無可緝之犯。即驗有鬪毆傷痕。而傷非致命。死由自盡。緝獲時罪止杖笞。並不擬抵。是以例內並不予以限緝。該御史奏請自縊命案。勒限開查。是將帶傷自盡之案。誤作因傷斃命。應無庸議。從之。○是日駐蹕阿貴圖大營。○乙未

上遣侍衛春寧赴避暑山莊

皇太后行宮問安。○行圍。○諭昨據御史戈源叅奏六月分鄖陽府知府奉旨開缺。已在二

十日截缺之後。應歸七月銓選。乃吏部先於十七日開缺。輒將本部司官儲秘書選補。弊混顯然。一摺。果如戈源所言。似吏部竟有徇私廢公之處。不可不徹底查辦。因批交英廉閣循琦金簡等查奏。今據覆奏。吏部向來辦理開缺案件。如僅止降革。交部議奏者。於議覆具題奉旨之日。始行開缺。如革職之外。尚有餘罪者。不俟具題。即行開缺。並查自乾隆二十二年至今。辦過成案十餘件。查開具奏

至儲秘書銓選之處。係按記名俸次。比較揆用。是吏部於此案開缺。推補並無違例。戈源所奏未免有意吹求。前日御史戴翼子曾奏五城自盡命案。不應輕改成例。及傳旨詢問吏部。則於定例並無更張。半月之間。而言官兩劾吏部。皆無確據。甚屬無謂。御史風聞言事。內外大臣。如有婪賄不法。舞弊營私情節。言官等即能據實指叅。朕方為之嘉許。而於被劾之人。必審明從重治罪。即如方世儒良

卿錢度輩贓私纍纍並非有御史叅出而一經敗露俱嚴訊立正典刑此等貪贖敗檢之員從不稍為寬貸亦諸臣所共知者然此數案皆非科道糾劾乃惟指摘部中一二案件不問是非虛實率行入告以見其風力誰不能之且此案開缺之事特派別部大臣查覈斷不至稍有瞻徇而所查悉已得其底裏御史凡有聞見如肯留心體察真偽無難立辨顧可捕風捉影而以無據游談妄為誣讎乎

御史叅劾部院堂官如其言果確朕必不肯於大臣少存庇護若語涉無稽得撫失實欲以此自命敢言深所不取明季科道往往與部臣牴牾遇事生風攻訐不已久之遂成門戶朕披閱史冊每深惡而痛嫉之方今政治肅清不願言官蹈此惡習著將此傳諭各科道如再有似此劾叅各部事件查無實據者即將言事之人交部議處是日駐蹕海拉蘇臺大營丙申

上行圍是日駐蹕呼魯蘇臺大營丁酉上行圍諭曰明亮一路正當用人押送喇嘛達固拉僧格之副都統噶塔布侯到京二三日仍著由驛馳赴明亮軍營吏部等部議覆陝甘總督勒爾謹奏稱甘肅省黃河浮橋向歸皋蘭縣經理該縣政繁難以兼顧請添設主簿一員管理河橋平番縣地方遼濶河渠二十餘處請添設主簿一員專司水利肅州嘉峪關距州城七十里該州鞭長莫及請添設巡檢一員來往稽查又肅州州判專管九家窰屯田該屯戶視為官田不盡心耕種以致收糧短絀莫若改為民田令其自行經理計畝陞科其州判一缺裁所有該員廉俸即分給添設之皋蘭平番二縣主簿又哈密廳屬之酤水堡向設有巡檢該處民居甚少無藉專員彈壓請將酤水巡檢缺裁移駐嘉峪關為肅州屬該員廉俸照數改撥應如所奏從之賑卹甘肅皋蘭河州狄道渭源金

縣靖遠循化廳紅水縣丞沙泥州判安定固
原鹽茶廳張掖撫彝廳山丹東樂縣丞武威
平番古浪永昌鎮番莊浪靈州中衛西寧碾
伯大通巴燕戎格廳肅州高臺安西等三十
一廳州縣本年旱災雹災飢民并予緩徵
鑄給甘肅布政使按察使布政司照磨按察
司照磨按察司司獄寧夏府水利同知各印
信關防刑舊印內陝西二字冠以甘肅從布
政使王亶望請也鑄給烏魯木齊管理厄魯

特部落領隊大臣印記從都統索諾木策凌
請也○是日駐蹕納爾蘇台達巴漢西大營
翼日如之○戊戌

世宗憲皇帝忌辰遣官祭

泰陵○諭曰

皇貴妃金棺應於今冬送至勝水峪入寶城
慶貴妃豫妃金棺亦應同時送至勝水峪妃
衙門著該衙門於十月內擇日照例舉行○
諭軍機大臣等據畢沅奏寶陝局鼓鑄應採

辦第十運滇銅共估需銀五萬三千餘兩派
委典史李尚志赴滇領運等語所辦未妥採
運滇銅事關鼓鑄且動用腳價至五萬三千
餘兩為數甚多豈可僅委典史微員專司其
事此等微末之員管辦多金難保其不垂涎
染指或竟於途中侵盜浪費花銷皆所不免
迨事後發覺即將該員正法嚴追已屬無補
畢沅何計不及此著傳諭畢沅即再派一同
知知縣之類前往共辦嗣後凡採辦滇銅必

須選派明幹知縣或能事之同知通判前往
並須擇其身家殷實者充當此差方為妥協
雜職中即有勤慎明白堪任差委者亦只可
令派出之丞倅知縣帶往以供奔走查催之
役斷不可專派簿尉微員領辦致滋貽誤設
差委非人沿途或有侵蝕虧缺等事惟派委
之該督撫藩司是問仍將此諭令辦銅各督
撫一體遵辦並諭戶工二部堂官知悉○定
邊右副將軍廣州將軍明亮奏琅谷之上為

斯底葉安再上為甲索層層高砌與納木迪相為犄角臣等本擬從甲索下攻實為正辦因前此和隆武所帶官兵半途雨雪阻滯又賊人防守甚嚴是以中止今斯底葉安納木迪既難力取若不將扎烏古山梁攻克截出其前無以肅清後路俟甲索賊人稍退即當進兵諭軍機大臣曰明亮奏和隆武一路之兵既屬正辦即應令其相機直進因何忽而中止行軍固當慎重而過慎則愆今阿桂統領官兵已直壓勒烏圍計日可馳捷報而明亮至今未能下至河沿豈甘心讓西路獨成大功而北路竟不思稍展寸長乎至阿桂處攻勒勒烏圍前以其久攻未下諭令派兵渡河前往勒烏圍對面遙為犄角昨阿桂已從福康安等駐兵之所接拏木柵直與第四礮官兵遙對業將勒烏圍四面圍攻此時正需多兵會勦自無庸復分兵渡河但既得勒烏圍以後阿桂仍即須派兵過河幫同明亮將

扎烏古山梁及納木迪斯底葉安一帶賊卡悉行掃蕩引令明亮至河沿會同進勦則後路更覺肅清尤可安心直進兵部奏吏部則例終養服滿人員坐補原缺其服滿引見奉旨不必坐補原缺者歸於單月五缺後選用一人而兵部則例副將終養赴補者遇有部推副將缺出即擬補具題叅遊都守等官終養赴補者無論雙單月遇缺即補是同一終養文職與武職辦理懸殊請嗣後武職終養候補照吏部例畫一辦理從之己亥上遣侍衛春寧赴避暑山莊皇太后行宮問安行圍諭據定西將軍阿桂等馳奏紅旗報捷於八月十六日已攻得勒烏圍賊巢此實仰賴上天眷佑成功迅速而將軍叅贊實心宣力調度得宜將領弁兵各奮勇集事均屬可嘉所有將軍阿桂副將軍豐昇額叅贊大臣海蘭察額森特及在事將弁等著交部從優議叙

其出力之滿漢官兵屯土兵練俱各賞給一月錢糧以示獎勵。又諭曰將軍阿桂等奏報攻克勒烏圍賊巢紅旗於八月十六日自軍營馳發今於八月二十四日丑時遞至木蘭行在計沿途僅行七日實為迅速所有辦理臺站驛遞文武官員均屬可嘉著該部查明同兵部捷報章京一併議叙各站差弁兵夫並著該部查明照例議賞其馳送紅旗到行在之各站員等同捷報章京等著行在兵部查明先行賞給緞匹兵部員外郎額爾克圖自辦理軍務以來承辦捷報頗屬勤勉現係該員齎遞紅旗著賞戴花翎並交該部遇有郎中缺出即行陞補。又諭前明亮奏據永平李本報解盤獲金川差往西藏之喇嘛達固拉僧格及霍爾章谷番人雅滿三珠布那瑪太等訊供具奏彼時以永平等在吉地丹東一帶防守尚能留心盤獲賊番奸細是以降旨賞給緞匹示獎今據解到喇嘛達固

拉僧格及番人雅滿三珠布等到行在令軍機大臣審訊據雅滿三珠布供土婦扎什納木私囑我到丹東一帶卡子遇有官兵即行告知將喇嘛擒拏勿令其得至西藏是以我到丹東二道橋看見守卡官兵我先去告知來歷官兵就將達固拉僧格拏住復詰問喇嘛達固拉僧格據供我到丹東二道橋時卡子上官兵已經睡熟雅滿三珠布說此處有我認識之人我去要了路票好往前去及他一見官兵即同衆人將我拏住等語彼時若非雅滿三珠布向官兵告知則該喇嘛等業已偷越潛赴西藏所謂巡防要隘者竟屬何事達固拉僧格與雅滿三珠布等分起解送無從串供且喇嘛方恨其將伊獻出豈肯轉為附會所供自屬實情雅滿三珠布高屬効順有功即扎什納木亦當從輕宥幸而問明此情節若照永平李本等所報將雅滿三珠布即行正法豈不枉屈是永平等不但無盤

獲勞績且幾因官兵睡熟誤事乃轉為捏飾冒功不可不加懲創永平李本俱著交部嚴加議處明亮既經提訊仍未研審實情輒據虛詞入告亦屬非是明亮並著傳旨申飭朕於諸臣功過務期平允況在行軍之際賞罰尤宜嚴明如永平等初則因其盤獲奸番量予賞賚今既訊得確情亦必加以譴責悉視其人之自取不肯稍涉顛預○諭軍機大臣等官兵攻克勒烏圍已降旨將將軍等從優議叙並遣阿彌達齎紅寶石帽頂至軍營賞給阿桂以示優眷俾益奮迅集勲此次攻取勒烏圍官軍聲勢益盛扎烏古山梁等處僅一河之隔賊人隔岸望見其勢自難復支理應不攻而潰計明亮聞阿桂捷音自應統兵直進迅掃賊人寨落以期兩軍會合何以未見明亮奏到或其所發之摺不及阿桂捷報八百里馳遞之速著諭詢明亮將近日勦賊情形若何迅速具奏○是日駐蹕都穆達烏

拉岱大營 庚子

上行圍 遣官祭賢良祠 大學士舒赫德奏請於九月初旬起程前赴行在得旨准其前來 是日駐蹕巴顏布爾噶蘇台大營 辛丑

上行圍 諭現在有旨准舒赫德前來熱河著英廉留京辦事 諭軍機大臣等據伊齡阿奏鹽運情形摺內稱五六月間雨澤稀少迄今又將兩月仍多晴明間有雨澤未能普遍霑足又稱七八月海潮大汛並無風雨通泰海三屬蕩地草薪長發惟望日內再得甘霖大沛鹽運可以暢達等語看來淮北一帶夏秋雨水較稀通泰海三屬鹽場似露旱象其毗連竈地各州屬情形想亦大畧相同何以高晉薩載並未見其奏及著詢問該督等所有通泰海三州所屬八月間是否續得透雨於大田收成有無妨礙即速查明據實覆奏毋得稍存迴護尋高晉奏兩江地方八月後

已成旱象。惟低田仍屬有收。現委員確勘督辦。得旨知道了。其成災處賑卹事宜。妥為之。薩載奏江蘇自交七月後。蘇州松江太倉徐州等屬。俱先後得雨。其餘各屬。未能普霑。至八月初旬。雖經得雨。而氣候已遲。不免旱象。現飭藩司親往確勘。至通泰海三屬鹽場。被旱竈地。與州屬民田。情形大概相同。得旨。知道了。其有成災者。實力妥行撫卹。軍機大臣等議。覆闡展辦事。大臣伯忠奏。稱闡展向設有章京二員。至筆帖式。但有委署。未設額缺。查現在事務。章京一員。足資經理。惟繙譯查案等事。必須筆帖式協辦。請於章京二員內。裁一員。委署筆帖式。內裁二員。增設正八品筆帖式二員。即在委署筆帖式內。揀選奏補。三年期滿。如能勤職。送部引見。以本旗部院筆帖式用。其願就武職者。發回以驍騎校用等語。臣等酌議。闡展事務。較簡。筆帖式不必增設二員。應於章京二員內。裁一員。委署

筆帖式。內裁一員。增設正八品筆帖式一員。餘如所奏從之。兵部議。覆陝西巡撫畢沅奏。稱武生入伍食糧。向未定以年歲。恐致冒濫。請嗣後武生年逾三十者。不准入伍食糧。即年未逾三十。亦必督撫提鎮親驗。方准其兼充入伍。後如果勤慎。差操與營兵一體較拔。否則開除名糧。咨回交學管束等語。查入伍定以三十歲。則三十以上。豈無有用之才。自未便拘以年限。餘俱應如所奏。從之。兩廣總督李侍堯廣東巡撫德保奏。覆廣東布政使姚成烈奏。稱請停止州縣領碾府廳倉穀一摺。令臣等酌議。據稱常平府倉向係知府專管。自酌撥附近州縣碾放兵米。已常年存於別邑。嗣復改歸首邑經理。借糶買補事宜。悉與縣倉無異。是雖存府倉之名。實即縣倉之穀。乃頻年領解運費虛糜。請即歸入分撥各州縣及各首縣額內。經營不必再多領解之煩。至廣糧通判經營省倉穀石。向分撥

南番等八縣領碾穀一萬一千四百石。亦請照撥定數目。歸各縣存貯。分管所有各屬領碾府廳倉穀。及開銷運腳之處。概停應如所奏從之。是日駐蹕巴顏溝大營。壬寅。

上行圍。諭軍機大臣曰。阿桂等奏防守吉地一帶截拏逆酋事。宜據稱舒常已先令帶兵百餘前往佈置。至額森特所得之傷。雖已漸愈。尚不能馬上遠行。且於土境情形及調度駕馭之處。又遜舒常遠甚。似可毋庸令其前往。因復再四熟籌。富德昔在西陲。於追賊事宜。較舒常多為閱歷。若令舒常前往。絨布換富德至吉地。自尤可恃等語。所計甚是。前以明亮奏尚需舒常幫辦。因諭舒常將吉地一帶部署妥協。令桂林前往代其防守。舒常仍回北路。今阿桂已攻得勒烏圍。乘勝前進。明亮自可將後路之賊搜剿肅清。即與阿桂會兵進剿。彼處可同商辦之人甚多。舒常無庸復往北路。著傳諭舒常即速馳赴絨布代富

德駐守富德接奉此旨。俟舒常一到。即帶兵馳赴吉地妥協辦理。其吉地現在情形。將達卡移近並在正地派兵攻打。使賊酋畏懼不敢竄逸之處。令舒常一併告知富德。令其實心籌辦。是日駐蹕鄂勒楚克哈達大營。翼日如之。癸卯。

上行圍。諭曰。羅布藏錫喇布行走有年。頗屬勤慎。著授為貝子。諭軍機大臣等。現在阿桂督兵進剿噶喇依。掃穴犁巢。固屬要事。而於擒捕逆酋賊黨。尤為先務。據各路脫出番人供詞。賊中慌亂情狀。大概可知。今官兵既得勒烏圍。番衆自更魂飛膽喪。或莎羅奔弟兄將索諾木縛獻。亦未可定。否則擄取賊巢時。務須設法截擒逆酋。及其弟兄賊目。并助惡喇嘛。勿使漏網。亦勿令自戕。若擒得索諾木一面。飛遞紅旗一面。將各要犯檻車拘繫。選派健銳營兵。令福康安帶領。嚴加管押。沿途仍多撥弁兵護送。先行解京獻俘。以彰鉅

典至善後事宜。亦應豫為籌及。一俟官兵掃平金川。即應於兩金川之地。酌安綠營設官駐守。如噶喇依勒烏圍。美諾三處。擇其最要者。設立總兵。次則令副將駐之。其餘自章谷至巴朗拉一帶。酌量形勢輕重。分設叅遊都守駐之。令官兵營制聯絡。橫隔於衆土司之中。方可謂之一勞永逸。至駐兵必先籌糧餉。現在運往各路軍糧頗多。大兵凱旋時。各處自多有餘存。米石應量其道里相近處所。陸續運赴各營。建倉存貯備用。但現在所有餘糧。止可為初立營制之需。將來經久恒規。自當以屯田為妥。兩金川地面。可耕之土甚多。而綠營兵衆屯種。又其所習。今新疆各處耕屯。俱已收實效。阿桂向為伊犁將軍。屯政乃所深悉。將來金川營務。自當酌仿而行。至成都滿兵。必須移駐打箭鑪。該處控制諸番。遠撫西藏。實為扼要之地。並須添設將軍鎮守。聲勢方為尊重。所有移駐滿兵。或即仍將成

都現數。或須添撥若干。並著阿桂妥計行之。其所需糧餉。由內地運往。諒亦不甚費力。或兼用新營屯種有餘之米。亦令阿桂一併籌辦。又打箭鑪移駐滿營。添設將軍一應廨宇兵房倉庫。均須建蓋。或現在城內可以安營。或須另築新城。並著阿桂與文綬咨商。悉心籌畫。務在工程堅固。規模宏整。方足以壯觀瞻。不可存惜費之見。其金川新設綠營。或即住彼官寨散碕。則所省實多。亦一體辦理。至於各土司。經此番輯靖之後。務須使之懷德懾威。上下維繫。所有各土司。應令將軍總督一體管轄。在內則屬之理藩院。方為妥協。以上應辦事宜。並著阿桂於稍暇時。札致文綬商同詳定章程具奏。至阿桂於掃穴擒渠之後。即應振旅還朝。以待酬庸策勲。舉行郊勞凱宴諸大典。其應先帶京兵若干。及副將軍叅贊領隊諸人。作何分起行走之處。均須豫為酌定。並須酌帶土司數人來朝。令其瞻仰。

天朝禮法承受恩典將來即照新疆年班之例輪流入覲除已旺梭磨現係土婦不便輪班外此次著先帶緯斯甲布土司雍中旺爾結布拉克底土司阿多沃克什土司雅滿泰隨同來京事畢再令回巢伊等共相傳播久之必以入覲受恩為榮亦如準部之永承恩澤矣 甲辰秋分夕

月於西郊遣貝子慶恒恭代行禮○

上行圍 戶部等部奏雲貴辦運銅鉛需員實

多兩省額設州縣不敷差委查現行川運例捐納知縣不准分發然當此需人之際當稍為變通請將捐納知縣准其加捐分發雲貴二省委運銅鉛如運完無誤遇有該省應歸月選知縣無論何項出缺俱准題補不必拘定年限並免其試署至試俸仍照舊例從之 兵部議覆署湖廣總督湖北巡撫陳輝祖奏稱荊州水師係守備專營每年僅止宜昌總兵巡察一次就近並無營將管轄易致生

疎至管理巡查岳州水師守備之該營叅將及長沙協副將俱非水師人員於教練無益請嗣後水面操演將荊州守備營責令宜昌前營遊擊岳州守備營責令洞庭協副將隨時親往閱驗其歲底巡察荊州水師仍令宜昌總兵查閱岳州水師改歸洞庭副將辦理將長沙副將閱驗舊例停止應如所奏從之 豁除浙江仁和永嘉三縣乾隆三十九年分捐置義塚建造衙署及坍荒地三項有

奇額賦 是日駐蹕扎克丹鄂佛囉大營○

乙巳

上行圍 諭曰薩載奏海門廳遣發賊犯陸寶於泰州城外脫逃旋經拏獲審明正法自應如此辦理乃摺內叙案稱陸寶逃至素識之黃聰家因乏錢使用獨自行竊事主沈玉誠家衣物寄存黃聰家內並稱逃後亦無知情窩留情事等語殊屬非是陸寶係積匪猾賊應發新疆改發內地之犯業經審明定罪自

必先行刺字。黃聰係其素識，豈不知該犯問罪脫逃情由？且陸寶既住其家，又行竊寄存贓物，此非窩留而何？豈可復為之解說開脫？各省辦理案件，往往不肯認真復意，在矜原曲示寬縱，最為可鄙。奸民因向來不加窮究，遂爾漫無畏忌，敢將逃犯隱藏，致陷成大辟者，不一而足。未必非外省問刑衙門之姑息，因循有以釀之也。龍承祖係刑部幹練司員，朕特擢用為江蘇按察使，伊於獄獄關鍵，何所不知？豈宜羈率若此？龍承祖著交部嚴加議處。薩載任封疆有年，辦理案牘理宜詳慎，詎當如此漫不經心？薩載著交部議處，並將此通諭知之。又諭據旺保祿王進泰奏，拏獲逃兵匡中考一名，請示將軍阿桂。今奉批示，即將匡中考在美諾正法等語，太不曉事。逃兵一經拏獲，即就所獲地方正法定例已久。旺保祿等豈尚不知各省巡撫並無統兵之責？然遇有此等逃兵，尚且恭請王命，即行

正法。今旺保祿王進泰身係提督大員，現在軍營帶兵駐守，獲有逃兵，即應以軍法從事。再一面具奏，一面報知將軍方為正理。若如旺保祿等辦法，設或遇賊打仗時，弁兵內或有畏怯不前者，亦俟請示將軍然後以軍法示衆，紀律尚安在乎？旺保祿王進泰任提鎮有年，不應舛謬若此。均著交部嚴加議處。又諭曰：侍郎袁守侗、阿揚阿著馳驛前往貴州，有查辦事件，所有隨帶司員亦著一併馳驛。袁守侗既已出差，其兼管順天府尹事務著胡季堂暫行管理。諭軍機大臣曰：舒赫德等奏接到貴州鎮遠府知府蘇塙呈遞公文一角，係因叅革台拱同知席纘達例折收杖斃人命一案，揭總督藩臬勾通一氣，護撫權莫已操等語，殊屬駭異。如所揭情節果實，則是黔省上下通同袒庇劣員，營私舞弊，吏治實不可問，必當徹底訊明，從重嚴究。若係蘇塙挾嫌妄揭污蔑上司，其風亦不可長。自

當訊得實情嚴加治罪此事甚有關係不可不詳細研鞫使之水落石出案無遁情著傳諭袁守伺阿揚阿接奉此旨不必來行在請訓即速馳驛前往秉公確審務得實情如有應行革訊之員即一面具摺奏聞一面將該員革職提審毋稍瞻徇將此一併傳諭知之所有舒赫德等奏摺及蘇橋稟揭鈔錄存覈外即將原本發交該侍郎等閱看又諭曰熊學鵬奏審訊安南逃回廠犯供情已竣一摺據稱覈其情節較重者六十四人分起委員解赴東省其餘情輕各犯札商督臣押解原籍管束等語此等自外國逃回廠徒自不便仍留本地再令滋事是以屢經傳諭該督撫就各犯情節輕重分別酌留本籍及令隔省安插並分發伊犁烏魯木齊等處令其種地自贍並因人數多至二千餘名諭令李侍堯親赴粵西查明分別妥辦該督撫等接奉節次諭旨自必遵照辦理但人犯過多遞解

非易今熊學鵬既稱由南寧歸途至梧州暫住等候督臣回札等語李侍堯熊學鵬若於境上會商妥辦商定後即可各回本處以省跋涉之勞自更妥便想李侍堯必能籌酌及此也又據稱張德裕李喬光古宇湯三犯經該夷弁誘獲解赴安南國王駐劄之處未識曾否將各犯送交內地如尚未解到應令李侍堯行文該國王催令即速解送該督處審訊從重辦理又據稱張德裕擁貲甚厚李喬光貲本力量不及張德裕等語此案各犯多係廣東嘉應州人其張德裕李喬光諒亦係該州人戶著李侍堯即派妥員往查如張德裕等曾將財物寄回本籍家貲豐厚此等越境謀利之徒其財產自應查明照例入官若其貲本雖多俱留安南營運即無庸行文該國向其查取將此旨由五百里一併諭令知之又諭前因明亮一路隔滯不進曾諭阿桂或派海蘭察豐昇額帶兵千餘過河幫同

明亮將納木迪至扎烏古一帶全行攻克。合力進剿勒烏圍。今勒烏圍既經攻克。無須河西協助。但阿桂現在乘勝進兵扎烏古一帶。皆在其後。恐扎烏古之賊讓阿桂前進。復渡河占據勒烏圍。邀我後路。所關不小。即或賊人計不出此。而扎烏古一帶與甲雜擒捕渠魁。及欲進剿噶喇依。擣其巢穴。均須將河西賊寨盡行洗蕩。使後路肅清。方為萬妥。著傳諭阿桂。即速抽撥勝兵千餘。於海蘭察豐昇額內酌分一人。帶領過河。幫同明亮將納木迪及扎烏古之賊。即速剿洗淨盡。再行統兵進剿。又諭昨已諭令阿桂凱旋時。帶綽斯甲布布拉克底。沃克什。三土司同來。令各瞻仰受恩。此乃朕優施恭順各番。使其共知德意。惟是該土司等從未進京。恐其見將軍等挈此數人入朝。慮有他意。心生疑畏。因思明正土司於內地禮儀最為相習。向為各土司總領。而瓦寺土司亦於內地為近。伊等若聞

准其來京觀謁。必皆欣然。樂從莫若。令明正瓦寺同綽斯甲布等共五土司俱隨阿桂來京。綽斯甲布等見有明正瓦寺土司同來自必心安。意得即應對儀節亦可視明正等為效法。而其衣裳總不必更換。仍從其便。於事更覺有益。以署鑲紅旗蒙古副都統託雲為鑲紅旗滿洲副都統。署正白旗蒙古副都統舒泰為正藍旗漢軍副都統。是日駐蹕薩勒巴爾哈達大營。是月直隸總督周元理覆奏本年直隸被災州縣雖較多於上年。而水災實輕於旱災。約計賑卹所需與上年不甚相懸。得旨賑卹之事不可計及費用多少。若惜費之念重。則失之遠矣。閩浙總督鍾音奏臺灣府屬每年撥運內地兵眷米穀。向令商船輪流搭運。按次給單。四次後優免一次。其文武員弁渡海坐船亦分別減免。查該船戶以得免單恒有影射脫漏等弊。請嗣後無論商船差船均按次配運。從前免差名

色革除得旨好如所議行○護湖南巡撫布政使覺羅敦福奏湘鄉安化二縣開採硫磺存積充裕請將該二縣磺磺封禁下部知之○山東巡撫楊景素奏東省未修城工內有間閭急公情願捐修者應聽民便但此項工程俱係紳士等自行經理與官修報銷者不同請照民修水利例一體免其報銷得旨如所議行○陝甘總督勒爾謹奏巴里坤牧馬原分東西兩廠嗣因滿兵移駐巴里坤將東廠馬撥歸西廠查西廠在木壘奇台一帶今該地陸續墾種水草不敷請將東廠馬移至東北山大小紅旗溝牧放報聞○湖廣總督署四川總督文綬奏北路解到番犯應行監禁但聚集一處尚恐滋事查省城司府及成華二縣共有四監應分為數處羈禁以便防範得旨嘉獎○又奏從前軍需奏銷係先將實銷各數題報完竣後始將駁減銀數覈追但為時既久經手之員一遇陞遷事故移查

咨追未免拖延請就案比較如有覈減按款飭追得旨早應如此辦理何待今日○兩廣總督李侍堯覆奏八月二十一日接奉諭旨令臣親赴粵西即於二十二日起程前往至應議安南互市一事業准撫臣札商臣因事關久遠章程未便率爾定議容俟委勘明確會商具奏得旨嘉獎○定西將軍尚書阿桂定邊右副將軍尚書公豐昇額奏贊大臣內大臣都統海蘭察副都統額森特奏勒烏圍為賊人巢穴臣等分兵進攻至甲爾日礮橋用礮轟摧並選楚兵內善於泅水者令其潛由水底繫巨索於橋柱拽倒以斷其要路至八月十六日遂攻克勒烏圍賊巢及轉經樓喇嘛寺并攻獲碉房寨落木城石卡六十餘座殺賊數百人奪獲鎗礮刀矛無算得旨此皆由上天垂佑爾等同心宣力方能成此大勲嘉悅之外幾欲垂淚更當合力前進速成大功以

俟厚獎

大清高宗法天隆運至誠先覺體元立極敷文
奮武孝慈神聖純皇帝實錄卷之九百八十九

清 實 錄 乾隆四十年九月上

大清高宗法天隆運至誠先覺體元立極敷文
奮武孝慈神聖純皇帝實錄卷之九百九十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履程

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未九月丙午朔

上行圍。諭軍機大臣曰。貴州知府蘇壻揭參
督撫藩臬各上司。通同欺蔽一事。昨據舒赫
德等奏到。初閱其揭內情節。殊堪駭異。如果
屬實。則是黔省上下一氣。袒庇劣員。營私舞
弊。吏治實不可問。已派袁守侗。阿揚阿。前往
秉公查審。今日都察院兵科。又據揭轉奏。復
細閱其原揭。據稱藩司因會審之貴陽府宋
昱丁憂。又惡遵義府于方柱素性認真。一併
徹回。改委席纘。世交素好之貴東道佛德等

承審後復云總督必要將席丞開復佛德以
案情不實不肯依辦互相爭論等語頗覺自
相矛盾既云佛德與席纘世交改委專辦自
當為之照應何以又有不肯依辦之事即此
一節而論其情詞閃爍已可概見且佛德旗
人與席纘又有何世好交誼乎或者蘇橋探
知有將伊糾劾之信故為此先發制人之計
亦未可定袁守侗等務須詳細研鞫使其事
水落石出斷不可稍存偏袒瞻顧之見將此

遇便傳諭知之○是日駐蹕安巴完和羅昂
阿大營、丁未

上行圍 兵部奏難廕人員向歸營衛應用班
內選用並無發標學習之例恐未諳練查滿
員難廕外用綠營人員令在京營學習三年
期滿分別錄用漢員難廕事同一律請將難
廕都司守備於引見後發回本省隨營學習
三年如堪造就送部引見分別補用守備無
庸分別營衛至衛千總乃督理漕運之員非

初任者所宜無庸議以衛缺所有難廕千總
把總亦俱發營學習期滿在外拔補毋庸送
部如營伍未諳者展限學習其實在庸劣者
奏請休致從之○又議覆兩廣總督李侍堯
奏稱塘兵專司遞報向由提塘募充遠駐各
省稽察難周現責成所在州縣嚴加甄別遇
有更換缺出即由地方官選充與提塘一體
稽察應如所請并通行各省一體遵辦從之
是日駐蹕烏蘭哈達大營○戊申

上遣侍衛春寧赴避暑山莊

皇太后行宮問安○行圍○諭軍機大臣等據
三寶奏拏獲隣省盜匪王南山等各犯審擬
一摺已批交行在軍機大臣會同三法司覈
擬速奏矣至摺內敘述案情稱胡雲瓏年長
居首餘依齒序寫立名單即於神前結拜將
單燒化尚無焚表盟誓情事等語殊屬非是
該犯既將名單燒化非焚表而何且該撫於
按律問擬處原稱設誓焚單即與盟誓焚表

無異於罪尚無輕縱而摺內乃稱其尚無焚表盟誓之語豈不自相矛盾乎外省辦理審案往往於萬無可寬解之處必曲為之解說意存開脫此皆奸胥劣幕徂於相沿惡習希圖存此一線可原以圖積陰德所見最為可鄙三寶委任封疆有年審辦案牘理宜詳慎何任其率行敘述漫不經心若此三寶著傳旨申飭以內閣學士董誥署工部右侍郎是日駐蹕坡賚昂阿大營已酉

上行圍諭曰布政使郝碩自赴西路督辦糧儲實心催趲經理從無貽誤按察使銜建昌道白瀛承辦軍需歷經四載自收復小金川及進攻金川一切不辭勞瘁均屬奮勉出力郝碩白瀛著加恩各賞戴花翎再劉秉恬前此獲罪原係總督任內之事伊自革職後駐劄嶺南總理糧運兩載以來尚能留心經理妥協盡力並著加恩賞給兵部郎中仍賞戴花翎劉秉恬務宜益加奮勉以副朕格外加

恩至意諭軍機大臣曰阿桂等奏通籌直擣噶喇依賊巢一摺該處進兵路徑阿桂躡探已久自係成竹在胸實有把握方如此籌辦且自十七晚官兵已陸續起程至昆色爾而海蘭察同各領隊現俱奮迅進攻可望得手自應聽其照所擬妥速勦辦阿桂現既併力直擣賊巢自不能復有多兵派幫明亮且阿桂如即能攻得噶喇依則其餘各處碉卡賊衆斷難再拒必皆自行潰解况阿桂節次

所籌俱有成效今大功已屆垂成更惟阿桂是恃一切悉聽其調度第阿桂等統兵進攻以後恐扎烏古等處賊人潛至勒烏圍撓我兵後路其事甚有關係阿桂現派額森特在轉經樓前科布曲山腿之下駐劄攻打以牽賊勢額森特雖尚未能上馬遠涉而防守是其所長著阿桂即劄知該叅贊令其在勒烏圍一帶小心看守勿使隔岸之賊得乘隙過河滋擾或至稍有疎虞是日駐蹕塔哩雅

圖昂阿西大營。庚戌。賜扈從蒙古王公台吉兵丁及沙喇扣肯等食。並銀緞有差。諭軍機大臣等。昨阿桂奏因勒烏圍已得。整兵直取噶喇依賊巢。為擣其心腹之計。所籌甚是。果能將賊人巢穴攻破。其餘碉柵必皆不攻而潰。即逆酋賊黨亦更無由竄遁。自屬正辦。況索諾木之姑阿青。現在噶喇依居住。阿青即係與丹巴沃咱爾等倡謀抗拒之人。尤為首惡重犯。而索諾木母妻亦俱在彼。一經攻克。噶喇依務即將各犯搜擒捕獲。獻俘誅磔。毋使漏網。阿桂現既籌辦及此。以期迅速。藏功自不得不注以全力。勢難復分兵幫助。明亮設或撥兵渡河。先助明亮攻打扎烏古阿爾古一帶。俟攻克後。再回東岸。圖取噶喇依。往返耽延。未免多需時日。萬一賊酋得豫為之備。轉於公事無益。是阿桂之不分兵幫助。明亮理勢宜然。亦無足怪。第恐明亮見阿桂攻得噶喇依。自忖未能寸進。及向阿桂求

助。又不肯應允添兵。未免有礙顏面。而奎林和隆武亦各懷勇往好勝之心。設或因愧忿所激。毅然不顧輕率一往於事。甚有關係。雖云不入虎穴焉得虎子。但亦須審度機要。權其利害而行。切不可冒昧攻撲。非但將軍領隊等各宜自慎。即旗營屯土各兵亦不可令其輕冒鎗石。今大功已逮垂成。一切倍宜保重。若明亮等不論利害。促令弁兵輕率撲碉。或至稍有閃挫。明亮等轉不得辭咎。惟當斟酌妥為之。又昨阿桂奏。明亮於伊等進攻達思里之次日。亦即進剿。明亮此時自己相機攻剿。或竟得其碉柵。亦未可定。設或尚未能進。惟期留心體察相機。而前或賊人力不能抗。棄碉遁逸。明亮等一面搶占一面領兵往甲雅圍打。若能擒獲索諾木及有名賊目。即其大功。但須試探明確而行。不可轉為賊人詭狡所惑。再阿桂一路軍聲甚壯。賊人自不敢攖鋒。恐其見明亮處兵力稍單。或從扎烏

古及納木迪等處偷出或從甲索一帶潛來皆足撓明亮軍營後路所係非小明亮等務須實力嚴防不可稍墮賊人詭計勉之慎之

兵部等部議覆陝甘總督勒爾謹奏稱巴里坤滿兵移駐古城所遺官員衙署並磨房共三十五所請將八所分給八旗照舊作為磨房餘二十七所分給新增佐領雲騎尉委署筆帖式等各衙署及各項公所義學馬圈其官兵所遺房一千八百九十六間內除臨街兵房一百十六間招商取租作各兵紅白賞項並現在馬兵八百四十八名每名增給房一間新增步兵養育兵八十四名每名給房二間餘房七百六十四間分給八旗佐領招商取租亦歸各兵紅白賞卹項下造報應如所奏從之○調正白旗滿洲副都統莽古賚為盛京副都統○蠲免湖北孝感鍾祥京山荊門安陸雲夢應城隨州應山襄陽宜城棗陽等十二州縣並武昌武左荊州荊左荆

右襄陽德安等七衛乾隆三十九年旱災額賦以故四川松茂道屬黨壩長官司索諾木弟策旺丹怎四川建昌道屬阿得橋土百戶羊祖子業咱雲南騰越州屬戶撒長官司賴君愛子邦傑休致貴州思南府屬朗溪司正長官司土官田大爵子宗啓各襲職○旌表守正捐軀之山東聊城縣民楚小四妻徐氏是日駐蹕張三營行宮○辛亥諭軍機大臣等據陳輝祖奏審擬叅革鄖陽府知府王采珍承審典史蔡安弦刀戳衙卑楊魁身死一案於關要情節均親自動筆改作楊魁自戕輒將全案供狀移易以致是非倒置請將王采珍發往軍臺効力贖罪等語王采珍以知府大員輒敢於承審屬員戮斃人命重案親筆改換供招捏敘件作辯論種種添設刪抹希圖朦混結案情節實為可惡著將王采珍拏交刑部治罪並傳諭陳輝祖派委妥員小心管解來京沿途倘有疎虞或致王采

珍有畏罪自戕等事。惟陳輝祖是問。又諭據明亮奏調兵由碾占下壓。並與西路約期會剿。自應如此辦理。因展閱阿桂處前此進到地圖。內有碾占之名。就其形勢而論。若果能從彼下壓。則扎烏古阿爾古一帶賊人。皆攔截在內。自可不攻而潰。況與阿桂訂期進攻。彼此為犄角之勢。更可互相照應。著傳諭明亮。總須相度機宜。妥速辦理。若已攻至沿河。而阿桂一路之兵。亦已繞出。又可夾攻。科布曲賊礮。以期必克。明亮仍當統兵前赴甲雜。擒捕逆渠。務須必獲。明亮之立功。即在於此。當努力妥為之。戶部議覆湖廣總督署四川總督文綬疏。稱捷為南部閬中西充遂寧五縣共坍塌鹽井三百四十二眼。請即封禁。其無著課稅銀二千一百二十一兩有奇。一併豁免。應如所請。從之。是日駐蹕波羅河屯行宮。壬子。諭軍機大臣等。據阿思哈奏查審叅革承德縣知縣福綱。勒借鋪戶銀

兩一案。緣福綱在京補授承德縣時。即託素識之候補吏目李康寧。說合立票借冠姓李姓郭姓等八扣銀三千五百餘兩。福綱到任後六月初間。李姓郭姓持票至承德縣索取福綱無銀償還。遂向鋪戶勒借清還等語。福綱甫為縣令。即揭借多金。以致勒索部民財物。其罪實無可逭。除交阿思哈審明定罪外。所有福綱在旗家產。著英廉會同該旗一併查抄。毋使隱匿寄頓。至李康寧冠姓李姓郭姓等。膽敢在京重利放債。并直至承德署肆意逼索。情實可惡。著英廉即將李康寧冠姓李姓郭姓等一併拏交刑部審明。按律究擬。以示懲創。將此諭令知之。又諭曰。福綱甫為縣令。乃於出京時。即揭借重利銀至三千五百餘兩之多。則其人不能安分謹飭蓄意。到任後肆行婪索。已可概見。不可不嚴訊定擬。以儆官方。其冠姓等違禁重利放債。亦屬可惡。已另有旨交英廉查辦矣。至德風。以侍

郎兼管府尹於所屬知縣勒借部民銀兩。漫無覺察。已有應得之咎。今訊出德風。因添建署內房屋。輒交福綱代派各鋪戶。取用物料。其事後發價與否。俱不足信。總之身為上司。欲修建房屋。理應自辦。但經派令屬員經手。即屬非是。其罪并不止於失察矣。已於摺內詳悉批示。著阿思哈於審明定案時。將德風一併叅劾。照例定擬具奏。將此由四百里傳諭知之。○步軍統領衙門奏。山西五臺縣民

人鄭開昌。控告王梁逞兇攢毆。且素多不法。並將該縣家人書吏一併列款具控。請交該撫查審。得旨。此案著派高樓。馳驛前往。會同該撫查審具奏。不必前來行在請訓。○浙江巡撫三寶疏報。太平。平陽。青田等三縣。並衢州衛。乾隆三十九年分。開墾田地。山塘。五十八頃有奇。○以鑲紅旗滿洲副都統託雲。正白旗滿洲副都統慶桂。對調。正黃旗漢軍副都統黃承恩。正紅旗漢軍副都統和爾精額。

對調。○豁除江蘇江寧縣。坍沒占廢屯田二頃九十五畝。有奇。額賦。○旌表守正捐軀之江蘇昭文縣民李大妻高氏。○是日。駐蹕中關行宮。○癸丑。

上詣

皇太后行宮問安。○諭軍機大臣等。昨據阿思哈奏。查審承德縣知縣福綱。索借鋪戶銀兩一案。請將福綱任所貲財。及在旗財產。一併查抄。已有旨。交英廉會同該旗查辦矣。今思

福綱索借所部銀兩。固有應得之罪。但究係揭借私債。與侵挪官項者不同。其財產可以無庸查抄。所有勒借鋪戶等銀兩。著於福綱及從中分肥之各犯名下追出。給還原主。再於福綱名下。照數追出一分入官。至放債之冠姓等。以八當十。重利盤剝。甚屬可惡。著傳諭英廉。即照伊等立票銀數。加倍追罰入官。以為違禁漁利者戒。著將此由三百里諭令英廉。阿思哈知之。○又諭曰。李奉堯奏。據寧

福營都司鄧應文轉據福山汎犯總王福全稟報初家店撥兵吳成烈接投黃務墩兵遲連得遞到匿名稟帖稱係訪得福山縣東南鄉桃扣村有叛徒趙飛仙邪法施藥聚寧海棲霞福山三邑盟兄弟認子姪約二千餘名其妻子志姐認姊妹亦有千餘家風言歸太居其黨於十月上旬謀叛經該把總會同福山縣親赴該村查得村內趙姓共三家內有一人行醫為業名趙良臣其妻趙于氏並無趙飛仙之名搜查亦無悖逆情事現交福山縣審訊李奉堯亦親往查察等語此事想屬荒唐大約又與衛輝鹿來相夏津王二英挾嫌誣陷之案相類趙良臣既查無法書籍字跡轉不必從彼深究而編寫匿名揭帖之人不可不查出嚴懲衛輝夏津兩案皆從被誣之人根究其平昔仇家罪人斯得今此案亦當訊其平日有無仇人即可從彼根求無難立擒正犯自為此事關鍵著傳諭楊景素

即前往該處就近查訊務得此案犯據嚴審定擬具奏但查辦地方此等事件必須不動聲色鎮靜料理不宜稍涉張皇致要犯得以聞風免脫楊景素外任年久諒能妥協辦理也將此由四百里諭令知之如查有端緒即將大概情形先行覆奏李奉堯摺鈔寄閱看并傳諭李奉堯知悉○又諭曰國泰奏據福山縣知縣稟報匿名揭帖一案因撫臣現在沂州一帶查閱營伍即與臬司孫廷槐商酌欲往福山親自查辦孫廷槐輒云此事辦理甚難又不知巡撫之意欲辦不欲辦倘若不欲辦理此時奏明前往查辦更覺非是且一經具奏若不能究出實情如何完結覆奏等語孫廷槐所見如此實出情理之外臬司為刑名總匯地方遇有此等案件臬司即應親往查拏豈有藩司欲辦轉行攔阻之理况匿名揭帖訐告叛逆實有關於世道人心無論事之難易皆當徹底根究若畏難不辦尚何

藉此無用之大員為孫廷槐原不過循資擢用然亦不料其居心辦事竟至於此因召見軍機大臣諭及此事據大學士舒赫德奏昨歲見楊景素曾向臣言孫廷槐自守過甚不能擔事是其人本屬平常難勝臬司之任著密諭楊景素即查明孫廷槐平日居官辦事不肯認真之處據實奏奏勿任戀棧貽誤尋奏孫廷槐本非能事臬司俟查明後再行具奏報聞○是日駐蹕避暑山莊至庚申皆如之○甲寅

上奉

皇太后幸卷阿勝境侍早晚膳○賜御前大臣侍衛軍機大臣等食○諭本年刑部進呈勾到冊內四川省從緩決改入情實者有徐興德因熊相潮左世偉向伊索討欠帳該犯同兄徐興道分持刀棍各斃一命一案又鮮紹冕尹加廷因與張光孝裁秧爭鬧二犯持刀戳斃張光孝張光泗一家二命一案又蒲正

已因雇驢運送軍米毆差尹智殞命一案又袁文魁因袒護姦婦李氏踢傷羅氏斃命一案又孫全德孫元富因李斌李惠向孫全義索債爭鬧二犯持刀幫助戳斃一家二命一案共有五起內徐興德鮮紹冕二起朕於批閱該省題本時因其情節較重即交批本處密記俟秋審招冊進呈時看其如何覈辦今二案即在九卿等擬改情實之內可見刑部九卿所辦認真而川省辦理之草率謬誤矣

向年各省秋審經九卿擬改過多者每降旨申飭然每省不過二三起從未有如今年川省之改至五起者秋審為臬司專責該省臬司李世傑現在章谷辦理軍糧等事臬司印務該督應委熟習刑名之杜玉林署理而乃委顧光旭署理以致所辦舛謬若此然未有學養子而後嫁者不可不加懲儆顧光旭著交部嚴加議處至文綬身為總督於秋審事率行覈轉本屬非是但念其現辦軍需諸務

經手事多。難以專心秋讞。是其誤在顧光旭為重。而文綬較輕。文綬著從寬。交部察議。至顧光旭。由戶部司員出身。刑名非其所習。本不應派令署理臬篆。此即文綬委人不當之處。併著飭行。○又諭昨據李奉堯奏。福山縣匿名揭帖一事。已諭令楊景素親赴該處鎮靜料理。今據楊景素奏。派委藩司國泰迅往查辦。並據國泰奏稱。撫臣現在公出。若俟撫臣飭委再往。恐遲久難得端倪。已於九月初

一日起程。馳赴福山等語。所辦甚是。看來此案。自必出於挾嫌誣告。與衛輝鹿來相復津王二英相仿。尚非大事。既有國泰馳赴嚴密查辦。自能徹底根究。不值一撫一藩同往辦理。過涉張皇。况楊景素現在省西查閱營伍等事。并有會同高晉。姚立德查勘蜀山湖蓄水事宜。竟可無庸前往。著傳諭國泰務須不動聲色。妥協辦理。尋國泰奏。訊據趙良臣指出同莊居住之黃曰琮。素有嫌隙。因即根究。

緣黃曰琮兩次圖姦趙良臣之妻于氏。不從。被氏詬詈。起意誣陷。捏造趙飛仙子志姐姓名。誣以叛逆。竊立匿名揭帖。黃曰琮應照例擬以凌遲。家屬緣坐。報聞。○乙卯。

上詣

皇太后行宮問安。諭革職編修勵守謙准其自備資斧。在四庫全書處纂修上。効力行走。諭軍機大臣等。據李侍堯等奏。船商陳萬勝帶投暹羅國鄭昭文稟一件。稱平定打馬部落人衆投歸。內有滇省兵趙成章等十九名。附商船送回。並情願合擊緬匪。乞賞給礮鐵礮位等因。一摺。該督等以訊據各兵係上年八月緬匪攻破打馬。隨同奔至暹羅等語。與鄭昭來文云。因青靈為其所平。打馬部落率衆來降之語。其情詞不無粉飾。但現將內地兵丁搭船送回。尚屬小心恭順。其所請礮鐵等項。李侍堯以礮位不便准給。其硫磺鐵鍋等物。查照上年請買數目准行之處。所奏

甚是自應如此辦理。至所云緬匪於鄰疆諸國多遭殘害，自必志切同仇。果能糾約合舉，直抵阿瓦，擒其渠魁，上為天朝立功，下為爾主雪恥。大皇帝鑒爾忠貞，必有非常曠典等語，立言殊不得體。中國當此全盛之時，如果欲征勦緬甸，何必借助於海外小邦？況撫馭外夷亦自有道。若藉其力翦滅叛蠻，彼必恃功而驕，久且效尤，滋甚更難駕馭。此乃一定之理。李侍堯等蓋未見及此也。現今軍機大

臣代擬檄稿發去，再閱奏摺內稱請賞礮鐵礮位，並稱礮位礙難准行之語。及閱鈔錄鄭昭稟，係乞礮鐵銃仔所云銃仔，似即內地之礮子，而非礮位。是否鈔稟舛訛，抑係敘摺偶誤，并著查明具奏。現在所擬檄稿即照銃仔立言，並著李侍堯查對原文再行繕寫發往諭。以本閣部堂接閱來稟，並開列名單送回滇省兵丁十九名具見小心恭順，所請礮鐵銃仔前經駁飭。今除銃仔一項關係軍器

定例不准出洋，未便給發外。其需用硫磺鐵鍋，准照上年請買之數聽爾買回，以示獎勵。至所稱若以緬匪兇頑，罪在不赦，欲加天討，昭願率兵合擊，但昭統攝初安，軍需缺乏，冒乞恩賜礮鐵銃仔，並懇據情呈奏等語。所言已悉。但天朝統馭寰宇，中外一家，國富兵強，勢當全盛。前此平定準噶爾，回部西北拓地二萬餘里，今因兩金川狼狽為奸，負恩抗拒官兵征勦，現已擣其巢穴，大功指日告成。獻俘行賞，西南諸番部亦可永慶安全。德威所布遐邇莫不震懾。至緬匪頑蠢負隅，甘棄生成之外，實為覆載所不容，亦屬貫盈所自取。邇年因申討金川，遂將滇兵暫撤，今策勲在邇，或閱一二年稍息士卒之力，再行厚集兵力，將緬匪一舉蕩平。此時自難豫定。若果欲掃除緬匪，則以百戰百勝之王師奮勇直前，所向無敵，視攻擣阿瓦不啻摧枯拉朽。何藉爾海外彈丸聚兵合擊，或爾欲報故主之仇。

糾約青靈紅沙諸鄰境。悉力陳兵。盡除花肚。亦聽爾自為之。設或爾志得伸。據實稟報。本閣部堂覆覈無異。自當代為奏聞。大皇帝為天下共主。亦必鑒爾忠誠。予之嘉獎。至於中國之欲平緬匪與否。聖主自有權衡。固非我守土之臣所敢料。亦非爾之所當請問也。將此詳悉檄諭。即由六百里傳諭李侍堯知之。又諭昨阿桂奏。擬令舒常與富德對調。因照所請。傳諭舒常即赴南路。代富德駐守馬爾邦。換富德至吉地。同桂林堵截逆酋。並酌從正地。派兵襲擊。使賊知此路有兵。不敢從彼越竄。此旨於八月二十七日發往。九月初十日左右。方到軍營。舒常諒已早至明亮處。會同進剿。自不必令其仍赴南路。徒事往來。僕僕。且桂林曾任四川總督。向亦帶兵勦賊。著有功績。其於防堵逆酋。襲擊正地之事。尚所能為。似可即令其在吉地駐防。或阿桂計及逆酋等窮蹙時。必從此一路竄走。而堵截

追擒之事。富德閱歷尤深。桂林尚不及其幹練。則竟令桂林往南路駐守。馬爾邦換富德至吉地。一帶堵截。亦無不可。但軍營事宜。難以懸定。著傳諭阿桂。悉心妥酌。務策萬全。至前以官兵進剿勒烏圍。久未攻得。因思功噶爾拉當噶爾拉兩處賊人。若不似從前看守。或令長清帶兵千餘直進。殲賊克礪。以摧賊膽。而分其勢。是以諭令富勒渾代駐布朗郭宗。今阿桂已攻得勒烏圍。繞兵由昆色爾進剿。又以籌辦隨營軍糧。軍火為重。兵事移步換形。務期妥善。豈可因事前未定之旨。過涉拘泥。想阿桂必能為之妥酌指示也。近因大功將歲。檢各路屢次立功奏稿。以備親撰碑文之用。偶閱初次攻克僧格宗等寨摺內。有守備劉倭。崔文傑帶兵壓至僧格宗寨後。統截攻打。追殺賊人。又攻克美諾摺內。稱攻打美都喇嘛寺。有游擊谷生炎。都司余之格。直從山梁衝壓。都司劉倭。守備李植善。由寺東

進攻各等語。此皆綠營漢員中之奮勇出衆者。何以近日不見此諸人之名。現今俱在何路。是否如前勇往。抑或退縮不前。及當日曾否加恩鼓勵之處。並著阿桂查明。附便覆奏。又前後兩次。攻取美諾時。德赫布。及海祿。均屬奮勉出力。今海祿尚有隨征打仗之事。而德赫布。久未見其名。因何不復派用。或派用而不肯向前。亦著明亮查明。據實覆奏。○丙辰。諭據阿桂奏。頭等侍衛子爵明仁。自到軍

營以來。帶兵打仗。頗屬奮勉。近雖抱病。尚力疾行走。茲因病身故等語。覽奏深為憫惻。著賞給副都統銜。並著該部。即照贈銜議卹。所有子爵。即著伊子寶綸承襲。○諭軍機大臣曰。阿桂等奏。官兵攻得勒烏圍。移營高處。河水陡漲數丈。若漲在數日以前。則沿灘木柵。必致被衝等語。實仰賴

上蒼嘉佑。惟當額手敬謝。即此天心助順。可徵成功之速。○理藩院議覆定邊

左副將軍瑚圖靈阿奏。稱定例出口貿易人等。應在恰克圖。庫倫。塔密爾。烏里雅蘇臺。一帶集場。今商人圖利。向各喀爾喀游牧貿易者甚多。蒙古等始圖賒欠。後以牲畜加倍折算。屢啟訟端。請嚴行禁止。除恰克圖等集場。准其貿易外。如有潛往各游牧者。查出將貨物入官。商人遞解治罪。蒙古等容留商人。將所買貨物。加倍受罰。仍將該台吉參奏。再現在蒙古等所欠各商銀。限一年內。通行完結。

應如所奏。惟所稱蒙古欠各商銀。限年內全完一節。商人等在游牧貿易多年。蒙古所欠者。自必多寡不等。如統限一年完結。勢必不能。應飭各扎薩克等。將衆蒙古所欠。查明呈報將軍大臣。如新欠為數無多者。限一年內完結。倘所欠年久。商人已得重利。令其酌減歸還。總期限內全清。從之。○丁巳。

上詣
皇太后行宮問安。○恭送

皇太后迴鑾。○刑部奏。山東益都縣民張太素。呈控武生劉繩祖挾仇串通臨朐縣積賊妄扳伊姪張怡為竊。臨朐縣知縣俞開甲並不詳審。濫刑斃命。應革職。交該撫嚴審。得旨。此案著派穆精阿帶同吳壇。一併馳驛前往山東會同該撫查審。○豁免浙江諸暨縣乾隆三十一年分民借未完倉穀七十六石有奇。旌表守正捐軀之江西彭澤縣民胡瑞節妻王氏。○戊午諭曰。穆精阿現在出差。所有辦理行在勾到事務。刑部止有總理之大學士舒赫德一人。此外並無專辦堂官。著派王杰前來。於本月十八日在兩間房伺候辦理。不必趕赴熱河。○又諭刑部進呈福建省秋審冊。經九卿從緩決改入情實者二起。所改甚是。蔡建因妬姦戮傷徐沃。復將趕扭奪刀之鄰人吳沛然。刀傷心坎致斃。妬姦逞殺一傷一死。實屬淫兇。又周夜明因年甫八歲之張光富偷伊田豆。向其奪取。張光富用口欲

咬該犯。輒舉脚踢傷左脇。殞命。細故起釁。踢斃幼孩。殊為兇暴。此二案僅擬緩決。實乖情理之平。昨四川省秋審冊。經九卿改入情實者五起。為數過多。將承審之員議處。因署督文綬現辦軍需於秋審案件。未能悉心覈定。是以將專辦之署臬司顧光旭嚴加議處。而文綬則從其輕。今福建錯擬緩決。係余文儀所辦。余文儀向係刑部出色司員。於讞案情節輕重。皆所熟悉。且非若文綬承辦軍需者。可比。何輕率錯擬若此。秋審雖臬司專責。但廣德係吏部司員出身。刑名之事。不及余文儀遠甚。使欲加罪。則重在余文儀。而廣德為輕。因所改止有兩案。姑免交部。余文儀著傳旨申飭。嗣後秋讞定擬。如再有舛誤。不能復邀寬典矣。○諭軍機大臣等。前諭舒常至南路。換富德往吉地一帶。同桂林堵禦。昨據舒常等奏。桂林已於八月二十六日至丹東。舒常將應辦之事。向其告知。即於八月起身。往

北路明亮軍營。若再更調。未免往來僕僕。莫若即令桂林在吉地駐守。經理堵擒逆酋事。宜並酌量派兵從正地襲擊。使賊知我此路有兵。不敢從此路竄出。其事尚屬桂林力所能為。富德著仍在絨布駐兵。舒常仍在北路叅贊。均毋庸更調。○以兵部左侍郎周煌。知武舉。內閣學士錢載。為武會試正考官。侍講學士金士松。為副考官。○己未廣東巡撫德保疏報廣州潮州肇慶三府屬。乾隆三十九年分。開墾額外荒田十二頃二畝有奇。○護貴州巡撫布政使韋謙恒疏報。平越府施秉縣。乾隆三十九年分。開墾田土十二畝有奇。○庚申遣官祭

歷代帝王廟。○遣官祭

都城隍之神。○諭曰。薩哈岱之罪。非鐘音伯忠可比。且伊於雍正年間。即在奏事處行走。著加恩賞給副都統職銜。仍在奏事處行走。遇有副都統缺出。即行坐補。○又諭健銳營

火器營。俱由滿洲兵丁內揀選精壯另立之。營關係最為緊要。現今管理此二營之大臣等。操練演習。固屬盡心。但因日久風氣漸不如前。即如在軍營。晉斥將軍。及近日盜馬之事。若不速行整頓。必至習於下流。大有關係。著派舒赫德總管火器營。派福隆安總管健銳營。舒赫德福隆安管理之事尚多。不必輪班前往操練。著每一月內查看一二次。加意整頓風俗。嚴行約束。毋令為非。惟期精熟技藝。嗣後此二營官兵內。如仍有行為不堪者。朕惟伊二人是問。○旌表守正被戕之奉天岫巖廳民林祿女林氏。

大清高宗法天隆運至誠先覺體元立極敷文
奮武孝慈神聖純皇帝實錄卷之九百九十

實錄卷九百九十

手

大清高宗法天隆運至誠先覺體元立極敷文
奮武孝慈神聖純皇帝實錄卷之九百九十一

監修總纂官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未九月辛酉

上自避暑山莊迴鑾○遣額駙扎蘭泰赴巴克什營

皇太后行宮問安○諭前因刑部奏有鎮遠府知府蘇壻用六百里驛遞揭告該省督撫藩臬等串通一氣袒庇劣員等情彼時以事關通省大員自應徹底查究因派侍郎袁守侗阿揚阿馳驛前往查辦旋細閱蘇壻揭帖其措詞矛盾處甚多即疑其或因上司有將伊効參之信故為先發制人計圖反噬今據圖

思德叅奏該員於鎮遠府任內浮收稅銀勒索船戶客民及得受本地鄉紳餽金前往弔奠種種婪贓卑鄙均有證據並稱委員訪查於八月十五日抵鎮遠蘇橋即於十九日封發六百里馬遞公文通揭部科等語是其捏詞反噬果不出朕所料而於稅口例外浮徵一二倍之多尤屬目無法紀實出情理之外蘇橋著革職交與袁守侗阿揚阿將所叅各款及有名犯證一併嚴審定擬具奏至蘇橋

將所揭公文交鎮遠縣驛站諭令六百里馳遞更屬狂妄該縣李常吉違例遽為遞發亦屬錯謬著該侍郎等俟此案查審明確並將該縣李常吉一併叅奏上司如果不公不法扶同欺蔽致屬員負屈難伸原許其揭報部科奏為昭雪但須遣家人等齎投從無由驛馳發之例況驛站遞送限行幾百里事件惟軍營文報可以徑行其餘外省遞摺行文非有兵部火票不能馳遞今蘇橋以知府印文

擅動驛馬竟得專達京城則是各省驛站之輕率濫應大概可知著該部再行查例通飭如有故違擅動者隨時查明劾叅○諭軍機大臣等前據貴州鎮遠府知府蘇橋將署總督圖思德與署藩司國棟署臬司國棟貴州道佛德等通同一氣袒庇劣員席纘欲為開脫各情節由六百里馬遞直揭部科據刑部等衙門轉奏如果所言非妄則是黔省各官上下扶同徇私舞弊於吏治大有關係不可

不徹底根究特派侍郎袁守侗阿揚阿前往查辦復思該府即負冤直揭亦當差人齎投有何迫不及待而由六百里星馳遞遞必係聞督撫將欲劾叅捏詞反噬以圖先發制人故情急計出於此曾向軍機大臣一再言之復閱其原揭前稱改委席纘世交素好之貴東道佛德承審後云佛德以案情不實不肯依辦即屬自相矛盾曾諭令袁守侗阿揚阿詳細研鞫務使其事水落石出今據圖思德

叅奏蘇橋例外徵收關稅。賦款累累。乃聞該署督差人到府訪查。即由六百里遞發印文通揭。其挾嫌反噬。果不出朕所料。蘇橋將通省上司。全行訐告。即使所揭之事。審皆屬實。朕亦另有辦法。斷不肯因此遽加擢用。致啟澆風。乃浮徵稅課如許之多。復敢逞其鬼域伎倆。揭告上司。情罪甚為可惡。關稅俱有定額。各省司權務者。從不敢違例多徵。今蘇橋於額報數外。浮收一二倍之多。其罪甚重。袁

守侗等。審明確實。自應即以此款。作為重罪。問擬斬決具奏。其蘇橋原揭之案。如或審有確據。亦當分別辦理。不可因蘇橋已經獲罪。竟將原揭置之不問。至蘇橋賦數甚多。其稅銀現有草簿底簿可憑。諒非虛妄。所有蘇橋任所貲財。著袁守侗等。即將帶往司員內。派出一人。並同該督撫派委道員一人。同往該府查封。如審明定案。應行入官。即一面辦理。一面奏聞。將此同明發諭旨。由六百里一併

發往。諭令袁守侗。阿揚阿。知之。仍即將到黔後。查審大概情形。先行具奏。圖思德摺。並鈔寄閱看。○又諭。前據周元理奏。報直屬秋成分數。宣化府閩屬通計。係約收十分。何以本日奏到糧價單內。該府價值。轉視上月加增。殊不可解。著傳諭周元理。即行查明據實覆奏。尋奏。宣屬收穫較遲。該府所報。係八月十五日以前糧價。其時尚未收穫。米價交新脫陳之候。易至增昂。是以八月糧價。較七月加

增。報聞。○軍機大臣議。覆直隸總督周元理奏。稱。南北運河。每年額定歲搶修銀。各一萬五千兩。照數豫領。節年通融辦理。與永定河舊例相同。今永定河歲搶修工銀。既經酌改。則運河亦宜另定章程。應如所奏。嗣後南北運河。每年秋成後。各先發銀六千兩。分貯天津。通永二道庫。派員辦料備用。倘遇不敷。借款墊辦。其歲修銀數。每年秋汛後。令各該道將下年各工。親往確估詳報。該督覆勘。奏明

領辦次年照估興修所有原定銀數照永定河新例刪除從之○戶部議覆陝西巡撫畢阮疏稱寶陝局鼓鑄應採辦鉛錫共估需價值運費銀一萬八千六百餘兩派委典史陸象拱赴楚領辦查各省採買銅鉛等項或委州縣或委佐雜向來辦理原未畫一但銀數既多微員恐致貽誤應請旨飭令該撫於丞倅州縣中派員前往並請嗣後採買動項數至一萬兩以上者皆於丞倅州縣中選委辦理得旨依議速行○是日駐蹕喀喇河屯行宮○壬戌諭軍機大臣等前因逸犯歸太劉煥等為東省逆案要犯諭令周元理楊景素徐績等於各該省上緊查拏並令該督撫等將有無拏獲之處每月奏報一次以憑稽覈迄今已將一載並未弋獲而每月一奏在伊等既覺艱難難於措詞而朕披閱亦覺徒滋煩瑣於事毫無裨益且該督撫如果實心躡緝又不在每月之具文入告著傳諭周元理

楊景素徐績嗣後惟當飭屬實力嚴拏以期必獲一經獲犯即專摺奏聞其每月奏報之處著停止但不可因既停月報將緝犯要事置之不辦將此一併諭令知之○定西將軍尚書阿桂定邊右副將軍尚書公豐昇額參贊大臣內大臣都統海蘭察副都統額森特奏前擬從達思里噶拉宇進兵今因陰雨阻滯達思里一帶賊俱增修碉卡恐未免多煩兵力復躡探得什爾德山梁之南過溝為達烏達圍再上為安布魯木順梁而下即至聶烏過勒烏溝而上正對則朗噶克了口一經攻占即已截科布曲賊人之後而噶喇依更為震動至現在天色自九月初四日午後漸晴擬即日發兵諭軍機大臣曰阿桂等奏覓路繞截進攻情形所籌甚好且豫稱初四午後天氣漸晴擬於今日發兵務期迅速占據等語今節令已當九月向後自應晴爽阿桂等繞道進攻必能有益佇聽捷音再阿桂

昨曾與明亮相約。令其俟河東進攻達思里時。即從碾占下壓。今阿桂擬從達烏達圍一帶進攻。又在達思里之北。似不與碾占相對。或阿桂處另行通知明亮。相訂會辦。亦未可定。軍營之事。移步換形。難以遽為揣度。阿桂長於謀計。於籌畫軍務機宜。尤所諳悉。明亮等。惟當聽其妥酌行之。○軍機大臣等議覆。定西將軍尚書阿桂等奏稱。大兵擬直指噶喇依。歲功在即。將來隨臣等凱旋回京官兵。

請照平定西陲之例。以四百名為率。分四起行走。沿途給馬跟役人等。令其步行。照例折給馬銀。其餘京兵及吉林索倫官兵。非隨凱旋者。俱令由成都乘船至襄陽。由河南辦車進京。應如所奏。再索倫吉林等處官兵。有攻戰出力。蒙賜巴圖魯號。及賞戴花翎者。並令阿桂查明。於凱旋時。先行帶回進京。即在四百名之內。俾得一體恭與盛典從之。○是日駐蹕常山峪行宮。○癸亥。

上遣御前行走之郡王鄂勒哲特穆爾額爾克巴拜。赴羅家橋。

皇太后行宮問安。○御行殿勾到秋審官犯。服制及雲南貴州情實罪犯。停決官犯斬犯九人。絞犯六人。服制斬犯三十人。雲南絞犯二人。貴州斬犯二人。絞犯二人。餘四十人。予勾。○諭軍機大臣曰。勒爾謹奏。據署侍郎福祿咨稱。扎薩克公禮塔爾出獵。遇賊被害。現親往查辦等因。臣即密備甘省兵一千五百。寧

夏涼州莊浪滿洲兵一千五百。藉稱查邊。前往西寧。請特簡大臣前赴西寧會辦等語。此並非大事。勒爾謹張皇辦理。殊屬非是。禮塔爾自行出獵。並非因公。且青海一帶。不過番人。並無別部。禮塔爾出獵時。想所帶人數無多。又或未經冠帶。賊人不識。誤行戕害。或即係伊屬下滋事。亦未可定。此不過將戕害禮塔爾之人查出。從重辦理。何至如此聲張。勒爾謹雖云密備。不使人知。顧派兵數千。衆人

豈不紛紛議論乎。至福祿得禮塔爾被害之信。應一面奏聞。一面往辦。今並未具奏。惟咨行勒爾謹者。或以此乃番人常有之事。俟伊查辦後。一併具奏耳。然伊亦應先行陳奏。今僅咨行勒爾謹。亦屬不曉事體。著傳諭福祿禮塔爾。究係被何人戕害。伊親往如何辦理。即行覆奏。再此係細事。勒爾謹身為總督。不可親往。可密札法靈阿。前赴西寧探信。福祿如已辦竣。法靈阿即回任所。如未能完結。必

須調兵。法靈阿再就近領西寧兵前往。同福祿辦理。將此由六百里傳諭福祿。勒爾謹令其遵旨妥辦。尋奏。勒爾謹已至西寧。福祿即會同查辦。賊匪業經遠颺。俟留心查拏。現在西寧亦無應辦事件。已移知法靈阿。可不必來。勒爾謹亦即由西寧起程回任。得旨。益屬不堪。○兵部以武會試中額請。得旨。這考試。漢軍取中二名。直隸取中八名。陝西取中七名。廣東取中七名。河南取中二名。山東取中

五名。江南取中二名。山西取中三名。湖北取中二名。湖南取中一名。四川取中一名。廣西取中一名。福建取中三名。浙江取中二名。江西取中一名。雲南取中一名。貴州取中一名。○旌表守正捐軀之直隸邯鄲縣民婦劉高氏女劉氏。○是日。駐蹕兩間房行宮。○甲子。諭軍機大臣等。昨召見周元理。奏稱聞浙江巡撫三寶兩淮鹽政伊齡阿。知平定兩金川功成奏凱。在即。明春自必詣曲阜告功。江浙

商人竟欲懇照前次東巡時。在天津承辦排當等語。此甚無謂。辛卯歲。朕巡幸東省。適恭逢

聖母皇太后八旬萬壽之年。普天同慶。遐邇膺歡。是以允江浙各商所請。令其在天津辦差祝

釐。以展忱悃。至於明春或舉東巡之禮。係因武功者定。在泮告成。非前次恭辦

慶典可比。若果有應令伊等辦理之處。朕必早

為傳諭。何待伊等之申請乎。況明歲臨幸東省之事。此時亦尚未定。無論行止若何。總無須商人等之承應。將此傳諭三寶伊齡阿知之。○戶部等部會議。各省督撫奏覆武職交代。酌定限期事宜。內除倉場總督查覆。所轄汛弁。並無經手錢糧。毋庸交代。直隸總督奏覆。武弁中如並無經管錢糧交代者。仍照舊例報明接卸日期。咨部。均毋庸議。外。其江蘇、安徽、江西、山東、直隸、山西、河南、浙江、福建、四

川、湖南、湖北、廣東、廣西等省。并江南、河東、各總河、暨漕運總督等。各據奏稱。武職交代錢糧等項。無論正署。均請照黔省奏准撫標之例。統限一月。造具冊結。咨部。陝西、甘肅、三省。則議以督撫提鎮標下中營事務繁。交代請定以四十日。其餘標協營。統限一月。咨部。雲南、貴州二省。則議以滇省督提二標。臨元等六鎮。以及黔省提標、安籠等四鎮。經管錢糧軍械較多。請無論正署。自守備以上。交代俱限

五十日。其餘各標協營。定限一月。咨部。各等語。均應如所奏。如有遲逾。即行查叅。兵部照文職交代遲延例議處。又兩廣總督李侍堯。署漕運總督嘉謨等。奏請武職暫行委署。不及一月者。毋庸交代。陝甘總督勒爾謹。奏請交代各員。內有旋署旋卸。在三月以內者。將任卸日期報部。毋庸造具冊結。所管錢糧等項。令通報該管上司察覈各等語。亦應如所請。並通行各省一體遵辦。又署山西巡撫巴

延三奏。武職中如並不經管錢糧之副將。叅將。遊擊。都司。各有兼轄之責者。無論正署。亦於到任一月內。將所屬盤查取結。咨部等語。查各省經管糧餉員弁。既有本任勒限交代之例。又令兼轄之員。於到任時。盤查取結。事屬繁瑣。應毋庸議。從之。○是日。駐蹕要亭行宮。乙丑。

上御行殿。勾到秋審四川、廣西情實罪犯。停決四川斬犯七人。絞犯十四人。廣西斬犯二人。

絞犯二人。餘六十七人。予勾。○兩江總督高晉會同河東河道總督姚立德。山東巡撫楊景素覆奏。蜀山一湖。並無來源。惟收蓄汶河伏秋盛漲之水。始足以濟漕運。若如部議。必俟十一月煞壩後。收蓄清水。其時水落歸槽。難資存蓄。實於濟運無益。雖伏秋渾水。不免停淤。然祇在湖邊引河渠道之間。不致淤及湖心所淤之引河渠道。每年冬杪勘估。春初如式挑挖。動項亦屬無多。請仍循舊例辦理。

毋庸更定章程。惟是舊例每年收水。以九尺七八寸為度。蓋恐收水過多。冬間風緊。湖隄未免受險。今業將險要隄工。砌石增高。即多收水一二尺。亦可無虞。得旨。如所議行。○是日駐蹕密雲縣行宮。○丙寅。

上至南石槽詣

皇太后行宮問安。○諭軍機大臣等。據明亮奏。碾占巴扎木兩路賊人拒守甚嚴。未能即進。擬親赴西路與阿桂并力以圖。又據舒常奏。

接奉諭旨。令赴絨布寨。更替富德。現由沙爾尼起程前往等因。均屬大謬。看來明亮竟係因北路現無可進之機。而阿桂一路自攻得勒烏圍以來。繞兵前進。聲勢甚盛。遂欲捨此就彼。甚屬非是。各路分派將軍叅贊。責有專司。自應各就本路調度。熟籌以期集事。即彼此有應關照之處。亦不過聲息時通。訂期夾擊。互相犄角。斷無舍己從人之理。況西路有阿桂為將軍。又有豐昇額為副將軍。尚何藉

明亮之相助。即欲添阿桂兵力。亦止須令奎林和隆武統領前往。明亮何得輕率親行。且三將軍俱聚於西路。而北路竟無一統領之人。亦無此理。明亮既欲親行。又不留舒常在營駐守。實為非策。至所稱阿桂寄來摺稿。西路可供打仗者。止一萬二千人。僅數什爾。德一帶進攻。欲令帶兵數千。為續添力量。合勢掃巢等語。若其事果出阿桂之意。則阿桂亦有不合。因檢閱阿桂原摺。據稱西路兵雖共

三萬二千。因自梭洛柏古一帶道路綿長。近於後路營卡內極力抽兵。止得一萬二千。僅數什爾德一帶分路進攻。及為接續之用。等語。此就現在抽兵情形而言。並非議令相助。又據稱明亮前至軍營面商。告以俟官兵繞進得手之後。或河西另有機會。再行籌辦。過河幫助。否則俟西路攻進噶喇依時。明亮帶兵數千前來。為添力合勢。擣巢之舉。等語。此乃指攻圍噶喇依將得之時而言。其時明亮

或果由碾占一路乘機攻得。方令前往。並非令其捨河西一帶不顧。徑往相幫。蓋明亮誤看阿桂摺稿。並將上下文意錯綜誤會。遂至於此。因復細閱明亮之摺。據稱屆時統兵親往。似此時尚未起身。果爾。則北路兵尚不至於遽渙。但恐舒常既行。明亮又冒昧即往。賊人窺見此路無人。潛從扎烏古而下。將沙爾尼。茹寨等處復行占去。則於全局大有關係。甚為可慮。總之此事。明亮舒常所辦。太覺謬

戾。非尋常錯誤可比。著傳旨嚴行申飭。明亮此時斷不可輕離北路。如或阿桂果有必須助勦之處。即令奎林和隆武帶兵數千前往。亦無不可。明亮若能即將河西一帶及早攻奪下。至沿河方可與阿桂關照會勦。否則將河西一帶加意嚴緊守禦。勿為賊人窺伺。滋擾。閱進到之圖。所有扎烏古山梁未克賊。尚在勒烏圍東北。明亮並未將沿河一帶料理肅清。斷其過河至勒烏圍之路。萬一賊人由彼偷越。於勒烏圍甚有關礙。不可不極力嚴防。阿桂曾派令額森特在勒烏圍轉經樓甲爾日礫橋一帶駐守。此皆防西來之賊。非防北來過河之賊。此處大有關係。仍當諭令實力留心處處照料。不可稍有疎忽。明亮後路未清之時。阿桂切不可將額森特調令他往。致滋貽誤。阿桂並傳諭額森特知之。至沙爾尼茹寨一帶。為軍糧軍火臺站所經。不可無妥幹大員坐辦。富勒渾昨奏往底木達經

理糧臺原為功噶爾拉當噶爾拉一路進兵。因思該處進兵。不過牽綴。無庸富勒渾往彼相助。就現在情形而論。河西所關尤重。富勒渾自當在此一帶。留心妥辦。或仍在梭洛柏古。或酌籌與明亮軍營相近最要之處駐守。至功噶爾拉當噶爾拉進與不進。無關大要。阿桂攻得噶喇依時。如欲添兵。或調長清處兵一千名。令其帶往幫攻甲雜。蓋噶喇依一經攻得。則功噶爾拉當噶爾拉皆成內地。長清自可徑行無阻。著阿桂妥酌行之。至於河西碾占一路。雖賊人堅拒難進。自應別探可進之途。即如阿桂處。初擬由達思里一帶進攻。繼聞賊人知覺豫防。即改由達烏達圍。經安布魯木而進。程雖稍遠。而攻其無備。自易得手。若如明亮之畏難輒止。何由所向克捷耶。又聞明亮圖內。官兵所設營卡太多。上下列布三層。似覺無謂。今既將達布依一帶營盤拆毀前移。何不將石真噶一帶及達思拉

木方營向北一帶小營盤移徹。又可抽添無數兵力。明亮何不計及於此。嗣後務宜諸事留心。為妥舒常較明亮稍有心計。是以前次派令往吉地駐辦堵截逆酋之事。旋經明亮奏其於北路軍務番情熟習。仍欲得其相助。是以即令復回北路。而令桂林往代。至於襲擊正地一事。原令舒常同桂林酌量辦妥。即回北路。嗣因阿桂奏請。令舒常往絨布換富德至吉地堵截。雖允所請。隨據舒常奏。已於

八月二十八日。自吉地起程。徑赴明亮軍營。朕尚以其徑去為是。是以諭令仍在北路。無庸前往。絨布更換。而以吉地堵截之事。交桂林辦理。朕於七八千里外。籌度機宜。只能如此。軍營之事。移步換形。或接奉後旨。與前旨情形不符。果能揣度事勢。擇其妥是者。奏聞而行。朕非惟不責其故違。並且獎其曉事。舒常豈尚不知。而拘泥若此耶。舒常奏已於初十日起身。若至正地。料理襲擊之事。稍就。即

接奉前旨仍回北路自屬最要若已馳赴絨布而富德又自絨布前往吉地彼此甫經更調又只宜各就現駐之處作為定局實力妥辦不可因有此旨復行僕僕道途徒勞跋涉舒常富德均當妥酌而行是日駐蹕南石槽行宮丁卯

上迴鑾奉

皇太后居暢春園問

皇太后安詣

安佑宮行禮幸圓明園廣東巡撫德保疏報廣州惠州潮州肇慶高州羅定六府州屬乾隆三十九年分開墾額外水田二十九頃二十九畝有奇以故甘肅河州土司王車位于斌四州永寧道屬麻柳壩土百戶仰挖子賈故各襲職戊辰

上詣暢春園問

皇太后安諭曰明亮在軍營不甚奮勉成功後如何用伊之處另降諭旨所有廣州將軍

員缺著永瑋補授永瑋正白旗蒙古都統員缺著邁拉遜調補王進泰年老不勝提督之任廣西提督員缺另行補放所有邁拉遜正藍旗漢軍都統員缺著王進泰補授其未回京之前仍著邁拉遜兼管又諭前因旺保祿在天津鎮總兵任內看其尚知奮勉是以令其往署四川提督在軍營後路駐劄巡防乃伊自到任以來諸事毫無措置竟係一庸碌無能之人難勝專閫重寄祇可授為副都

統應俟大功告成後令其來京仍為健銳營翼長似得其長其四川提督員缺著桂林補授伊於川省軍務情形尚為熟悉且現在吉地一帶辦理堵截賊首之事以提督大員在彼督辦呼應自必更靈桂林應益加感奮以副委任其旺保祿所遺之天津鎮總兵員缺即著滿斗補授定西將軍尚書阿桂定邊右副將軍尚書公豐昇額叅贊大臣內大臣都統

海蘭察副都統額森特奏達思里噶拉字一帶因賊衆固守改道從達烏達圍繞進奮攻海蘭察所帶之兵分爲七起豐昇額額森特處亦分爲三路值風雨交作涉險衝泥克取當噶克底綽爾丹色木里各碉卡并將原擬進攻之達思里噶拉字莫魯古各處碉卡寨落悉行攻克諭軍機大臣等阿桂等原欲攻達思里等寨因賊人知覺豫防須改從達烏達圍繞進今於繞進之時不但將改道擬攻之當噶克底一路盡心攻克並將原擬進攻之達思里噶拉字莫魯古一帶盡皆搶占將軍叅贊調度有方在事之將領弁兵等皆冒雨衝泥攀崖越險所向克捷甚屬可嘉所有阿桂豐昇額海蘭察額森特及奮勇之領隊大臣等各分別賞給荷包以示獎勵仍俟攻克噶喇依時一併交部優敘俾膺渥典至阿桂統兵攻勦噶喇依爲擣其腹心之計深得竅要現在督兵進攻自斷不容復行抽撥往

助明亮是以前諭阿桂令調長清所統之兵但昔嶺一帶亦須有人牽綴即長清之兵似亦不宜調動著阿桂妥酌行之至勒烏圍及甲爾日磔橋一帶甚爲緊要宜防扎烏古等處之賊過河滋擾所係匪細前據阿桂奏派額森特在彼駐守頗爲可恃閱此次奏摺額森特業已帶兵進勦則勒烏圍一帶現派何人代彼該處專防後路過河之賊其責甚重阿桂宜選派勇幹之人駐辦仍將派委緣由即行奏聞○定西將軍尚書阿桂奏接奉諭旨令臣凱旋時帶綽斯甲布布拉克底沃克什明正瓦寺五土司來京查瓦寺土司故後伊應襲之子年幼尚未襲封布拉克底土司阿多本係跛足令人背負而行自不能遠赴京師至番人有生身熟身之分與蒙古無異其未經出痘者心多畏懼請令明正沃克什等先來此後有願輸忱瞻覲者再行辦理報聞○命馬蘭鎮總兵滿斗仍兼

東陵總管內務府大臣事務。已已諭據文綬奏驛道杜玉林在川省辦理軍報驛站諸事俱能悉心經理其總理南路糧運亦奮勉急公實心催趲實為明幹出色之員等語杜玉林著加恩賞給按察使銜以示鼓勵。庚午諭寧壽宮地方緊要若令內務府大臣公同管理轉無以專責成著派內務府大臣福隆安金簡二人專管所有該處輪值看管之內務府護軍未為妥協及一切應辦事宜並著

福隆安金簡妥定章程具奏務須留心經理實力稽查嗣後如稍有疎懈貽誤惟伊二人是問將來福隆安金簡二人或有陞遷出缺之處著內務府大臣開列名單請旨另行簡放尋奏酌議章程一寧壽門請派侍衛什長帶領親軍值宿其餘外圍各門派八旗內務府護軍叅領等帶領護軍值宿夜間周迴傳籌統交景運門值宿護軍統領順貞門值宿內務府護軍統領嚴行查察如有貽誤即行

叅處一後路東西角門向未建值宿班房應請增置一請於內務府司員內遴選郎中員外各二員主事一員并該工監督等派令專管輪流值宿稽查一請添設檔房筆帖式四員擇其兼通滿漢文者由各該處揀補聽事人八名於各管領下食錢糧之蘇拉挑補不須另給錢糧如果勤慎三年後交各管領挑補甲缺一各處陳設均造具清冊二分鈐以廣儲司印信其一交總管內監其一交臣等

存查一新派辦事司員於陳設事宜未能熟習請將原派查辦司員仍令兼辦三年。一皇極門外有備用庫房數間敝褻門外亦有備用餘房請作為官員書吏等辦事公所。一檔房所需筆墨及紙由廣儲司領用。一寧壽宮外圍舊設內管領一員專司掃除請再添設內管領一員。一案冊文移應用司印者仍照舊鈐用廣儲司印外如有應用堂印之處請鈐用總管內務府印從之。諭軍機大臣曰

三寶奏嘉興府海防同知舒希忠籤陞廣西柳州府知府現已給咨送部引見請仍發回浙江以候補知府委用等語此事不可行已於摺內批示矣外省官員推陞別省不許督撫奏留曾經降旨飭禁蓋各省員缺均需得人而理若以駕輕就熟為詞則是稍能明幹練習者必須專在一省陞轉而他省竟無可

以辦事之員於事理未為平允且恐此端一開凡籤陞邊省惡缺者皆得藉上司奏留免於遠涉此等趨避之風尤不可長三寶因舒希忠籤陞柳州知府輒為奏留之處殊屬非是三寶著傳旨申飭吏部等部議覆戶部侍郎高樸奏稱捐納知縣向有准捐分發之條惟此次川運例不准請仍舊准其報捐應如所奏惟人數不得過多大省分發十二人中省十人小省八人再候補知縣向例准過班加捐分發今川運例亦不准應一體准其報捐又本年八月新例以雲貴銅鉛需員解

運議將捐納知縣准其加捐分發雲貴二省今既各省准捐前議自無庸另辦惟是該二省解運銅鉛需員較多若照小省應發人數而計恐不敷委用應請雲南分發二十員貴州分發十二員令報捐人員通行籤掣其掣得雲貴者到省時無庸拘定一年之限該督撫即酌量題署實缺令其承運銅鉛如辦理無誤回任時即題請實授亦不拘年限從之

辛未

上詣暢春園問

皇太后安○詣

大高殿

壽皇殿行禮還宮○兵部議覆河南巡撫徐績奏稱雲貴文報至豫省新野縣入境向係襄城縣遞送由許州至新鄭共一百八十里查襄城另有由長葛縣石固鎮至新鄭一路共一百三十里較近五十里請改由石固鎮責成長葛縣經營應如所奏從之○壬申

孝慈高皇后忌辰遣官祭

福陵。諭京師每屆冬令五城設厰煮賑三個月。今歲因係閏十月經都察院奏准於閏月朔開賑。第念十月望日已交立冬節天氣漸就沍寒貧民口食未免稍覺拮据所有五城煮賑著加恩於十月十五日為始俾得早資果腹不致凍餒。副朕惠愛窮氓至意。各該衙門遵諭即行。○諭軍機大臣等前據圖思德叅奏知府蘇橋於例徵關稅外數倍浮收賊

款累累等因一摺韋謙恒雖亦會銜具奏實係圖思德巡閱黔省營伍入境後訪查而得並非發自韋謙恒其情節已屬顯然巡撫有察吏懲貪之責鎮遠距黔省會城不遠耳目易周今蘇橋浮收關口稅銀勒索客民船戶及得受本地鄉紳餽金賕私狼藉若此韋謙恒近與同省何竟漫無覺察任其貪汙無忌而圖思德一入黔境便有風聞即行訪查叅奏則韋謙恒平日所司何事且知府貪劣本

省巡撫不行查叅直待督臣訪劾巡撫雖同列銜亦難辭咎而韋謙恒自與圖思德會銜之後若無其事者然既不專摺特叅亦不自請議處今日奏到各摺謂必係補奏蘇橋之事乃竟無一字提及實大不是韋謙恒著傳旨嚴行申飭並著明白回奏○是日起

上以孟冬享

太廟齋戒三日○癸酉諭軍機大臣等伊犁烏魯木齊古城巴里坤等處設立駐防滿洲兵

特派將軍大臣管理原期不失滿洲本業訓練講習以成勁旅該將軍大臣等宜仰體朕心實力整頓方為無忝厥職若戲園酒肆最為敗壞風俗之端尤宜嚴禁乃近日新疆屢有因酒後鬪毆斃命之案皆由平日漫無約束所致此事甚有關係著傳諭該將軍大臣等嗣後務宜留心化導隨時簡練於聚飲演劇之事嚴行禁止以副朕造就滿洲至意倘視為具文經朕察出必將該將軍大臣等治

罪（甲戌）

孝敬憲皇后忌辰遣官祭

泰陵諭現今大功指日告成所有節次撥解銀兩已足敷用但平定金川後一切善後事宜不無尚需經費儲備尤當寬裕著於部庫內再撥銀三百萬兩仍照上年奏准之例令經由各省督撫派員承管遞行轉解交川省藩庫存貯備用該部即遵諭行○諭軍機大臣曰阿桂等奏進攻西里碉寨痛殲賊人並過溝攻打科布曲山腿將軍等董率將領弁兵奮勇出力均屬可嘉看來西里科布曲兩處為賊人緊要險隘是以悉力堅拒今阿桂現驪路徑或從達思里踰溝上攻或搶上安布魯木順梁繞截仍一面在科布曲山腿相機攻奪如此多方布置賊衆自難處處堵禦可期迅速歲事至朕所最厯念者以甲爾日礮橋為通科布曲要路恐賊衆伺官軍進攻後過橋至勒烏圍滋擾所關非細已屢諭阿

桂加意嚴防今據奏甲爾日礮橋業經坍塌此次往攻科布曲山腿係潛搭浮橋而過且於對岸施放鎗礮擊賊所辦甚好甲爾日礮橋想即係攻克勒烏圍時繫巨索於橋柱拽倒今橋雖拆斷仍防賊人泅水而來額森特現已回至勒烏圍豐昇額亦往該處督辦自可放心若遇伊等應往他處進攻時勒烏圍一帶必須酌留大員一人如額森特駐兵防守方為妥協又據長清等奏由功噶爾拉進

攻搶獲平卡二座此一路官兵久未攻打今忽於此覓間進攻賊衆見之必皆驚惶支抵自足牽綴賊勢所辦亦好但其地險峻賊人便於踞守若官兵冒昧進攻恐難得力並恐賊計狡譎讓官兵深入在後潛行邀截甚有關係長清等此時不宜輕舉妄動或酌量於底木達等要處帶兵駐守以防後路且可使賊常聞官兵聲息不敢輕動以掣其勢若阿桂處尚需兵力或於長清處所有三千兵內

酌調一二千名往彼助勦亦無不可著傳諭阿桂令其妥酌行之○吏部奏貢監職員遇銓選考試等事不及回籍起咨例得取具同鄉京官印結然必同係一省體察方能確實若江蘇之與安徽湖北之與湖南陝西之與甘肅業分兩省自非同鄉乃往往互相出結恐滋朦混請嗣後業經分省者均不准通融出結如該省京官稀少或有京官而無印信有印信而官階在八品以下例不出結者仍遵向例先取同鄉京官圖結再加具隣省京官印結報聞○湖北巡撫陳輝祖議覆布政使吳虎炳奏稱定例南漕餘剩耗米易穀存貯各州縣附入常平額內查湖北州縣有南漕者三十三處原額貯穀及餘剩耗米易穀存倉日積日多甚至倉廩不敷無南漕者三十五處僅止額穀存貯遇有賑貸糶濟等事穀少處撥運為難請嗣後查明各州縣存倉穀少者仍照舊辦理若存倉穀石已多即令

將餘剩耗米變價解司派令無南漕州縣倉數數少之處赴司領價買穀存倉倘倉廩不敷詳請添建如此二十年後通省勻貯則各州縣均無不足之虞等語該司所陳自屬因時調劑惟必俟有耗米之州縣陸續變價發買未免倉儲額數無定且二十年後勻足亦覺紆遲今擬覈定石數一百二十萬為正額餘作附貯於各州縣中擇其正額外附貯歲剩耗米過多者將糶缺之價分發穀少之州縣購貯一二年內通省倉糧皆可齊全得旨如所議行○是月直隸總督周元理奏七月初旬水勢迅驟永定河工合龍後又致漫口所有用過工料銀八千二百九十兩請於一年內繳歸道庫得旨此項永定河漫工銀兩其初次堵築所用工料仍應照銷六賠四之例辦理周元理毋庸將銷六之項獨賠至合龍後又復漫開自係辦理不善之故周元理既願認賠著將此項銀兩令其完交○又奏

原任貴州布政使張逢堯應繳銀錢無從著追。可否照例豁免。得旨。所有張逢堯名下未完銀一萬一千八百七十二兩零。又錢九百五十三千一百餘文。俱著從寬免其追繳。張逢堯已經問流發遣。亦不必再行治罪。該部知道。○兩江總督高晉會同河東河道總督姚立德奏。微山一湖為東省漕運要區。原定水誌一丈一尺。始足濟運。現僅存水八尺三寸。兼以近日雨少。湖水難期增長。查上年臣等在江南黃河北岸潘家屯開挑引渠。於霜降後開放。洩水入湖。頗資接濟。今歲霜降後。自可仍前開放。一俟湖水足用。即隨時堵閉。得旨。此亦一法。但此奏後。山東已得雨。或不致藉此也。○閩浙總督鍾音奏。海壇鎮左營所轄之小練嶼頭二處。適當澳口要地。向未設立汛防。請於小練之兆礁嶼頭之下斗門。各設兵十名。於平潭汛內抽調。仍隸該標。磁澳汛并管轄。並各建塘房墩臺。報聞。○湖北

平定縣志

卷五

巡撫陳輝祖奏。滇銅黔鉛運京車腳銀。俱係撥存通永道庫。俟至張家灣覈發。其滇銅自漢口以下水腳銀。係撥貯於湖北。江寧兩藩庫。俟船到漢口。儀徵給領。惟黔員水腳。向係在黔全領。似未畫一。請嗣後黔省運鉛。自漢口至張家灣水腳銀。亦如滇省運銅辦理。報聞。○辦理糧餉。浙江布政使郝碩奏。官兵攻卡防賊。鎗礮須先用布袋盛土。層累於前。再建樹木城。逐步前進。是布袋為攻卡急需。查西路各站額設人夫。每日支領米糧。所餘布袋約四百餘條。合計一月。即有一萬數千。若令按月解營。足敷拏卡之用。得旨。嘉獎。

實錄卷五十一

三十五

大清高宗法天隆運至誠先覺體元立極敷文
奮武孝慈神聖純皇帝實錄卷之九百九十一

平泉縣志卷之九

十三

大清高宗法天隆運至誠先覺體元立極教文
奮武孝慈神聖純皇帝實錄卷之九百九十二

監修總裁官經廷講官太子太傅文淵閣大學士文淵閣領閣事領侍衛內大臣稽察欽奉
上諭事件處管理

吏部理藩院事務正黃旗滿州都統世襲騎都尉軍功加七級隨帶加一級尋常加二級軍功紀錄一次臣慶柱

總裁官經筵講官太子太傅文華殿大學士文淵閣領閣事務察故奉
上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次正德瑛經筵講官太子少保工部尚書紀錄六次正曾振鐸等奉

救修

乾隆四十年乙未冬十月乙亥朔享

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○頒乾隆四十一年時憲書○諭喀什噶爾地方緊要著調雅德總理著申保幫辦其葉爾羌事務著調淑寶協同瑪興阿辦理○又諭曰高晉奏江安糧道員缺緊要請以新陞廣東惠潮道陶易留江改補俾得熟諳之員接辦期於漕務有裨等語陶易著照所請調補江安糧道高晉奏留陶易與前日三寶奏留舒希忠相似而實不同朕惟準至理以為權衡故准駁亦因之而異陶易在江年久舒希忠在浙年久雖相彷彿而一由知府陞道一由同知陞府其遷轉亦不甚懸殊但陶易歷任淮安江寧於各衛情形諳悉高晉欲留其接辦江安糧道以資駕輕就熟之益乃為漕務擇人起見而陶易所得之廣東惠潮道亦係監司要缺該員自無所揀擇於其間事屬

可行是以允准若舒希忠雖由知縣至同知皆在浙江於該省民情亦自熟習但三寶留彼並非有必需該員辦理之事徒以其陞任廣西柳州府欲為留浙改用柳州係邊省惡缺人皆憚於遠涉舒希忠自不願前往三寶此奏乃為人擇缺起見恐此端一開凡畿陞遠省者皆得藉上司奏留以遂其趨避之計此風斷不可長是以不但不准並加以飭諭朕辦理庶務一秉至公可否惟視其人之自取實無絲毫成見於其間各督撫如欲奏辦此等事件具摺時先當自問其為公為私即可豫揣其應准應駁若各屬員妄懷僥倖之心上司畧存邀譽之見非惟無益而適以自害不可不慎也官員推陞他省不許督撫奏留前曾降旨飭禁恐行之日久人漸相忘而任封疆年淺者或并未知此例若遽加懲治未免不戒視成是以三寶前奏僅予傳旨申飭著再將此明白曉諭各督撫嗣後不得以

不應奏留之人。率行瀆請。如違。定行交部議處。必不輕宥。○丙子。

上御乾清門聽政。○諭軍機大臣曰。李侍堯奏。安南脫回。厥徒一案。究出滋事悍黠者六十名。應發往伊犁。給種地兵丁為奴。俟審明分別辦理外。其在厥被逐跡涉擴悍。發往烏魯木齊等處屯田出力者。計九百三名。其祇附近貿易。及聞風逃避。隻身無藉者。酌發江蘇二百四十名。安徽一百八十名。浙江二百

四十名。河南一百四十七名。知會各省撫臣。於所屬州縣地方。分散安插。聽其自行謀生。其有親族行業可依者。二百八名。解回原籍。飭令地方官。嚴加管束等語。所辦甚好。即應如此分別遣發。此等越境滋事厥徒。除訊明。隨同械鬪逞兇。致斃人命之犯。應令該督撫。俟安南國解送張德裕等犯到時。質訊明確。另行定擬具奏外。所有應發伊犁。烏魯木齊。及江蘇等四省各犯。俱係不安本分之人。為

數衆多。現在雖分路押解。恐在途或易致疎虞。著傳諭李侍堯等。將發新疆及江蘇等四省各犯。應由何路行走。各省分一體鈔錄。諭旨。豫行知會。其沿途各該督撫。應嚴飭所屬地方官。派委員弁。小心管押。毋稍疎玩。如中途或有脫逃者。即照新疆遣犯之例。拏獲。即行正法。至到遣以後。並著該督撫。分地安插。嚴行管束。其發往伊犁。烏魯木齊等處者。尤多擴悍之徒。該將軍都統等。亦當分地編

管。飭令所在官員。嚴加鈐約。勿使滋事。此等分發人犯。無論內地新疆。有在遣所脫逃者。一面奏聞。一面上緊緝拏。正法。將此由四百里一併傳諭知之。○調倉場侍郎富察善。為盛京工部侍郎。盛京刑部侍郎喀爾崇義。為盛京戶部侍郎。刑部侍郎穆精阿。為盛京刑部侍郎。○旌表守正捐軀之安徽宿州民王宗朱妻孫氏。○丁丑。以詹事汪永錫為內閣學士。兼禮部侍郎。○戊寅。諭軍機大臣等新

補惠潮道行有俾。不過一平庸之材。看來尚不脫纨绔習氣。今惠潮道員缺。與伊前此所得之河陝汝道同一衝繁中缺。是以照例補放。但粵東地方緊要。監司大員。有整躬飭屬之責。該員未能勝任。著傳諭李侍堯。於該員到任後。留心察看。如能辦理無誤。則已。倘有不能妥協之處。著即據實具奏。毋得稍事姑容。○以故和碩恒親王弘旺子永皓襲爵。故奉恩輔國公弘院子永浩襲爵。○己卯

上御太和殿視朝。文武陞轉各官謝恩。○諭曰。伍彌泰。福德。諾穆親。俱已年久。理應更換。著賞給留保住副都統銜。更換伍彌泰駐藏辦事。散秩大臣公慶麟。著授為伊犁領隊大臣。往換福德。副都統舒泰。著授為烏什領隊大臣。往換諾穆親。○又諭曰。永瑞。綿康。父子。前往雲南軍營。俱受瘴氣身亡。雖非陣亡者可比。究屬為公捐軀。情殊可憫。永瑞之弟永澤。著加恩賞給輔國公。○諭軍機大臣等。據周

元理奏。查封革職知府蘇壩原籍家產一摺。據審訊伊子及家人供。蘇壩從前歷任知縣。通判。各任用度不敷。尚有借貸。至乾隆三十七年。陞任鎮遠府後。上年兩次寄回銀四千九百兩。今年又送到銀四千二百兩。通共計銀九千一百兩。除還賑及用度外。實無絲毫隱寄等語。蘇壩歷任縣令。府倖時所入。尚不敷用。自陞任知府後。三次寄回原籍銀。至九千餘兩。因查該府每年養廉。僅一千三百。統

三年而計。尚不及所寄之半。今寄回銀兩。至如許之多。其為浮收關稅。及各項貪婪贓款。已屬顯然。是圖恩德之訪查。參劾實為不枉。而韋謙恒同在一省。漫無見聞。直待督臣入境。始行附名奏。其咎亦無可逭。俟此案審明。再降諭旨。至蘇壩所婪之贓。雖多。但其寄回項內。現貯銀錢。尚五千有餘。各項用度。亦俱能指實。且其事初經敗露。即令該督委員查抄。自不能有風聞寄頓情弊。周元理可無

事推求。統俟貴州任所查抄。具奏到日。再行覈辦。著將此傳諭周元理。並由五百里諭令袁守侗。阿揚阿。知之。○庚辰。

上御懋勤殿。勾到廣東情實罪犯。停決斬犯七人。絞犯六人。餘七十三人。予勾。○諭。昨遣慶麟往伊犁。調換福德。但福德所管。係厄魯特部落。恐慶麟年少。經事未深。著傳諭伊犁國。俟慶麟到任。留心試看。果能辦理裕如。即令伊管。若有不能勝任之處。可於伊犁領隊大

臣內酌量更調一員管理。○諭軍機大臣等。據富勒渾奏。站員冀國勲。虧短銀米一案。若照原奏所稱。冀國勲例外加給夫價口糧。添改糧運。並不詳明上司。任意糜費。至六萬餘兩之多。借軍需為名。從中染指。其情罪甚重。即應在軍營正法示衆。難以姑寬。因降旨。將冀國勲革職拏問。查抄家產。並令該督嚴審定擬具奏。嗣據文綬奏。審明冀國勲。以北

自買驛頭趕運。是該員不但非侵冒營私。且知急公辦事。情有可原。是以於軍機大臣會同刑部覈擬覆奏時。特降明旨。免其死罪。第因未經詳稟上司。予以枷責薄懲。仍留軍營自備資斧。効力以觀後效。朕辦理庶務。一秉至公。遇有應行治罪之案。惟視其人之自取。從不稍參絲毫成見。正今日軍機大臣述旨之時。又據富勒渾奏。冀國勲雇覓人夫。任意加價。擅將帑項借與腳戶三萬餘兩。又置買馱騾。任聽灌縣截留輓運。種種情節甚多。而承審之知府李永祺。並不切實審究。率行定案。相應一併參奏等語。與文綬所審情節迥不相符。而富勒渾摺內。又祇稱該參員避重就輕。反覆狡卸。將虧侵之項。盡作為趕辦軍需用去。各種疑竇。俱未根究確實。咨明文綬。另委員將該府李永祺有無徇縱之處。一併查奏。而並未將冀國勲實在侵虧柄據。一一指出。仍難憑為信讞。朕於匹夫匹婦之獄。尚

不肯畸重畸輕。况係辦理軍需。有關吏治。尤不可不徹底清查。因將此旨未發。富勒渾與文綏素不相協。動輒齟齬。此乃其意見之偏。尚不足深責。此案情節。若照富勒渾所奏。則冀國勲萬無生理。若照文綏所審。則冀國勲又無死法。此等死生出入所關。紀綱法度所在。豈可少涉顛預。致有枉縱。袁守侗。阿揚阿。現在貴州查審蘇壩一案。無難即行訊鞫。盡得實情。著傳諭袁守侗等於查審結案時。即由黔省就近赴川。速將冀國勲之案逐細秉公詳審。務令水落石出。期無偏徇。朕辦理此案。並無成見。袁守侗等奉命往查。自當虛衷準理。使無遁情。斷不可稍存左袒。為他人任咎也。至阿桂現在軍營。此事情節。自所深悉。惟此時正在進兵攻剿。自未暇辦及此事。大功告竣。阿桂即當整旅凱旋。若於過成都時。酌計查辦此事。不致稽誤。郊勞日期。即就便查明。一併覆奏。以便覈其是非虛實。將此由

五百里傳諭袁守侗。阿揚阿。並附軍報。諭令阿桂知之。所有富勒渾。文綏前後奏摺。及軍機大臣會同刑部定議之摺。并昨日所降諭旨。著一併鈔寄阿桂。及袁守侗等閱看。○定西將軍尚書阿桂。定邊右副將軍尚書公豐昇額。叅贊大臣都統海蘭察。副都統額森特。奏。臣等分路統兵。攻克達思里山腿第二三碉。併攻開碉卡寨落五處。所克碉寨悉行燒燬。此時達思里山腿上下碉寨已清。若下至溝邊。將雅瑪朋寨落及科思果木往來路徑。竟行占住。又可添一進取之路。臣等現在督兵。即於所燒各寨落處。拏柵而下。相機攻搶。諭軍機大臣等。阿桂等此次進攻。雖未得賊人要隘。然已將達思里二三碉攻克焚燬。且擬於所燒寨落處。拏柵而下。相機攻搶。阿桂隨地偵探部署。無一刻不切實用心。又且長於籌畫。近亦思迅速藏功。遇有應進之處。自能經理得宜。此時自應及早得手。○以福州

將軍薩哈岱為正白旗滿洲副都統○豁除甘肅山丹縣坍沒鰥潮田地十七頃一十三畝有奇額賦○辛巳

上詣暢春園問

皇太后安○辛圓明園○諭曰昨日恒親王弘旺之子永皓承襲郡王謝恩時經朕詢問竟不能奏對清語再賞賜公爵弘昇之子永澤亦不曉清語伊二人俱係近派宗室其父皆熟諳清語何其子竟至奏對茫然近派王公

等曾有准其奏請隨侍教誨子弟之例今亦並無奏請者伊等不訓子弟又不奏請或僅恃伊門下護衛官員等教導乎試思自己尚不能通曉門下官員又安能責以通曉乎將此通諭近派王公等嗣後各宜加意習學勤教子弟如導訓無人東三省精於清語者頗多許伊等即奏請隨侍再近派王公初未設有族長以致伊等漫無管教至此嗣後各支皆放族長一人令其督催該族子弟習學清

語如仍有玩不學習者除將伊父兄等治罪外并族長一體治罪其如何簡放之處著軍機大臣會同宗人府定議具奏○壬午諭據楊景素奏秦臬司孫廷槐優柔成性雖自守有餘而明決不足凡有發審事件從不提審一任縣府率意拖延實難勝臬司之任等語孫廷槐著以道員用○又諭曰富勒渾秦成都府知府德克進布防守軍營後路總理大板昭糧站並歷次督辦軍火糧石均能穩妥

又候補副將扎史總理梭洛柏古後路一帶放哨搜山妥協無誤間遇賊匪滋擾糧臺飭屬擒殲後路得以寧謐該二員俱為急公辦事勤勞出衆之員等語德克進布扎史俱著賞戴花翎以示優獎○諭軍機大臣等據伊齡阿奏九月間得雨鹽運情形摺內稱揚州地方本月二十二日辰刻起晝夜大雨如注直至二十三日辰刻止地土深透約有四寸四野霑足又稱通泰各場同日亦得雨三四

寸不等各等語。所奏似未盡實。已於摺內批示。如果晝夜大雨如注。則其入土斷不止三四寸。若僅止三四寸。又何得謂之深透。需足恐所稱晝夜大雨及深透之說不免稍有粉飾。未必盡確。著詢問高晉薩載。將自九月以來。淮揚一帶。果否得有透雨。各屬農田是否足資種麥。並此後續得雨澤與否。即速據實詳查覆奏。至通泰海三屬。有無被旱成災之處。實在情形。若何曾否確切查覈。並著速行照例辦理。仍即一面覆奏。將此由四百里傳諭知之。○陝甘總督勒爾謹疏報甘肅迪化昌吉三州縣。乾隆三十四三十七等年。開墾荒地五十七頃有奇。○旌表守正捐軀之湖北宜都縣民姚文遠養女李氏。○癸未上詣暢春園。問皇太后安。○還宮。○諭軍機大臣等。昨青海公禮塔爾出獵被戕一案。因福祿辦理未明。朕遣阿思哈前往。其辦理之法。已諭阿思哈矣。

但此事可疑處甚多。禮塔爾原帶去十一人。夜間賊至。豈竟無一人驚覺。賊即將伊等按住。裹頭細手。其裹頭壓按之時。豈竟無一人見賊狀貌。且同去十二人。只禮塔爾受傷至死。餘止微傷。安知非伊屬下人等有意戕害。捏報。再禮塔爾等十二人。俱被細壓。賊應不少。焉有如許人衆。走山谷曠野。不見蹤跡之理。況據玉魯木扎布等供稱。只拏去伊等馬匹。烏鎗撒袋。並未剥去衣服物件。則其非賊明甚。種種應行研訊之處。福祿皆未深究。將此寄諭阿思哈。到彼詳細嚴訊。務得實情。從重治罪。以昭炯戒。斷不可使正犯漏網。○甲申。諭軍機大臣曰。勒爾謹奏稱。伊至西寧。見福祿奏摺底稿。因自西寧回至安西等語。勒爾謹此回。甚屬非是。福祿辦理此案。只據禮塔爾屬下人等一面之詞。並未研究正犯。勒爾謹身為總督。豈看不出此案疑竇。理宜會同福祿詳細審明。乃以福祿業經具奏。即視

為與已無涉。置之而回。殊不曉事。勒爾謹著傳旨嚴行申飭。此事已遣阿思哈前往。毋庸勒爾謹。福祿辦理。勒爾謹若接申飭諭旨。懼而復返西寧。則尤屬錯謬也。著一併諭勒爾謹知之。○定邊右副將軍明亮。奏贊大臣副都統舒常奏。斯底葉安。為納木迪藩蔽。賊衆死拒。難以力取。查賊人守柵。俱於壕底潛伏。以避迎面大礮。現在相度形勢。於額爾替之西。基木斯丹當噶之下。趕築木城石卡。直接克爾瑪山。箭築起礮臺。緊與賊壕相對。於此多設礮位。隔溝轟摧。則壕內賊不能藏匿。仍於迎面用礮擊打木柵。一俟賊人慌亂。即派兵努力進攻。諭軍機大臣等。明亮奏進攻斯底葉安。未得擬於克爾瑪從旁用礮轟擊。所辦尚好。其法於進攻甚便。朕曾屢降諭旨。令將軍等妥辦。今明亮所籌。與朕前旨相合。自能直擊壕中之賊。使其無從匿伏。我兵越壕而過。便可無虞阻遏。但順壕放礮。以賊人逃

竄出壕為度。若我兵過壕時。鎗礮即宜停止。不可誤放。凡有賊人挖壕守拒之處。果然相度形勢。妥協為之。自屬事半功倍。即阿桂等亦當照此籌辦。○乙酉

上御懋勤殿。勾到福建奉天情實罪犯。停決福建斬犯十二人。絞犯一人。奉天斬犯二人。絞犯十人。餘八十九人予勾。○諭直省滋生戶口。向惟冊報戶部。朕臨御之初。即飭各督撫歲計一省戶口倉穀實數。於仲冬具摺以聞。並繕冊由部臣彙覈以進。蓋仿周禮司民掌登民數。拜獻於王之意。即藉以驗海宇富庶豐盈景象。法至善也。顧行之日久。有司視為具文。大吏亦忽不加察。殺數尚有倉儲可覈。而民數則莫為加增。所報之摺及冊。竟有不及實數什之二三者。其何以體朕周知天下民生本計之心乎。我國家累洽重熙。百三十餘年於茲。休養蕃滋。盛於往牒。且我皇祖恩旨。以生齒日繁。人民永不加賦。其利益

溥閭閻安享昇平樂利阜寧歲計倍有增益詎可不確覈以登紀盛世殷繁之實乎現今直省查保甲所在戶口人數俱稽考成編無難按籍而計嗣後各督撫飭所屬具實在民數上之督撫督撫彙摺上之於朝朕以時披閱既可悉億兆之概而直省編查保甲之盡心與否即於此可察看其敬體而實行之毋怠○諭軍機大臣等據薩載奏到江省被旱地方情形一摺內如高郵寶應等處地屬瀕湖易資灌溉何亦一律被旱歉收前因下河地方低窪易致淹浸是以令將五壩堵閉不輕宣洩勿使有礙民田若當夏秋缺雨之時稍減洪湖之有餘以濟下游之不足於事實為兩便與其令湖水暢出清口徒爾滔滔歸海何如酌計尺寸分潤下河之為愈乎高晉等平日但視洪湖為敵黃之資而不知其可為濟旱之用故未嘗計及於此自屬缺畧著傳諭高晉會同吳嗣爵薩載留心查覈嗣後

或遇下河高寶等州縣稍旱之年應如何酌計分寸開放閘壩以資灌溉之處悉心妥議豫定章程具奏將此由四百里傳諭知之尋高晉吳嗣爵薩載奏嗣後察看洪湖水勢如高堰誌樁長至九尺以上仁義禮三壩應聽其過水下注高寶諸湖以為儲備遇稍旱之年洪湖水小誌樁在九尺以下石脊不能過水而高寶諸湖之水充裕沿湖西鄉地畝足敷沾溉即先將西岸各港口酌開數處灌注入運其運河東岸除高郵之南關車邏等大壩非遇異漲之年仍不便輕議開放其餘各閘壩涵洞均應相機開放分潤下河總以運河存水五尺為度以濟漕運餘水儘歸下河以資灌溉如雨水調勻下河並不需水即毋庸開放分洩得旨覽奏俱悉○巡視西城御史木隆阿黃義尊奏失察書役詐贓釀命之副指揮黃登源請交部議處臣等未能先事查出請一併交部議處得旨此案書役詐贓

致釀人命該巡城御史初據稟報即應一面奏聞一面交部查辦乃經刑部審訊得實明知難免處分始以一奏為自占地步不但其失察難辭並屬有心取巧本隆阿黃義尊著同副指揮黃登源一併交部嚴加議處○以山東運河道陸燿為山東按察使○丙戌諭據阿桂等奏甘肅肅州鎮總兵六十自乾隆三十七年調赴川省軍營頗為奮勉茲因染患傷寒病故等語六十六在軍營四載帶兵打仗尚為出力今因病身故亦屬可憫著加恩照病故總兵王萬邦劉輝祖之例交該部查明議卹具奏○諭軍機大臣等戶部奏據湖北巡撫陳輝祖造送乾隆三十九年賑濟報銷到部內孝感等十九州縣衛被災六七八分極次貧民男婦大小共一百八十七萬五千八百餘名口該部查覈此次賑濟人數過多恐其中不無浮濫因將各該處造報民數清冊覈對竟多至十數萬據實奏明一

摺已依議行矣湖北上年六七月間有缺雨被旱之處據陳輝祖照秋災常例題報隨令其確勘妥辦嗣因新正有應須加賑恩旨詢問旋經陳輝祖覆奏情形不過將應賑之孝感等州縣照常聲敘朕亦不過照例降旨加賑實不知該省被災之特重也朕愛育黎元凡遇極災卹民之事惟恐各省督撫稍存粉飾諱匿致災民或有失所不憚諄諄告誡務令據實妥辦期無遺漏該省上年孝感等處應賑人數既如此衆多其被災不為不重陳輝祖即應將災重人多之故豫行奏聞朕必嘉其實心民事況民數冊即由巡撫衙門彙奏豈戶部事後尚知按籍而覈而該省辦賑轉置民冊於不問乎各省奏報民數大率視為具文隨意增減原不足為確據辦理災賑自不能拘泥此冊致災黎或有向隅但其冊既已奏報即係備朕親覽者而應賑人數題達後朕亦必加披閱陳輝祖何不豫為校對

將人數不符之故。據實奏明。而竟顛預若是。乎陳輝祖實屬非是。著傳旨嚴行申飭。並令其明白回奏。○又諭曰。阿桂等奏。官兵由達思里山腿拏柵。業已下至河沿。將科思果木。與雅瑪朋寨落截斷。賊人不能往來接應。可立時攻克。至賊人當此窘迫之際。尚敢潛出侵擾。實屬可恨。幸官兵防守甚嚴。殲賊甚多。稍足使蟻衆知警。但侵剗營卡。乃逆賊鬼域長技。各路軍營俱不可不實力防守。並須隨時偵察。勿稍疎懈。○吏部議准。浙江巡撫三寶奏稱。請將衢州府屬西安縣縣丞。移駐梓樹潭。處州府屬麗水縣縣丞。移駐碧湖。以資彈壓。均改為在外揀調之缺。應如所請。從之。○奉天府府丞李綬奏。奉天瀋陽書院。向未頒有書籍。坊肆亦少藏書。請將書院充公盈餘銀五百兩。購買士子應讀各書。存貯書院。以資生徒講貫。得旨嘉獎。○以湖南衡州協副將曹順。為甘肅肅州鎮總兵。○丁亥。

上御紫光閣。閱中式武舉騎射。○諭軍機大臣曰。圖思德奏。整欠土目召教。景海土目刁別。遣使目四名。解獻象牙犀角。并具稟懇求代為申憫。其應否遣員伴送進京。請旨遵行等語。整欠景海。兩土司前曾兩次投誠。且經定期六年一貢。是該土司等久歸服屬。自當與內地土司相仿。何以圖思德摺內。尚稱其為外夷土目。並指為緬匪夷目。殊不可解。或該土司等名為內附。仍與緬匪往來。朋比不免心懷兩端。或自投順以後。專心內向。不復與緬匪相通。並著圖思德查明具奏。至該土司等既知依期納貢。並欲令使目瞻仰天顏。自不妨准其來京朝貢。俾知天朝威德。益切畏懷。至革職道員唐宸衡。在滇年久。熟悉邊地夷情。其叅革原案。亦非必不可寬之罪。其人似尚堪驅策。著傳諭圖思德。或即派唐宸衡伴送該使目來京。候朕量加錄用。若唐宸衡現有經手應辦事件。難以遽離。圖思德即另

派委員伴送使目進京亦可。將此由三百里傳諭知之。仍即逐一查明覆奏。○又諭。前因車里土司刁維屏棄職悖逃一案。孫爾桂係專轄總兵。是以將伊革職。勒限緝拏。嗣因逾限未獲。並將伊革任。留滇自効。迄今已逾二年。其革退以後。未知其辦事情形若何。若不過尋常循分行走。即無足深惜。倘能自知愧勵。實心奮勉。猶不至終於廢棄。該員在武職中。尚屬可用之材。其革職之案。亦非必不可原之罪。著傳諭圖思德。將孫爾桂近日在普洱辦事如何之處。即速查明據實覆奏。候朕另降諭旨。尋奏孫爾桂近日頗知愧勵。辦事尚能奮勉。報聞。○戊子。

上御紫光閣。閱中式武舉技勇。○諭軍機大臣曰。韋謙恒奏查繳違禁書籍摺內。稱該省現將繳到禁書。封固發還書坊。俟奉旨後。在外銷燬等語。所辦實屬乖謬。已於摺內批抹。各省查辦違禁之書。屢經傳諭。令各

督撫檢出解京。並經朕親行檢閱。分別查銷。從無在外銷燬者。兩年以來。俱如此辦理。韋謙恒豈不聞知。即如韋謙恒之意。將書封固候旨。亦應封存署內。靜候批示遵行。乃竟將原書發還書局。實無此情理。幸而黔省人心椎魯。或未必有潛留傳播之事。若在江浙等省。聞有應燬之書。必且以為新奇可喜。妄行偷看。甚或私行鈔存。輾轉傳寫。皆所不免。是因查銷應禁之書。轉多流傳底本。成何事體。韋謙恒即係江南人。寧於此等事。亦未計及。且韋謙恒於蘇壩一案。既不能察劾於前。又不知請罪於後。其辦事已屬大錯。今收查遺書一事。乃讀書人本分所應為。何亦茫然不知輕重。若此。看來韋謙恒竟是一糊塗不曉事之人。豈尚堪封疆重任耶。韋謙恒著傳旨嚴行申飭。並令其自行明白回奏。○又諭。前據阿桂等奏到。投出金川番人供詞。均稱聞索諾木、莎羅奔兄弟及頭人丹巴沃咱爾等

相商。若大兵打到噶喇依時。算來無路可逃。惟有聚集大礮內放火。一齊燒死等語。此言斷不可信。賊衆狡獪異常。每為誑言欺飾。況番人性情。與蒙古相似。以經典有自戕之人。永遠墮落。是以不肯輕生。非若山東逆匪王倫。情急自焚者可比。伊等詭稱一齊燒死之言。安知非故為揚布。使官軍聞之。不為防截。伊等於攻圍窘急之際。焚燒空寨。以掩飾耳目。因得乘間易服脫逃。勢所必至。從前班滾燒燬空礮之事。乃賊番等所習聞。自必踵其鬼域伎倆。阿桂等於班滾之事。素所深悉。自不致為其所愚。其餘副將軍叅贊等。亦當深以前事為戒。於攻破噶喇依時。務將逆首索諾木。莎羅奔兄弟。及阿青。阿倉。并有名助惡頭人。如丹巴沃。咱爾等。一一生擒。檻車解京。獻俘誅磔。以申天討。而快人心。設或見賊巢有焚礮之事。尤須各路堵截嚴密。遇有軼出之衆。無論何項服色番人。均即擒獲。逆酋等

自無從漏網。凡我將士。有能擒獲賊酋賊目者。必格外優賞。倘有疎縱。罪亦非輕。各宜凜遵。毋忽。又前閱投番供詞。聞有百姓私議。若頭人肯將土司投獻。不但頭人可以邀恩免罪。即我輩百姓亦得生全等語。可見番衆之心漸散。或可隨時設法誘諭。若頭人中有能縛獻逆酋兄弟。及助惡之丹巴沃。咱爾等來獻者。不但免其抗拒之罪。並當奏聞大皇帝。逾格加恩。如此曉諭。或稍有益。亦未可定。但正辦總當相機儘力進攻。以期迅速。藏事耳。將此隨軍報之。便諭令知之。○己丑。上御太和殿傳臚。賜中式武舉一甲王懋賞。彭朝龍。德成。三人。武進士及第。二甲何異蘭等四人。武進士出身。三甲馬為錦等四十一人。同武進士出身。○諭。今歲畿南一帶。因七月間雨水稍多。低窪村莊。間被淹浸。現據該督查明題報成災之保定文安等四十七州縣。廳照例撫卹賑濟。並將此次被災較重之霸

州永清新城雄縣安州新安等六州縣先於九十兩月摘出賑給貧民已可不致失所第念此等摘賑各戶尤係災黎中窮乏之民惟是大賑定期須在十一月今年孟冬適當置閏此等貧民於摘賑完畢以後距大賑尚需待哺一月未免餬口無資深為軫念著加恩將災重之霸州等六州縣應得大賑即於閏十月開放俾得接濟無缺該督務飭所屬實心妥辦以副朕加惠窮黎至意該部遵諭速行○諭軍機大臣等據戶部議覆周元理題報霸州等五十二州縣被災賑卹一本已依議速行並另降旨將應加摘賑六州縣大賑之期改至閏十月開賑俾極次災黎均得早霑渥澤至本內將喀喇河屯水衝沙壓地畝一體列入未免漫無區別口外山田寬廣所種莊稼大半皆在高坡其瀕臨溪河之地大率皆瘠薄遇山水衝壓為數亦屬無多非口內被水村莊可比本年應辦之處何亦隨

同畿輔九州縣一體具題耶且如乾隆三十五六等年熱河等處被水較重朕即特發帑金派令大臣前往賑卹並不待地方官之查覈即此可見口外各廳之不應入於常例題辦矣著傳諭周元理嗣後口外地方田畝有被水衝沙壓者祇須照例妥辦毋庸增入賑濟案內題達將此諭令知之○加賑直隸衡水嚴鎮富國豐財蘆臺等五縣場本年水災貧戶併蠲緩額賦有差

大清高宗法天隆運至誠先覺體元立極敷文奮武孝慈神聖純皇帝實錄卷之九百九十二

大清高宗法天隆運至誠先覺體元立極敷文奮武孝慈神聖純皇帝實錄卷之九百九十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功七級隨帶加一級尋常加二級軍功紀錄一次臣奏稿

總裁官經筵講官太子太傅文學士文淵閣領閣事稽察欽奉 上諭事件處管理刑部戶部工部事務

世襲騎都尉軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將尋常

敕修

乾隆四十年乙未十月庚寅諭向例派員巡

盛京黑龍江吉林三處由都察院衙門奏派科道其歸化城游牧二處由吏部向各衙門查取通曉蒙古言語人員請旨派往同一奏派巡察而或由都察院或由吏部辦理殊未畫一嗣後此五處差務總歸都察院衙門奏派其應需通習蒙古言語之員即著都察院行文咨取再三年請派巡察之例尚覺太近嗣後著於五年奏派一次不必再行請旨著為令此次盛京等處巡察著於丁酉年奏派

又諭曰僧保身為副都統該處存留蒙古逃犯甚多未能查出實屬無用不勝副都統之職僧保著交部嚴加議處其黑龍江副都統著雅郎阿調補○諭軍機大臣等據龍承祖奏伊族姪龍鳳祥於上年運銅來京曾寄交銀五百八十兩為湊補捐復之用嗣因補放江蘇按察使後將原銀轉交通州知州龍舜琴收存今龍鳳祥既有未清銅觔之案此項銀兩應請勅順天府行文該州龍舜琴提解戶部貯庫等語所奏甚是已交順天府就近辦理矣至運員龍鳳祥因捏報撈獲銅觔一案經戶部叅奏並請行文滇省及江西原籍確查該員踪跡迎提根究旋據海成奏准咨已經兩月該員並未回籍現在沿途查截等語龍鳳祥係滇省試用知縣自應回滇候補或因已經降調亦應回江西原籍不應在他處逗留此案尚非大罪亦不至有中途逃避之事著傳諭沿途各督撫即速飭屬嚴查

龍鳳祥下落派員押解來京交戶部查訊確數具奏將此由四百里諭令知之○蠲免甘肅皋蘭狄道金縣安定會寧撫彝山丹東樂古浪平番寧夏中衛西寧大通肅州河州高臺等十七州縣廳乾隆三十九年水雹霜災額賦有差○豁除撫彝寧夏中衛等廳縣坍沒田地七十六頃三十六畝有奇額賦○辛卯

上詣

雍和宮行禮駐蹕○諭昨因三和從前辦理布達拉廟工程草率將伊子員外郎蘇第察承襲之雲騎尉一併革退但念三和勤慎素著且効力多年若將伊世襲之官即行革去朕心不忍著加恩將伊雲騎尉世職仍令蘇第察承襲○旌表守正捐軀之廣東順德縣民何華靜妻潘氏○壬辰

上至靜安莊視

令懿皇貴妃金棺奉移勝水峪啟行

上命

皇十五子恭送於是月二十六日奉安孝賢皇后陵寢

上還宮○定西將軍尚書阿桂定邊右副將軍尚書公豐昇額參贊大臣都統海蘭察副都統額森特奏官兵連日於達思里山腿極力攻搶下至沿河已將科思果木攔截在內賊衆於此悉力抵禦其與勒烏圍前相對之科布曲山腿賊人恃其險阻守禦不無稍懈轉可乘此進攻查雅瑪朋寨上山包所有雙礮係一新一舊當將礮先擊舊礮已有坍塌現并轟擊新礮擬於三日內發兵攻搶又奏臣等於攻克勒烏圍後令額森特帶兵於轉經樓申爾日礮橋一帶駐劄以便相機攻搶科布曲山腿并防範河西其自梭洛柏古至達爾扎克又至密拉噶拉木已占榮噶爾博勒烏圍一帶山梁為軍糧軍火臺站所經均已順梁分設營卡至勒烏圍以北冷角寺赤布

占等處沿河地方皆設有營卡。直過對岸營卡之北。以此處與沙爾尼兩岸相對。使賊人不能從北繞過。復傳諭額森特加意嚴防。斷不致稍有疎懈。諭軍機大臣等。阿桂等奏攻打科布曲山腳碉卡。並礮轟雅瑪朋寨。上山包雙碉。實為用心周到。前此惟恐勒烏圍後路。或有賊人潛來滋擾。是以屢次傳旨詢問。今據阿桂覆奏。措置尤屬周密。阿桂凡遇攻占賊碉。多係繞道分兵而得。所有節次調度。明亮豈不聞知。何以屢次進攻。輒為賊眾阻遏。就圖中形勢而論。若從教成所守之甲索山梁下攻斯底葉安一路。則自上下壓。較為利便。或可有得。但不宜輕率移兵。致賊人窺見豫防。徒勞無益。○旌表守正被戕之河南夏邑縣民張某妻徐氏。○癸巳。

上御懋勤殿。勾到陝西湖廣情實罪犯。停決陝西斬犯三人。絞犯四人。湖廣斬犯十三人。絞犯七人。餘七十二人。予勾。○諭軍機大臣等。

據勒爾謹奏。巴里坤地方秋收糧石價平。請乘時採買小麥青稞。共一萬石。以備供支。一摺。巴里坤等處現在耕屯廣闢。且值豐收。所得糧石似應足備供支之用。何以尚須採買。看來採買一事。內地定價有限。如直隸等省地方官慮有賠墊。往往非所樂從。口外價值較多。承辦之員利於購辦。是以歲以為請。著傳諭勒爾謹確查是否如此情形。或該處屯田所獲尚不敷用。必須乘價平採買之處。再行確覈據實具奏。至甘省自准捐監以來。各州縣所收糧石必多。自無須再議採買。外省捐監一事實為弊數。是以前經降旨停止。前歲該督以地方應用糧石。自停捐以後。歲需採買。奏請開捐。彼時雖經允行。恐日久難免滋弊。因責成勒爾謹。王亶望二人。實力妥協經理。未知現在所辦若何。勒爾謹近日辦事甚屬糊塗。即如查辦青海扎薩克公禮塔爾被害一案。始則過涉張皇。繼則付之不辦。業

經傳旨嚴行申飭。以此類推。恐於捐穀事宜。亦未能實心查察。著傳諭勒爾謹等。務須嚴切稽查。不可稍涉大意。如辦理畧不盡心。或復顛預了事。任屬員從中弊混。將來經朕訪知。或別經發覺。惟勒爾謹。王亶望。是問。恐伊等不能當其罪也。仍著將現在收捐情形。據實覆奏。並著將此諭令王亶望知之。尋勒爾謹奏。已里坤地方。為新疆孔道。供應浩繁。一歲屯耕所獲。不敷一歲之需。是以歷年俱請採買。以備陸續供支。今查乾隆四十年。民屯所收糧石。以及倉貯舊存。暨新收監糧。並吉布庫等處。馱運糧石。約共四萬一千四百餘石。應備四十一年供支各項官兵。約需糧三萬四千一百餘石。下剩糧不過七千二百餘石。設遇歉收。下年即不敷供應。如俟臨時採買。不惟糧價增長。且恐一時採辦維艱。若由他處輓輸。則運費更倍於糧價。因奏請乘此秋收價平。採買糧一萬石。以備緩急。至自乾

隆三十七年。口外開捐。暨三十九年。內地開捐。截至本年十月止。共捐監生五萬七千五百七十七名。共收糧二百六十五萬四千餘石。除動用糧一百四十五萬二千餘石。外現應存糧一百二十萬二千石。零據各道府盤查。結報均屬實貯在倉。並無虧缺。報聞。○甲午。上御乾清門聽政。○諭據李侍堯奏。粵省審辦內地民人黎奇珍。潛赴安南滋事一案。查取失察出口職名。按其月日。應將前署明江同知嵇璇開叅。而左江道秦廷基。忽赴東謁見。先為窺探游說。希欲通融。酌辦旋據太平府知府程大治。寧明州知州康坦。嶽捏造情節。倒提年月。開送前任同知鄒錫彤職名。及指駁行提復令州役甘華頂冒寫就口供。沿途教導種種舞弊。請將秦廷基。程大治。康坦。嶽革職。嵇璇解任。審訊等語。失察偷越處分。自應按計出口日期。不可絲毫假借。乃秦廷基等。以道府大員。敢於意存袒護。捏造案情。教

供頂冒並於親見總督時面為稟請實出情理之外著照所請秦廷基程大治康坦嶽俱著革職嵇璜著解任交與熊學鵬提集案內有名人證一併秉公嚴審定擬具奏官官相護惡習外省原所不免若遇模稜姑息之督撫未必不以顛預了事李侍堯一經該道面稟即能洞燭其奸徹底根究使情偽畢露據實叅劾實屬公正可嘉李侍堯著交部議敘嵇璜乃嵇璜之弟秦廷基畏朝中尚書膽敢作弊尤非尋常徇庇可比著審明加倍治罪

○四川總督富勒渾辦理糧餉兵部郎中劉秉恬奏查日爾拉山勢陡峻路徑險窄每遇秋冬初春時候冰雪載途背運人夫多致失足行走實屬艱難但該處係西路糧運正道應即時設法開修臣等於本年六月間悉心籌議酌定章程分飭附近各站員合力鳩工修理自山腳至大崖窩兩站道路一律開寬一丈二尺其陡峻處用木石橫攔作成階級

險窄之處一路砌有石牆極為堅厚可無跌失之患並沿路開溝以通水道又將山頂啞口鑿下一丈數尺加工平治以免陡險兼於山腰稍平處所修立板棚五間備往來人夫憩息之地看此情形即往後稍有冰雪而地方開展人力可施亦不難隨時修整查上年十月初間該處道路即已凍滑難行停積米石經臣等親赴該處極力疏通始得通行無誤目下自大加修理之後不但人夫輻輳而來即馬騾馱運亦易現請裁撤北路卓克采一路臺站糧運均由此路運供得旨嘉獎○又奏北路糧運歸併之後數月以來分路加緊趲運西路計自撒拉起至前敵止各站共存米六萬一千八百五十餘石北路卓克采一站存米四千六百一十餘石又自勒吉爾博至沙爾尼前敵止各站共存米三千九百八十餘石又木池覺木交兩站存米一萬三千餘石約敷兩路軍營三月之用且日爾拉

一帶道路又大加修整一律開寬可無阻滯
現在大兵攻過勒烏圍今昔情形又有不同
將前次酌留卓克米一路臺站全行裁撤以
昭省便得旨嘉獎○乙未以翰林院侍讀學
士胡高望為詹事兼翰林院侍讀學士○加
賑江蘇句容江浦六合宜興荆溪丹陽金壇
溧陽甘泉東臺上元江寧溧水高淳武進陽
湖無錫金匱江陰丹徒阜寧鹽城高郵泰州
江都儀徵興化寶應長洲吳縣常熟昭文山
陽清河桃源安東蕭縣海州沐陽如皋鎮江
揚州儀徵蘇州太倉淮安大河等四十七州
縣衛本年水旱災民併蠲緩額賦有差○加
賑安徽定遠泗州盱眙天長五河滁州來安
合肥巢縣鳳陽虹縣全椒建平懷寧桐城南
陵貴池東流當塗蕪湖繁昌廬江壽州宿州
懷遠靈璧霍邱六安霍山和州含山廣德並
安慶廬州鳳陽長淮泗州滁州建陽等三十
九州縣衛本年旱災貧民併蠲緩額賦有差

○丙申

上詣暢春園問

皇太后安○幸圓明園○諭前據刑部奏鎮遠
府知府蘇橋揭告該省督撫藩臬等串通一
氣袒庇劣員席纘一案彼時即疑蘇橋必係
聞上司有將伊奏之信故為先發制人計
圖反噬因違例由驛速遞但事關通省大員
不可不徹底根究因派侍郎袁守侗阿揚阿
前往查辦嗣據署督圖思德奏蘇橋浮收
稅銀勒索船戶客民及得受本地鄉紳餽送
婪贓累累均有證據且稱委員於八月十五
日抵鎮遠查訪蘇橋款跡蘇橋即於八月十
九日用六百里馬遞通揭部科等語果不出
朕所料蘇橋早鄙狡詐目無法紀實出情理
之外即降旨將蘇橋革職交袁守侗等嚴審
定擬具奏至蘇橋在鎮遠府如此劣跡昭著
韋謙恒近在同省何竟漫無覺察待署督入
境風聞訪明列款叅劾則韋謙恒平日所司

何事且僅以會銜附摺了事此後並未提及蘇橋一字實不解其何意因傳旨飭令明白回奏今韋謙恒回奏之摺尚未奏到乃因蘇橋揭稱席纘任內蠹役詐贓逼命及將屯軍酷刑杖斃二案有與伊牽涉之處哢哢剖辯而於蘇橋貪鄙之事仍不置一辭竟視蘇橋貪贓款案若與伊無涉者然其罪實無可逭伊摺內自稱素性愚直不知其竟係優柔取巧此等伎倆豈能在朕前嘗試韋謙恒係朕特加擢用之人乃辦事乖謬若此殊屬負恩溺職不但不可護理巡撫並不可復為藩司韋謙恒著革職發往軍臺効力贖罪其貴州巡撫員缺著裴宗錫調補雲南巡撫印務著圖思德暫行兼署安徽巡撫員缺著李質穎補授安徽布政使員缺著王顯緒補授安徽按察使員缺著農起調補山西按察使員缺著李永艸補授貴州布政使員缺著鄭大進補授湖南按察使員缺著永慶補授其所有

硃批韋謙恒原摺並著發鈔與衆閱看其摺內所辯二案亦著索守侗等一併審明具奏裴宗錫未到任之先貴州巡撫著索守侗署理○以故雲南臨安府屬納樓茶甸副長官司普天民子濟襲職○丁酉諭曰高晉奏推陞廣西平樂協都司之守備陳錦章因患病精力疲弱請勒令休致一摺已批交該部知道矣此等辦法貌似秉公久之不免流弊如其人才具中平或僅勝守備而不勝都司或僅勝遊擊都司而不勝副將該督撫等於各員推陞時據實奏聞自屬公當若年齒衰邁及精力疲弱則平日早應知之何直待其推陞始行劾奏此不過常時曲示姑容為部推之後必須送部引見知難逃朕洞鑒恐干詰斥是以故為此奏以塞責各督撫類此者甚多殊非封疆大臣秉公整飭營務之道著傳諭通行申飭嗣後如仍有似此辦理者必將該督等交部議處○諭軍機大臣等據高晉

覆奏各屬先後得雨情形一摺。看來究未透足。已於摺內批示。如所稱淮安得雨八寸。自屬優霑。其餘各屬。節次所報。僅止一二寸至四五寸不等。何得遽稱深透。朕念切民瘼。每遇農田畧有旱象。即虔求雨澤。並於得雨時。切實體驗。大率五寸以下。於田事未能有濟。不得謂之霑渥。北省尚然。况江南乎。至今夏。江省缺雨。致成旱災。高晉薩載。自應將農田望雨情形。及時據實入告。朕亦得將應行施恩之事。早為籌辦。乃高晉等前此並未切實上聞。殊不能體朕卹災愛民至意。高晉薩載俱著傳旨申飭。仍著將現在應辦賑卹事宜。飭屬妥協辦理。務使災黎均霑實惠。○又諭曰。據軍機大臣議。覆西安將軍傅良等奏。西安滿營原辦馬棚。船隻栽種苜蓿等項銀兩。俟詳細確查到日。另行覈議一摺。已依議行矣。該處建造房屋船隻。未及十年。估變竟不及十分之一。原辦時浮冒情弊。已所不免。至

栽種苜蓿一項。不過墾地布種。無須費工。力何竟用至三千三百餘兩之多。且歸於有名無實。此必當年承辦之員。藉此為名。任意冒銷其弊。不可不徹底查究。軍機大臣初議此摺。俱係照覆經朕面為指示。始如此改議。恐傅良等視為尋常駁查案件。仍以顛預了事。則大不可著傳諭傅良。畢沅即將其中情弊。秉公逐一確查。務令水落石出。據實覆奏。毋得稍涉瞻徇。將此遇軍報之便。諭令知之。○又諭昨經降旨。將鄭大進補授貴州布政使。其湖南按察使員缺。以巴里坤道員永慶補授。現在湖南藩司印務。係鄭大進署理。其臬司印務。係鹽道梁敦書署理。若鄭大進即赴貴州。則湖南兩司事務。乏員辦理。今春永慶來京引見。回任未久。著傳諭勒爾謹。即行轉飭永慶。速赴湖南新任。不必來京請訓。仍接署藩司事務。鄭大進。俟永慶到任後。再赴貴州新任。將此由四百里各傳諭知之。○又諭

昨侍郎高樸自山西查審案件回京召見時
詢以晉省之事據奏已延三曾向伊談及布
政使黃檢才具明練到山西後諸事皆賴其
幫辦按察使農起辦理諸事似有好名之意
等語黃檢原係勇往能事之人朕所素悉已
延三之言自屬公當至農起之是否好名向
未深知或因意見不和故為貶抑亦未可定
但既有此語未便仍令其同在一省已降旨
將農起調任安徽而其人之辦事若何有無
沽名之習不可不切實體察著傳諭李質穎
俟農起到任後留心察看如能實心任事謙
獄持平於司臬自可勝任倘果一味沽名毫
無實際則於地方刑名要務必致貽誤李質
穎即當據實奏聞候朕另降諭旨不可稍涉
徇隱又諭昨因韋謙恒奏摺將蘇橋揭報
之款與彼有涉者哢哢置辯仍未將蘇橋侵
貪之事據實陳奏實屬優柔取巧罪無可逭
已降旨革職發往軍臺効力並將韋謙恒所

辦二案交袁守侗等審明具奏矣今據刑部
奏韋謙恒具題審擬席纘違例折徵杖斃人
命一案擬以流罪請將原題鈔寄該侍郎等
俟其查明具奏到日再行覈覆等語看來此
案情節韋謙恒實不免有袒庇席纘之意為
蘇橋執持把柄是以於蘇橋貪婪累累不敢
據實劾奏而蘇橋則因圖思德入境訪查劣
款叅奏欲為先發制人之舉轉稱圖思德偏
護席纘韋謙恒權莫已操等情砌詞反噬通
揭部科是韋謙恒之袒護席纘咎無可辭而
圖思德則與席纘隔省自不值遂為徇庇也
韋謙恒著暫留黔省交袁守侗阿揚阿將此
情節一併查審如韋謙恒於席纘不過徇情
曲庇則坐臺已足蔽辜袁守侗等於審明定
案後一面具奏一面即令韋謙恒前往軍臺
倘韋謙恒與席纘平日通同交結甚至得受
賕私則應從重治罪袁守侗等亦即據實嚴
叅候朕另降諭旨毋得稍為徇隱將此由六

百里傳諭知之尋袁守伺等奏訊據韋謙恒供本年三月二十六日蘇橋揭報席纘杖斃屯軍并折徵松茂子城石硯三堡米石隨於二十九日據揭參奏六月內奉到部文委道府查審八月初間據該府張繼辛稟稱蘇橋原揭之松茂等三堡折徵米石已經審明詳司今聞德豐等十九堡亦均有折徵現擬請回司詳另辦等語臣復查此案辦理多日韋謙恒何以於奏摺內並不將道府徹詳另辦

一節據實聲敘據供道府徹詳另辦一節因係該員等自行查出實情其初審尚未詳院所以摺內未經聲敘又據原審之佛德張繼辛供稱此案初參韋謙恒係照蘇橋原揭參奏並無刪改情節後訪出十九堡有折徵面稟韋謙恒隨飭飛提犯證務須徹底根究如韋謙恒有徇庇席纘之事正好就初參完結豈肯嚴飭根究將十九堡折徵全行審出各等語查韋謙恒辦理席纘一案雖訊無得贓

徇庇但於蘇橋揭告部科有關於已具摺曉曉致辯而於失察劣員貪婪之咎竟無惶恐請罪一語實為顛倒錯謬負恩溺職罪由自取相應遵旨將韋謙恒發往軍臺効力即委員解送兵部聽候轉發下部知之○又諭本年各省收成豐稔者多惟畿南一帶六七月間偶因雨水稍多致永定河水漲漫溢瀕河近淀之保定文安等五十二州縣廳均被潦成災而霸州等六州縣較重又甘省五月中旬後雨水未能霑足皋蘭安定三十一廳州縣夏禾偏被旱電等災又江蘇省夏秋雨澤愆期句容等四十六州縣衛被旱及蕭縣境內間有被水偏災又安徽省定遠等三十九州縣衛秋禾被旱及宿州靈璧二處臨河地畝被淹均經各督撫陸續奏明題報照例分別賑卹窮黎自可不致失所第念明春正賑已畢尚屆青黃不接之時民食恐不免拮据著傳諭各該督撫確切查明據實覆奏候朕

新正酌量加恩用敷春澤至豫省沁河兩次水漲漫刷武陟縣民坵將附近之張村等三十七村莊河灘地畝被淹雖僅屬一隅偏災但情形亦覺稍重應否一體酌辦之處並著該撫查明奏聞將此由五百里傳諭仍令由五百里馳奏○定邊右副將軍明亮奏贊大臣副都統舒常奏河西進兵道路止有礮占巴扎木扎烏古三處屢經竭力進取賊人守禦甚密斯底葉安一帶亦無隙可乘現將全營滿漢屯土兵下分為六隊每夜輪派一隊於琅谷什扎古等處往攻斯底葉安如有可乘之機即行占據否則亦可使賊疲於奔命而我兵得以逸待勞攻其無備諭軍機大臣等明亮等籌辦進剿情形一摺此事朕曾計及正欲傳諭明亮等今所奏適與朕意相合自應如此辦理明亮等當努力妥為之閱所奏降番木爾甲供詞將幾日前頭人還囑付說你們好好堵擋不過一兩月天朝就准我

們投降等語賊酋等當此窮蹙之時尚敢造為誑語籠絡羣賊此皆從前准令投降故得藉以誑惑番衆今官軍分路進剿阿桂現在乘勝深入指日掃穴擒渠想各土司等自無不共知此意惟助惡黨逆之衆向為逆酋所愚護死力拒自應令屯土兵丁等隨時宣布使衆番知逆酋賊目罪在不赦斷不能復為姑寬若番人此時及早投出尚可貸其一死如執迷不悟一經攻克碉寨凡拒守之賊盡誅無赦如此亦足以破逆酋之計而散衆人之心至官軍進剿則愈當加緊庶賊益知畏懾成功更易○戊戌

上詣暢春園問

皇太后安○還宮○諭軍機大臣等據富勒渾奏文綬審辦冀國勲虧短銀米一案承辦各員並不切實研究致該參員避重就輕反覆狡卸將任意加價擅借侵虧之項盡作為趕辦軍需用去各種疑竇不無徇縱朕以此案

情節若照富勒渾所奏則冀國勲萬無生理若照文綬所審又無死法此等死生出入所關紀綱法度所在豈可少涉顛預致有枉縱不可不徹底查辦因傳諭袁守伺阿揚阿於查審貴州蘇橋之案完結後即由黔省赴川秉公詳審今復據富勒渾奏查覈代辦按察使顧光旭呈送審擬招詳竟將從前道員查禮呂元亮通詳冀國勲所供借給腳戶銀三萬九千餘兩各緊要情節全行刪去并招內所敘查禮原詳詰訊松岡土司頭人等咸稱如果番夫並未領加多腳價豈肯代冀通判捏飾等情查查禮等各詳內番民並無此等詞句俱係憑空添出一刪一添情弊顯然等語此事殊不可解冀國勲所供加價借給腳戶銀至三萬九千餘兩之多若果係捏飾即屬該員藉端侵冒必有存積之處如蘇橋加徵稅銀一案於其原籍景州查出蘇橋在鎮遠府任內前次寄回之銀計九千餘兩自可

為其貪贓之據而冀國勲則經歷查其任所原籍貲財均屬無多即或該員在站時有嗜酒賭博及下賤不堪之事任意花消亦不應費至如許且無難查訪而得今銀兩均無著落確據則前項所虧之數究歸何處不可不徹底根查使案情毫無疑竇總之冀國勲虧短銀米之案其關鍵全在入已與不入已如實係營私肥橐訊有確切憑據即應按軍法立正典刑庶足大示懲創若果因糧運緊急加價雇夫則其咎止於辦理不善又難加以重辟事關罪案出入必當使之水落石出期無絲毫罅漏方成信讞袁守伺現今暫署貴州巡撫印務且蘇橋之案查辦尚需時日所有冀國勲一案即著阿揚阿就近馳赴川省照朕指示情節秉公徹底研訊務得實情此案並無難辦之處一經查審明確即著據實速奏如查出承辦之李永祺顧光旭有瞻顧刪改情弊亦即一面奏聞將該員等革職并

訊阿揚阿不得稍涉偏徇自干咎戾將此由
六百里諭令知之○又諭曰阿桂等奏攻克
達噶木山包賊碉現在設法分攻雅瑪朋碉
寨以便進攻科布曲所辦甚好達噶木為賊
緊要咽喉今官兵既已占據從此進攻自更
得力又奏小金川頭人末利阿什咱同其妻
舅阿噶爾甲投至軍營請暫緩辦理以供軍
營體訪之用所見亦是末利阿什咱係小金
川頭人黨助逆酋帶兵抗拒與既降復叛之
阿噶爾甲情罪均無可逭今阿桂既欲暫留
在營供用或可稍資其力亦未可定設其人
果欲立功自贖實有可藉以誘惑賊衆之機
即酌量賞給頂戴使衆番艷羨亦無不可統
俟大功告成之後將該賊目解京另行辦理
再西路之兵因阿桂屢戰克捷遇敵皆踴躍
直前而北路之兵因明亮經久未能寸進衆
心不免稍阻自當設法鼓舞使人知勵勇効
用方為有益明亮舒常各宜努力自奮○加

賑兩淮石港金沙掘港豐利拼茶角斜富安
安豐梁垛東臺河垛丁溪草堰劉莊伍佑新
興廟灣等十七場本年旱災貧戶蠲緩額賦
有差併蠲緩通州泰州海州三場本年旱災
田地額賦○已亥

上以翼日奉安

令懿皇貴妃金棺於寶城遣官告祭

孝賢皇后陵寢○諭曰綽克托等奏稱土爾扈

特和碩特等現今移牧哈喇沙爾辦理蒙古

事件甚多嗣後印房辦事章京二員貼寫委

署筆帖式三員年滿更換時請將通曉蒙古

語人員揀選派往更換等語著照所請哈喇

沙爾印房章京缺出由京將通曉蒙古人

員揀選帶領引見發往其貼寫委署筆帖式

著於該處通曉蒙古語人員內揀派○又諭

曰綽克托等奏稱庫爾勒之四品伊沙噶伯

克阿爾祖患病難痊請原品休致所賞翎頂

仍令其戴用遣回本城養病所遺伊沙噶伯

克員缺請將哈資伯克額穆爾補授等語。阿爾祖係久在庫爾勒効力辦事之人。今患病不能行走。即著照綽克托等所奏准其原品休致。仍令其戴用翎頂。遣回本城養病。所遺伊沙噶伯克員缺。著額穆爾補授。○又諭曰。據綽克托奏稱。哈喇沙爾大臣現在兼辦土爾扈特和碩特事務。請將從前給發滿漢回子三體字銅印。改鑄兼托忒字銀印等語。著照綽克托所奏。交該部將哈喇沙爾大臣所用之印。改鑄兼滿漢托忒回子字銀印給用。○予故烏喇特扎薩克鎮國公索諾木喇布坦致祭如例。○庚子。

上御乾清宮召土爾扈特新襲郡王車凌德勒克入覲。並召至重華宮賜食。并賜章服。朝珠三眼孔雀翎。○諭軍機大臣等。據袁守侗等奏查審蘇牆浮收關稅銀兩。訊據關書等供出。每年除報解正額外。納餘銀四五千兩不等。並訊明收受周大年家點主餽金各情節。

屬實。現在審明定擬等語。蘇牆侵蝕稅課數已逾萬。其得受所部鄉紳餽金。亦供認不諱。其罪實無可逭。自應將派累客商各款一併審確。從重定擬。以儆官邪。至此項浮收稅銀。據關書等僉供。每年除報解正額七千餘兩外。約餘銀四五千兩不等。三處關口火食束修役食等項。俱於此內支發等語。是此項盈餘銀兩。竟似相沿陋習。若歷任所餘俱係此數。則其弊不始於蘇牆。自未便置已往。

於不問。若蘇牆作俑多收。實屬目無法紀。或因向來有火食等項零星餘款。蘇牆遂借名額外浮收。則是蘇牆加徵肥橐。不可不嚴示懲創。至各省大關稅權。正額之外。例報盈餘。默省向來作何辦理。或聽各員任意開銷。竟不申報。抑或因餘款無多。僅報該上司查覈存案。此等情節。皆不可不逐一訊明。此案既已敗露。自當徹底清釐。使之水落石出。著傳諭袁守侗詳細查明。據實覆奏。袁守侗現署

撫篆所有查審冀國勲一案昨已有旨令阿揚阿就近馳往秉公審辦著阿揚阿即遵前旨迅即赴川可也○辛丑軍機大臣等議奏朱賓朱寶呈請回旗一案查朱賓朱寶原係正白旗漢軍因在巡捕營當兵該旗輒將伊等俱令出旗為民辦理錯誤應將該都統等交部議處至朱賓朱寶俱係朱椒嫡派子孫自應令其回旗當差但伊等於出旗時並未聲明至出有侯爵始請回旗明係覬覦承襲

實錄卷九百九十三

吏

請將伊二人遇有應襲時不准列名揀選得旨朱賓朱寶准其回旗照例當差但遇應襲侯爵時伊二人本身及其子孫俱不准列名揀選至所襲侯爵職分較大著軍機大臣會同該旗揀選帶領引見○旌表守正捐軀之直隸藁城縣民李樸妻李氏○壬寅諭軍機大臣等據裴宗錫奏拏獲逃兵審明正法一摺內稱羅金美本名鍾朝國係昭通鎮餘丁乾隆三十一年八月出師木邦有兵丁羅金

美病故領兵守備溫廷秀即令其頂食名糧三十二年微出龍陵旋即脫逃等語溫廷秀令鍾朝國頂食羅金美名糧並未更改已屬不合及至脫逃乃以原名開報幾致無從弋獲該守備更難辭咎裴宗錫辦理此案自應將溫廷秀附摺叅奏聽該部查明議處乃該撫摺內竟未提及又鍾朝國丁起祥二犯既已審明正法何以並未錄取供詞一併呈覽所辦亦屬未協著飭諭裴宗錫令其查明據實覆奏○命鴻臚寺少卿陳孝泳同南書房翰林行走○以故廣西思恩府屬舊城司土巡檢黃紹子瀚源襲職○癸卯諭軍機大臣等李質穎奏查出山西長治縣人秦功德帶有木做勸化臺上有皇恩普照等字及陰陽尺至心斗等物忠孝圖增福十保等文甚屬不經現在飛提該犯至省從重究擬等語聞進到增福十保文二篇其中並無不法字句尚非邪教可比不過鄙俚勸世文詞藉以哄

實錄卷九百九十四

十

誘鄉愚誑銀錢耳但其語究屬不經自不可聽其流傳蠱惑著李質穎於該犯解到時即行嚴訊如無別項悖逆情節或將該犯枷責遞解本籍收管不許出境或擬以發遣已足示儆不值從重辦理也○署四川總督文綬奏大兵即日竣事軍糧備貯充餘現已停止發運無須再行採辦至今歲秋收尚稱豐稔民間亦有餘糧所有商販米糧應聽其流通為便得旨是該部知道○甲辰

奉先殿

上詰

奉先殿

壽皇殿行禮○定西將軍尚書阿桂定邊右副將軍尚書公豐昇額叅贊大臣都統海蘭察副都統額森特奏官兵攻克達噶木下距雅瑪朋碉寨已為至近但卡布角一帶寨落尚多官兵從此前進必穿寨落中間而過若稍有不應手之處酌徹既難而接續亦為不易必須直搶西里下截山腿則雅瑪朋寨落及

科思果木悉已攔截在內而由們都斯進搶科布曲山梁上之索隆古地方始可進退自如雖該處在西里賊碉迤下但審山巒形勢只須拏住卡柵縱使賊人自上壓下亦可無虞此時既不可稍露我兵有攻取西里山腿之意而一得西里山腿亦必迅拏木柵占據為進搶們都斯索隆古之計庶可出賊不意深入其阻又定邊右副將軍明亮叅贊大臣副都統舒常奏查納木迪官寨屢次進攻總以官兵下至溝底即三面受敵而近西一帶碉寨賊鎗尤難躲避必須於烏岳之前接拏木柵臣等即派珠爾格德等帶兵由烏岳直下趕立木柵二座相距納木迪不過一箭可及現將近西碉寨從中截斷若再接拏木柵二座愈逼愈近則賊人斷不能仍前拒守查納木迪一路賊人悉力以拒其扎烏古山梁必防禦稍疎今綽斯甲布土司土舍情願搜集各寨土兵添同進勦約在此數日內即可

到齊臣等擬將全營滿漢屯土官兵儘數抽調即於扎烏古伺隙以進務期必克諭軍機大臣等阿桂籌辦搶占西里下截山腿並豫備攻奪科布曲山梁情形阿桂實心調度設法進攻實為可嘉而各路之兵亦惟阿桂最為可恃是以盼望尤切但自攻得勒烏圍以來距今已七十餘日雖所至屢有克捷而於西里及科布曲兩要隘尚未攻克朕因此晝夜焦思阿桂自必深體朕心力圖迅速集事

奏奉
聖旨

著
照
所
請

又據明亮等奏於納木迪趕拏木柵圍搶扎烏古所籌尚好賊人屢遇官兵進攻皆豫為暗中抽調賊眾密施鎗石堵拒今既接拏木柵逼攻賊人自不能復如前拒守況於納木迪進攻可進則進否亦可以牽綴賊勢一面令滿漢官兵率同綽斯甲布土兵等搶占扎烏古山梁出其不意自可望得手明亮等各當努力是月江南河道總督吳嗣爵奏前月下旬以後黃水又加長二尺七寸徐城誌

橋連前長至一丈四寸外河老壩口誌橋長至一丈八尺六寸豐碭廳屬丁家集一帶外灘衝刷溝槽毛城鋪滾壩過水尚多督臣高晉就近勘辦挑挖引河刨疏灘嘴以順其勢因黃水未能遽消仍將邵睢廳屬之南岸峯山開照舊啟放以資分洩下游洪澤湖內因正陽關淮水九月底又報長四尺滙歸下注高堰誌橋續長水一尺二寸連前長至一丈三尺山旰仁義禮三壩過水三四尺不等洪湖水勢浩瀚裹河清江以至淮城運河上下水勢甚大平隄拍岸臣先將清口東西壩大加展拓而黃水清水同時並長仍未消退臣復一面將外河王營減壩循例開放使之稍減暴漲之勢一面督率員弁分段巡查實力防護賴天氣晴霽各處水勢漸次平定黃河內已消水一尺八寸上游淮水消水一尺洪澤湖內亦消水四寸一切工程均屬保護穩固目下立冬已逾數日將來水勢自可有消

無長回空漕船渡黃南下者已過行無滯得
旨覽奏欣慰

大清高宗法天隆運至誠先覺體元立極敷文
奮武孝慈神聖純皇帝實錄卷之九百九十三

大清高宗法天隆運至誠先覺體元立極敷文
奮武孝慈神聖純皇帝實錄卷之九百九十四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未閏十月乙巳朔諭軍機大

臣等今日徐績五百里馳遞奏函疑其或有
地方緊要急務隨即拆閱乃係覆奏武陟一
縣被災情形無庸加賑之事已屬不知輕重
前此因成災各省或有應於明春加展賑期
者令其逐一確查由驛迅奏以備新正恩旨
係指新正應行加恩者而言今武陟縣被水
村莊既據徐績稱現賑恤有資明春止須照
例糴借接濟等語是該縣並無應降恩旨之
處不過照常覆奏足矣乃仍拘泥前旨用五

百里馳覆何不曉事若此至所稱毋庸再費聖心之語尤不得體朕於民間水旱偏災原深厯念然遇加恩賑恤止須飭部施行事有常經無勞多煩籌畫徐績毋庸費心之語乃漢軍尋常酬答朋儕俗套何竟入於章奏不亦深可笑耶徐績著傳旨申飭遇該撫奏事之便諭令知之○又諭曰已延三奏查辦冀國勲之弟冀國猷冀國維家貲一摺此案前據富勒渾奏冀國勲例外加增夫價口糧添改糧運任意糜費從中染指覈其情罪即應在軍營正法是以降旨將伊革職拏問並查抄家產嗣經文綬審明冀國勲因北路糧運緊要加價雇夫自買騾頭趕運尚非侵冒軍需其咎止於辦理不善因降旨免死予以枷號示懲仍留軍營効力贖罪次日軍機大臣述旨時適富勒渾復奏到冀國勲一案承審官刪添情節與原奏迥不相符其事不可不徹底清查以成定讞遂命侍郎阿揚阿由

黔省就近前往查審總之此案關鍵全在冀國勲之是否藉端侵冒抑係實發在民方足以定其罪狀如果侵漁入已即應將冀國勲立正典刑冀國猷冀國維家產亦應查辦雖云弟兄分產且所借王恭等十二券皆在乾隆三十五年以前安知非冀國勲豫防事發囑其弟倒提年月詭名寄匿自應訊明照例入官若實有支領買騾確據冀國勲即無大罪祇須將本身財產抵充缺項自不必及其弟兄必須俟阿揚阿審明覆奏到日始能覈定著傳諭已延三將應查之項及冀國猷等暫行看守此時且不必深究統俟結案時另降諭旨定奪○丙午禮部奏冬至節應行慶賀禮得旨奉

皇太后懿旨今年冬至著停止行禮○丁未恩賞旗兵閏月甲米諭八旗兵丁甲米閏月例不支放向雖曾特恩賞給並非常例第念京師五方聚集食指浩繁兵丁所得甲米糴殮

自給之餘。或將剩米出糶。尚可潤及閭閻。數十萬戶。仰資其利。現在正逢閏月。例無應放之米。兵民口食。未免拮据。著加恩賞給閏月甲米。即於本月十五日開放。其十一十二兩月放米之期。並著移於每月十五日。明歲新正以後。仍循其舊。則禦冬度歲。更得饒裕。市價亦可藉以益平。於兵民生計。均有裨益。嗣後凡遇閏月。俱照此一體實給甲米。俾各永霑實惠。著為令。該部遵諭速行。○又諭曰。原

任廣州將軍拜靈阿。前在古州總兵任內。總辦解送滇省馬騾。所有應賠倒斃銀兩。伊名下應賠銀五千四百餘兩。乃希圖僥倖。具呈行查。甚屬卑鄙。不堪拜靈阿著革職。交刑部治罪。○又諭曰。吳嗣爵題歲報河道錢糧一疏。尚係乾隆三十七年分動支收存之數。辦理太遲。河道錢糧等項。例應按年造報。原欲周知一歲河道工程之多寡鉅細。以憑覈實稽查。即云俟各司道陸續造送。查覈需時。

則三十七年之案。亦應在三十九年正月出本。斷無查辦不及之理。今乃遲至四十年冬間。具題中間。幾閱三載。實屬遲延。吳嗣爵著交部議處。嗣後河工歲報錢糧。俱著次年全數查明。於第三年正月間開印後具題。如有逾期。該部即查明叅奏。○蠲免雲南浪穹。鄧川二州縣本年水災田地額賦有差。○戊申諭據伊勒圖奏。署總兵喬照辦理屯田事務妥善。著有勞績。或坐補涼州鎮總兵實缺。或賞戴孔雀翎之處。請旨定奪等語。喬照在伊犁三年以來。辦理屯田事務妥善。著有勞績。著即照伊勒圖所請。補授涼州鎮總兵。俟再出力數年。請旨賞翎。○已酉

上御太和殿視朝。文武陞轉各官謝恩。○諭軍機大臣等。嘉謨奏查辦舍軍僉丁一摺。內稱徐州衛指揮裔汪有年。捏稱前已出籍為民。查無確據。且現有衛籍備僉之案。則其捏報圖脫無疑。又浙江嘉湖衛舍軍陳玉垣業已

具認入冊乃伊父原任壽光縣知縣陳鵠復
曉曉呈辯致有陶升安等聞風而起現在嚴
檄江浙二省司道覈實辦理等語所辦甚是
運軍僉丁一事既經徹底清查則冊籍有案
之人均當按次承僉豈容復有倖免至陳玉
垣父陳鵠曾任知縣尤非齊民不明法令者
可比乃敢以舍軍不應入冊強詞控辯致各
戶聞風效尤更屬恃符違抗該員隸籍浙江
著傳諭三寶即行查明叅奏其嘉湖衛丁陶

升安彭應求黃揆典項廷軾各戶並著三寶
秉公查辦確覈具奏至徐州汪有年捏報給
牌出籍緣由著諭令高晉薩載即速飭屬嚴
查覈辦毋任藉端脫漏將此并諭嘉謨知之
又諭據薩載奏請粵省遣發各省廠犯面
上刺明廠徒二字以防脫逃等語此事不可
行已於摺內批示矣安南逃回廠徒業經李
侍堯熊學鵬等會覈案情分別情罪輕重辦
理所有為首各犯已於該處正法其餘情節

更重者發往伊犁次重者發往烏魯木齊安
插至分發內地各省人犯原不過隨同附和
尚非桀驁犯法之徒可比第恐留於本地或
致日久故智復萌是以酌令離其鄉土俾不
能復行越境滋事解到各省後止須分別地
方安置飭所在該管官嚴行約束勿使生事
脫逃設有膽玩潛竄者拏獲即從重懲治通
行知照分發廠徒省分伊等自不敢輕干憲
典若無故遽行刺面處置未免過當且此廠

徒通計不下二三千勢難遍及而已發烏魯
木齊之人尚令撥地屯種聽其遷善自新又
豈可悉行黥面乎若云刺字所以防其逃逸
則各省軍流遣犯報逃者頗不少則刺頰又
何益乎惟在督撫等嚴飭地方實力管察有
犯必懲方為妥善何必苛法峻防之著詳晰
傳諭薩載即遵朕旨妥辦其有安插廠徒省
分並兩廣督撫一併諭令知之○予故青海
多羅郡王袞楚克敦多布納木扎勒致祭如

例○庚戌

上御懋勤殿勾到浙江江西安徽情實罪犯緩決浙江斬犯九人絞犯二人江西斬犯二人絞犯二人安徽斬犯一人絞犯二人餘七十二人予勾○諭軍機大臣等據高晉奏現在丁家集防護籌辦情形一摺稱黃水大局已定即下游洪灘二河漫水堵閉尚易惟毛城鋪過水年甚一年本年尤為異漲丁家集形勢日見南趨若不豫為籌辦來年汎水漲發難免全河旁注等語此事甚有關係毛城鋪原以宣洩黃河盛漲而減下之水藉有倒勾河以殺其勢故下游不致有害今既唐家灣引河連年河唇高仰不能暢洩而丁家集迤下日生新灘恐有吸溜之虞此實不可不早為籌辦現據高晉於丁家集對岸開挑引河俾溜勢北趨全河改由北岸東下並大挑倒勾河以資分洩所辦甚是高晉等務即將應行籌辦工程確切勘估實力妥速為之並將

該處河形及現辦各工詳悉繪圖貼說具奏又據稱五壩被風浪掣開三壩已督率防護無虞並稱即赴清口查勘酌放湖水分潤下河各等語此事辦理已遲五壩定誌不令過水原指尋常保護下河而言如今年高寶一帶夏秋缺雨民田灌溉無資自應酌量機宜稍減洪湖之有餘以濟下河之不足於事兩有裨益且使早為開放則洪湖之水不致過多何致有掣開三壩之事高晉等實不免拘泥成例不知變通而此際始議分潤下河為時較遲民田已不能資其利高晉等今年辦理之誤不可不知但現在悔已無及嗣後當引此為戒隨時留心籌畫節宣得宜據實奏辦勿貽膠柱鼓瑟之譏致有再誤又上年因微山湖存水較小經姚立德奏開挑潘家屯引河挹注濟運並令高晉會同勘辦業已著有成效今年既尚須引放不趁此黃河水大之時多為引蓄既可濟來春重運且湖內貯

水稍多又可省明冬再引高晉當與姚立德
札商妥辦至黃水所過之處必有沙泥停積
日久易致淤墊並當隨時疏濬以期有利無
害此則姚立德所當實力經理著傳諭高晉
吳嗣爵薩載一體遵照並令姚立德知之仍
各將籌辦事宜即行覆奏尋高晉吳嗣爵奏
丁家集一帶黃河曩走北岸因年久河勢坐
灣溜向南趨北岸河形漸成平陸長出新灘
以致本年南岸外灘民堰被衝漫水寬廣毛
城鋪過水較大下游不能容納若不於今年
籌辦妥協來年汎水長發勢必全河旁注所
關匪細近日水勢漸次歸槽南岸漫塌民堰
計長五百餘丈若從兩堰頭起用埽接築未
免工費浩繁今就臨河灘面所衝溝槽四道
共寬四百二十餘丈分頭堵築事半功倍仍
補還民堰一道計長一千三百六十六丈以
資攔禦此係民修之工應照例責成民辦一
俟堵閉斷流則毛城鋪迤下之洪灘二河立

見消涸凡有缺口均可掛淤堵築甚易為力
至來年毛城鋪過水須由唐家灣分洩該處
係屬倒勾河且在丁家集迤下不致掣溜有
礙下游祇以該河頭形勢欠順河唇高仰不
能收分洩之益今擬將河頭改正測量河唇
一帶引渠淤墊者計長一千八百二十餘丈
應一律挑深六七八尺不等寬以八丈至十
丈為度臨黃築以草壩以資收束即使盛漲
時亦不至刷寬口門其北岸外係嫩灘挑挖
引河難以施工且形勢仍屬兜灣應於靠裏
舊日黃河故道直開挑引河可成吸川之勢
計長一千一百六十丈挑深七八九尺不等
挑成後冬底水弱開放不能掣溜應於來年
汎水長發時相機開放俾全河改由北岸則
南岸之丁家集一帶更可保無旁注之虞而
毛城鋪啓閉機宜亦可操縱由人節宣有制
得旨覽奏俱悉○辛亥

上詣暢春園問

皇太后安○幸圓明園○諭曰御史尹壯圖奏保定等州縣於十一月開賑請飭選滿漢科道十員前往分查驗放一摺所見非是地方水旱偏災賑濟各省皆有惟在辦賑之員實心經理督撫司道實力稽查遇有吏蝕官侵隨時秉公叅處則貧黎自得均霑實惠奸胥亦無從剋冒分肥尹壯圖以地方官應辦之事而今科道紛紛鈐制無此政體且他省又當如何朕加恩災黎豈有遠近之分耶尹壯

圖迂謬無識所奏不可行原摺著擲還並將此通諭知之○軍機大臣議奏將軍阿桂酌籌善後事宜一摺查邊外各土司令仿照回部伯克之例輪流入覲以理藩院為之典屬俾擴充知識以革其獷悍之風據阿桂奏布拉克底土司腿患癰瘻巴旺子幼未襲係土婦管理不能進京外其木坪瓦寺明正沃克什各土司率皆傾心向化懇請入覲應同綽斯甲布土司均令將軍阿桂於凱旋時先行

率帶來京共與盛典其餘各土司仍令酌量遠近定以年限輪流朝覲又查川省口外各土司向隸地方文武管轄今令於促浸償拉之地各設鎮駐兵則附近土司自當有所專屬特設將軍駐劄近邊與總督提督同理番務其各土司應辦事宜仍隸之理藩院總統不必如從前之專隸地方文武則體統既尊易於控制再向來駐防將軍皆不兼轄綠營今番地既分布鎮協特設將軍臨邊控制綠營將士若僅屬提督恐將軍呼應不靈令將提鎮各標所轄綠營統聽將軍節制應令將軍等遵照妥辦從之○定邊右副將軍明亮叅贊大臣副都統舒常奏現於納木迪趕立木柵更擬於扎烏古添湊土兵伺隙以進令霍爾甲阿咱拉帶同投番八名乘夜由沿河深入躡探道路現飭土司雍中旺爾結催調各寨土兵趕緊前來務將扎烏古剋期搶占諭軍機大臣曰明亮等奏逼近納木迪接拏

木柵並密躡道路剋日進攻所辦尚好。看來明亮等軍營近日大有起色。益當勉力為之。今阿桂等現擬攻勦西里科布曲要隘。自可即期得手。明亮復乘機而進。兩路並攻。賊勢必更窘迫。官軍成功尤速。其霍爾甲阿咱拉及投番八人俱甚出力。明亮當量為賞賚。以示鼓勵。至索諾木兄弟不和。節次降番供詞如一。並有稱其將異母兄弟留於噶喇依。以備事急獻出求饒者。尤為可惡。索諾木罪大

惡極。雖寸磔不足以蔽辜。乃圖於勢窮力竭之時。將其異母不和之兄弟縛獻了事。以為倖免之計。其居心狡惡如此。更屬覆載所不容。索諾木負恩反噬。實此事罪魁。莎羅奔雖黨惡當誅。然不能僅戮此數人。轉貸索諾木之死。設或索諾木竟將莎羅奔兄弟縛獻。將軍等惟當留心防備。不使藉詞施計。仍一面將莎羅奔兄弟拘留。一面設法掩擒索諾木。並益加奮勉攻勦。務期掃蕩巢穴。搜捕兇渠。

勿使兔脫漏網。○壬子諭刑部等衙門議覆侍郎袁守侗等查審蘇橋侵匿稅銀等款。照侵盜錢糧擬斬。并請旨即行正法。於定罪尚未允協。向來侵盜錢糧之罪止於斬監候。蘇橋欺隱稅課雖多至一萬二千餘兩。但外省似此侵貪者亦所常有。俱係照例問擬。不必因此將蘇橋獨行加重。而蘇橋必不可逭之罪則在探知該督欲將伊贓蹟叅劾。輒捏砌虛誣之款。計圖陷害上司。擅用六百里揭報

部科為先發制人之計。其乖張傾險實出情理之外。當今政治肅清。豈容有此儉邪之臣子。蘇橋著照法司所擬即行正法。至韋謙恒護理撫篆。與蘇橋止在一省。乃於其侵課婪贓之事漫無覺察。直待圖思德巡查入境。據實叅奏。韋謙恒僅以附銜了事。已屬昏憤。轉因蘇橋揭內有干涉伊審案之語。輒復曉曉奏辯。而於不早查叅蘇橋之咎。不置一辭。其獲罪乃在於此。是以將伊革職發往軍臺効

力贖罪。朕辦理庶務一秉至公。輕重惟視其人之自取。將此通諭知之。○山西巡撫巴延三疏報輔國公寧昇額等家。乾隆三十九年開墾牧廠地一百一頃十三畝有奇。○癸丑吏部議准御史孟生蕙奏稱學習進士期滿留部之後。應照報滿日期先後行走。年分淺深以次挨補。其同時報滿行走並無間斷者。按科分甲第名次題補。應如所請。從之。○甲寅

上詣暢春園問

皇太后安。○還宮。○乙卯諭曰。鄂忻在和闐已滿三年。德風著。加恩賞給四品頂戴。自備資斧前往和闐。換回鄂忻。○諭軍機大臣等。據高樸楊景素奏查審范縣民人孟興璧首告劉昌吉等邪教惑眾一案。親赴范縣將所控人犯按名拏獲。搜查各犯家內。並無經卷圖像及違禁不法物件。惟劉昌吉之妻陳氏供伊母曾學真空家鄉等歌句。現在隔別研審。

務期徹底澄清等語。學習歌句固邪教之所由起。若無誦經設像糾眾騙錢諸款證。難遽坐以邪教之罪。自不值從重辦理。而此案緊要關鍵全在孟興璧所控之割取髮辮及被割雞翅牛舌等物。應從此嚴切根究。若訊明割辮等事確有憑據。即當將被控之犯重治其罪。不可輕宥。并從前割辮之事亦當向彼根求盡獲匪黨。以申法紀。若訊明毫無影響。自係孟興璧捏詞妄控。即當訊其因何挾嫌

緣由。將孟興璧擬以誣告反坐。使奸頑知所儆戒。其曾經傳習歌句之犯止須枷責示懲。勿使株連拖累。將此由四百里傳諭高樸楊景素知之。○軍機大臣會同宗人府奏請簡派宗室族長得旨著誠郡王弘暢為淳度親王。怡賢親王誠恪親王和恭親王等四支族長裕親王廣祿為恒溫親王。簡靖貝勒允禧恭勤貝勒允祐貝子允和等四支族長莊親王永瑞為誠隱郡王。貝子品級允祇莊親

王等三支族長理郡王弘聰為理密親王一
支族長貝勒永福為貝子品級允禔果毅親
王二支族長貝子弘旰為恂勤郡王愉恪郡
王二支族長○丙辰

上御乾清門聽政○御懋勤殿勾到江蘇河南
情實罪犯停決○蘇斬犯五人絞犯七人河
南斬犯九人絞犯六人餘八十六人予勾○
諭曰周元理奏據宣化府哈靖阿稟揭所屬
懷安縣知縣李千齡因該縣徒犯脫逃致該

府辦差未邀議叙今為代捐加一級據實具
稟請旨將李千齡革職等語周元理所奏甚
是李千齡借端代捐加級取悅本府實屬逢
迎取巧著革職其代捐加級並著註銷外省
似此逢迎上官者諒所不免上司若稍不持
正方以其為善於取悅而劣員遂藉此把持
結交於吏治官方所關匪細哈靖阿能據實
揭報甚屬可嘉著加恩賞加一級以示獎勵
○又諭昨閱吏部開列翰林院侍讀學士詹

事府右庶子員缺兩本侍讀紀昀俱未與應
陞之列吏部因其有降級留任處分是以扣
除固屬照例辦理但念紀昀於四庫全書總
纂事務實屬盡心出力嗣後遇有該員應陞
缺出著加恩准其一體開列○諭軍機大臣
曰阿桂奏探得西里賊寨上有黃草坪一處
若突然搶占下壓自易所籌甚好○邇日想已
得手看來賊衆勢已慌亂官兵若能即將西
里攻得不但科布曲之賊可不攻自潰其餘

則朗噶克了口等處自皆可乘勝席卷番地
冬令天氣多晴阿桂務須趁此時努力為之
又另摺奏底木達抽兵七百餘名美諾抽兵
四百餘名俱令其赴明亮軍營聽用前據明
亮等奏現在設法進攻納木迪一帶正需兵
力若新調之兵到彼明亮等即能統率前進
攻克賊碉固屬甚善設或攻勦未能即克仍
如前坐守則是將有用之兵置之無用之地
又不如今此一千一百餘兵仍赴阿桂軍營

添助聲勢於事更為有益。倘明亮一路實需此項兵丁應用，不能再赴西路。阿桂或酌於美諾一帶後路除防守要隘外，尚可抽兵千餘令赴西里一帶備用。自屬更捷。若難以再調，亦不必勉強從事。轉致留防之員得以藉口。此事著交阿桂熟籌妥辦。○兵部奏揀選武舉三等以衛千總用者缺少，班多難以銓補。請嗣後揀選以衛千總推用之武舉，如有年力壯盛，情願入伍効力者，准照武生食糧之例於會試年報部考驗，照隨營額數補足。分發各該督撫提鎮給與馬糧一分，令其効力三年。如果弓馬漢仗可觀，遇有把總缺出，准其與外委馬兵一體較拔從之。○調正白旗滿洲副都統託雲為阿勒楚喀副都統。○陝甘總督勒爾謹疏報甘肅高臺縣乾隆三十五年開墾荒地五百十畝。○旌表守正被戕之廣東嘉應州民葉登禮女葉氏。○丁巳諭十五善射自有專管王大臣與兵部無涉。

嗣後挑選十五善射之時，著該王大臣承辦，不必由兵部辦理。○豁除江蘇鎮洋蘇州二衛占廢坍沒田地二頃十一畝額賦。○戊午上御懋勤殿，勾到山東山西直隸情實罪犯。傳決山東斬犯二人，絞犯二人，山西斬犯一人，絞犯一人，直隸斬犯二人，絞犯七人，餘七十人予勾。○諭軍機大臣等，明亮等現在攻打納木迪，連日用礮轟摧賊寨，看來明亮軍營近日漸有起色，自可即望克捷。阿桂現攻西里等處，可期即克。若明亮復能將扎烏古一帶攻得，乘勝深入，賊勢必更窘蹙，自可迅速藏事。各路將軍參贊等層層攻勦，籌畫宣勞，將士等亦俱奮勇出力，深為廛念。適盛京進列野雞鹿肉，皆將軍等在外所不能得者。今寄賞阿桂、明亮、富德三路將軍各一分，以示優眷。○以右春坊右庶子陸錫熊充日講起居注官。○調正黃旗蒙古副都統普爾普為正白旗滿洲副都統，以內閣學士博清額

為正黃旗蒙古副都統○已未諭據戶部議
鳳陽關監督棟文短少稅銀一摺請交高晉
派委明幹大員赴關查覈之處自屬照例辦
理但該關實在短少情形是否因光州固始
一帶秋收偶歉致過關船隻無多或係上年
辦理不善是以商販裹足不前遂致遞形短
絀抑或棟文不能實力經理所致李質穎向
曾經管鳳陽關務自所熟悉前曾諭令幫同
棟文妥辦即著該撫親往該關詳細確查務
將實在短少緣由據實覆奏至棟文已請將
缺少銀兩自認賠補所有自請交部議處之
處著加恩寬免○予故阿巴噶扎薩克郡王
車凌旺布祭如例

大清高宗法天隆運至誠先覺體元立極敷文
奮武孝慈神聖純皇帝實錄卷之九百九十四

實錄卷之九百九十四

幸

大清高宗法天隆運至誠先覺體元立極敷文奮武孝慈神聖純皇帝實錄卷之九百九十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書兼領滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未閏十月庚申

上御懋勤殿勾到朝審情實人犯停決斬犯十
二人絞犯十七人餘二十三人予勾○以侍
講學士褚廷璋充日講起居注官○辛酉諭
軍機大臣等朕昨檢閱各省呈繳應燬書籍
內有僧澹歸所著徧行堂集係韶州府知府
高綱為之製序兼為募資刊行因查澹歸名
金堡明末進士曾任知縣復為桂王朱由榔
給事中當時稱為五虎之一後乃託跡縹緲
藉以苟活其人本不足齒而所著詩文中多

悖謬字句自應銷燬高綱身為漢軍且係高
其佩之子世受國恩乃見此等悖逆之書恬
不為怪匿不舉首轉為製序募刻其心實不
可問使其人尚在必當立寘重典因令查閱
其家收存各種書籍今於高綱之子高秉家
查有陳建所著皇明實紀一書語多悖謬其
書板自必尚在粵東著傳諭李侍堯等即速
查明此書板片及所有刊印之本一併奏繳
又查出喜逢春傳奇一本亦有不法字句係

江寧清笑生所撰曲本既經刊布外間必有
流傳該督撫等從前未經辦及想因曲本蒐
輯不到耳一併傳諭高晉薩載於江寧蘇州
兩處查明所有刷印紙本及板片概行呈繳
高綱為澹歸作序朕於無意中閱及可見天
理難容自然敗露其子高秉收藏應燬之書
即或前此未經寓目近年來查辦遺書屢經
降旨宣諭凡繳出者概不究其已往今高秉
仍然匿不呈繳自有應得之罪已交刑部審

辦此專因高綱為八旗大臣子孫其家藏有應燬之書不可不示懲儆。至陳建在明天啟間即清笑生似亦明末時人其兩家即有子孫均可不必深究。設或民間尚有藏者但經獻出均可免罪。將此由四百里一併諭令知之。○壬戌諭今日御史王寬奏請將各省秋審經九卿改輕改重之案酌定處分一摺所奏甚屬非是。朕辦理庶獄一秉大公至正即有更改惟在準情酌理務得其平從不存絲毫成見。至每年辦理各省秋審俱經細閱數次其中稍有一線可原者臨時即不予勾。或各督撫有開擬失當經九卿改正者朕量其改駁案件少者傳旨申飭多者或交察議其事亦只可如是而止。即如今年四川省改駁多至五案亦止將署臬司顧光旭嚴加議處而署督文綬尚因其承辦軍糈特予從輕。此衆所共知者乃該御史欲請將秋審改多之案明定處分此必私心揣測妄以朕為有意

從嚴若果行其說其無知之督撫自皆避寬縱之名共思從重以免過勢必致失入者多於民命所關甚鉅。國家設立刑章辟以止辟聞尚德緩刑未聞尚刑緩德。王寬此奏斷不可行。向來御史每遇給事中缺出時多有封奏事件希冀轉科朕用人自有權衡豈以一言為去取况身為言官藉以干進亦為諸臣恥之。同日李殿圖請陸續刊刻開國方畧一摺此書現在纂輯告成後自當敬謹刊行若纂辦未完豈可零星刊布然所言不過書生迂見尚不足深責是以止將原摺發還而王寬之奏為明刑大體所繫不應妄陳若此著交部議處將此通行傳諭知之。○諭軍機大臣等會同戶部議駁勒爾謹等奏請烏魯木齊採買糧石一摺已依議行矣。烏魯木齊近年屯糧充足現據該部覈計用存餘糧及新收捐監糧石除支用外已屬有盈無絀即該督等所稱金川凱旋官兵及換防官兵路糧

為數亦屬無多何得藉詞採買向來內地各省因定例糧價無多往往憚於採買而新疆糧價較昂購買頗有餘利是以地方官樂於從事圖沾微潤前於勒爾謹奏請巴里坤乘時採買一摺已傳諭令其據實覆奏今烏魯木齊耕屯所在糧石足以供支況有捐監之穀可敷接濟何以復為此請著傳諭勒爾謹即行明白回奏○定邊右副將軍明亮叅贊大臣副都統舒常奏扎烏古第一條山梁經官兵占據其第二山腿在隔河勒烏圍之北第三山腿與勒烏圍相對下與阿爾古相接非惟碉卡層密且沿河一帶俱係懸崖賊人俱據險以待惟查兩山腿中間夾有深溝有一線可通之路必須攀崖附葛而行雖極為冒險諒向來賊人力量不過能守一面或轉可以出奇制勝隨令奎林和隆武阿爾薩朗等挑選兵丁分為三路加派可信投番在前引路密從溝內進發仍於迎面派令都爾嘉

等攻取扎烏古上截山梁珠爾格德等攻取扎烏古下截山梁尚有四處碉卡派叅領額爾伯克侍衛進財保分為兩路攻取臣等率同前進德赫布及噶塔布等先於什扎古琅谷兩處統眾努力攻撲賊人方當放鎗滾石而奎林和隆武已由溝內直上山頂賊人於設想不到之地忽見此一路官兵先已慌亂所有第三條山腿碉卡隨到隨克而都爾嘉珠爾格德即乘勢分搶碉卡額爾伯克進財保亦將山半碉卡全行攻克各路合兵復分為兩路一由扎烏古上攻直至相近日斯滿而止一由扎烏古下壓直至相近阿爾古而止諭軍機大臣等據明亮等奏官兵將扎烏古山梁全行攻克明亮舒常如此奮勉庶覺畧增顏面現在正可乘勝深入而納木迪斯底葉安等處攔截在內並可不攻自潰此一路官兵聲勢日盛大有起色至逆酋索諾木常在甲雅賊寨居住其地在河之西與明亮

軍營相近明亮等將河西一帶碉卡勦蕩肅清之後若能統兵徑赴甲雜攻圍賊寨將索諾木及其得力頭人概行擒縛其功亦不為小庶可與阿桂等同膺渥眷明亮等當努力為之○以故翰林院五經博士張大經孫廷鼎襲職○癸亥諭軍機大臣等昨因高秉家內查出皇明實紀一書內多悖逆字句應行銷燬其書係東莞人陳建所著已諭令該督等細查所有刷印之本及刻板一併奏繳是

書又名皇明通紀恐刻板或有兩副應一併查明繳進至僧澹歸徧行堂集語多悖謬必應燬棄即其餘墨蹟墨刻亦不應存著李侍堯等逐一查明繳進并將所有澹歸碑石亦即派誠妥大員前往推辟推仆不使復留於世間又聞丹霞山寺係澹歸始闢而無識僧徒竟目為開山之祖謬種流傳實為未便但寺宇成造多年毋庸拆廢著李侍堯等即速詳悉查明將其寺作為十方常住削去澹歸

開山名目官為選擇僧人住寺經理不許澹歸支派之人復為接續該督等務即妥辦覆奏所有高秉家查出澹歸詩集及各種墨刻並著鈔寄李侍堯等閱看此外或有類此者並著一體查辦將此再行傳諭知之○軍機大臣議覆據署四川總督文綬奏稱查凱旋官兵共七萬餘人除留駐促浸儻拉地方及滇省官兵由達木巴宗出木坪一路至雅州水路回營外其餘各路軍營滿漢官員兵役

俱應由美諾卧龍關撤回至桃關進口通計約五萬餘人口外沿途支應口糧不可不早為豫備查自桃關以外之大包壇起至卧龍關以內之二道橋止共八站自卧龍關起至資哩以內之木耳站止共九站約計每站需米五六百石方足應付臣現飭派桃關卧龍關米各五千石上緊運交令該二站將現存額夫日逐接遞以桃關之米滾運卧龍關以內各站卧龍關之米滾運資哩以內各站至

木坪一路臺站久徹應先於蘆山縣運貯米三千石俟馬尼官兵會合時調徹南路站夫分安木坪一路即可將此項米石就近滾運供支不致有誤至口內沿途支用口糧止須飭令地方官就近備辦毋庸另籌運貯應如所請得旨依議速行○署四川總督文綬奏滇黔二省辦運京局銅鉛攸關鼓鑄自應實力催趲查滇銅自瀘店領兌開行由重慶換船至四川巫山縣出境例限九十五日黔鉛

自永寧運至渝局鎔化換載至四川巫山縣出境例限六個月零十五日歷來運船雖俱依限具報護送然每多逾限不能迅速進行推原其故大率藉守風守水為由地方各官不能切實催趲所致若不嚴立章程終恐有名無實應請嚴定例限守風不得過四日守水不得過八日倘間遇江水異漲有實在不能依八日之限冒險開行者令該道府大員察驗實在情形出具印結報查庶不似從前

任意捏混如運員無故逗留地方官弁徇情代為捏飾隨時嚴叅議處庶幾各有責成不敢任意稽緩得旨知道了實力妥行毋為空言○兩江總督高晉江蘇巡撫薩載奏民間攬用小錢奉旨折半定價立限收買在案茲自三十八年中秋節起四十年端午節止行之又已二年查江寧等八府三州所屬每節收買小錢自一二百觔至三四十觔不等并有偏僻州縣全無收買者察看所收小錢輪廓光圓俱非近日新鑄偽號鉛錢已無一見平日市肆交易行使盡係制錢是三節收買行之實有成效伏查江寧蘇州揚州等處係南北通津商賈輻輳前於收買小錢限滿後臣等恐外來商賈夾帶隱匿於三節完賬之時又復乘間攬用是以奏請展限按節收買原屬邀恩格外今又已二年自應奏請停止惟江寧蘇州揚州等處商賈雲集之地交易繁多其剔除未盡小錢不能保其必無恐尚

有乘機攬入與他處情形稍有不同惟有照舊隨時揀剔每逢三節繳官給價收買倘敢隱匿不繳查出照行使小錢例嚴治其罪庶民間知小錢永無可使之時自必揀繳淨盡禁令久而不弛於錢法似有裨益得旨是竟當常行至無可收買方止○甲子遣官祭

先醫之神○諭據阿桂等奏官兵進攻西里山腿黃草坪現已搶得各處碉卡其時總兵曹順身騎木柵之上親射賊人併指揮兵丁

攻打以致暗受賊人鎗傷陣亡等語曹順自調赴軍營以來節次勦殺賊衆無不奮勇爭先著有勞績是以屢加拔擢用至總兵今因攻克黃草坪碉卡先登督戰受傷陣亡深為憫惜著加恩交部查照從前李全之例給予應得卹典仍入祀昭忠祠並著該員本籍督撫查明曹順之子現年若干先行奏聞俟其服闋後即行送部引見○諭軍機大臣等前因富勒渾奏文綬查審冀國勦侵虧銀米一

案與原參情節迥不相符此事有關生死出入不容顛預枉縱因袁守侗現有黔省留辦之事令阿揚阿先行馳赴川省查辦復以阿桂在軍營於此情節自所深悉並諭令就使查明覆奏今據阿桂奏詳查文綬審擬摺稿其中疑竇甚多如冀國勦加價短雇番夫浮用銀四萬八千餘兩傳喚松岡頭人虎保南卡朋等來營面訊據供共得過冀國勦加價銀二萬餘兩與審摺所開數已不符并查覈

該站額夫每月尚多空閒均已照長夫滿數開銷糧米其代邛州等九州縣墊雇夫價二萬五千餘兩一款其給發何人亦查無著落顯有捏飾侵冒情弊等語若果如此則冀國勦之罪實無可逭不可不徹底根究以期水落石出前因袁守侗留黔暫署撫篆諭令阿揚阿馳往川省查審今據阿桂奏到情形其案情所關甚大恐阿揚阿一人不能審辦若由京另派大臣前往自易訊得實情但聞投

出番人硯朋供詞稱土司向衆百姓說聽得京城有一位大人來了他是要來饒我們的等語逆酋既造此語愚惑衆番此時若遣大臣入川賊人更得指以藉口即緣營兵衆聞知此信亦必心懈於事甚有關係現今大功將成自不宜以審事而致礙軍務因思袁守侗署理黔撫並無緊要應辦之事著傳諭袁守侗接奉此旨即速起程前赴四川會同阿揚阿查審冀國勲一案所有阿桂覆奏之摺

及所錄供情並著鈔寄袁守侗等閱看務須秉公詳悉審訊勿使遁飾至貴州巡撫印務如新任布政使鄭大進已經到任即令其暫行護理若鄭大進未到即令臬司國棟暫護亦可再雲南巡撫已諭令圖思德兼署裴宗錫接奉此旨即速馳赴貴州接印任事又據阿桂奏現將查出案情鈔錄一分寄交欽差侍郎查覈阿揚阿如已接到即可照單逐條嚴行根究務得確情若阿揚阿尚未接到阿

桂咨案即俟袁守侗到彼一同徹底查審據實具奏阿桂現在設法攻勦自可乘勝深入掃穴擒渠計袁守侗等審結此案其時阿桂等亦當成功凱旋著阿桂豐昇額於過成都時會同袁守侗等將此案就近覆訊以成信讞將此由六百里各諭令知之○又諭本日德保奏謝恩賞鹿肉一摺此外並未陳奏地方他事巡撫身任封疆應辦之事甚多既遣人齎摺赴京自應將日行事件一併具奏設或現無應行入告之章即將謝恩摺稍待數日亦無不可其事何關緊要而單發一摺奏謝乎德保何不曉事若此著傳旨申飭○又諭曰阿桂等奏官兵攻搶西里山梁黃草坪拏柵占據並攻打科布曲山腿在事之將領弁兵實屬奮勉據阿桂奏現擬直上山梁之頂橫截賊人碉寨中間一得此處迤下皆可迎刃而解阿桂調度得宜自可乘勢席卷迅奏膚功○乙丑

上詣暢春園問

皇太后安○辛圓明園○丙寅諭據陳輝祖回奏上年奏辦湖北災賑案內未將災重人多及查實災口與民數冊不符之故詳晰豫陳請交部嚴加議處一摺已批交該部矣至所稱從前歷辦民數冊如應城一縣每歲止報滋生八口應山棗陽止報二十餘口及五六七口且歲歲滋生數目一律雷同等語實屬荒唐可笑各省歲報民數用以驗盛世閭閻

繁庶之徵自當按年確數豈有一縣之大每歲僅報滋生數口之理可見地方有司向竟視為具文而歷任督撫亦任其隨意填送不復加察似此率畧相沿成何事體現據陳輝祖另摺奏請將本年民數展限於明歲繕進以期覈實湖廣通省如此各直省大畧相同前曾降旨令各督撫將實在民數覈上但恐督撫等泥於歲底奏報之期尚爾草率從事仍屬有名無實所有本年各省應進民冊均

著展限至明年年底繕進俾得從容辦理以期得實或今年有陸續報到者該部即行駁回毋庸彙進嗣後每年奏報民數各該督撫務率屬實力奉行勿再如前開造倘仍因循疎漏察出定當予以處分至陳輝祖上年查辦孝感等州縣災務其過止於未將實在情形豫行奏聞而其確勘災民按數給賑期無一夫失所尚能體朕綢恤災黎之意是以不加深責若各督撫查辦民數既不實心及遇

有偏災辦賑復從而遷就迴護致羣黎不能普霑實惠者一經訪聞惟該督撫是問恐不能當其罪也將此通諭知之○諭軍機大臣等朕檢閱各省呈繳應燬書籍內有千山和尚詩本語多狂悖自應查繳銷燬查千山名函可廣東博羅人故又稱為博羅刺人後因獲罪發遣瀋陽函可既刻有詩集恐無識之徒目為縉流高品並恐瀋陽地方為開山祖席於世道人心甚有關係著弘昫富察善即

速確查從前函可在瀋陽時曾否占住寺廟有無支派流傳承襲香火及有無碑刻字蹟留存逐一查明據實覆奏○禮部議准陝甘總督勒爾謹奏稱甘肅安西

文廟於乾隆三十五年議建在案查有現裁之淵泉縣衙署基址廣濶堪以就地改建應如所請從之○丁卯

上詣暢春園問

皇太后安○還宮○諭據劉秉恬奏揪砭糧站

查獲盜買盜賣軍米私刻鈐記倉收之杜潮珍劉潮貴王德裕三犯正法示衆一摺所辦甚是揪砭係糧運總匯之地杜潮珍以夫頭領運官米膽敢盜賣軍糧至二十五斛之多劉潮貴希圖得利竟敢私雕鈐記倉收假充繳官王德裕明知滾運軍米收買私存冀圖牟利均屬大干法紀劉秉恬能查獲審明即行正法示衆俾各站知所儆懼辦理頗屬認真至揪砭糧員知州張克明能實心巡查使

作奸之犯即時敗露亦屬可嘉該員原係候補直隸州知州著交該督等遇有缺出即行補授其二道坪站員定遠縣知縣袁文煥雖失於覺察但事發後即能會同迅速查拏全獲要犯功過亦足相抵著免其交部察議巡役周倫奉差巡查據實首稟並即酌量給賞以示鼓勵○定邊右副將軍明亮恭贊大臣副都統舒常奏扎烏古為河西喫緊門戶經官兵盡行占據人心悉已動搖是以納木迪官寨賊人於前晚自行焚棄相近寨落一空惟其上斯底葉安共有寨落三十餘處現在我兵拏柵與阿爾古相接雖有木城攔路無難以次攻克但西北一角未及肅清即向南逕趨未免後顧可虞應先於斯底葉安一路進攻隨派令侍衛進財保叅領額爾伯克等由扎烏古下壓副將全保遊擊常格等由琅谷衝進將斯底葉安悉行占據因曲碩木寨落隱於西面山溝之內未經掃除惟日斯滿

別起山峯賊踞林立現擬日內務期克取則甲索以下聲勢尤為聯絡諭軍機大臣曰明亮等奏連日攻克日斯滿以下山梁礪卡並納木迪官寨斯底葉安一帶地方均已掃洗覽奏欣慰日內想早已得手自可酌抽基木斯丹當噶一帶防兵并為打仗之用又據奏稱我兵拏柵下與阿爾古相接雖有木城攔路亦無難以次攻克等語而投番阿旺亦供索諾木派人到阿爾古去把守是其地尚係賊人所注意明亮等當設法攻取使賊失其所恃官兵更可乘勝深入徑攻甲索賊寨擒獲逆酋用膺茂賞明亮等務須奮勉力攻又據稱曲碩木寨隱於西面山溝之內未經掃除等語其地僅止一隅明亮宜即統兵掃蕩將河西一帶殲滅淨盡以杜後患且此處所得之納木迪賊人先已焚寨而遁而斯底葉安之賊又係望風潰逃固由官兵勇銳賊衆膽落不敢再支但恐賊人見勢難相抗詭計

棄寨潛避讓進官兵賊或繞出我兵之後計圖阻截於事甚有關係不可不防明亮等必須將後路料理肅清方為妥善今明亮等一路已由扎烏古山梁壓下便可直至河沿與阿桂遙為聲應約會合攻賊衆自更難抵禦即西里科布曲之賊聞之必更慌亂阿桂自必剋期得勝佇盼紅旗速至○河東河道總督姚立德奏東省運河本年輪屆大挑除下河廳屬衛河長流迅駛不能熬壩興挑所有淤淺段落前面係用船撈濬仍照例辦理外查開河以內運河廳屬南旺濟寧等處地處上游汶泗之水首先入運捕河廳屬長河汶水北行為沙趙二水所頂上河廳屬臨清一帶塘河係汶水入衛尾閘汶水出閘有衛水相抵雖均不免停淤而按土計夫額用夫工尚有節省惟加河廳屬之彭口塘河以及八閘內大泛口等處本年伏秋汛內山水屢次漲發挾帶泥沙停積較厚必須挑挖深通以

待來春重運。覈其應挑土方。額募人夫。不敷辦理。臣通盤籌畫。裒多益寡。即以運捕上三廳節省之夫。添給加河。尚係土浮於夫。酌加添募需費無多。即於該廳搶修項內。動給妥辦。毋須另請錢糧。現在分派人夫。令將挑河器具備齊。用資力作。并將銅鉛差民等船。嚴催飛挽。清理河道。以便堵築南旺大壩。得旨。覽奏俱悉。○戊辰。禮部奏。

皇太后萬壽聖節慶賀禮。得旨是。照例行禮。奉皇太后懿旨。今年停止筵宴。○己巳。命通鑑輯覽附紀明唐桂二王事蹟。諭申申歲。我國家既定鼎京師。而明福王朱由崧。為南京諸臣迎立。改元首尾一載。其後唐王朱聿鍵。桂王朱由榔。相繼稱號者。又十有餘年。當時以其事涉本朝開創之初。凡所紀年號。例從芟削。即朱璘之明紀輯畧。亦以附三王紀年。為浙江撫臣等所奏。燬茲以搜訪遺集。外省奏進此書。閱其體例。非不尊崇本朝。且無犯諱字。

跡徒以附紀明末三王。自不宜在概禁之列。前命編纂通鑑輯覽。館臣請不錄福王事實。因念歷朝嬗代之際。進退予奪。繫乎萬世公論。若前代偏私袒徇之陋習。以曲筆妄為高下。朕實鄙之。即如福王。承其遺緒。江山半壁。疆域可憑。使能立國自強。未嘗不足比於宋高宗之建炎南渡。乃孱弱荒淫。自貽顛覆。而偏安之規模未失。不可遽以國亡書法絕之。特命於明崇禎末。附紀福王年號。仍用雙行分注。而提綱則書明以為別。至蕪湖被執。始大書明亡。蓋所以折衷至是。務合乎人情天理之公也。至於唐王桂王。遁跡閩滇。苟延殘喘。不復成其為國。正與宋末昺昱二王之流。離海島者相類。是以輯覽內未經載入。今思二王究為明室宗支。與異姓僭竊者不同。非偽託也。且其始末雖無足道。而奔竄事蹟。亦多有可攷。與其聽不知者私相傳述。或致失實無稽。不若為之約舉大凡。俾知二王窮蹙。

情形不過如此。更可以正傳聞之譌舛。又其下諸臣。以旅拒王師者。向多以偽官目之。然其間如白文選。李定國等。本獻賊義子。反側無常。彼在明已合稱賊。稱偽自當準春秋書盜之例。又如金堡等之五虎橫行。把持國是者。亦無足齒錄。若其他各為其主。始終不屈。以致隕首捐軀者。不一而足。較宋末之文天祥。陸秀夫。實相彷彿。雖混一之初。兵威迅掃。不得不行抗命之誅。而諸人瑣尾間關。有死無貳。洵無愧人臣忠於所事之義。迄今日久。將遂泯沒。朕甚憫之。亦宜畧為紀錄。使之有傳。於後設以為載筆有體。則凡事涉二王者。不妨直以彼字稱之。用存偏正之別。而其臣則竟書為某王之某官某。概不必斥之為偽也。明紀輯畧已命有司弛其禁。而通鑑輯覽校刊將竣。其令四庫全書館總裁。詮敘唐桂二王本末。別為附錄卷尾。凡彼時仗節死義之人。考訂事蹟。悉與備書。朕將親為裁定。宣

付刊行。俾讀者咸知朕大中至正。未嘗有一毫私意偏倚。其間而崇獎忠貞。亦足以為世道人心之勸。書成。即以此諭。同御製輯覽原序。並冠卷端。庶將來有所參考。喻朕意焉。○定獨子承祧例。諭曰。戶部奏軍營病故乏嗣人員。請照陣亡之例。准以獨子立嗣一摺。已依議行矣。獨子不准出繼。本非定例。前因太僕寺少卿魯國華條奏。經部議准行。但立繼一事。專為承祧奉養。固當按昭穆之序。亦宜順孀婦之心。所以例載嗣子不得於所後之親。准其另立。實準手情理之宜也。至獨子雖宗支所係。但或其人已死。而其兄弟各有一子。豈忍視其無後。且現存者尚可生育。而死者應與續延。即或兄弟俱已無存。而以一人承兩房宗祀。亦未始非從權以合經。又或死者有應襲之職。不幸無嗣。與其拘泥獨子之例。求諸遠族。何如先儘親兄弟之子。不問是否獨子。令其繼襲之為愈乎。嗣後遇有孀婦

應行立繼之事。除照例按依昭穆倫次相當外。應聽壻婦擇其屬意之人。并問之本房。是否願繼。取有合族甘結。即獨子亦准出繼。庶窮發得以母子相安。而立嗣亦不致以成例阻格。該部即照此辦理。著為令。○諭據文綬奏。川省所產雜糧。現飭夔關一併截留。禁止販往楚省。一摺。所辦非是。川省產米素稱饒裕。向由湖廣一帶販運而下。東南各省均賴其利。近年因辦理軍務。購糧較多。經該督等

奏准暫停夔關出米。以供軍儲。而資民食。尚屬可行。至各項雜糧。仍當聽商販流通。俾從民便。不應在禁止之例。今大功指日告成。軍糧儲備充盈。採買較前漸少。何以轉加飭禁。況今年江蘇安徽俱被偏災。米價不免昂貴。若得上游糧食源源販運。兩省之民更可藉以接濟。所有文綬截禁雜糧越省一事。斷不可行。即著停止。現在官兵乘勝深入。便可掃穴擒渠。一經紅旗馳報。並應將川省米石聽

其運出夔關販賣。無許再行禁遏。俾各省商民均霑利益。副朕惠愛普同至意。該部遵諭即行。並將此通諭知之。○又諭據富德奏。派副都統舒亮等於本月初七日夜。分路統兵往攻布咱爾尼山梁中間崖洞官兵奮勇突前。向洞內拋擲火彈。賊人猝不及防。各兵擁進洞口。刀鎗並施。殺賊六七十人。餘皆帶傷。而竄拏獲活口四名。割取首級三顆。耳記五個。並於初九日夜間。派舒金泰等進攻。復搶得賊卡二座。木城二座等語。此次攻勦布咱爾尼崖洞。富德調度有方。官兵皆鼓勇克捷。甚屬可嘉。叅贊富德。俟大功告成後。一併從優議敘。所有在事出力之將領弁兵等。俱著富德查明。咨部議敘。○庚午。諭曰。原任工部尚書裘曰修。久直內廷。屢膺使命。宣力多年。其後人現無登仕籍者。每深軫念。今伊子裘行簡服闋來京謝恩。著加恩即授為內閣中書。並准其一體會試。○又諭曰。慶恒前署鑲

藍旗蒙古都統時未能查出叅領額爾奇木等冒領滋生銀兩一事將郡王降為貝子朕昨閱舊檔見伊高祖岳託為國宣力頗立軍功且慶恒之罪尚屬因公慶恒著加恩仍賞給郡王以示朕軫恤宗勲至意○又諭據阿桂等奏官兵搶上西里山頂拏柵截斷賊人攻克上下碉寨等因一摺內稱初九初十官兵連拏木柵十座相距山頂已近十一日已午間派兵三路向上直攻海蘭察福康安等遶出木城從賊背後施放鎗箭自上下壓賊人手足無措當將木城克獲殲戮甚多十二日又拏木柵八座據守山梁賊人不能來往十三日築起礮臺兩座分隊進攻十四日子刻烏什哈達等帶兵突然衝上克大碉三座木城四座福康安等又分頭攻克大碉兩座木城兩座殺賊更多並搜得鎗矛等物現於十五日復將阿穰曲山腿寨落攻取一處拏柵十四座以期迅速擣巢等語覽奏深為欣

悅此次官兵奮勇克捷皆由將軍叅贊等調度董率有方統俟大功告成一併交部優敘其在事出力之將領弁兵等著阿桂即行查明咨部分別議敘○諭軍機大臣等戶部議駁勒爾謹請將撫彝廳所管五壩地方應徵糧草歸併高臺縣完納一摺所駁甚是已依議行矣五壩地方自撥歸撫彝廳以來歷今二十餘年小民輸納錢糧相安已久况道里相距僅多十五里何必復事紛更且該處既改隸撫彝廳一切刑名田土諸政務皆其所隸今獨將糧賦改撥實於體制未符兼恐事多掣肘勒爾謹辦理此事實屬無謂著傳諭該督令其明白回奏○又諭昨李侍堯委員解到自暹羅送回之滇兵高元等十七名經軍機大臣訊據供稱俱係從前跟隨楊寧征勦緬匪因徹兵落後被賊截拘數年復從打馬至暹羅始行送回等語該兵等當楊寧徹兵時隨後退出者尚有二百餘人伊等不能

奮勇衝出。均被截拘。殊屬不堪。本應重治其罪。但伊等原係怯懦。無能之綠營兵丁。難盡責以大義。今既解送來京。著從寬免其治罪。交刑部遞解。各回原籍。令該督撫轉飭該地方官嚴行管束。毋許出境滋事。倘有私自脫逃者。一經拏獲。即於本處正法。仍行奏聞。將此傳諭知之。○豁除江蘇上元縣坍減屯田一百八十八畝額賦。○辛未。諭軍機大臣等。據已延三奏。准安省咨查秦功德家有無不法事蹟。隨委臬司農起親赴該犯家查訊。伊弟秦修德及隣佑人等僉供。並未見其寫字焚燒。其妻李氏亦祇稱該犯度日艱難。時常求神保佑。曾寫紙二張焚化。委不知有十保文等項刊刷板片。並做勸化臺之事。現咨安撫嚴密查辦等語。此案前據李質穎奏到。閱其增福十保文二篇。其中並無不法字句。尚非邪教可比。不過俚鄙勸世文詞。已諭李質穎於該犯解到時。如訊無別項悖逆情節。即

可照常辦理。今已延三委臬司農起查訊。該犯家屬及隣佑人等俱稱並無刊播不法情事。晉省自毋庸根究。該犯現在安省。著傳諭李質穎將秦功德詳細研鞫。如實無別項悖逆情節。仍遵前旨。辦理完結可也。將此並諭已延三知之。○是日起。

上以冬至祀

天於

圜丘齋戒三日。○壬申。定邊右副將軍明亮叅

贊大臣副都統舒常奏。扎烏古既經克捷。若即從阿爾古發兵。不難一鼓而下。第日斯滿高踞山頂。雖不能阻我前進。而甲索一路官兵為其隔絕。且與達爾圖基木斯丹當噶等處尚可潛出滋擾。臣等正將日斯滿籌辦。其阿爾古木城二座。外在前復有賊碉一座。木城後復接卡二座。直至河沿。先經額森特在隔河用礮轟摧。賊已難存。駐臣等復於下流河窄處加造索橋。使兩路官兵聯絡。唯是日

斯滿山頂上共有十七礮。其山險峻異常。日斯滿之南另拖山腿一條。地名耳得谷。即為上巴布里。尚有中巴布里。下巴布里。再下即阿爾古。沿山寨落甚多。惟耳得谷最為扼要。自應先行攻取。當派奎林和隆武統兵鼓勇直前。四面合圍。第一處寨落賊番皆被剿戮。復殲斃頭人錫拉木。其第三處寨落望風潰散。惟溝內之賊屢次衝突。上山皆被阿蘭保督兵力戰殲。斃餘始潰散。竊念賊人所以死

據日斯滿而不棄者。不過欲為我後路之患。今其後路轉為我兵所據。是日斯滿以至巴扎木一帶。礮內賊人諒再不能支持。況上巴布里既已攻奪。中巴布里下巴布里無難乘勝掃除。而阿爾古正如破竹之勢。迎刃而解。諭軍機大臣曰。明亮等奏攻克耳得谷。即上巴布里一摺。覽奏欣悅。此次攻奪耳得谷。賊寨奎林和隆武甚為奮勉。而截殺衝突上山滋擾之賊。阿蘭保進財保等頗為出力。著明

亮存記。統俟大功告成。咨部議敘。至額森特。雖未親身攻剿立功。而於隔河施礮轟礮。使賊人膽落。如此不分畛域。方無愧為叅贊。益當努力自勉。共襄大功。○癸酉

上詣

南郊齋宮齋宿。○諭前因蘇壩知上司訪款。劾叅計圖反噬。捏款誣揭。督撫司道一摺。擅用六百里驛馬。交鎮遠縣轉發。該縣李常吉違例遽為馳遞。實屬錯誤。因令袁守伺等查明

叅奏。並諭兵部再行查例通飭。蓋以此等揭報部科。止准其專人齎投。何得擅動驛馬。李常吉以鎮遠首站。與知府近在同城。蘇壩平日之貪黷狼籍。該縣豈無聞見。且既將蘇壩通揭情形。稟之督撫。則蘇壩先發制人之舉。該縣皆所深知。乃復違例濫應。代為馳遞。其咎實無可貸。至沿途各驛站。接准上站六百里公文。原不能知其中係何緊要事件。自不便擅意駁回。若亦治其濫應處分。於事理未

為平允且恐有驛各州縣因此心存畏避設
遇實係有關重大之件亦不肯為之接遞於
公務轉滋貽誤所有各驛站馳遞蘇牆通揭
文書各員除首站鎮遠縣知縣照例議處外
其餘均無庸查議如有似此者俱照此辦理
（又諭據多敏奏接奉諭旨烏梁海等偷盜
哈薩克馬匹屬實將為首之人即行正法其
為從者分別治罪遵將為首之塔奔即行正
法其為從之阿木爾巴圖爾貝克等發往烟
瘴地方等語前據多敏查明烏梁海塔奔阿
木爾巴圖爾貝克等四人偷盜哈薩克馬匹
屬實將該犯等暫行監禁候旨俟奉諭旨後
不分首從傳集哈薩克將塔奔等正法示衆
等因具奏朕即降旨塔奔等膽敢偷盜馬匹
如此之多理應無分首從即行正法且偷盜
哈薩克馬匹尤宜立寘重典與哈薩克等觀
看多敏既已審明屬實即應一面具奏一面
在邊卡辦理乃仍監禁候旨殊不曉事今多

敏尚未接到此旨接奉初次分別首從辦理
諭旨係從前軍機大臣等換寫錯誤者因另
摺請罪已批令該部嚴察議奏矣但此究非
伊應得之罪不必因此察議至多敏不將塔
奔等即在哈薩克前正法仍行監禁候旨其
罪乃在於此多敏著交部嚴察議奏○軍機
大臣議覆阿桂等奏稱豫備郊勞官兵等四
百員名由陸路回京其餘俱於重慶用船由
湖廣襄陽起岸川省馬匹已可不致竭蹶惟
此次逆醜蕩平各土司頭人情願瞻仰闕廷
者自應令其恭與大典屆期作為一起其大
臣官員跟役減裁在後另為一起統計不過
六起間日行走十二日之後馬匹即可捲徹
更屬易於籌辦但自軍營至成都原議抽調
馬八百匹就程站分設查軍營至成都計三
十餘站馬八百匹不敷分布而豫備郊勞官
兵應須剋日趲行若將此項馬匹作為長騎
則馬力慮難直達臣等籌酌陸路回京之官

兵止四百員名。在口外則官員尚有自餽之馬。即兵丁赴成都。概令步行。折給馬價。均所樂從。所有川省馬匹。應請毋庸遠解軍營。仍令其按站安設。至官兵由陝進京。不必取道河南。請由山西赴直隸。以均勞逸。其餘自成都至重慶。坐船從湖廣水路赴襄陽起岸。由河南直隸回京。再各省駐防綠營官兵。為數不少。若俟大功告成。再行文各處豫備。未免需時。所費實為繁鉅。臣等亦即一併酌定。除

陝兵仍由廣元一路回陝外。令甘兵由保茂松潘一路回甘。其雲貴兵由西路之達木巴宗出木坪一路至雅州。上船由水路至永寧起岸。入黔省。交替湖廣兵。亦由成都至重慶。用船從水路回楚。庶分道遙行。不至前停後待。久駐旋師。均應如所請。得旨依議。速行。○是月。安徽巡撫李質穎奏。飭屬續行查繳偽妄各書。共一百種。內除九十八種。各省及安省已經繳過。又皇明書一種。係前明野史。紀

載龐雜。不便存留。今一併解送四庫全書處。查明銷燬。謹另繕書目。恭呈御覽。其未經繳過者。則有焚餘續草二本。係趙維寰所作。語多悖謬。但查趙維寰係浙江人。其書作於前明。本人子孫及藏書之家。屢奉恩旨寬宥。自當免其深求。其所鑄板片。臣現經咨明浙江原籍。嚴查送燬。所有焚餘續草一書。恭呈御覽。又前撫臣裴宗錫任內。查繳各書。內有查出金正希集不全板片二百四十四塊。又譚

桐集不全板片三百二十一塊。已另交委員解軍機處。查明銷燬。報聞。○陝甘總督勒爾謹奏。查舊制。安西廳屬自惠回堡起。至馬蓮井止。共十三營塘。派千總一員總理。歲支鹽菜銀二十八兩八錢。口糧粳米二石九斗八升八合。又巴里坤廳屬自底塘起。至託賴井子止。共十軍塘。派守備一員總理。歲支鹽菜銀二十八兩八錢。口糧白麵三百六十觔。伏思新疆各處。建置州縣。久成內地。該備弁各

駐本營俱有本身應支俸餉雖有總理塘務之責並未離營與馳遞文報及奉派出差者有間所有歲支鹽菜口糧自當與哈密管臺都司一體裁汰以節糜費而歸畫一報聞

大清高宗法天隆運至誠先覺體元立極敷文奮武孝慈神聖純皇帝實錄卷之九百九十五

大清高宗法天隆運至誠先覺體元立極敷文奮武孝慈神聖純皇帝實錄卷之九百九十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事務稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鎮江蘇州都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未十一月甲戌朔冬至祀

天於

園丘

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵 遣官祭

孝賢皇后陵

端慧皇太子園寢 諭軍機大臣等據李質
穎奏署來安縣候補縣丞李奉綸查報災
賑事務辦理不善等因一摺已著革職交與
該撫審擬具奏矣李奉綸查辦賑務輒將縣
差斗級代書門斗等概行列入且開報外來
之人轉多於本地民數並將開鋪貿易者亦
併入冊均屬違例此等劣員自應據實叅革
以示懲儆但奏事由內冒濫字樣未為妥協
朕念切愛民凡遇地方水旱偏災惟恐有司
查辦不實或致災民向隅是以屢諭督撫等
實力查辦勿使一夫失所以副朕軫恤窮黎
之意今李質穎以冒濫等詞列入叅摺恐外
間無識之徒見之妄生議論此後地方官於
辦理災賑事務概從剋減幸免處分辦賑理
宜寧濫毋遺豈可使存寧遺毋濫之意乎李

質穎初任封疆立言尚未得體已將原摺交
軍機大臣改正發鈔將此傳諭李質穎嗣後
奏摺務須留心檢點並遇各督撫奏事之便
一併諭令知之○督理糧餉四川總督富勒
渾山西巡撫鄂寶浙江布政使郝碩奏大兵
業攻克扎烏古日斯滿斯底葉安納木迪等
處現在進攻乃當山梁其北路勒吉爾博得
式梯茹寨臺站輓運改由巴占黃土坪牛廠
一路轉輸實為捷近得旨嘉獎○富勒渾又
奏西路官兵分路由拉枯喇嘛寺進攻業已
克獲西里官寨現在進攻科布曲山梁並則
朗噶克丫口山徑延長營卡紛處所有軍糧
自應設法轉輸分頭接濟查自拉枯喇嘛寺
沿昆色爾山梁直下溝底地名果羅木現安
一站其自果羅木以前之洪加山墨魯古甲
爾噶東噶達果木卓斯果木西里寨等處各
有營卡礮臺均須分路運送但該處係新得
地方山坡險窄且一經攻克科布曲餉道仍

須由勒烏圍轉運。目下暫時之計。無庸概設糧臺。今自果羅木直運各處營卡。酌按道里。分別一二三站不等。支給背夫口糧腳價。轉輸以期節省。至凱旋之後。如美諾希朗郭宗勒烏圍噶喇依。俱係留駐防兵處所。均應儲備軍糧。查後路日耳撒拉大板昭梭洛柏古各站。現俱積米充盈。美諾等處。即可就近酌撥。長商運米。應加緊趕運。勒烏圍俾駐兵之處。均得早有儲積。再凱旋官兵。一切應豫為備辦。臣已將各處臺站酌量歸併。每兩站酌留幹練站官一員。專辦其事。復分委道府一員。往來照應。惟恭與郊勞大典官兵四百名。並各土司等。應由功噶卧龍關一路至省。俱係剋期行走。臣擬令各站臨時多設棚廠。代辦飯食。官兵隨到應付。以免稽遲。並分飭各站員。乘此閒空。派撥人夫。每站砍取山草五六千觔。豫備將軍大臣官員等乘騎馬匹之用。俾得士馬飽騰。行程迅速。得旨嘉獎。○

亥

上詣暢春園問

皇太后安。○幸圓明園。○丙子。諭曰。奎林和隆武自派往軍營。諸處奮勉。竭力報効。殊屬可嘉。奎林已挑御前侍衛。和隆武著加恩。亦挑在御前侍衛。上行走。○又諭據伊勒圖奏稱。惠寧城滿兵。請旨亦照駐防舊城各營部落。給與旗纛之例。賞給一分等語。著照伊勒圖所奏。惠寧城滿兵亦賞給旗纛一分。並著伊勒圖等。繪畫旗纛式樣。送部照依製造發往。○諭軍機大臣等。據劉浩奏。辦理布達拉工程。夫匠所需口食米石等項。請交熱河道明山保豫行採買等語。此事不應交地方官辦理。工程需用夫匠。俱係發價和雇。其各人日用口食。原當聽其隨便自買。劉浩即計及夫匠眾多。恐市中米麵一時不敷。只可於管理工程人員內。擇其誠妥者。代為豫購。隨時散給。已交劉浩妥協辦理矣。但聞熱河一有採

買之信糧價業已加昂。今歲口外豐稔勝常。不應米價轉致騰踊。此必係奸民等豫思居奇牟利於民食甚有關係。不可不早為查辦。著傳諭明山保實力飭查該處糧價。是否不至日增。設法諭禁。勿使閭閻食貴。如有奸商齊行長價之事。查出即行重治。數人以示懲儆。如或視為具文。惟明山保是問。將此傳諭明山保知之。○丁丑

上奉

皇太后還宮。○諭據阿桂等奏。拔磨土婦卓爾瑪。並伊子土司斯丹巴。自川省用兵以來。派出隨勦土兵較多於各土司。前經賞給土婦賢順名號。伊子並賞戴花翎。今見指日大功告成。備牛五百頭。酒一千簍。糈糒五百背。呈送軍營。懇求備賞。頗見誠心。當將酒物酌留牛隻發還。並將該土婦土司及頭目人番衆等。厚加賞賚等語。拔磨土婦卓爾瑪。併伊子安撫土司斯丹巴。恭順可嘉。著加恩將斯丹

巴賞給宣慰司之職。以示鼓勵。○又諭據劉秉恬奏。川省辦理軍需。錢糧奏銷。甚關緊要。現在省局司道各有本任應辦之事。未能專心經理。以致節次催趲。仍多延擱。查有湖北安襄鄖道浦霖。係戶部司員出身。辦事頗能留心認真。請令來川。幫同錢鑒等辦理。並令該道將平日所知屬員。及書吏內各。揀派數人。帶同幫辦。又雲南鎮雄州知州白秀。辦事細緻。亦請令來川。幫辦。並請各以本任之官。

在川辦事等語。所奏甚是。浦霖著即揀派。應帶員役。由湖北馳驛前往四川。白秀解銅來京。現已事竣。著馳驛前往川省。會同軍需局司道。上緊查辦軍需報銷事務。至浦霖。白秀仍著各以本任之官。赴川辦事。其員缺著該撫委員暫署。如該員等果能實心出力。著有勞績。仍著出具考語。送部引見。○定西將軍尚書阿桂。定邊右副將軍尚書公豐昇。額森。贊大臣。都統海蘭察。副都統額森。特奏。阿璘

曲寨落三處業經攻得其二惟將至河沿之第三座寨牆甚厚賊人聚集死守臣等公同商酌以索隆古一帶路徑頗多官兵從此搶上必須厚集兵力方可分頭攻打今即使攻克第三座寨落而第二山峯等處之賊尚未肯即時潰散則前敵之兵均難抽徹於直上索隆古分頭搶壓之計斷不能行究不如將第二山峯木城攻克則直壓至山腿之下勢等建瓴此處賊人俱可掃盡而自科思果木以下至卡布角各寨亦不攻自潰既無他顧之虞便可抽兵數千搶占前進諭軍機大臣曰阿桂等奏所籌大有把握自即可望得手看來賊人全力專注西里一帶今阿桂等相機進攻自可乘勝克捷而噶喇依賊寨據投番等所供現甚空虛攻之自易為力是掃蕩噶喇依賊巢惟盼阿桂等一路之迅速藏事至河西一帶賊既不能抽兵相助則攻取亦不甚費手今又聞索諾木仍在甲離而土婦

阿倉等現存雍中喇嘛寺明亮等若攻克阿爾古即馳往甲離勒擒逆首並乘勝攻占獨松兼可杜賊眾西竄之路彼時或馳赴阿桂處幫同掃平噶喇依或渡河攻打雍中喇嘛寺擒獲阿倉阿青等則賊勢更孤明亮等即可由彼處與阿桂約會夾攻噶喇依巢穴自更可期迅速集勲○豁除山東官臺王家岡釀廢竈地五十四頃十五畝有奇額賦○戊寅

上詣

皇太后宮問安○己卯

上御乾清門聽政○諭曰原任刑部侍郎加贈尚書錢維城供職內廷宣力年久其後人尚無出仕者今伊長子錢中銳服闋來京謝恩著加恩照襲曰修子裘行簡之例授為內閣中書並准其一體會試○吏部議覆陝西布政使富綱奏稱府屬州縣本無在外請陞知府之例唯直隸州缺出例得於知縣內請陞

設以所屬知縣陞授本管知州則現時之屬吏俱平日同寅凡董率稽查難保一無徇顧於吏治官方所關非淺請嗣後直隸州員缺如需知縣內遊員陞補不得於所轄屬員內請陞其由部推陞者亦即扣除另選應如所請從之○以太常寺少卿達敏為內閣學士兼禮部侍郎○庚辰諭戶部覆議圖思德等奏威寧州知州劉標虧空銅鉛工本案內攤賠未完銀兩照滇省議攤未完軍需之例請在黔省養廉內公攤統限十年清繳等語因屬照例籌辦但此項虧欠應賠銀兩皆前任各上司等不能實力體察所致並非接任各員本分應賠之項且貴州通省養廉有限若攤扣過多未免不足以資辦公著加恩展作二十年扣繳俾得從容歸款○又諭曰長祿自補授荊州副都統以來不知奮勉適辦出征兵丁衣服全然不妥甚屬無用今屆大功將歲所有徹兵應辦之事款項繁多長祿豈

能料理且伊所署將軍職任尤關緊要長祿著革去荊州副都統所遺員缺著永昌補授兼署荊州將軍○又諭曰永昌現授荊州副都統其所遺天津鎮總兵員缺著將軍阿桂於軍營出力應陞人員內不拘滿漢揀選一員奏請補授現在大功將次告成俟凱旋時再行赴任其未到任之前所有天津鎮總兵印務著吳掄元即行前往署理○諭軍機大臣等本日圖思德遞到三百里奏摺朕意其有陳奏緊要事件及經拆閱係接奉兼署撫篆諭旨料理起程赴省接印並將辦理章程札囑署提督錦山總兵吳萬年道員龔士模等照辦等語殊屬非是目下正當派兵防邊之時圖思德自應在永昌騰越一帶往來巡查督辦豈可因兼署巡撫遽回省城況巡撫印務並非必須面交其常行事件又非必須在署坐辦儘可札致裴宗錫委員將印送至永昌接受至滇省銅鹽諸務雖係巡撫專責

原可在行署料理其該省刑名案件本屬無多况有臬司在省審辦不致稽誤或遇案有疑竇亦不妨將人犯案卷提解赴永昌覆訊然亦非常有之事自無慮拖累多人况過春間撤防之期仍可回省辦事乃圖思德一聞兼署撫篆之命輒爾起程赴省轉將邊防要務諉之提鎮道府殊屬糊塗不知事理輕重圖思德著傳旨申飭並諭令該署督速即前赴永昌督辦巡防事宜又諭據李侍堯等

奏續獲私越安南滋事之李阿集案內劉阿眉孫阿顯等九犯並於莊阿奇犯屬莊阿冉處搜出帶信號簿計七十二人俱籍隸潮州屬內現在委員按名查拏解省覆審從重定擬等語此等匪徒敢於越境潛至安南受其偽職原屬不法若其在洋搶奪財物時或有逞兇戕命之事自當嚴拏務獲立寘重典若止係逗留外國滋事懼罪逃回尚不致如川省之張坤忠以內地兵丁竄投促浸為主謀

者可比猶可貸其一死著傳諭李侍堯等於拏獲各犯時除將所有家產貲財及搶奪順化金銀物件查明入官外仍將各犯分別研訊如有搶奪殺人之犯即行審明正法餘俱細覈情罪其較重者即發往伊犁厄魯特為奴次重者酌發烏魯木齊等處給兵丁為奴即最輕者亦應分發各省安插但不得仍留本地致日久故智復萌其有在遣脫逃弋獲即於該處正法將此由四百里傳諭知之○

又諭曰明亮等奏官兵現自甲索日斯滿札烏古下及臨河俱已攻克官軍屢次克捷勇氣倍增現在攻勦乃當迅望得手聞索諾木又在甲雜居住若明亮等果能乘勝深入直抵甲雜將逆首擒獲則噶喇依賊巢及馬爾邦等要隘碉卡皆傳檄而定無庸復煩兵力設攻得甲雜逆首仍復竄回巢穴又當以掃蕩噶喇依為要將兇渠逆黨盡行擒縛檻解獻俘方能藏事明亮等至時當酌量情形如

阿桂之兵已逼近噶喇依。明亮等迅速過河。攻打雍中喇嘛寺。與阿桂兩面夾攻賊巢。則勒除自更迅捷。若阿桂尚未抵噶喇依。而明亮等已攻克甲雅獨松。又不妨先由河西往馬爾邦一帶迎進富德之兵過河。同勒賊巢。三路合力攻圍。賊更不能支。延久拒。尤可望剋期集事。明亮總當妥酌而行。又另摺奏。綽斯甲布土司雍中旺爾結。添人協勦。踴躍從事。土舍綽爾甲木燦。進攻尤為出力。甚屬可

嘉。著傳旨賞給御用大荷包各一對。朝衣料各一件。大緞各一匹。雍中旺爾結。小荷包四個。綽爾甲木燦。小荷包三個。並諭以此等貴重服飾。不獨番地難得。即在內地臣工亦不能輕得。大皇帝因爾弟兄誠心効順。特加優賚。以示鼓舞。爾等惟當倍加奮勉。速助成功。將來隨將軍等凱旋入覲。大皇帝自必另沛渥恩。用昭嘉獎。其土婦澤旺拉木。並著賞蟒緞一匹。大緞一匹。交伊等一併祇領齎往。○

定邊右副將軍明亮奏。湖廣總督陳輝祖。於九月間。先後解到皮衣皮帽皮領共四千六百副。當即散給存營。楚省各兵。諭軍機大臣曰。陳輝祖所辦。固由體恤所屬兵丁起見。但軍營調到兵丁。陝甘滇黔皆有。其需衣履更換。大畧相同。不獨楚省為然。今陳輝祖獨恤楚省。從征士卒。使有禦寒之具。其意雖善。而其見則小。各省兵丁。同係効力行間。惟楚省溫暖適體。此外設有衣褐不完之人。欣羨之餘。恐不免私怨其該管督撫。不知曲體下情。因而心生懈怠。於全局甚有關係。今大功指日告成。此事原可毋庸置議。但就事理而論。凡曾經調兵省分。只應將該省派兵若干。通知川省總督。如查有應製換衣履之時。即在成都造辦。解交軍營分給。俾其不致偏枯。仍令各省照例扣項。解還歸款。方為普遍。將此諭令四川。陝甘雲貴各督撫一體知悉。並諭陳輝祖知之。○辛巳。諭據綽克托等奏稱。阿

克蘇五品噶匝納齊伯克阿拉瑚哩烏什明伯克納雅斯俱各遵奉指使出衆効力請加恩以示鼓勵等語阿拉瑚哩納雅斯感戴朕恩諸處竭力報効邇來解送所採玉石晝夜照料跬步不離送至庫車其阿拉瑚哩既戴有花翎著加恩陞授一等賞給四品頂戴納雅斯既戴有藍翎著加恩陞授一等賞給五品頂戴准戴花翎○以三等輕車都尉薩里子海色水襲職○旌表守正捐軀之湖北隨州民陳楚望妻袁氏○壬午

上詣

皇太后宮問安○諭朕恭閱舊滿洲檔冊

太祖

太宗初創鴻基闢取輿圖甚廣即如葉赫烏拉哈達輝發那木都魯綏芬尼瑪察錫伯瓜勒察等處皆在舊滿洲檔冊之內雖在東三省所屬地方因向無繪圖竟難按地指名歷為考驗邇來平定準噶爾回疆等處時朕特派

大臣官員將所有地方俱已繪圖昭垂永久列祖初開鴻業式廓疆圉豈可轉無繪圖著恭查滿洲檔冊詳對盛京誌

實錄繕寫清單札寄盛京吉林黑龍江將軍等各將省城為主某地距省城幾許現今仍係舊名或有更改并有無名山大川古人遺跡逐一詳查三省會同共繪一圖呈覽○癸未命議子明季殉節諸臣謚典諭崇獎忠貞所以風勵臣節然自昔累朝嬗代於勝國死事之臣罕有錄予易名者惟我

世祖章皇帝定鼎之初於崇禎末殉難之大學士范景文等二十人

特恩賜諡仰見

聖度如天軫恤遺忠實為亘古曠典第當時僅徵据傳聞未暇徧為搜訪故得邀表章者止有此數迨久而遺事漸彰復經論定今明史所載可按而知也至若史可法之支撐殘局力矢孤忠終蹈一死以殉又如劉宗周黃道

周等之立朝謬誤。抵觸僉士。及遭際時艱。臨危授命。均足稱一代完人。為褒揚所當及其他或死守城池。或身殞行陣。與夫俘擒駢儻。視死如歸者。爾時王旅徂征。自不得不申法令以明順逆。而事後平情而論。若而人者。皆無愧於疾風勁草。即自盡以全名節。其心亦並可矜憐。雖福王不過倉猝偏安。唐桂二王。并且流離竄跡。已不復成其為國。而諸人茹苦相從。舍生取義。各能忠於所事。亦豈可令

其湮沒不彰。自宜稽考史書。一體旌諡。其或諸生韋布。及不知姓名之流。並能慷慨輕生者。議諡固難於概及。亦當令俎豆其鄉。以昭軫慰。嘗恭讀我

太祖實錄。載薩爾滸之戰。明楊鎬等集兵二十萬。四路分出。侵我興京。我

太祖

太宗及貝勒大臣等。統勁旅數千。殲戮明兵過半。一時良將。如劉綎。杜松等。皆歿於陣。近曾

親製書事一篇。用揚

祖烈。而示傳信。惟時

王業肇基。其抗我顏行者。原當多為獮薶。然迹其冒鎬。櫻鋒。竭忠効命。未嘗不為嘉憫。又若明社將移。孫承宗。盧象昇等之抵拒王師。身膏原野。而周遇吉。蔡懋德。孫傳廷等。以闕獻蹂躪。禦賊亡身。凜凜猶有生氣。總由明政不綱。自萬厯以至崇禎。權奸接踵。閭閻橫行。遂致黑白混淆。忠良泯滅。每為之搥擊不平。福王時。雖間有追諡之人。而去取未公。亦無足為重。朕惟以大公至正為衡。凡明季盡節諸臣。既能為國抒忠。優獎實同一視。至錢謙益之自詡清流。覲顏降附。及金堡。屈大均輩之倖生畏死。詭託縉流。均屬喪心無耻。若輩果能死節。則今日亦當在予旌之列。乃既不能捨命。而猶假語言文字。以圖自飾。其偷生是必當明斥。其進退無據之非。以隱極其冥漠。不靈之魄。一褒一貶。褒貶昭然。使天下萬世

共知予準情理而公好惡以是植綱常即以是彰羣凡諸臣事蹟之具於明史及通鑑輯覽者宜各徵考姓名仍其故官予以諡號一準

世祖時例行其令大學士九卿京堂翰詹科道集議以聞○御製己未歲我

太祖大破明師於薩爾滸山之戰書事文曰蓋聞國之將興必有禎祥然禎祥之賜由乎天而致

天之賜則由乎人予小子於己未歲我

太祖大破明師於薩爾滸之戰益信此理之不與也爾時草創開基軍路藍縷地之里未盈數千兵之衆弗滿數萬惟是

父子君臣同心合力師直為壯荷

天之龍用能破明二十萬之衆每觀

實錄未嘗不流涕動心思我

祖之勤勞而念當時諸臣之宣力也謹依

實錄敘述其事如左○己未二月明帝命楊錦

杜松劉綎等統兵二十萬號四十萬來攻左翼中路以杜松王宣趙夢麟張銓督兵六萬由渾河出撫順關右翼中路以李如柏賀世賢閻鳴泰督兵六萬由清河出鴉鵲關左翼北路以馬林麻岩潘宗顏督兵四萬由開原合葉赫兵出三岔口右翼南路以劉綎康應乾督兵四萬合朝鮮兵出寬甸口期並趨我興京三月朔我西路偵卒遙見火光馳告甫至而南路偵卒又以明兵逼境告我

太祖曰明兵之來信矣南路駐防之兵有五百即以此拒之明使我先見南路有兵者誘我兵而南也其由撫順關西來者必大兵急宜拒戰破此則他路兵不足患矣即於辰刻率大貝勒代善及衆貝勒大臣統城中兵出而令大貝勒前行時偵卒又以明兵出清河路來告大貝勒曰清河之界道途偏仄崎嶇兵未能驟至我兵惟先往撫順以逆敵兵遂過扎客關與達爾漢侍衛扈爾漢集兵以待

上之至時

四貝勒以祀事後至。謂大貝勒曰。界藩山上。我築城。夫役在焉。山雖險。倘明之將帥。不惜士卒。奮力攻之。陷夫役奈何。我兵宜急進。以安夫役之心。大貝勒等善是言。下令軍士盡擐甲。日過午。至太蘭岡。大貝勒及扈爾漢。欲駐兵隱僻地。以待敵。

四貝勒艷然曰。正宜耀兵列陣。明示敵人。壯我夫役士卒之膽。俾并力以戰。何故令兵立隱僻地耶。已圖魯額亦都曰。

貝勒之言是也。我兵當堂堂正正。以向敵人。遂督兵赴界藩。對明兵營。列陣而待。初。眾貝勒兵未至。我國防衛築城夫役之兵。僅四百人。伏薩爾澣谷口。俟明總兵杜松。王宣。趙夢麟之兵。過谷口。將半。尾擊之。追至界藩渡口。與築城夫役合。據界藩山之吉林崖。杜松結營薩爾澣山。而自引兵圍吉林崖。仰攻我兵。我兵四百人。率眾夫役下擊之。一戰而斬明兵

百人。時我國眾貝勒甫至。見明兵攻吉林崖者約二萬人。又一軍列薩爾澣山巔。遙為聲勢。四大貝勒與諸將議曰。吉林崖巔有防衛。夫役之兵四百人。急增千人助之。俾登山馳下。衝擊。而以右翼四旗兵夾攻之。其薩爾澣山之兵。則以左翼四旗兵當之。遂遣兵千人往吉林崖。

上至問四大貝勒破敵策。四大貝勒具以前議告。

上曰。日暮矣。且從汝等。今分右翼四旗之二。與左四旗兵合。先破薩爾澣山所駐兵。此兵破。則界藩之眾自喪膽矣。再令右二旗兵。遙望界藩。明軍俟我兵由吉林崖馳下。衝擊時。并力以戰。是時我國近都城之兵。乘善馬者。先至。乘駕馬者。後至。其數十里外者。尚未至。于是合六旗兵。進攻薩爾澣山。明兵駐營列陣。發鎗礮。我兵仰而射之。奮力衝擊。不移時。破其營壘。死者相枕藉。而所遣助吉林崖之兵。

自山馳下衝擊右二旗兵渡河直前夾擊明兵之在界藩山者短刃相接我兵縱橫馳突無不一當百遂大破其衆明總兵杜松王宣趙夢麟等皆歿於陣橫屍亘山野血流成渠其旗幟器械及士卒死者蔽渾河而下如流斯馬追奔逐北二十餘里至碩欽山時已昏軍士沿途搜勒者又無數是夜明總兵馬林兵營於尚間崖濬壕嚴斥堠鳴金鼓自衛我兵見之乘夜馳告於大貝勒翼旦大貝勒以三百餘騎馳往馬林兵方拔營行見大貝勒兵至回兵結方營環營濬壕三匝列火器俾習火器者立壕外繼列騎兵以俟又潘宗顏一軍距西三里外營斐芬山大貝勒見之使人馳告於上時我國遠路之兵亦陸續至與大貝勒兵合明左翼中路後營遊擊龔念遂李希泌統步騎萬人駕大車持堅楯營於幹琿鄂護地環營濬壕外列火器

上見之與四貝勒率兵不滿千人分其半下馬步戰明兵發火器拒敵四貝勒引騎兵奮勇衝入我步兵遂斫其車破其楯明兵又大敗龔念遂李希泌皆陣歿馬會大貝勒使人至知明兵已營尚間崖上不待四貝勒兵急引侍從四五人往日中至其地見明兵四萬人布陣成列上趣令我軍先據山巔向下搏擊衆兵方欲登山而馬林營內之兵與壕外兵合上曰是將與我戰也我兵且勿登山宜下馬步戰令大貝勒往諭時左二旗兵下馬者方四五十人明兵已自西突至大貝勒代善言於上曰兵已進矣即怒馬迎戰直入其陣二貝勒阿敏三貝勒莽古爾泰與衆台吉等各鼓勇奮進兩軍搏戰遂敗明兵斬首捕酋過當方戰時我六旗兵見之不及布列行陣人自為

戰前後弗相待。縱馬飛馳直逼明營。明兵發鳥鎗巨礮。我兵衝突縱擊。飛矢利刃所向無前。明兵不能支。又大敗遁走。我兵乘勝追擊。明副將麻岩及大小將士皆陣沒。總兵馬林僅以身免。滅跡掃塵。索角隴種。尚間崖下河水為之盡赤。

上復集軍士馳往斐芬山。攻開原道潘宗顏兵。令我兵之半下馬仰山而攻。宗顏兵約萬人以楯遮蔽連發火器。我兵突入摧其楯遂破之。宗顏全軍盡沒。時葉赫貝勒錦台什布揚古欲助明與潘宗顏合。其兵甫至開原中固城聞明兵敗大驚而遁。是時我軍既擊破明二路兵。

上乃收全軍至固勒班地方駐營。而明總兵劉綎李如柏等由南路進者已近逼興京。偵卒馳告。

上遂命扈爾漢先率兵千人往禦。翼旦上復命二貝勒阿敏率兵二千繼之。

上率眾貝勒大臣還軍至界藩。行凱旋禮。封八牛祭纛告。

天大貝勒代善請曰。吾先歸從二十騎微行探信。祀畢。

上徐來。

上許諾。三貝勒莽古爾泰亦相繼行。

四貝勒馳至。

上前請與俱往。

上曰。汝兄微行往探。汝隨吾後行。

四貝勒曰。兄獨往。吾留此未安也。遂亦行。日暮。

大貝勒回至興京入宮則。

皇后內廷等見大貝勒至。亟問禦敵策。大貝勒曰。撫順開原二路敵兵已破。誅戮且盡。南來。

兵已遣將往禦。我待。

父皇命當即往破之。於是大貝勒復出城迎。

上於大屯之野。

上自界藩啟行至興京。平明命大貝勒三貝勒四貝勒統軍士禦劉綎。而留兵四千於都城待。

李如柏賀世賢等之兵。初劉綎兵出寬甸進棟鄂路我居民避匿深山茂林中。劉綎恣焚其柵寨殺其孱弱。佐領託保額爾訥額赫率駐防五百人迎敵。劉綎兵圍之數重。額爾訥額赫死之。并傷我卒五十人。託保引餘兵與扈爾漢軍合。扈爾漢伏兵山隘以待。已刻大貝勒及三貝勒。

四貝勒引兵甫出瓦爾喀什窩集。時劉綎所率精銳二萬先遣萬人前掠。將趨登阿布達哩岡布陣。大貝勒欲引兵先登。馳下擊之。

四貝勒曰。兄統大兵留此相機為援。吾先督兵登岡。自上下擊之。大貝勒曰。善。吾引左翼兵出其西。汝引右翼兵登山。俾將士下擊。汝立後督視勿違吾言。輒輕身入也。

四貝勒遂率右翼兵往。先引精騎三十人。超出衆軍前。自山馳下奮擊之。兵刃交接戰甚酣。後軍隨至衝突而入。大貝勒又率左翼兵自山之西至夾攻之。明兵大潰。

四貝勒乘勝追擊。與劉綎後隊兩營兵遇。綎倉卒不及陣。

四貝勒縱兵奮擊殲其兩營兵萬人。劉綎戰死。是時明海蓋道康應乾步兵合朝鮮兵營於富察之野。其兵執篋筦長鎗被藤甲皮甲。朝鮮兵被紙甲。其冑以柳條為之火器層疊列待。

四貝勒既破劉綎兵。方駐軍。衆貝勒皆至。遂復督兵攻應乾明兵及朝鮮兵敵。競發火器。忽大風驟作。走石揚沙。煙塵反撲敵營。昏冥晝晦。我軍乘之。飛矢雨發。又大破之。其兵二萬人殲焉。應乾遁去。先是二貝勒阿敏扈爾漢前行。遇明遊擊喬一琦兵擊敗之一。琦收殘卒奔朝鮮。都元帥姜功烈營時功烈據固拉庫崖。衆貝勒復整兵逐一琦。遂攻朝鮮營。功烈知明兵敗大驚。遂按兵偃旗幟。遣通事執旗來告曰。此來非吾願也。昔倭侵我國。據我城郭奪我疆土。急難之時。賴明助我。獲退倭。

兵。今以報德之故。奉調至此。爾撫我。我當歸附。且我兵之在明行間者。已被爾殺。此營中皆高麗兵也。明兵逃匿於我者。止遊擊一人。及所從軍士而已。當執之以獻。四大貝勒定議。乃曰。爾等降。先令主將來。否則必戰。功烈復遣使來告曰。吾若今夕即往。恐軍亂。逃竄其令副元帥先往。宿貝勒營以示信。詰朝。吾率衆降。遂盡執明兵。擲於山下。付我明遊擊喬一琦。自縊死。於是朝鮮副元帥先詣衆貝

勒降。翼日。姜功烈率兵五千下山降。衆貝勒宴勞之。送功烈及所部將士。先詣都城。

上御殿。朝鮮都元帥姜功烈及副元帥等。匍匐謁見。

上優以賓禮。數賜宴。厚遇之士卒。悉留養。四大貝勒既殲南路明兵四萬人。我軍駐三日。藉其俘獲人馬輜重鎧仗而還。是役也。明以傾國之兵。雲集遼瀋。又招合朝鮮葉赫。分路來侵。五日之間。悉被我軍誅滅。其宿將猛士。

暴骸骨於外。士卒死者。不啻十餘萬。我軍邀天佑助。以少擊衆。無不摧堅挫銳。迅奏膚功。策勲按籍。我士卒僅損二百人。自古克敵制勝。未有若斯之神者也。時明經畧楊鎬駐瀋陽。聞三路兵敗。大驚。急檄總兵李如柏。副將賀世賢等回兵。如柏等自呼蘭路遁歸。我哨兵二十人見之。據山上鳴螺繫帽弓。殲揮之作。招集大兵。狀已而呼噪下擊。殺四十人。獲馬五十匹。明兵奪路而逃。相蹂踐死者。復千餘人。庚寅。大軍還至都城。

上顧衆貝勒大臣曰。明以二十萬衆。號四十七萬。分四路并力來戰。今我不踰時破之。遂獲全勝。各國聞之。若謂我分兵拒敵。則稱我兵衆。若謂我往來勦殺。則服我兵強。傳聞四方。孰不懾我軍威者哉。嗚呼。由是一戰而明之國勢益削。我之武烈益揚。遂乃克遼東。取瀋陽。王基開帝業定。夫豈易乎。允因我太祖求。是於

天復讐乎

祖同兄弟子姪之衆。率股肱心膂之臣。

親冒矢石。授方畧。一時

聖嗣賢臣。抒勞効愫。用成鴻勳。我大清億萬年

丕丕基。實肇乎此。予小子披讀

實錄。未嘗不起敬慕起悲。愧未能及其時。以

承

訓。抒力於行間馬上也。夫我

祖如此勤勞所得之天下。予若孫覩此戰蹟。而

不思所以永

天命。綿帝圖。兢兢業業。治國安民。凜惟休惟恤

之誠。存監夏監殷之心。則亦非予子孫而已

爾。此予覩薩爾濟之戰。所由書事也。此予因

實錄尊歲人弗易見。而特書其事。以示我大清

億萬年子孫。臣庶期共勉以無忘

祖宗開創之艱難也。○諭軍機大臣等。前次派

令阿揚阿赴川查審冀國勳一案。復據阿桂

覆奏之摺。其案情關係甚大。恐非阿揚阿一

人所能審辦。因諭令袁守侗。速即自黔馳赴川省。會同查審。至阿桂前奏稱。現將案內可疑情節。逐一指出。開列清單。同虎保等供詞。另鈔一分。先行咨會欽差侍郎查照審辦。而阿揚阿到川後。即奏稱。已飛調查禮帶土司頭人。及蠻夫茂州夫數名。到省備質。自屬正辦。但阿桂之摺。於閏十月初九日拜發。而阿揚阿於閏十月十六日抵成都。所有阿桂咨文。早應接到。即所調之查禮。及虎保等。亦應

早到省城。阿揚阿自應將案內情節。質訊大概。先行奏聞。何以至今未據奏及。豈因案情重大。聞袁守侗將至。欲俟其到川同辦。不敢專主耶。至前據阿桂稱。傳喚松岡頭人虎保。南卡朋等面訊。據供共得過冀國勳加價銀二萬餘兩。與審摺所開數已不符。尚有浮用銀二萬數千。作何著落。又稱。若用長夫不敷。因短顧蠻夫。即應將此項夫價。添用於加價之內。何以雇用番夫之加價。又於軍需項下

關支且每月俱有空夫亦俱照長夫滿數開銷各等語。此兩節實為案內緊要關鍵。以此詰訊冀國勲復何置辯。從此根究自無難水落石出。前已詳悉傳諭袁守侗等。悉心秉公查審。今據袁守侗奏接奉前旨。即於閏十月二十九日。自黔起程前往。計此時應抵四川省城。此案是非虛實。無難質訊明確。不可稍涉游移。若云冀國勲所侵之數。即虎保一案已多至二萬餘兩。而該犯任所原籍查抄資產。

寥寥無幾。或疑該犯侵蝕非真。此則不可誤認。該犯既侵項如許。必其在此食用奢華。妄行花費。或并有嫖賭下賤之事。皆不可知。由此訪查。自難掩飾。總之此案關係生死出入。不可少存成見。亦不得稍涉偏私。若圖救冀國勲之命。令虎保等改供。強為開脫。則阿桂聞之。必不肯依。若止顧周旋。阿桂原奏將案犯鍛鍊成獄。非但無以服冀國勲之心。即文綬亦未必甘受委屈。若袁守侗等欲瞻顧

兩面。遂爾顛倒了局。為和事老人之見。斷難逃朕之洞鑒。伊等係派往審事欽差。此案本與伊無涉。若查審稍有不實不盡。則伊二人自取重愆。恐不輕為寬宥也。至阿桂所奏與審案情節兩岐。若係文綬顛倒是非。有心開釋。其罪即不可逭。朕思或文綬因辦理軍需事繁。不及親審。而承審之顧光旭、李永祺等。意在徇庇冀國勲。曲為開脫。捏詞誑票。文綬為其所蒙。不復詳查。率行結案。亦未可定。則

其罪重在顧光旭等。若顧光旭等仰承文綬意旨。扶同完結。則其罪重在文綬。該侍郎等。又不可以朕有此旨。稍為遷就也。朕辦理庶獄。惟期平允。使案情無枉無縱。輕重惟視其人之自取。從不豫設成心。袁守侗等。惟當一秉虛公。實心研鞠。以成信讞。此案有一是。必有一非。再不能兩立。勿稍存偏向調停之見。自取罪戾。將此傳諭袁守侗等。並阿桂、豐昇額知之。○定西將軍尚書阿桂等奏。臣等分

兵兩隊一從阿穆曲山梁正面進攻一於右手旁繞進攻先令官兵埋伏福康安等帶兵分路衝上見賊露身柵上抗拒即行擊射之又有一二百人欲暗為衝突計官兵將礮轟擊賊始竄入木城固守臣等現鑄成兩大礮仍分兵三路上攻一得木城憑高下壓各碉卡賊人亦斷無尚能死守之理諭軍機大臣曰阿桂等奏官兵攻打西里第二山峯木城碉卡一摺看此情形賊人不過護死抗拒無

能復為久支况添鑄大礮往轟仍擬分兵搶占自無難操券而得至噶喇依現在光景甚屬空虛各番供詞如一自係實情阿桂等前奏若搶占索隆古山梁隨處可進其瑪爾古舍齊之賊皆無從堵禦自可乘勝席卷但前此番人等曾有賊眾尚欲拒守舍齊喇嘛寺之供若從索隆古山梁而下路徑果多即可覓間直擣噶喇依一經掃蕩賊巢其餘賊人碉隘如舍齊雍中喇嘛寺等皆可傳檄而定

便可一面辦理平定事宜一面迅發紅旗報捷○鑲黃旗滿洲都統舒赫德奏頭等承恩公散秩大臣伊松阿患病逾年應照例革退公爵另行襲替得旨伊松阿病至年餘例應革退公爵另行襲替但念其所得公爵因係皇太后戚屬是以特加優封非他人所襲公爵可比今雖因病不能當差著加恩止將散秩大臣開缺其公爵免其革退應得俸祿減半支給○護理湖南巡撫布政使敦福疏報巴

陵臨湘華容三縣乾隆三十九年開墾荒地六十二頃四十九畝有奇○甲申諭軍機大臣等據德保奏東安縣遣犯余秉聰乘間脫逃始興縣遣犯王三與禿喜兒在配同逃現在派員嚴緝並移咨各犯原籍及經過各省一體查拏等語已令將該管之知縣典史交部議處矣遣犯在配理宜嚴加管束今余秉聰王三禿喜兒同時在配脫逃自係該管官漫不經心該督撫等不嚴切飭交所致著傳

諭李侍堯德保除將各逃犯躡緝務獲重治其罪勿使漏網即嚴飭所屬將安置之遣犯嚴行防範勿使乘間免脫如再不實力妥辦該督撫亦不能辭其咎也○又諭據畢沅奏保安縣流犯羅大春偷竊典史驛頭扭落城門鐵鎖而逸請將該典史知縣革職等因一摺已准行矣羅大春本係旗下家奴犯竊流徒膽敢於配所偷竊典史署內驛頭鞍屨甚至扭落城門鐵鎖開門竄逸實屬大干法紀

非尋常流犯脫逃可比必須拏獲重懲該犯竊帶驛頭而逸較單身竄逸為難其蹤跡易於躡緝即或牽驛潛遁亦可就責驛所在物色根求自無難得其底裏著傳諭畢沅速飭所屬將羅大春即行嚴拏務獲從重定擬具奏○刑部左侍郎兼管順天府尹胡季堂順天府尹劉純燁奏有臣劉純燁舊日長隨楊三持順天府舊廢印花填寫借約在外抵攬債務經臣胡季堂訪拏請交刑部質審臣等

請交部議處得旨著交刑部審擬具奏劉純燁著交部議處此案經胡季堂訪聞查辦免其交部○以內閣學士董誥為工部右侍郎○命翰林院侍讀學士曹文垣提督浙江學政○乙酉

上詣

皇太后宮問安○諭朕以福祿係班第之子特加恩擢用侍郎派往西寧辦事伊應感激朕恩益加奮勉乃抵西寧以後諸事糊塗即青

海公禮塔爾被戕一案未能審出實情惟信禮塔爾下人一面之詞顛預了事殊不勝任福祿著革職發往伊犁充當苦差自備資斧効力贖罪○又諭曰惠齡著賞給副都統職銜馳驛赴西寧辦事○丙戌

聖祖仁皇帝忌辰遣官祭

景陵○

上詣

奉先殿

壽皇殿行禮。○諭據文綬奏。珙縣紳民呈請。將公捐修城銀。八千三百九十餘兩。歸還司庫。情詞懇切。似應俯順輿情。准其捐修等語。該縣紳民譚瀛等。情願捐貲修城。甚屬急公可嘉。著文綬詳查各所捐銀數咨部。照例分別議敘獎賞。○諭軍機大臣曰。明亮等奏。官兵於巴布里。阿爾古。適中之地。連拏木柵。使賊人悉眾拒守。以便乘虛襲取碾占。所籌頗好。賊眾每見官兵進攻蹤影。即集眾併力抗拒。因致艱於得手。今明亮等欲明攻阿爾古。暗襲碾占。為聲東擊西之計。出賊人不意。使其照顧不暇。深合制勝機宜。自應如此辦理。碾占在甲索山後。地居乃當之上。一得碾占。便可從上壓取乃當。而乃當之下。為甲雅獨松等處。明亮等於攻克乃當時。即統兵徑擣甲雅。掃其賊寨。方為正辦。○吏部議覆盛京將軍弘昫奏。稱。請將失察流民私行渡海之奉天。山東。沿海州縣。及巡查各員。嚴行議處。嗣

後如有失察流民。私行渡海。別經發覺者。照臺灣流寓民人眷屬偷渡例。將沿海州縣。及巡查文職官。失察一名至十名者。罰俸一年。十名以上。降一級留任。二十名以上。降一級調用。至武職巡哨洋面。均有稽查之責。如有失察。亦照此例。按其偷渡名數。分別議處。其守口武弁。遇有疎縱。即照盤查不實例。降二級調用。從之。○旌表守正捐軀之浙江鎮海縣民林宗慶妻解氏。○丁亥。諭據伊勒圖奏。稱。伊犁罕伯克阿克伯克。自布庫爾調至伊犁。經理屯田事務。諸凡盡心。甚屬妥協。但僅有數戶延齊回子。此外別無得項。每年可否賞給養廉二百兩之處。請旨等語。阿克伯克經理屯田事務。甚屬妥協。既無得項。著加恩每年賞給養廉銀二百兩。○又諭據伊勒圖等奏。稱。伊犁屯田回眾應納糧石。俱於年內交納完竣。賞給大小伯克布帛之處。分別開單。請旨等語。伊犁屯田回眾。俱各勤謹奮勉。

應納糧石。照數交納。甚屬可嘉。著將阿奇木伯克以下。玉資伯克以上。俱照伊勒圖等所請。分別等第。賞給布帛。以示鼓勵。○諭軍機大臣等。前因查辦木果木潰逃兵丁案內。令將空出名糧扣存。停止挑補。彼時因此等逃兵不能効力行間。轉致債事。是以停其補額。今大功將屆告成。各省原調官兵。均須回營歸伍。其守汛差操等項。自應照額補還。所有陝甘雲貴湖廣四川等省。從前停補潰兵缺

額。俱著即照數挑補。該督撫提鎮。務勤加訓練。以飭戎行。而收實效。將此傳諭知之。○戊子。諭據雅德等奏稱。阿奇木伯克公噶岱默特。染患傷寒。於閏十月十三日病故等語。噶岱默特。未授伯克之前。即尋往伊犁歸附。又跟隨進剿。著有勞績。今聞溘逝。深堪憫悼。加恩於彼處銀兩內。賞銀三百兩。並著伊子。同明年輪班伯克等眾。前來入覲。○又諭。據富德奏稱。綏庫自革退二等侍衛巴圖魯名號。

授為藍翎侍衛以來。諸處奮勉。此次甫見多賊。衝犯營壘。即領兵殺敗等語。綏庫自知己罪。諸處奮勉行走。可嘉。著加恩授為三等侍衛。嗣後如另有出力之處。俟富德奏到時。朕仍予加恩。軍營大臣官員有功。朕即賞之。有罪。朕即罰之。毫無偏徇之處。著將此通諭官兵知之。

大清高宗法天隆運至誠先覺體元立極敷文奮武孝慈神聖純皇帝實錄卷之九百九十六

大清高宗法天隆運至誠先覺體元立極敷文奮武孝慈神聖純皇帝實錄卷之九百九十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十年乙未十一月己丑

上詣

皇太后宮問安。○諭據阿桂等奏官兵攻打西里第二山峯地名奔布魯木乘夜督兵拏柵而進即於柵內轟塌賊碉兩座初二三等日復派調官兵赴山腿盡處合力攻打海蘭察等帶兵直取奔布魯木山峯木城福康安等所帶三隊官兵分頭搶撲賊人抵死拒守鎗石交下。隨拋擲火彈百餘時及大風火勢蔓延燒及木城官兵乘勢騰踴而上賊人踉蹌

奔出官兵緊追截殺殲斃甚多並因趕急滾崖跌死者又復不少其不敢逃出者俱斃於內福康安等復攻入各碉內放火焚燒官兵四面合圍碉內賊人亦均斃於火嗣後三隊合兵自上壓下將西里正寨及寨後山包併迤下山腿各碉卡隨攻隨克直至溝邊額森特等復攻撲山腿盡處木城亦經克獲並得雅瑪朋寨前兩碉進圍雅瑪朋寨落相機即可搶上科布曲索隆古等處連日共攻得木城九座大寨四座石碉七座石卡數十座殺賊百餘人所得鎗矛等物甚多等語覽奏深為欣悅此等皆促浸要隘賊人恃險死守將軍等多方籌畫調度合宜屢戰克捷實屬可嘉現在大功指日告成將軍等自當特膺懋賞所有先登制勝之叅贊海蘭察及帶兵勇往之領隊大臣福康安均著交部議敘其隨從分隊打仗出力之滿漢屯土各兵並著將軍等查明賞給一月錢糧以示鼓勵○又諭

曰四庫全書處總裁將所輯永樂大典散篇各書進呈朕詳加披閱內宋劉跂學易集十二卷擬請刊刻其中有青詞一體乃道流祈禱之章非斯文正軌前因題胡宿集見其有道院青詞教坊致語之類命刪去刊行而鈔本仍存其舊今劉跂所作則因服藥交年瑣事用青詞致告尤為不經雖鈔本不妨姑存刊刻必不可也蓋青詞跡涉異端不特周程張朱諸儒所必不肯為即韓柳歐蘇諸大家

亦正集所未見若韓愈之送窮文柳宗元之乞巧文此乃假託神靈游戲翰墨不過借以喻言並非實有其事偶一為之固屬無害又如時文為舉業所習自前明以來通人擅長者甚多然亦只可聽其另集專行不宜並登文集況青詞之尤乖典故者乎再所進書內有擬請鈔錄之王質雪山集內如論和戰守疏及上宋孝宗書諸篇詞旨剴切頗當事理竟宜付之剞劂但其中亦有青詞一種並當

一律從刪所有此二書著交該總裁等重加釐訂分別削存用昭評議之允至現在纂輯四庫全書部帙計盈數萬所採詩文別集既多自不能必其通體完善或大端可取原不妨棄瑕錄瑜如宋穆修集有曹操帳記語多稱頌謬於是非大義在所必刪而全集或錄存亦不必因此以廢彼惟當於提要內闡明其故使去取之義曉然諸凡相類者均可照此辦理該總裁等務須詳慎決擇使羣言悉

歸雅正副朕鑑古斥邪之意○諭軍機大臣曰吳嗣爵奏請修惠濟閘座一摺稱於年內煞壩斷流先行拆卸春融開工修砌來年汛前一律完竣等語所辦未為妥協惠濟閘為淮水入運緊要關鍵如果閘座歇損必須拆卸大修自應即籌妥辦但既已施工當思經久石料工程全恃灰漿膠固必須曬晾乾透始可放水明春所做石工俟至後年汛前然後引水經行節宣啟閑方為有益今吳嗣爵

乃欲於春融興作。汎前完工。則為日無多。灰石必不能凝固。遽令急流盪激。豈能資抵禦之功。近年御園修一小石岸。工員不待全乾。即行灌水。以致隨修隨墊。此朕所目擊者。小池沼且然。況全淮之力乎。若必須拆造大修。不可不遵前旨。妥協經理。若閘身尚屬穩固。即或石塊稍有應換之處。祇需酌量繕葺。不得輕議拆卸。轉滋貽誤。此事關係甚大。理宜慎重。吳嗣爵不能深悉工程做法。所請未為

妥善。著傳諭高晉親往察勘。會同吳嗣爵詳細講求。將該閘是否必須拆修。或祇須黏補修整。抑或仍存其舊之處。逐一查覈明確。即行據實覆奏。尋高晉、吳嗣爵奏查閘身業已通體坐陷串漏。皆因年久底樁朽爛空虛。閘石俱已移動。該閘為淮水入運首閘。水勢賴其節制。必須拆卸到底。從新發樁。逐層砌造。灌滿灰漿。如式修建。以收啟閉之益。該閘本有越閘可通舟楫。應於正閘煞壩興修後。凡

往來船隻俱由越閘行走。不致阻礙。工完仍舊留壩攔護。歷過夏秋冬三季。察看漿汁堅凝。通身膠固。然後放水。工程既可經久。而於節宣亦無窒礙。得旨。自當如此。○庚寅。諭曰。順天府尹劉純煒現在交部議處。例應降調。府丞卜寧一亦具呈告病。順天府事務不可無人辦理。蔣賜榮昨歲獲罪之案。固所自取。今事隔年餘。伊亦頗知感愧。自勵且念其前管府尹時尚能認真辦事。蔣賜榮著加恩補

授順天府尹。此係朕格外恩施。棄瑕錄用。蔣賜榮務宜益加慎勉。供職以策後效。○督理糧餉山西巡撫鄂寶河南布政使顏希深奏。我兵鼓勇前進。攻克納木迪斯底葉安。已克必巴扎木日斯滿等處。地方已與甲索一路官兵會合。所有達爾圖得楞基木斯丹當噶等處駐防官兵。現經調赴新得山梁駐守。其運道臺站又當相機辦理。查舊站自俄坡至大營計程四站。今官兵既已移駐日斯滿等

處而大營現又擬移斯底葉安。應請將達爾圖得楞基木斯丹當噶三站全行裁撤。改於木克爾安設一站。分運兵糧。運道既免紆迴。經費亦可節省。至應安人夫。除日斯滿一站。僅隨營收放。無庸議設。惟木克爾一站。係分運日斯滿斯底葉安兩處軍糧。應請仍安夫三百名分運。其運日斯滿者。作為一站。運斯底葉安者。作為半站。更屬便捷。再查裁撤達爾圖得楞基木斯丹當噶三站。共夫九百名。除分安木克爾一站外。尚餘夫六百名。本應及時裁撤。但本地收存南路陸續運到之米。尚多。該處額夫不敷趕運。應請將前項餘夫六百名暫留。分添木池。覺木交兩站。幫運存糧。以期迅速竣事。一俟存米運完。即行裁撤。得旨嘉獎。○護理山東巡撫布政使國泰疏報諸城縣乾隆三十八年開墾荒地一項五十一畝有奇。○旌表守正捐軀之奉天寧海縣民宋玉春妻趙氏。○辛卯。

上御乾清門聽政。○以詹事胡高望為內閣學士。兼禮部侍郎。○壬辰。

上詣

皇太后宮問安。○幸瀛臺。○諭軍機大臣曰。明亮等奏自碾占進兵。攻得克爾甲爾古。日格德木牛兩處碉卡。現擬即拏木柵。就近攻打。日蓋古洛相機策入。所辦甚好。若能乘勢壓下。攻克乃當。掃蕩甲雜則河西一帶即可廓清。且破其狡窟。逆酋更無從竄逸。佇聽捷音。至前此額森特駐守勒烏圖於堵禦河西及科布曲一帶之賊。責任甚重。今額森特隨阿桂等進兵。其勒烏圖。惟留伍岱。富興等看守。富興本係病軀。難以策其出力。即伍岱計畫調度亦未必及。額森特之優。現在阿桂軍營。不但海蘭察勇畧超羣。其餘領隊大臣侍衛。內能帶兵勇往者甚多。可無藉額森特一人。隨同進剿。著傳諭阿桂。即令額森特仍回勒烏圖駐守。嚴切防禦。勿使河西之賊得以偷

越設稍有疎虞。惟額森特是問。○吏部議奏失察長隨竊用舊廢印花。捏寫借約之順天府尹劉純煒。照例降調。得旨。劉純煒著降一級調用。○豁除湖北監利縣坍廢屯田一項七十一畝有奇額賦。○癸巳諭軍機大臣等。據李侍堯等奏。發往廣東披甲之俄羅斯伊宛。年六十六歲。於本年閏十月初九日潛逃。所有管束不嚴之協領二達色。佐領德克精額等。請交部議處。伊宛。俟拏獲日。即行正法等語。除管束不嚴之協領二達色等。交部嚴加議處之處。另降諭旨外。俄羅斯伊宛。係發往廣州披甲之人。支食錢糧有年。膽敢潛逃。情實可惡。自應嚴行查拏。一面具奏。一面即行正法。至伊宛與內地語言不通。形貌亦異。伊又能往何處逃走。著傳諭李侍堯等。嚴飭廣東廣西上緊查拏。務獲一面具奏。一面即行正法。仍傳諭各省督撫一體嚴行查拏。於何處拏獲。即於何處正法。斷不可令其免脫。

兩廣總督李侍堯奏。廣東鑲白旗滿洲披甲俄羅斯伊宛逃走。皆由該管官員不能管束所致。請飭將該旗協領等。交部議處。得旨。不能將俄羅斯伊宛嚴加管束。以致脫逃之協領二達色。佐領德克精額。防禦西登額。委署驍騎校西登額。著交該部分別議處。○甲午諭福建海壇鎮總兵員缺。著陳汝捷補授。所遺廣東碣石鎮總兵員缺。著許時中調補。所遺河南南陽鎮總兵員缺。著吳掄元補授。吳掄元現署直隸天津鎮總兵印務。其天津鎮員缺。前經有旨。令阿桂於軍營出力人員內。揀選奏補。俟功成凱旋。再至天津任事。吳掄元此時。且不必前赴南陽鎮。新任所有該鎮總兵印務。著徐績於通省副將內。選員奏聞暫署。○又諭三法司。覈議江蘇巡撫薩載題宿遷縣民劉俊。強搶良家妻女。姦占擬以絞候。自屬按律辦理。惟將劉俊之父劉殿臣。照為從擬。以杖流。未為允協。劉殿臣係劉俊

之父當伊子告知欲搶孟池之女為妻即應嚴斥禁阻乃轉同往幫搶實屬悖理自有應得之罪若於其子犯案內照為從問擬則名不正而言不順何可為訓明刑所以弼教豈有定父兄為子弟從犯之理此乃風化所係讞獄者不宜掉以輕心海內之大億兆之眾良楮本自不齊如果父戒其子兄勉其弟使蹈網者稀豈不甚善總因德教未臻上理朕方引以為歎詎可不為天下申明大義乎夫

父兄之教不先已難辭不能約束之咎今劉殿臣明知其子強暴橫行反親往增勢以成其惡此即敗類之尤不可不示以懲儆而律以為從則斷不可著交刑部將父兄不能管束子弟轉同行加功者如何按本犯科條分別定罪之處即行悉心妥議具奏此案自議定後遵照辦理并將此通諭知之○又諭曰兵部尚書嵇璜工部尚書閻循琦左都御史阿思哈俱年逾六十五歲直隸總督周元理

現屆七旬均著加恩在紫禁城騎馬戶部尚書王際華明年亦屆六十且在內廷行走甚勤著一體加恩在紫禁城內騎馬○諭軍機大臣曰鐘音等叅奏革職州同潘復和諱罪冒捐主事一摺已批交該部矣潘復和健訟滋事擾害民番疊經犯案褫革責懲復違例冒捐主事自應斥革追照繳銷此等怙惡不悛之犯非但海外不可容留即福建內地亦不宜令其居停滋事著傳諭鐘音等檢齊各

案卷派委妥員將該犯押解來京交刑部審明治罪並飭委員沿途小心管押毋致疎脫○又諭據勒爾謹奏大通縣扎馬圖地方辦理金砂一摺將圖字譯作免字實屬大謬勒爾謹身係滿洲於此等對音字面不應訛舛若此前因內外各衙門過清文音漢字樣任意混寫錯誤甚多曾命軍機大臣酌擬十二字頭對音定式朕親為閱定刊刻頒行即應遵照妥辦且今年五月內朕因明史內於元

時人地名對音尚沿舊習有將圖作免者於字音無當而用意更鄙薄不堪特降旨改正傳鈔通諭該督豈未見此旨乃於陳進奏函惟憑庸胥劣幕隨手訛寫竟不親加檢點有是理乎勒爾謹著傳旨嚴行申飭至摺內所稱哈布塔垓哈喇山開採金砂但云該處現在土脈凝結不能施工已照例停工封廠等語並不將該處是否因冬令天寒暫停開採抑係永遠封禁之處聲明亦屬含混並著該督明白奏覆○又諭曰臺灣鎮總兵顏鳴臯恭請陞見一摺所奏非是臺灣為海外要缺向例三年更換原因遠隔大洋更調非易是以定有期限以省往來委署之煩顏鳴臯自應俟年滿換回後再行奏請陞見乃亦拘泥內地總兵之例遽行奏請殊屬不知事體輕重顏鳴臯著申飭並著傳諭鐘音嗣後臺灣鎮總兵俟調回內地方准奏請陞見並交兵部存檔查覈○四川總督富勒渾奏大兵屢

捷功屆垂成領運官商倍加踴躍查現存米石除北路自己占至沙爾尼軍營並木池覺木交兩站存米二萬餘石外西路自楸砭至果羅木前敵各站約存米九萬石儲備實屬充盈但官兵指日凱旋一切應付事宜在在均需夫力勢不能將存積米石同時轉輸自應權其緩急先為調度臣已飭撒拉以前各站乘此大功垂成之際多撥人夫將存米陸續加緊趲運於巴占一帶酌量備貯將來勒烏圍等處分設防兵轉運更為捷近而且後路積米得以及早疏通其撒拉以內自楸砭至沙壩各站仍令照常運供所存之米留為分貯美諾一帶防兵之用亦屬省便至生鐵一項需用浩繁各兵軍裝尤關緊要自閏十月初一日起至本月十五日止運過梭洛柏古生熟鐵四十餘萬觔各省官兵衣履鍋帳等項共八千餘背均無貽誤得旨嘉獎○乙未

上詣

皇太后宮問安○幸瀛臺○諭軍機大臣等據李侍堯奏接准安南國咨覆以毗連西省地方實無土物可以互市現在照覆停止等語奸民出境貿易易致滋生事端例本宜禁況近有張德裕等在安南開礦鑛殺之案逃回民人甚多尤不可不整飭邊防盤詰禁止至定期互市之說原恐安南或有仰藉中國貨物之處難以概行杜絕因令以該督之意行知該國王酌議呈報覈辦今該國王既以互市為未便則奸商更無從藉詞偷越邊境尤為肅清惟當嚴飭沿途文武員弁實力稽查毋許一人竄逸並宜令該國王一體留心如有內地商民潛赴彼國者即令其拘拏呈送該督辦理更為周妥因令軍機大臣代擬檄稿寄交該督諭以該國送星厥有內地民人張德裕等聚眾滋事一案除該國拏獲解審並有陸續投回者甚多均經本閣部堂奏明

分別嚴懲內地民人原不許私越邊境況該國王素稱恭順此輩不安本分之徒尤不便聽其在爾境滋擾業經嚴飭沿邊各員禁止民人出口第恐爾國或有仰藉中國貨物之處若概行禁絕恐於爾國生計有礙是以本閣部堂擬令民人在近邊互市俾爾國懋遷有資於整飭之中仍寓體卹之意因行文該國王查詢該處情形酌擬呈覆近據該國王覆稱以邊地民俗樸陋無需中州重貨互市之法恐為虛設細籌良有未便等語爾國既無需內地貨物互市之法原可不行則邊境更得肅清於爾國尤為有益因即檄行照覆今已嚴飭沿邊文武員弁實力巡察稽查毋許一人出口並飭永遠遵行此次查禁之後設有匪徒潛行偷越仍至爾國逗留者該國王即行查拏呈送本閣部堂按法處治奸民自必益凜條教爾境亦得永臻寧輯該國王其遵奉毋忽將此傳諭李侍堯知之併即照

繕發往。又諭海疆水師總兵非熟諳洋面舟師者不能勝任。前經保舉記名者甚少。其中或有內地水師人員。於海洋非所素習。恐遷地弗能為良。海疆水師總兵缺出。一時頗難得其人。著傳諭李侍堯。鍾音。於廣東閩浙水師副將。叅遊等員內。擇其諳習海洋水面。駕駛純熟。操防勤慎。其才情器局。堪勝總兵之任者。各揀數員。據實奏明。送部引見。以備酌量錄用。又諭各省總兵內。如江南蘇松鎮陳奎。狼山鎮葉浩。廣東碣石鎮新調福建海壇鎮陳汝捷。福建南澳鎮林國彩。漳州鎮李國樞。浙江定海鎮林雲。甘肅西寧鎮劉鑑。貴州古州鎮現署貴州提督寶瓚。八員。在總兵中似覺稍優。但未知其平日辦事如何。其才具識見。局面將來。是否堪勝提督。或宜水師。或宜陸路。該督等平日知之。必深著傳諭各該督將該員。是否能勝任。或不能勝任之處。秉公確覈。據實覆奏。○以貴州清江協副

將寶琳。為甘肅肅州鎮總兵。陝西定邊協副將李煦。為浙江處州鎮總兵。○丙申。諭據阿桂等奏。前以黎雅營遊擊劉倬。熟悉番情。因請陞授四川城守營叅將。嗣准部劄咨文。以劉倬例應迴避本省。但查從前李天佑。調補維州協副將。並無迴避。且剋日大功告成。辦理善後事宜。更須熟手。又湖南衡州協副將馬詔蛟。係四川人。久與番衆相習。因其打仗勇往。是以不論省分。即請陞補。若軍事一竣。仍請將該員調回四川省補用。以收駕輕就熟之益等語。武職管理營務。原與文職不同。即如福建總兵要缺。多有閩省人補授。以期人地相宜者。況川省大功告成。以後應辦善後事宜。尚多。自不必拘於成例。所有李天佑。劉倬。均著毋庸迴避。更調。其衡州協副將馬詔蛟。並著阿桂等。屆時酌量。調回川省補用。該部知道。○諭軍機大臣曰。阿桂等派兵將舍勒固。租魯相連。碉寨悉行攻獲。其瓦喇占

以上之寨亦經攻得並殲戮多人官兵自可乘勝直前搶占科布曲山梁而豐昇額又親往勒烏圍前路相機合力攻打所辦甚好至們都斯一帶賊番搬運木石思添碉卡拒守實為可恨現據阿桂用大礮轟擊賊衆自不能存亦可無虞其阻計阿桂日內必當得手官兵若得科布曲索隆古山梁更為得勢過此惟舍齊喇嘛寺或尚有賊抗拒然官兵屢勝之後聲勢甚盛由彼下壓噶喇依易如摧枯拉朽惟當努力妥辦迅奏膚功以膺懋賞

○丁酉

上詣

皇太后宮問安侍早晚膳○諭現在大功指日告成所有撥解軍需銀兩雖已敷用但平定金川後一切善後事宜尚需經費儲備尤當寬裕著於部庫內再撥銀三百萬兩仍照戶部奏准之例令經由各督撫揀派妥員承管遞行轉解交川省藩庫存貯備用該部即遵

諭行○諭軍機大臣等據烏大經奏查閱南贛鎮各標營伍情形一摺內稱操演烏鎗有止演四進五連環者當即飭令改為九進十連環等語此却可以不必已於摺內批示矣演放烏鎗惟以純熟為要進數之多寡原可無庸拘泥兵丁等果能認真演習即四進五連環已為有益如京師健銳火器兩營常時操演皆不過三進四連環而技藝準頭並極精熟得用可見操演烏鎗惟在講求實濟不在求多而徒務虛名且與其進數多而耗費火藥何如進數較少節省藥子以勤為演練俾益臻嫻熟乎今烏大經既為此奏恐各省營伍亦多拘陣勢九進十連環之說者殊屬無當著於奏事之便傳諭各總督巡撫提督遵照辦理并令傳諭各鎮總兵一體覈實妥辦並傳諭烏大經知之○

戊戌

皇太后聖壽節遣官祭

太廟後殿○

上詣

壽康宮行慶賀

皇太后禮王大臣於

慈寧門衆官於午門行禮○奉

皇太后御壽安宮侍宴○己亥

上奉

皇太后御壽安宮侍早晚膳○督理糧餉四川

總督富勒渾浙江布政使郝碩奏大兵現已

攻克科斯果木及雅瑪朋各寨落所有西里

溝底一帶地方業與勒烏圍接通糧運道路

自應相度情形隨時酌辦以期省便昆色爾

北接沙冒碯格魯瓦覺一帶山梁若由谷噶

舊路轉運即可直達軍營比現在色木多一

路較近數站查自梭洛柏古至谷噶原係舊

定站所仍應作為站半該站現有夫一千名

無庸添設其谷噶至格魯瓦覺前因緊接大

營限於地勢是以作為站半及半站目下另

立糧臺自應酌量道里均勻安設應自谷噶至得勝坡作為一站由得勝坡至格魯瓦覺作為一站由格魯瓦覺至沙冒碯作為一站由沙冒碯一站即直抵昆色爾軍營共添四站每站各安夫一千名共應安夫四千名此項人夫即於色木多至巴占十一站裁撤人夫九千五百名內撥出四千名如數添安新站實可節省人夫五千五百名一得科布曲即由科斯果木直運勒烏圍兩路總匯之所

不過計程站半較之由色木多一帶供運途路既近實多節省至前敵情形移步換影查自墨魯古西下至新得雅瑪朋寨稍上地方距果羅木二十餘里應安一站由該處分運前敵各營卡不必仍由墨魯古山梁紆折行走致滋糜費但該處係新得地方深入賊境山路崎嶇人夫未免畏怯所有分運各營卡之處酌定十餘里者准作半站二十餘里者准作一站俾夫力從容輓運更加踴躍並飭

墨魯古礮局一併移往均歸近便。至原設密拉噶拉木礮炭窑一百餘座亦令分移一半。赴昆色爾山左安設以資鑄造得旨嘉獎。○山東巡撫楊景素奏報東省得雪情形得旨欣慰覽之批摺時京師復值雪今歲誠天恩優渥益深敬慰耳。○庚子

上詣

皇太后宮問安。○幸瀛臺。○壬寅諭據阿桂等奏官兵連克舍勒固租魯瓦喇占雅瑪朋各

碉寨併搶占科恩果木官寨掃清沿河卡布角一帶寨落等因一摺內稱連日分兵勦壓共得賊人碉寨木城五十餘處殺賊二百餘人活拏賊番四名所獲氈毯刀矛烏鎗等物甚多等語又據明亮舒常奏阿爾古一帶寨落悉行攻克等因一摺內稱派兵分路攻克卡寨痛殲賊衆賊人從河沿逃竄被官兵截殺直至臨河或撈獲擒捉或用箭攢射賊人無一得脫共計生擒賊番八名割取首級耳

記三十餘件殺死賊人二百餘名擒獲刀矛及什物等項無算等語覽奏甚為欣悅此次兩路官兵各能爭先殺賊奮勇奪碉賊人已失險要不難指日蕩平皆由將軍叅贊等調度有方故能動合機宜同時克捷統俟大功告成特加茂賞其阿桂一路昨已降旨查明打仗出力各項兵丁賞給一月錢糧此次明亮一路出力之滿漢屯土各兵並著照前次阿桂軍營之例一體賞給以示鼓勵。○諭軍

機大臣等據袁守伺到川會同阿揚阿奏查審冀國勲一案內稱加價雇用短夫一節總不能徹底明晰其所審冀國勲供內稱前因各州縣解到長夫多有病逃屢催不補纔詳明解送津貼代雇應役再雜項差使內如過兵每百名准銷夫八十名或用至一百二十名我摺報內照例只開銷八十名至解到津貼我歷次收過銀五千一百八十餘兩歸在公項其未解銀兩如今算出墊用銀二萬

五千餘兩至實在加價雇用短蠻夫及茂州夫客夫等項共虧空多少銀兩未及算賬等語所奏供情甚屬游移站員自不止冀國勳一人其上下各站皆如是墊用虧帑乎此亦易查之事也此案冀國勳加價短雇之虛實多寡自應將該站長夫是否足額詳晰覈實即用夫時多時少夫數遞增遞減俱有按旬摺報可查其津貼加價亦必有經手之家人書役存記賬目可以覈對其如何侵冒花銷

亦有在站經手之人可以查審細心確覈無難水落石出至虎保供情尤關緊要前據阿桂稱面訊虎保共得過冀國勳加價銀二萬餘兩甚為確鑿今又稱細想總數約畧有二萬多銀子實在記不得確數等語南卡朋等供亦相同虎保係松岡站頭人領銀發價俱有衆夫頭經手其實共領銀若干自必有領狀賬目文案可據若逐一調查無難清理何得任意狡卸即虎保不能逐案親身赴領亦

必有同充頭人赴站領銀確據至查禮身任道員非虎保等頭人可比且此案從前經該員稟詳知之自必甚悉其如何侵蝕浮濫自應東公據實查稟若稍有瞻顧迴護意存遷就欲圖完案則查禮之不是更大總之此案屢經降旨嚴切訓示袁守侗阿揚阿等自當一秉公正覈實辦理務期審出實情以成信讞有一是必有一非事難兩立斷不可存偏向調停之見自取咎戾將此隨軍報發往諭令袁守侗阿揚阿據實查辦並傳諭查禮知之○又諭曰阿桂等奏科思果木本係賊酋緊要官寨勢居陡險碉堅牆厚攻打較為費力今阿桂既將舍勒固租魯等處碉寨悉行掃除並料思果木亦即迎刃而下阿桂既已抽調防兵五六十趕緊攻打薩爾歪寨落以截斷勒烏溝之賊即可迅上科布曲索隆古山梁直搗噶喇依巢穴自更勢如破竹而明亮一路亦經攻克阿爾古已出對河科布曲

之南下至臨河現即趕運大礮將對河賊卡
隔岸轟摧甚為得力是目下兩路官軍聲勢
倍為壯盛看來逆酋不過暫圖護死其手下
賊番自亦不能如前此之悉力抵禦逆酋力
量更不能支大功自可速成阿桂明亮等益
當努力為之指日掃穴擒渠以膺酬庸懋賞
○癸卯

上詣

皇太后宮問安幸瀛臺○諭曰喀什噶爾阿

奇木伯克公噶岱默特與貝勒鄂對俱於平
定回疆以前即投至伊犁歸附且在葉爾羌
喀什噶爾和闐等處打仗奮勉著有軍功是
以封為貝勒公爵原非恩封可比其鄂對之
貝勒噶岱默特之公爵即著世襲罔替不必
降等今噶岱默特病故公爵即著伊長子阿
布都爾滿承襲○督理糧餉四川總督富勒
渾浙江布政使郝碩奏十一月二十八日將
軍阿桂派兵分路進攻科布曲臣等同至前

敵見各官兵奮勇爭先搶上索隆古陡險之
處距山頂不遠勒烏圍一路官兵亦經奪占
科布曲山梁半截趕擊木城所需木植臣等
先已飭令糧員多撥人夫砍運現在兩處木
城俱各拏住並拉運大礮轟擊上下夾攻自
不難全行克獲同日復據報北路副將軍明
亮亦經攻克阿爾古地方糧運情形又應改
由勒烏圍渡河轉運較為省便所有臣等前
擬谷噶一路餉道尤須及早那移臣等於拜
摺後即自軍營起程臣富勒渾前赴沙冒礪
谷噶一帶沿途查勘道路安設各臺臣郝碩
前赴薩爾赤一帶督催該站員等將積米掃
數運完速帶人夫趕往谷噶一路加緊安設
不過數日即可完竣再巴占等站既經裁撤
所有積米俱應運貯勒烏圍兩路總匯之處
該處距北路軍營較近其北路原設之黃草
坪各站亦應酌量減裁以歸節省臣富勒渾
業已札商鄂寶審度情形隨宜辦理得旨嘉

獎○是月吏部奏定例滇省解運京銅自瀘州領運限九個月抵通換船換簍限六十日統計限十一個月如逾限一月以上者領解官革職戴罪管解委解上司降三級留任沿途催趲官員照催趲不力例議處悉按所過境內違限日期多寡分別罰俸降調革職又例載各省委員赴雲南等省採辦銅錫鉛觔有無故遲延逾限一月以上者領解官革職戴罪管解完日開復各等語竊思運京銅觔關係戶工二局鼓鑄固應上緊趲運嚴定處分而外省派赴滇黔諸省採辦銅觔等項亦均關緊要若同屬逾限一月以上一則議以革職一則例准開復未免輕重懸殊再逾限之期例文統言一月以上而凡不及一月并兩月以上至半年者多寡不等亦不應漫無區別且運京鉛錫與銅觔事同一例原例內專言銅觔不及鉛錫立法亦未詳備今臣等悉心酌議嗣後各省運京銅錫鉛觔除一切

章程仍遵舊例辦理如正限之外逾限不及一月者降一級留任委解上司照例罰俸一年逾限一月以上者降一級調用兩月以上者降二級調用三月以上者降三級調用四月以上者降四級調用五月以上者革職委解上司仍各降三級留任其各省派赴滇黔等處採辦銅錫鉛觔如於採買完竣起運之後沿途無故遲延逾限不及一月者照舊例免議一月以上者罰俸一年兩月以上者降一級留任三月以上者降一級調用四月以上者降二級調用五月以上者降三級調用至半年以上者革職再查運京銅鉛有無違限向俱於抵通後統行合計應請嗣後運京銅鉛等項過境如有無故遲延不在例准扣限之內者各督撫按照運員所遲月日將催趲不力之各地方官職名咨部俟該運員抵通後移咨戶工二部確覈除運員逾違統限例應議處者沿途地方官仍各按所過境內

逾限日期多寡分別罰俸降調革職外。至運員並未逾違統限例得免議者。其中途所過省分有逾程限。該地方官催趲不力。仍各予以處分。應令該督撫將銅鉛船隻入境所過州縣各程限日期逐一分晰覈算。咨明戶工二部存案。遇有違限。咨叅到部。如原限應行四日而行至五日以上者。專催官罰俸一年。督催官罰俸半年。應行四日而行至六日以上者。專催官降一級留任。督催官罰俸一年。應行四日而行至八日以上者。專催官降二級留任。督催官罰俸二年。應行四日而行至九日以上者。專催官降三級留任。督催官降一級留任。其餘多寡程限不同。皆照此例覈算。至已過州縣所違之程限。如入境後能為趲出者。該地方官應酌予紀錄一次。其有能上緊催趲。於未屆正限之先即已出境者。亦准予紀錄一次。以示鼓勵。如此詳悉定例。分別勸懲。則運員及沿途地方官各知趕緊趲

運自不敢遷延從事從之。江南河道總督吳嗣爵奏外河清口東西壩為全河最要關鍵。現在時已深冬。尚存口門寬四十五丈。臣已飭淮揚道松齡留心察看。即將東西壩先行次第接築。收蓄湖水。以資來春禦黃濟運。又邳州宿遷運河。每歲冬間擇要挑挖。以備次年重運。經臨今上游東省大壩業築做完。竣下游江南邳宿運河水漸消涸。臣與督臣高晉遴委幹員先行確估。臣即親赴該處逐段覈實。趲辦務期一律深通。以利新運。目下時逾冬至。臣嚴飭廳營將各處緊要埽壩分別簽掛樁板柳枝俾資防護。各工甚為穩固。各廳所辦新料已到十之五六。其餘可計日運竣足敷來歲修防之用。得旨覽奏俱悉。

大清高宗法天隆運至誠先覺體元立極敷文奮武孝慈神聖純皇帝實錄卷之九百九十七

高宗實錄

卷九十八

大清高宗法天隆運至誠先覺體元立極敷文奮武孝慈神聖純皇帝實錄卷之九百九十八

監修總裁官總纂官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲副都統軍功加十九級隨帶加二級又加二級臣董福內大臣戶部尚書鑲藍旗滿洲都統軍功紀錄五次

尋常紀錄十四次臣德琿經筵講官太子少保工部尚書紀錄六次臣曹振鏞等奉

欽修

乾隆四十年乙未十二月甲辰朔日食○諭

曰圖桑阿年老不能辦理副都統事務著以原品休致其鑲白旗漢軍副都統員缺著萬福補授○又諭昨賞給惠齡副都統職銜命往西寧辦事西寧地方統轄青海番子蒙古賞戴花翎易資彈壓著加恩賞戴花翎○乙巳諭軍機大臣曰富德奏稱遵旨嚴飭堅固防守以便乘機前進富德不以躁進失機固屬慎重但現在情形與前不同當兩路將軍兵未深入賊勢方張富德兵數無多未便輕

進是以僅令堅守要隘。牽綴賊勢。現今不但阿桂一路破險深入。即明亮亦皆克捷。前驅官兵逼近賊巢。逆酋方救死之不暇。又何能派兵侵我後路乎。富德此時當將後路應撤之兵酌量撤出。以圖進取。即如穆谷等處豈非險峻難圖之地。阿桂現已設法前進。攻取勒烏圍與噶喇依相近。明亮一路初亦難於得手。而今已屢戰有功。富德不乘此奮勉。豈俟阿桂等攻得噶喇依時始行進兵耶。富德

此時發兵前進。如能畧有聲勢。則三路並進成功。自當愈速。富德當盡力勉為之。○又諭據議覆盛京侍郎兼管府尹富察善奏請更易保甲一摺。已降旨依議行矣。奉省旗人與民人錯處。原無界址之分。自應給與門牌。編入保甲。以防奸匪潛蹤。所有該處旗員並應會同地方官一體稽查彈壓。富察善所奏自屬正辦。乃德風從前竟未籌辦。及此是必因與弘昫不合。竟將應辦公事有意膜視。實屬

任私誤公。甚為錯謬。德風著傳旨嚴行申飭。○軍機大臣議准盛京侍郎兼管府尹富察善奉天府尹銘通奏稱。奉天各州縣及旗莊地方旗民錯處。並無旗界民界之分。是以歷來俱係旗民官員會同查辦。一體給予門牌。若以旗人毋庸編查。恐旗民所雇流寓傭工。潛匿奸匪。雖有旗員查察。究不若編入保甲。旗民官員一體會查之周密。至奉省州縣及通判等官所轄地方遼濶。管界旗員較多。如

會同查辦。實足以資民員所不及。若止令民員辦理。遇有重犯。旗員前往查拏。民人以保甲非旗員應辦。或致抗違。兼恐旗員以無編查民人保甲之責。不肯實心究察。請將奉天保甲仍照向例。令旗民官員會同編查。應如所請從之。○吏部議准署湖廣總督陳輝祖奏稱。請將湖南清化順林大龍鄭家懷化。便水等驛丞六缺改為巡檢。仍兼驛務。應如所請從之。○禮部奏。乾隆四十一年正月初一

日元旦令節應行慶賀禮得旨是照例行禮奉

皇太后懿旨停止筵宴○丙午諭軍機大臣曰袁守侗阿揚阿等查審冀國勲虧短軍需銀兩一案查出發米底簿總計短銀夫浮加銀四萬三千四百餘兩驛運浮加銀一萬五千七百餘兩茂州夫浮加銀四千一百餘兩覈之原審浮加之數實多銀一萬四千零等語袁守侗等辦理此案查出底簿實據又買驛

幫運且於原奏四萬八千餘兩之外又查出一萬四千有零其草簿字跡均係隨時登記原本並非事後添造似可憑信從前文綬審辦此案時承審官員何以不將底簿查出覈對至松岡站領運夫頭虎保究係實領過銀若干更須根究明確况各站辦理糧運官員甚多何獨冀國勲一站遂至濫行加價虧短銀數萬餘兩之多必須逐層根究務得切實憑據方足以成信讞袁守侗阿揚阿承辦此

事原屬局外之人自應一秉虛公毫無成見將應查應詰之處悉行根究明確斷不可少存偏向意在調停了事倘辦理草率不實不盡致結案之後復留疑竇致他人更生議論則咎有攸歸惟伊二人是問將此由六百里傳諭袁守侗阿揚阿知之○軍機大臣議覆署四川總督文綬奏稱查甘省凱旋官兵共一萬數千名應由保縣茂州松潘一帶回營自保縣至松潘所屬之柴門關出川境交甘界中間計十二大站沿途應支口糧不少而自保縣以北糧食昂貴難以採買輓運又多糜腳費查茂州現有存倉麥莖四千餘石松潘現有存倉稞麥八千四百餘石米一千一百餘石所需回兵及夫役口糧約計不過三千石今於此項倉貯米麥內動用搭放已屬供應裕如即茂州無存倉之米而保縣係現在糧運正道臨時酌搭亦甚近便至所缺倉額俟來歲麥收價平後再行買補較為節省

應如所請得旨依議速行○丁未

上詣

皇太后宮問安○幸瀛臺○諭曰工部尚書閻循琦老成練達宣力有年洊歷正卿正資倚任前以染患膈噎特頒內府藥餌令其加意調攝冀得速痊茲聞溘逝深為軫惜著加恩晉贈太子太保並派散秩大臣一員帶同侍衛十員前往奠醊所有應得卹典仍著該部察例具奏○調兵部尚書嵇璜為工部尚書

禮部尚書蔡新為兵部尚書以吏部左侍郎曹秀先為禮部尚書○旌表守正捐軀之雲南昆明縣民溫榮妻戴氏○戊申

上御太和殿視朝文武陞轉各官謝恩○諭吏部侍郎員缺著劉秉恬補授劉秉恬現在軍營辦事其未到任之前所有吏部侍郎事務著工部侍郎董誥暫行署理○又諭戶部議駁巴延三等奏河東暫增二釐鹽價再請展限三年之處毋庸議一摺自屬照例辦理但

念該處場價未平其小鹽池六處甫經開採接濟所得贏餘未能補足前兩年歉收之數商力不無拮据著加恩照該撫等所請將從前暫增二釐鹽價再行展限三年俾轉運益資充裕○定西將軍尚書阿桂定邊右副將軍尚書公豐昇額叅贊大臣都統海蘭察副都統額森特奏查薩爾歪寨落共有三處對河有阿結占寨落兩處與薩爾歪隔河應援並即在官兵槍上山梁道路之旁若不掃除則剋日上攻難免旁顧臣分派官兵同時並進直抵薩爾歪寨落四面蹙登將薩爾歪三處碉寨占據其隔河之阿結占寨落兩處亦經福康安等同時力攻立即克獲諭軍機大臣等阿桂一路官兵每次進攻俱能克獲碉卡擒殺賊人甚為欣慰即當鼓勵我軍乘勝直搶科布曲索隆古以便迅擣噶喇依賊巢至明亮一路其聲勢尚不如阿桂一路之奮勇直前此時賊勢日蹙不特兩路將軍應同

心併力。務於歲內速成大功。以膺茂賞。即當德。亦當於此時相機進取。俾在事官兵同霑恩澤。以光奏凱旌庸之典。○調甘肅固原鎮總兵海祿為直隸天津鎮總兵。以湖廣長沙協副將圖欽保為甘肅固原鎮總兵。○己酉。孝惠章皇后忌辰。遣官祭。

孝東陵。○諭。據明琦等奏。哈密通判龍文。刻薄性成。凡遇過往一切支應。任意剝削。土爾扈特回至哈密。該員按名僅給羊肉一觔。至二三觔不等。以致土爾扈特等皆不願領。經明琦等聞知。嚴飭始改給羊隻。其柴炭燭油。仍多剋減。又挑取鋪家皮張。發給賤價。沁蔡二屯秋收糧石。勒收斛面二三升。種種卑污。請旨革職等語。此案龍文卑污貪婪。尚屬小節。其將土爾扈特等支應任意剝削之處。甚有關係國家優恤外藩。如各蒙古等俸祿。銀足半隻供應等項。承辦官員俱應加意照料。妥為辦給。不可絲毫虧短。俾得均霑實惠。况

土爾扈特等歸順伊始。尤非內地蒙古可比。若伊等中途有滋事之處。地方官自應嚴加管束。據實稟詳。如於伊等應得分例。任意剋扣。將來相率效尤。何以副柔懷遠人之意。此案不可不嚴行辦理。龍文著革職。於該處枷號示衆。以昭懲儆。明琦等奏摺內與挑取皮張。勒取斛面等款。一例聲敘。視為泛常。甚屬不知事體。明琦。松齡。俱著交部議處。○諭。軍機大臣等。前因李質穎奏。署東安縣李奉綸。辦理災賑不善。一摺。將冒濫字樣列入奏摺。立言殊未得體。且恐外間妄生議論。於賑務概從剋減。因將原摺改正發鈔。傳諭李質穎。嗣後奏摺留心檢點。令各省督撫一體遵。照。現據楊景素已延三。李質穎等俱陸續覆奏。似此有關民瘼。直隸近在畿輔。周元理接奉諭旨。自當即行奏覆。何以視等尋常。至今並未奏及。耶。朕念切民依。凡遇有關災賑事件。無不時刻留心。周元理何見未及此。著傳

諭周元理將因何不行覆奏緣由據實回奏
○又諭據陳輝祖奏遞解粵西廠犯楊懷萬
在鍾祥縣地方賄買替役王明舉開鎖脫逃
一案又據陳輝祖敦福奏解發廠犯巫朝龍
在江陵縣虎渡口賄買差役楊高開鎖脫逃
一案俱已批示交部此等廠犯本係私越邊
境滋事逃回內地者其罪本無可逭第念人
數太多因量其情節輕重分別新疆及各省
安插如有脫逃即於就獲處所照改遣人犯
例立時正法並豫飭沿途督撫嚴飭各屬小
心管解毋致疎虞乃分起押解以來各省經
過地方並未報有中途脫逃之事惟湖廣省
同日奏到二案俱係差役受賄縱逃則楚省
文武之玩視公務漫不經心均難輕貸而該
督撫之不能先事訓誡留心整飭亦可概見
陳輝祖敦福俱著傳旨嚴行申飭至所奏逃
犯楊德及賄縱之替役王明舉楊高業經拏
獲即行正法並將僉解之兵役發伊犁及問

實錄卷五十八

十

擬杖徒等罪自應如此辦理其逃犯巫朝龍
現在曾否弋獲未便令其久稽顯戮並著該
督撫飭屬上緊嚴緝務獲正法并著該犯原
籍之該督撫及經由之江西巡撫嚴飭一體
躡捕毋任潛蹤漏網所有僉差不慎并失察
之地方文武各官均有應得處分除外委陳
超羣既經自行獲犯功罪尚可相抵應予寬
免其已在本境獲犯之文武各員議處亦可
稍輕至巫朝龍一案之該地方官既已疎脫
於前又不即時緝獲議處應行加重並著該
署督等查明分晰叅奏交部議處將此一併
傳諭知之○又諭據李質穎奏查察鳳陽關
稅短少緣由因揀文辦理過嚴以致商販人
等裹足不前遞形短絀等語揀文因徵稅缺
額嚴諭竭力趲辦以致員役等專事刻覈商
販聞風退阻自屬辦理不善與從前方體浴
淮關覆轍正復相似第念其究因急公起見
並非侵蝕所有缺少稅銀該員已自請按數

賠繳自可毋庸置議。著傳諭李質穎再行留心察看。如此番查辦之後。棟文料理關稅。漸有起色。原可仍令接管。倘仍不能善為經理。著李質穎於明歲將換時。據實奏聞。不可稍涉瞻徇迴護。致滋貽誤。將此諭令知之。○大學士舒赫德奏。據宗人府奏稱。旌訥亨未入八分公。不應齊集。及禮部奏稱。會典內輔國公應行齊集之處。查典禮重輕。應以品級之等差為準。八分公與未入八分公。階級既屬相懸。則喪儀齊集。自不容漫無區別。據會典及則例開載。鎮國公。輔國公之喪。貝子以下。奉恩將軍以上。皆會喪。並未分晰入八分公與不入八分公字樣。定例原未詳明。自當另為酌定章程。使無牽混。臣等細繹會典。則例所載會喪之條。俱視身故之爵。優一等者為準。如貝子之喪。自貝勒以下齊集。鎮國公。輔國公之喪。則自貝子以下齊集。此指已入八分公者而言。固自秩然不紊。則未入八分公

之例。即可由此類推。臣等公同酌議。所有未入八分之鎮國公。輔國公喪儀。請自入八分之鎮國公。輔國公以下齊集。則體制既昭。等級自別。至鎮國。輔國。奉國等將軍喪儀。會典則例雖俱載有齊集之條。但宗人府查明久未舉行。徒屬有名無實。應請刪除。以歸簡要。又會典內開。鎮國公。輔國公身故。官給塋費。立碑銀兩。亦未分晰入八分公與不入八分公字樣。請一併酌議。嗣後官給塋費銀入八分公五百兩。不入八分公三百兩。立碑銀入八分公四百五十兩。不入八分公二百五十兩。如本身無功績可紀。未經賜諡立碑。則照例祇給塋費銀兩。查會典官給塋費項下。鎮國將軍五百兩。輔國將軍四百兩。立碑項下。鎮國將軍三百五十兩。輔國將軍三百兩。今宗人府查鎮國將軍以下。塋費一項。亦久不支給。自不便徒存虛名。應請一例刪除。以昭畫一。從之。○庚戌

上御乾清門聽政○吏部議覆廣西巡撫熊學鵬奏稱泗城府知府員缺請以候補知府董世明補授查泗城府知府嵇璜現在尚未開缺應毋庸議得旨董世明請補泗城府知府之處該部因嵇璜解任質審尚未開缺遂爾議駁殊屬拘泥成例計嵇璜等審案此時該省自己辦結所有泗城府員缺即著董世明補授以後有似此不合例者著該部聲明請旨○以翰林院侍讀學士曹文植為詹事兼

翰林院侍讀學士○辛亥

上詣

皇太后宮問安○幸瀛臺○辦理糧餉浙江布政使郝碩奏西路大兵已將科布曲山梁全行攻獲兩處官兵接通會合現擬分道進取噶喇依將軍阿桂擬欲移營科布曲山下申爾日礮橋之間糧道改由谷噶一路運供應裁各站積米軍火等項除色木多薩爾赤雪山根等站所存積米不多現已趕運完竣移

往谷噶一路安設其達爾扎克至密拉噶拉木等站共存米二萬餘石逐日發運旬日之內亦可完竣此項積米運至勒烏圍合之該站所存米統計三萬餘石其谷噶一路業已開運軍米自必源源而至足資接濟得旨嘉獎○琉球國中山王尚穆奏謹遣陪臣向崇猷蔡懿等進貢方物得旨覽王奏進貢方物具見悃忱知道了該部知道○以兵部侍郎景福充經筵講官○予金川陣亡肅州鎮總兵曹順祭葬如例入祀昭忠祠○旌表守正捐軀之山東平陰縣民侯廷林妻馮氏○壬子諭軍機大臣等據李侍堯等奏據海口營叅將王中立稟報擎獲在洋刼奪各盜犯巡檢劉毓琇起獲盜首洪阿漢並究出李阿集等私越外番得受偽職等因一摺所辦甚好安南黎阮二姓彼此相仇及阮翁聚之乘機覬覦原可置之不問至李阿集等以內地民人膽敢私越外番乘其內訌聽受偽職實屬

不法之尤。自應迅速審明。從重究擬。其搶奪金銀等物。及各犯現有貲財寄頓之處。俱著一併查明。抄沒入官。至兵丁郭英里聽受賄囑。已送番婦。亦屬藐法。並著嚴訊重究。沿海地方。遇有奸民在洋滋事。文武各員。即留心訪察。立時稟報。嚴拏究辦。宵小自當聞風。戢戢。海疆可期寧謐。粵省查辦此案。可見其平日巡防嚴密。所有查拏盜犯之叅將王中立。知縣汪奎。巡檢劉毓琇。及防護奸民之副將吳本漢。審拏奸民之知縣許憲。任果。俱屬實心能事。並著該督等出具考語。送部引見。將此由四百里傳諭知之。○大學士于敏中等奏。請設四庫全書。薈要處。總校官二員。將國子監監丞侍朝。候選內閣中書張能照充補。可否給與庶吉士銜。以示鼓勵。從之。○癸丑。緩徵浙江長興縣本年旱災田地額賦。○甲寅。上詣

皇太后宮問安。○諭曰。簡親王豐訥。亨前在軍營。甚為奮勉。承襲王爵以來。諸事敬謹。宣力勤勞。茲聞薨逝。殊深憫惻。加恩著派綿德帶領散秩大臣侍衛等。往奠茶酒。○又諭。據阿桂奏。署陝西興漢鎮總兵保寧。署貴州威寧鎮總兵特成額。於乾隆三十八年奉命前赴軍營。嗣經奏署總兵。節次打仗。無不勇往向前。於綠營事務。亦俱練習。但均係乾清門侍衛。是以兩年來。未請實授。今成功伊邇。凱旋時。應否令其進京供職。或令赴任等語。保寧著實授陝西興漢鎮總兵。特成額著實授貴州威寧鎮總兵。於大功告成後。俱各赴任。以後來京陛見。仍准在乾清門行走。○又諭。據周元理奏。審擬汎兵劉瑞等。窩賊夥竊行強一案。已批三法司覈擬。速奏矣。設汎駐兵。原以防緝賊匪。今劉瑞等。膽敢窩賊。夥竊行強。情罪實為可惡。亦屬從來未見之事。皆由該管營員。平日漫無約束。而該督及提鎮等。不

能實力整飭所致。今周元理僅請將本汛專管協防之千總外委革職。拏問而兼轄之都司副將止於革職及嚴加議處。仍視為尋常案件。殊未允協。若不重示懲創。以昭炯鑒。則凡係管兵之大小員弁。皆置管教兵丁於不問。營伍尚可問乎。所有此案兼轄之都司那當阿統轄之副將雅爾哈俱著革職。拏問。其前任天津鎮總兵永昌提督段秀林及該督周元理均著交部嚴加議處。○又諭。江西按察使員缺著白瀛補授。白瀛現在軍營辦事。未能即赴新任。所有江西按察使印務著海成於通省道員內揀選一員奏明暫署。○定西將軍尚書阿桂定邊右副將軍尚書公豐昇額參贊大臣都統海蘭察副都統額森特奏。科布曲山腿之克爾古什拉斯一帶係自勒烏圍前抵噶喇依正路。其格隆古一處在科布曲以下。勒隈勒木通克爾古什拉斯以上官兵現攻獲格隆古克爾古什拉斯各碉。

卡勒隈勒木通賊人尚復死守。現在移礮往轟。以便相機搶占。諭軍機大臣等連日盼望阿桂等一路捷音甚切。今雖未能即得賊人要害山梁。而旁近寨落屢有克獲。亦足翦賊番羽翼而褫其魄。若能占得科布曲及索隆古兩處山梁。便可從上下壓直勦噶喇依其勢更易。其中惟舍齊喇嘛寺賊人或尚於彼聚守。然乘勢深入。軍氣奮揚。彼疲殆之賊自難支禦。則掃穴擒渠。諒應剋期蕩事。阿桂等惟當善體朕意。速集大勦。○兵部議准。兩廣總督李侍堯疏稱番禺縣燕塘墟地方相距村莊自數里至一二十里不等。四路通衢。奸匪易於混跡。誠為衝塗要區。請於墟東飛鼠山上添建汛房。以資巡察。所需兵丁於廣州協右營等處目兵內抽派十一名。撥赴駐劄。將大楓岡汛村莊五十八處撥出三十九鄉歸入該汛經管。均應如所請。從之。○乙卯諭曰。志信年老著留京。仍在阿哥書房行走。遇

有侍郎及內閣學士缺出軍機大臣具奏請旨○以正藍旗滿洲副都統德保為正黃旗漢軍都統○丙辰諭曰豐訥亨所遺鑲黃旗領侍衛內大臣員缺著阿桂補授阿桂功成凱旋以前著誠郡王弘暢署理其弘暢所署鑲白旗護軍統領事務另行派員署理○以御前侍衛和坤為正藍旗滿洲副都統輔國將軍景熠為鑲白旗護軍統領○補盛京禮部侍郎志信為通政使○調廣西巡撫熊學鵬為廣東巡撫以湖北布政使吳虎炳為廣西巡撫○丁巳以通政使全魁為盛京禮部侍郎○以故輔國將軍德爾登額子莽古齋襲職○予故安徽布政使李學裕入祀鄉賢祠○戊午月食○諭前據李侍堯奏秦廷基袒護嵇璜向其游說求情一事該督既能洞燭其奸又秉公據實劾奏實屬持正可嘉已降旨交部議敘并將此案交熊學鵬嚴審具奏今據熊學鵬奏到審明情節則秦廷基

之袒庇嵇璜實因畏懼尚書嵇璜已自認不諱殊出情理之外業將審擬一摺交三法司覈擬具奏矣至嵇璜不過一尚書且非朕深為倚任之人何至即令外間畏憚若朝中尚書聲勢即可傾動至此則日在朕前之大學士舒赫德于敏中又當何如此必嵇璜向來好與外官交結以致依草附木之輩輒為瞻顧伊弟以示迎合用情雖此案審無嵇璜囑託情弊原可無庸深究設有其事必將嵇璜重治其罪斷不稍為曲貸然身為尚書竟令外省揣承意指必其平日有以致之可不知所愧懼乎在廷大臣受朕恩眷理宜小心謹飭以副任用即如于敏中程景伊王際華俱朕所親信者伊等亦能謹凜自持看來漢尚書中惟嵇璜不免與外吏稍通聲氣前此裴曰修亦間或有之然任事不久未至為衆所屬目是以不蹈過愆而嵇璜現有此案則顯然昭著矣若就嵇璜辦事而論較之王際華

實有過之無不及而小心謹慎之處則遠不如朕所以於嵇璜不肯委以重任且時加訓飭提撕俾知儆覺諸臣各撫心自問朕所評論果皆切當否乎朕臨御四十年一切人情物理何事能逃朕洞鑒若內而大學士尚書外而督撫不過二三十人之居心行事尚不能察見底裏其何以知人任使撫馭海宇乎幸當綱紀肅清之時內外諸臣尚不敢稍有縱越即有未能精白之處亦不敢於朕前嘗試此即諸臣之福嵇璜嗣後惟當改悔思愆深自斂抑無負朕教戒成全之意至嵇璜失察邊民出口此乃恒有之事不過公罪處分部議時本可原情留任今有此一節轉不能復邀寬宥是秦廷基之逢迎瞻徇康坦獄之換犯教供不但身獲重戾其於嵇璜亦所謂愛之適以害之耳外省此等惡習實所常有可不各思痛加湔滌乎此於吏治人心大有關係用再明白宣示通諭中外知之○以四

川按察使李世傑為湖北布政使四川驛傳道杜玉林為四川按察使○署雲貴總督圖思德疏報雲南昆海沿邊乾隆三十九年開墾馬廠草地一千九百畝有奇○是日丙申年立春順天府進土牛春山寶座

大清高宗法天隆運至誠先覺體元立極敷文奮武孝慈神聖純皇帝實錄卷之九百九十八

大清高宗法天隆運至誠先覺體元立極敷文奮武孝慈神聖純皇帝實錄卷之九百九十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣等謹將

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣等謹將內大臣戶部尚書領侍衛內大臣滿洲都統軍功紀錄五次

尋常紀錄十四次臣等謹將經筵講官太子少保內閣學士臣曹振鏞等奉

敕修

乾隆四十年乙未十二月己未

上詣

皇太后宮問安。○御乾清門聽政。○諭兩淮鹽課。例限次年二月奏銷。前以丁亥己丑兩綱。因該處鹽場歉收。是以准展至八月。今乙未綱奏銷。復請展限。該部議駁。自屬照例辦理。但念該處場竈。偏被旱災。歉產滯運。商情不無拮据。著加恩將乙未綱奏銷。准其展至明年八月造報。至稱淮北各商。上年被水。辦鹽實多竭蹶。請將丙申以後四綱。帶完銀二十

二萬餘兩。並著加恩准其展限四年。分作八年完納。以紓商力。○以故一等順勤侯馬國銘子官正。一等延恩侯朱紹美子貽鳳。二等子白忠子明。三等子察哈爾策凌端多布子班珠爾。三等子安泰子伊魯爾圖。一等男祖學讓子裔興各襲爵。○予故工部尚書閻循琦。祭葬如例。謚恭定。○庚申。諭本日兵部奏將不繳臺費之革職千總陳士封。請交刑部治罪一摺。已依議行矣。此等不交臺費之員。刑部照例按數定擬。最重不過杖徒。陳士封係微末弁員。於力既不能完繳。亦只可如此辦理。若職分稍大。或曾為州縣之員。緣事坐臺。其臺費自應按限交足。如或過期不繳。即屬有意遷延。或該員知逾限不完。部叅治罪。不過問徒完結。轉得借此即回內地。適以遂其私智。殊未允協。著交兵部存記。嗣後如千把未弁坐臺。不繳臺費者。該部仍照舊例奏請治罪。其職分較大。及曾為州縣以上之坐

臺各員。如已滿三年。不能按期繳費。即將該員永遠留臺。不准復回內地。以為觀望取巧者戒。○諭軍機大臣曰。阿桂等將勒隈勒木通礮卡。悉行攻克。殲賊甚多。將軍及將士等。並皆實心出力。朕深為嘉慰。惟是現攻之科布曲。索隆古。兩處山梁。即能剋期得手。尚隔舍齊喇嘛寺一隘。方能直擣噶喇依。或官兵乘勝深入。賊眾難以復支。掃穴之功。易如破竹。自屬最善。阿桂等務當仰體朕意。努力速為之。○以故三等子張世芳子秉聰襲爵。○以光祿寺卿耀海為太常寺卿。○辛酉。諭軍機大臣等。三法司議薩載題陳八戳死陳勝章一案。擬議兩歧。駁令再行確審之處。所駁甚是。已依議行矣。此案該撫等援引罪名。一命兩抵。太覺錯謬。若陳裕章將伊兄陳勝章用繩套頸。復喝令人毆打。以致斃命。即與自毆胞兄致死無異。自應問擬斬決。即不應復將陳八擬以絞抵。今陳勝章之死。實係陳八

之木尺戳傷。屍格具在。既將陳八擬絞。何得復將陳裕章仍擬斬決。况套之與縛。迥不相同。若陳裕章將伊兄手足拴縛。不能抵護。致為人毆斃。則其死由於縛。陳裕章仍難追殺兄之條。今陳裕章止將伊兄用繩套頸。其死尚堪抵格。不期為陳八毆傷殞命。是陳勝章之死。實由於毆。而不由於套。陳裕章止應律以套兄罪名。豈宜遽擬重辟。此等情理。顯而易見。自當平心定讞。事關生死出入。尤不應妄涉深文。因查閱承審之臬司。則係龍承祖。在他。人或尚可云未諳律例。龍承祖向在刑部。素稱明練出色之員。是以用為臬司。何於此案。審擬舛謬若此。則該員平日所謂諳習刑名者。又安在耶。豈得一臬司。即心滿意足。一切皆不留心辦理乎。著傳諭薩載。龍承祖將因何如此問擬。抑或另有別情之處。各令其據實明白回奏。○督理糧餉四川總督富勒渾。山西巡撫鄂寶。浙江布政使郝碩。河南

布政使顏希深奏。大兵攻獲則朗噶克了口。乘勝長驅。直取瑪爾古當噶。本月十七。官兵又將瑪爾古當噶全行攻克。現今西路進取舍齊喇嘛寺。北路攻抵獨松。不數日間。即可蕩平賊境。所有一切軍糧軍火。自應通盤籌畫。用歸節省。查西路自大板昭至勒烏圍各站。存米五萬餘石。北路附近軍營各站。存米一萬三千餘石。又自楸砥至撒拉各站。存米五萬餘石。此項積米。在大板昭以前者。應飭運交勒烏圍存貯。其在大板昭以後者。應由布朗郭宗一路運交美諾存貯。以上統計米十餘萬石。除供支兩路前敵。後路兵夫。及應付凱旋官兵外。勒烏圍美諾兩處。尚可餘米三四萬石。詢之將軍阿桂。促浸償拉地方。約留防兵六七十名。以此覈計。足敷防兵二年有餘之糧。已屬充裕。至軍火一項。兩路現存火藥。紅銅。銅礮。生鐵。火繩。鉛子等項。均屬充餘。凱旋之後。存剩軍火。即可留為防兵駐守。

之用。所有軍糧軍火。應行停止。再大兵即日凱旋。美諾以前應添各站。業已指調各員加緊安設。其卧龍關一帶舊站。每站原安夫一百名。未免不敷應用。查大板昭一路。現經停運。無用多夫。即將該處一帶站夫。分撥一半。移赴卧龍關一帶。均勻安設。不但可免內地派調之煩。亦且應付從容。軍行更得迅速。得旨嘉獎。○壬戌。

上詣

皇太后宮問安。○諭軍機大臣等。今日鐘音等奏到李阿集夥犯在安南。聽受阮翁袞偽職。逞兵滋事一案。據拏獲自安南回閩之歐盛祖。王四海等。供稱安南黎姓。駐劄東京。本受我朝封號。其西南一帶。向為阮姓占踞。近因阮王身故。庶子繼立。有阮岳。即阮翁袞。自稱西山王。以除奸立嫡為名。招集內地民人李阿集。李阿智。分管兵馬船隻。爭得地方。并索詐民番。受職役使。嗣有東京王。遣國老帶兵

攻擊。阮岳敗走。李阿智、李阿集等始各分頭逃竄等語。此案前據李侍堯節次奏報。拏獲各犯訊供。止稱阮岳招集民番。構兵滋事。旋因兵敗人散。並無東京王遣國老帶兵擊敗之語。今閩省歐盛祖等所供。此一節情事。與粵省原供不符。黎阮二姓素來不睦。今阮姓自相構釁。與黎姓本無干涉。黎姓之王自不值為其發兵攻擊。或係黎姓欲乘阮姓內訌。借興兵靖亂為名。希圖吞并其地。以除後患。亦未可定。此案李阿集等各犯。現在廣東。著傳諭李侍堯。即速詳加審訊。務得確實情節。錄供奏聞。再前據該督奏。查抄李阿集在船搶劫各物。得有平定玉符一件呈進。此外有無珍寶之物。合計資財。共有若干。未據奏及。著李侍堯再行查明。李阿集所有財物內。如金珠等項。即奏明解京。其銀兩即存該省。入官充用。粗重什物。及田產等項。變價歸公。將此一併傳諭知之。○宗人府奏請應封宗室

明該等二十人。照考試繙譯騎射等第。將應得品級襲封。得旨。明該、明贊俱投為奉恩將軍。文獻與瑞明充宗敏。永萼俱投為一等奉國將軍。弘起、綿佐、崇寧俱投為三等輔國將軍。永瑤、亮瑚俱投為二等鎮國將軍。永琨投為不入八分輔國公。恒慶、永育、恒伯俱投為三等奉國將軍。永聚投為一等鎮國將軍。永蕃、賓靖俱投為二等輔國將軍。晉昌投為一等輔國將軍。○以侍講學士朱珪著日講起居注官。侍講王大鶴充日講起居注官。○豁除江蘇丹徒縣坍沒田地六十頃四十九畝。有奇額賦。○癸亥。軍機大臣議覆據陝甘總督勒爾謹奏。稱陝省有驛州縣。通川省大路者居多。即僻路驛馬。俱幫貼棧內。現在無可更調。而滿漢各營馬匹。除隨帶之外。亦屬無幾。擬於西安滿營內撥馬四百匹。通省綠營內撥馬四百匹。先期押赴漢南一帶。俟有紅旗信息。即星飛趕赴川省之廣元、昭化等處。

分站應用。又查陝省自寧羌州入境。至河南閿鄉縣出境。計程一千六百一十里。酌擬安設馬站十六處。每站安馬二百匹。惟雲棧以內。南星留壩。馬道褒城。寧羌五站。尤為險峻。各加馬一百匹。共需馬三千七百匹。擬於甘肅各營驛內。抽撥馬二千匹。在秦階一帶餵養。豫備飛調入棧應用。晉省協濟馬一千匹。在潼關平陽蒲州一帶餵養。以備調赴華陰。以西寶雞以東應用。其餘不敷馬七百匹。并需備餘馬。擬雇民馬應用。又查棧內山多人少。撥送官兵軍裝行李。雇夫不易。且恐行走遲延。酌擬棧內雇備健騾馱送。棧外雇備大車接運。至西安滿兵暨陝省綠營兵。應由廣元一路回陝。甘省綠營兵。應由保縣茂州松潘一路回甘。滿兵每起四百名。綠營兵每起五百名。所有官員乘騎馬匹無多。自可查照成案酌辦。均應如所請。得旨依議速行。○吏部議覆署雲貴總督圖思德奏稱雲南騰越

州。為邊關扼要。經奏准改協為鎮。移兵添駐。所屬南甸地方。民夷雜處。每年支放錢糧。稽查奸匪。均需文員會同彈壓經理。查騰越州判一員。住在同城。係屬閑曹。今請移駐南甸。責任分防。較為得用。應如所請。從之。○署四川總督文綬奏。西北兩路官兵。屢經克捷。現在積峙充盈。可供至明年二三月。自應調劑盈虛。隨時酌辦。將各府州縣。應豫運明春正二兩月之米。除現在已經領銀者。十分之四。仍聽運供給外。其未曾領銀者。尚有十分之六。即飭令概停豫運。統俟將來酌量情形。再為籌辦。總期隨時調劑。既不致積貯過多。而各路軍食。與日後防兵口糧。均歸足用。得旨嘉獎。○以鴻臚寺卿永信為光祿寺卿。○旌表守正捐軀之河南永城縣民常二女。常氏。浙江江山縣民吳發富養媳周氏。○甲子。諭據明亮等奏。由達撒谷進兵。連克三道險要。山梁已將沿河格爾則寨落。一併攻取。通計

攻得賊人大寨落五十餘處。木城碉卡三十餘座。搶獲鐵礮及鳥鎗刀矛什物甚多。殺賊百餘。生擒賊番二名等語。覽奏欣慰。官兵等鼓勇直前。攻堅殺賊。甚為奮勉。亦由明亮、舒常等調度有方。故能所向克捷。痛加勦洗。均屬可嘉。其副將軍叅贊統俟大功告成。特加茂賞。所有帶兵之各領隊將弁等。著查明咨部議敘。其派出越險攻碉之索倫、吉林及綠營官兵二百四十名。及隨同分隊出力之屯

練土兵。並著查明賞給一月錢糧。以示鼓勵。
○乙丑

上詣

皇太后宮問安。○幸瀛臺。○回部葉爾羌三品阿奇木伯克貝勒品級鄂對等十一人瞻覲。○丙寅。諭據阿桂等奏官兵攻克格隆古、科布曲、索隆古、們都斯、得木巴爾一帶山梁、碉卡寨落。並乘勢搶占安布魯木山、峯、碉卡。現由索隆古進攻。即期迅擣賊巢等因。一摺。覽

奏深為欣悅。此次攻克賊人大碉寨一百餘處。獲礮九尊、鳥鎗刀矛等物無算。殺賊二三百名。拏獲活賊二名。官兵等越險直進。鼓勇摧堅。所殲醜類甚多。且扼賊人要隘。皆由將軍等調度合宜。叅贊及諸將領等董率銳進。官兵並能奮勇出力。均極可嘉。而所得勞績亦較前數次更大。阿桂、豐昇、額海蘭察、額森特及在事之將領弁員等。俱著交部從優議敘。以示獎勵。仍俟大功告成。另沛酬庸渥典。

○諭軍機大臣曰。阿桂現據之索隆古、山梁距噶喇依賊巢不遠。今阿桂乘勝乘入。勢如席捲。雖據報投番等供。賊又欲於鄂依、楂爾丹布、哈爾斯拉瓦等處修築碉卡抗拒。現在官兵進攻迅速。賊來自皆措手不及。即或舍齊喇嘛寺。尚思聚眾力守。然距賊巢愈近。賊計愈窮。而賊膽亦愈落。以我勝兵臨之。不啻摧枯拉朽。由彼直擣噶喇依。自可剋期掃蕩。看來此事擣穴已有把握。而擒渠則宜加意

妥籌今索諾木及老土婦阿倉阿青等於噶喇依甲雜兩處往來無定而莎羅奔甲爾瓦沃咱爾則逃於庫爾納其守科布曲之大頭目布籠普阿納木當噶拉阿納木及丹巴沃咱爾並逃回賊巢其餘莎羅奔等二人亦在噶喇依久住此等皆必須擒解京師明正典刑此次征勦金川原因索諾木等之負恩反噬必將逆黨全獲獻俘方為全美阿桂明亮等至時當多方搜捕務獲勿使一人得脫刑

誅又據投番供出山塔爾薩木坦現在來達木帶兵其人亦係小金川助惡大頭人必應擒獻者且來達木為進攻甲雜之路所必經山塔爾薩木坦向來頗能帶兵打仗明亮等進勦時尤宜加倍留神設法攻克並將山塔爾薩木坦擒獲來京勿使免脫○丁卯署四川總督文綬布政使銜李湖奏川省軍需報銷自乾隆三十六年軍興日起至三十八年六月止動放銀一千九百七十餘萬兩現據

各屬請銷之數大率照例造報似應准銷及檢閱底案內原報文領並藩庫月報冊開支放之數有當日領數本少而現在應銷創價轉多應行找領者蓋緣辦事之初章程未定承辦之員無所遵守恐干駁查擱節請領寧少無多是以不能畫一但現覈諸成例有減無浮是已領之銀數即實發之工價自毋庸援例找領臣等現除原行牌檄及文領內聲明墊辦有據者始准找領外其餘悉以底案文領為憑照數覈銷不准找給以歸節省而杜流弊再查官運背米長夫照乾隆十二三年金川舊例折給口糧銀兩一款檢閱原卷此項折支口糧銀兩自乾隆三十六年官運以來藩庫從未給發各屬亦無有具報墊辦者是折支雖有明文奉行並未照例今為期日久事後補領斷難按名給發適以啟浮冒而滋流弊查舊案計需口糧折價不下二十萬兩臣等現將此款覈刪庶實支實銷經費

皆歸有著。得旨所辦是知道了。○戊辰

孝莊文皇后忌辰遣官祭

昭西陵○

上詣

皇太后宮問安。○諭曰。四阿哥奏稱履親王原有張家口外牧場。現在並無牧放馬匹牲畜。其牧場蒙古無人約束。恐其生事。請派人管束等語。此項牧場既無牧放牲畜。想來必有開墾之地。著交常青查明酌量派委差使。以

便管束。其地業經開墾者。著官辦取租。將每年所收之租給與四阿哥。○又諭。李侍堯奏接兵部咨。粵東糾黨結盟之犯不數月間竟有五案。應照本例加重議處。其武職雖經協拏。從前究有疎縱。未便即予免議等因。行知到粵。但思各員弁協拏屢獲破案。宵小日就斂跡。若因破案甚多。不准免議。恐蒼猾之員以任事為受愚。以取巧為得計。即有見聞亦必暗為消弭。兇徒轉多漏網。請將已經協拏

者。照例寬免。未經協拏者。予以應得處分。所奏是已。於摺內批示矣。地方文武平時不能約束稽查。致匪徒糾黨結盟。屢行犯案。自應示以重懲。如果實力查拏。有犯必懲。則藏奸自少。即所屬地方犯案較多。若知上緊緝擒。功過原可相抵。設仍予以議處。轉致各員弁自顧考成。暗為消弭。於懲治奸匪。整飭吏治均屬無益。李侍堯此摺為挽回積習起見。所奏甚是。然亦為該督向來董察屬寮不事姑息。朕所深信。始可為此言。若他人固未可輕為倣倣也。此案著照李侍堯所請行。並將此通諭知之。○諭軍機大臣等。刑部議駁江西崇仁縣革監黃金龍改契折占余牛房屋山場。逼脅代筆之羅寄五誣證。致令自縊一案。所駁甚是。已依議行矣。此案前經該部據咨駁查。以黃金龍捏改契紙。硬將余姓房屋折毀。復將山場樹木砍伐。逼令原契代筆之羅寄五誣認絕賣。閉置空房。以致羅寄五自縊。

身死其中不無有心致死情事。該撫僅議軍罪殊未允協。至黃金章曾聽伊父誣告及目擊伊弟禁閉逼命毫無禁阻議以杖贖開復監生亦失平允。駁令妥議。該撫即當遵駁改正。乃仍徇於前議止將黃金龍改發黑龍江充當苦差。黃金章改為實杖仍予開復。雖罪名畧有增加而案情仍無更改殊屬有心迴護。州縣辦理命案關涉紳衿富戶瞻徇情面曲予開脫致令死者含冤兇徒倖免最為吏

治民生之害。此等劣員即應叅劾重懲。查此案係臬司歐陽永禔任內審轉其人性近沽名近年來益復衰頹不能振作致審案舛謬若此使其尚存必不稍為寬貸至海成平日辦事尚肯認真何竟含糊膠滯若此海成著傳旨申飭並令即速提犯到案將部駁各情節再行虛公研訊務得實情另議具奏。○是日起

上以歲暮裕祭

太廟致齋三日。○已巳諭據明亮等奏稱二等侍衛扎拉克巴圖魯進財保三等侍衛特充阿遇戰奮勇打仗此次攻取達撒谷地方復又超衆勇往請各加恩等語著照明亮等所請進財保著補授頭等侍衛特充阿著賞給瑪桑巴圖魯名號仍照例賞銀一百兩。○諭據明亮等奏本月十四日分派官兵攻克獨古木上下寨落乘勝搶占乃當之布吉魯達那兩道山梁等因一摺覽奏深為欣悅此次

攻克山梁焚燒上下寨落八十餘處生擒番童二名殺死賊人一百餘名搶獲鐵礮一位將領等均屬奮勉而奎林和隆武尤鼓勇先登懋著勞績各官兵亦皆踴躍思効銳氣倍加皆由將軍叅贊調度有方用能所向克捷甚屬可嘉。明亮舒常及在事打仗出力之將領員升等俱著交部從優議叙仍俟大功告成另沛渥恩以酬勲績。○諭軍機大臣等明亮等奏官兵攻打布吉魯達那時賊皆望風

披靡各思潰竄其頭人在後用刀驅之亦不復相顧是番衆之心已散未必復能如前次之併力死守故投出之人日多一日昨因阿桂等奏於投番內挑選精壯者留營打仗恐番衆窮蹙投降其心未必可信不宜留於肘腋之間令解往成都監禁今看番衆來降情景自屬無他著傳諭阿桂等查前次留營各番如其中有懷叵測形迹可疑者不妨即於軍前正法其尋常投出番衆止須善為撫輯勿使驚疑但現在營中兵數頗多無復藉資番人之力嗣後續有來投番衆祇須照前安插勿多選留營尤為穩當將軍等均當斟酌妥辦全善○以杭州副都統扎什扎木素為山海關副都統江寧副都統明貝為浙江杭州副都統協領墨爾根為江寧副都統○

庚午以歲暮裕祭遣官祭

太廟中殿

後殿○諭曰阿桂等奏官兵由索隆古進攻所

向克捷現據噶占山梁整兵直擣噶喇依等因一摺據稱於本月十三日分派將領帶兵進攻各官兵一呼直前先將克爾納古車歪里達爾卓克三處碉卡木城均行克取遂從山坳繞道攻開賊匪所積攔木一面留兵占據山梁一面越過山腿直取甲木爾復回攻朗阿古碉寨衝上山梁克獲得拉古碉卡截殲賊匪甚多又分頭攻取布哈爾地方占奪則朗噶克梁上了口各碉同時並攻得庫爾

納達爾卓克氣什機等寨復由則朗噶克了口下至溝底將噶爾噶木勒烏果木得克轟烏各寨落悉行焚燒連日又將庫爾納額木里多巴斯科得里角噶占馬爾角等處並皆克取共攻得官寨三處碉寨四五百處擒獲九節礮一尊烏鎗刀矛等物無算殺賊甚多官兵現駐噶占山梁於一二日內順梁下壓直擣噶喇依賊巢已有摧枯拉朽之勢又另摺奏有頭人色木里雍中願為官兵內應望

塵跪迎並有大頭人布籠普阿納木帶領所屬寨番男婦千餘來降各等語覽奏深為欣悅此次官兵爭先殺賊奮勇進攻連日克獲賊人碉寨甚多現在乘勢深入直擣賊巢且逆酋平日所恃之大頭人亦率屬出降可見賊中勢已瓦解指日可期掃穴擒渠皆由將軍叅贊等調度有方故能動合機宜屢戰克捷而海蘭察尤勇畧超羣諸將領並皆奮勉出力實屬可嘉著將阿桂豐昇額海蘭察額森特及領隊大臣並將佐員弁俱交部從優議敘以示鼓勵仍俟大功告成再沛酬庸茂典○諭軍機大臣等前因阿桂等攻克科布曲索隆古山梁即可乘勝下壓已成破竹之勢今官兵果能越過旁岔山腿推開險要殲賊奪碉甚多並掃除一切附近寨落現駐噶占山梁之上距噶喇依甚近賊勢已極披靡從此直擣賊巢自同摧枯拉朽至達爾卓克頭人色木里雍中願為官兵內應望塵跪迎

並招降大頭人布籠普阿納木伊等即率所屬千餘人並與迷輸喇嘛一同投出布籠普阿納木係助惡大頭人向為逆酋所倚仗且近從科布曲逃回若非實見賊滅亡在即亦斷不肯輕率出降其色木里雍中甫經投出即隨軍打仗殺賊自當分別加恩使蟻衆聞風心動更必勢成瓦解其餘黨逆頭人或有不思效者并可期罪人皆得亦是用兵權宜之法布籠普阿納木本係其大頭人著賞孔雀翎給以四品頂戴其色木里雍中著賞戴藍翎給以六品頂戴此內色木里雍中尤屬誠心如再有出力自効之處並不妨量為錄用其布籠普阿納木雖膺章服之榮仍當不動聲色留心察防方為妥善○陝甘總督勒爾謹奏陝甘兩省馬步糧缺共三千一十八名從征步守等兵均効力疆場功在垂成應加鼓勵請將陝甘扣存馬兵一千一百四十七名於軍營出力之步守兵選補其步守

兵缺以軍營出力之餘丁挑補其扣存步守
兵一千八百七十一名照例挑選補額報聞
○以貴州黔西協副將國伸泰為廣東高廉
鎮總兵○辛未拾祭

太廟

上親詣行禮○遣官祭

永陵

福陵

昭陵

昭西陵

孝陵

孝東陵

景陵

泰陵○遣官祭

孝賢皇后陵

端慧皇太子園寢○遣官祭

太歲之神○軍機大臣議覆督理糧餉吏部
右侍郎劉秉恬奏稱僭拉促浸地面添駐營

汎揆之地勢情形不外美諾底木達大板昭
勒烏圍噶喇依等數處查日耳現存糧二萬
石除酌留凱旋兵糧外俱應取道沃日明郭
宗儘數運赴美諾以備各處支食撒拉大板
昭存貯之米除酌留外應由烏爾當一路撥
運底木達等處勒烏圍一帶餘存之米應由
沿河分運噶喇依等處其南路協運木池之
米已運赴覺木交如覺木交尚有存貯亦趕
運扎烏古等處庶皆可就近酌撥又秋砮一
路自汶川至沙壩每站先酌存米四五百石
以為凱旋兵夫口糧如有餘剩一概運往撒
拉其草坡一路自桃關至木耳每站亦先存
米五六十石以備兵夫口糧如有餘剩一概
運往美諾又查西路現設藥局指日攻克噶
喇依所得必更有增添應將臨時餘存之火
藥火繩鎗子等項照營制大小酌量兵數派
撥分貯又查各路軍營鑄成銅礮將來凱旋
後臨時酌留數位分存各營汎餘俱飭令鎔

銷無論在營在途。全數運交省局鼓鑄。又查各路軍營打出礮子。及存用生鐵。不下數百萬觔。不便聽其散而無稽。應將附近美諾一帶者。交美諾等處營汛收存。附近噶喇依勒烏圍一帶者。查照道路遠近。運交各該營汛收存。將來屯田農具所需。即可取資於此。均應如所請。得旨依議速行。○壬申

上詣

皇太后宮問安。○御保和殿筵宴朝正外藩。左

翼烏珠穆沁和碩親王朋蘇克喇布坦。科爾沁多羅郡王和碩額駙齊默特多爾濟多羅郡王納旺色布騰。鄂勒哲特穆爾額爾克巴拜。多羅貝勒三音察袞。固山貝子班珠爾。輔國公色當噶瑪勒和碩額駙敏珠爾。多爾濟雅喇木丕勒二等台吉班珠爾。濟克濟扎布。錫第喀喇沁多羅郡王喇特納錫第。固山貝子多羅額駙扎拉豐阿。輔國公拉扎布。和碩額駙雍庫爾忠袞。楚克扎木素固山額駙敦

珠布色布騰。二等塔布囊丹巴多爾濟。巴林多羅郡王巴圖輔國公和碩額駙德勒克多羅額駙丹津。一等台吉索特納木多爾濟。敦漢多羅郡王喇什喇布坦。固山貝子固山額駙羅布藏。錫喇布。垂濟扎勒。輔國公多羅額駙桑濟扎勒。和碩額駙朋蘇克喇錫。二等台吉巴勒珠爾喇布坦。濟克濟扎布。土默特多羅貝勒索諾木巴勒珠爾。翁牛特固山貝子圖們巴顏。一等台吉旺舒克。二等台吉袞布車布登。鄂爾多斯固山貝子丹巴達爾濟。喇什達爾濟。烏喇特鎮國公噶勒桑車凌。阿巴噶。輔國公齊巴克扎布。蘇尼特輔國公羅布藏。車凌克什克騰扎薩克。一等台吉囊濟特扎布。奈曼一等台吉素彌喇。郭爾羅斯固山額駙素瑪第。右翼喀爾喀車臣汗車布登扎布。和碩親王固倫額駙拉旺多爾濟。多羅貝勒袞布多爾濟。固山貝子巴爾準多爾濟。伊達木扎布。鎮國公當蘇龍。輔國公德勒克多

爾濟三丕勒敦多克扎薩克一等台吉三都
布多爾濟額林沁多爾濟一等台吉齊旺多
爾濟袞楚克扎布厄魯特和碩親王和碩額
駙羅布藏多爾濟公品級一等台吉旺沁班
巴爾杜爾伯特和碩親王車凌烏巴什固山
貝子博第四等台吉鄂勒哲鄂羅什瑚奈曼
多羅郡王拉旺喇布坦蘇尼特多羅郡王車
凌袞布回部郡王品級多羅貝勒霍集斯貝
勒品級鄂對輔國公圖爾都額色尹和什克
扎薩克一等台吉瑪木特阿魯科爾沁多羅
貝勒達克丹綽羅斯多羅貝勒富塔喜二等
台吉納木扎勒輝特輔國公旺扎勒敦多布
扎薩克一等台吉拉克沁噶喇青海扎薩克
一等台吉根敦扎布土爾扈特扎薩克一等
台吉烏爾津三等台吉額林沁達瓦四等台
吉格蘇爾和碩特四等台吉宗濟特及領侍
衛內大臣等召烏珠穆沁和碩親王朋蘇克
喇布坦科爾沁多羅郡王納旺色布騰和碩

額駙齊默特多爾濟鄂勒哲特穆爾額爾克
巴拜多羅貝勒三音察袞喀喇沁多羅郡王
喇特納錫第固山貝子多羅額駙扎拉豐阿
巴林多羅郡王巴圖輔國公和碩額駙德勒
克敦漢多羅郡王喇什喇布坦固山貝子固
山額駙羅布藏錫喇布垂濟扎勒輔國公多
羅額駙桑濟扎勒土默特多羅貝勒索諾木
巴勒珠爾喀爾喀車臣汗車布登扎布和碩
親王固倫額駙拉旺多爾濟多羅貝勒袞布
多爾濟固山貝子伊達木扎布厄魯特和碩
親王和碩額駙羅布藏多爾濟杜爾伯特和
碩親王車凌烏巴什固山貝子博第奈曼多
羅郡王拉旺喇布坦蘇尼特多羅郡王車凌
袞布回部郡王品級多羅貝勒霍集斯輔國
公圖爾都額色尹和什克阿魯科爾沁多羅
貝勒達克丹等至
御座前賜酒成禮○諭曰瑚什年老有病難勝
護軍統領之任遇有蒙古副都統缺出再行

補授所遺正黃旗護軍統領員缺著景熠補授仍兼副都統署理鑲白旗護軍統領事務○又諭曰德雲年已就衰且患腿疾令其來京所遺巴里坤副都統員缺著岱星阿補授○又諭曰明亮等奏官兵連日克攻甲雜並後路巴布里日蓋古洛一帶全行勦洗乘勝進抵獨松隘口剋日會擣噶喇依等因一摺覽奏深為欣悅甲雜為賊人往來狡窟昨阿桂攻占噶占山梁進逼賊巢已成破竹之勢

今明亮復將河西甲雜一帶後路將及百里全行掃蕩肅清即可統兵渡河直取雍中喇嘛寺賊首更無竄身之地並有大頭人達固拉得爾瓦率領乃當番衆五百餘人投降為官兵內應擒獲土舍庸中旺嘉勒及邁布星根來獻又喀拉頭人思達爾結亦率屬六百餘人來降擒獲礮位烏鎗火藥鉛子甚多此皆將軍叅贊調度督率有方諸將領官兵亦各奮勇出力用能屢戰克捷實屬可嘉著將

明亮舒常及領隊大臣將佐員弁等俱交部從優議敘以示獎勵大功指日告成俟紅旗遞到再沛酬庸渥典○諭軍機大臣曰明亮等將河西一帶全行肅清惟餘獨松正地未得看來賊番如此窘迫不能復行抗拒明亮等一得獨松即當統兵渡河攻打雍中喇嘛寺與阿桂成犄角之勢夾擊賊巢自更易於掃蕩又據奏大頭人達固拉得爾瓦率領乃當番衆五百餘人投降並為官兵內應擒獲土舍庸中旺嘉勒來獻頗屬誠心又喀拉頭人思達爾結亦率屬六百餘人來降並當予以獎賞達固拉得爾瓦著賞戴孔雀翎給以四品頂戴其所獲之土舍庸中旺嘉勒乃革布什咱一案罪魁即邁布星根亦助惡要犯均當一併解京今明亮等已將二犯解赴成都著文綬即嚴行監禁每日給以口食其庸中旺嘉勒現受鎗傷並為調治痊愈俟拿獲索諾木及緊要逆黨一併檻解京師獻俘並

諭令文綬知之。○是月江南河道總督吳嗣爵奏查江南黃運湖河旬日以來各處水勢有消無長。黃河徐城誌橋現存水五尺八寸。洪湖高堰誌橋現存水九尺八寸。清口東西壩已次第趨築完整。現留口門寬三十丈。臣時刻留心體察。並將上年所存河水前後比較。今歲雖大七寸。而清口上年留口門二十丈。目下尚寬三十丈。臣復加籌酌。應將東壩再接五丈。留口門寬二十五丈。以資收蓄。禦

黃濟運當飭外河廳營乘時趕辦。歲內即可築竣。邳州宿遷一帶運河挑淺工程。日來天氣晴和各工員多添人夫。上緊趨趕。一俟全竣。臣即親往驗收。以利新漕。豐碭廳屬丁家集溜勢南趨之處。北岸估挑引河一道。現飭各員實力趕辦。務於汛前如式完竣。以備水長開放。其南岸新堵溝槽。埽後又各添做土壩一道。俾資攔禦。報聞。○閩浙總督鍾音奏閩省行鹽商地內龍巖霞浦莆田南安龍溪

漳浦南靖長泰平和詔安永安南平順昌建陽海澄等十五州縣暨寧德平潭二幫。前因商人疲乏。經臣奏准暫歸官辦。接部咨候試行一二年後。如果欠項清完。幫有起色。即行另招股商行鹽辦課。隨時奏明等因。茲查順昌建陽二幫歸官辦運。已經一載。積欠俱已清完。察看情形。實有起色。并招有殷商閩縣人邵建澤。承辦順昌幫務。浦城人孟振翔。承辦建陽幫務。下部知之。○是年追予金川出

師陣亡之通判吳景一員。筆帖式書隆阿一員。縣丞劉希燾一員。典史方光祀一員。副都統銜科瑪一員。副將佛遜一員。頭等侍衛敦住一員。叅領五林泰等四員。署叅領克星額等八員。二等侍衛庫爾德等二員。署章京和盛保等四員。佐領巴西薩一員。叅將楊發育等四員。遊擊奈之格等四員。都司曹陞等二員。守備陳明等十員。駙騎校福志等十七員。前鋒校達善等六員。護軍校烏爾泰等九員。

藍翎長扎瑪庫等三員千總盧琮等十六員。土千總阿那一員委署七品官吉爾圖等十員把總楊兆立等五十二員土把總阿咱納一員外委杜之貴等三十六員武舉陳元樑一名護軍披甲馬步兵二千二百四十一名。祭葬卹賞如例俱入祀昭忠祠。○旌表孝子直隸等省生員劉志道等九名守節合例八旗閑散宗室明彝妻瓜爾佳氏等五口滿洲護軍圖德繼妻章佳氏等七十四口蒙古馬

實錄卷九十九

七

甲雅爾圖妻玉魯氏等十七口漢軍馬兵劉之傑妻胡氏等十三口內務府披甲明海妻李氏等十六口奉天等處駐防披甲吳沙力漢妻何氏等八十七口直隸等省監生張桐繼妻劉氏等四百零四口夫亡殉節直隸等省監生闕旺妻陰氏等十八口未婚守志滿洲正黃等旗西昌聘妻兀扎喇氏等三口江蘇等省民王復誠聘妻吳氏等二十四口百歲壽民婦安徽等省常廷士等十六名口各

給銀建坊如例。○一產三男山東等省民張廷槐等九家。○會計天下民穀數各省通共大小男婦二萬六千四百五十六萬一千三百五十五名口各省通共存倉米穀三千九十五萬八千九十石四斗五升七合零。

實錄卷九十九

七

大清高宗法天隆運至誠先覺體元立極敷文奮武孝慈神聖純皇帝實錄卷之九百九十九

大清高宗法天隆運至誠先覺體元立極敷文
奮武孝慈神聖純皇帝實錄卷之一千

纂修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務鑲黃旗滿洲都統世襲副都統軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

藍翎騎都尉軍功加十九級隨帶加二級又加二級 量給內大臣戶部尚書鑲黃旗滿洲都統軍功紀錄五次

尋常紀錄十四次臣德麟經筵講官太子少保工部尚書紀錄六次臣曹振鏞等奉

教修

乾隆四十一年丙申春正月癸酉朔

實錄卷之一

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜皇子皇孫親王等宴○諭

據富德奏派撥官兵進剿令舒亮等帶兵千

餘同降番干布拉阿什扎土司阿多部落之

兵分路進攻並親率總兵斐慎帶兵六百餘

名夾河攻打噶咱普得爾窩俱於十二月十

九日夜間齊到所指之處賊人鎗石抵拒我

兵奮勇迎擊賊人不能支禦盡皆棄硯潰竄

官兵乘勝追殺直抵馬爾邦而舒亮等之兵

亦直由太約進剿攻克思覺博堵等處下至

河沿與馬爾邦一路官兵會合等語覽奏甚

實錄卷之一

二

為欣慰同日明亮等亦奏攻得獨松卡拉爾

等處并知阿桂已得舍齊喇嘛寺現在圍剿

噶喇依計掃穴擒渠奏捷甚速阿桂明亮等

統俟大功告成茂加渥典此次富德一路官

兵奮勇出力甚屬可嘉富德及在事之將領

員弁等均著交部從優議敘○諭軍機大臣

曰明亮等奏攻克獨松及卡拉爾舍斯滿一

帶地方現擬直擣馬爾邦等語覽奏欣悅已

於摺內批示並據富德奏已攻得馬爾邦思

覺博堵等語。富德自至絨布寨以來。惟此次最為奮勉。已交部將伊及將領員弁從優議敘。明亮等統俟大功告成。再加渥賞。至富德奏稱行文李世傑。哈清阿。調兵七百名分守後路。李世傑等即行給發等語。富德調兵應用。李世傑等照撥發兵。所辦俱合機宜。已用清字諭知富德。並將此傳諭李世傑。哈清阿知之。並據富勒渾奏。據報十二月十八日。已將舍齊喇嘛寺攻克。隨於本日晚間發兵圍

攻噶喇依等語。阿桂等既得舍齊喇嘛寺。應即奏報。現在未據具摺。必因進擣賊巢。為掃穴擒渠之計。刻不容緩。無暇繕摺。是以富勒渾奏報在前。今日正值元旦。連得捷音。深為欣喜。阿桂等已逼賊巢。即可設法擒捕。索諾木。及逆黨等全行弋獲。獻俘獻事。佇望紅旗。指日馳遞。將此由六百里加緊傳諭知之。○甲戌上奉

皇太后幸寧壽宮侍早膳。重華宮侍晚膳。○諭

前據邁拉遜奏拾獲匿名揭帖一紙。內有開寫綿德阿哥賞給禮部郎中秦雄褒字畫食物。並經相見送禮一節。隨密諭福隆安查訪。今據奏稱。拏獲曾在綿德阿哥處雇工之馬成蘇。訊供秦雄褒。曾進見綿德阿哥。致送畫冊。鑪瓶等物。綿德阿哥亦賞給綢紗。字扇屬實。此事甚有關係。阿哥在內廷讀書。理應謹慎自持。不當與外人交接。況秦雄褒不過一禮部漢司員。與阿哥等毫無干涉。非若書房行走之翰林等可比。秦雄褒何所為而必欲謁見綿德。綿德亦何所為而必欲認識秦雄褒乎。秦雄褒係秦道然一家。從前秦道然在康熙年間。即有交通塞思黑之事。其家風本不醇謹。今秦雄褒復敢如此。幸而早為發覺。尚不致久滋事端。此即阿哥等之福。若不示以懲儆。恐諸皇子皇孫無所畏憚。漸失我朝家法。綿德著革退王爵。即令綿恩承襲。綿德之師傅李中簡。不能教誡管束。咎無可辭。

該員本係緣事降調。復經賞給編修職銜。仍令在書房行走。今復不能盡職。即著革職。逐出書房。至秦雄。褒身為司員。敢與綿德覬送。殊屬可惡。著革職。即日發往伊犁。不准贖罪。至此事。係朕特交福隆安查辦。若復稍存徇隱。不肯據實查出。朕必重治其罪。福隆安寧敢瞻顧阿哥等。而轉不畏朕乎。經此小懲大誡。不特綿德當知感愧。即皇子皇孫。亦均當感激自勵。若因福隆安之查奏。輒心懷嫌怨。

平定縣志

五

斷難逃朕洞鑒。必不稍為寬宥也。將此通諭知之。至投遞匿名揭帖之人。仍著軍機大臣查審具奏。○又諭。昨歲安徽江蘇地方。七八月間。偶有雨澤愆期之處。以致上江之廬鳳等屬。下江之句容等屬。高阜田畝。間被偏災。業經該督撫題報。照例分別撫恤。蠲賑兼施。貧民已不致失所。第念新春正賑已畢。麥收尚早。青黃不接之時。口食或恐拮据。且同一州縣之民。其有收之戶。共樂含哺。而高旱之

處。獨形匱乏。尤堪軫惻。茲當春和布澤之初。著加恩將安徽被旱成災八九分不等之定遠。泗州。盱眙。天長。五河。滁州。來安等七州縣。均係積歉之區。無論極次貧民。各加賑一個月。其廬州。鳳陽。長淮。泗州。滁州等五衛。被災屯戶。各隨坐落之州縣。一體賑給。江蘇被旱較重之句容。江浦。六合。宜興。荆溪。丹陽。金壇。溧陽。甘泉。東臺等十縣。及次重之上元。江寧。溧水。高淳。武進。陽湖。無錫。金匱。江陰。丹徒。阜

平定縣志

六

寧。鹽城。高郵。泰州。江都。儀徵。興化。寶應。十八州縣。并鎮江。揚州。二衛。均勘實成災七八分之極貧戶口。各加賑一個月。以資接濟。其餘較輕貧戶。有應行酌借籽種口糧之處。並著各該督撫。體察情形。分別妥辦。務俾窮黎普霑渥澤。該部遵諭速行。○又諭。上年甘肅省夏秋二禾。統計收成七分有餘。惟皋蘭等三十一廳州縣。夏禾間有被旱被雹之處。皆屬一隅偏災。業已蠲賑兼施。俾無失所。內惟皋

蘭金縣渭源平番中衛靈州肅州七州縣並
皋蘭分駐之紅水縣丞所屬。或情形較重。或
值積歉之後。民食未免拮据。著加恩於青黃
不接之時。各展賑一個月。又續報秋禾偏被
霜雹之隴西等十一州縣。亦經照例賑恤。內
涇州平涼二處被災稍重。並著一體展賑一
個月。用敷春澤。其餘夏秋被災較輕之河州。
隴西等處。今春如有缺乏籽種口糧之戶。並
著該督隨時體察酌借。以資接濟。該省係瘠
薄之區。災黎尤堪厯念。勒爾謹務董率所屬。
實心妥為料理。俾得均霑實惠。以副朕軫恤
邊氓之至意。該部遵諭速行。○又諭昨歲畿
南一帶。因夏秋間雨水稍多。濱臨河淀州縣
之低窪村莊地畝被潦。均不及一隅。業經該
督勘明保定文安等五十二州縣。應成災之
處。照例撫恤賑濟。並降旨將較重之霸州等
六州縣。應行摘賑。提前一月。俾與大賑接濟。
無缺。貧民已可不致失所。第念新春正二月

正賑已畢。距麥收尚遠。茅檐口食。或恐不無
拮据。茲當履端肇始。宜沛恩施。著加恩將被
災較重之霸州永清新城雄縣安州新安六
處。及次重之文安保定武清大城清苑天津
靜海青縣八處。均各展賑一個月。俾窮黎益
霑愷澤。該督其董率所屬。實心經理。以副朕
加惠畿民至意。該部即遵諭行。○定西將軍
尚書阿桂定邊右副將軍尚書公豐昇額。叅
贊大臣都統海蘭察。副都統額森特奏。臣額
森特由則朗噶克了口。上槍喇烏喇山梁。於
十七日。將各碉卡賊衆殲戮。遂占據瑪爾古
當噶碉卡。並克獲山梁迤東一帶寨落。海蘭
察由噶占進攻。占得爾隴山坡。至是日夜。我
兵齊抵舍齊喇嘛寺。併力勦殺。復攻克雍中
喇嘛寺。即於十八日。將格爾巴夾木巴雪寨
下至克角干登。均經槍占。現派兵分路攻噶
喇依碉寨。兩三日內。諒可合圍。投出頭人達
什阿庫魯。錄供呈覽。至本日晚間。有投番來

稱索諾木之母姊妹現於甲納雜爾渡河前來。到時另行奏聞。諭曰阿桂等奏大兵分路攻克喇烏喇瑪爾古當噶一帶碉卡。並克取得爾隴。槍占舍齊喇嘛寺。雍中喇嘛寺殺戮有名賊目。痛殲賊番。現在攻圍噶喇依賊巢等因。一摺。覽奏深為欣悅。連日兩路將軍馳報得勝捷音。賊勢已萬難支禦。今阿桂又將附近賊巢之碉卡寨落五百餘處。全行掃蕩。已將噶喇依四面圍攻。水陸俱斷。指日即可擒渠掃穴。迅集洪勳。實由將軍阿桂等調度精詳。機宜悉中。用能所向克捷。甚屬可嘉。所有將軍參贊及領隊大臣各將弁等。均著交部從優議敘。仍俟紅旗奏捷。再沛渥恩。○

實錄卷一千

九

又諭曰永安奏請將京城箭亭內碑上鐫刻聖訓。賞發於古城箭亭。立碑鐫刻等語。著照所請。賞給令於該處立碑。每遇操演時。弁兵等閱看誦讀。以期勤肄武備。不失滿洲舊習。至伊犁。烏魯木齊。巴里坤。皆有滿兵駐防。亦

著一體賞給。令立碑鐫刻。○諭軍機大臣曰阿桂等現已統兵直抵賊巢。四面攻圍。并知索諾木。莎羅奔兄弟。及助惡之丹巴沃咱爾等。俱在圍內。自更無從奔竄。但須設法生擒。勿令窘急自斃。方為萬妥。聞索諾木之母姊妹。俱有投出之信。果爾則逆酋等或亦可招致。阿桂自有權衡。至現在投降之達什阿庫魯其罪惡尤重。非布籠普阿納木達固拉得爾瓦可比。將來尚須一同獻俘者。但此時

實錄卷一千

十

不妨經權參用。姑賞以翎頂。或彼果能招誘逆酋等來投。原可假此為餌。統於功成獻俘時。分別伊等罪狀。再行定奪。○乙亥。

上詣

皇太后宮問安。○諭上年甘肅省皋蘭等三十七州縣。夏秋二禾。均被有偏災。業經降旨於照例賑恤外。乘春布澤。再沛恩膏。特予加賑。用資接濟。惟念皋蘭等處。尚有應徵從前因災未完。民借籽種口糧折色等項。曾經疊次

加恩於原限六年之外。再展二年四年者。其四十年分應徵之數。例應按限催徵。第念各該處上年夏秋又經被災。民力不無拮据。著勒爾謹將該年華蘭等三十七州縣被災之處。應徵未完籽種各數。迅即詳查奏明。再予展限一年。俾荒瘠邊黎得緩追呼。共安樂利。該部即遵諭行。○丙子。軍機大臣議准。署四川總督文綬奏籌備凱旋各事宜。○官兵多由功噶美諾卧龍關一路撤回。除日耳以外。

各站有舊存米石外。其自木耳至草坡等站。應將桃關長運米。截留轉運分貯各四五百石。至桃關由汶保一帶長運米。應自汶川起至楸砥每站截留四五百石備用。○軍需火藥鉛彈。現飭在省製造者。毋庸起解。已運未出口者。應截留補維州茂州青雲等營缺額。出口者。咨劉秉恬富勒渾等就近截留撥貯。其鐵觔銅觔已運在途者。俱交地方官截收。○西北兩路站夫。尚有辦送楸砥一路撤回。

差務。應將前裁站夫。仍照舊數雇解。○陸路官兵騎馬。除酌調臺驛馬匹外。尚有不敷。及備添換之數。現飭局雇民馬。解驗分撥各標鎮協營馬。并飭調解。○水路船隻。京城吉林。索倫黑龍江及荊州滿兵。應同楚兵至重慶下船。現飭地方官豫備。其滇黔兵由雅州下船。并飭於雅州并下游等處雇驛從之。○丁丑。享。

太廟遣誠郡王弘暢恭代行禮。○

上詣

皇太后宮問安。○遣官祭

太歲之神。○御紫光閣。賜蒙古王公貝勒額駙台吉及回部郡王品級多羅貝勒霍集斯並年班回部葉爾羌三品阿奇木伯克貝勒品級鄂對等宴。○召大學士內廷翰林等茶宴。以寧壽宮落成聯句。○命安插新降番衆。諭軍機大臣等。據明亮等奏河西賊境全已蕩平。於噶喇依對河之巴布朗谷密佈營卡。

會擒逆酋。富德亦奏。占據噶爾谷等寨落。現與西北兩路官兵會合。攻圍賊巢等語。覽奏均為欣慰。已於摺內批示。至各路番人。紛紛投出。其中大小頭人。俱復不少。此等番衆。從前抗拒官兵。捨死固守。情罪均屬可惡。直至兵臨巢穴。計窮力竭。始行投降。非若大兵尚未深入以前。陸續來投者可比。但衆番皆係曾與官兵打仗之人。此時難以分其所犯輕重。且其抗拒官兵。固屬可恨。而原其所以捨死堅守。尚知各為其主。亦復可矜。況為數過多。又係投降乞命。若盡予駢誅。實覺心有不忍。惟其中大小頭人。及其眷屬。自不便仍留本處。應照前此平定準部時。所有台吉宰桑德木齊等。稟行移徙例。妥為辦理。但須趁官兵未撤時。即為查明。於八旗及吉林索倫兵。凱旋之便。令其分隊攜帶。押至京城。再行酌量分別安插。伊等既係投降。與黨惡要犯。應行獻俘者不同。途中不便加以鎖杻。惟當

留心照料。毋致脫逃。并不動聲色。勿使驚畏。方為妥善。但各種頭人。及其眷屬。為數甚衆。其如何分別押帶之處。著阿桂。妥為覈定。一面奏聞。至各處降番。若移於他處編管。未免人多費事。伊等俱係嫻於耕作之人。兩金川又有可耕之地。現在凱旋後。兩金川地方。立況安營。添設提督總兵等官。足資彈壓。其應辦善後事宜。內原有隨處耕屯之議。莫若即用此等降番。就所在墾耕安業。盡力農功。各有將弁管束。久之亦可消其桀驁不馴之氣。而令其交糧。亦省川省運糧之勞。惟是編立營屯。必須安設頭目。當於隨營攻勦之他處土兵內。擇其出力者充當。既足以示獎勵。又令他處之人管理。更不慮其故智復萌。至此等降番。餓乏已久。既欲令其耕種。自難以枵腹從事。著將軍等。量為賞給籽種口糧。俾口食有資。自更安心盡力。將軍等宜及此時早為籌辦。將此由六百里加緊諭令知之。阿桂

自奏報攻圍賊巢以來。距今又閱三日。想早應掃穴擒渠。大功全藏。惟望紅旗即至。○戊寅。停年終彙奏幕友例。諭前因御史胡翹元條奏各衙門延請幕友。恐日久弊滋。定以五年更換。并不准延請本省之人。及隣省五百里以內者。彼時覺所言似尚有理。是以諭令各督撫通行查明。於年終彙奏造報。以備稽考。迄今已閱數年。各該省屆期奏報。並未實在查出違例延請及逾期不行更換之人。可

中書本一十

上

見彙奏一節。不過沿襲具文。仍屬有名無實。各省幕友。在署幫辦事件。原不當令其出外交遊結納。致滋弊端。惟在督撫等董飭所屬大小各員。關防嚴密。隨處留心。自不虞其顧私誼而撓公事。若徒定以隔省限以五年。而不能實力防閑。亦未必即為正本清源之法。且如劣幕徐掌絲。葉木果二案。皆係浙人。而一在楚省。一在滇省。相隔不為不遠。仍不免於作奸犯科。可見杜弊不係乎限地。至幕友

中書本一十

上

如果不使交通聲氣。雖年深亦不至於請託舞文。設或不能遠跡避嫌。即年淺亦難保無徇私曲法。且有馴謹之幕。相隨日久。尚可資其欣助。若因已滿年期。另易生手。諸事未能即語。而新延之人。亦未必悉皆可信。是防微亦不在乎限年。嗣後著各該督撫實力整飭稽查。如有惡幕招搖生事。及劣員徇縱濫交者。即行嚴叅究治。若督撫袒庇屬員。姑容消弭。或經科道叅奏。或別經發覺。惟該督撫是問。所有各省年終彙奏幕友之例。著停止。仍將此通諭知之。○諭軍機大臣等。據富德奏有巴甲庚額頭人都瓦爾普魯投降時。託病並未親來。及准降之後。傳喚該番至營。察看該番毫無病態。形色頗露奸頑。因功屈垂成。若將伊擒縛。恐動搖新降番衆之心。是以暫行籠絡。駕馭。令將伊所管百姓派往前敵。以分其勢。茲據其小頭人拉爾結稟稱。都瓦爾普魯仍在本寨碉頂。放鎗擲石。聲喊我等原

係假降。乘大兵前進。合同邀截後路。此時還不動手。等待何時。我將叅贊大人教訓之言。向伊告訴。伊不但不聽。仍在碉頂喊叫招人。我隨會同在彼防守之布拉克底頭人阿資拉。並官員等帶領兵丁。將碉寨圍困。放鎗攻打。拋擲火彈。將寨內火藥轟著。都瓦爾普魯及其全家數十口。盡行燒死等語。所辦甚是。此等頭人。直至窮蹙來投。其真偽原不可信。惟是既已投降。未便復行駢戮。且為數過多。

誅之亦有所不忍。但斷不可仍留本處。致令乘間滋事。必須及大兵未撤之前。不動聲色。豫為料理。令京城及東三省凱旋之兵。管帶來京。分別安置。方為妥善。朕昨計及於此。隨諭令阿桂等。即為籌辦。今富德一路。既有都瓦爾普魯之事。各路將軍叅贊等。尤當一體留心防範。如此小懲大誡。於軍務甚為有益。計此時掃穴擒渠。大功已成。自當將此項新降頭人及其眷屬。按數分起。令凱旋京兵等。

陸續押送京城。若頭人內。或有詞色狡詐。叛迹顯露者。并當即行正法。以儆其餘。各處降番。無頭目煽誘。亦不虞其復懷反側。至庚額小頭目拉爾結及布拉克底頭人阿資拉。一面集眾。將都瓦爾普魯攻圍。一面奔告叅贊。均屬可嘉。富德即行賞給花翎銀緞。以示獎勵。所辦亦是。又另單奏據布拉克底頭人綽窩密。稟有自噶喇依投出之草布什咱小頭人撒木喀爾。向伊告稱。因見賊勢渙散。乘空逃出。伊家屬在克舟九寨。情願帶領投奔布拉克底等因。查該番本係積年助惡之人。今見賊勢已破。始行潛逃。又畏罪不敢投西北兩路。亦不來營親見叅贊。又不願回本地。其情狡詐。或係索諾木等見事勢危急。故將該番放出。散布流言。離間新降番眾。亦未可定。自難輕縱。隨飭綽窩密將該番哄誘來營。面加訊究。旋據綽窩密稱。撒木喀爾於二十三日夜。拋棄家屬。不知逃往何處。即派人往

克丹九寨擒其家屬。并派妥幹之員。嚴拏務獲等語。撒木喀爾其屬可惡。必須迅速擒獲。訊取供詞。立寘重典。著富德再行嚴飭各員。實力查拏。并通知各路將軍等。一面躡緝。務須速擒伏法。勿致漏網。今就獲否。並即奏聞。又據奏馬爾邦一帶。乃總匯之地。處處均須妥籌辦理。未敢拘泥前奏。遽往噶喇依。仍在馬爾邦與英泰商酌。料理一切事宜等語。如此方是。乃同時奏到之清字摺片。則稱將諸事交付英泰。於夜間帶兵前往噶喇依等語。與漢字摺不符。殊不可解。現在噶喇依賊巢。已經阿桂派兵圍定。其河西之兵。亦經明亮帶往。協同擒剿。是噶喇依已有兩將軍在彼。毋庸富德復往幫助。至馬爾邦一帶。關係緊要。其後路各險隘。賊人寨落。尚須撫輯安定。其間彈壓經理。自非富德不可。若僅委之英泰。未為妥協。富德此時。如尚未起身。竟不必前往噶喇依。若已經到彼。接奉此旨。亦即仍

回馬爾邦。妥協料理。或逆酋等就擒之後。馬爾邦事已辦完。更無應辦之事。則又不必復勞往返。富德惟當隨宜妥酌而行。計阿桂奏到圍攻賊巢之摺。至今又閱四日。自應早已得手。又奏稱索諾木母姊妹。俱相率投出。亦早應到營。何以均未奏及。連日盼捷。尤切佇望。紅旗即日馳遞。將此由六百里加緊傳諭知之。○又諭前因川省軍需款項紛繁。已閱數載報銷。恐不無牽混浮冒等弊。是以特派富勒渾劉秉恬鄂寶桂林會同文綬覈辦。并添派李湖在局。專司綜覈銷算。自派辦以來。雖據文綬奏。飭局將前案軍需覈出四十案。先行造銷。迄今又及一年。經部臣節次行催。仍無一案到部。茲袁守侗在川查審事件。回京。詢及該省奏銷之事。據稱聞報銷造冊到局。經李湖查覈辦定。復咨送各該處覈查。有准於此而駁於彼者。往返咨商。是以未能題達等語。所辦未為妥協。軍需案件。承辦各

有專司。如富勒渾文綬俱係該省現任總督。事無鉅細。皆所應知。劉秉恬桂林從前均曾任總督。即各有承辦之案。鄂寶雖專司北路糧運。亦各有經手案件。自應各先就本人承辦之事。詳悉查覈。統歸報銷局總覈報部。方可畫一就理。至李湖係後來到川。諸事並未經手。因其平日辦事尚肯認真務實。是以令其幫同稽覈報銷。以昭慎重。是銷算一事。自應以彼為歸宿。不可因其銜係藩司。亦如外

省辦理尋常事件之必須自下而上。以致輾轉稽延。政如治絲而勢難歸畫一。則軍需各案。何日方能造冊題銷耶。著傳諭富勒渾等。即就各人各路承辦案件。所動款項。詳細覈明。總交報銷局。即令李湖逐款查覈。交該署督迅速具題。毋得再行延緩。致滋叢脞。○是日起

上以祈穀於

上帝。齋戒三日。○己卯。

世祖章皇帝忌辰。遣官祭

孝陵。○命議謚前明靖難殉節諸臣。諭前以明季殉節諸臣。各為其主。義烈可嘉。爰命大學士九卿等。集議予謚。所以褒闡忠良。風勵臣節也。今復思建文革除之際。其臣之仗節死事者。亦具載史傳。當時永樂一藩臣耳。乃犯順稱兵。陰謀篡奪。諸臣以大義自矢。固當不共戴天。雖齊秦黃子澄。輕率寡謀。方孝孺識見迂濶。未足以輔助少主。然跡其尊主鋤強

之心。實堪共諒。迨大事已去。猶且募旅圖存。抗詞抵斥。雖殞身湛族。百折不回。洵為無慚名教者。他若景清。鐵鉉輩。或慷慨捐軀。或從容就義。其致命縱各不同。而志節凜然。如下至東湖樵夫。補鍋匠之流。姓名即隱晦不彰。其心跡固可追溯也。特以永樂殘刻性成。淫刑以逞。屠戮之慘。極於瓜蔓牽連。殆非人理。余讀史至此。未嘗不深憤而痛嫉之。雖其中葉少弛厲禁。而彼時臣子。徇私曲諱。終不

獲顯示褒揚。使忠臣義士之氣。久弗克伸。良可憫惻。夫以勝國革命之時。其抗我顏行者。尚念其忠於所事。特命表章。矧建文諸臣。不幸遭內難。為國捐生。成仁取義。顧可令其湮沒於千百世下耶。允宜再集廷議。並予易名。以發幽光。而昭公道。其覈實條具以聞。○又諭曰。都統和隆武。左都御史阿思哈。副都統和珲著加恩。將其一族由各該旗擡入正黃旗滿洲。○大兵克金川。賜將軍以下封賞。

平定縣志

卷一

有差。據定西將軍尚書阿桂。定邊右副將軍尚書公豐昇額。內大臣明亮。叅贊大臣都統海蘭察。副都統額森特奏。賊酋索諾木弟兄。及助惡頭人。均在噶喇依官寨。自必嚴密圍困。始可設法俘擒。臣海蘭察。同福康安。普爾普。額爾特等。帶兵拏卡。直至河沿。以截噶喇依之右。派烏什哈達。由噶喇依官寨正山腰。拏卡下逼。近據噶喇依之上。臣額森特等。帶兵攻克喀爾巴寨。復將附近噶喇依寨落。九

平定縣志

卷一

處攻克焚燒。直至河沿。以截噶喇依之左。鄂碩覺十寨。以南山梁。派舒亮帶兵。同侍衛訥松額駐劄。臣明亮。西岸沿河一帶。已嚴密防堵。臣阿桂。豐昇額。復派兵過河。於拉古爾對過山腰。多設卡座聯絡。左手西北兩路官兵。俱合其水路。復於噶喇依官寨上游。趕造浮橋。並設卡座巡守。至木果木。普嶺等處。及鄂碩覺十寨。均經一律掃除。臣明亮。河西一路。及富德一路。番人俱望風投順。現在促浸全境已平。惟餘噶喇依巢穴。自歸掌握。諭曰。本日據阿桂等奏。官兵已將促浸全境掃平。現在四面攻圍噶喇依巢穴情形。一摺。深為欣慰。并閱進到地圖。賊境碉卡寨落。均經大兵勦洗。所餘惟噶喇依。最爾彈丸。不及已得之地。百分之二。自可即日掃蕩。是征勦金川之役。已屬蔽功。又據稱賊酋索諾木弟兄。及作惡頭人。均在噶喇依官寨。今經嚴密圍困。斷難復行軼出。便可設法俘擒。且索諾木之母

阿倉姑阿青及其姊妹均已來營投降。更不虞索諾木等之尚懷觀望。所有渠兇黨惡。自必即行擒縛。馳遞紅旗。褒績酬勲。宜頒渥典。將軍阿桂。蓋誠體國。不憚艱勞。制勝運籌。克成偉績。實為此事首功。前曾賞戴雙眼花翎。並於攻克勒烏圍時。賞用紅寶石帽頂。茲著加恩封為頭等誠謀英勇公。並賞四團龍補褂。金黃帶。以昭崇獎。副將軍豐昇額。明亮。抒誠勵勇。協力宣勞。亦堪嘉尚。豐昇額。本襲公爵。復加賞繼勇名號。著再賞以一等子。暫令伊弟布彥達賚承襲。俟豐昇額生子後。仍令其子承襲。布彥達賚。現係藍翎侍衛。今既襲子爵。著授為三等待衛。明亮。著封為一等襄勇伯。恭贊大臣海蘭察。每遇推堅奪隘。無不鼓勇先登。實為超眾。著加恩封為一等超勇侯。以示優異。恭贊大臣額森特。領隊大臣奎林。和隆武。福康。普爾普。均各奮勇出力。茂著勤勞。額森特。著賞以一等男。奎林。本係

公爵。著加賞一等男。即令伊子承襲。和隆武。本係子爵。著晉封三等果勇侯。福康。安著賞給三等男。所有伊原襲伊兄福靈安之雲騎尉。著福隆安次子豐紳果爾敏承襲。普爾普著賞給三等男。豐昇額。明亮。海蘭察。奎林。和隆武。仍各賞戴雙眼花翎。共昭榮獎。大學士于敏中。自辦理軍務以來。承旨書諭。夙夜殫心。且能鉅細無遺。較眾尤為勞勩。其前此過失。尚可原恕。著賞給一等輕車都尉。以示格外恩眷。所有此次恩賞世爵世職。均著世襲罔替。至應予錄敘之將士。並各項應予議敘議賞之官員人等。及應行諸典禮。均俟紅旗馳遞到日。再降諭旨。○又奏。索諾木之母姑姊妹等。均至大營。現准其母所請。遣隨來之喇嘛噶布則。前往噶喇依。諭令出降。又西北兩路。投出番眾。現將其大小頭人等。派弁兵看守。餘除有可疑情節。隨時正法外。俱分別安插。綽斯甲布。草布什。咱。梭磨。卓克。采。從

噶克黨壩明正。木坪。布拉克底。已旺。沃克什。瓦寺。十二土司地方。其各土司又分安各寨。有頭人管束。且各有冊檔可稽。將來即有另辦之處。亦無難查辦等語。諭軍機大臣曰。阿桂等奏稱。索諾木之母阿倉及其姑阿青。并伊姊妹。帶領從人喇嘛等。於十二月二十日到營投降。並准阿倉所請。差人往諭索諾木出降。因母以招其子。實亦誘擒生致之機。若逆酋等果皆投出。自更為省力。佇盼紅旗旦晚即至。又另摺覆奏。籌辦投出大小頭人及番衆一節。所見亦是。即照阿桂等所請行。至捷音到後。即應祇謁。

兩陵并告功

闕里原擬於謁

陵禮成。即行郊勞。再舉東巡。現已擇於二月初九日啟鑾。為時甚近。將士凱旋。未必能如期。迨至。且番境初平。其善後事宜。應辦者甚多。均關緊要。亦須阿桂親為經理。方覺妥善。今

定於謁

陵後即奉

皇太后聖駕巡幸山東。計回鑾約在四月十五以前。由寶稼營登陸。經南苑新衙門。至黃新莊。路亦近便。阿桂等於大功告成。即將善後事宜。妥為料理。帶領應行郊勞之將佐京兵等。酌量日期起程。於四月十五日以前。至黃新莊。以備勞還大典。實屬兩便。將此傳諭知之。○庚辰。

上詣

南郊齋宮齋宿。○諭軍機大臣等。昨已降旨。將軍營領隊大臣。歷經打仗克捷。出衆超羣者。如奎林。和隆武。福康安。普爾普等。覈其功績。各予酬庸渥典。至此次平定兩金川。攻勦打仗之處甚多。其領隊大臣侍衛等。或尚有奮勇出力。勞績可錄者。自當量予加恩。若併有實在超軼等倫。厥功茂著者。更當特加優獎。並著阿桂等一體查明奏聞。其明亮富德兩

路將領。並著查明交阿桂再行覈實具奏。候朕酌量分別施恩。以昭公允。○又諭。此次征剿金川。將軍阿桂。豐昇額。明亮。叅贊大臣海蘭察。額森。特領隊大臣奎林。和隆武。福康。安普爾普等。直抵賊巢。各奏功績。是以經朕施恩。分別賞給公侯伯子男爵。寶石頂。黃帶。雙眼花翎。惟叅贊大臣富德。舒常。二人。朕並非不施恩澤。富德前曾獲咎。經朕寬免。遣赴軍營。理宜感激朕恩。力圖報効。而身至軍營。駐

聖訓卷二十一

七

劄絨布寨二載有餘。並無寸進。昨雖將庚額特。穆谷。馬爾邦等處攻取。一因接奉飭催之旨。再因將軍阿桂。豐昇額。明亮等已抵賊巢。乘其離散之際。始有報獲。豈可為功。舒常乃大學士舒赫德之子。經朕加恩補放。叅贊大臣。同豐昇額駐劄宜喜。一年有餘。並未得進。而豐昇額赴凱立業後。伊統兵身駐宜喜。惟知株守。迨明亮至達爾圖後。方始進兵。而屢次將軍摺奏。亦未見伊有身先立功之舉。軍

營鼓勵將士。籌畫機宜。責在將軍。至叅贊大臣。理宜統兵奮勇前進。為衆表率。海蘭察。額森。特。獨非叅贊大臣乎。且彼係索倫烏拉齊。尚知奮勉打仗。舒常身係滿洲。世受國恩。而反可臨陣不前乎。朕每覽軍營摺奏。於將軍等籌辦。及叅贊大臣。領隊大臣。領隊侍衛出力之處。無不留心。即如朕躬親歷。豈有遺落之理。富德。舒常。未治其罪。仍同衆議敘。是即朕之施恩矣。將此傳諭富德。舒常。知之。○又

聖訓卷二十一

三

諭。昨據富德奏。自噶喇依投出之草布什。咱頭人。撒木喀爾。經富德遣人傳喚。復又逃去。現飭員弁搜捕。并令護軍校常明。泰帶兵前往克舟九寨。擒拏該番家屬等語。撒木喀爾係促浸頭人。既經投出。復又逃去。其為詐降無疑。情殊可惡。必須迅速拏獲。勿使漏網。現已派人前往。將伊家屬查拏到案。自可嚴究。該犯潛逃蹤跡。設法躡緝。勿使久匿稽誅。富德當實力董率。至該犯現今曾否就獲。並著

富德即行覆奏。將此附軍報之便。傳諭富德知之。○辛巳。祈穀於

上帝。

上親詣行禮。○河東河道總督姚立德奏。河隄南北兩岸。向有官兵民夫一同防守之例。官兵設有堡房。民夫無屋可居。晝聚夜散。當伏秋大汛。隄工喫緊之際。未能實力巡防。現飭沿河州縣。各在本境大隄上。兵丁堡房中間。添建民夫堡房一座。交汛收管。俟水長上隄時。即令其分住。晝夜防守。得旨。好。夫多而房少。恐難容。但較之全無而露處。自佳。又奏。大河兩岸。去冬不甚沍寒。現在凌汛。亦未報長水。隄工穩固。報聞。○壬午。

上詣

大高殿行禮。○奉

皇太后居長春仙館。○詣

安佑宮行禮。○幸圓明園。○諭曰。阿桂著加恩。賞用紫韁。○癸未。諭軍機大臣等。昨據阿桂

等奏。已將噶喇依四面密圍。水陸俱斷。逆首逆黨。必無從喙走。連日盼望紅旗甚切。今復據阿桂等奏。先准索諾木之母阿倉姑阿青所請。遣喇嘛前往噶喇依。曉諭賊首兄弟等投出。茲莎羅奔岡達克。來至大營。供稱欲見其母。再叫人往喚兄弟們出來。現將岡達克等嚴密拘留。小心防範等語。所辦甚是。阿桂曾否令見其母。或已令相見。其神氣詞色若何。曾否商量復差人

往喚索諾木等。未據奏明。著傳諭阿桂。即

速據實具奏。至索諾木勢已窮蹙。經其母差人招諭。尚不即時出降。僅令其異母之兄。至營探試。甚為可惡。此必丹巴沃咱爾等及逃兵張坤忠狡謀。以噶喇依運貯糧食頗多。可供番衆餬口。尚思觀望支吾。苟延殘喘。且冀抵禦日久。使官兵糜耗軍糈。或希將軍等惜費解圍。彼復得逞其伎倆。否則令我多費軍儲。亦可稍釋其憤恨。看來賊智必不出此兩

者。因思阿桂等。業將賊巢嚴密圍攻。所帶現兵。已足敷用。且各處後路。俱係將軍等一律掃清。即可無煩多兵分佈守卡。此時自應一併量為裁撤。茲據阿桂奏。已將西安兵一千四百餘名。荊州兵一千七百餘名。交書麟。與兆。各自分撥帶領。先行撤回。辦理極為妥協。至其餘各省調到之綠營兵。大率守卡者多。亦當擇其中不能攻戰。僅堪分守者。酌量陸續減出。即以所節之糧。供我存兵之用。更覺

平定卷五十一

三

充裕。設或畧需時日。亦不致遂賊衆之願。於藏功全局。尤為有益。阿桂等當即妥酌而行。又阿桂奏。現在鑄成大礮一位。三四日內。又可鑄成兩三位。自應上緊轟擡。使其無堅可恃。即或叅用招誘之法。亦不宜稍懈攻打。庶賊衆驚惶窘迫。利害相權。或可冀其乞降免死。此乃一定之理。昨曾降旨諭之。想阿桂亦能見及此也。至就此時大局而論。掃穴實非所難。惟擒捕兇渠。最關緊要。必須概行執縛。

獻俘。方為全美。設或逆酋等。果致情急自戕。究不能謂之盡善。古人攻城。原有故留一隙。俟其逃而邀擒之法。昔我

太祖高皇帝嘗論此以

諭當時諸將。實千古至當不易之成規。昨秋曾諭阿桂等。敬仿酌辦。目下正當其時。應即籌覈情形。審察何面可以設伏遮截。即於此一面量留空罅。使賊窺見。但覺我兵之稍疎。而不知我兵之用計。庶可資留隙邀擒之利。惟

平定卷五十一

三

前途設伏之兵。必須層層布置嚴密。選派勇幹將領。統率防堵。庶幾萬無一失。阿桂即當酌量妥辦。又據奏。山塔爾薩木坦。在河西藏匿。隨派漢土官兵。沿途搜捉。經綽斯甲布土舍。綽爾甲木燦。及頭人溫布。在獨松箐林內拏獲。經舒常解赴河東。現在嚴加看守等語。此事甚好。山塔爾薩木坦。係助惡要犯。必須獻俘誅磔。今綽爾甲木燦。溫布。將伊搜獲。甚屬可嘉。應即酌加獎賞。以示鼓勵。山塔爾薩

木坦既如此藏匿。恐其餘要犯類此者多。并逆酋逆黨等亦效尤偷息。俱未可定。著阿桂等選派將領弁兵四處躡查。或深密菁林。或幽僻巖洞。逐一搜尋緝捕。勿使潛蹤漏網。至促浸喇嘛好用鎮壓。今所得舍齊雍中兩喇嘛寺。皆係喇嘛等念經之所。恐有密藏鎮壓物件。阿桂等即應派細心誠妥之人。於寺內寺外及附近處所。凡有可疑之處。悉搜查剗挖。毋令存留。又攻得此兩寺時。俱有喇嘛投

實錄卷一千

三十五

出。此等皆曾為逆酋念經之人。斷不可仍留該處。致番衆等心存希冀。潛滋事端。況此輩在營。非若壯夫之可以出力隨攻。又毋庸藉其招致逆匪。留之亦屬無益。應將所有喇嘛即用檻車拘解進京。并派妥員沿途嚴密管押。勿稍疎虞。將此由六百里傳諭知之。○軍機大臣等議准。辦理糧餉浙江布政使郝碩奏稱。自上年以來。大兵所向克捷。軍營各路小民已視若蕩平。商賈雲集。各站缺額里夫

多雇募客夫頂補。計背給與口糧工價。空日不給。查各站額夫。自數百名及千餘名不等。原係軍需局指定州縣派解。而遠處州縣亦有將解費交各站代雇應役。更有原派實夫到站。病故逃亡。各站隨時募補。此等皆與客夫無異。其空日口糧應扣除。一路如此。南北兩路情形畧同。並請交督臣富勒渾文綬及總辦軍需大臣等覈實辦理。從之。○督理糧餉山西巡撫鄂寶。河南布政使顏希深奏。將軍明亮等現進至巴布朗谷山梁。去阿爾古舊營三百餘里。中間須添運站。因督飭站員速行安設。現在自阿爾古至獨松業已暢行。其獨松至巴布朗谷山險路長。即於雍中喇嘛寺安站接運。再查北路軍營既抵巴布朗谷駐劄。地勢情形距西路較近。而距北較遠。現搭蓋浮橋以通兩路。若將北路軍糧一併改由西路道既省便。而北路新設臺站亦可量裁。報聞。○甲申諭曰。多敏在科布多年久

實錄卷一千

六十六

著明善前往更換。法福里著賞給副都統職銜。授為烏里雅蘇臺叅贊大臣。辦理事務。○乙酉。

上奉

皇太后幸同樂園。侍早晚膳。至戊戌皆如之。○

諭軍機大臣議。駁劉秉恬等所奏。各省凱旋綠營兵丁。自成都省城起身以後。應支鹽菜銀兩。請照新例。加賞四錢之處。固因內地經行。非口外可比。第念兵丁等隨營征勦。均係

實錄卷十

十一

出力之人。茲屆凱旋。各回本營。亦當厚加優恤。既係凱旋。由內地行走。著加恩於每月應給鹽菜銀九錢之外。加給二錢。俾沿途日用益資寬裕。○又諭。據文綬奏。藩司錢鑒為辦理軍需得力之人。請賞戴花翎一事。殊屬非是。錢鑒此次辦理軍需。止可謂之無過。不得謂之有功。且伊惟在省局坐辦軍需。並未出口經理。與隨營及分駐辦事往來勤勩者不同。至辦理軍務司道中。有因其奮勉出力。賞

戴花翎者。俱係朕格外施恩。又豈臣下所得冒昧代為陳請乎。文綬著傳旨申飭。○諭軍機大臣等。據富德奏。已將新降之頭人番衆等。逐一詳查。內有勢迫始行投出。形跡可疑。及林箐內搜獲。心懷觀望者。並攢拉頭人他克撒噶蓋。促浸頭人都瓦爾普魯等。家口陸續殲戮者。不下三百餘。其先行攜眷投出。並親往各處招降番衆。實心出力。情有可原之家口。分別安插於布拉克底。巴旺。明正等處。

實錄卷十

十二

俟大功一竣。統聽將軍指示辦理等因。一摺。所辦甚好。此等投降番衆。難以深信。斷不宜留於番地。致滋事端。屢經傳諭阿桂。將所有頭人等。概行解京。其餘暫令安插。俟辦理善後事宜時。再為酌量妥辦。今富德已將南路投番。遵照將軍等商辦事宜。查辦完妥。何以阿桂處。轉未辦及奏聞。該將軍等此時。自以圍攻賊巢。籌擒逆酋為重。難於兼顧。然每日豈無片刻稍暇。亦應將此等事宜。隨時帶辦。

況降番在營。聚集人多。難保其不乘隙生心。即逆酋等。未嘗不思若輩為援助。自宜即速遣散。以善周防。雖阿桂前經奏及。將降番男婦。分別安插於十二土司之地。但陸續投出之頭人等尚多。自應視其情罪輕重酌辦。除應行獻俘之犯。俟擒獲逆酋等。一併檻解。其餘亦當如富德所辦。將各頭人先解成都拘禁。使軍營更覺清肅。尤為妥善。著傳諭阿桂等。即速照辦奏聞。至富德前奏欲往噶喇依

實錄卷二十一

三十一

協勦。彼時因該處後路尚未辦清。是以諭令富德仍駐馬爾邦。經理一切。今富德既將降番之事辦竣。即應在噶喇依會同阿桂等商同協勦逆酋。毋庸復回馬爾邦駐守。至阿桂自攻圍噶喇依以來。距元旦發摺之時。已逾旬日。賊衆尚敢護死抗拒。實為可恨。昨逆酋雖將莎羅奔岡達克遣其來投。尚係其異母之兄。不甚愛惜。是以令其先為嘗試。自不外乎丹巴沃咱爾等之詭計。看來逆酋等之敢

於聚衆久拒。必因該處早經運貯糧食。藉以支持。自無由使之即為匱乏。但逆酋番衆同在圍中。不能不資水日用。其向西臨河一面。已經官兵圍截。賊衆斷不能復向河邊運取其圍中。即或有井。亦未必足敷飲汲。自係將大河之水引以供用。因閱阿桂前日所進到地圖。其大河之南有支河一道。經得什科爾之地。賊番自必資藉此水。其水或係大河分流。或自夾巴寨流出。歸於河內。未能遙揣。但

實錄卷二十一

四十一

河口近接官兵喀爾巴浮橋。而自夾巴寨至莫克巴寨一帶。久經官兵攻克。安有營卡。此兩處皆官兵力所能及。若可設法截住上游。使番衆無可供汲。不過兩三日。賊勢必將自潰。似屬攻圍上策。或酌量噶喇依賊寨地勢窪下。較河身為低。並可決水以灌賊巢。更為直捷。阿桂應即速妥酌辦理。計此旨到營。大功自早已就藏。原可無藉乎此也。將此由六百里加緊傳諭知之。○軍機大臣奏。臣等前

議覆將軍阿桂酌議凱旋事宜摺內。所有郊勞官兵。議令由河南行走。今准阿桂等咨稱。從山西柏井驛至恒山。中間只添獲鹿井陘兩站。若從豫省。則多備二十八站。仍以由晉省為便。應請將直隸山西二省經由調撥各事宜。交直隸總督周元理。山西巡撫巴延三。妥協豫備。從之。○提督長清都統王進泰。副都統旺保。祿奏報。臣長清於十二月二十五日。准將軍阿桂照會。遵將貴州兵及成都滿洲兵。帶領於二十九日抵美諾。臣王進泰。旺保。祿。准將軍照會。即將美諾一帶無甚關礙營卡。全行撤去。所有各山梁及橋梁河渡。並通西南兩路要隘。營卡十四處。遵照將軍指示。酌留兵弁防守。其美諾地方。臣王進泰仍駐守。除酌留兵弁外。其餘儘數撤出。臣旺保。祿。長清。帶領於正月初一日起程。由崇德擦爾角牛廠。功噶前進。一面搜山。一面安設卡汛。以通噶喇依之路。得旨覽。○丙戌。

實錄卷十

聖

上御奉三無私殿。賜皇子皇孫諸王等宴。○丁亥。上詣

安佑宮行禮。○御正大光明殿。賜朝正外藩等宴。召烏珠穆沁和碩親王。朋蘇克喇布坦。科爾沁多羅郡王。納旺色布騰。多羅郡王。和碩額駙齊默特多爾濟。多羅郡王鄂勒哲特穆爾額爾克巴。拜多羅貝勒。三音察袞。喀喇沁多羅郡王喇特納錫第。固山貝子多羅額駙扎拉豐阿。翁牛特多羅郡王布達扎布。教漢多羅郡王喇什喇布坦。固山貝子固山額駙羅布藏錫喇布。垂濟扎勒輔國公多羅額駙桑濟扎勒。土默特多羅貝勒索諾木。巴勒珠爾。巴林輔國公和碩額駙德勒克。喀爾喀車臣汗車布登扎布。和碩親王固倫額駙拉旺多爾濟。多羅貝勒蒙布多爾濟。固山貝子伊達木扎布。阿拉善和碩親王。和碩額駙羅布藏多爾濟。杜爾伯特和碩親王。車凌烏巴什。固山貝子博第。奈曼多羅郡王拉旺喇布坦。

實錄卷十

聖

蘇尼特多羅郡王車凌衮布固部郡王品級多羅貝勒霍集斯輔國公圖爾都額色君和什克阿魯科爾沁多羅貝勒達克丹等至御座前賜酒成禮。

實錄卷一

重

大清高宗法天隆運至誠先覺體元立極敷文奮武孝慈神聖純皇帝實錄卷之一千

大清高宗法天隆運至誠先覺體元立極敷文奮武孝慈神聖純皇帝實錄卷之一千一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事務處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣
總纂官經筵講官太子太傅文庫殿大學士文淵閣領閣事稽察欽奉 上諭事務處管理刑部戶部三庫事務
世襲騎都尉軍功加十九級隨帶加二級又加二級 臣黃鴻內大臣戶部尚書錄星旗滿洲都統軍功紀錄五次
尋常紀錄十四次 臣德瑛經筵講官太子少保工部尚書紀錄六次 臣曹振鏞等奉
敕修

乾隆四十一年丙申正月戊子

實錄卷一

上御正大光明殿賜大學士尚書等宴○己丑諭據官保奏現在患病且年逾八旬步履維艱請將內閣吏部等事務俱行開缺等語官保宣力有年尚能誠謹供職今以老病懇請解任著准以原官致仕吏部尚書員缺著阿桂調補並協辦大學士事務戶部尚書員缺著豐昇額調補兵部尚書員缺著福隆安調補工部尚書員缺著綽克托補授阿桂未到京以前所有吏部尚書著阿思哈暫行署理

綽克托現在烏什。其工部尚書著邁拉遜暫行署理。福隆安在工部年久。諸事諳悉。仍著管理工部事務。○又諭朕於二月初二日御經筵。所有應行典禮。各該衙門照例豫備。○諭軍機大臣曰。阿桂奏索諾木兄弟。接到阿倉。阿青岡達克書信。意已游移。復為丹巴沃咱爾所阻。而索諾木彭楚克。甲爾沃雜爾二人。因不能見其母兄。致相痛哭。則其心已動。目下自以儘力速攻為正策。使賊人膽落心驚。可冀早為蕞事。至賊番所以相聚堅拒。不過欲使我久駐勞師。糜耗帑餉。今阿桂等酌將官兵可徹者陸續撤回。使賊計徒施無益。所辦甚堪嘉尚。自可望指日集勦。惟是攻圍畧久。恐賊人於我營盤處所。暗挖地道。此事頗有關係。不可不加意嚴防。再賊人每當窮蹙之時。輒潛赴我營卡滋擾。乃其鬼蜮長技。阿桂等並當飭諸將士一體留心防範。不可稍疎。○督理糧餉四川總督富勒渾。浙江布

平定本二十一

三

政使郝碩奏。現在大兵三路會合。情形較舊不同。應覈定站程。另行安站。臣等即由西里寨行勦。於科斯果木。勒烏圍。西里寨。則朗噶克坡底。瑪爾古當噶等處。定為五站。安設齊全。其北路牛廠。至獨松各站。先行裁撤。所裁官員人夫。即添撥功噶一路。得旨嘉獎。○庚寅。諭曰。吏部堂官。現在辦事人少。瑚世泰著仍回吏部本任。倉場侍郎員缺。著嘉謨補授。其漕運總督員缺緊要。且正當辦理漕務之時。即著阿思哈。馳驛前往暫署。候朕另行簡放。昨命阿思哈兼署吏部尚書。今阿思哈現在出差。其吏部事務。著永貴暫行署理。戶部尚書事務。著英廉署理。內閣滿大學士。亦應有坐辦之人。阿桂未到京以前。並著英廉協辦大學士事務。所有英廉原兼之戶部左侍郎員缺。著福康安轉補。其戶部右侍郎員缺。著和珅補授。阿思哈左都御史事務。著素爾訥署理。綽克托所遺刑部侍郎員缺。著阿揚

平定本二十一

三

阿補授。並著協理步軍統領衙門刑名事務。邁拉遜所管事務較多。不必署理禮部。其禮部侍郎事務著高樸兼署。○又諭曰。正紅旗滿洲都統員缺。著阿桂補授。阿桂未到京之前。著拉旺多爾濟署理。鑲白旗蒙古都統事務著德保署理。正紅旗蒙古都統事務著永瑞署理。○命刑部侍郎王杰提督浙江學政。○辛卯。諭曰。王杰現出學差。所有刑部侍郎事務著袁守侗兼署。○諭軍機大臣等。閱阿桂等進到所克雍中喇嘛寺圖樣。形勢頗覺可觀。此係番地最大廟宇。其材料裝飾。有用者多。今勒平番境。設汛安營。此等寺廟。即另招喇嘛居住。亦無須過於華麗。倘概行燬棄。又覺可惜。莫若拆運來京。擇地照式建蓋。以紀武成盛績。或木料過大。難於移送。若水路可通。亦可運致。所有銅瓦及裝修華美什件。附便運送來京。以便倣造。將此隨軍報之。便諭令阿桂等知之。○壬辰。督理糧餉吏部侍

郎劉秉恬奏。凱旋官兵經由之路。業於成都府屬。派夫前往桃關撥辦站務。并將楸砭一路人夫。每站酌撥。派安草坡。卧龍關等站。但由草坡至美諾。二十餘站。向非糧運正道。諸事俱已荒廢。應有專員督辦。臣請自行留駐桃關。督同上緊趕辦。至楸砭一路軍糧軍火。應行分撥運貯者。現已委員在彼辦理。得旨嘉獎。○又奏路過灌縣。正值軍需局催運口糧。因思自灌縣至草坡六站。遠道運供殊難。查汶川近日奉文截留商米。及前存米。共二千石。汶川一站。得米四五百石。已足敷用。自縣城至草坡止二站。應將汶川餘米。就近挹注。得旨嘉獎。○癸巳。諭曰。廣州副都統劉沛德。年班來京。陛見。看其人尚堪造就。原欲留京任用。詢知伊在廣州副都統任內八年。因詢以從前將軍秦璜。叅奏副都統恒泰。浮銷買馬銀兩。並恒泰叅奏秦璜。尋釁充發家人塔思哈。霸占其妻。令坐八人轎入署。生辰演

戲。屬員俱往拜賀。並私用存公銀兩。及放官受賄等事。據稱恒泰辦理馬匹時。伊適來京。泰璜事曾經風聞。不能確悉。未敢具奏等語。此案伊等互相叅奏時。即交李侍堯德保審明。泰璜所叅無據。恒泰旋即病故。恒泰所叅各款屬實。因將泰璜於秋審時正法。劉沛德與恒泰同辦馬匹事務。何得不知。恒泰事已審虛。尚可無論。泰璜身為將軍。發遣家人霸占其妻。並於生辰演戲。屬員往賀。如此舉動彰著。闔城無不聞見。劉沛德同駐一城。乃謂知之未確可乎。劉沛德與泰璜同係漢軍。顯屬瞻徇迴護。各省副都統。於公事固當與將軍商辦。至將軍如此卑鄙無恥。有玷官箴。豈可隱匿不奏。各省設立副都統。果何為耶。劉沛德不勝副都統之任。著革去副都統留京。仍在叅領上行走。將此通諭各省副都統知之。○甲午諭曰。黃檢覆奏查辦歸化城稅務情形一案。不將派往會勘之司員評德永齡

平定卷二十一

六

一併列名。止該司單銜具摺。殊屬非是。此案係戶部奏請選派司員。前往會同黃檢赴彼查勘。其覆奏摺。自應列司員在前。而黃檢隨之。即如侍郎等出差。與督撫會查事件。列銜例在督撫之前。若派司員往各省會同督撫查辦案件。奏事列銜在督撫之下。歷來體制如此。昨吳壇派往安徽會審控案。李質穎與之連銜具摺。即其例也。蓋內外官階。不容稍紊。郎中員外品級雖小於藩臬。而一經奉差叙次。即當在藩臬之上。且藩司雖係從二品。若降補京秩。仍不過用為郎中。是藩司之與部屬。頂戴雖覺懸殊。而內外不容凌越。今黃檢具摺。不但不令奉差之司員前列。并且不署其名。竟若評德永齡係伊帶往隨同辦事者。有是理乎。黃檢著交部察議。至此案查辦情節。仍著該部議奏。○乙未諭前據將軍阿桂等奏。官兵攻勦金川。將賊境悉行掃蕩。僅餘噶喇依賊巢。通計不及百分之一。現在水

平定卷二十一

七

陸圍攻。為掃穴擒渠之舉。計日可以獻俘闕下。原擬俟露布馳聞。舉行告功大典。茲復據阿桂奏。連日將噶喇依緊要碉寨。節經克獲。並斷其水道。兼用大礮轟擊。摧其垣壁。殲賊甚多。且索諾木之長兄岡達克及其母阿倉姑阿青等。並倡謀助惡之大頭人山塔爾薩木坦達什阿庫魯雍中旺爾結等數犯。現皆拘獲在營。可舉獻俘之典。至蟻衆聚於一窟。苟延殘喘。實同金底游魂。無從他竄。擒捕亦屬非難。惟能將逆酋索諾木逆黨丹巴沃咱爾俱生致解京。自為盡善。即或賊酋等勢迫自戕。亦可俘馘同獻。是蕩平金川大功業已全定。更無俟馳報紅旗。今諏吉於二月初九日啟鑒。先謁

東陵再謁

西陵。申達集勲忱。禮成。回至南苑恭奉皇太后聖駕。由桐柏村登舟。巡幸山東。由德州遵陸掖

輦展謁
岱廟。祇迓
慈輦。即詣
闕里告成瞻禮。仍於濟寧由水程回鑾。計當將士凱旋之期。舉行郊勞。以彰定武鴻庸。所有應行一切典禮。各該衙門照例敬謹豫備。○諭軍機大臣等。日來盼望紅旗甚切。今阿桂等奏到。連日攻打噶喇依情形一摺。據稱海蘭察率同福康安等。分兵從左手山峯而下。攻得大石卡一座。又將其衛護取水之大石卡一座。亦經攻得。賊人取水更難。其地與賊巢甚近。移礮往轟。賊勢當益窘迫等語。攻之自易為力。指日便應掃穴成功。尤為盼望。至所稱自勃爾赤亞魯回來之後。業已置之不理。今賊酋等又有此時只剩下死的一路。求將軍大人施恩憐憫等語。似賊酋近日又有具稟懇求之事。自當置之不理。但何以未將所差何人。所答何語。詳晰奏聞。著阿桂等

即行附便覆奏。又奏據日來投出番人供稱大礮攻打之處。將三層高厚礮牆穿透。被礮擊斃及因牆塌石壓而死者甚多。索諾木等不敢復住礮樓。已於樓下第三層牆垣較厚之處。存站躲避。又因寨在石峯之上。不能創害。將土石口袋四面圍繞遮護。並稱丹巴沃咱爾及各頭人同張坤忠俱在其內等語。看賊人如此偷生惜命。諒不能引決自裁。但窮蹙若此。尚欲抵死支拒。苟延殘喘。實為可惡。

平定本二十一

十

此必張坤忠習知內地情事。代為主謀。以番衆多守一日。所費糧食有限。而官兵多攻一日。供餉需數萬金。欲使我兵久駐糜耗。尤堪切齒。竟當令土兵等在卡上喊諭。以爾等羣賊相聚死守。不過欲圖多延時日。耗我兵糧。此乃逆犯張坤忠之狡計。今我軍營糧餉充盈。內地又復源源供饋。而運川備用軍需銀兩尚盈千萬。即稍稽時日。用度仍屬寬餘。且此次大兵申討。惟在掃蕩賊巢。雖多費亦所

不惜。此等愚拙之事。徒勞無益。況以大礮神威轟擊。何攻不克。賊衆又安能久延。如此宣諭。俾知我已窺破賊計。其伎倆更無可施。衆心自益惶懼。賊寨雖聚有糧石。坐食易於匱乏。不久自當內潰。此亦治病偏方之一法也。又據奏所有投出男番四十餘人。悉行殲戮。即喇嘛班第亦不稍為寬宥等語。此等賊番至此時始行投出。其罪實無可赦。自當悉予駢誅。但現在攻圍賊巢甚急。蟻衆驚惶無措。因而脫出求生。相率而來者。應復不少。若知將降番即在軍營正法。勢必裹足不前。雖此時賊即聚守不出。亦無難力攻而得。但攻圍嚴急之時。賊衆接踵來投。其勢更當立成瓦解。今阿桂等如此辦法。恐轉為賊多留幫助抗拒之人。未為盡善。阿桂等自因深恨賊衆狡惡。故未計及於此。現在官兵聲勢甚盛。衆輩到營。更無從窺我虛實。別施奸詭。或將應辦之人。押解成都正法。亦屬便易。或將此

平定本二十一

十一

等降番。仍遣歸巢。令將賊酋逆黨縛獻。賊酋等聞之。必不相容。自將若輩寘之死地。更使衆番不知我剪除羣醜之計。不致阻其來投之路。自更妥協。此旨發到軍營。計大功早應告藏。設或尚未辦完。續有投出之番人。將軍等當照此旨酌量妥辦。又閱進到攻圍噶喇依情形圖。官兵四面佈圍。固屬周妥。惟閱舒常營盤。尚在河西營卡之外。似覺稍遠。何不移至沿河卡邊。用礮夾河轟擊。更當得力。又烏爾納營盤東北之官兵營卡。距賊巢亦遠。何不不移過河溝。於硃筆園出處駐劄。使礮轟賊寨。更為切近。其餘有應移近者。並著將軍等照此妥酌辦理。仍著發交阿桂閱看。此旨著由六百里加緊發往。傳諭知之。佇盼紅旗旦晚即至。○又諭前經阿桂等奏。有自促浸投誠之迷輸喇嘛一名。已諭令派員解送京師。今據阿桂等奏。自該喇嘛投出後。又有續行投出之噶布珠雍中朋喇嘛。並在促浸助

惡之堪布喇嘛共三名。於正月初十日。派員自軍營一併起解赴京等語。計程此時將抵成都。著傳諭文綬。即添派妥員。并沿途分別管押。小心照料。迅速解送京城備訊。如此旨到時。該喇嘛等已過省城。即著文綬檄飭該委員。趕緊遄程管解。毋稍稽延。○丙申。諭朕此次祇謁

兩陵。回至南苑。恭奉

皇太后。安輿。巡幸山東。已降旨於二月初九日

啟鑒。著顯親王。裕親王。大學士。舒赫德。協辦大學士。尚書。英。廉。留京辦事。其月選之文員。內。通判。州縣等官。武員。內。八旗護軍校。驍騎校。及外省送到之補放水手官。驍騎校。並年滿千總等官。弁。俱著王大臣照例驗放。至外省督撫提鎮等奏摺。俱照上次巡幸山東之例。著齎摺人前赴行在奏遞。該部通行傳諭知之。○又諭曰。阿哥等赴南苑恭送

皇太后啟鑒後。即住彼處行圍一月。再行進京。

著派積福瑚什在阿哥處照料。○諭軍機大臣等據敦福奏上年江省間有被災之處恐致青黃不接時災地民人有食貴之虞。楚省現有常平溢額及停運豫省正耗穀共二十萬一千石。請儘數碾米運赴江南聽候分撥平糶以裕民食等語。適高晉陞見在京尚未起程回任。當經傳問。據稱上年江省偶被旱災。節經蠲賑頻施。窮黎已各得所。現又奉旨加賑。所有本省倉穀儘足敷用。且川省米糧業已弛禁。商販又源源而至。無需隣省接濟等語。江省民食現既不虞匱乏。且川米源源而下。更無藉接濟。此項穀石自可毋庸碾運。致糜運費。著傳諭敦福知之。○又諭聞直隸地方所種春麥比山東較少。因去年麥收歉薄。貧民購買麥種稍難所致。北省民食以麥麩為重。尤宜妥速籌辦。俾資接濟。昨歲臘雪普遍。近復春雪優霑。土膏渥潤。正可耕耩春麥。著周元理迅即飭屬勸民及時趕種。尚不

為遲。其中如有缺乏麥種之戶。速令地方官確切查明。量為借給籽種。俾早得翻犁補種。以冀有收。將此傳諭該督一面迅速辦理。一面覆奏。○又諭前曾傳諭阿桂。俟軍務全竣後。帶領凱旋官兵。於四月中旬至黃新莊。備行勞還之禮。茲朕詠吉二月初九日啟鑾。祇謁

兩陵恭奉

皇太后巡幸山東告成

闕里。由濟寧登舟回鑾。按程站計之。應於四月二十七日駐黃新莊。二十八日舉行郊勞大典。二十九日獻俘凱宴。阿桂等掃穴擒渠之後。於一切善後事宜。更可從容辦理。行程亦屬寬裕。將此遇軍報之便。諭令知之。○丁酉。戶部奏外省文員。遇引見離任。其任內俸銀有計日扣存者。有並不扣存。統行支給者。未能畫一。查官員事故離任。及引見陞調他缺。俸銀自應扣除。其引見仍回本任之員。係

卓異及俸滿並未開缺。所有俸銀應准其照數支領。又旗務則例內載八旗兵丁及軍營陣亡兵丁之無嗣孀婦身故。照伊夫原食錢糧給與。其官員之妻及陣亡官員之妻無嗣身故者。俱未開載。應准照領催分例賞給。從之。○刑部議覆大學士管兩江總督高晉奏稱。外省秋審。每歲審錄時。令本管道府巡歷所屬。悉心審勘。遇有臨時呼寃之犯。另繕招冊解司院覆訊。惟該道府多係本案承審。恐心存迴護。即改委隣封別屬。亦不免瞻徇。請嗣後仍照舊例。解犯到省。督撫率同藩臬司道親鞠覈實。其道府巡錄之例。請停止。應如所奏。再秋審後。例於五月中旬具題到部。其各省應入秋審案件。亦應照舊例。以各犯事地方與省城相距遠近。分別立限到省。從之。○戊戌。督理糧餉吏部侍郎劉秉恬奏。郊勞官兵及土司頭人等。現改議仍由楸砥一路行走。查楸砥各站人夫。前經撥往卧龍關添

設。今若仍將原夫調回。往返跋涉。不無逃散。應將署督臣文綬所派成都府屬從前西北兩路裁減站夫三千一百餘名。改赴楸砥趕緊辦理。報聞。○以內閣學士嵩貴充經筵講官。○以侍講學士朱珪充日講起居注官。○予故和碩簡親王豐訥亨諡曰恪。○賜琉球國中山王尚穆使臣宴賚如例。○己亥。

上奉

皇太后幸暢春園。○諭軍機大臣等。據薩載龍承祖各回奏。問擬陳八戳死陳勝章一案。兩人摺內均未將案犯罪名究應如何定擬之處。詳細聲叙。惟各自行引咎。請交部議處治罪。殊未明晰。此案先因部駁。以該撫等一命兩抵。辦理太覺錯謬。是以諭令薩載龍承祖將因何如此問擬。抑或另有別情。各據實明白回奏。今閱覆奏之摺。止稱陳裕章因拔豆細故爭角。拴縛親嫂。迨伊兄陳勝章往與爭毆。陳裕章藉稱交伊收管。即抓傷胞兄咽喉。

復用繩拴套兄頸。強拉前行。致被陳八戳死。該撫等以其情形兇暴。倫紀攸關。是以問擬斬決。而於一命兩抵之處。或應改。或不應改。俱未置一詞。含糊殊甚。若原問實屬舛誤。應遵部駁改正。則該撫及臬司。有應得處分。若將案情反覆講求。必須仍從原擬。則該撫等又無可加罪。是此案應俟題結到日。方能定該撫司之是非。今若照該撫等所請。遽行交部。則案犯尚未擬用何條。又憑何事擬兩人之罪。豈僅以其自認糊塗愚昧。便可付吏議耶。朕辦理庶務。惟在研求至當。以協情理之平。從不肯顛預了事。薩載等豈尚不知。著再傳諭薩載。龍承祖。速將此案是否應遵部駁。抑仍從原擬之處。即行詳確覆奏。並即將案犯覈實定擬具題。候朕再降諭旨。尋奏陳裕章。究非與陳八先有謀約。應遵部駁改正。照弟毆胞兄本律定擬。陳八照原擬具題。得旨。俟題到有旨。○軍機大臣議奏。向例八旗滿

洲蒙古各佐領下護軍校驍騎校。缺出。由該佐領之領催前鋒護軍內揀選引見補放。近年來各都統俱揀選曾經出師者陞用。其驍騎營領催及八旗印務筆帖式。並保送應陞之拜唐阿等。皆以未曾出師。不得陞進。又每佐領下領催承辦俸餉文案。終日當差。並無陞轉之途。是以情願挑補者甚少。今酌議護軍校仍照舊辦理。其驍騎校缺出。補放出師者二名。領催一名。或遇應放出師及領催之缺。而適無可放之人。即於該旗奏留保送應陞之筆帖式。拜唐阿內。揀選引見從之。○庚子。皇十二子永璘薨。○諭朕向來駐蹕熱河。所有月選文武各員。令該堂官帶至行在引見。如遇巡幸各省。則月選之文員通判州縣等官。武員驍騎校千總等官。即令留京辦事。王大臣驗放。不使選員久羈旅食。所以示體恤也。第王大臣驗放。除照九卿等所驗衰頹者。照例改教外。並未見有所更調。固屬不敢

擅專之意。但缺之繁簡不同。人之能否不一。若人地或不相宜。當官即不免叢脞。是以朕於月官引見時。每慎重甄覈。如有年力強壯。人尚明白。而掣得簡缺者。亦有人本平庸。齒復就衰。而掣得繁缺者。必為斟酌對調。以協量才授官之意。從不肯以輕心掉之。今王大臣於驗看月官。惟恐更調易招物議。遂為依樣葫蘆。倘用違其才。於吏治未為有益。是避嫌事小。誤公事大。不可不權其輕重也。嗣後

聖訓卷二十一

三

王大臣等驗看月官。見有人缺不相當者。即為悉心商榷。酌議對調。仍令派出之九卿科道覆看。如意見相同。所擬自屬公當。即一體聯銜具奏。請旨遵行。若九卿科道中或有言所擬尚未允協者。著吏部將所言之人記明。并將擬調之員扣存。候朕回鑾後引見定奪。如擬調果未愜當。則留京辦事王大臣。自難辭咎。若所擬本屬不爽。而一二人意獨參差。即難保其無懷私偏徇之弊。惟於異議之人

是問。其武職內有應分別營衛者。亦一併酌覈妥辦。即自此次巡幸山東為始。著為令。○又諭據阿桂奏。隨營辦事之禮部員外郎曹焜。於口外糧站事宜。頗為明白。茲當軍務告竣。應行回京。若調戶部覈辦報銷。似有裨益。請旨調補等語。著照所請。曹焜即以戶部員外郎調補。該部知道。○諭軍機大臣等。連日盼望捷音甚切。茲據阿桂等奏。現在用礮合擊賊巢。約計十天左右。即可掃蕩。其索諾木

聖訓卷二十一

三

彭楚克。及大頭人達爾什桑。卡爾雅瑪。朋阿。庫魯三人。續經到營。現已嚴加拘管。等因。一摺。覽奏稍慰。看來賊勢已極窮蹙。今既四面用礮合轟。自可剋期蕩平。至此次到營懇求之索諾木。彭楚克。係索諾木同母兄弟。自因其母在營。是以來投。且前日一見阿倉差往之人。即勸索諾木等出降。繼復痛哭。今到營跪懇。即求面見將軍。並恐回寨不能再出。又同岡達克差人回巢。催促逆酋投出。此兩人

尚不敢始終抗拒。至達爾什桑卡爾經岡達克再三曉諭。尚促索諾木彭楚克速回。及詰以把持之語。亦俯首無辭。實屬怙終不悛。難以輕宥。尤宜嚴加拘禁。勿致疎虞。至逆酋索諾木等。始稱於十五日。出降。繼復托病不出。甚屬可惡。阿桂等雖稱其為頭人所制。每日遷延。然逆酋當此危迫之時。如果尚知畏懼。亦何至不能自主。即或丹巴沃咱爾等。從中把持。亦無難將梗阻之人。一併擒縛。率衆速

出請罪。今仍詭語遷延。竟是索諾木稟性兇頑。至死不變。實堪切齒。現既用礮轟擊。自即可削平賊巢。諒此輩釜底游魂。必當同就擒獲。檻解獻俘。迅速集勲奏凱。阿桂現奏期以十日。果如所言。則二月初九日啟鑒之前。尚可望紅旗早至也。將此由六百里加緊傳諭知之。旦晚惟盼露布馳達。○以詹事府少詹事沈初為詹事。兼翰林院侍讀學士。○旌表守正捐軀之湖南新化縣民楊添文妻李氏。

○辛丑諭各幫重運漕船。如遇御舟經過時。止須按次停泊岸旁。毋庸令其先期引避。○軍機大臣議准。烏魯木齊都統索諾木策凌奏稱。烏魯木齊所屬漢字事件日繁。請於原設民書十三名外。酌添五名。作為額缺十八名。其工食於本處房地租銀內支給。五年役滿。照例保奏賞職選用。從之。○以故奉恩將軍沙爾慎子那爾善襲職。○以署正藍旗滿洲副都統阿揚阿為正紅旗滿洲副都統。○

壬寅。

上詣暢春園。問。

皇太后安。○還宮。○諭據李質穎奏。安慶等府州屬。上年間被旱災。所有乾隆四十年分漕糧。已蒙緩至四十一年帶徵。其壽州。宿州。盱眙。懷遠。四州縣。自三十八年後。連被偏災。若統於四十一年。新舊併徵。民力未免拮据等語。著加恩將壽州等四州縣。所有乾隆三十八。九。兩年積欠漕糧。一萬四千九百餘石。緩

至四十二三兩年。分年帶徵。俾民力益紓。以副優恤窮黎之至意。○又諭據楊景素奏。此次巡幸山東。所有隨營站道辦差之滿漢各營官兵。整備衣裝。餽養馬匹。皆有應行需用之處。請豫借一季俸餉。仍於本年秋季起。分作四季扣還等語。著照所請。借給一季俸餉。准其分季歸款。以示體恤。○是月。直隸總督周元理奏。各災區遵旨展賑。例應銀米各半兼放。即於河南存貯薊糧內撥運。但此項倉儲。必俟二三月內。始能運到。難於接濟。應請照例。每米一石。以銀一兩二錢。全行折給。俾領賑各戶。自行買食。報聞。○兩淮鹽政伊齡阿奏。江蘇通屬各場。及泰屬之富安。安豐。梁垛三場。運鹽河道。上年雨澤稀少。頗多阻塞。須動工挑濬。場運河工。例係商捐辦理。臣於年前勸諭諸商。乘汎未發時。雇夫挑濬。開印後。可一律完竣。報聞。○安徽巡撫李質穎覆奏。遵旨察看臬司農起人尚本色。其論事似

乎露才好名。細覈其承辦刑名事件。俱能認真。於司臬尚可勝任。得旨。公論知道了。○河東河道總督姚立德奏。山東濟寧衛等幫糧船。例係鋪水後開行。往年鋪水之際。在北則放南旺湖。在南則放馬場湖。今兗泰等府去冬屢得大雪。濟寧汶上暨鄒滕嶧縣。春雨滂沱。均歸汶水。是以此次鋪水。專用汶流。無須再動湖水。得旨。欣悅覽之。又奏。臣於南旺未煞壩之先。遵旨通引蜀山湖水。將臨汶之永定。永安。永泰三斗門引渠。一律挑挖倍深。汶水暢灌入湖。查驗誌樁。現已蓄水丈餘。所修大石碎石等工。亦經完竣。足資抵禦湖浪。此外馬場馬踏南旺等湖。現已收水五尺至九尺不等。臣仍隨時察看。如貯水濟運有餘。免致今冬再引。即知會江南。堵閉潘家宅。臨黃鉗口等壩。得旨。嘉獎。○辦理軍需布政使銜李湖覆奏。遵旨查覈軍需銀款。口外各案。均歸承辦諸臣分覈。其口內各營屬支領銀兩。

查係指款詳請督臣批飭藩司覈發。按月造冊咨部。均有文案可據。現督局員催送銷冊。確覈釐辦。覈轉題銷。報聞。

實錄卷一千一

三六

大清高宗法天隆運至誠先覺體元立極敷文奮武孝慈神聖純皇帝實錄卷之一千一

大清高宗法天隆運至誠先覺體元立極敷文奮武孝慈神聖純皇帝實錄卷之一千二

監修總纂官太子太傅文淵閣大學士劉世明領閣事領侍衛內大臣福康安奉 上諭軍機處管理
吏部理藩院事務黃旗滿洲副都統德新副都統功加七級隨帶加一級尋常加二級軍功紀錄一次
副都統官經筵講官太子太傅大學士文淵閣領閣事禮部奉 上諭軍機處管理刑部戶部三庫事務
葉麟副都統功加十九級隨帶加二級又加二級尋常加一級內大臣戶部尚書蘇麟滿洲副都統軍功紀錄五次
尋常紀錄十四次臣德麟經筵講官太子少保工部尚書紀錄六次臣曹振鏞等奉
敕修

乾隆四十一年丙申二月癸卯朔春分朝

日於東郊遣理郡王弘曉恭代行禮○諭據傳良等奏滿營官員內現在熟練稿案兼通滿漢文義甚難其人茲值金川大功告竣回營官兵一切事務需員辦理請將革職之防禦秦廣猷降調之協領隆德帶降革之案留任辦公等語著照所請隆德帶所降之級秦廣猷帶革職之案俱從寬留任隆德俟三年無過秦廣猷俟四年無過再行送部引見請旨開復該部知道○定西將軍協辦大學士尚

書公阿桂定邊右副將軍尚書公豐昇額內大臣明亮奏查木坪沃克什黨壩等各土司土舍均已束裝豫備赴京。綽斯甲布三雜谷布拉克底巴旺亦派土舍頭人隨往。但番人深畏內地炎熱。若令隨同官兵。於四月望前抵京。其歸途正當五六月。倘有事故。轉不免指為畏途。應請令至十一月內。本省提督派出諳練將領帶領。於年前至京。彼時正值入覲之各蒙古及土爾扈特王公扎薩克併回

城大小伯克等俱集京師。在各土司等見王會輻輳。既益生其震疊。而輪班之王公伯克等亦知無遠不服之盛。諭軍機大臣曰。阿桂等奏各土司頭人於年前到京入覲。所見甚是其應行入覲之土司。統俟阿桂辦理善後事宜時酌定。如何分班照回部輪流入覲之例。與外藩等同與朝正。仍知會沿途督撫一體照料。○兵部議覆盛京將軍宗室弘煦奏稱駐防官員前因民人王格聚眾械鬪案內。

奉旨銷去加級紀錄。現在實能痛悔奮勉。請照舊准予議叙。應如所奏。得旨。此案兵部遽行覆准。殊屬非是。前因盛京駐防各官習氣不堪。不可不加整飭。是以特降諭旨。將伊等停其議叙。嗣後如果能改悔。再予紀錄。昨據弘煦等奏稱現在各官漸除舊習。實心奮勉。可否照盛京五部及奉天府州縣之例一體加級紀錄等語。批令該部議奏。兵部堂官於此等特旨停止之事。理應先行請旨。再行覈

議題達。即不然亦當於疏內聲明。或仍遵前旨停止。或如恩准予議叙。分別兩請。候朕降旨。方得辦理之正。乃視如尋常事件。輒照該將軍所奏議覆具題。若非朕留心披閱。竟照簽依議。是直置前此所奉特旨於不論。部中不太覺有權乎。此等駐防各員。既據弘煦奏稱實能痛改惡習。差使均無貽誤。著加恩准其一體議叙。其辦理錯誤之兵部堂官。著交部察議。○署四川總督文綬奏蜀省產米下

游各省均資接濟。前因籌辦兵糧。請於夔關截禁。今大兵即日竣事。業經停止發運。無須採買。應仍聽其流通。現檄遵照開禁。得旨是。○甲辰。以舉行仲春經筵。遣官告祭。

奉先殿

傳心殿

上御文華殿。講官暨侍班之大學士。九卿詹事等行二跪六叩禮。分班入殿內序立。直講官四人出就講案前行一跪三叩禮。復位。直講

官永貴曹秀先進講。論語百姓足君孰與不足二句講畢。

上宣御論曰。後儒解此章者。率以深言君民一體。什一天下之中為言。而戒夫橫征暴斂以虐民耳。夫橫征暴斂。自非大無道之君。與夫極孱弱之國。孰肯為之。彼其剝肉補瘡。胥淪於亡。有如哀公所云二猶不足之歎耳。余則以為為人君者。當常存百姓不足而欲其足之心。而此心常不足也。蓋貴為天子。富有四

海。豈有不足之理。但四海之內。百姓衆矣。其皆足乎。若但知己之足。而不知百姓之不足。視己之足。即以為百姓亦足。則是孤為君之職。背天理而失民心。必在此矣。然百姓之足。豈易言哉。水旱之不齊。貧富之不等。非輕徭薄賦之所能及也。一人向隅。仁者有所不忍。而況向隅者衆乎。此予所以宵旰祈年。令各省無匿災傷。而亟為賑恤緩貸。補偏救弊之為。夜以繼日。猶不足也。講官暨侍班官跪聆

畢。興。直講官景福蔡新進講。書經君子所其無逸一句講畢。

上宣御論曰。無逸一篇。凡七發端。而皆以嗚呼始之。所以長言詠歎。戒宴安。勵祗懼。三致意焉。而開章即曰。君子所其無逸。實挈通篇綱領。夫所者。處所也。即地也。蓋人晝而作。夜而息。皆必有所處之地。不能離也。為人君者。果能以無逸為所處之地。作焉息焉。語焉默焉。動焉靜焉。無不以無逸為所焉。則何私欲之

侵而怠惰之萌哉。召誥王敬作所。益相發明。而著誠深矣。講官暨侍班官跪聆畢。大學士舒赫德。于敏中奏曰。欽惟

皇上大德天覆。聖敬日躋。

恩施每洽於閭閻。咨警彌殷於夙夜。洵說侔異。

益健協。

乾行。臣等幸聆。

御論敬體。

聖衷曷勝欽服。奏畢。諸臣出。就拜位。行二跪六

叩禮。禮成。

上御文淵閣。賜茶。還宮。復賜講官暨侍班官等

宴於文華殿東廡之本仁殿。遣官祭

先醫之神。諭軍機大臣曰。李侍堯奏審擬

李阿集等在洋搶奪殺人。一摺。將汛兵郭英

里及衙役許阿啟等。僅擬外遣。又刑書禁卒

林耀等五名。擬以軍罪。千總范簡選。擬以革

職。辦理均屬寬縱。經法司覈覆。改擬已依擬

行矣。兵丁係應行捕盜之人。郭英里乃敢受

賄包送番婦。實屬亂法之尤。許阿啟等身充官役。膽肆隱匿寄頓。并代正犯料理家務。均屬法所難貸。即林耀等五名。以刑書禁卒。勒索得贓。軍罪豈足蔽辜。千總范簡選。失察賄縱重犯。又豈得僅以革職了事乎。李侍堯平日辦事。頗知輕重。何於此案。問擬率意若此。李侍堯著傳旨申飭。○乙巳。諭軍機大臣等。前月二十八日。據阿桂等奏。現用大礮攻擊賊寨。不過十天左右。可以得手。本月初一日。

復據秦擎柵進逼。加礮轟摧。旬日之間。可得。以其拜摺之期計之。正月底即應蒞事。是以連日盼望捷音尤切。但官兵如此奮力攻打。屢次破其碉卡。殲其醜類。逆酋等勢已窮蹙。早應畏避求生。乃猶負隅抗拒。實非情理。看來賊人等固屬護死遷延。亦其詭智欲多遲時日。以疲我兵力。糜我糧餉。實為可惡可恨。現在官兵布圍嚴密。且層層逼近。自不虞尚有疎懈。惟是各路官兵之應先撤者。阿桂俱

經酌量減微。而現在攻勦之兵。為數尚多。所需軍食。應復不少。近日承辦糧站之大臣等。節次具奏。或酌停糧運。或酌徹糧臺。俱因軍營尅期蒞功。豫為籌辦。但阿桂等。自舊歲臘月十九日攻圍賊巢以來。距今已一月有餘。尚未能奏掃穴擒渠之績。今各路所備糧石。俱屬有限。設軍務未能速竣。現有之糧。不敷供給。所關甚大。著傳諭阿桂等。速即上緊攻打。務期迅奏膚功。並著阿桂通盤熟籌。或有

可減之兵。再行酌減。以省糜費。若現兵不能再減。而存糧或尚不敷。即速行知會富勒渾。文綬及管理糧餉大臣等。迅速籌辦。趕運。期無貽誤。此一節。並諭富勒渾等知之。朕因盼望紅旗。每致夜不成寐。茲偶念及。甚為懸注。阿桂等。務當善體朕意。即為努力速辦。以副殷懷。此旨。著由六百里加緊發往。惟盼紅旗及早馳奏。○戶部議覆雲南巡撫裴宗錫疏。稱雲南復隆鹽井。向未建倉。煎出鹽觔。均暫

貯竈戶家內。難免挪掩透漏之弊。請建蓋倉房二十間。官為收貯。從之。○督理糧餉四川總督富勒渾。山西巡撫鄂寶。河南布政使顏希深。奏此時北路軍糧。應歸併西路。但西路臺站新安。以之分運兩營。恐不足深恃。擬於北路未徹站之先。趕辦二千石。運赴大營。即西路撥運米偶有不敷。已可添補。其北路徹站後。所有後路官兵。即調赴大營。其未調營之前。所需軍糧。擬令駐甲雜以外者。在大營

支領。甲雜以內者在牛廠支領。牛廠存貯軍火糧石。現飭運赴勒烏圍。運竣亦可裁撤。報聞。○是日起。

上以祭

社稷壇。齋戒三日。○丙午。遣官祭

歷代帝王廟。○諭曰。台吉蘇克都爾所屬八

個半佐領之人。原係蘇克都爾之妻進獻

皇祖。是以從前不屬扎薩克管轄。今旺楚克多

爾濟私戴翎頂。妄行滋事。皆因無人管束。所

致恐此後再生事端。蘇克都爾雖無子嗣，亦有兄弟族人，俱可管理。著德福馳赴土默特，會同該盟長喇特納錫第，查明蘇克都爾弟兄有無子孫。如無子孫，即查其族人將此項人等附隸伊等當差，令其約束。○諭軍機大臣等，據吳嗣爵奏，新歲以來，河湖消存水勢情形，摺內稱：引河五道內，惟張家莊河尾水深二尺一二寸，又裴家場河水深二尺二三寸，應即先為挑挖等語。洪湖蓄水全賴引河深通，方足以敵黃濟運。今張家莊裴家場二引河，僅水深二尺一二三寸不等，必因黃水倒漾，以致引河淤淺。若此，倘聽其愈積愈深，於清口甚有關係，不可不亟籌挑挖。雖據吳嗣爵派委副將徐建功駐工督催，尚恐未能妥協。高晉自京回程，道經徐州，前往籌辦，甚便。著交高晉即至該處，會同吳嗣爵悉心籌辦。設法疏濬，務期一律深通暢達，切不可稍存遷就因循之見，致有貽誤。仍將如何籌辦

情形，先行覆奏。將此傳諭高晉，並諭吳嗣爵知之。尋奏張家莊河尾裴家場河身現經疏濬，深至四尺五六寸。惟河頭尚淺，現飭接續疏治，多添器具，刨挖爬撈。總以水深五尺為度。再查湖水已長，所有清口口門，原寬二十五丈，並遵照定制，將東壩酌開五丈，以資宣洩。得旨覽奏俱悉。○命編修鄭際唐在尚書房行走。○禮部題：朝鮮國王李哈遣使表賀萬壽，冬至元旦三大節，及進歲貢方物，賞賚筵

宴如例。○丁未祭

先師孔子，遣協辦大學士程景伊行禮。○戊申祭

大社

大稷

上親詣行禮。○詣暢春園問

皇太后安。○幸圓明園。○己酉，諭曰：文綬著實授四川總督，其湖廣總督員缺仍著富勒渾調補。俟大兵凱旋後，即行赴任。○又諭：昨日

朕恭祭

社稷壇德明贊禮錯誤。德明平日唱贊妥善。經朕加恩擢用侍郎署理副都統。自宜感激。益加敬謹。乃屢次錯誤殊屬不堪。無福承受朕恩。著革去侍郎及署副都統。在贊禮郎上行走。伊此次派出扈從。仍令其隨往。○定西將軍協辦大學士尚書公阿林定邊右副將軍尚書公豐昇額內大臣明亮奏。臣等派兵於二十二日夜分攻賊巢。左手兩寨未能即克。

因於二十五日夜攻克其東北之木工寨。並附近石卡四座。現督兵趕拏木柵。運礮轟擊。又綽窩土司彭楚克喇布坦來營。稱願隨同入覲。實為効順。可使霍爾各部土司聞風興起。臣已賞給花翎鼓。諭軍機大臣曰。逆酋當此窮蹙之時。尚敢負隅抗拒。實為可惡。阿桂等惟當一意轟擊賊巢。速期摧破。毋致羈延。又阿桂奏。綽窩土司彭楚克喇布坦願隨各土司入覲。番衆之性。不耐炎熱。所有輪班

入覲之土司等。已許其十一月起身。於歲內到京。綽窩土司亦應一例妥辦。○又奏。據逆酋今頭人將張坤忠送出。係屬要犯。茲派解赴京。諭軍機大臣曰。張坤忠以內地兵丁。甘心投降賊番。為之助惡。自應解赴行在。嚴審治罪。著傳諭文綬。即速檄飭川省委員沿途小心管解。遄程行走。○督理糧餉吏部侍郎劉秉恬奏。臣前奏汶川存米。就近撥往草坡。今草坡一路兵數漸少。而汶川為樵砥一路

必由之徑。取用較增。因即飭令糧員將前項米石停運。并令保縣至樵砥各站內有存米較多處。俱趕運薩拉。以便分撥。人夫一項。向來里夫不足。多係雇募貿易之人。充當客夫。應用近來凱旋在即。商運既停。貿易小民頗有散歸者。恐以後各站雇夫短少。因派員於關隘要口。諭以新得之地。均須設鎮安營。口外尚有買賣。不必急歸。各站貿易人漸已安心樂業。夫力自可裕如。報聞。○署雲貴總督

覺羅圖思德奏。新改騰越鎮龍陵協添撥兵丁。及永昌協應留駐防兵。均係新移。未諳邊營兵制。必須將應習馬步弓箭。烏鎗藤牌。雜技。分別定期。令該營備弁督率操演。至上年提督徹防後。派駐曩宋。今南甸安設重兵。又在曩宋以外。應令署提督錦山移駐南甸。總兵吳萬年。兼署騰越鎮。仍令該提鎮於適中之地。半月會操一次。其龍陵兵。即令駐守鎮將合操。報聞。○庚戌。諭曰。侍郎袁守侗。現派隨往山東。所有順天府府尹事務。著胡季堂暫行兼署。○又諭。社稷壇之有拜殿。原以備致祭之日。或有風雨也。今年偶值風雨。所司移拜位香案於殿中。餘仍列於壇上。是朕獨得蔽棟宇。而神位牲醑。並皆露設。非所以昭妥脩。朕心深切不安。雖社稷之制。不設棟宇。以承天陽。是乃就壇墻而

言。至

神牌平日原係尊藏

神庫。未嘗不在屋宇之內。則祭享時。偶因風雨。移奉殿內。又何嫌忌乎。且拜殿甚寬。想當締造之初。未必不豫為臨時移奉計。祇以未嘗經之事。所司遂依例陳設。不知所據。嗣後祭時。或遇大風雨。所有

神位祭品樂簾。應如何移就拜殿之處。著大學士九卿會同太常寺。敬謹詳議具奏。尋奉臨

祭時。如請駕前十刻。或值風雨。及陰雲太常寺。即將祭品樂簾。移設拜殿。恭請

神位於殿內致祭。如不及十刻。仍照舊例行。從之。○大學士九卿等議。奉遵旨。酌擬明代殉難諸臣。分別予諡。伏考歷代易名。祇為飾終常制。而勝國遺忠。並膺茂典者。實曠古所未有。謹按順治九年。

世祖章皇帝軫念明末甲申殉難之臣。自范景文以下二十人。及劉文炳。鞏永固。衛時春。張

慶臻錫諡有差。乾隆四年。

皇上允廷臣請於明臣趙謨復予旌諡。茲奉旨詳議追獎。臣等伏讀欽定明史及輯覽二書。詮次釐定。義法精嚴。蓋自萬歷以降。諸臣効節始末。具載二書者。臣等分析考稽。而以大清一統志與直省通志互覈同異。至建文諸臣遺聞軼事。附會不經。表忠致身等錄。無足徵據。應一以正史為斷。其中區別流品。斟酌典章。謹擬數條。一諸臣所處時地不同。素行亦不一。應定為專諡通諡之法。其生平大節卓然。又艱貞自靖者。宜特予褒崇。按名定諡。其平時無甚表見。而慷慨致命。則彙入通諡之例。較著者為忠烈忠節。次則為節愍烈愍。一天啟崇禎間。已經議卹者。毋庸再給。至福王時及唐桂二王。雖有贈諡。而偏私掛漏。臧否益淆。應據實綜覈更正。一明臣既邀賜諡。宜有所附麗表彰。應於各原籍令有司設牌入祀忠義祠。其里居失傳。則於授命之所附

祀。請勅下翰林院撰議專諡通諡文各一篇。

交禮部刊發直省。令所在如式造木榜填書某官姓名諡字。載事實於後。懸祠內。其後嗣願於祠墓立碑者。聽其闔門遇難者。應入祀節孝祠。一諸生韋布。甚至姓名無考。如山樵市隱。遂志成仁。諡所不及。應均入忠義祠。其有妻女同殉者。如前例。一明臣如楊所修。王大年。李應薦。張據。楊維垣輩。雖臨危不屈。而名麗閹黨。不便濫邀諡典。其因馬士英驟遷如楊文驄抗節可矜。進身究可議。若方岳貢。邱瑜殉難見於一統志。以正史律之。則有遺憾。而一時勲戚之臣。明史謂大半以兵死者。原不在盡節之數。又如張鶴鳴之排熊廷弼。蘇觀生之搆難桂王。皆債事可誅。而馬吉翔蒲葵表裏為奸。其入緬偕亡。益無足道。且有於甲申謁賊苟免。後乃堅拒王師。如傅鼎銓。張家玉。衛允文。吳爾璵者。均屏而不錄。至樓璉。草詔而後自經。梅殷入朝而復遇害。亦不

得比於完節。明史久經欽定頒行。謚法難於各傳添載。請照明史格式另編一冊。冠以原奉諭旨。次載諸臣議疏。及所擬專謚通謚清單。一體成書。與明史相附而行。又議駁左都御史張若淮奏。請交直省督撫採訪明季殉節事蹟。伏查文集說部。原非一無可據。然如李國楨誤國辱身。而谷應泰紀事本末。乃謂其激烈殉義。吳繼善降賊被殺。而吳偉業作傳。乃稱其大罵捐軀。此等亦復不少。且有文獻無徵。而僅據其子孫呈報之詞。又將何所考覈以辨其誣信。况天下之節義一也。皇上褒崇獎卹。原主於扶植綱常。即間有未發之幽潛。亦無不正氣咸伸。漏泉同感。所奏應無庸議。諭曰。大學士九卿等。將明季並建文時殉節諸臣。悉按史乘覈查。擬予專謚通謚。及應入忠義祠者。分冊具奏。甚為允協。著照所議行。其進呈各冊。於姓名事實。摘具梗概。頗見詳備。著名為勝朝殉節諸臣錄。交武英

殿刊刻頒行。即以原頒諭旨錄冠卷首。仍附載廷臣所上議疏。朕特製詩篇。題識簡端。用以垂示久遠。至大學士等議覆張若淮奏。請勒限訪查一摺。所駁亦甚是。張若淮固為善善從長之意。但現在廷臣等考覈釐次。以明史及輯覽為據。旁及一統志及各省通志。參互考證。其仗節死義者。已有三千六百餘人。是因世近可徵。而朕加恩訪錄。已迥非漢唐宋諸朝所可及。不可謂不多。今既各加旌典。俾得共與闡揚。於崇獎忠貞。風勵臣節之道。已無遺憾。即使再加蒐採。亦未必能廣至千人。於此事全局。有何增益。而稽諸文獻無徵之餘。必至真偽混淆。轉不足以昭傳信。且恐有司詢訪。不免於胥吏輩藉端滋擾里閭。更非朕軫恤遺忠之本意。此事亦著照所議。無庸辦理。併以此旨及議駁稿備載卷首。仍將此通諭知之。○諭軍機大臣曰。新選貴州銅仁府知府單國佐。昨請訓時。看其人甚平常。

且係甫經捐納。初次筮仕。於知府方面要任。恐非所宜。著傳諭裴宗錫。於單國佐到任後。留心察看。如於地方一切事務。不能經理。難勝知府之任。即據實奏聞請旨。毋得稍事姑容。致滋貽誤。○又諭。向來養心殿太監等。遇有一應零星活計。輒傳喚造辦處各項匠役。整理。漫無稽覈。殊屬非是。圓明園等處亦然。宮殿重地。豈容外人出入。即有應行修整之事。亦應告之總管內務府大臣等。派員放匠。不當任聽太監等。專擅徑行。告

皇祖時曾有

諭旨飭禁。載在宮史。今相沿日久。太監等又復漫無顧忌。不可不實力整頓。著交總管內務府大臣。將太監傳喚匠役進內之事。嚴行禁止。嗣後如有必須放匠修整活計之事。俱令呈明該總管大臣派員查點。仍將某處放進次數。於年底彙摺具奏。○又諭。昨據阿桂等奏。逆酋將張坤忠縛獻。止令散番送至營門。

其頭人阿木魯綽窩斯甲。總在官寨相近。不肯遠離等語。甚屬可惡。賊番等詭詐百出。總難深信。今將張坤忠送出。其心未嘗不知畏懼。現在官兵奮力用礮轟擊。逆酋自更窘迫。或率其弟兄頭人等。詣營請罪乞降。亦未可定。但恐其投降時。隨行人眾內。暗藏袖鎗。施放。圖逞奸謀。所關非小。不但將軍叅贊等。當加意慎防。即領隊大臣等。亦不宜稍有疎忽。從來受降如受敵。業經屢降諭旨。將軍等自當凜遵。但恐正當大功告成之時。將軍等或因其率眾出降。遂爾稍涉大意。朕偶計及此。甚為懸注。著再傳諭阿桂等。如索諾木等有求降之事。務須設法嚴防。慎之又慎。以成全美。將此由六百里加緊傳諭知之。明日即啟鑒恭謁

兩陵告功。禮成。巡幸山東。佇望紅旗。於此半月。內馳至。○蠲免江蘇上元江寧句容溧水高淳江浦六合山陽阜寧清河桃源安東鹽城

高郵泰州東臺江都甘泉儀徵興化寶應蕭縣海州沐陽如皋長洲吳縣常熟武進陽湖無錫金匱江陰宜興荆溪丹徒丹陽金壇溧陽等三十九州縣并鎮江淮安大河揚州儀徵等五衛乾隆四十年分旱災額賦○辛亥上詣暢春園問

皇太后安○自圓明園啟鑒謁

東陵○諭朕因平定兩金川祇謁

兩陵禮成恭奉

皇太后巡幸山東告成

闕里所有沿途經過地方著加恩蠲免本年

錢糧十分之三○又諭朕恭謁

陵寢向俱出派王大臣祭奠沿途王等園寢嗣

後原任大學士傅恒墳墓亦著入於祭奠之

內一體出派○是日駐蹕烟郊行宮○壬子

諭曰各部郎中員外俸滿截取知府時令該

堂官酌量堪勝繁簡分別出具考語保送引

見其有不勝外任者即行聲明留部各該堂

官自應慎重甄別以副因材器使之意乃相沿日久各部堂官於俸滿人員率多徇情取悅惟戶部近日尚有列為簡缺及因不勝外任留部者亦不過一兩人其餘各部則多以繁缺保送殊非覈實辦公之道知府為方面大員於吏治民生甚有關係豈容以不堪勝任之員濫竽貽誤况各部保送人員遇有貪贖等事原舉之堂官處分甚重該堂官即欲瞻徇情面寧不自顧考成乎嗣後各部堂官於俸滿截取人員務須秉公察覈分別宜繁宜簡及不勝外任據實辦理不得仍前濫送又各部院司員補放御史向曾禁止不令仍兼本衙門辦事嗣因各部院欲得諳練人員仍准各堂官保留兼原衙門行走誠以公務為重特予通融酌辦乃近年以來凡部院司員補放御史者該堂官率以熟手奏留兼辦竟似成例相沿漫無區別於政體既屬未協且御史有稽察部務之責一經留部則兼吏

部者必不肯糾舉吏部之事。兼戶部者必不肯糾舉戶部之事。其他可以類推。久之恐滋流弊。勢必至仍前降旨停止。該堂官雖欲留實能辦事之人。亦不可得。豈非因博愛以自誤乎。嗣後由各部院改補御史者。非實係練習部務必不可少之人。該堂官不得擅行奏留。此二事。各該堂官從前所辦。均屬非是。并著飭行。○諭軍機大臣等。前年鐘音來京。陛見。曾奏及段秀林人平常。在浙江提督任內。於所屬營員。意存護庇。不能實力整飭。彼時有守備高必陞。因署紹興協右營都司。濫刑責打隊目兵丁一案。經鐘音委員訪查。該提督始行揭報等語。段秀林綠營習氣。雖不能保其必無。以朕觀之。尚為稱提督之任者。且自調任古北口提督。兩載以來。朕留心體察。見其精力尚強。辦理營務。頗為妥協。亦不聞其有取悅屬員之事。以現在提督而論。或黃仕簡稍能過之。若甘國寶。不過與之相仿。而

李國柱。則遠不能及。是段秀林尚屬提督中之較優者。何以鐘音稱其平常。至其不揭守備一事。頃於行在召見。段秀林詢及之。據稱右營紹興協守備糧房。私通縣書。豫支兵丁米票。經署守備章鳳勇搜獲。散米賬簿。稟知署都司高必陞。隨將隊目兵丁。追票責打。以致衆怨沸騰。段秀林即將應叅各官揭報。督臣會叅。適督臣亦有所聞。已密飭訪查。而提督揭文。先到二日。遂疑辦事搶先等語。段秀林於高必陞劣蹟。一經訊明。即行揭出。不得謂之袒庇屬員。且止揭報督臣。並未自行具奏。亦不得謂之搶先辦事。鐘音前此因何陳奏不實。又鐘音奏廣德辦事不能妥協。巡撫余文儀甚嫌其人。昨廣德來京請訓。朕面加飭詰。據廣德奏。余文儀熟諳刑名。廣德每遇案件。必稟商辦理。從不敢偏執己見。巡撫余文儀亦並未憎嫌。惟總督鐘音常因論事參差。不甚愜意。因檢閱余文儀奏屬員賢否摺。

所注廣德考語。並無貶詞。是鐘音所言余文儀嫌廣德之處。已不足憑。近復詢之蔣允焄。據奏廣德辦事。頗為認真。惟見總督時講論公事。詞氣不能和婉。常被總督面斥。蔣允焄曾勸其在上司前。不應激切太過。廣德自言中有所見。口不能忍。遂不免徑直招尤等語。是廣德之不悅於鐘音。更為有據。兩司為幫助督撫之人。本不宜隨聲附和。如辦事果能認真。即或有過於懇直之處。正屬可取。督撫方當加之賞識。豈可轉因此芥蒂於中。設廣德實有不妥之處。鐘音見以為非。不妨在朕前據實陳奏。豈可嫁名余文儀。以快夙嫌。如此存心取巧。其何以副倚任封疆之意。甚非其尋常素履。豈以地遠朕不能悉知乎。以上二節著傳諭鐘音。令其據實明白回奏。○是日駐蹕白澗行宮。○癸丑。

孝康章皇后忌辰。遣官祭

孝陵。○是日駐蹕隆福寺行宮。○甲寅。

上謁

昭西陵

孝陵

孝東陵

景陵。俱未至碑亭。即降輿慟哭。步入

隆恩門。詣

寶城前行告功禮。躬奠哀慟。王以下文武大臣

官員。隨行禮。○至

孝賢皇后陵寢奠酒。○兩金川平。露布至

行在。遣侍郎和珅。赴暢春園問

皇太后安。並奏賀。○定西將軍協辦大學士。尚

書公阿林定。邊右副將軍尚書公豐昇。額內

大臣明亮。奏臣等督兵將噶喇依賊黨合力

攻圍。其官寨外札木什克各寨。尚在死力拒

守。臣等晝夜督攻。初三日望見札木什克寨

內及各卡賊衆。情形散亂。臣海蘭察。額森特

均即帶兵直下。臣富德舒常亦帶兵過河。賊

人出寨跪降。所有各散寨。均經官兵占據。並

將官寨東取水之處占斷。是晚各至官寨墻下圍定。賊人叫稱索諾木明日出降。至初四日早。索諾木跪捧印信。帶同兄弟並伊妻及其大頭人喇嘛。大小頭目二千餘人出寨。乞免誅戮。伏查金川賊首窮兇極惡。為西南邊外之患。今悉就擒俘。而助惡頭人無一倖脫。除將賊首賊目遵旨檻送京師。其家屬大頭人喇嘛等陸續起解外。謹將武功全藏恭馳露布奏聞。諭軍機大臣等。今日正當祇謁。

東陵告功。回桃花寺駐蹕。適阿桂等所奏紅旗遞到。此實仰賴。

皇祖默佑。是以捷報不期而至。朕回鑾至圓明園。即啟程展謁。

西陵。禮成恭奉。

皇太后巡幸山東。告成。

闕里。計四月二十六日至黃新莊。於二十七日舉行郊勞大典。著傳諭阿桂令其約計程期。在軍營起身。與豐昇額海蘭察額森特福。

康安普爾普等同來。至明亮擬授為該處將軍。毋庸來京。并著阿桂於富德舒常內酌留一人。同明亮辦事。其餘領隊大臣侍衛等應帶何人同來。應留何人。分帶後隊凱旋兵丁。並著阿桂酌定。此次平定金川。實皆阿桂一人功績。深堪嘉尚。茲班師在邇。特解親御黑狼腿黃馬褂。先行隨報賞賜。○又諭曰。將軍阿桂等奏報攻克噶喇依賊巢。全境蕩平。俘敵同獻紅旗於二月初四日。自軍營馳發。今

於二月十二日未刻。遞至桃花寺行在。沿途僅行八日。實為迅速。所有齎遞紅旗之兵部員外郎六十五著照上年額爾克圖之例。賞戴花翎。其辦理臺站馳遞文武各員。均屬可嘉。著該部查明。同兵部捷報章京各員。一併議叙。各站差弁兵夫。並著該部查明。照例議賞。其馳送紅旗到行在之各站員等。同捷報章京等。並著行在兵部查明。先行賞給緞疋。○又諭曰。鴻臚寺卿江蘭。在兵部行走。兼管

行在捷報。頗屬奮勉。亦著加恩賞戴花翎。○督理糧餉調任四川總督富勒渾。四川總督文綬奏南路章谷以外至軍營章谷以內至打箭鑪各站。大兵現將凱旋。存米漸次運竣。均可次第捲裁。報聞。○是日駐蹕桃花寺行宮。○乙卯。遣官祭

關帝廟。○諭曰。將軍阿桂等奏報攻克噶喇依賊巢。逆酋索諾木及其兄弟莎羅奔甲爾瓦沃雜爾斯丹巴併兩土婦及助惡之大頭人丹巴沃咱爾阿木魯綽寓斯甲尼瑪噶喇克巴等悉行擒獲。金川全境蕩平。武功耆定。馳遞紅旗。隨摺奏賀。披覽深為欣悅。前因兩金川以內地土司敢作不靖。暴侮隣疆。初以蠻觸相尋。乃番人常性。不值勞師遠涉。屢經該提督誠諭斂輯。乃野性難馴。反覆違約。甚至狼狽為奸。負恩反噬。非復可以口舌化誨。此而不懾以兵威。大示懲創。則懦弱之土司幾無以自存。且逆番平日有搶至維州橋之

謠。若聽其鴟張肆橫。久之必至擾及內地。何以綏靖邊圉。惟當掃滅叛番。以圖一勞永逸。否則後患滋深。此朕數年來不得已而用兵之苦心也。茲將軍阿桂統率將士。不憚艱勞。殫心謀畫。我八旗勁旅。奮勇爭先。漢土各兵。有所效法。亦皆踴躍用命。屢建殊勲。兩金川之地。隨以次蕩平。逆酋兄弟及黨惡之大頭人等。現皆擒獲。俘獻。露布馳聞。大功全藏。從此即於其地設鎮駐兵。番境寧謐。各土司得以永慶安全。此皆仰賴

上蒼默佑。

宗社鴻庥。朕喜慰之餘。倍深敬畏。朕現在祇謁兩陵。禮成後。恭奉

皇太后巡幸山東。告成

闕里。計四月二十六日回鑾至黃新莊。並諭將軍等率凱旋兵衆如期而至。即於二十七日舉行郊勞之典。翼日獻俘

廟

社並御午門受俘。所有一切事宜及功成應行典禮。著各衙門查例具奏。並將武成原委宣示中外知之。○又諭曰。將軍阿桂等奏。金川全境蕩平。逆酋兄弟及助惡頭人悉皆擒獲。大功告成。紅旗報捷。此皆仰賴

昊蒼鴻佑。朕惟日凜敬寅。而邊徼輯寧。從此銘勲偃武。實由

聖母福庇。詒慶滋長。歸

善顯揚。尊崇宜備。謹擬加上

皇太后徽號。朕率王公大臣等共申慶賀。以昭慈闈燕喜。所有應行典禮。著內閣博考彝章。交各該衙門敬謹具儀以聞。○又諭。現在平定金川。大功告成。所有郊勞獻俘。並祭告

壇

廟等事。一切應行禮儀重大。禮部承辦者多。該部堂官辦理恐未能周到。永貴平日頗為精細。且原係禮部尚書。著回禮部辦事。仍兼署吏部事務。理藩院尚書素爾訥現在兼署都

察院不必兼署禮部。○又諭。現在平定金川。大功告成。文綬係總辦軍需之員。著交部議叙。其承辦之司道及文武各員。著文綬查明咨部議叙。○又諭。此次進剿兩金川。所需軍糧。分路運供。特派劉秉恬。鄂實。顏希深。郝碩等董司其事。并命富勒渾在口外總理。自督運以來。辦理妥協。用能轉運無誤。今大功告成。宜加錄叙。富勒渾。劉秉恬等俱著交部議叙。其辦運糧餉各站員及督辦之本省大員。

均屬奮勉出力。並著文綬。富勒渾查明一併咨部議叙。○又諭曰。阿桂等具奏。攻取噶喇依等處出力官兵。請賞給職銜及巴圖魯名號。其領隊大臣舒亮。總兵劉國樑。應請一併賞給巴圖魯名號。賞戴花翎等語。著照所奏。副都統舒亮。賞給穆騰額巴圖魯名號。三等侍衛達薩奈。賞給法福禮巴圖魯名號。額勒登保。賞給和隆武巴圖魯名號。趕福。賞給蘇呼巴圖魯名號。健銳營委前鋒叅領哈當阿

賞給噶布實顯巴圖魯名號。瓦寺都司扎克塔爾賞給通扎克巴圖魯名號。仍各賞銀一百兩。總兵劉國樑著賞戴花翎。二等侍衛延達克巴圖魯托爾托保著授為頭等侍衛。三等侍衛濟葉特巴圖魯巴達瑪著授為二等侍衛。藍翎侍衛雅爾江阿濟沁特伍紹德布星額俱著授為三等侍衛。呼倫貝爾獎賞藍翎披甲鄂爾潤勒圖布克克俱著授為藍翎侍衛。烏鎗營委署章京常存著授為額外烏

實錄卷一十二

高

鎗副護軍叅領。烏鎗護軍校花連布著授為額外烏鎗委署護軍叅領。健銳營藍翎長格洪額火器營藍翎長定柱俱著授為額外護軍校。黑龍江驍騎校那延春著授為額外佐領。索倫獎賞藍翎領催福僧額著授為額外驍騎校。遇有該營本處缺出。即行補放。健銳營前鋒多隆武。五十四富勒瑚訥。德興永寧。永怡著陞授烏鎗護軍校。寧福伍保住耀寧。阿火器營護軍蘇克精額。文保額。勒謀同貴。

實錄卷一十二

高

陽春俱著授為額外藍翎長。遇缺即補。藍翎侍衛烏禮善。騎都尉果昇。阿烏鎗護軍校賽圖爾卓靈。阿呼倫貝爾獎賞藍翎驍騎校巴津達爾。索倫獎賞藍翎領催特勒登額。副將高臻。叅將羅江麟。赫倫都司楊桂。潘成。玉格。騰布。木坪。都司包天祿著賞戴花翎。吉林驍騎校額勒謹。七品委官留保善。德領催色森保。舒林保。前鋒烏三保。披甲保明。扎蘭泰。黑龍江前鋒章武。披甲巴瑚。索倫領催孟庫森。特噶坦。保披甲孟庫。諾昆泰。呼倫貝爾披甲默德訥。都司張起麟。土把總車爾都著賞戴藍翎。○又諭曰。阿桂等奏軍營出有總兵各缺。查有副將高臻。李文英。前經奉旨遇有總兵缺出。酌量補用。又副將嵩安打仗奮往。為人明晰。請即將該員陞補等語。均著照所請。四川重慶鎮總兵員缺著高臻補授。湖南永州鎮總兵員缺著李文英補授。廣東高廉鎮總兵員缺著嵩安補授。○又諭年來征勦金

川軍糧等項。皆官為辦給。而負任運供。不免稍資民力。川省百姓。踴躍急公。甚屬可嘉。業已疊次加恩。將乾隆四十年以前應徵錢糧。特令該督等查明分數。分別酌免。茲金川全境蕩平。逆酋兄弟。及助惡頭人。悉就擒獲。紅旗報捷。大功告成。用是廣沛恩施。以昭優恤。著該督文綬。將川省節年應徵緩帶錢糧。查明承辦運務地方。就其出力輕重。差務繁簡。分別妥酌。或全行蠲緩。或量其分數蠲緩之處。詳細覈定。計將軍阿桂此時尚未起程。並著會同查辦。迅速奏聞。候朕特溥渥恩。用副嘉惠勞民至意。○諭軍機大臣曰。土婦札什納木。前經設計投出。情尚可原。竟可毋庸解京。伊子諾爾布湛都爾。現在革布什咱。即可發回。令其完聚。再革布什咱土司納旺被害之後。並未另襲土司。伊子諾爾布湛都爾。是否以承襲。著阿桂查明奏聞辦理。至金川地方。既已設鎮安營。止宜令兵丁屯糧駐守。

實錄卷一千二

五

如兵丁不敷。於該處降番內擇其妥當者。在彼耕作。仍遵前旨。於出力土兵內揀選妥人。作為頭目管理。方為妥協。此一節。交文綬桂林辦理。○又諭據劉秉恬奏。促浸水源。來自松潘口外。經過從噶克黨壩。而入其境。水勢頗覺深潤。償拉之水。發源於孟筆山。巴朗拉等處。水源不遠。水勢亦比促浸較小。兩水均係自東北而趨西南。至明正司所轄之章谷地方。匯而為一等語。該二處水源大小不同。而所趨方位。均在西南。據稱至章谷地方。匯而為一之處。是否無誤。并此水現係何名。下流究歸何處。其境距川省內地不遠。所有水名及水勢源委。自無難確勘而知。查一統志載。寧遠府屬有若水。源出西番。至會理州西與金沙江合。亦名瀘水。今劉秉恬摺內所稱促浸。償拉。二水會歸之處。是否即係瀘水與金沙江合流。抑係別為一水。著文綬桂林確查具奏。再據劉秉恬奏稱。該處臨河一帶。可

實錄卷一千二

五

以開礦採金。是以一則呼為金川。一則呼為小金川等語。該處雍中喇嘛寺。現有大金頂。則產金自屬不妄。若果產金沙。恐該處衆番及內地奸民。前往偷採。聚衆滋事。自宜嚴查飭禁。設金沙果多。又不如官為勘驗試採之為愈。今兩金川之地。現議設鎮安營。此等事宜。亦總督提督所宜留心辦及者。並著文綬桂林。詳細查明。妥酌具奏。將此一併傳諭知之。○戶部議准。雲南巡撫裴宗錫疏。稱發古

實錄卷一千二

克

萬象等廠。兼辦箐口革浪河茨營山等處銅餉。採獲漸多。無從堆貯。請於發古廠建蓋官房十二間。萬象廠建蓋官房十間。從之。○調任四川總督富勒渾奏。索隆古一路臺站。係隨軍轉運。暫時安設。今科斯果木一路。平坦易行。應將索隆古。則朗噶克。丫口等站裁撤。功噶一路。原設額馬。不敷三路大兵馳遞。文報之用。已飭於南路各臺。抽調健馬應用。其逆苗索諾木之家屬頭人。一路護解。尤當加

意周防。現已飛調梭洛栢古大板昭等處之兵。豫先分派各站。建立木城。嚴行看守。并傳知口內文武各員一體遵照。報聞。○是日駐蹕白澗行宮。○丙辰。遣官祭黑龍潭。昭靈沛澤龍王之神。玉泉山。

惠濟慈佑龍王之神。○命紫光閣繪功臣像。諭此次平定金川。大功告成。自應照從前平定準噶爾回部之例。於紫光閣圖畫功臣像。掄其功績最著者。為前五十功臣。朕親製贊。

實錄卷一千二

克

並錄其較次者。為後五十功臣。著大學士于敏中等擬贊。紀實銘勲。用昭褒寵。前此以大學士忠勇公傅恒居首。此次殫誠宣力。百戰成功。實惟將軍阿桂一人之力。自應列為首功。其餘將佐。候朕另行定次。至隨朕辦理軍務之軍機大臣。五載以來。始終其事者。如大學士于敏中。承旨書諭。倍著勤勞。尚書公額駙福隆安。夙夜在公。克宣勞績。大學士舒赫德。於此事雖未全行承辦。而勦捕臨清逆匪。

實屬可嘉。並著一體畫入前五十功臣像。以示覈實酬庸之意。○又諭。此次辦理金川軍務以來。軍機大臣等。日值辦事。並著勤勞。茲當大功告成。宜加錄叙。大學士于敏中。業經加恩賞給世職。毋庸再議。所有現值慶成之大學士舒赫德。尚書公福隆安。侍郎袁守侗。梁國治。均著交部議叙。其隨同辦事之軍機處行走滿漢司員。并著查明一併議叙。○定金川營制。諭軍機大臣等。前據議覆阿桂奏金川設立營鎮各條。酌擬提督駐美諾。並於噶喇依添設總兵。勒烏圍添設副將。此時正當辦理善後事宜。阿桂自應籌及四川提督現係桂林。止須令其移駐。其副將一缺。亦可就內地簡僻營分。酌量改調。惟總兵一缺。或於內地各鎮內擇其事簡者。量為裁減。移設噶喇依。而其人則揀在軍營勞績最著。明幹能事者。酌量調補。若內地鎮缺難於裁併。即添設總兵一員。亦無不可。此事著阿桂會同

實錄卷一千一

四

文綬熟籌妥議具奏。至新設將軍。原議駐劄雅州。將成都副都統一缺議裁。今思各省駐守將軍。俱有副都統協同辦事。其成都副都統。自應仍留駐劄省城。所有額兵二千名。酌量一半在成都。同副都統駐守。止須移一千名隨將軍在雅州鎮守。於體制既合。即移建兵房等事。亦較為省便。阿桂自必以此說為然。著詢之阿桂。令其將作何移改之處。一併妥議具奏。又將軍駐劄雅州。原為番地初定。新設營汛。資其控馭彈壓。是以令將軍節制綠營。將軍每年自應至金川新設營分巡查一次。並當巡閱成都駐防之兵。即副都統亦當每年往來巡歷。至二三年後。則令將軍移駐成都。副都統移駐雅州。尤為妥協。已交軍機大臣存記。至期再行提奏請旨。將此由六百里傳諭知之。○以內閣學士達敏為禮部右侍郎。○調荊州副都統舒亮為鑲黃旗滿洲副都統。鑲黃旗漢軍副都統福森布。為荆

實錄卷一千二

四

州副都統。鑲黃旗滿洲副都統瑚世泰。為鑲黃旗漢軍副都統。○以廣東按察使陳用敷。廣西按察使廣德對調。○是日。駐蹕烟郊行宮。○丁巳。

上詣暢春園。問

皇太后安。○幸圓明園。○遣官祭昭忠祠。○諭

曰。李侍堯等。叅奏嘉應州民蔡老三。圖奸業

滿姑不從。致死焚屍一案。按奉部覆。將蔡老

三處斬。值該州將龍昌因公在省。轉委長樂

寶錄卷一十二

聖

縣知縣薛閔監斬。旋據申報。會同遊擊劉永

惠。於十二月初七日。將該犯斬決。通詳在案。

嗣因風聞蔡老三行刑後。次日不見屍首。密

飭鎮道嚴查。旋據報稱。監斬係吏目鄭兆麒。

千總劉駿。派令兵丁黃仕榮行刑。當日實未

殺死。監刑官並未查驗首級。初八日。始在灰

坑。拏獲斬訖。請將薛閔。劉永惠。鄭兆麒。劉駿。

革職拏問等語。此事殊堪駭異。實為從來所

未有。處決重犯。奉委之知縣。及該營遊擊。並

不親往監刑。委吏目千總微末員弁。黑夜行刑。又不親驗首級。致重囚臨刑脫逃。復敢捏報斬訖。實出情理之外。其行刑之兵丁黃仕榮。顯有賄囑情弊。不可不嚴訊重懲。即該鎮道等所報次日尋獲正法之處。亦恐難憑信。並當嚴密訪查。勿使兇惡要犯。得以潛蹤漏網。所有知縣薛閔。署遊擊劉永惠。吏目鄭兆麒。千總劉駿。俱著革職拏問。著該督撫。提同行刑之兵丁黃仕榮。一併嚴審明確。務得實

寶錄卷一十二

聖

情。從重定擬具奏。至粵省文武員弁。辦理此等要事。荒唐若此。則其吏治營務之廢弛。已可概見。所有總督李侍堯。巡撫德保。及該管提鎮道。府均屬咎無可辭。並著一併交部嚴加議處。○軍機大臣議奏。前奉旨八旗鰥寡孤獨人等。辦給養贍錢糧。令各該旗從實查辦。現據將未經辦給錢糧人等緣由。造冊咨部。臣等詳查。內有伯叔兄弟者。俱未辦給。伏思孀婦孤子之伯叔兄弟。或係兵丁。則錢糧

有限。即武職前鋒校。護軍校。驍騎校。文職筆帖式。皆與兵丁相等。自難兼顧。應請嗣後。此等孀孤。俱給養贍。從之。

實錄卷一十二

留

大清高宗法天隆運至誠先覺體元立極敷文奮武孝慈神聖純皇帝實錄卷之一千二

大清高宗法天隆運至誠先覺體元立極敷文奮武孝慈神聖純皇帝實錄卷之一千三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 臣履桂
總裁官經筵講官太子太傅大學士弘文館領閣事稽察欽奉 上諭事件處管理刑部戶部三庫事務
世襲騎都尉軍功加十九級隨帶加二級又加二級 臣董浩內大臣戶部尚書鑲藍旗滿洲都統軍功紀錄五次
尋常紀錄十四次 臣德瑛經筵講官太子少保工部尚書紀錄六次 臣曹振鏞等奉
教修

乾隆四十一年。丙申。二月。戊午。

上自圓明園啟鑾。謁

泰陵。○是日清明節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵○遣官祭

孝賢皇后陵

端慧皇太子園寢○諭曰原任直隸總督方觀承宣力畿輔二十餘載懋著勤勞其身後每深軫念伊惟方維甸一子彼時尚在幼穉今年已及歲前赴良鄉接駕著加恩照襲曰修子裘行簡之例授為內閣中書並准其一體會試○又諭現在攻克噶喇依金川全境蕩平逆酋黨惡並皆擒俘大功告成將軍阿

桂及勞績出衆之叅贊領隊大臣等業經降旨優加賞賚列爵策勛用昭渥眷毋庸再議外其隨同將軍奮勇立功之將士亦應各予錄敘以獎勤勞並著阿桂詳細查明此次在事之人覈實造冊咨部從優議敘○諭軍機大臣等此次蕩平金川將軍大臣等並皆奮勇建勲克成偉績業將阿桂等列爵酬庸以示優異此次隨同出力之將士自應並予優敘現已明降諭旨但賞功之典非覈實不足

以示公著傳諭阿桂務將在事將弁查明實係攻圍噶喇依賊巢節次奮勇奪取附近碉卡並隨海蘭察福康安等擒拏逆酋賊目及四面環佈力攻者自當據實查明分別造冊咨部錄敘若僅派遠處守卡並無勞績可錄者毋庸濫及以課實績而昭公允將此由六百里諭令知之○又諭昨日據李侍堯奏嘉應州斬犯蔡老三已據監刑之文武官員申報處決尋聞不見該犯屍首飭委該鎮道嚴查旋報於次日拏獲斬訖等因一摺實堪駭異斬決罪囚為地方緊要事件乃派委之監刑官憚於親身監看轉委之微末員弁所委之人又不親驗首級致重犯於已行刑後仍復脫逃實為從來未有之事不可不嚴加懲治已降旨將各員革職拏問交該督等嚴審究辦並將李侍堯等交部嚴加議處矣此案初次通詳斬決既屬捏詞則後所報之復行拏獲斬訖亦不足為信據該督奏稱另委

道員馳往查驗。現在曾否驗明。蔡老三身屍有無虛假。及復經斬決之處。有無捏飾。抑或別有逃匿。代替情弊。必須嚴切根究確實。迅速覆奏。至此事必係行刑之兵丁黃仕榮。受賄縱放。必須嚴加刑訊。勿使狡卸。一經審得實情。即一面奏聞。一面將黃仕榮立行正法。並查明黃仕榮之子。亦即發往伊犁。給兵丁為奴。以昭炯戒。即或審明實係黃仕榮手軟無能。臨刑決不如法。以致罪囚脫逃。亦應將

黃仕榮問擬斬決。請旨定奪。但不可因此旨而有意寬縱。後或別經查出。其罪不小。將此由六百里傳諭李侍堯知之。仍令由六百里覆奏。○又諭據永德奏。琉球貢船回國。免買絲綢布匹等物。免過稅銀。共一千二百餘兩。似較向來為數過多。因薩哈岱現隨行在。令軍機大臣就近詢問。據稱伊前管閩海關任內所辦琉球免過稅銀。雖不能一律。大概總未出五百兩以外等語。屬國進貢回洋。攜帶

內地貨物。准予免稅。原屬柔遠之經。然加惠外藩。亦當稍有節制。若向來俱少。此次獨多。恐伊等視以為常。或且效尤滋甚。勢將何所底止。設或向無定額。其免稅多少。悉由將軍等臨時覈定。更未為妥協。著交鍾音詳悉確查。該關於琉球回船免稅。有無約畧定數。并歷年免稅若干。此次免稅。因何多至如許。逐一據實覆奏。勿稍隱飾。若永德所奏。有沽名示寬處。即行參奏。不可又相徇隱。慎之。尋奏

查該國貢船順治年間。准其貿易。康熙年間。復予免稅。經前督臣喀爾吉善奏准。以帶銀置貨。並無限額。恐欺隱滋弊。嗣後令據實報明。經官公辦。其入口出口稅銀若干。向係閩海關之南臺口委員查照。則例覈數。申報將軍照驗。免稅放行。現查歷年免稅底冊。自乾隆三十一年以後。該國進貢船二隻。入口不出三百兩。出口皆在五百兩外。接貢船一隻。入口皆在二百兩內外。出口不出五百兩。至

三十六年。入口免稅二百四十九兩。出口八百一十九兩。較之往年。為數已多。今四十年較前更多。實因來船帶銀及置貨視歷年加增之故。報聞。○是日。駐蹕黃新莊行宮。○已未。諭曰。吏部侍郎袁守侗。派往四川。有查辦事件。著即馳驛前往。○又諭曰。袁守侗現在出差。所有行在吏部事務。著福隆安兼管。其行在刑部事務。著博清額兼署。○又諭此次平定金川。曾降旨。照前此平定準噶爾回部

之例。圖畫前後五十功臣像於紫光閣。並經軍機大臣酌擬諸臣名單進呈。其不敷人數。行令將軍阿桂酌量增添。移改並註明事實。確覈具奏。但前此圖畫功臣。曾將準部之薩喇勒等。回部之霍集斯伯克等數人並列。此次軍營隨征之各土司頭人。內頗有竭誠効力。奮勇著績者。自應甄錄圖形。以昭盛典。著傳諭阿桂。令於在事各土司。掄其功績較著者。酌擬二三人。列入前五十功臣。並於頭人

內擇其奮勉出衆者四五人。列入後五十功臣。一體註明事實畧節。覈實奏聞。○又諭。據郝碩奏。請於官兵凱旋後。即來京請訓。再赴浙江藩司新任一摺。不便准行。郝碩查辦糧運已閱二載有餘。必有經手承辦之事。此際大功告成。所有一應軍需報銷。正宜乘經辦熟手未散之時。及早上緊趕辦。庶不致舛錯稽延。若遽各回本任。設有未經明晰之案。必須行文別省咨詢。不但案牘紛繁。徒延時日。

且恐督辦大員。遠離該處。其下承辦各員。妄恃無可查對。任意混開。於銷算軍需要務。甚有關係。至浙江藩司。現有徐恕署理。郝碩自可毋庸急於前往。且不獨郝碩一人為然。即劉秉恬。富勒渾。鄂寶。顏希深等。均有經手事件。現當趕辦報銷。亦不可即離川省。統俟將各人經辦之事。查有頭緒。造冊交文。綬李湖查覈。方可各自奏明起程請訓。各赴本任。不必更候各案題達。昨於富勒渾調補湖廣

總督旨內有俟大兵凱旋後即赴新任之語。楚督印務現有陳輝祖兼署。富勒渾亦俟將經手之案辦畢。交文綬等覈辦。再赴新任。不必拘泥前旨也。可將此各傳諭知之。○又諭據桂林奏前經將軍阿桂奏交詳查富德所奏扣罰土兵鹽菜銀兩充抵賞需一案。調取各站員支收底案。並管理土兵員弁扣罰檔冊逐一查對。復將該員弁隔別詢問。皆與富德原奏多有不符。查富德原以節省帑項為詞。今覈其節省之法。一則將底旺例不應支之項冒支。一則將明正例不應扣之項濫扣。並非實有節省。並訪知富德一路所用賞需過多。除由省中調取綢緞布匹烟茶及軍營辦買牛羊燒酒等物。值銀一萬九千餘兩。復向隨營糧員取用銀一萬一千餘兩。因慮及事後追賠。急欲設法彌補。遂將土兵不應支扣糧銀輾轉扣罰。又恐私下抵還。難免物議。是以奏明補交二千之外。又暗繳銀一千兩。

假節省之名。償其過用之數。則富德添用土兵。似已先存借此彌補之心等語。此事實出情理之外。富德為人小氣。其沽名市惠。遇事取巧。固朕所深知。且其屢次奏摺。常將賞給兵丁之語附奏。焉知不豫為開銷地步。軍營賞項。自有節制。即如阿桂一路。弁兵屢立戰功。尚不見其多有賞賚。富德並未寸進。何獨於兵丁動輒多賞。即使所賞屬實。而格外濫賞。又擅行違例支扣彌縫。已有應得之罪。若更藉名賞用。而與所賞之人暗地分肥。則其罪更不可逭。今所取用支扣之項。俱有案冊可查。已無疑義。至其每次所賞何人。賞用何物。計共需銀若干。均無難查訪覈實。富德曾獲重譴。復加恩棄瑕錄用。即或所至立功。而有冒濫侵肥之事。尚不能相抵。況此次並未著有勞績。若此案查有情弊。則其罪由自取。更不能稍為寬貸矣。又桂林摺片奏總兵英泰向隨富德軍營辦事。此案原委。自所深知。

即富德原奏。亦有公同商議之語。乃面詢該鎮。但含混其詞。不肯實告。而詢之管理土兵守備李瑞。王朝貴。堅稱扣罰俱係隨時稟交該鎮。均經該鎮諭令轉交都司陳維耀存貯。並註明檔冊。復據陳維耀稟稱。此項銀兩收發。俱回明英泰。今衆證確鑿。該鎮猶一味含糊。希冀置身事外。殊屬巧詐不堪。且恐其中不無另有別情等語。英泰經手收發之處。既已衆供僉同。自難諉為不知。或與富德通同舞弊。亦未可定。均不可不徹底清查。著交阿桂。豐昇額。明亮。會同文綬。富勒渾。逐一秉公查覈。務得實情。如有應革職審訊者。一面辦理。一面奏聞。看來桂林此奏。未必有虛假之處。今派令阿桂等會同該督等查審。自無難水落石出。但朕知阿桂素與富德不和。而豐昇額之父阿里衮。更與富德不和。若僅交阿桂等審辦。恐無識之人。妄謂阿桂藉此事洩忿。而豐昇額等不免隨聲附和。轉無以服富

德之心。因派袁守侗前往會同查辦。其有應行提訊之人。應得查覈之案。阿桂等可先行提齊查辦。俟袁守侗到川省。公同定案。計袁守侗到四川省城時。阿桂等亦可回成都。公同查訊此案。尚可不誤將軍等凱旋郊勞之期。至袁守侗與富德素非交好。自屬空空洞洞。不肯稍存瞻徇。若富德果無情弊。阿桂等自無從加以深文。如或情真罪當。袁守侗亦不能稍為開脫。其是非曲直。俱難逃朕之洞鑒。朕惟一秉大公。從不豫設成見。阿桂等皆所深悉。並將面諭此事原委。令袁守侗見阿桂等時。傳諭更可得其中詳晰矣。將此由六百里加緊諭令知之。桂林摺並著鈔寄閱看。○諭軍機大臣等。據護湖南巡撫敦福奏。永州鎮中營遊擊薛隆紹。於籌備差費銀兩。捏稱捐俸。且敢擅那取悅上司一案。查係已故總兵于秀。於永州鎮任內。同陞任遊擊張謙。以籌備差費為名。動支庫貯本息銀二千兩。

與未變當貸作銀三千兩。交商營運。于秀與伊子于廷樞前後提取當內本息錢一千八百餘串。非提于廷樞到案質對。難成信讞。已飛咨陝甘督臣查拏于廷樞解楚質審。並將該故鎮家產暫行查封等語。于廷樞既隨伊故父于秀在永州鎮任內。有提取公項銀兩之事。自應解楚質訊。著傳諭勒爾謹即速派委妥員。將于廷樞拏解湖南質審。並將伊家產查封。俟此案審明具奏時。再行降旨辦理。

將此由四百里傳諭勒爾謹遵照辦理。並諭敦福知之。○是日駐蹕半壁店行宮。○庚申。兵部議准。寧夏將軍三舍陝甘總督勒爾謹奏稱。寧夏平羅兩縣。黃河沿一帶。有寧夏滿兵牧廠。查滿兵從前每名拴馬二匹。經前任將軍傅良奏准。照西安涼州例。每兵實拴馬一匹。此項廠地。多有閒曠。應將平羅廠地仍留牧馬。其寧夏廠地。丈勘定界。聽民認墾。從之。○舉行乾隆四十年大計。直隸省不謹官

二員。罷軟官一員。年老官七員。有疾官七員。才力不及官五員。浮躁官二員。奉天省。年老官一員。才力不及官一員。吉林。年老官一員。山東省。年老官五員。有疾官一員。才力不及官五員。河東河員。才力不及官三員。山西省。罷軟官二員。年老官七員。有疾官五員。才力不及官一員。河南省。不謹官二員。年老官十三員。有疾官四員。才力不及官四員。浮躁官一員。江蘇省。不謹官三員。罷軟官二員。年老

官六員。有疾官四員。才力不及官二員。江南河員。罷軟官一員。年老官一員。才力不及官一員。浮躁官一員。安徽省。不謹官一員。罷軟官一員。年老官二十員。有疾官一員。才力不及官一員。福建省。不謹官一員。罷軟官一員。年老官八員。有疾官四員。江西省。不謹官三員。罷軟官一員。年老官六員。有疾官四員。才力不及官一員。浮躁官一員。浙江省。不謹官一員。罷軟官二員。年老官六員。有疾官三員。

才力不及官四員。浮躁官二員。湖北省。不謹官一員。罷軟官三員。年老官五員。有疾官一員。才力不及官三員。浮躁官二員。湖南省。不謹官二員。年老官三員。有疾官四員。才力不及官二員。浮躁官二員。陝西省。不謹官一員。年老官九員。有疾官四員。才力不及官三員。甘肅省。罷軟官一員。年老官五員。有疾官三員。才力不及官二員。浮躁官一員。廣東省。罷軟官一員。年老官七員。有疾官四員。才力不及官三員。廣西省。罷軟官二員。年老官三員。才力不及官二員。雲南省。罷軟官二員。年老官三員。才力不及官一員。分別處分如例。○

是日駐蹕秋瀾行宮。○辛酉。

上遣侍郎和珅赴暢春園問。

皇太后安。○諭軍機大臣曰。成都駐防滿洲兵。原以控馭番夷。防守內地。冀挽綠旗兵怯懦之習。乃該兵丁等。駐防年久。漸染綠營風氣。竟將滿洲舊習。全行廢棄。此次進勦金川。並

不勇往。經將軍等奏請。將伊等錢糧裁減。按照綠旗兵支給。嗣因各知愧憤。臨敵奮勉。是以復其糧餉。以示鼓勵。今大功告成。撤兵後。若不乘勢善為整飭。自必仍染陋習。關係甚重。現已擬將明亮授為該處將軍。著即傳諭明亮。將成都滿洲兵。加意訓練。挽復舊習。或遇攜帶公出。亦須留心教訓。不得仍前玩誤。

○四川總督文綬覆奏。現派文武各員帶領備弁通丁。前赴郭羅克勒限拏獲。吹斯枯爾

喇布坦父子解辦。批。金川既平。想此等兇犯。不日即獻。又奏。至綢色噶布桑扎爾。係無罪之人。已豫飭在省藩臬。於到時酌賞。使其出力偵緝。報聞。○旌表擊賊被殺之山東壽張縣生員王鳴岡。武生王廷柱。臨清州生員王政李曰孜。民人黑耿光。馬體恭。馬體乾。趙金階等如例。○是日駐蹕梁格莊行宮。○壬戌。

上謁

泰陵。未至碑亭。即降輿慟哭。步入

隆恩門詣

寶城前行告功禮躬奠哀慟王以下文武大臣官員隨行禮○諭曰和隆武著管理茶膳房事務德保著不必管理和隆武未到京之先仍著德保暫行兼署○又諭曰陶桂原係膳房章京後補放上駟院卿經福隆安奏令管理茶膳房事務此等奏留人員非若金輝之派令管理造辦處者可比祇應仍在章京之列前此辦理原屬未協陶桂著以上駟院卿

仍兼茶膳房章京事務嗣後茶膳房頭等侍衛章京內年久得力遇有陞任卿員及包衣護軍統領者該處祇可請留章京之任其頭等侍衛不必開缺又如內務府堂郎中原係坐辦之員如內務府大臣出外其在京一切事務皆應堂郎中代辦不宜輕離職守乃向來有奏請將堂郎中補授包衣護軍統領者該員即應輪班隨圍其內務府事務又令何人坐辦此皆內務府大臣看顧情面專為該

郎中圖得花翎黃褂之榮而置坐辦於不計殊屬非是著將內務府大臣傳旨申飭嗣後堂郎中如有實在辦事年久得力者止許該大臣具摺奏明候朕酌量加以卿銜不准其仍列名陞補包衣護軍統領所有堂郎中什寶之護軍統領即著開缺另行揀選帶領引見補授○又諭曰阿桂等奏現在出有總兵副將參將等缺請以軍營出力之副將三德等陞補一摺著照所請陝西延綏鎮總兵員

缺著三德陞署所遺陝西潼關協副將員缺著梁朝桂補授其江南鎮江城守營參將員缺著特靈額補授○又諭曰阿桂等奏攻克噶喇依後派總兵烏爾納防守因寨旁喇嘛寺失火即帶兵往救逼近備貯火藥處所延轟石塊以致著傷身死等語烏爾納自抵軍營以來攻戰甚屬奮勉且已得有多傷今大功告竣復因救火著傷身死朕心深為憫惻著加恩交該部照陣亡例議卹○諭軍機大

臣等前日據郝碩奏請於官兵凱旋後即來京請訓。再赴浙江藩司新任一摺。因不便准行。業經降旨。通諭軍營現有經手事件各大員。俱不必急回本任。今日又據顏希深奏請進京陛見。即赴河南藩司之任等語。所奏與郝碩相仿。殊不思豫省藩司。現在榮柱署理。並無急待。顏希深辦理之事。而顏希深承辦糧運。已閱三年。其經手事務必多。現在大功告成。一切軍需報銷經手大員。正當乘此時

上緊清釐。庶無舛混。若各回本任。設有未經明晰之案。行文諮詢各省。徒繁案牘。又延時日。并恐督辦大員。一離該處。承辦各員。更致混開滋弊。甚有關係。雖據稱以請訓為辭。但軍需要務。自當權其輕重。顏希深平日尚知事體。何於此竟未計及。而急於請訓赴任耶。著再傳諭劉秉恬。富勒渾。鄂寶。顏希深。郝碩。仍遵前旨。各將經辦事務。止緊查覈。俟辦有就緒。造冊移交文綬。李湖再行具摺請訓。不

必復俟具題部覆方為妥協。○又諭粵省斬犯蔡老三行刑後脫逃一案。實為從來未見之事。不可不嚴行懲治。已疊諭李侍堯等迅速查辦。但該督摺內稱風聞該犯行刑後不見屍首之語。究係從何而得。或由屬員稟報抑係該督另行訪聞。著傳諭李侍堯即行據實具奏。至所稱另委道府大員前往查驗蔡老三身屍。其間有無虛假捏飾。無難水落石出。委員自應立即稟覆。該督亦應立即奏聞。

今距該督發摺。又經五日。何以尚未見該督續奏。豈李侍堯尚視此事為無關緊要耶。著李侍堯即將查得此案實在情由。併現在如何嚴審辦理之處。迅速據實覆奏。無得稍有遲緩。尋奏審係行刑兵丁黃仕榮朱振綱受賄故縱。已恭請王命先行正法。其為弟賄求全屍之蔡伯壠。不行查驗之吏目鄭兆麒。千總劉駿。按律定罪。下三法司覈擬。尋議上得旨。蔡伯壠著即處斬。鄭兆麒。劉駿。部議應斬。

著監候秋後處決。餘依議。○又諭據阿桂等奏查噶喇依官寨為大礮所轟已成一片土石。雜以亂木。至官寨內物件。訊據索諾木管事之阿木魯綽富斯甲等供稱。自大礮轟打以來。寨牆所壓物件。俱經損壞。此內尚有銀二千餘兩。現派司員尚安等監看。督率兵丁令番人指引。於土中逐一刨挖。找尋。俟查明另奏等語。所辦尚未周妥。賊首等豫將銀兩什物等項。密行埋藏。防為官兵所得。屢經投番等供明。今寨牆雖為礮轟摧。未必能損及埋藏之物。至所有銀兩。據供止二千餘。尤不足信。前歲木果木失事時。軍營被刦之銀。共計五萬六千餘兩。皆經逆首等運至噶喇依賊巢。伊等用銀之事無多。豈能將如許銀兩。概行花費。僅存二千餘金。此乃賊目阿木魯綽富斯甲等狡飾之詞。豈可為所瞞哄。況賊首賊目。前此曾欲聚族自戕。而其所藏銀物。必不肯落我之手。今該賊目等現俱就擒。焉

肯轉以深藏詭謀向我吐露。阿桂平日辦事。極其精細。宜於此事竟未思及耶。雖掃穴俘囚。大功已蕆。查辦賊巢物件一節。原非要務。但既洗蕩其巢。自應詳查所有埋藏。悉行搜獲。不宜草率了事。仍使瘞物存留。將來噶喇依官寨須設營屯駐兵丁。豈可令賊人在木果木刦去官銀。留於日後綠營兵丁等創用。前經傳諭阿桂。令於番人內細加訪詢。務得實情。悉行搜獲。勿使稍有遺留。今阿桂等計日凱旋。以備舉行郊勞大典。自不能在彼久駐。辦此一事。桂林係四川提督。并須駐劄美諾該處一切事宜。皆所應辦。著桂林即往噶喇依。令阿桂將此查搜賊寨銀物之事。交與桂林悉心妥辦。勿稍遺漏。仍將查辦情形。據實即行奏聞。將此由六百里傳諭知之。○調任四川總督富勒渾奏軍營後路留駐官兵。分佈防守。遠近不同。儲積之糧。未便零星分貯。應於總匯之所。留備供支。現飭於西路之

噶喇依勒烏圖大板昭底木達美諾南路之馬爾邦章谷等處修理舊碕搭蓋棚廠以貯後運之米隨到隨收不致露積俟將軍定有章程派定防兵多寡為存糧贏縮寬為貯備得旨嘉獎○以正藍旗滿洲副都統多敏鑲藍旗滿洲副都統額森特對調○是日駐蹕秋瀾行宮○癸亥命巡幸仍進閣本諭向來朕巡幸啟鑾後內閣將內外奏章按三日一次由驛彙遞行在候朕披閱至謁

陵日期在京內閣仍封送如常行在內閣則扣存另進舊例未免過拘茲據大學士于敏中面奏已諭令將本月二十日應進之本一併呈覽矣朕省方所至照常日理萬幾閣章間日郵呈正可隨時批發非若在宮時遇大齋大祀慶典令辰之應行停本也況每年八月朕駐蹕熱河遇萬壽日中秋節本報隨到隨遞並不停進餘可類推矣嗣後凡值巡幸如遇停本之期在京內閣仍挨日彙送行在內閣

亦按日並呈概不必停扣著為令○命吏部定濫保處分諭據裴宗錫奏石阡府知府洪彬由刑部司員俸滿截取以簡缺知府用該員才質中平辦理地方公務每形竭蹶難勝表率之任請給咨赴部引見可否以府佐降補恭候欽定其石阡府員缺歸部另選等語所奏甚是著交部照例辦理各部郎中員外俸滿截取知府令該堂官酌量堪勝繁簡分別出具考語保送引見其不勝外任者即聲明留部原屬慎重甄別之意乃相沿日久各堂官率徇情取悅以繁缺保送者多而簡缺及留部者少昨經降旨申飭今裴宗錫適有此奏可見各部堂官之保送不能公當矣簡缺與不勝外任相去止差一間該堂官遇司員才具平庸者送以簡缺計圖掩飾其短殊屬非是向來各部保送人員遇有貪黷敗露原舉之堂官考成甚重而簡缺選用人員或有不堪勝任者該堂官向無處分遂不免於

任情濫舉嗣後各部保送簡缺知府經督撫奏其不勝方面之任者其原舉之堂官咎無可辭雖不必如濫保貪員之重亦當予以議處俾知儆惕其應如何酌定之處著該部詳議具奏倘督撫因有此旨輒瞻顧原保之堂官情面遇簡缺知府之庸劣者曲為姑容不能如裴宗錫此次之據實陳奏則督撫等之獲戾甚大一經察出或經科道糾參必將該督撫重治其罪斷不能如尋常過失之得邀從寬留任也朕辦理庶務每事必求其至當如此一事論吏部定濫保之堂官處分即防各督撫之不免看情護庇不使稍滋流弊於此可見為君之難著將此通諭知之○又諭文職漢大臣由鼎甲出身者向無賞戴花翎及賞黃褂之事大學士于敏中於辦理金川軍務承旨書諭倍著勤勞昨因大功告成特沛恩綸畫入紫光閣功臣像與其餘詞臣不同著加恩賞戴花翎並賞黃褂以示優眷○

又諭昨日三寶題旌烏程縣女子沈二姑一本據稱沈二姑係山東壽張縣已故知縣沈齊義次女在浙江原籍因聞伊父在壽張縣殉難即寢食俱廢嗣家屬回浙得知確音投繯殞命具題請旌已批交該部議奏矣但所稱忠孝萃於一家之語殊未允當沈齊義身任地方值逆匪肆擾不能立時捕滅反露消息賊聞而起變以致失城刦庫設使該員尚在必當重懲其罪特因其一死予以卹典已屬加恩豈可謂之忠沈二姑聞父死難即絕食投繯雖弱質捐生情殊可憫然葬祭以禮乃孝之正道若皆以死殉父則其親身後之事付之何人是以毀不滅性禮經重戒男子尚然況女生外向又豈可以輕生教孝乎若沈二姑之死照一門殉難之例旌其義則可旌其孝則不可忠孝二字關係綱常名教者甚大非一端一節可以冒稱覈實循名未便輕於假借著將此通諭知之○諭軍機大臣

等據海成奏萬安縣灘頭司巡檢丁楚江以
巡查道路採買柳樹為名潛往他處未回經
該縣親往該巡檢署內向伊胞弟查訊據繳
出印信及申縣文稟稱因病苦交迫往他處
削髮為僧訊之隨行之火夫蕭祿供係帶同
弓兵練達搭船他往現在嚴行訪緝請將丁
楚江革職以便獲日審辦等語此事甚屬荒
唐該巡檢如果病發難支何難具文告病乞
休乃以現任職官假名公出潛逸不返且敢
留稟稱欲他往為僧實出常理之外其中自
另有別情是以畏罪逃匿必當緝獲重治其
罪丁楚江著即革職著傳諭海成速飭所屬
地方官將丁楚江及隨往之弓兵練達嚴密
查拏務獲研審實情定擬具奏併著湖廣總
督於該員原籍麻城縣一體躡緝毋任漏網
將此由四百里傳諭知之著海成等迅速覆
奏又諭昨阿桂等奏查勘噶喇依賊巢所
藏物件一節僅據阿木魯綽窩斯甲狡猾供

詞所辦未為周到已傳諭阿桂并令桂林前
往切實妥辦矣如銀兩一項據該賊日供稱
僅存二千餘金即不足信賊酋等在木果木
刮去之銀共五萬六千餘兩俱運往噶喇依
賊巢收藏逆酋等平日並無花用其下番衆
因乏食向借口糧尚吝不輕給遇有番人出
力者不過殺數牛以犒勞衆已矜為難得焉
肯賞以銀錢伊等又並無用銀製買物件之
事且官軍分路圍剿賊衆更無從他出購覓
其所有銀兩銷歸何處自係豫行深埋不欲
為我所得阿木魯綽窩斯甲狡惡異常必不
肯將實情吐出已另諭福康安將阿木魯綽
窩斯甲押解行在詳加鞠訊諒難更有所支
飾阿桂等凱旋在即自不能在彼久駐著桂
林即速馳往噶喇依遵奉昨降諭旨妥協辦
理慎勿草率了事將此由六百里發往一併
諭令知之禮部奏准原任廣東巡撫德保
咨稱各省每年造送僧道四柱清冊備僧綱

道紀等官之選。緣舊制非有度牒不准充補。冊內祇將領牒者造報。今已奉旨停給度牒。四柱冊應一併停止。至遇缺充補時。地方官出結保送。嗣後若僧道官犯事。亦應查明出結。官交部察議從之。○賑卹雲南浪穹。鄧川。二州縣。乾隆四十年水災。飢民並蠲緩額賦。有差。○是日駐蹕半壁店行宮。○甲子。諭曰。原任大學士劉統勳。宣力年久。每用軫懷。其子劉墉學問尚優。人亦似有出息。茲服闋來京。著以內閣學士用。遇缺即補。現在胡高望出差員缺。即令其署理。仍著在南書房行走。○又諭曰。于敏中既賞戴花翎。並賞黃褂。伊現係大學士。且與大學士舒赫德尚書公福隆安同列紫光閣功臣畫像。三人翎帽。自應畫一。于敏中著加恩賞戴雙眼翎。○諭軍機大臣等。昨據吳嗣爵奏。裏河廳屬平橋汛十五堡。迤下運河西岸土隄。因雨後風浪撞擊。墊塌四丈。現已堵築完竣等語。此事殊不可

解平橋汛一帶。隄工係內河平水之處。即遇風雨。何至隄工墊陷。必係前此修築時辦理本未堅固。致有衝坍。或附近居民別有盜決等情。均未可定。吳嗣爵於河務未能諳習。易為工員所朦。高晉等熟練河防。必能悉其實在情形。該督現有勘辦清口引河之事。著就近查明十五堡隄工。因何墊陷。情由據實具奏。毋得稍有瞻徇。尋奏。隄身本係單薄。僅資淤灘保護。水長即漫。由下滲刷。隄身以致坐墊。報聞。○正黃旗滿洲都統奏。義學教習六十五年滿。請仍留學教習。得旨。六十五者。再留教習三年。嗣後各旗義學教習。所教學生內考中一二人者。仍留學三年。考中三人者。交部議敘。○以光祿寺卿永信為內閣學士兼禮部侍郎。○是日駐蹕黃新莊行宮。乙丑。上行圍。○遣官祭賢良祠。○是日駐蹕新衙門行宮。翼日如之。○丙寅。上以翼日奉

皇太后啟鑾巡幸山東恭迎

皇太后安輿至行宮駐蹕。○賜扈蹕王公大臣及直隸地方官員等食。○諭曰禮部奏降級留任之員外郎慶齡又因前在知縣任內失察邪教例應降調離任懇請改為革職留任等語尚屬可行。至所稱如蒙俞允行文戶部三庫衙門遵照之處殊屬非是。禮部如因慶齡辦事熟練祇應請留禮部行走其緞匹庫員缺之去留應管理三庫之大臣酌辦。豈容禮部干與。一併奏請。況聞管理三庫大臣已將慶齡之緞匹庫開缺則禮部此奏其為瞻徇情面實屬顯然。禮部堂官著交部嚴加議處。至永貴前以徇庇屬員獲咎今復蹈故轍竟不意其怙終若此永貴並著傳旨嚴行申飭。又諭曰外省因公罣誤人員向令該督撫出具考語送部引見其由外任陞授京職者遇伊原任內因公處分概從實降並無出具考語之例辦理未為盡一嗣後外省人員

內陞京職已滿一年即令該堂官填註考語咨送吏部其未滿一年仍由該員原任之督撫填註考語送部候朕量其人才酌定去留以示平允著為令。○兵部等部議覆署雲貴總督覺羅圖思德奏定騰越龍陵酌改鎮協移駐官兵事宜一騰越改協為鎮應設總兵一員中營遊擊一員左右營都司二員中左右營守備三員千總六員把總十二員外委十八員兵三千名請將中營千總一員外委一員兵一百名駐蒲窩左營都司一員守備一員千總二員把總四員外委六員兵一千名駐南甸右營千總一員外委一員兵一百名駐固棟右營把總一員兵五十名駐緬箐龍陵改營為協應設副將一員都司一員守備一員千總二員把總六員外委八員兵一千五百名請將把總一員兵五十名駐龍陵關把總一員兵五十名駐象達一該鎮協營應行移撥員弁請照應設之數選留原營多

餘者撥赴新營不敷者按數添補一督提標及鶴麗昭通等鎮協原定裁移兵數與現在應添之數不符查騰越協原設馬二步八兵一千五百名今改鎮應添撥一千五百名龍陵營原設馬二步八兵六百名今改協應添撥九百名請於此次奉裁之撫標永順鎮改協馬步兵內酌改裁添其裁撥營鎮內各官親丁馬步守糧公費等兵各按營分繁簡酌裁安設其裁撥挑拔馬兵應需馬匹准於各營額設馬內撥給騎操一騰越鎮轄本標三營兼轄永昌龍陵二協順雲一營并控制各土司應請換給勅書一道並頒各營鎮關防一永順騰越龍陵等處副將遊擊都司守備各缺照舊在外揀選題補龍陵協副將都司守備騰越鎮左營都司守備仍定為邊俸五年報滿永昌協屬緬寧守備邊俸三年報滿楚雄營遊擊守備定為部推之缺一騰越龍陵兵餉向係採買供支應令糧儲道覈實應

買數目詳請具題飭各該處同知照例備貯從之○以署刑部右侍郎德福為鑲紅旗滿洲副都統○以盛京協領達春為廣州漢軍副都統○以告休甘肅碾伯縣土指揮同知李國棟子世泰故四川大鹽井土百戶者布葉姪開文雲南雲龍州屬六庫土千總段復健子雲彩各襲職○丁卯

上詣

皇太后行宮問安○行圍○江蘇巡撫薩載奏

被災歉收之上元江寧等州縣本年平糶應將每石一兩七錢者減一錢一兩八錢至二者減二錢二兩以外減三錢成熟州縣照依前價減糶以五分一錢一錢五分為等如價在一兩以內無庸平糶報聞○是日駐蹕南紅門行宮○戊辰

孝昭仁皇后忌辰遣官祭

景陵○諭曰阿桂等奏叅領山東保烏林泰二員前經發往軍營以副將委用今大功已集

該員等俱呈請回旗當差等語。山東保原係護軍叅領。尚未開缺。應令其仍回本旗當差。烏林泰俟到京之日。兵部帶領引見。酌量留用。該部知道。○又諭曰。阿桂等奏陝西遊擊子爵王承勲。前於副將任內。因漏報逃兵革職。留於軍營効力。嗣以差委奮勉。補授遊擊。但所有子爵。應否承襲等語。王承勲仍著承襲子爵。該部知道。○又諭曰。阿桂奏各隊保舉出力人員。分別揀選。請加恩獎賞。其副都

統阿爾薩朗一切奮勉。攻取甲雅。獨松等處。益覺勇往。應請一併賞給巴圖魯名號等語。著照所奏。副都統阿爾薩朗賞給阿爾杭阿巴圖魯名號。乾清門二等侍衛富寧賞給奇徹伯巴圖魯名號。三等侍衛阿蘭保賞給噶布實顯巴圖魯名號。仍各賞銀一百兩。藍翎侍衛八十九著授為三等侍衛。健銳營前鋒校富連著授為額外委章京。護軍藍翎長瑪木錫著授為額外護軍校。遇缺即補。成都領

催世住七十九前鋒富臣俱著授為額外驍騎校。遇缺即補。藍翎侍衛薩哈泰著賞戴花翎。健銳營前鋒福柱德楞額黑龍江驍騎校羅托領催六十著賞戴藍翎。健銳營前鋒色楞景福六格俱著授為額外藍翎長。遇缺即補。貴州把總初大榮授為額外千總。遇缺即補。雲南守備鄭天祥著賞戴花翎。雲南守備屠登陞陝西守備孟洪毅雲南千總李天臨寧夏千總李自昌雲南把總高起林貴州把

上奉

總梅盛春貴州外委把總李玉成俱著賞戴藍翎。○是日駐蹕桐柏村行宮。○已巳。

皇太后至寶稼營登舟。○詣

皇太后御舟問安。○祭

先蠶之神。遣妃行禮。○諭朕因武功耆定。展謁

兩陵禮成後恭奉

聖母慈駕巡幸山東延

禧岱藏並親詣

闕里告功蹕路所經宜施渥澤業於啟鑒日
降旨蠲免本年正賦十分之三著再加恩將
通州三河薊州大興天津津軍廳青縣滄州
靜海南皮交河東光景州等十三州縣廳未
完乾隆三十八九兩年緩帶各項地糧共銀
六萬六千四十四兩零屯糧米穀豆五千四
百二石零及大興宛平三河涿州良鄉武清
東安天津青縣靜海滄州南皮交河東光景

州等十五州縣未完乾隆三十五七八九等
年因災出借常平穀三萬一千六百一十七
石零米四萬七千七百八十四石零麥五千
九百五十石零又交河滄州未完乾隆三十
五七九等年災借屯穀一千二百四十一石
零米一百一十石零普行蠲免該督其董率
所屬實心妥辦以副朕嘉惠畿民至意該部
遵諭速行○又諭前歲調派八旗勁旅及吉
林黑龍江索倫等精銳進勦金川直隸為首

先經行之地曾予緩徵茲大功告成凱旋在
邇允宜特沛恩施用敷慶澤除大興宛平良
鄉等縣業於蹕路經由諭旨內加恩所有清
苑永平磁州趙州柏鄉定州等六州縣未完
乾隆三十八九兩年軍行緩徵併因災緩帶
地糧銀三萬九千五百六十四兩零又清苑
滿城定興望都樂城趙州定州等七州縣未
完乾隆三十五六七九等年因災出借常平
穀三千七百九十石零米三千二百九十石
零一併加恩蠲免以示優恤該部即遵諭行
○諭軍機大臣等據伊齡阿奏大使陳文棟
協解雲南第三批餉銀具領裝鞘堆貯大堂
起解時查點少鞘一個即日根尋於大堂前
井內撈獲交該員押解起程現在上緊勒緝
竊犯并請將大使陳文棟運使邊廷掄交部
分別議處等因一摺已批交該部察議具奏
矣此項餉鞘堆貯大堂派有兵役看守斷非
外來之人所能潛入竊取如係外賊必攜鞘

遠遁。今所失之鞘，丟放大堂簷前井內，必係本衙門人役乘間竊藏。冀事後取出，不可不及早根究，使正犯無從遁跡。今伊齡阿現赴山東接駕，薩載亦至山左。此事著交與高晉嚴查該衙門值宿兵役及在署人等，詳細研訊。務在速得實情，勿使正賊得以漏網。將此由四百里傳諭知之，仍將查辦獲賊情由，迅速覆奏。尋奏查審是夜看護嚴密，以重鞘擲井中，不應全無聽聞。批：如此則非在井中撈獲明矣。應有別情。又奏現飭將解員跟役家人提訊，並研究值宿兵丁外，另行設法躡緝，得旨覽。○又諭據桑齋多爾濟奏准俄羅斯之固畢爾納托爾咨稱：伊等有馬五匹被竊，將其蹤跡交付章京德沁。德沁並不應承。又驍騎校滿濟私行越境，與彼國伊斯塔納布等交易，當被拏獲，并所有物件帶至邊地交付。往喚德沁，德沁未到等語。應將德沁滿濟提訊。但此時暫不令俄羅斯知聞，仍使當差

俟秋季差滿時，一併更換治罪。併將咨行俄羅斯文稿具奏前來，所辦非是。邊境辦事大臣遇有外國交涉事件，理應秉公辦理，不可徇徇俄羅斯被竊蹤跡，如未入內地卡座，德沁應立時報該扎薩克大臣，乃並未呈報，即有應得之罪。滿濟私與俄羅斯交易什物，為彼拏獲，更宜從重辦理。自應即將伊等治罪，聲明情節行文俄羅斯，令其將伊斯塔納布等治罪方足以昭天朝之正大。若如所奏，不令俄羅斯知聞，但將伊斯塔納布等應行治罪咨行前去，彼豈能心服？況如此辦理，彼亦斷無不知，豈不轉為所笑？桑齋多爾濟所見太小。著傳旨嚴行申飭，即著將德沁滿濟解送理藩院嚴審定擬。其咨行俄羅斯文稿著此處另行改定，發交桑齋多爾濟照辦咨行。○是日御舟駐蹕寶稼營水營。○庚午，諭本年新正曾將畿南一帶昨歲被潦州縣分別予以展賑，用普春祺。茲當金川全境蕩平，巡

幸山左凡鑾輅所經之地現已普被恩膏其災區之不值蹕途者亦堪軫念著加恩將霸州保定文安大城永清河間獻縣武邑衡水寧晉武強安平等十二州縣未完乾隆三十九年因災緩帶地糧銀八萬六千七百四十五兩零屯米二百四十八石零又霸州保定文安大城永清新安安州固安蠡縣河間獻縣任邱晉州玉田武邑衡水陸平寧晉深州安平等二十州縣未完乾隆三十三四五六

七八九等年因災出借常平穀二萬八千九百石零米二萬八千七百七十二石零麥五千八百七十四石零又霸州固安河間三州縣未完乾隆三十九年因災出借井田屯穀二百九十一石零米一千四百五十七石零概行蠲免以示慶成施惠至意該部即遵諭行

○又諭朕此次恭奉

皇太后巡幸山東告成

闕里自寶稼營登舟用奠

慈躬頤適所有扈從官員人等俱令由陸路行

走毋庸乘坐船隻以省船戶等守候之勞現在隨用之大小各船隻為數雖屬無多而水手人等之當差出力亦宜體卹著照上屆巡幸天津之例於常值外每水手一名日增給銀二分俾得均霑惠澤○又諭曰嘉謨在漕運總督任內辦事不能得要且看其局面亦小於總督要任未必相宜但其人尚無大過於倉場侍郎或堪勝任昨歲駐蹕熱河時曾

屢向軍機大臣諭及至冬間將富察善調補盛京侍郎其倉場員缺止令瑚世泰暫署原欲俟金川大功告成後督撫內尚有須更調者至期另簡總漕而以嘉謨改用倉場此朕之本意軍機大臣皆所備聞也今年正月間高晉在京朕偶詢及嘉謨近日辦事如何據奏伊性情急躁有任意責打弁兵之事適吏部需人辦事是以降旨將嘉謨補授倉場侍郎換瑚世泰回京亦不特因高晉之奏也茲

嘉謨來赴行在。召見時。將高晉所言面詢。據奏不但無擅責弁兵之事。即旗丁亦未責打一人。朕以高晉為人誠實。從不在朕前妄言。且朕用嘉謨為總漕。即係高晉所薦。若嘉謨果無其事。高晉豈捏此語以誣之。況高晉非造言傾陷人者。使非其平素見信於朕。亦豈能如此加恩倚任乎。因令軍機大臣傳旨詢問嘉謨。若伊奏對之言果實。仍當諭詢高晉。詰其言何所憑據。以定其是非。斷不可顛預了事。且令諭知嘉謨。以管轄弁兵之人。不妨稍嚴。若責處並非極屈。亦不為過。始據稱遇有糧船無故停泊。及頭舵人等不肯使力。原常令運員等責懲。實無任性親看責打之事。等語。糧船無故停泊。及頭舵不肯使力。本有應責之罪。且委員責處。即是伊令責處。豈必親自看視。始謂之責打乎。伊既有此情節。朕詢及即應據實陳奏。乃以詭詞支飾。及經傳旨覆詢。知其情難以終隱。始行吐露。即此足

見其糊塗不堪。嘉謨著交部嚴加議處。○署湖廣總督陳輝祖奏前任督臣富明常以湖北大冶等縣沿湖居民。間有爭訟。奏請將全省湖地通加勘量。更正舊冊。此後推收隨時換給新帖。查民間藉湖為業。或族姓公同。或村衆共占。或一姓兼收。或數姓各管。守業有券。輸課有額。均非無稽。間有影射爭控。即調湖隣及官冊互相比覈。無難立辨。若徧厯勘丈。追換書帖。事涉紛更。輿情未便。並恐奸弊叢生。所有楚省湖地應請停止通勘。得旨此奏是依議。○是日御舟駐蹕南倉水營。○辛未。

上詣

皇太后御舟問安。○諭朕因平定兩金川。巡幸

山東。告成。

闕里。所有蹕路往來。經由直隸。該省承辦差務之文武大小官員。宜一體加恩。用昭渥澤。著該督查明咨部。凡有罰俸住俸降級之案。

俱准其開復其無此等叅罰案件者各加一級○又諭朕因兩金川耆定恭奉

慈輦東巡修在泮獻功之典首自近畿覃敷愷澤膠庠樂育並宜一體加恩著將直隸本年入學名數大學增額五名中學增額四名小學增額三名該學政其悉心校錄甄拔殊尤副朕嘉惠士林至意○又諭曰兩金川現已奏凱集勲恭奉

聖母鑾輿巡幸山左詣

闕里告功兼以省方行慶道經畿輔所至耆庶懽迎倍覲愛戴自宜首沛渥恩所有經過直隸州縣內男婦年七十以上者著該督查明照從前恩詔之例分別賞賚○又諭茲當金川全境蕩平告成

孔廟踴途所經之地業已疊沛恩施第念武功耆定兵氣永銷並宜式措祥刑益敷愷澤所有直隸省現在軍流以下人犯著加恩悉予減等發落用昭行慶肆眚之至意○又諭

方今金川平定大功全藏恭奉

皇太后巡幸山東告成行慶經由直隸地方所有該省辦差各營汛兵丁俱著查明賞給兩月錢糧以昭恩賚○又諭據富察善等奏寧海縣知縣雅爾善因失察邪教案內降調送部引見但該員兼署承德縣及治中印務會辦參局諸事且有委審命案均關緊要現在實更無可委調之人查承德縣一缺已奉旨揀發有人請將雅爾善暫留奉省俟新任承德縣到任交代後仍令其護治中印務等語雅爾善著暫留奉天委用俟新任承德縣知縣到任後即速飭令交代清楚給咨送部引見富察善等不得又藉詞乞留○又諭據刑部奏廣東司有犯杜雲錦因在監患病交北城吏目取保該司書吏任貽渭轉覓孟姓到坊取保嗣該坊因杜雲錦屢傳不到旋據坊役稟稱業已脫逃而書吏任貽渭連日並不進署該司署郎中海齡隨將任貽渭斥革

而員外郎圖山佈復不行回堂用印付移會該城御史查辦請將海齡圖山佈革職等語刑部承辦書吏輒敢向坊官處借名保領枷犯併與同逃該司員海齡圖山佈匿不回堂擅行斥革其中顯有情弊此等事為刑部從來所未有不可不切實嚴究海齡圖山佈著革職交刑部會同都察院審明具奏其書吏任貽渭枷犯杜雲錦並著英廉選派妥幹兵役嚴拏務獲研訊確情定擬具奏○是日御

舟駐蹕湖洋莊水營○是月督理糧餉吏部侍郎劉秉恬奏奉旨審定番音金川名為促浸小金川名為僭拉查乾隆十二年平定金川方畧內已書金川小金川字樣臣民亦共知之其知促浸僭拉二名者惟在事臣工數人若以之纂入方畧且不免轉生疑義應請照舊書寫或改寫促浸僭拉於首卷總敘番地名目說一篇內得旨自應如此○直隸總督周元理奏本年恭逢巡幸東省及郊勞

大典官兵凱旋各處驛馬差務稍繁應請借領驛站銀兩以資供備得旨著照所請行○江蘇巡撫薩載奏華亭鎮洋寶山三縣境內之戚家墩長湖港張鑑浜黃家宅舊城灣等處海塘均被潮衝應行添築橋石壩坡現飭估辦下部知之○山西布政使黃檢覆奏臣會同奏派司員查辦歸化城稅務摺內未署司員銜名實屬糊塗粗忽咎無可辭得旨若諸事皆如此自專則不可矣○陝甘總督勒爾謹奏甘肅提標驍馬六百八十餘匹自三十九四十四兩年陸續撥補各營鎮外尚餘馬八十匹今西寧鎮請領四十年秋季合例馬匹除將餘馬撥給外尚不敷三十匹請於提標牧放馬按年撥補報聞

大清高宗法天隆運至誠先覺體元立極敷文
奮武孝慈神聖純皇帝實錄卷之一千三

實錄卷十三

聖人

大清高宗法天隆運至誠先覺體元立極敷文
奮武孝慈神聖純皇帝實錄卷之一千四

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

數修

乾隆四十一年丙申三月壬申朔諭朕以金

實錄卷一十四

川全境蕩平恭奉

皇太后安輿巡幸山東告功

闕里先期諭知該督等沿途無事點綴繁文
茲桐柏村駐蹕之所祇循向有行館而自寶
稼營登舟以來水營規模亦悉仍其舊但程
站較多地方官修葺經理亦未免需費著加
恩於長蘆鹽課應解內務府銀兩內賞給銀
一萬兩以示體恤○是日御舟駐蹕楊家園
水營○癸酉諭軍機大臣等朕奉

皇太后安輿巡幸山東告功

闕里並謁

岱廟祝

釐先期屢諭地方官沿途毋事點綴繁文侈為觀美連日經過直隸水程凡有村落之處綴景未免太多至於戲臺尤屬無謂御舟匆匆一過何暇留覽而徒為此無益之糜費乎且既有豫備村民聚觀迎迓者必多朕不得不出坐船頭聽其瞻仰轉妨船窓觀書吟咏之功祇覺其煩勞而不覺其可樂已命軍機大臣諭知周元理量為減省直隸既已如此恐山左聞之更為踵事增華與朕省方觀民之本懷不相左乎著傳諭楊景素務須善體朕心若本未備辦固屬甚善設或偶有點綴亦不得過多可減者減可停者停勿負朕諄切告戒之意○是日御舟駐蹕司馬莊水營○

甲戌

上詣

皇太后御舟問安○諭曰河東河道總督姚立德自獲咎以來將及二載著加恩賞還頂戴○禮部議覆安徽學政秦潮奏稱安省衛籍丁童散處各州縣向遇考試其附近本衛者由衛錄送散處者由各州縣錄送請嗣後概令各州縣確數收考應如所奏並酌議安省各衛應將本管軍籍豫造戶口印冊移送土著州縣存案至試期即令各本童赴州縣報名填註衛籍三代字樣該州縣按原冊覈對如隱匿及廩保扶同照例治罪至學政取進時俱撥入本州縣學毋庸撥府其從前由衛錄送之廩增附生亦令填明衛籍改歸州縣從之○是日御舟駐蹕花園莊水營○乙亥遣官祭

先農之神○諭曰巡撫徐績前來接駕朕詢及前歲逆賊王倫之事據徐績奏稱始聞逆賊王倫聚眾悖叛之信即率中軍叅將海明帶兵前往至鄧家莊張四孤莊勦滅賊眾迨

後在柳村北面與賊打仗忽被賊衝擊海明並未在旁惟一在彼處一同衝出行至梁家淺海明亦帶兵到等語海明係巡撫中軍叅將既與徐績同在一處與賊打仗理應跟隨徐績勦滅賊衆乃一經賊人衝至遂棄徐績自行落後與臨陣脫逃者何異綠營官弁如此行事尚應重治其罪況海明身係滿洲豈可如是脫逃若謂事屬既往概從姑息將何以儆衆似此怯懦之人不可不重治其罪海

明身任三等侍衛現在京師著舒赫德接奉此旨即將海明拏送刑部嚴審明確從重定擬具奏○諭軍機大臣等據阿桂奏查明富德在馬爾邦等處所藏番衆僅止三十六人其捏稱三百四十餘名之語係富德吩咐書辦邱宏道令告知英泰照辦以圖熱鬧英泰即曲為承順照所言具稟等語富德性喜造作諸多不實朕素知之乃英泰竟與之明比為奸實屬不堪然此一節尚其罪之小者至

其妄報賞賚兵丁多取銀緞等物並將土兵鹽糧銀兩冒支濫扣充抵賞需等情其中侵冒分肥皆所不免果爾則富德與英泰之罪甚重已差索守伺馳往會同阿桂等查訊如查明侵冒實據即將富德英泰一面革職嚴訊一面奏聞著傳諭阿桂等即遵照前旨據實審究迅速覆奏務使水落石出以成信讞此一節并諭索守伺文綬富勒渾知之又阿桂等覆奏三路節次投出番人二萬有零分

別賞給各土司等因一摺亦只可如此辦理前因促浸番衆黨助逆酋抗拒天兵甚為可惡曾諭軍機大臣存記俟大功告成時提奏將此等曾經抗拒至勢窮力竭始行投出之賊番查明分發伊犁黑龍江等處安插彼時因伊等頑梗情形實堪切齒故欲示以嚴懲今促浸巢穴既已掃蕩逆酋逆黨悉就俘擒其事業已辦完而此等番衆分賞各土司並分別安插其勢已散而作惡之頭人俘戮已

盡更無虞其日久滋事。且分賞土司之人。並經伊等養贍。難以復行追回。至各土司隨征打仗。傷損精壯男番頗多。今所賞之人。尚不足以抵補其所損之數等語。此等番人。即照阿桂等所奏辦理。無庸另行查辦。將此由六百里諭令知之。○定西將軍協辦大學士尚書公阿桂等奏查各路十二土司並土舍頭人等。出力勤勞者七十餘名。其歷年出力之屯土各弁。並已賞頂戴之降番頭目等四十餘名。分別酌賞銀兩。臣等不揣冒昧。作為恩旨傳諭。當衆面為賞給。皆叩頭祇領。歡呼感忭。得旨嘉獎。○是日御舟駐蹕馮家口水營。○丙子。諭曰。山東巡撫楊景素前已賞戴花翎。著加恩賞穿黃褂。○又諭曰。青州副都統烏什布。兗州總兵瑪爾清阿。俱著加恩賞戴花翎。○戶部議准。陞任貴州布政使署湖南布政使鄭大進奏稱。各省購辦黃白蠟。係備內廷及祭祀應用。查乾隆三十四年。採辦本

色時。因辰州寶慶二府。不能如期趕辦。曾通派省屬。恐將來歲值缺產。而辦期適至。致市儈居奇。請於二三年前。行知應辦省分。俾得分年購備。從之。○工部議准。西安將軍傅良陝西巡撫畢沅疏稱。西安滿營移駐裁汰副都統所遺衙署二所。先經奏准估變。查兩署在滿城大街。如後復有需用。量加修整。即可居住。應照舊留存。從之。○蠲免江蘇山陽阜寧清河鹽城四縣。淮安大河二衛。乾隆三十九年分水災田地項下。乾隆四十年新賦。○旌表守正捐軀之山西孟縣民胡秉旺妻黃氏。○是日御舟駐蹕夏口北水營。○丁丑。諭朕因兩金川全境蕩平。祇奉皇太后安輿。恭詣泰岱祝嘏。延禧並登闕里之堂。告功釋奠。輦路所經。加恩優渥。而泰安曲阜為駐蹕之地。尤宜廣敷惠澤。用溥

隆施著將該二縣乾隆丙申年應徵地丁錢糧全行蠲免該部即遵諭行○戶部議奏據臣部郎中評德理藩院員外郎永齡會同山西布政使黃檢履勘和林格爾東白塔爾二處俱有歧路可避歸化城之稅商人越漏應查禁請交山西巡撫飭該處營弁於巡防地方之便實力稽察或有勒索許附近丞倅詳稟丞倅徇隱令該道揭報叅治從之○是日御舟駐蹕史家莊水營○戊寅

上詣

皇太后御舟問安○諭上年山東省歲事順成二麥秋禾並慶豐稔萬姓恬熙樂業足慰殷懷茲因獻捷金川告功

孔廟所有鑾輅經臨之各州縣現沛恩綸將積欠普行蠲免第念蹕路未經之地小民愛戴同深所有各該處從前被災借欠銀穀等項並宜普施渥澤俾免向隅著再加恩將鄒平新城齊東陵縣德平惠民濱州青城樂陵

利津霑化蒲臺范縣朝城茌平及齊河平原泰安汶上博平東昌衛等二十一州縣衛乾隆三十六年因災民借籽種未完銀四萬四千九百餘兩民借常平未完穀一萬六千二百十九石零又樂安壽光濰縣乾隆三十九年潮災案內民欠未完地丁銀三千十二兩零民欠常平穀三千八百十九石零又壽光縣沙壓地畝乾隆十一十二十九等三年舊欠地丁銀一千四百三十二兩一併蠲免俾茅檐得免追呼共享昇平之福該部即遵諭行○又諭朕因兩金川平定奏凱集勲恭奉皇太后安輿巡幸山左詣

岱祝

釐告成

闕里鑾輅經臨先敷愷澤業於直隸首塗降旨將山東省經過地方蠲免本年正賦十分之三茲臨莅省方用慰輿情望幸臚歡既洽渥澤宜覃著加恩將此次水陸經行之德州

禹城齊河泰安濟寧衛壽張東阿陽穀聊城
博平堂邑清平臨清夏津東昌衛等州縣衛
所有乾隆三十六九等年未完地丁銀三萬
一千一十七兩零及三十六七兩年民欠麥
本籽種銀六千六百三十兩零並民借耕牛
銀二千五百兩及歷年民欠常平穀二萬一
千一百六十三石零又三十七九兩年民借
未完常平穀九千八十九石零俱著普行蠲
免以示朕入疆行慶至意該部即遵諭行○

實錄卷一百一十四

下

一

又諭曰吳紹詩前在吏部侍郎任內因老病
乞休准以原品致仕今朕巡幸山東吳紹詩
恭迎道左召對時見其精神尚好且係曾經
出力之人著加恩賞給尚書銜○又諭曰禮
部奏准工部咨請修

天壇

祈年殿等處工程奉移

神位擇吉告祭等因並據劉浩奏自熱河進京
詳查修理等語

實錄卷一百一十四

下

一

天壇等處事關重大豈可頻頻興作且修理未
久何致遂有滲漏復事修理此必出自素爾
訥德明主意乃劉浩亦並不查明實在與否
輒隨聲附和具摺陳奏俱非覈實辦公之道
著英蘆永貴素爾訥劉浩等親往再行敬謹
詳查據實覆奏○吏部奏前奉旨外任陞授
京職人員到任未滿一年者遇有原任內降
調處分仍由原任督撫註考送部引見伏思
此等人員若行文該省咨取考語恐原任督
撫或遇陞遷事故無從查取應請於該員陞
任給咨時即令於咨文內填考送部註冊其
因公革職者一體辦理臣部俱於議處本內
夾簽具題從之○安徽巡撫李質穎奏安慶
廬州府被災各屬應豫籌減糶查各屬米價
每石自一兩二錢餘至二兩不等請將價在
一兩七錢以上者減一錢五分至二兩以外
減二錢請糶麥豆者照市價減銀一錢雜糧
減五分如在一兩五錢以內概不准其減糶

報聞○是日御舟駐蹕袁家樓水營○已卯上奉

皇太后至德州登陸○詣

皇太后行宮問安○諭朕因金川武功嚴定恭奉

慈駕東巡告成

闕里所有蹕路往來東省承辦差務之文武大小各員宜沛恩施用昭慶澤著該撫查明咨部凡有罰俸住俸降級之案俱准其開復

實錄卷二十四

上

其無此等參罰案件者各加一級○又諭茲

因兩金川蕩平奏凱巡幸山東告成

闕里清蹕所至惠澤覃敷所有該省派出繹

兵著加恩賞給兩月錢糧辦差兵丁著賞給

一月錢糧其青州德州駐防兵丁派有差務

者並著查明一體賞給一月錢糧以示體恤

○又諭前經軍機大臣議覆定西將軍阿桂

籌辦善後事宜案內令於大功告成後特設

成都將軍一員駐劄雅州統兵鎮守節制綠

營並於兩金川之地安設營汛移駐提鎮以

資控馭今兩金川全境蕩平即應駐設所有

成都將軍員缺即著明亮補授移成都滿兵

一千至雅州隨將軍駐守其原設之成都副

都統仍留駐省城分兵防守俟二三年後再

令將軍駐劄成都副都統移駐雅州永資綏

靖邊圉之益所有移駐滿兵事宜及兩金川

設鎮安營諸事統令阿桂會同新設將軍及

該督等妥議具奏○是日駐蹕德州行宮○

實錄卷二十四

上

庚辰

上詣

皇太后行宮問安○諭兩金川現已蕩平獻俘

奏凱稽典東巡告功在津業已恩施疊沛慶

洽羣黎更念齊魯諸生戶盈絃誦地切近光

當此武功大定之時更宜加惠膠庠式敷教

澤所有山東省本年入學名數大學著增額

五名中學增額四名小學增額三名該學政

其悉心蒐錄遴拔真才副朕樂育人才至意

○又諭朕因武功耆定祇奉

慈輿延

禧泰岱並詣

闕里告成蹕路所經黃髮龐眉扶杖迎迓具
徵親愛忱悃宜施渥澤以廣

慈仁所有山東省經過州縣內男婦七十以上
者著該撫查明照從前恩詔之例分別賞賚
其青州德州駐防男婦年七十以上者並著
查明照例分別賞賚用昭恤老引年盛典

高宗實錄

下

諭軍機大臣等乾隆十三年平定金川後特
頒詔諭一道用清漢西番三體字繕寫發往
訓諭各土司今大功告成宜仿照前例獎諭
訓勉現已繕就清漢字詔諭其西番字令章
嘉呼圖克圖繕譯仿照十三年舊式繕寫三
體字勅諭一道即交兵部發遞川省軍營如
阿桂尚未起身進京交阿桂辦理如已起程
即交明亮遵旨通行曉諭詔諭四川各土司
曰兩金川與爾等同為內地服屬土司曩因

小金川為金川侵擾摧殘特興師征討莎羅
奔郎卡窮蹙乞命宥不加誅理應感激悛改
曾未十年郎卡即與隣境土司構釁滋擾彼
時因其與各土司不過微隙相爭尚無大損
亦遂釋而不問郎卡既死其子索諾木等濟
惡益甚與僧格桑狼狽為奸蠶食隣邦志圖
吞併僧格桑攻圍沃克什總督提督親往訓
諭陽雖受約陰竟抗違索諾木復乘隙殺害
草布什咱土司占其境地負恩反噬各修碉
卡抗拒官兵此而不聲罪致討殄滅擒誅則
爾等土司懦弱者將無以自存而獷悍者必
致效尤滋甚王法尚安在乎特命定西將軍
阿桂及副將軍叅贊大臣等統率八旗勁旅
分路進兵兩金川以次削平巢穴僧格桑早
伏冥誅索諾木兄弟及助惡之大頭人現俱
擒獲解京獻俘備受極刑寸磔梟示此皆逆
酋等罪惡貫盈孽由自作實為
覆載所不容而鋤強誅暴掃蕩蠻氛俾爾眾土

司得以安居樂業。久無侵擾。危迫之虞。此朕數年來不得已而用兵之心也。今於兩金川之地設營駐兵。令提督統兵分守。並於近邊添設將軍控馭。以保衛爾各土司。使長享太平之福。此又朕善後之殷懷也。爾土司等年來出力隨征。共効恭順。甚屬可嘉。已節次加恩獎賞。並命照回部之例。輪班入覲。除土婦及土司中之未曾出痘。不能至內地者。毋庸輪班外。其餘土司頭目。俱按應行入覲之期。令於冬間由將軍、總督、提督等。照料進京。俾之隨班朝賀。瞻仰受恩。爾等並得身受寵榮。增長聞見。豈非爾等之大幸歟。至爾崇尚佛法。信奉喇嘛。原屬番人舊俗。但果秉承黃教。誦習經典。皈依西藏達賴喇嘛。班禪喇嘛。修持行善。為衆生祈福。自無不可。若奔布喇嘛。傳習咒語。暗地詛人。本屬邪術。為上天所不容。即如從前沃克什土司。因有詛咒鎮壓僧格桑之事。屢經兵革。若非大兵救援。

幾至滅亡。又如索諾木令都角堪布喇嘛等。咒詛將軍大臣。今大功告成。將軍大臣等班師奏凱。受朕重恩。而索諾木等及所用之喇嘛等。俱解京共受重罪。均不能保其軀命。咒詛之不足信。欲害人而適以自害。更顯然可見矣。爾衆土司當從此悔悟。永為鑒戒。共秉誠順之心。永荷安全之慶。不亦休哉。其各凜遵。毋忽。特諭。○又諭據阿桂等奏。屯土各兵內。打仗奮勇及陣亡受傷。應行賞卹。未准部覆者。尚有數案。若部覆後。該督將應賞銀兩。交地方官及營員轉發。難保無官吏沉攔。侵漁之弊。請令督臣於接到部覆時。即交提督桂林就近給領等語。所奏尚未周妥。現授明亮為成都將軍。移駐雅州。節制而提督桂林。則令其移駐美諾。所有此項屯土兵丁賞卹銀兩。即著該督解交明亮處轉交提督桂林。就近傳喚各土司頭人給領。俾番衆均霑實惠。將此傳諭明亮、桂林、文綬知之。○又諭曰。

阿桂等奏噶達城惠遠廟本達賴喇嘛從前卓錫之所至今猶遣其堪布喇嘛三年一換前來住持今堪布喇嘛阿旺達爾結同其徒弟淵巴得爾什羅奔二名來營念經並稱情願分派喇嘛移居兩金川地方振興黃教是否可行統俟面請聖訓遵照辦理等語此事究不可行已於摺內批示矣兩金川之地現議添設營汛令提鎮統兵駐守所有該處喇嘛寺俱令兵丁等分駐最為省便且各喇嘛寺經官兵攻打殘破已多就其所存者作為兵房無須添蓋若令喇嘛居住又須復事葺修另煩工作既屬非計況該喇嘛阿旺達爾結等師徒無多若令於兩金川分派住廟仍須添派徒衆更屬費事至兩金川既已駐兵久之可將該處崇尚喇嘛之事漸次化改若復留駐喇嘛非但該處番人不能改其舊俗并恐各土司聞風而至信奉者多雖非若奔布爾之邪術惑人亦不免日久滋事況阿旺

達爾結等係達賴喇嘛教下若令於兩金川分住其地漸成達賴喇嘛所屬是我兵費力攻得之兩金川轉資達賴喇嘛之利益尤無此情理阿桂竟當宣諭該喇嘛等以兩金川逆首負恩造孽該處喇嘛黨惡妄行所有寺廟皆非淨土今賊巢既已掃蕩其廢寺亦不宜復存業將可住之屋分給兵衆不更延僧住持且該處頭目各番俱以助逆自取誅滅所存皆窮苦散番耕作自贍亦不能復有布施供養爾等即在彼住廟亦屬無益是以不復相留如此曉諭自足以杜其妄想若阿桂已帶凱旋兵起程即作為明亮之意以此曉諭該喇嘛並將曉諭之處即行覆奏又據阿桂等稱雍中喇嘛寺建於瀕河低下之地南北兩山對峙其上鎗礮皆屬可及實非駐兵之所等語雍中寺既有此情形不妨即行拆毀毋庸駐兵至寺中所有金頂及莊嚴華飾仍遵前旨送京其大木酌由水路運送來京

方為妥便。若阿桂已經起身，並著交明亮、桂林辦理。此一節並令桂林知之。著將此旨由六百里加緊發往。○又諭據阿桂奏從前送滇之銜天礮位，經阿桂奏令送京，今查詢該處尚未據送回等語。此項礮位自停止軍務以來已閱數載，何以尚未派員送京？著傳諭圖思德即行查明，并原發之儀器等項送京，以免日後損壞。將此隨圖思德奏事之便諭令知之。○兵部議准：河東河道總督姚立德疏稱河標設有中軍副將一員，左右二營遊擊都司守備千總把總等官弁向未設有叅將，是以副將缺出俱於撫鎮各營叅將內揀選陞補。或奏請由部揀放，均係綠營人員。於一切防汎事宜並未經歷。請將河標遊擊都司守備各缺以本標熟諳之員陞補，并將右營遊擊改為叅將，仍作為題缺從之。○定西將軍協辦大學士尚書公阿桂奏查舒常與明亮久在一路，性情相得，此時明亮授為成

都將軍，所有料理善後事宜自應酌留舒常，俟助至大功已蕝，明亮定邊右副將軍印應於臣進京時同繳。其明亮此時文移來往舒常處現有欵差，大臣關防應即交與明亮為暫時辦事之用。俟新鑄四川將軍印頒到更換報聞。○又阿桂會同豐昇額、明亮奏湖廣陝西綠營兵已全數撤回，所餘甘肅雲貴兵共一萬五千餘臣等已將西、南、北三路甘肅兵令總兵斐慎等分起撤回甘肅，餘西寧鎮標兵亦即酌撤。其貴州雲南兵亦令總兵特成額、劉國標等分帶起程。總計三月初八日可以全撤至三路。四川兵共一萬四千餘應留新疆者六千餘，其餘亦當酌撤。已交與明亮、桂林俟各省兵撤後分別應留應撤妥協辦理。得旨嘉獎。○又奏查土婦扎什納木前於掃蕩噶喇依時投出伊子諾爾布湛都爾，實為該處頭人番眾歸心。所有草布什咱土司應令承襲。其土司印信先為金川奪去，現

於噶刺依官寨內創得當於二十七日陳設印信傳集扎什納木母子並草布什咱各頭人宣示諭旨令其祇領該土司母子感激流涕各土司見之無不咨嗟悅服報聞○以兵科給事中塔章阿為光祿寺卿○以故廣西萬承州土知州許載屏姪天爵襲職○旌表守正捐軀福建長樂縣民胡而彩妻魏氏○是日駐蹕曲陸店行宮○辛巳諭朕因平定兩金川集勲奏凱舉告成

闕里之典巡幸山東適江蘇巡撫薩載以封圻接壤前來迎鑾於行在召見詢及江蘇省上年被災情形據奏被災各屬蒙恩蠲賑頻施並皆得所惟山陽等四屬乾隆三十九年因災蠲剩應分年帶徵漕糧及句容等各屬乾隆三十九四十等年緩徵漕糧均應同四十一年新漕一併帶徵等語因思連年被災之地今歲即遇豐收元氣尚未能驟復若漕糧新舊併徵民力不無拮据著加恩將山陽

清河鹽城阜寧四縣乾隆四十年分災緩漕糧二萬七千九百餘石統俟三十九年蠲剩漕糧按限徵完後再行接續帶徵並將句容江浦高郵泰州東臺興化寶應甘泉儀徵武進陽湖江陰宜興荆溪丹徒丹陽金壇溧陽等十八州縣乾隆三十九年分緩漕十萬八千七百餘石於四十一年帶徵其四十年分緩漕四十一萬一千餘石於四十二年帶徵俾閭閻益得寬紓以示朕軫念貧氓之至意該部即遵諭行○又諭曰史奕昂前在兵部侍郎任內以氣質不馴與同寅口過獲咎賞給三品卿銜令其回籍讀書宮兆麟在巡撫按察使兩任內節經緣事革職嗣進京恭祝皇太后萬壽賞給五品職銜今朕巡幸山東伊等遠來接駕著加恩史奕昂賞給二品職銜宮兆麟賞給三品職銜○又諭朕因金川掃穴擒渠告功

闕里並恭奉

聖母慈輦瞻禮

岱廟迓福祝

釐宜益溥浩蕩之恩以廣

慈慶著將山東省軍流以下人犯照例減等發落用昭欽恤推

恩至意○命議成都將軍統轄番地事宜諭軍機大臣曰昨授明亮為成都將軍節制綠營控馭番地已明降諭旨矣該處所以設將軍之意原因此次逆酋抗拒不法皆由歷來地

方官釀成向來管理番地各員於土司漫無經理惟附近之明正土司等數人引而親之加以禮貌其餘則皆視同膜外衆番已久懷不平且於軟弱者縱胥吏肆其魚肉而於強橫者畏如虎狼益為番衆所輕遂至毫無忌憚歷任總督如開泰阿爾泰又皆無整理之能畏憚貽誤即從前莎羅奔郎卡之事亦未必非彼時督撫之優柔畏事積漸而成今費五年之力十萬之師七千餘萬之帑始能將

兩金川削平掃穴俘渠用申國威而肅法紀茲議於其地安營設汛移提鎮大員統兵駐守並添設將軍駐邊彈壓固足以震懾諸番但所設之將軍若不委以事權於地方文武不令其統屬考覈仍於內地之江寧浙江等處將軍無異尚屬有名無實且番地事宜仍由地方文武辦理僅稟知總督而行而將軍無從過問非但呼應不靈即於綏靖蠻陬之體制亦不相合現在文綬為總督明亮為將軍自不虞有掣肘若將來接任之員或彼此稍存意見即不能資和衷任事之益且恐不肖員弁久之故智復萌不免仍蹈前轍尚不足為一勞永逸之計此乃善後事宜之最切要者不可不及早酌定章程俾永遠遵守自應令成都將軍兼轄文武除內地州縣營汛不涉番情者將軍無庸干與外其管理番地之文武各員並聽將軍統轄凡番地大小事務俱一稟將軍一稟總督酌商妥辦所有該

處文武各員陞遷調補及應參應訊並大計舉劾各事宜皆以將軍為政會同總督題奏庶屬員有所顧忌不敢妄行而番地機宜亦歸畫一若日後將軍或因事權專重擅作威福擾及地方干與民事者總督原可據實陳奏又或總督輕聽屬員之言於番地情形動多牽掣致誤公事者將軍亦當據實奏聞朕惟按其虛實秉公覈辦以定是非必不肯有所偏向其應如何酌定章程之處著阿桂等於回至成都時會同明亮文綬桂林悉心妥議具奏至各土司內宣慰司宣撫司安撫司招討司等職其每年輪班入覲時應作何按次輪派並聽將軍覈定會同總督提督料理送京至該土司等到京後應照年班回部之例歸理藩院管理使土司頭人各遂其瞻仰之情承受恩澤倍加榮耀其土司襲職等事亦由將軍總督咨報理藩院辦理所有應行事宜並著阿桂等一併酌定具奏將此由六

百里加緊傳諭知之仍將酌定章程各條迅速覆奏又諭向來軍營官兵凡有奮勉出力者俱降旨令該將軍等覈其功績定為超等及頭二等交部分別議賞議叙兵丁等常加恩賞給月糧賞賚不為不多自不應復有隨營賞號之事乃前據桂林奏絨布軍營除賞號銀兩外其自成都取用綢緞茶布等項計值銀不下一萬數千餘兩此等賞號起自何時曾否奏有成案且前此平定準部回部時並未聞備有賞號何獨川省有此必係該地方官多備此項自取其擾至賞給所需亦當約有定數豈有聽憑將軍參贊等自行咨取漫無節制之理至軍營取用後作何賞給及賞何項兵丁之處是否行知該糧員等存檔備覈並著文綬逐一詳查覆奏至軍營需用賞號銀兩綢緞等項當征勦之際將軍參贊等或藉以示鼓勵士衆因亦未為論及且該地方官已經備辦其動支賞用果有確據

者自仍當令其覈實報銷。但不得援以為例。著交戶部存記。嗣後或遇辦理軍需之事。如有請備賞號者。即遵此諭駁飭。將此傳諭文。綬並令戶部知之。○刑部等衙門會奏審明刑部郎中海齡員外郎圖山佈因本司書吏任貽渭保犯同逃。迴護處分。不行回堂。私議畫付辦理。照例擬罪。得旨。此案海齡徇庇不法。書吏不行回堂辦理。圖山佈私用堂印移城。實屬刑部從來所未有。不可不重示懲創。

今刑部議將圖山佈擬以絞監候。海齡擬發烏魯木齊。均屬罪所應得。圖山佈海齡仍著於刑部衙門前。枷號三個月。俾眾司員觸目警心。以昭炯戒。枷號滿日。再行分別監候發遣。餘依議。○是日駐蹕李六莊行宮。○壬午

上詣

皇太后行宮問安。○

孝賢皇后忌辰

上命

皇十五子 **額駙** 祭

陵寢。○諭朕因兩金川全境蕩平。恭奉

皇太后巡幸山左。登

岱延

禱告功

闕里。巡撫楊景素以遵陸後沿途雖舊有行宮。而自德州至平原程站較長。因於適中處所添設樸屋數楹。以備

聖母慈躬安憩於

高年頤養為宜。是以不加禁止。茲臨駐所至。見其規制雖不事奢華。而結構究不無所費。且逐程修葺行館。亦不免稍需用度。著於山東鹽課內賞給銀二萬兩。以示體恤。○又諭漕糧漕項向不在蠲免之例。茲因平定兩金川

詣

闕里告功。巡蹕所經。業已優數愷澤。今自入山東境以來。小民夾道歡迎。倍覘親愛。宜邀逾格恩施。著將德州壽張陽穀聊城堂邑清

平館陶臨清恩縣夏津武城等州縣緩徵三十九年未完漕米四萬七千五百三十一石零豆二萬二千八百四十一石零並臨清等州縣緩徵漕項銀一千六百十三兩零一併普行蠲免以示朕加惠無已至意該部即遵諭行○大學士管兩廣總督李侍堯奏兩廣存貯火藥俱經按照定例廣東豫備三年廣西豫備二年而鎗兵間有裁并遞年支用已與原存數目長短不齊廣東省原定每兵一名每年火藥七觔八兩本屬寬裕即有兵多藥少之處自可樽節通融惟廣西向隸雲貴原定章程與東省互異歲給鎗兵火藥亦多寡懸殊今查各營實支數目與原額多至千百觔及一二萬觔不等額貯既有多餘出易即不能如限今酌令東西兩省一律豫備三年請以乾隆四十一年為始各營火藥暫停造補俟餘藥裁完動支額貯正數之日再照實支數日出陳易新逐年造補報聞○又李

侍堯會同廣東巡撫熊學鵬覆奏閩省拏獲歐盛祖等係李阿集等一同在番滋事之犯飭提詳審供稱並無東京國老兵來之事可否行文安南國王查覆得旨亦不必矣外國之事總以安靜為要○是日駐蹕晏子祠行宮○癸未諭現在軍營由滿員擢用總兵副將者多著有勞績奮勇出衆之人如用於北省及四川等鎮協要缺尚可演習騎射留心營務可冀成材得用若補授廣東廣西湖南湖北等省皆非習武之地恐至彼耽於安逸轉足消其英銳之氣殊覺可惜因交兵部將在軍營之滿洲總兵副將補授廣東等省者通行查明並將直隸等省要缺各員之非由軍營陞補者一併列單進呈朕詳加閱定所有直隸正定鎮總兵員缺著嵩安調補其所遺廣東高廉鎮總兵員缺即著富明調補直隸宣化鎮總兵員缺著仁和調補所遺湖北宜昌鎮總兵員缺即著達齊調補山西大同

鎮總兵員缺著官達色調補。所遺湖北襄陽鎮總兵員缺。即著哈攀鳳調補。山西太原鎮總兵員缺。著特成額調補。所遺貴州威寧鎮總兵員缺。即著敬善調補。又直隸督標中軍副將員缺。著普吉保調補。其所遺廣東惠州協副將員缺。即著任學周調補。直隸大名協副將員缺。著富成調補。所遺廣西梧州協副將員缺。即著陳鎮國調補。直隸河間協副將員缺。著全保調補。所遺湖北鄖陽協副將員缺。即著范宜恒調補。山東膠州協副將員缺。著豐盛阿調補。所遺湖南永順協副將員缺。即著盧光裕調補。山西蒲州協副將員缺。著觀成調補。所遺湖南長沙協副將員缺。即著曹龍驤調補。陝甘督標中軍副將員缺。著和成額調補。所遺貴州都勻協副將員缺。即著特松額調補。甘肅慶陽協副將員缺。著興奎調補。所遺貴州黔西協副將員缺。即著趙登高調補。陝西漢中城守營副將員缺。著阿穆

呼朗調補。所遺貴州清江協副將員缺。即著林茂益調補。甘肅神木協副將員缺。著德起調補。所遺貴州平遠協副將員缺。即著陳聖謨調補。甘肅沙州協副將員缺。著雙喜調補。所遺江南安慶協副將員缺。即著許宗奕調補。四川督標中軍副將員缺。著巴福書調補。所遺雲南廣羅協副將員缺。即著張允師調補。該部知道。○又諭曰。吳嗣爵來至山左。迎鑒。召見時。看其精力似覺就衰。且亦有病。於總河要任。斷非所宜。吳嗣爵原係吏部司員出身。部務自所熟習。著回京。署理吏部侍郎事務。所有江南河道總督員缺。著薩載補授。其江蘇巡撫員缺。著楊魁補授。○諭軍機大臣曰。阿桂等奏查覈富德扣罰土兵鹽糧銀兩。充抵賞需一摺。據稱富德藉名扣罰。填還賞項。任意欺誑。已屬顯然。其曾否染指。尚須細加究詰等語。尚非實在情節。富德平日為人小器。其所用賞項獨多。又屢次具摺豫存

地步難保其無浮冒侵分情事。設使無弊。又何必巧扣抵賞項乎。昨據大學士舒赫德等訪查富德於上年十月間。差人到京。送有銀兩緞匹回家之事。銀兩或係其每月所得分例節省。然亦不能過多。若緞匹則非叅贊分例所應有。自係賞項下冒銷分肥所得。前已降清字諭旨寄諭阿桂。無難就此詳悉根求。至所用銀緞等項賞給何人。每次賞用若干之處。亦無難逐一覈實。自當水落石出。屢次諭旨甚明。計阿桂豐昇額等。到成都時。索守伺亦應抵川省。著即據實說明具奏。無任稍有支飾。至所稱英泰自認不能力為勸阻之處。亦未必然。前據阿桂等覆奏富德殲戮投番僅三十六人。冒報三百餘名一案。英泰與之朋比為奸。一事如此。事事可知。務須詳切研訊。使無遁情。富德、英泰等有應質訊者。仍遵前旨。一面草職審訊。一面奏聞。阿桂等至成都查審事件。計算郊勞日期。酌量起程。若

因此次凱旋官兵四百名人數較多。沿途行走畧需時日。則令豐昇額帶領官兵分撥先行。阿桂務須將富德一案審明再行起程。將軍獨為一隊在後而行。沿途即欲趨程。尚屬易事。總於四月二十六日抵良鄉。亦不為遲。是日尚欲差大臣等至營賞將軍等及官兵飯食也。海蘭察、福康、安普爾普等雖先回京。已有旨交軍機大臣存記。臨期仍令伊等至將軍處會齊。同與郊勞盛典。將此由六百里加緊諭令知之。仍即將查審緣由具奏。○軍機大臣議覆定西將軍協辦大學士尚書公阿桂等奏稱。兩金川番人因有凶惡頭人指嚇。是以敢為不法。今投降者皆攻勦殲戮之餘。且於先降頭人內擇令管領。又有官兵彈壓稽查。自不虞其滋事。查儼拉地方就地屯田事宜。除美諾底木達、布朗郭宗、大板昭及南路僧格宗翁古爾壘約咱章谷等處。前議令所駐官兵授地墾種外。其改土為屯之別

斯滿一帶。應令雜谷腦屯弁阿忠保居住管理。其汗牛一處。於三十七年投降時。令明正頭人。權為管理。亦應派屯弁管束。改作屯兵。其帛噶爾角克及薩納木雅地方。本係侍衛木塔爾所管。即令管理此一帶降番屯種。其宅壘頭人安本。投順後。久在南路出力。即令其管理宅壘屯壘。其所管降番。均照屯兵辦理。至促浸地方。除官兵耕種外。查有日爾底頭人丹比西拉布章雜寨頭人得洛思達拉。

上年投誠。屢在前敵打仗。又達爾卓克寨頭人色木里雍中。率六寨番民。同時投順。官兵因得直抵噶喇依。其在北路投降頭人霍爾甲等。打仗亦為奮勉。此等所有家屬番眾。擬分安於促浸河東河西。與官兵錯居。並一體酌給籽種牛具。俾及時種藝。再降番多者三四十戶。少者不過一二十戶。日久無虞。反側此屯壘之初。仰懇免其祖賦。俟三年後。照屯練納糧例。交官以佐兵儲。應如所議。交成都

將軍。揀派應放土弁及管理屯弁。照阿桂議

定章程妥辦。從之。○定西將軍協辦大學士

尚書公阿桂定邊右副將軍尚書公豐昇額

奏。遵旨將歷次出力攻克地方。繪畫戰圖。以

傳永久。業經繪出。攻得羅博瓦喇穆喇穆色

朔普三圖進呈。茲復將自攻上邁過爾至掃

平噶喇依。其中力戰奮攻之處。分作九圖。仍

每圖隨以節畧恭進報聞。○調任江蘇巡撫

薩載奏。常鎮各屬坐撥兵糧。因上年被災。缺

米三萬餘石。請就近借常平倉穀碾給。俟秋

成將緩徵新舊南屯米。按數收還。得旨。如所

議行。○是日駐蹕潘村行宮。○甲申。

上詣

皇太后行宮問安。○諭軍機大臣曰。楊魁現已

授為江蘇巡撫。接奉諭旨後。必具摺奏請陛

見。但伊此時尚未到任。於江蘇事務。未能知

悉。伊即見朕。亦無從訓示一切。著傳諭楊魁

此時且不必前來請訓。現令薩載即赴總河

新任楊魁可先至清江見薩載交印將蘇撫應辦事務向其詢問逐細講論即赴蘇州任事俟辦理數月於九月底朕自木蘭回鑾後再行赴京請訓將此由六百里諭令知之○

又諭曰勒爾謹自授任陝甘總督業經三載有餘至今未據奏請陞見伊前此或因川省辦理軍務陝甘有調兵事宜未及陳請今金川平定大功告成業已月餘伊何以尚未據奏及豈竟不思見朕一面有是理乎著諭勒

爾謹即行來京陞見

○

所有陝甘總督印務著畢沅前往署理其陝西巡撫事務著富綱暫行護理將此并諭畢沅知之○又諭曰阿思哈奏據淮揚道松齡稟稱三月初一日有宿州二幫重運糧船三十三隻乘順風過洪澤湖行至湖心陡遇風暴人力難施被浪漂沒糧船二十五隻剝船三隻其餘糧船八隻并大小剝船二十二隻盡皆損失桅蓬舵櫓米石亦有潮濕並有淹斃旗丁舵水人口均須

查勘現飭江安糧道等照例分別辦理等語重運漕船遇風漂沒至二十餘隻之多且傷斃人口乃漕務中重大之事該督接據稟報即應親行馳往確查辦理豈可僅委之糧道等照例勘辦況阿思哈係軍機大臣暫署漕督遇事尤當較他人加意認真不應不識事體輕重若此阿思哈著傳旨申飭仍即親身查勘將現在作何照例分別妥辦之處迅速據實覆奏將此由四百里傳諭知之○烏魯

木齊都統索諾木

○

策凌陝甘總督勒爾謹奏巴里坤歲需不敷兵餉前經奏准挑撥甘涼西寧等提鎮營學生駝隻解交巴里坤鎮在於古城濟布庫奇台等處輓運查各該處水土不宜多致倒斃且運費甚於採買請將前項糧石停其輓運令於每歲秋後量為採買接濟其駝隻即撥歸巴里坤營生厰內俟有撥用另為辦理得旨如所議行○以甘肅按察使圖桑阿為江西布政使○以故雲南浪

穹縣上江嘴土巡檢楊煊孫太和告休廣西上下凍州土知州趙京于嗣獻各襲職○是日駐蹕靈巖寺行宮翼日如之○乙酉諭曰大學士舒赫德奏有山東民人李承諾呈控丁元明鑽通伊子舒寧奪承諾窯業承諾即煩王燕緒向舒寧說明送給股分寫立合同交家人王六送進傳言允其開窯嗣丁元明復串通家人王六李五等另立合同先將窯座開挖承諾煩王燕緒之子王慶長轉曉中書徐步雲領見舒寧撤回丁元明所立合同舒寧訂期遣人到山令丁元明交出窯業後屢次爽約仍着丁元明開造是以情急赴控已將舒寧併呈內有名人證一併行提查拏交送刑部並請旨簡派大臣會審等語此事實堪駭異舒寧先因獲罪發往伊犁交伊父舒赫德管束嗣復加恩准帶回京乃竟怙惡不悛敢與外人來往圖利玷辱伊父顏面實屬敗類適王燕緒隨駕在此因命軍機大臣

實錄卷十四

四

及侍郎和珅巡撫楊景素會同訊問據王燕緒供李承諾係其表弟向有西山煤窯二座聞山主丁姓要同舒寧夥開央我向舒寧講說舒寧始雖允許收有合同其後舒寧復與丁姓夥開李承諾復央我往見舒寧就不允了等語是舒寧與丁元明夥開煤窯竟屬實有其事舒寧係大學士之子本不應交涉外事即或丁元明原係山主應行開採之人亦非舒寧所當干與若其理曲情虛恃有舒寧之勢爭占他人窯產則舒寧之罪更重如審訊得實其人豈可復留今兩造具在一經研訊無難水落石出至舒赫德自請治罪之處尚可從寬舒寧之生事不法非伊意料所及且於接呈後愧憤惶悚即將伊子拏送刑部據實具奏所辦尚是設舒赫德敢於容隱別經發覺則其首領亦不能保但不能管教伊子咎有應得舒赫德著交都察院嚴加議處此案舒赫德自應迴避著派誠郡王弘暢皇

實錄卷十四

四

六子永瑤侍郎金簡高樸會同刑部東公嚴審王燕緒著草職解交刑部一併審訊具奏舒赫德原摺及王燕緒供單並著寄交刑部查辦○諭軍機大臣等伊勒圖奏稱車凌德勒克呈報伊來京之後伊宰桑恭格等強取衆屬下牛馬曾經台吉巴顏達賚稟知舒通阿未經辦理車凌德勒克問明詳告舒通阿亦未查辦現經伊勒圖派員會同舒通阿審辦等語舒通阿乃專理車凌德勒克游牧之

字樣本十四

四二

人乃宰桑恭格等苦累屬下經巴顏達賚稟告並未辦理已屬非是迨車凌德勒克問明詳告仍復不辦更屬不堪然則伊駐庫爾喀喇烏蘇所司何事舒通阿著即革職發往伊犁効力贖罪庫爾喀喇烏蘇去伊犁不遠經車凌德勒克呈報伊勒圖即當提集案內緊要人犯審明定擬又何必周章派員舒通阿如此糊塗仍令會審更屬錯誤此旨一到若尚未審報即將案內要犯提至伊犁審明定

擬具奏○又諭曰伊犁協領西津泰著賞給副都統銜在庫爾喀喇烏蘇辦事○刑部奏審明驍騎校和綢額家人趕生與民人鬪毆致傷覺羅木隆武按律問擬杖徒折枷鞭責得旨此案趕生誤傷覺羅木隆武刑部照毆傷宗室覺羅律擬議未為允協趕生因與李崇斌鬪毆用碗向擲以致誤傷覺羅木隆武額角與實毆宗室覺羅者不同止應照家奴毆凡人律問擬著該部另行定擬具奏至木

字樣本十四

四二

隆武身係覺羅乃不顧顏面與旗下家奴同赴酒肆沽飲復往茶館生事實屬不堪木隆武著革退護軍削去覺羅籍檔交宗人府重責八十板發往盛京交該將軍嚴加管束以示懲儆○又奏黑龍江將軍傅玉咨民人霍濟格爾等扎傷柏木博爾岱致死將霍濟格爾擬絞奈瑪圖近邊充軍查霍濟格爾已自認竊柏木博爾岱布匹應以竊盜殺人律定罪請飭該將軍再行確訊妥議得旨部駁甚

是此案霍濟格爾奈瑪圖等偷竊柏木博爾
岱布匹致相鬪毆霍濟格爾奈瑪圖各用小
刀扎傷柏木博爾岱斃命自有竊盜殺人專
條豈可照共毆律科斷且霍濟格爾等是否
商謀同竊并未研訊明確所竊布匹原贓曾
否起獲亦未聲明遽行定擬完結均屬未協
著傳諭傳玉即速明白確訊另行定擬具奏
○倉場侍郎嘉謨范時紀奏查通流普濟南
浦減水西閘每年開銷新板價值其換下舊
板未定作何開銷請嗣後舊板作為本年橋
梁之用選剩者變價存公并將各閘板定限
五年坐糧廳驗明准換限內損壞令原承辦
閘官賠補從之○以四川驛傳道李本為甘
肅按察使○丙戌

上至泰安府謁

岱廟○詣

皇太后行宮問安○諭朕前歲閱視河工臨蒞
天津督撫等有遠道進貢者曾降旨通諭飭

禁茲因平定兩金川巡幸山東告成

闕里各省督撫呈遞貢摺者甚多殊屬無謂
朕鑒輅所經如本省大吏呈進方物尚非過
分即各鹽政關差織造間進綢緞等項以備
賞賚亦尚有因乃各省督撫竟相率遠致皮
張緞匹等物為誇多鬬靡之舉朕非但不喜
且覺其煩瀆可憎封疆大臣朕委任以地方
政務惟視奉職程其殿最豈因進貢衡其短
長伊等何不知善體朕意冒昧若此乎所有

此次各督撫呈進之物已諭令奏事處概行
擲還仍著傳旨申飭嗣後遇朕巡幸務恪遵
此諭毋得復有進獻將此通諭知之○又諭
曰彭啟豐曾任尚書學問亦優其緣事降調
尚無大過後因衰病於京察時以原品休致
今伊遠自蘇州前來接駕著加恩賞給尚書
銜○諭軍機大臣等昨據伊勒圖奏稱車凌
德勒克之屬下宰桑恭格等擅行奪取屬下
馬牛羊隻台吉巴顏達賚稟知照料車凌德

勒克游牧大臣舒通阿舒通阿並未辦理朕以舒通阿糊塗不堪降旨革職發往伊犁効力贖罪但現在照料各游牧大臣均已撤回而照料車凌德勒克游牧大臣何以未撤或庫爾喀喇烏蘇另有應辦之事而游牧係其兼管耶再各處駐劄辦事大臣等均有奏事之責舒通阿自到庫爾喀喇烏蘇並未一次奏事看來此缺不甚要緊著傳諭伊勒圖綽克托索諾木策凌將庫爾喀喇烏蘇駐劄大

實錄卷十四

四六

臣係辦何項事務查明奏聞外此缺如不必專駐大臣即將賞給副都統銜協領西津泰留在伊犁可也著公同妥議具奏○軍機大臣議覆定西將軍協辦大學士尚書公阿桂等奏會商兩金川設鎮安屯善後事宜○明正木坪等土司現令於本年冬季進京統俟各土司入覲後再照回疆例定以年班應令將軍明亮等妥為酌派以均體恤○原議將軍駐劄雅州但將軍總督兩地相懸遇緊要

實錄卷十四

四七

番情不獲立時商榷并勘明雅州城地勢偏仄滿兵難於挈眷宜令將軍仍駐成都○原議提督移駐美諾查美諾仍在各土司境地東界其距夔州川北永寧均已寫遠於專轄內地綠營事宜多所未便綠營兵散布居處與滿營不同應於雅州拓城建房令提督移駐即交桂林籌辦○泰寧協副將移駐打箭鑪改阜和協兵額照舊分協標左右兩營阜和營遊擊移駐花林坪改泰寧營兵額亦仍原數○原議增添滿兵一千今將軍副都統既同駐省城兵額祇應仍舊○促浸共安兵三千名於勒烏團設總兵一遊擊一都司二守備二駐兵一千噶喇依設副將一都司二駐兵七百噶爾丹寺設遊擊一守備一駐兵三百茹寨設參將一守備一駐兵四百馬爾邦設遊擊一守備一駐兵三百曾達設守備一駐兵三百攸拉共安兵三千名於美諾設總兵一遊擊一都司二守備三駐兵一千底

木達設都司一。駐兵五百。大板昭設守備一。駐兵三百。僧格宗設參將一。守備一。駐兵五百。翁古爾龍設守備一。駐兵三百。約咱設都司一。駐兵三百。明正章谷原設防兵。添足一百名。酌派千把一員駐防。應設小汎塘遞。均各於所安兵內撥設。至償拉促浸地土瘠薄。今授田伊始。應將兵三人給地畝一分。令兩人當差。一人耕種。建昌松潘維州等處兵。願挈眷來居者。官為咨送。初至給鹽菜口糧。俟

實錄卷千四

聖

墾種已成。停止。再有餘地。於雜谷腦五寨屯兵內移駐。并於維州保縣來營貿易番人內招墾。其家眷照例給賞遷徙。兵缺出即於番人內募補。并一體酌給牛具籽種。再番地房屋不能經久。應令分建碉寨居住。鹽茶布棉等項。每年官為辦運。定價銷售。其屯種收穫等事。於同知佐雜內。派委分駐經理。三人更換。實心奮勉者奏陞。現在邊外各土司。係松茂建昌道所屬。應即令該二員赴口外經理。

一。應設官兵。每年所需鹽菜銀。應照原議於江浙等省酌裁名糧。以符其數。俟番民樂業後。再行酌減。均如所奏。諭曰。軍機大臣覈覆。阿桂等議奏兩金川善後事宜摺內。所有番境應設綠營兵六千五百名。歲需屯墾鹽菜銀七八萬兩。請於江蘇安徽浙江江西湖北山東河南山西等腹內省分。酌減名糧抵補一款。尚未妥協。朕平定兩金川。不惜七千餘萬帑金。原為綏靖邊圉。一勞永逸之計。何靳

實錄卷千四

聖

此七八萬鹽菜之需。況江浙等省營分。雖居腹地。亦有差操防汛之事。若酌減名糧。於各該省兵丁生計。殊屬有礙。自可無庸裁減。所有川省歲需屯兵鹽菜之費。著該督文綬。即於正項內動支。至番地初定。新設營汛。全資將軍控馭彈壓。自應令將軍每年至兩金川新設營分。巡查兩次。副都統亦當每年巡查一次。將所有滿兵輪派隨往。庶駐防兵丁。嘗得演習勤勞。即綠營官兵。亦知所觀法。餘依

議○四川總督文綬奏大兵凱旋三月內全數進口其口內西北路自灌縣至雜谷南路雅安等處尚有存糧查成都雅州等屬額貯常社倉穀節年都已碾運應將前項軍米及時出借秋後照一米二穀例如數還倉免其加息得旨嘉獎○是日駐蹕泰安府行宮至戊子皆如之

實錄卷十四

辛

大清高宗法天隆運至誠先覺體元立極敷文奮武孝慈神聖純皇帝實錄卷之一千四

大清高宗法天隆運至誠先覺體元立極敷文奮武孝慈神聖純皇帝實錄卷之一千五

世宗憲皇帝實錄卷之六十四 臣等謹將乾隆四十四年丙申三月丁亥上登岱詣碧霞宮瞻禮○賜山東地方官員等食○諭曰江南提督員缺著陳杰補授貴州提督員缺著寶璜補授李國柱年力就衰著以原品休致所有湖南提督著段秀林調補其直隸提督員缺仍著王進泰補授○湖北巡撫陳輝祖奏前歲被災各屬隣邑出借籽糧多有撥運穀石若需徵穀交還殊滋糜費應請就款抵免如孝感應城應還江夏漢陽漢川等

敬修

乾隆四十一年丙申三月丁亥

實錄卷一十三

上登岱詣

碧霞宮瞻禮○賜山東地方官員等食○諭曰江南提督員缺著陳杰補授貴州提督員缺著寶璜補授李國柱年力就衰著以原品休致所有湖南提督著段秀林調補其直隸提督員缺仍著王進泰補授○湖北巡撫陳輝祖奏前歲被災各屬隣邑出借籽糧多有撥運穀石若需徵穀交還殊滋糜費應請就款抵免如孝感應城應還江夏漢陽漢川等

縣穀即將各該縣應買賑穀之銀截給買補其本倉賑缺之數仍以催收民借之穀抵還並擬嗣後各州縣遇有應還隣穀有可劃抵俱隨時籌辦得旨如所議行○戊子諭朕因平定兩金川集勲奏凱巡幸山左告成泮林山東及各省士子聯袂迎鑾抒誠忭頌進詩獻賦者甚多因照從前巡幸之例命題考試就其文義量加甄錄所有列在一等之貢生黃道甦李憲喬監生蔡廷衡俱著賞給舉人

平定縣志卷一

二

其舉人賈汝翼秦瀛著以內閣中書補用其列在二等之舉人貢監生員李佩鸞黃玉瑚王所擢汪長齡朱熊光薛侶丁慎樞袁守信嚴守田戴元章施福元王震劉召揚范廷謨史國華汪彝銘俱賞綴二足以示優武修文廣惠士林之至意○諭軍機大臣等從前出有提督各缺留俟大功告成再行酌量簡放因派員暫行署理今已降旨即令陳杰補授江南提督寶璜補授貴州提督其湖南提督

李國柱因年老休致已將段秀林調補所遺直隸提督員缺仍令王進泰補授矣現在尚有廣西提督一缺著阿桂於軍營所有之副都統總兵各員擇其勞績出眾實在堪勝提督之任者即據實奏請補授再阿桂昨奏善後事宜摺內稱松潘鎮總兵五福重慶鎮總兵高瑤俱熟悉夷情令其分辨美諾噶喇依事務專指美諾一缺而言其勒烏圍應添總兵尚未籌及著傳諭阿桂等如五福高瑤二人果皆能勝夷疆之任何不即以該二員調補美諾勒烏圍總兵令其安心任事其所遺之缺另行簡放若阿桂另有應行酌辦之處並著阿桂會同明亮妥覈具奏將此由六百里諭令知之○己丑諭軍機大臣等昨據阿桂等派委副都統德赫布將都甲聶壘兩喇嘛解至行在因派令軍機大臣逐加訊問據都甲喇嘛供稱索諾木曾令在噶爾丹寺率領徒弟誦緯沃經詛咒大兵彼時沙羅奔曾

平定縣志卷一

三

遣畫匠畫蛇。猪。鵲。馬。狐。各一。並書咒語。作為紙捲。填入牛角。埋地鎮壓等語。因將上年阿桂等所進噶爾丹寺圖。令其指出埋藏方向。據供。只見一分。係埋於該寺大門門檻四五尺外。約深二三尺。餘四分。分埋各處路口。離寺不遠。却不能指出何處等語。因思阿桂上年攻克該寺時。曾降旨令將該喇嘛寺埋藏鎮壓物件。形跡可疑。逐細刨挖。後據覆奏。寺內有土臺。係喇嘛等作法之處。業經刻平。刨看。並未見有可疑物件。又稱寺經焚燒。地面多積石塊。刨挖起驗。需夫頗多。須俟攻勦稍暇。再行辦理等語。今據該喇嘛所供。是其埋藏之地。阿桂等從前似未刨及。因令將噶爾丹寺原圖方向。約繪一分。標簽發去。即可按照查辦。現在阿桂等業已起程。著傳諭明亮。即選派妥員。前赴噶爾丹寺。照該喇嘛所指之地。刨挖查驗。並於該寺左近要隘路口。勘有形跡可疑之處。逐細刨看。務將牛角畫捲

咒語各件。全行起出。並須囑咐委員。不動聲色。密為妥辦。毋得稍涉張皇。仍將如何辦理之處。奏覆。此旨著隨軍報之。便發往。並諭阿桂等知之。○是日駐蹕四賢祠行宮。○庚寅。諭曰。貴州古州鎮總兵。係苗疆要缺。著該督於所屬總兵內揀選一員。奏請調補。其所遺員缺。及江南壽春鎮總兵員缺。著交將軍阿桂於打仗出力人員內揀選兩員。奏請補授。○又諭據瑚圖靈阿奏。科布多叅贊大臣多敏。病故。多敏在科布多辦事有年。昨遣明山前往更換。今聞溢逝。實為可憫。著加恩賞銀二百兩。仍賞給都統銜。一切應得卹典。該部察例具奏。○是日駐蹕中水行宮。○辛卯。

上詣

皇太后行宮問安。○諭曰。戶部尚書王際華。才品端謹。學問優長。久直內廷。簡任部務。懋著勤勞。邇年承辦四庫全書及薈要事。尤為殫心經理。且年甫六旬。正資倚畀。今聞其因痰

湧暴厥醫治無及遽爾溘逝深為悼惜著加恩晉贈太子太保並派散秩大臣一員侍衛十員前往奠輓其各任內革職革任之案俱准開復所有應得卹典仍著該部察例具奏○又諭曰戶部尚書員缺著袁守侗補授吏部侍郎員缺著吳嗣爵補授袁守侗現在出差戶部漢堂官乏人所有戶部尚書事務著嵇璜暫行兼署○又諭曰董誥著充四庫全書館副總裁所有舊要事務即著董誥接辦並著充武英殿總裁○又諭邇年征勦金川一切軍需糧運等項節次發帑不下七千餘萬官為辦給不欲絲毫累及閭閻而負任運供不無稍資民力業已疊次加恩將乾隆四十年以前應徵錢糧分別蠲免茲兩金川全境蕩平大勲克集念川省百姓踴躍急公甚屬可嘉自宜廣沛渥恩以昭優卹特令該督文綬會同將軍阿桂查明奏聞茲據分晰差務繁簡覆奏著加恩將成都華陽新都漢州

郫縣灌縣德陽綿州梓潼劍州昭化廣元汶川保縣雜谷廳雙流新津邛州名山雅安榮經清溪打箭爐二十三廳州縣乾隆四十年分緩徵錢糧全行蠲免金堂簡州資州資陽內江隆昌瀘州納溪敘永廳永寧中江三臺蓬溪射洪渠縣南充大竹十七廳州縣所有四十年分全緩錢糧蠲免十分之七其茂州松潘廳江北廳巴縣永川榮昌璧山樂山犍為宜賓眉州奉節雲陽萬縣巫山梁山蘆山天全州十八廳州縣四十年分前經酌緩十分之七錢糧一併蠲免溫江新繁彭縣什邡崇寧崇慶州遂州長壽墊江南溪富順長寧蒲江大邑安縣綿竹仁壽井研廣安岳池安岳榮縣遂寧二十三州縣所有四十年分已經酌緩十分之七錢糧內蠲免十分之五其西充營山儀隴隣水江津碁江南川合州涪州銅梁大足定遠忠州鄆都鹽亭樂至丹稜彭山青神我眉洪雅夾江威遠合江江安二

十五州縣四十年分前經酌緩十分之五錢糧全行蠲免閬中蒼溪南部巴州通江南江馬邊廳慶符高縣筠連珙縣興文屏山雷波廳酉陽秀山黔江彭水開縣大寧石柱廳達州東鄉太平新寧平武江油石泉彰明西昌冕寧鹽源會理州越嶲廳三十四廳州縣四十年分前經酌緩十分之五錢糧內蠲免十分之三其各營縣番民認納銀米前已降旨緩徵著並將該年夷賦一體按照分數蠲免俾民番均得普霑實惠用示慶洽武成嘉獎勞民至意○諭軍機大臣等前據太常寺奏請修

天壇

祈年殿等處工程一摺已飭交英廉等詳查具奏今已踰旬何以尚未見覆到

天壇等處工程關係重大不宜輕動朕御極以來曾命和恭親王等經理其事大為修整閱時未久何致興工葺治

天壇安妥

神位宜宜因黏補滲漏致請奉移因思

天壇殿宇每年秋季豈無上房拔草之人既可拔草即可隨便拘抵以防滲漏又何必奉移神位始為修葺耶看來此事由於禮部過涉張皇而英廉等未能持正所辦未為妥協著再傳諭英廉等即速詳查據實覆奏○又諭南苑圍河為鳳河之源自疏濬以來又經數載若再加挑寬自更足資暢達再四海子五海子其水皆歸運河該處泉源亦多若併開深通既與下游有益且多儲積水更足以納行潦而供灌注著傳諭劉浩即前往該處查勘明確會同英廉於步甲內挑用照例賞給飯錢施工既為迅捷即於步甲等生計亦有裨益將此傳諭知之仍即將查勘估辦緣由即行覆奏○直隸總督周元理疏報開墾乾隆四十年分順天保定宣化永平正定天津遵化易州等八府州暨熱河道屬生熟地共四

百項有奇。○以貝勒永福為正白旗護軍統領兵部左侍郎高樸為鑲藍旗滿洲副都統。○予福建閩安水師右營遭風淹溺弁兵賞卹如例。○蠲緩河南武陟縣張村等三十七村莊乾隆四十年分水災額賦。○豁免山東壽光、濰縣二縣潮淹地畝二百六項有奇。乾隆三十九年以後額賦。○旌表殉父捐軀浙江烏程縣原任山東壽張縣知縣沈齊義女沈氏。○是日駐蹕泉林行宮。至癸巳皆如之。

○壬辰諭朕因兩金川全境蕩平。歲功奏凱。恭奉

皇太后安輿。臨蒞山左。詣岱拈香。告成。

闕里所有東省商眾。祇候迎鑾。歡忭具徵。誠愀用宜。特沛渥恩。俾霑慶澤。著加恩將山東商人本年應徵乾隆四十四、四十一兩年引票正項銀三十六萬七千七百餘兩。又未完借項銀二十四萬兩。自本年奏銷後起限分作

八年帶徵以示優卹。該部即遵諭行。○癸巳上詣

皇太后行宮問安。侍早膳。○諭據阿桂奏。准圖思德咨稱。楚姚協把總陳寬鎗傷病發。急難痊愈。業咨部勒休等因前來。查此等受傷深重者。均係軍營出力之人。應否量予優卹。出自聖恩等語。前因各營兵丁有受傷遣回殘廢難痊者。曾降旨令各督提查明。仍給守糧一分。以資養贍。其弁員在軍營打仗出力。因傷病廢。與前項兵丁事同一例。若照尋常衰病勒休。情殊可憫。著雲貴、陝甘、四川、湖廣各督提查明。節次派往軍營之千把外委。如有因打仗受傷。難於痊愈者。一面咨部開缺。仍加恩給與步糧一分。以養餘年。所有把總、陳寬。即照此辦理。該部知道。○定西將軍協辦大學士尚書公阿桂定邊右副將軍尚書公豐昇額。成都將軍明亮奏。霍爾章谷納林冲孔撒三土司。懇請進京謝恩。查此三處自軍

興以來。派令土兵在革布什咱。甲魯。一帶防範。并仍派烏拉。輓運軍糧。亦為出力。似應給與花銅頂戴。再革布什咱土舍諾爾布湛都爾。據土舍頭人稟稱。願將大頭人達爾結等打仗所得之銅。挪給頂戴。方足彈壓衆人。臣等商同一併賞給。又吏部侍郎劉秉恬等奏。兩金川現已設鎮安營。軍火等項。為巡防操練所必需。查三路軍營各站。共存礮子。鎗子。火藥。火繩。噴筒。火彈。戰箭。烏鎗。銅礮。鐵礮。除南路業已運貯章谷馬爾邦兩處。並原存勒烏圍。噶喇依。兩處藥局。以及酌留底木達大板昭外。其餘各按道里遠近。酌量分運噶喇依。勒烏圍。美諾。以備撥用。至生熟鐵。不便轉運。即交附近營汛。分晰記檔。發交松茂道移明該鎮將。有需用處。隨時支領。諭軍機大臣曰。阿桂等奏霍爾章谷納林冲孔撒三土司。稟稱願同甲壘土司。一體進京謝恩。已准其所請。并給與革布什咱土舍花銅。所辦甚好。

霍爾章谷等土司。既誠心感戴。自應准令同衆土司入覲。著交明亮等妥協經理。將應行朝覲之各土司。按其序次大小遠近。分派平允。做照回部年班。仍遵前旨。於冬至月起程。歲底到京。今年係初次朝謁。自應多派數人。此後按年均勻輪派。其來朝者。承受恩寵。回巢傳說。衆土司聞之。自必倍加踴躍。又據劉秉恬等奏。三路軍營各站。所存火藥。礮子。鎗子等項。酌量分運噶喇依等處收貯。以憑撥運等語。此項火藥。礮子。鎗子。為數太多。兩金川之地。雖已設鎮安營。即美諾。勒烏圍。兩處寬餘存貯。及分給各營豫備操演。亦不須用至如許。若過於多積。徒存無益。且恐附近番人等。乘間竊取。或綠旗兵丁盜賣。甚有關係。自應於美諾。勒烏圍。噶喇依。有總兵副將處。所存貯稍寬。其分給各營汛者。酌數備用。餘俱就近運送口內營協較大之處。加謹收貯。以備內地各營撥用。現在站夫尚未徵完。即

令其歸途帶運亦屬甚便。又火彈一項專為攻礮摧卡而設。今兩金川已經平定。設營駐守。火彈無所用之。據稱尚存六千二百三十九個。即以每個貯火藥三五觔而計。亦可得淨藥二三萬觔。自應併運內地。仍解作火藥存貯。其噴筒二千六百五桿如已裝火藥者亦一併酌辦。至各處原損之鐵礮。鳥鎗存留無用。自應銷燬。其所存生熟鐵幾及六千萬觔。更覺太多。但其價本輕。自不值運送糜費。而久存亦屬無益。除留給各兵番作為農器鍋具外。有可設法經理者。並當酌量籌辦。庶不致歸於無用。以上各條著交明亮舒常桂林悉心妥酌辦理。○成都將軍明亮舒常桂林副都統舒常。四川提督桂林奏噶喇依為兩金川適中之地。臣等現駐該處商辦一切事宜。目下應留川省官兵六千名。已如數挑出。查總兵五福。於小金川一帶最為熟悉。已令帶兵在美諾駐防。高塔隨征數年。於口外

番情。山形道路亦漸領畧。即派帶兵駐勒烏圍。并令將派撥所轄官兵逐一安營設汛。至耕屯所需之農具籽種。已飭松茂建昌道約覈數目。速為儲備散給。再臣等現駐口外。一切文報往來。仍令將西路各站每站留馬六匹遞送報聞。○督理糧餉吏部侍郎劉秉恬調任四川總督富勒渾。山西巡撫鄂寶。浙江布政使郝碩。河南布政使顏希深。奏前大兵由瑪爾古當噶一路進攻。各營卡俱在山頂。不得不尾隨供運。今官兵全數凱旋。祇須趨運存糧。應改由勒烏圍沿河行走。直達噶喇依貯糧處所。現已將西里各站裁撤。所有人夫即帶赴勒烏圍沿河安設報聞。○又奏臣等前奏准分撥軍糧。視各處駐兵之多寡。為存糧之盈縮。覈計道路遠近。妥為分貯。查促浸。償拉。及明正司所屬。共駐漢屯兵六千五百名。計現存米數。自楸砥至梭洛柏古等處。尚有七萬餘石。勒烏圍現有米一萬二千石。

應再運八千石。茹寨噶爾丹等處兵即於勒烏圍支領。噶喇依現有米二十餘石。應再運一萬二千餘石。美諾現有米一萬餘石。應再運二萬石。僧格宗翁古爾壘等處兵即於美諾支領。底木達現有米四千石。應再運六千石。餘二萬貯大板昭南路運貯章谷米九千石。約咱兵即於章谷支領。馬爾邦米五千石。曾達兵即於馬爾邦支領。約計足敷二年有餘。加以辦理屯田官役人等口糧均屬充裕。現分路轉輸。並派分段總理各員查催。報聞。○甲午。

上詣皇太后行宮問安。○諭據阿思哈查奏宿州二幫糧船於三月初一日午刻行至清河縣所轄之極險湖心。陡遇暴風波濤洶湧。致漕剝各船陸續漂沒二十八隻。板席粒米無存。併淹斃正副丁舵工水手男婦多名。等語。湖心陡遇暴風。船經漂沒。自屬人力難施。且各船

淹斃多人。殊堪憫惻。所有沉沒漕糧米石一萬八百三十石七斗零。著加恩豁免。餘著照該署督所議行。○又諭曰。內閣學士劉墉著派往安徽會同巡撫李質穎查審事件。即馳驛前往。○巡視中城給事中阿那布王猷奏拏獲迷拐幼女多名之王劉氏等。請交部究辦。諭用藥迷人拐賣人口情罪最為重大。王劉氏等膽敢於輦轂之下迷拐幼女至十六名之多。尤屬不法。一經審實。不論首從。即應從重治罪。著交刑部嚴加刑訊。務得實情。審明定案之日。一面奏聞。一面將該犯即行正法。以示懲儆。○諭軍機大臣等。本日報到。據總管太監王忠奏。京師於三月十五日子時小雨。隨下隨止。又十八日申正至亥正止。得雨約一寸餘。等語。何以未據王大臣等奏及豈因前次奏報十二十三得雨之後。甫經數日。是以不復具奏耶。現在京城是否盼雨。近日曾否續得雨澤。及二麥大田情形若何。並

著王大臣等。即速查明覆奏。○又諭據弘暢等奏。查審李承誥呈控。奪開密業大概案情。一摺。所請將徐步雲。王慶長革職。嚴審之處。已依議矣。閱舒寧供詞。其與丁元明夥開煤窰一節。已有實據。縱使丁元明於煤窰有分。尚非恃勢強占。而舒寧以大學士之子。與市井買賣民人往來牟利。即屬下流不堪。所有各供詞。與原呈未符之處。自應秉公切實研訊。務得確情。即行定擬具奏。將此傳諭知之。

○又諭今日阿桂等派令哈清阿押解七圖甲噶爾思甲布七圖阿申到行在。隨派軍機大臣審訊。據供伊從前勾引降番復叛時。往來通信。有家人硯朋一名。在噶喇依逃去。又有小金川頭目索羅甲卡爾甲。一同商量勾引其人於大兵攻克勒烏圍之後。投到將軍處各等語。此二人均係緊要番犯。曾否拏獲起解。阿桂業自軍營起程赴成都。著傳諭明亮。即行查明此二犯著落。如尚未起解。即派

妥員押送來京。仍飭委員沿途小心管押。毋致疎虞。將此隨軍報發往。並諭阿桂等知之。○是日駐蹕中水行宮。○乙未上詣

皇太后行宮問安。○至曲阜謁

先師廟。○諭軍機大臣等。據三寶奏兩浙商人何永和等呈請赴東省迎鑾。并備物以佐郊勞賞需等情。因情詞懇切。是以聽其前往等語。甚屬多事。已於摺內批示矣。朕因平定

金川。集勲奏凱。特循舊典。告成

闕里。一切祇候迎鑾等事。本與江浙各商無涉。昨伊齡阿率帶兩淮商眾。在泰安一帶豫備段落。當即嚴切申飭。伊齡阿未嘗不以此為獻勤見好。朕則甚嫌其多事。即花翎亦不賞給。至浙商則距山東更遠。乃亦備物踵至。尤屬無謂。此必因兩淮商人有迎鑾之舉。遂聞風效尤。朕實所不取也。第該商等業已遠來。仍照例賞給。諭令即回。三寶係封疆大臣。

非伊齡阿專司鹽政者可比。何亦不知大體。若此。著傳諭申飭。○又諭曰。額爾德蒙額奏稱發往杭州充當苦差之回子薩蓋脫逃。除行知各處嚴緝外。請將協領岳格並伊等交部分別議處等語。回子薩蓋係發往杭州充當苦差之人。敢由配所脫逃。情殊可惡。若不嚴拏重懲。曷以示儆。著交該省及福建江南江西河南山東山西陝西甘肅直隸等省督撫嚴行查緝。於何處拏獲。一面具奏。一面即行正法。至該將軍等漫無管束。以致逃逸。疎縱已極。協領岳格著交部嚴加議處。將軍額爾德蒙額副都統明貝著交部議處。○蠲免安徽懷寧桐城南陵貴池東流當塗蕪湖繁昌合肥廬江巢縣壽州宿州鳳陽懷遠定遠虹縣靈璧霍邱六安霍山泗州盱眙天長五河滁州全椒來安和州含山廣德建平等三十二州縣并建陽安慶廬州鳳陽長淮泗州滁州等七衛。乾隆四十年分水旱偏災。額賦

有差。○旌表守正捐軀之河南寶豐縣民王姜妻杜氏。○是日駐蹕泮池行宮。至丁酉。皆如之。○丙申。

上詣

先師廟。釋奠告功。至大成門。降輿。步入行三跪九拜禮。遣官祭

崇聖祠。分獻四配。十哲兩廡。

上謁

孔林。至墓門。降輿。步入墓前。北面跪。三酹酒。

畢。行三拜禮。○詣

少昊陵。

元聖周公廟。行禮。○賜衍聖公孔昭燦及孔氏族人等食。○諭前歲初聞木果木軍營失事之信。以溫福倉猝遇變。臨陣捐軀。特加恩賞。以世襲伯爵。嗣查明木果木之事。溫福既未能措置豫防。及礮局被劫。復將營門關閉。遂致民散兵潰。是溫福之乖方債事。死由自取。豈可復膺五等之封。是以將所賞伯爵革

去。但念其究係陣亡。仍令該部照例議給世職。即令伊子永保承襲。茲因平定金川。將軍阿桂等查明木果木一案。通信勾結。七圖甲噶爾思甲布實為罪魁。因命解至行在。交軍機大臣審訊。據供初投誠時。派在控喀打仗。有伊叔小金川頭目七圖安堵爾差經朋來營。約令叛回。初時因官兵勢衆。未敢應承。後見將軍將後路防兵調去。只剩番兵看守。從察斯木翻過山頂。地名登達達。到勒烏圍只

一天路。可以繞道通信。遂勾通各番。寄信索諾木等。統賊分路潛出。先害董天弼。次劫溫福。約計辦了兩個月。方乘隙滋擾等語。則其事全係溫福釀成。七圖甲噶爾思甲布係小金川罪惡頭人。七圖安堵爾親姪。乃溫福並不查察。留於軍營。又不加意防範。竟聽其假稱投降。勾賊內應。商謀兩月之久。奸細往來送信。出入自由。溫福毫無見聞。直如木偶。已屬不成事體。且據七圖甲噶爾思甲布供察

斯木翻山。即是登達達。到勒烏圍只一天路。該處既有此捷徑。溫福當昔嶺阻遏之時。即應留心偵訪。間道疾趨。出其不意。直抵勒烏圍。大功早可告成。乃坐擁重兵。守株待斃。轉留此路。為賊人通信構謀。是木果木之挫失。全係溫福之坐昧事機所誤。使其尚在。必將伊立寘重典。今既已身死。即屬倖免。豈宜令其濫邀世及之恩。所有此案議給溫福世職。即著撤銷。至伊子永保等各本身原有官職。

仍准其照舊當差。此即朕格外加恩。罪人不孥之意。伊等益當感激奮勉。以贖父愆。朕於軍營功過。信賞必罰。悉視其人之自取。從不肯絲毫假借。如溫福之失律貽誤。若令其冒濫叨恩。又何以示勸懲乎。著將此通諭知之。○又諭曰。吳虎炳奏。於二月初二日到廣西巡撫任後。查有革職道員秦廷基。因袒護屬員。授意改供。擬斬監候。係旗人。應行解部監禁之犯。尚未起解。當經飭催。據報患病調治。

嗣據署臬司黃邦寧面稟該犯在監病故隨率同司道等親往相驗。秦廷基實係生前自縊身死並非病故。併訪知該犯原寓省城邊耳巷張姓公館內。並未收監扭鎖。以致在寓投繯。黃邦寧於該犯死後。連夜擡入司監各情節。請將署臬司黃邦寧。司獄宋紱一併革職審擬。併自請交部嚴加議處等語。覽奏殊堪駭異。實為從來未有之事。秦廷基係問擬斬候。應行解京監禁要犯。黃邦寧署理臬司。膽敢瞻徇同寅情面。任聽安住旅館。托病延挨。不即起解。已屬玩法。及秦廷基自縊。復敢捏稱在監病故。移屍獄中。希圖掩飾。其情罪尤屬可惡。黃邦寧著革職拏問。該撫即派委妥員。速行押解赴京。交刑部從重治罪。至此案係熊學鵬任內之事。熊學鵬既將秦廷基授意改供審訊屬實。擬以斬候。自應一面具奏。一面將秦廷基照例收監。乃自十一月二十一日定案後。任聽其在省安居。並不即行

收禁。致該犯得以在寓投繯。其事實由熊學鵬釀成。況秦廷基袒護改供一案。熊學鵬近在粵西。並未查出叅奏。難保無徇情曲庇之處。直待李侍堯秉公叅劾。熊學鵬乃不得不嚴行定擬。其隱微已不問可知。朕以熊學鵬素常辦事尚屬勤慎小心。是以調赴粵東大省。竟不料其荒唐一至於此。實為辜負朕恩。朕於督撫等公過處分應行降革者。概予從寬留任。今熊學鵬敢於違例寬縱。係屬私罪。難以曲為原宥。熊學鵬即著革職。發往川省辦理軍需奏銷事務。其軍營各員所有虧短官項如溫福遺失銀米等款。若力不能完者。即著令熊學鵬賠補。以為督撫徇情沽名者戒。至司獄宋紱雖係專獄之員。但將秦廷基擡屍入監一節。出自署臬司黃邦寧之意。該司獄以微末屬員。其力自不能違抗。予以革職。已足蔽辜。毋庸審訊治罪。吳虎炳到任未及一月。即將秦廷基應行解部監禁之處。飭

屬嚴催。併將黃邦寧捏報監斃移屍入獄各情弊查出。據實叅奏。頗屬認真辦事。其失察泰廷基原未收禁之處。尚可從寬。吳虎炳無庸交部議處。又據蘇爾德奏。身任藩司。近在同城。不能早為發覺。請一併交部議處等語。蘇爾德若止係藩司。監獄之事。與伊無涉。原可無庸置議。但熊學鵬於正月初十日起程赴粵。東新任後。蘇爾德即護理撫篆。至二月初二日始行卸事。其間幾及一月。既未將泰廷基未經收禁之處查明。又不催令將泰廷基解部。其罪實在於此。豈得僅以藩司同城為詞。自行檢舉。思欲避重就輕乎。蘇爾德著交部嚴加議處。朕辦理庶務。一秉大公。悉揆其情事。為重輕。從不肯稍存成見。而紀綱法度所在。亦不肯絲毫寬假。似此吏治人心所繫。豈可不加之重懲。以示儆戒乎。將此通諭知之。○諭軍機大臣等。現已降旨。將熊學鵬革職。發往川省。辦理軍需奏銷事務。如軍營

各員有虧短官項。力不能完者。即著令賠補。以示懲儆。伊久任外省。現在居住江寧。著傳諭高晉。即將熊學鵬所有家資產業。嚴密查封。以抵應賠之項。高晉或在淮陽一帶查勘河工。一得此旨。務即親往迅速妥辦。勿任其稍有寄頓隱匿。高晉自非熊學鵬之流也。慎之。其任所貲財。並著李侍堯嚴密查封。以抵賠項。毋任隱漏。將此由六百里傳諭知之。○戶部議覆四川總督文綬疏。稱撥解西藏餉銀。請於司庫支發。應如所題。至稱派委隣水縣典史平震世管解前往。查上年採銅案內奉旨不准簿尉微員領辦。今此項餉銀多至六萬兩。亦未便以微員貽誤。嗣後應覈銀數多寡。即照京餉例。遴員押解。從之。○調安徽巡撫李質穎為廣東巡撫。以江寧布政使閔鶚元為安徽巡撫。○賑恤甘肅隴西伏羌會寧漳縣。平涼華亭涇州靈臺隆德寧夏平羅秦州玉門十三州縣。乾隆四十年分雹水霜

災飢民。○旌表守正被戕直隸唐縣民王通妻劉氏。○戊戌諭朕於五月十三日啟鑾幸避暑山莊。立秋後幸木蘭。一切應派人員著各該處照例備派。○又諭昨據吳虎炳奏官犯秦廷基在省寓自縊。署臬司黃邦寧捏報監斃。并移屍入獄一案。實堪駭異。已降旨將黃邦寧革職拏問。解部治罪。並將熊學鵬革職發往川省辦理軍需奏銷。令將應賠無著之項著其賠補矣。所以如此者。實由熊學鵬始終袒護秦廷基所致。秦廷基授意改供之事。始於粵西。該犯既赴粵東稟求李侍堯。斷無不就近先求熊學鵬之理。熊學鵬不即將秦廷基奏。其徇庇已屬顯然。及李侍堯秉公劾奏。交熊學鵬查審。熊學鵬自不得不按例定擬。豈能因後此之審實掩其前此之袒庇乎。至秦廷基既已問擬斬候。即應照例收禁。乃熊學鵬自上年十一月審明定案。至本年正月初十日卸事。幾及兩月。竟聽該犯安居省寓。不入囹圄。此非瞻徇情面而何。熊學鵬平日係謹慎小心之人。遇事不免過於瑣碎。此等非其意想不及者。何竟寬縱至此。殊不類其所為。是秦廷基之得以投繯自斃。實由熊學鵬釀成。即問之熊學鵬。何詞尚能抵辯乎。至朕於督撫處分。應行降革者。若事涉因公。無不量予從寬留任。今熊學鵬徇情沽名若此。其罪實由自取。無可復原。是以將伊從重究治。督撫皆朕所委任大臣。冀其整飭吏治。共佐上理。乃前此粵東既有黃仕榮將蔡老三行刑縱放一案。今復有黃邦寧捏報移屍一案。皆從來未有之事。恐外省惡習。類此者正復不少。朕將何以信任用人。返思深用自媿。督撫等亦當引為切戒也。將此再行通諭中外知之。○又諭從前調派各省官兵。其餘丁有脫逃者。緝獲之日。令各該督撫將該犯問擬死罪。牢固監禁。原以軍興之際。餘丁雖非正丁。乃敢任意脫逃。不可不嚴示懲

做。今大功既已告竣。若仍前牢固監禁該犯等轉得坐食囚糧。甚屬無謂。著交刑部通查各案。將該犯等或改發伊犁等處。或發往煙瘴。分別安插。酌量定擬。彙摺具奏。嗣後如有續獲者。即照新定之例辦理。○諭軍機大臣曰。阿桂等奏查審富德扣罰土兵鹽糧銀兩一案。其不應支領而領。及藉端罰扣。以為彌補賞需。衆口如一。實已毫無可疑。是富德冒濫行私。朦混欺誑。其罪已干重辟。至所賞銀

賞銀卷一十五

三十一

兩綢緞。俱係零星分洒。以為人數衆多。難於逐一查訊。而管理賞需之李萬年等。堅稱並無他故。或因富德尚為叅贊大臣。心存顧忌。富德亦未肯遽吐實情。已將富德革職嚴訊等語。自應如此辦理。至所稱英泰於富德冒支濫扣之處。曲為承順。已屬不堪。及訊以富德有無侵漁情弊。一味諉為不知。更為蒼滑取巧。並將英泰解任嚴究等語。英泰竟當革職嚴訊。已於摺內批示矣。富德將賞需銀兩

綢緞零星分散。以冀人衆難查。此即富德私詐用巧。豫為地步。必有與衆人私分之事。而藉賞多恐罹罪為賠補。仍可令衆人感激為之抱屈。其情尤為可惡。此事虛實。止須嚴究富德。即可令其水落石出。并無庸遍質衆人。前據舒赫德英廉查富德於上年十月內。差家人徐九之子。自軍營送銀兩綢緞等物兩車到京。徐九旋於閏十月內。赴涿州置地七八項等語。地價每頃以二三百金而計。所值

賞銀卷一十五

三十二

亦在二千金內外。昨海蘭察自軍營赴行在。詢以所得鹽菜銀兩。每月不過二十餘兩。富德同係叅贊大臣。其得項相等。即以到軍營後兩年餘所得之銀。全數寄回。尚不及千數。安得二千餘兩之多。且富德家產。向曾查抄。馬能復有蓄積。而軍營甫寄銀兩回家。即置地畝。其情節更屬顯然。止須問以此項銀兩從何而來。諒富德斷不能復有支飾。至綢緞等項。皆非叅贊分例所應支。更當問富德從

何而得。是其侵肥情弊。尤難隱遁。且現已傳諭舒赫德英廉將富德家人概行拘拏嚴訊。自可得其底裏。著阿桂等即將富德切實嚴審。務得確情。即行定擬具奏。其英泰等並著一併嚴審具奏。將此由六百里加緊發往傳諭知之。仍著將訊明緣由迅速覆奏。○以江南江安糧道陶易為江寧布政使。諭軍機大臣曰。江寧布政使員缺緊要。其所屬江揚淮徐等府積欠尤多。若將外省臬司陞調。一時

實錄卷二五

三

難以得力。因思江安糧道陶易曾任淮安府知府。於該處地方情形。并查辦積欠事務。素所熟悉。是以逾格將伊超擢。著傳旨詢問高晉。朕用此人如何。是否能繼閔鶚元勝江寧布政使繁劇之任。於地方公事果否有益之處。就伊所見。據實覆奏。○是日駐蹕長慶屯行宮。○己亥。諭軍機大臣等。昨己降旨將李質穎調任廣東巡撫。閔鶚元授為安徽巡撫。所遺江寧布政使員缺。已令陶易補授矣。陶

易現在江寧。即可就近接任。閔鶚元於交代後。即赴安徽新任。所有安徽應辦事宜。閔鶚元向李質穎面為詢問講論。自可得其大概。此時且不必亟亟請訓。其廣東巡撫印務。自應李侍堯暫行兼署。李質穎於交印後。亦即前赴廣東新任。李侍堯在粵年久。諸事最為熟悉。李質穎到彼。一切俱可隨時問之。該督而行。李質穎甫自行在。召見數次。現在別無可諭。更不必前來請訓也。將此由四百里傳

實錄卷二五

三

諭李質穎。閔鶚元。并諭李侍堯知之。○又諭據圖思德奏。車里逃夷。刀維屏等悔罪自歸。一摺。內稱。刀維屏弟兄過江。爭迎饋食。並公呈乞留。仍管夷衆等情。可否將刀維屏刀士宛暫行羈禁。令其招致。刀召廳等各犯。以完塵案等語。車里土司業經改土歸流。添設都司守備。設兵駐守。兼轄十二猛。相安已久。豈可以夷民乞留。即令刀姓復管其衆。此與國體有關。但刀維屏兄弟既已投歸。祇可貸其

一死。在省城按察司監牢固監禁。竟當作圖思德之意。諭以刀維屏本係內地土司。棄職潛逃。本應立正典刑。以彰國法。念其悔罪投歸。姑予網開一面。至刀士宛隨從同逃。於法亦難末減。因其被人網刦。且曾有投河一節。尚可矜原。均從寬免死。在省監禁。此即本部堂仰體大皇帝法外之仁。爾弟兄當倍加感激。如此辦理。衆夷人聞知。亦必共知感畏。至刀紹文。本係無足重輕之人。無庸緝捕。如彼自行投回。亦可照刀維屏兄弟一例辦理。至其餘隨逃之衆。并可聽其自然。其來與不來。皆無關緊要也。將此由五百里諭令知之。○江西巡撫海成覆奏。遵旨查拏灘頭司巡檢丁楚汧現已通飭勒限嚴拏務獲。得旨豈有許多日尚不就獲之理。汝所辦何事。彼曾為官。豈似小民難於訪緝乎。○是日駐蹕濟寧州行宮。翼日如之。○庚子。協辦大學士刑部尚書英廉等以恭查

實錄卷二十五

言

天壇

地壇殿宇。無庸興作覆奏。諭此奏方是。每年既有秋季拔草之例。自可就便勘驗。量加拘抵。况各處滲漏甚微。何至大興工作。此皆素爾訥德明好為矜張。因有前此之奏。

壇宇神位。豈宜屢請奉移。致滋褻瀆。並非靳惜小費也。今既查明實在情形。嗣後即照此敬謹妥辦。○諭軍機大臣等。戶部奏已故銅山縣知縣楊大紳有應追分賠銀三千五百餘

實錄卷二十五

三

兩。據漕運總督咨稱。伊子漕標候補千總楊教穀實無財產可追。請俟該弁補官日扣俸完繳等情。查楊教穀尚未補官。若俟補官日坐扣。千總薪俸有限。已難剋期扣繳。而伊父楊大紳名下尚別有兵工二部行追漫工驛站等銀。共四萬一千餘兩。以一千總之薪俸。扣抵四萬餘兩之欠項。清繳無期。除應追漫工驛站等項應聽兵工二部查辦外。請將戶部應追銀兩。飭交兩江總督山東巡撫會同

漕運總督詳查覈辦。使官帑不致無著等因。一摺。已依議行矣。楊大紳浮給折賑米價。及覈減豆價等項。至三千餘兩之多。當時各該上司。因何不即覈實查辦。致令懸宕多年。山東原籍。又因何不上緊嚴追。致令完項無日。可見外省辦理承追之案。積疲成習。徒以空文往返。遂使帑項久懸。殊非覈實辦公之道。除交軍機大臣。就近面詢楊景素。令其據實覆奏外。並著傳諭高晉。將此案應追銀兩。因

實錄卷一十五

三

何疲玩多年。不行實力催追之處。據實明白回奏。又諭據署正藍旗都統弘暢奏。輕車都尉印務章京兼佐領松桂。聘定原任道員禮山之女。現任江蘇金壇令繆廷玠之妹為妻。於去年告假往伊妻兄任所就婚。限內未回。曾由本旗行知兵部轉催。至今已逾兩月。並無回音等語。旗員告假出京。例有定限。如在外逗留逾期。該地方官即應查明奏。催令回旗。況松桂業經該旗於限內轉行兵部

咨催。何以不催松桂速回。又不查明逾限緣由。分別咨旗奏。此皆外任積習。遇事不肯認真之故。薩載現已陞任南河總督。著傳諭高晉。即查松桂因何逾限未歸。如有別項滋事情節。即一面嚴叅。一面將該員押解回旗治罪。將此傳諭高晉知之。仍即查明覆奏。又諭據富綱奏。謝護理撫篆恩。並請陞見。同日畢沅亦具摺奏請。並聲明俟督臣勒爾謹回任後。再行來京。自應如此。富綱應候畢沅陞見回陝後。再行起程赴熱河。陞見。將此諭令知之。○命戶部侍郎和珅在軍機處行走。

○辛丑。

上奉

皇太后登舟。○詣

皇太后御舟問安。○諭淮安宿遷兩關短少盈餘九萬二千五十五兩零。經戶工二部議照薩載所查。請令伊齡阿寅著按數分賠二摺。交軍機大臣查取戶工二部。該關歷年盈餘

實錄卷一十五

三

之數較雍正十三年多寡若何。逐一詳晰覈奏。今閱單內所開。各年盈餘數目。較雍正十三年。短少者居多。可見歷任監督不及從前之妥協。難保無任憑胥役肆意侵肥。或竟徵多報少。自行染指。俱未可定。若云盈餘短少。由於上游各省米豆歉收之故。則自雍正十三年至今。已歷四十餘年。收成豈皆歉薄。而雍正年間。豈皆豐收乎。前因各關盈餘參差不齊。恐每年逐漸加增。無所底止。曾經降旨

實錄卷二十五

三

以雍正十三年成數為準。示以折衷之制。俾不致多寡懸殊。其法最為妥善。乃行之未久。部臣復因各關奏報盈餘。大概較多於前。奏請仍以上屆數目為比較。遂無成式可循。以致遞行短少。此則部臣辦理之未善也。第歷年既久。已往姑免深究。嗣後各關考覈。務照雍正十三年之數比較。毋得復事更張。至關稅盈餘。尚非正額可比。向俱不令著賠。此次淮安宿遷兩關缺數。雖屬過多。朕初意本欲

寬免。乃召見監督寅著。詢以短少緣由。據稱該關四十年分盈餘之短少。實因豫東二省及安徽廬鳳等府。豆收歉薄所致。今年各處雖可望豐收。盈餘仍恐不能如數。殊屬非理。若云秋收豐稔之後。次年仍復短少。設或又遇歉收。更當何如乎。寅著此奏。顯係為下年奏報數。紕豫占地步。其言更不足信。朕本欲從寬。因寅著此奏。轉不可不示以懲儆。部議令其全數追賠。著加恩免其一半。其餘一半。

實錄卷二十五

三

著伊齡阿。寅著。按股分賠。既已示儆。著免其交部議處。○閩浙總督鍾音覆奏。臣前面奏提督段秀林。護庇屬員。臬司廣德。與巡撫余文儀。不協之處。均屬冒昧錯謬。仰懇交部嚴加議處。得旨。議處不過革職留任。爾等亦不懼。但若熊學鵬之顯然犯出。亦未嘗從寬。自加謹慎。度量可也。常以天理良心。置之方寸。慎之。○福建巡撫余文儀疏報。開墾乾隆三十九年分羅源。閩清。仙遊。龍溪。南平。尤溪。霞

浦福安福鼎漳平古田十一縣并華峯縣丞所屬園地屯地六頃六畝有奇○豁除江蘇元和崑山寶山等縣乾隆三十九年後坍沒地畝一百三十頃有奇○豁除福建閩縣乾隆四十年分被水衝陷田一十三畝有奇○是日御舟駐蹕大長溝水營○是月大學士管兩江總督高晉奏查勘丹徒縣境內運河自江口至西閘止長二百一十丈自窑灣至孫家村止長四百丈俱係淺涸又江口東岸

實錄卷一千五

甲

及橫閘對岸各有淤灘一段殊礙行舟均應挑挖加以築壩修閘等項現動項趨辦諭部知之○陝甘總督勒爾謹奏撫彝廳額徵常平各項糧十五萬二千餘石舊倉不敷收貯應添建廩座八十間清水縣舊倉年久傾壞者三十二間應重建請動項興修諭部知之○陝西巡撫畢沅奏西安等府屬四十七州縣共渠一千一百七十一道俱於去冬水涸時督催疏濬一應堤堰皆補築完固報聞○

署雲貴總督覺羅圖思德奏銅廠舊欠久懸先後亦須截清以免那掩之弊鹽課盈餘亦有墮欠必須親自巡查得旨自應實力妥辦毋為虛言○貴州布政使鄭大進奏貴州常平項下額貯米八十萬五千七百餘石應折穀一百六十一萬一千餘石今查全省倉貯穀數不及十之三四邊方官不諳掌故未經籌辦平糶多致歲變耗折請照例遞年借糶秋後買補還倉勒限三年全數易穀得旨好

實錄卷一千五

甲

諸凡似此實力為之可也

大清高宗法天隆運至誠先覺體元立極敷文
奮武孝慈神聖純皇帝實錄卷之一千五

實錄卷一千五

聖

大清高宗法天隆運至誠先覺體元立極敷文
奮武孝慈神聖純皇帝實錄卷之一千六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲都統世襲將軍副都統七級隨帶加一級尋常加二級軍功紀錄一次臣等謹

總纂官經筵講官太子太傅大學士文淵閣領閣事稽察欽奉 上諭事件處管理刑部戶部工部事務

世襲副都統軍功加十九級隨帶加二級又加二級臣等謹將內大臣戶部尚書鑲藍旗滿洲都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將尋常

奏修

乾隆四十一年丙申夏四月壬寅朔享

實錄卷一千六

一

太廟遣果郡王永琮恭代行禮○諭曰烏雲布
係另戶蒙古身為前鋒乃敢於行營偷竊布
匹甚屬無恥不堪僅擬枷責不足蔽辜烏雲
布著革退前鋒削除旗籍揀耳箭遊營示衆
交楊景素將烏雲布於行竊之處枷號兩個
月滿月鞭一百問徒三年以示懲儆烏雲布
係前鋒統領努三管轄之人努三及前鋒叅
領等平日所司何事俱著交部分別嚴加議
處○又諭曰英泰現已革職所有四川建昌

鎮總兵員缺著交與將軍阿桂於所知軍營出力人員內揀選一員奏請陞補現在該鎮印務著照文綬所請令副將張允師暫行署理○諭軍機大臣等據明亮等奏酌籌現留屯兵請照舊例每日給米一升其加給銀四錢即可裁去一摺屯兵原非打仗征兵可比所有加給銀四錢自應節裁即每日給米一升之處亦暫時籌辦則可將來酌定屯兵永遠章程自當照例妥議至稱餘下一項目下分設營汛各處兵丁砍運木石趕砌碯房尚屬無暇可否俟碯房工竣即行裁撤等語此項留屯兵丁原不應有餘丁若以趕築碯房需用工作人力則屯土兵練等素所熟悉儘可役使即云此時兵丁無暇或資餘丁之力亦當定立限期或半月或數月示以節制嚴行督催一俟工竣即行裁撤庶不致久延糜帑著將此傳諭明亮等知之○是日御舟駐蹕王老口馬頭水營○癸卯以平定兩金川

遣官告祭

天

地

太廟

大社

大稷○

上詣

皇太后御舟問安○諭曰戶部尚書已令豐昇額補授現在凱旋到任後英廉即不兼署戶

實錄卷一百一

三

部但戶部事務較繁且現有川省軍需報銷諸案叢集不可無熟手經理豐昇額初莅戶部未能即諳表守伺亦習於吏部而未習戶部大學士于敏中又須隨往熱河戶部舊堂官祇金簡一人留京伊在部尚未及二年且係侍郎自不若英廉之練習英廉此時未便遽離戶部豐昇額回京後且不必赴戶部任事所有戶部尚書事務仍著英廉兼署俟川省軍務奏銷事竣再令豐昇額接辦戶部英

廉專辦刑部事務。福隆安亦應隨往熱河。兵部尚書事務。著豐昇額署理。○又諭曰。富德之子二等侍衛富哈善。著革職。拏交刑部監禁。○諭軍機大臣等。據劉浩等奏。寶源局監督鄭源燾呈稱。行用錢文。間有缺邊漏風之弊。查係該局鑪頭任應舉。顧寧及穿錢匠常官等無心混入。請交刑部嚴審一摺。所奏殊未明悉。京城行使錢文。係寶泉。寶源兩局之錢並用。何以知寶源局有缺邊漏風之錢。即或因錢文清字可辨。是以查辦。但此等錢文。俱經該監督驗明。方能出局。鑪頭等撓和情弊。在局時。鄭源燾尚不能詳悉查明。及出局行使以後。何由知有情弊。遽行查辦。其中必另有發覺別情。鄭源燾知事不可掩。始行檢舉塞責。劉浩等此奏。未免代為迴護。著該部嚴行查明。據實具奏。再寶泉局錢文。較寶源局多三分之二。今工局既有缺邊漏風之錢。戶局豈能獨無。金簡現管戶部錢法堂事務。

曾否辦及。著金簡將實在情形。即行查明。據實覆奏。將此一併傳諭知之。尋刑部奏。此案因鄭源燾在錢鋪換錢。揀出缺邊漏風二十餘文。疑是曾經記過之工匠撓入。其實無可根尋。現貯局錢。亦無此弊。但平日不能細驗。咎實難辭。應將監督鄭源燾徹出寶源局。仍交部嚴議。得旨。此事管理錢法堂侍郎。亦難辭咎。著交部一併察議。餘依議。又金簡奏。寶泉局向設四廠鼓鑄。稍不如法。隨時將監督等嚴飭。現無滋弊之處。報聞。○又諭曰。英廉奏。湖北民人江榮周。在京呈控沔陽州土隄衝潰多年。未經修築一案。已將江榮周交部解赴湖北。聽候查辦。著劉墉於查審安徽事竣。即就近前赴湖北。會同陳輝祖。秉公查勘。此項隄工。雖係民修。但關係垸田數百萬畝。豈可聽其經久不行葺治。若其中有業戶民。即應令其出資。上緊趕築。倘或民力實有不能。亦當官為設法。借給。按年扣還。俾隄埝衛

田以資久遠之利。不宜因循坐視。致良田多年歉收。劉墉等務將實在情形。確查妥議具奏。至江榮周本身止有田百畝。因何遠涉赴控。恐不免有藉端歛費情弊。並著一并查明具奏。英廉摺鈔寄一分。並江榮周呈詞原圖寄交劉墉閱看。○轉吏部右侍郎劉秉恬為左侍郎。○是日。御舟駐蹕五里堡水營。○甲

辰。諭軍機大臣等。據英廉奏。步軍校拏獲寧津縣民婦郭孫氏。攜帶幼童福壽。用鐵釘穿

書來下

六

一

透腮頰。恃強化緣一案。已交刑部審究矣。閱摺內所訊供詞。郭孫氏毀傷肢體惡化。已非良善之人。且在錦州。曾入邪教。犯案遞籍。其義母謝氏。及馬老道。尼僧龍宮等。皆係一教之人。當時即應從嚴根究。何以僅將該犯婦遞籍安插完結。著傳諭弘晌。富察善等。查該州從前曾否詳報。及該將軍府尹。因何不行具奏之處。據實覆奏。並將供內之謝氏。馬老道。尼僧龍宮等。拘拏到案。嚴究邪教源委。及

傳習之人。逐一嚴訊具奏。並將所訊供詞。咨明在京刑部。即可據供質訊。以省往來提解之煩。此旨著由五百里傳諭弘晌。富察善等。即行查覆。英廉摺並鈔寄閱看。并諭在京刑部知之。○予故協辦大學士吏部尚書官保祭葬如例。謚文勤。○是日。御舟駐蹕劉家灣水營。○乙巳。

上詣

皇太后御舟問安。○諭。據舒赫德等奏。稱查抄

書來下

七

富德家產。將伊家人。俱交刑部審明取供。一并奏聞等語。看來富德扣取賞號銀兩。入己等款。已皆屬實。富德前獲重罪。朕復施恩。用為叅贊大臣。遣往軍營。伊不知感激。反行此卑鄙無恥之事。實屬喪盡天良。有負朕恩。斷難輕宥。富德所行之事。伊子富哈善。自無不知。現既將富哈善革職交部。伊家人如有不能細知之事。即嚴審富哈善。務必究出確情。不可稍涉姑息。至富德家人。穆特布。趙亮。供

詞內稱現在抄出緞三十餘匹。皆係相識之人饋送。並非官物。此亦難信。恐亦係軍營賞緞。藉端入己者。亦著詳悉研審具奏。再現隨富德家人趙清。盡知此案備細。已降旨隆安將趙清拏解送京。俟趙清解到時。舒赫德等即歸案詳細質訊。○是日。御舟駐蹕朱官屯水營。○丙午。諭軍機大臣等。昨駐博平縣朱官屯水營。密雨竟夜。雖未能十分霑足。當此久盼甘霽之時。於二麥早禾。亦殊有益。不識昨晚之雨。京師曾渥霑否。著諭詢留京辦事王大臣。即行據實覆奏。○又諭。上年曾令將軍等。將攻得兩金川地方。所有形勢最號險惡。經我兵艱難力戰而得者。將士等勞績尤多。均應繪畫得勝圖。以彰武成盛典。今已據阿桂節次繪畫進呈。而明亮一路。亦有地當險要。經官兵力攻而得。如宜喜達爾圖等處。自應一體繪畫。著傳諭明亮逐一查明。繪圖貼說呈覽。○以戶部左侍郎福康安兼鑲黃

旗蒙古副都統。○是日。御舟駐蹕新莊水營。○丁未。常雩祀。

天於

園丘。遣履郡王永瑛恭代行禮。○諭臨清舊城。當水陸衝要。向來商賈駢集。塵市殷闐。民居亦極稠密。前年逆匪王倫等竄踞其地。搶掠焚毀。人多蕩析離居。朕心每深軫念。雖曾加恩撫卹。冀得安全。尚未能信其是否均霑實惠。茲蹕路經行。親臨周閱。見商民廬舍。修葺者已十之八九。閭閻環集。貨肆列陳。風景漸可復舊。甚為慰懷。因念勦捕逆匪時。勅發禁旅遄行。始得迅速。歲事而所調駐防及綠營兵衆。亦頗不少。然係內地捕賊。非征調用兵。可比。一切應需日用。各有本分糧餉。可以抵支。乃徐績等過涉張皇。妄照軍需之例。支放實屬錯誤。因責令分賠。以示懲儆。但念此項為數稍多。且因地方公務動用。尚非伊等冒銷冒領。自未便全令賠還。因交楊景素查明

徐績等已未完細數。開單呈覽。內除徐績身任封疆。辦理不善。致地方有逆匪倡亂之事。本應治罪。業已加恩宥免。所有伊名下應賠之數。自應罰令全賠。其藩司國泰名下。尚未完銀一萬三千兩零。原任臬司孫廷槐名下。尚未完銀一萬兩零。並著加恩免其分賠。准予開銷。再朕今日在舊城親臨閱看。逆賊等占據之汪姓大宅。及大寺兩處。詢及官兵勦捕情形。彼時叅將武靈阿。剛塔俱係在事出力之人。雖已加恩擢用。仍著賞戴花翎。示獎。又賊匪前此攻犯臨清新城。計七八日。經副將葉信。叅將烏大經。署知州秦震鈞。晝夜設法拒守。殺賊保城。均屬可嘉。今烏大經已擢授總兵。葉信於病故後。仍給還副將原銜。至秦震鈞。雖以知州陞用。但至今尚未得實缺。著賞緞二匹。以旌其勞。並著該省出缺即用。又回兵洪印。率領回民。勦殺賊匪。頗為奮勉。著加恩交該撫。即以把總拔補。俾衆共知鼓

實錄卷一百六

十

勵。又據楊景素奏。稱前年在臨清河西帶兵時。有臨清州民王或。每日清晨煮粥數石。送至河岸。供饋衆兵朝餐。旬餘不懈等語。王或以里巷小民。能知大義。深可嘉尚。著加恩賞給七品頂帶。並賞緞二匹。用示獎勵。朕於賞罰功過。惟視其人之自取。權衡悉協於平。以昭彰瘴。將此諭衆知之。又諭前歲勦捕逆匪王倫一案。徐績等不知其事止係內地捕賊。乃妄照軍需之例辦理。實屬錯誤。自應責令該撫藩臬分股賠還。今念其究屬因公動用。業已查明。另降諭旨。分別應賠應免矣。但該省前此之誤。因向無一定章程所致。彼時曾勅戶部定議通行。惟所議止係勦捕賊盜事宜。而於各省或遇調派用兵之事。未經議及。現在平定兩金川大功告成。非惟邊徼永靖。而海宇亦共臻乂安。惟願從此洗兵不復。另有征調之事。但國家安不忘危。兵固不可一日不備。莫若於功成善後之時。將各省軍

實錄卷一百六

十一

需事例。覈定規條。俾各有所遵守。不致臨事周章。此亦承平時所當講求。以冀有備無患者。即如川省賞號一項。實屬濫設。軍營隨征員弁奮勉出力者。俱令該將軍等。覈其功績。定為超等。及頭二等。交部分別議賞。議敘。兵丁等亦常加賞月糧。其中奮勉出眾者。又持加陞用。及賞給巴圖魯號。並賞戴花翎藍翎。所以鼓勵戎行者。至為優渥。何得更有隨營賞號之事。或將軍等自顧體面。欲格外加賞。以示獎勸。將各人自有之綢緞等物。量行賞給。未為不可。向年大學士公傳恒。經畧金川。即以朕賞賜之物。分賞將士。並非地方官辦給。又如平定準噶爾回部時。亦並無此項開銷。何獨川省辦及賞號之事。即富德此次在軍營。止於無功。並非有罪。乃因有賞號一項。始則濫賞沽名。繼則冒支混扣。以圖彌補。甚至剋扣賞銀分兩。侵用官備緞匹。身蹈重愆。雖其自取。實由地方官多備賞項。以釀成之。

可見賞號一項。斷不應有。昨已諭戶部存記。將川省賞號一項。不准報銷。著令備辦之地。方官及將軍。叅贊分賠示儆。嗣後即當永遠刪除。至各省調兵整裝安家等項。或賞或借。不同。又土兵安家一項。向係有名無實。及鹽菜口糧等項。多寡不同。以至餘丁馱載數目。並運送軍裝糧石。損擡舫重。叅差不齊者甚多。均應推類確查。俾令畫一。著交軍機大臣會同該部。分別條款。悉心安定。章程具奏。俾得永遠通行遵照。尋奏。軍需章程。應以平定西陲為正則。叅以雲南舊案比較。至現議條款。須俟川省逐案依限題覆。臣部始能依次覈定。統俟奏銷得其大概。再將各項章程酌擬。列款請旨。至各省調派。因地制宜。斷難畫一。亦俟定議時。另為一款。酌定載入則例。從之。○旌表守正捐軀江蘇華亭縣民陳元觀妻張氏。福建屏南縣民張顯名妻韓氏。○是日。御舟駐蹕朱泉屯水營。○戊申。四川總督

文綬奏。川省茶政。設有邊引。商人照額納稅行運。在松潘。打箭鑪。灌縣等處發賣。凡土司蠻商。皆准赴邊起票。聽其買賣。番人進口零星貿易。皆所不禁。乾隆三十七年。遵旨以償拉促浸。仰給內地茶餉。立法查禁。今番境蕩平。請照舊規。聽其貿易。從之。○以戶部右侍郎金簡兼鑲黃旗滿洲副都統。○是日。御舟駐蹕夾馬營水營。○己酉。諭。據裴宗錫奏。黔省地處邊圉。司庫備貯銀兩。理宜寬裕。請勅撥銀三十萬兩。解黔等語。著照所請行。准撥銀三十萬兩。解黔備用。或於附近黔省留協項下撥給。抑或於川省用剩軍需銀兩內。就近撥往。該部即速妥議具奏。○諭。軍機大臣等。據周元理奏。伍岱永平。旺保祿。扎爾桑所帶各起凱旋官兵。由河南一路回京。聞此月望間。可至直隸境。需用車馬應付。但將軍阿桂等帶領應備郊勞官兵。亦於彼時入直隸境。所有直隸豫備車輛馬匹。應先在井陘一

帶應付。方能徹往磁州備用等語。將軍等帶領豫備郊勞官兵。須於此月二十六日以前。齊集良鄉。沿途車馬。自應先儘應付。其餘各起凱旋官兵。不妨稍待。以便車馬接替備用。所有伍岱帶領之兵。如已入直隸境者。即在磁州暫住等候。其尚在河南境內者。即於彰德一帶。酌量地方暫住。俟直隸車馬應付郊勞官兵事畢。徹至磁州一路。即行知會前途陸續進發。除就近交周元理妥辦。並另降清字諭旨。諭知伍岱等遵照外。將此由六百里諭令徐績知之。○吏部等部議准。盛京工部侍郎兼管奉天府府尹富察善疏稱。寧遠州中後所地方。向設巡檢一員。後改設州判。管理人命詞訟等事。但究係佐雜。旗民視非正印。不甘聽斷。請裁歸寧遠州知州自行經理。唯中後所係關外要地。應仍設巡檢。專司巡緝。定為調缺。從之。○以西安副都統書麟為廣西提督。以湖南衡州協副將靈山為四

川建昌鎮總兵。陝西靖遠協副將李化龍為江南壽春鎮總兵。○是日。御舟駐蹕石屯汛水營。○庚戌。

上詣

皇太后行宮問安。○諭此次巡蹕所經直隸山東兩省。每日俱有戲臺承應。甚或間以排當殊屬無謂。朕起鑾前。曾再三申諭。勿務繁文。而地方官總不能實心仰體。朕於道旁老幼扶攜瞻覲。嘉其情殷愛戴。每顧而樂之。至於沿途點綴。飾為巷舞衢歌之象。從未嘗攬轡停輿。一為聽覽。亦何必為此無益之繁費乎。前此恭奉

皇太后。巡幸江浙。臚歡祝

釐。所至或綴陳燈綵音樂。以奉

慈娛。因兩淮蘇杭地本殷阜。且俗尚如斯。遂不加斥禁。然亦初不以為觀美。若北方風氣淳樸。豈可效其所為。又從而踵事增華乎。況今年巡莅山東。原因臨清地方。前歲經逆匪王

倫滋擾。閭閻恐不免凋敝。故親臨閱視。以慰厪懷。適當平定兩金川告功。

闕里登堂展禮。藉申五年疎濶之忱。又因道經泰山。祇掖

安輿。詣

岱廟辦香展敬。以迓

鴻禧。此則朕自抒尊養之誠。有司等固不當援引南巡祝

嘏之例。朕省方問俗。惟以民生休戚為念。而農

田晴雨。尤軫於衷。即如三月朔日。天津途次。優渥春膏。夾岸麥隴菁蔥。深為欣悅。乃自入山東境。至今為之望霖。已經彌月。雖有廉纖微潤。而甘澍未得霑濡。麥禾漸覺減色。朕心實切焦勞。即行館供陳。亦為之居不安席。豈復能適意乎。督撫等當以朕此心為心。方不負朕委任。至朕簡畀封疆大臣。惟視其留心民事者。加之恩眷。從未嘗因其能辦差。喜承奉。稍為嘉獎。此尤中外臣民所共見共聞者。

督撫等。可不知所趨向乎。朕行事期為天下後世法。方今綱紀肅清。朕巡省周咨。並不以遊觀為事。誥諭諄諄。督撫等尚且不能深喻朕意。我子孫若能恪遵朕訓。庶不致為奢靡所移。設或稍不自持。畧涉流連游覽。督撫因而曲意逢迎。其流弊伊於何底。此於國運人心。所繫甚鉅。可不共知。微懼乎。又如前四次南巡。大學士傅恒綜理諸務。極為安靜。邇年兩次東巡。大臣等管理一切。雖尚屬妥協。而行營已不能如從前之一無所事。又漸有饋遺之風。扈從諸臣。可不益加戒勉乎。今日召見軍機大臣。並周元理楊景素。詳悉誠諭。並將此通諭知之。○以頭等護衛薩炳阿為西安副都統。○是日駐蹕德州行宮。翼日如之。○辛亥。諭朕於本月二十七日。由黃新莊行宮。御龍袍袈裟。乘十六人金漆亮轎。用騎駕鹵簿。導至郊勞臺。其大駕鹵簿。即於郊勞處排設。所有隨從郊勞之王公大臣。俱穿蟒袍。

補褂。禮成後。仍乘十六人金漆亮轎。騎駕鹵簿。及饒歌樂。導至行宮。用膳。更行衣。隨從大臣官員。及凱旋之將軍大臣官員等。亦俱更換行衣。隨從。朕由行宮乘八人轎。至趙新店頭分尖營換車。所有二分尖營。著移設於廣寧門關廂外。其騎駕鹵簿。即先赴彼處豫備。朕至二分尖營後。仍乘八人轎。用騎駕鹵簿。導引進宮。大駕鹵簿。宮內無庸再設。再禮部奏請在京王大臣官員等。於二十六日至初一日。此五日穿蟒袍補褂。朕於二十七日進宮。所有隨駕之大臣官員等。著於二十八日至初一日。穿蟒袍補褂。又諭曰。協辦大學士尚書公阿桂。著仍在軍機處行走。並著紫禁城內騎馬。○又諭曰。阿桂既已賞給寶石頂。四團龍補褂。金黃帶。令其服用。著再加恩。賞穿四開裾袍。○又諭曰。富德之孫慈寧。著拏交刑部監禁。○諭軍機大臣等。本日據舒赫德等奏。審訊富德家人穆特布供出。從軍

營帶回金子二十兩。又據趙亮供出帶回金子五十兩等語。更出情理之外。實屬自取其死。富德寄回綢緞銀兩等物。尚係從賞號內侵肥尅扣。至金子一項。又從何處而得。即或伊帶兵攻獲寨落。搜取番人藏蓄。侵匿不報。亦所不免。然通計富德攻克寨落甚少。得金安能如許之多。此必係向明正巴旺。布拉克底。各土司等勒索。其罪更重。將來富德解到時。徹底嚴訊。自無能復有捏飾。但袁守伺差

實錄卷十六

三

往川省。會同將軍等查審此案時。何以不將此等情節。詳細審明。任其供詞含混。致有不實不盡之處。在阿桂必自念伊係原叅。避嫌不肯深究。豐昇額辦事本不能細緻。若袁守伺。素屬明練。且係軍機大臣。專差審理大案。自應詳細研求。何以竟不將富德寄回金銀綢緞之事。逐一審出。并究其物所自來。輒爾顛預完案。袁守伺實難辭咎。朕閱阿桂奏摺於富德一事。言外有引而不發之情。諒富德

侵扣婪索諸罪蹟。阿桂俱有真知灼見。特因上年袁守伺同阿揚阿審辦冀國勲虧帑一案。與阿桂所奏情節不符。阿桂因此引嫌不肯顯然抉破耳。今富德諸事俱已敗露。豈復能稍有隱諱。著傳諭阿桂。即將所知富德勒索侵尅各款蹟。逐一據實具奏。將此由五百里諭令知之。仍即由驛覆奏。又諭刑部奏駁河南省審擬關言誣告家主占奪伊妻一案。所駁甚是。已依議行矣。關言賣於竇長裕為僕。服役年餘。因欲偷竊銀錢。被竇長裕責逐外出。膽敢挾嫌誣告伊主。情節甚為可惡。奴僕陷害其主。與子孫誣告祖父母同罪。應照干名犯義律擬絞。例有正條。何得僅照凡人誣告之例。問擬發遣。殊屬舛誤。著傳諭該撫徐績。即照部駁另擬具題。並著該撫及署按察使周於智將因何錯擬之處。明白回奏。至榮柱向係刑部出色司員。律例素所諳習。雖現署藩司。讞獄非其專責。然於審擬此等

實錄卷十六

三

重案亦應留心商辦。何得視同膜外。聽該撫臬率擬若此。榮柱並著傳旨申飭。○豁免福建諸羅彰化臺灣三縣遭風漂沒撥運倉穀一百六十石。兵米二百六十石有奇。○壬子上詣

皇太后行宮問安。奉

皇太后登舟。○是日御舟駐蹕袁樓水營。○癸

丑諭曰。圖思德奏黔省上游各鎮協營俱經上年親往查閱。因赴永昌辦理出防移駐事

實錄卷一百一

三

宜。是以未及查閱下游。現奉旨兼署雲南撫篆。不能前往查閱。可否令裴宗錫代為考覈等語。著照所請。黔省下游各鎮協營。即著裴宗錫就近考覈。○蠲免直隸霸州保定文安大城固安永清東安武清寶坻薊州寧河香河大興宛平順義清苑安肅新城博野望都容城蠡縣雄縣祁州安州高陽新安河間獻縣任邱天津青縣靜海津軍廳正定晉州無極藁城新樂雞澤大名元城玉田武邑衡水

趙州隆平寧晉深州武強安平定州等五十
二州縣廳乾隆四十年水災額賦有差。○豁免福建建陽縣乾隆三十八年水衝地四十
三頃八十二畝額賦有奇。○是日御舟駐蹕
史家莊水營。○甲寅諭直隸應行引見人員
著交行在吏兵二部於駐蹕天津時帶領引
見。○吏部議覆福建道監察御史董之銘條
奏初捐知府概不准以繫缺選用。查知府職
司表率。由貢監遞捐者未經筮仕。自難驟膺
繁劇。應如所奏辦理。至由外任正印等官捐
陞者。非初登仕版可比。應仍照舊例。無論繁
簡一體選用。其別項佐雜遞捐者。仍以簡缺
選用。至由滿漢京職捐陞人員。有例不截取
及未經俸滿者。行文各該堂官察覈。出具考
語。以定繁簡。再加捐分發人員。亦應一體辦
理。從之。○是日御舟駐蹕夏口北水營。乙
卯。以平定兩金川遣官告祭

昭西陵

孝陵

孝東陵

景陵

泰陵○遣官告祭

孝賢皇后陵○

上詣

皇太后御舟問安○諭軍機大臣等此次平定兩金川將軍阿桂等將俘獲逆酋逆目并喇嘛等解京分別辦理內有助惡之堪布都角

聖錄卷五十六

三四

兩喇嘛業經凌遲處死其情罪較輕之聶隆喇嘛已交山東臬司永遠監禁迷輸喇嘛已交刑部監禁尚有班第喇嘛未經辦及江寧省城向有喇嘛寺著傳諭舒赫德即派員將該班第喇嘛發往江寧交高晉嵩椿發交喇嘛寺內役使如有脫逃等事即嚴拏務獲立行正法一面具摺奏聞將此傳諭高晉嵩椿知之○以大理寺少卿孫士毅為廣西布政使○旌表守正捐軀直隸元氏縣民李儒丹

妻何氏是日御舟駐蹕馮家口水營○丙辰以平定兩金川遣官告祭

先師孔子○諭昨日吏部議官犯秦廷基在省寓自縊一案將規避處分之布政使蘇爾德革任一本進呈已照擬行矣此案情節實為從來所未有秦廷基雖問擬斬候其罪尚不至予勾何以一聞吳虎炳催令起解遽即投縲殞命且該犯既已問擬定罪自應照例收監派員押解何以任聽安住省寓熊學鵬

聖錄卷五十七

三五

素常謹慎小心朕方嫌其過於瑣屑苛求乃於此案獨違例寬縱非有心袒徇而何業經降旨將熊學鵬革職發往川省辦理軍需奏銷並責令賠補無著之項以重示懲儆至如黃邦寧以道員署理臬司未久若將秦廷基在寓自縊情節據實稟首雖有應得處分實不若徇縱之熊學鵬為重乃移屍入獄捏詞誑報出於情理之外豈非自取罪戾乎至蘇爾德身任布政使同在省城不但護理撫篆

幾及一月。咎無可逭。且審結此案時。秦廷基未經收禁。蘇爾德斷無不知之理。何竟置若罔聞。不早為秉公舉發。是以即將伊革任。不復從寬者。以此看來。外省官官相護之習。實尚未能盡行湔滌。所關吏治不小。各省督撫司道。俱當倍加警惕。有則改之。無則加勉。勿負朕諄切告誡之意。將此再行通諭知之。○諭軍機大臣等。陳輝祖奏。緝拏萬安縣巡檢丁楚江一案。據稱丁楚江原住麻城縣北城內。先年盡變已產。捐納吏目。分發江西。嗣丁憂服闋。又借變伊弟丁楚澧產業作費。赴任得缺。復將伊妻子。及丁楚澧夫婦。接往任所。其在家之弟兄親族。數年未通音問。實不知在逃情事等語。丁楚江始則變產捐官。嗣又借變弟產作費赴補。其人本非恬淡可知。豈肯無故棄官。託言高尚。若云病迷潛出。則又留稟繳印。明言削髮為僧。其中必有情虛畏罪之事。恐該縣揭叅。故爾潛逸不返。亦未可

實錄卷一百零七

五

知海成自應從此詳悉訪究。得其底裏。至丁楚江曾任職官。且有弓兵練達隨行。即或匿跡緇流。較之尋常逸犯。尚易於物色。今楚省本籍既查無蹤跡。其人似未必遠颺。不過在江西境內。潛匿山僻菴寺。而地方官不肯實力稽查。遂至久緝未獲。實屬不成事體。著海成即派委妥幹員。弁嚴行緝拏。毋任稽延漏網。將此由五百里傳諭海成。實力妥辦。即速覆奏。再丁楚江雖本籍本家。查無下落。或在附近山林幽僻之所。潛往藏匿。不可不一例訪緝。著陳輝祖飭屬嚴密偵捕。毋得視為具文。將此并諭陳輝祖知之。○以原任廣東巡撫德保署吏部侍郎。○旌表守正捐軀安徽靈璧縣民張某妻馬氏。○是日。御舟駐蹕花園莊水營。

實錄卷一百零七

五

大清高宗法天隆運至誠先覺體元立極敷文
奮武孝慈神聖純皇帝實錄卷之一千六

實錄卷一千六

天

大清高宗法天隆運至誠先覺體元立極敷文
奮武孝慈神聖純皇帝實錄卷之一千七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲副都統世襲騎都尉軍功七級隨帶加一級尋常加二級軍功紀錄一次臣等謹

將總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功九級隨帶加二級入加二級臣等謹將內大臣戶部尚書錄監旗滿洲副都統軍功紀錄五次

尋常紀錄十四次臣等謹將經筵講官太子少保工部尚書紀錄六次臣等謹將

欽修

乾隆四十一年丙申四月丁巳

實錄卷二十七

上詣

皇太后御舟問安○是日御舟駐蹕司馬莊水

營○戊午

孝端文皇后忌辰遣官祭

昭陵○諭曰阿桂奏據押解富德之員外郎開

泰稟報該員解送富德進京沿途有人指稱

富德前站需索滋事等語富德係有罪之人

業經革職令其解京審訊自應派委妥員沿

途小心管押乃僅令向隨富德辦事之員外

郎開泰伴送并任聽攜帶家人照常行走毫無防範致使在路滋事殊屬非是阿桂於此一節未免避嫌過甚豐昇額何竟置之不管現已另行傳旨飭諭至袁守伺以軍機大臣專差前往審辦此事且伊並非不曉事之人結案時即應將伊所帶之刑部漢司員並令文綬派委滿員將富德押解其家人亦當隔別管押方為正理何率意錯謬若此袁守伺著交部嚴加議處○諭軍機大臣等本日阿

實錄卷一十七

二

桂奏到摺內有成都縣為富德豫備應需夫馬及隨從官員分例廣元縣亦豫備馬七十餘匹夫一百五十名並公館二座等語無論富德係有罪之人業經革職理應派員解京審訊何得任其攜帶多人沿途應付如許夫馬并為豫備公館即將軍凱旋亦不應如此也地方官因何如此辦理將來又作何開銷文綬豈竟毫無見聞著傳諭文綬即速查明據實覆奏至其經過之陝西等省未經隆安

傳旨拏問以前富德到站時是否照川省一例應付並著各該撫一併查明覆奏○又諭據阿桂奏聞富德前在南路因所用賞需太多懇求糧員代為幫補墊還各糧員共湊給富德銀一千兩其後並未交出不知作何下落若諭詢桂林即可得其實在或竟傳諭李世傑飭其詳悉回奏伊係大員諒亦不敢掩飾等語富德侵蝕賞需扣剋平色及誣告阿桂謀反之語其應得重罪甚多不待此一節

實錄卷一十七

三

方可定罪且俟解到時逐一審訊無難令其水落石出若傳諭桂林李世傑查辦各糧員等知有與受同罪之例豈肯自行承認即或據實查出而拖累多人又將作何辦理川省軍務甫竣一切宜從鎮靜此事竟可無庸查辦且往返稽查多需時日及至覆到富德一案早應審明定罪川省更不必多此一查也將此由五百里傳諭阿桂知之○又諭曰阿桂奏據押解富德之員外郎開泰稟報富德

在途仍不安靜等語。富德係阿桂等審實。革職解京之人。即未奉到拏問之旨。亦不應仍聽其照常行走。毫無防範。且開泰係富德保舉之人。令其解送富德。尤屬非是。袁守侗已交部嚴議。豐昇額亦係派審之人。更不應糊塗至此。著傳旨嚴行申飭。再開泰係曾經富德保舉之人。當時不知如何趨承迎合。今見富德犯罪。即具稟傾陷。亦屬敗類。且本係富德案内之人。著一併拏解來京。○是日。御舟

實錄卷二十七

四

駐蹕楊家園水營。○已未。以鑲黃旗蒙古副都統弘嵩正紅旗蒙古副都統珠爾格德對調。○是日。御舟駐蹕湖洋莊水營。○庚申。

上詣

皇太后行宮問安。○諭朕因平定兩金川集勲奏凱恭奉

皇太后安輿巡幸山東告功

闕里。茲迴程駐蹕天津。長蘆商衆祇候迎鑒。懽欣踴躍。具見悃誠。用宜優恤。特加俾霑慶

澤。著加恩將長蘆商人本年應完乾隆四十

年分引課銀四十九萬八千五百餘兩及未

完前年借項銀四十三萬二千兩。自本年奏

銷後起限分作八年帶徵。俾商力益資饒裕。

該部即遵諭行。○又諭此次隨駕之文武大

臣內。回京後有應即隨往熱河者。在京為日

無幾。其本任印務不必接管。即著原經派署

之員照舊管理。啟鑾時無庸另行奏派。○予

故戶部尚書王際華祭葬如例。諡文莊。○是

實錄卷二十七

五

日。駐蹕柳墅行宮。至壬戌皆如之。○辛酉。諭

曰。鐘音奏臺灣府諸羅縣知縣李倭現年五

十五歲。尚無子嗣。呈請攜眷赴臺。查與定例

相符。應請准其攜帶等語。臺灣文職官員知

縣以上。年過四十無子者。方准攜眷前往。此

例未知始自何時。殊可不必。該處雖遠隔重

洋。自設立府縣以來。地方寧謐。與閩省內地

無異。且各員攜眷赴任。不致內顧分心。於辦

公亦甚有益。方今中外一家。更不必過存畛

域之見。即如伊犁等處距邊萬餘里。其駐守之將軍等官。俱准其攜帶家眷。何獨於臺灣為禁制乎。王道本乎人情。舊例尚未為允協。嗣後臺灣文武各官。無論年歲若干。有無子嗣。如有願帶眷口者。俱准其攜帶。其不願帶者。亦聽其便。著為令。○諭軍機大臣等。前據杭州將軍額爾德蒙額等奏。有發往杭州充當苦差之回犯薩蓋。於本年三月初五日。在遣脫逃。當經傳諭該省。及各省督撫。飭拏務獲。即奏聞於該處正法。迄今一月有餘。未據各省奏報拏獲。回人脫逃。自必仍歸其故土。甘肅哈密等處。皆所必經。已另降清字諭旨。令該將軍及駐劄大臣等。上緊緝拏矣。自杭州至甘肅。經過內地省分甚多。何竟無一處盤詰。聽其安行無阻。況回人面目形狀。與常人迥別。沿途最易物色。何以各省漫無稽查。經久未獲。又如山東逆匪王倫案內。歸太。劉煥二要犯。嚴緝已將兩載。亦無蹤跡。可見各

省督撫。全不以事為事。所謂編查保甲。亦不過奉行具文。如果實力挨查。則此等逸犯。從何潛竄。即此可知。外省辦事之毫無實際矣。著再傳諭各督撫。嚴飭地方官。並派委妥員。將應拏之回犯薩蓋。嚴飭務獲。仍遵前旨。一面審明正法。一面奏聞。其山東逆案內之歸太。劉煥。並當一體嚴緝。毋任漏網。將此遇各督撫奏事之便。傳諭知之。○壬戌。以平定兩金川。遣官告祭。

永陵

福陵

昭陵。○諭朕因平定兩金川。告成。

闕里。回鑾舉行郊勞盛典。蹕途經過津門。直隸及各省士子。祇迎道左。并頌抒誠。進獻詩賦者甚多。因照此次在山東召試之例。就其文義。量加甄錄。所有列在一等之進士舉人。邱桂山。祝瑩。洪榜。戴衢亨。關槐。俱著以內閣中書補用。萬年。方起。華。張曾太。俱著賞給舉

人其列在二等之舉人貢監生員周光裕陸滋李蔚觀王奉曾郭緯鑒葉汝蘭薛蓉張元楷張景運王績著黃繼光周贊錢敬熙黃驛吳蔚光蔣傳馨周嘉猷王丕烈黃景仁邱桂芬俱著賞緞二疋以示慶惠士林之至意諭軍機大臣等戶部議覆海成籌辦滇銅一摺已依議行矣江西寶昌錢局前因專用洋銅價值過昂酌用大興廠銅酌鑄原期均勻牽算本息無虧嗣因該省積銅甚多戶部議令數年之後即行購辦以期接濟自應遵照辦理何以直至滇銅配用將竣始議採辦是該撫辦理此事實屬遲緩其因何不早籌辦緣由著海成即行查明據實明白回奏○禮部奏請入宴紫光閣大臣得旨大學士等至倉場侍郎俱著入宴內閣學士不必入宴○四川總督文綬奏川省各路臺站次第裁撤後仍有往來運送差使須另為經久之計查通藏站路向由打箭鑪飭明正土司雇撥蠻

實錄卷二十七

八

夫烏拉給與腳價運送其經由裏塘巴塘等地方該土司亦一體雇辦接遞今西路由桃關出口經瓦寺鄂克什境中路由雅州出口經木坪境北路由雜谷出口經拔磨境均應飭照藏例令該土司頭人雇撥蠻夫烏拉應用其由孟固至噶喇依勒烏圍等處即於雜谷移往屯戶及安插種地降番內就地酌撥一體給與腳價以資運送從之○又奏汶川縣桃關地方為西路出口要道距縣城四十里遇有緊急邊務鞭長莫及查保縣縣丞可以移駐桃關請改為汶川縣縣丞并派千把一員帶兵三十名長駐該汛得旨如所議行該部知道○又奏請酌定成都將軍統轄事宜查松茂建昌二道松潘建昌二鎮阜和一協及所屬管理土司者均聽將軍統轄事關番情者均與總督提督一體商辦各屬舉劾亦一體考驗得旨如所議行該部知道○癸亥

實錄卷二十七

七

上詣

皇太后御舟問安。○諭朕於五月十三日恭奉皇太后安輿幸避暑山莊著派顯親王裕親王大學士舒赫德協辦大學士尚書公阿桂留京辦事。所有吏兵二部應行引見官員文職知縣以上武職守備以上著於未啟鑾往木蘭之前每月彙齊派該堂官一員輪流帶赴熱河引見其文員內佐雜等官武員內八旗護軍校驍騎校及外省送到之補放水手官

實錄卷一〇七

十

驍騎校並年滿千總等官弁仍著王大臣照例驗放至八月以後月選等官亦照向例辦理其外省督撫提鎮等官奏摺朕駐蹕熱河時著齋摺人赴熱河投遞至進哨以後著兵部選派司員二人住於哨門外經管臺站各省齋摺人赴哨門外即交兵部司員接收按日由臺馳送行在批覽發回後仍由該司員付各齋摺人領回該部通行傳諭知之○諭軍機大臣等逆酋索諾木之妻得爾日章現

經議給功臣家為奴但念伊係布拉克底土司之女著交刑部永遠監禁○兵部等部議覆烏魯木齊都統索諾木策凌等疏稱瑪納斯原有新舊二屯請改設副將作為協標左右二營築城二座其副將一員即由西鳳協移駐至每營應設各員都司移西鳳協中軍沙州協右營各一守備移畧陽營興武營各一千總移洮岷營西鳳營各一并添設蒙古千總各一把總移延綏鎮屬之歸德堡固原鎮屬之鎮遠汛慶陽營西固營各一經制外委每營六額外外委每營八俱在烏魯木齊瑪納斯屯兵內揀選添設馬步兵一千名在各營內馬步各半均勻攤派其移駐之屯兵二千名於本年次年秋令分為兩撥其官兵應支俸餉馬乾等項照烏魯木齊提標科則支給俱應如該都統所請惟應設蒙古千總二缺及經制額外外委等缺應仍在內地撥往未便准其添設從之○豁免江蘇山陽縣

實錄卷一〇七

十一

乾隆三十九年被淹存倉米穀九千三百六十石有奇。○是日御舟駐蹕南倉水營。甲子。以左都御史阿思哈為漕運總督。理藩院尚書素爾訥為左都御史。庫掄辦事大臣索琳為理藩院尚書。仍留庫掄辦事。戶部尚書豐昇額兼署理藩院尚書。○是日御舟駐蹕寶稼營水營。○乙丑。

上詣

皇太后行宮問安。恭送

皇太后安輿還京師。○豁免遭風漂沒之江西南昌前幫旗丁馮益漕米一千一百三十五石。鉛山幫旗丁拱吉顯漕米一千一百三十五石。安福幫旗丁韓端正漕米一千一百三十四石。各有奇。○以故廣西慶遠府東蘭土州同韋振馨子永鎮襲職。○旌表守正捐軀河南太康縣民張增瑞妻王氏。○是日駐蹕桐柏村行宮。○丙寅。獻金川俘馘於廟。

社兵部率解俘將校押俘首索諾木莎羅奔岡達克索諾木彭楚克甲爾瓦沃雜爾逆目山塔爾薩木坦布籠普占巴雅瑪朋阿庫魯並逆酋僧格桑馘函由長安右門入。進天安右門至。

太廟街門外。嚮北立。候告祭大臣至。押俘嚮北跪。置僧格桑馘函於地。告祭大臣進太廟。行禮畢。兵部率解俘將校押俘至

社稷街門外。押俘仍嚮北跪。告祭行禮如前儀。

○諭軍機大臣等。本日據弘昫等奏覆屯婦郭孫氏前在錦州。曾入邪教。並剝手化緣一案。已批交該部議奏矣。至摺內稱拜發奏摺。即於是日起程回省。立言殊未允當。奉天陪都重地。歷來稱為盛京。非各省可比。弘昫等諒所知悉。摺內自應稱回盛京。方為得體。雖俗語有東三省之說。統言之尚屬無礙。乃竟稱京為省。則斷乎不可。即如順天府尹近在京城。遇有奏摺。亦只可稱為京師。或稱為京

城豈能因係府尹所在亦稱京城為省乎。弘
昫等何不知檢點若此俱著傳旨申飭。○又
諭今日據圖思德由驛遞到四百里奏函朕
初意以為或係邊地要務及拆函披閱乃係
巡閱營伍順道辦理凱旋兵丁事宜并景海
整欠夷役出境日期此等俱屬尋常事件即
覆奏曉諭刁維屏一摺係奏聞業已遵旨辦
理並無緊要應辦之處自應專差齎奏何以
擅行由驛馳遞圖思德殊不知事體輕重至
所稱一面提出刁維屏等宣示恩旨一面飛
檄該鎮道府等曉示夷眾如刁紹文聞信投
回即解赴省城一例辦理等語更不曉事刁
維屏兄弟前此投回內地不過希冀仍為土
司管事今既將刁維屏解至省城拘禁且將
辦理原委曉諭夷眾刁紹文聞之必不肯復
行來投此事理之顯而易見者圖思德何竟
見不到此耶圖思德著傳旨申飭○是日駐
蹕新衙門行宮○丁卯諭朕今日旋蹕黃新

莊在京王公大臣等迎駕站班少頃欲行召
見則俱早經退散朕巡幸東省諸王公大臣
在京安閒已兩月有餘今日既出京迎駕即
應詣宮門進遞膳牌且此內朕尚有欲行召
見之人即自擬非召見所及者亦應在宮門
祇候何伊等意圖安適各自散回寓所竟不
能少待有是理乎如怡親王弘曉淳郡王永
璟在諸王中行輩較尊年亦最長果郡王永
璫恒郡王永皓和郡王綿脩皆係內廷行走
王子而公弘勳亦曾在乾清門行走今仍係
散秩大臣何全不知禮若此著將伊等交宗
人府議處其餘王公俱不必交議至程景伊
係協辦大學士永貴係吏部尚書為九卿領
袖伊二人既散眾人遂尤而效之其咎更無
可諉程景伊永貴俱著交都察院議處其餘
俱不足深責無庸交議又諭向來外省遇
有欽差大臣官員因公過往地方官為之豫
備公館亦勢所不免至於公館之外不應復

有繁費。即如此次將軍等凱旋過境較別項差使自屬緊要一切或稍加周到然凱旋非事所常有其餘則不當援以為例且聞各驛站每有長隨胥役等代辦向其本官任意開銷甚至借端科派需索累及閭閻流弊滋甚即如富德係有罪解京之人經過地方止須派員幫同押送出境乃尚有照常為之備辦公館夫馬者尤屬不成事體已諭令該督等查辦矣。看來外省應酬風氣未能革除於吏治甚有關係地方官豈肯費其養廉不過仍出之民間不可不力為飭禁著各省督撫實力稽查嗣後驛站官員應付差使如有違例逢迎稍涉糜費及長隨胥役藉差派累者即行嚴叅重究督撫等或意存袒徇經科道叅奏或朕別有訪聞惟該督撫是問將此通諭知之。又諭曰周元理勒爾謹巴延三段秀林及孔照煥並其子孔憲培俱著隨同在京王公大臣入紫光閣宴。是日。

平定錄卷二十七

一六

上駐蹕黃新莊定西將軍阿桂副將軍豐昇額等振旅凱旋詣

行在請安。賜將軍以下至官兵等食。戊辰

上自行宮啟鑾幸良鄉城南行郊勞禮正南為

壇壇上左右列轟

上龍袍袂服騎駕鹵簿導行將至壇軍士鳴螺

繞歌樂作將軍副將軍暨叅贊領隊侍衛官

兵戎服跪迎

上登壇拜

平定錄卷二十七

一七

天自將軍以下及在京王公大臣皆隨行禮

上御黃幄將軍副將軍等率眾三跪九叩候旨

行抱見禮賜坐慰勞賜茶禮部堂官奏禮成

馬上凱歌樂作還行宮賜將軍叅贊隨征將

士等宴王公大臣咸與賜將軍阿桂副將軍

豐昇額叅贊大臣海蘭察額森特領隊大臣

奎林和隆武福康安普爾普御用鞍馬各一

扈蹕至行宮賜成都將軍明亮御用鞍馬一

於其家

上迴蹕京師。詰

皇太后宮問安。○諭禮部所奏二十八日受俘儀注。將軍等應入於百官班內。在午門前行禮。但將軍等於郊勞及凱宴兩次。俱有行禮之處。受俘時。將軍及自軍營回京之在御前乾清門行走者。俱著扈從登午門樓。不必入班行禮。止須令福康安帶領押俘將校等在午門前行禮。○命藏將軍阿桂等所用得勝靈纛九桿於紫光閣武成殿。○豁除江蘇桃

平定卷一十七

源縣乾隆四十年被水衝沒地一百二十三頃十八畝額賦有差。○己巳行受俘禮。侍郎福康安率押俘將校。以俘酋索諾木。莎羅奔。岡達克。索諾木。彭楚克。甲爾瓦。沃雜爾。山塔爾。薩木坦。布籠普。占巴雅瑪。朋阿庫魯等。并逆酋僧格桑。馘函。豫埃於午門外。饒歌大樂。金鼓全作。

上龍袍袞服。御午門樓。王公百官朝服侍班。侍郎福康安率押俘將校。三跪九叩。押逆酋索

諾木等。北嚮跪伏。置僧格桑。馘函於地。兵部堂官跪奏。平定兩金川。生擒逆酋索諾木等。並獲逆酋僧格桑首級。謹獻闕下。命交刑部。刑部堂官跪領旨。押俘自天安門出。王公百官行慶賀禮。禮成。○

上御瀛臺。親鞫俘囚索諾木等罪狀。命刑部將索諾木。莎羅奔。岡達克。索諾木。彭楚克。甲爾瓦。沃雜爾。山塔爾。薩木坦。皆寸磔。梟索諾木等。併懸僧格桑首於市。○

平定卷一十八

上御紫光閣。行飲至禮。賜將軍阿桂。副將軍豐昇額等。卮酒。成功將士。並王公大臣咸入宴。奏凱宴樂。各番人以次歌舞。退。賜將軍至隨征將士銀幣有差。○

上親製平定兩金川告成太學之碑。命勒石大成殿。階前。文曰。太上立德。其次立功。又其次為立言。而德與功。皆賴言以傳。言之無文。行而不遠。文之時義大矣哉。然傳德之辭。直而寡。傳功之辭。費而多。直而寡者。不因文而

德自見。二典三謨。經世立教是也。費而多者。必因文而功。乃明周誥殷盤。佶屈聱牙是也。吾嘗讀韓昌黎平淮西碑。益悉此言之不與。何則。彼其藩鎮。乃家奴之類。愆愆因循。以致宛成敵國。削而平之。是宜引以為愧。而不可炫。以為功。賴昌黎之文。幾與江漢常武同稱者定。然有識者。固知其辭費而多飾。而未知憲宗之愧與弗愧耳。今之平定兩金川之文。不有類於斯乎。解之者曰。逆酋羈縻徼外。非

平定卷十七

下

若淮蔡之居中土。元濟之為世臣也。吾則以為既已受職為土司。則是我臣。而其地近接成都。遠連衛藏。則是我土。我土我臣。而橫生逆志。蠶食鄰封。將欲大有所為。弗勒而滅之。則西川將不能安枕。茲雖歲事。與平定淮蔡擒吳元濟。何以異。故宜引以為愧。而不可炫。以為功者。以此。金川之始。見於己巳告功之文。茲不複記。記其復叛而復征。則其陰謀負恩。已自戊寅年始。蓋戊辰之師。實緣其跳梁

不靖。而師既臨境。彼即窮蹙乞降。遂以赦罪。頒師甫十年。而其酋郎卡即與革布什咱構釁。又四年。遂與緯斯甲布及三雜谷為敵。而逆子索諾木兇悖益甚。自恃地廣人衆。力強與各土司構兵。訖無寧歲。故各土司皆畏之如虎。而以勢分力散。又莫能如之何。余以為業已受其降。不宜復加兵。且蟻鬬蠻觸。不足以勞王師。因命地方文武大吏。隨宜彈壓。令弗越內地界。亦足以安民而示度耳。不虞地方大吏。欲息事而每示寬。逆酋轉以為無足懼。而日益逞。其小金川逆酋僧格桑者。始則與索諾木水火相仇。繼乃狼狽為奸。於是索諾木計殺革布什咱土司色楞敦多布。取其印勅以歸。而僧格桑亦侵占鄂克什地界。且發兵圍其土司色達拉之官寨。期於必取。總督阿爾泰提督董天弼。知事不可掩。乃有發兵之請。是役也。或咎阿爾泰依韋誤事之過。而余則以為阿爾泰之過。皆余之過。蓋金川

平定卷一十七

下

因其地險衆悍久蓄異志是以有殺至維州
橋之謠則其不忘內地情率可知戊辰之役
我師深入屢勝即不宜赦其罪而受其降此
一誤也甫十年而郎卡偕恩作亂以及逆子
踵其蹟皆不即發兵問罪惟令地方大吏隨
宜處置又屢誤也以至尾大不掉終於興師
故予不咎人之議為窮兵黷武而轉咎已之
類於姑息養奸蓋中國之制外域張撻伐則
彼畏而斂跡主和好則彼輕而生心漢唐宋
明之覆轍率可鑒也若謂予窮兵黷武則予
賴

實錄卷一十七

三三

天恩平伊犁定回部拓疆二萬餘里豈其尚不
知止足而欲滅叢爾之金川以為揚赫濯紀
勲烈之圖哉雖然平伊犁定回部其事大矣
然費帑不及三千萬成功不過五年茲兩金
川小寇地不逾五百里人不滿三萬衆而費
帑至七千萬成功亦遲至五年則以跬步皆
險番奴効命死守故得延至今日而我將軍

阿桂立志堅定決機明敏兩副將軍及叅贊
領隊諸臣同心合力各軍士敵愾奮勇凡經
大小數百餘戰而後成功視平伊犁定回部
費力轉不啻倍蓰設非

天恩助順衆志成城則金川未易言滅而國威
或致少損矣是不可以不記觀斯文者尚諒
予懷慙悔過之不暇知非稱功誦德而為言
其庶幾乎繫之以辭用誌始末云爾小金首
禍曰僧格桑兵救鄂什竟抗顏行督臣提臣

實錄卷一十七

三三

每事遷就知弗勝任將軍別授攻破巴朗直
取達圍進抵資哩數月克之兩路夾擊遂得
美諾鼠竄狼奔金川助惡既平懣拉遂討促
浸雪多境險奏功以沈奏功以沈賊更遮都
綠營怯懦遇戰辟易兵既無能將復失算豈
如南路全師而返重調勁旅吉林索倫健銳
火器其心忠純仍分兩路堂堂正正不旬日
間美諾重定谷噶既入馬尼並克恭養旗兵
允得其力驪三路進一阻宜喜及彼絨布遇

險而止阿桂西路則屢建功羅博湖普達遜克宗喇穆山梁日則了口舉默格爾以擾其後明亮宜喜亦據嶺梁而復難進徒然望洋逮昨乙未畧康薩爾木思工噶賊碉並毀明亮河西亦有所據日旁以前五十里路夾河兩軍聲息可通並清後路遜克爾宗舊則大海昆色拉枯層層破要步步披嶇遂克勒圍紅旗飛遞而何四月大捷未至既克西里廼若建瓴科布索隆不日而傾雍中舍齊易如

平定縣志卷二十一

三

拉朽密圍噶依賊其奚走是時河西明亮亦入富德馬邦傳檄芥拾設非西路圍噶喇依則其兩路亦無進期諸軍既合火攻周遭雖據三穴訖其奚逃然猶死守四十餘日計窮力竭乞命而出金川之功阿桂居首特恩異數加之宜厚能出能入有權有經運長擊短後實先聲金川之功允資羣力寸步層峯氷滑石仄將軍指揮無不奮勇以此破敵鹿埕隴種金川之功非予所期事弗可已久而得

之闕猶獸困捨懲雞肋念我衆勞至今心惻金川之功允賴

上蒼靖彼蕃徼我武惟揚勒碑太學用遵成例靜言思之文以誌愧又平定金川勒銘美諾之碑文曰首禍者必有奇禍之遭偕德者必有凶德之報蓋僭拉之首禍實由促浸之教而促浸之偕德亦因僭拉之肇故戊辰之役以救僭拉而有促浸之征茲辛卯之師以伐僭拉乃並促浸而掃彼其緩則頡利突利之相猜急則僑如榮如之相保然而地險人強機謀深造則僭拉遠不如促浸故美諾再入而再克雖南有僧格宗北有明郭宗而我師奮力攻取無不立摧堅碉遂據官寨之穴害此固

平定縣志卷二十一

三

弗雪寃沉。兵威大振。勁旅繼至。師分兩路。谷噶馬尼上下同心。據忠敵愾。西路遂進。南路畧泥。了口深入。爰克羅博。喇穆喇穆。併占默格。獲康薩爾。木思工噶。遜克爾宗。其險難託。凡此數處。林立堅碕。層次攻勦。我師實勞。據昆色爾。乃近賊巢。北軍亦至。隔河匪遙。曰勒烏圍。賊舊官寨。垣固碕高。力守要害。經樓輔車。陡礮劃界。木卡石城。蠶簇鱗繪。拏柵周遭。援路截其。泗水拽橋。囊土濟師。穴道旁出。轟以地雷。凡此百計。用盡無遺。四面礮攻。碕摧垣裂。遂督大軍。斫牆衝闌。遊魂弗支。奔迸蹙躡。功成一夕。中秋八月。衆軍之力。一帥之謀。靖彼賊穴。安我蜀陲。肫乎厥忠。卓乎厥猷。銘誌鴻功。永示千秋。又平定金川。勒銘噶喇依之碑。文曰。向不云乎。弗加征而自臣。屬謂之歸順。始逆命而終徠服。謂之歸降。若今索諾木之窮蹙。率弟兄出碕獻印。不但不可謂之歸順。即歸降亦不可得而方。彼其抗命相拒。

歷五年之長。茲已密圍巢穴。火器圍攻。腹心潰內。羽翼失傍。方將剽砦搜穴。利斧其吭。生擒亦易。旦夕滅亡。乃始匍匐請命。又安得比之肉袒牽羊。噶喇依者。蓋其世守官寨。故多深塹高牆。我師萬層險。歷千戰威揚。譬之大木。已盡去其枝葉。則本根亦可待其立殲。然而逆賊有言。官軍若至。當毀其重器。聚族焚而自戕。使果如所云。則雖獻馘歲事。終不如生獲盡美盡善之慶。是蓋兇渠罪大惡極。而且貪生苟延。以致獻俘闕下。明正典刑。於是疆界厥地。屯戍我兵。鎮羣蕃而永靖。樹豐碑以告成功。歲在丙申。仲春日吉時良。諭軍機大臣等。據隆安奏。四月二十日。行至介休。該縣稟稱。有四川省發來六百里公文一角。拆封開看。係署嘉定府湯大寧寄富德安稟等語。覽奏殊為駭異。隆安據實奏聞。所辦尚是。富德係已經革職有罪之人。地方官即不應與之通問。且外省如遇緊要公事。自應由

驛限行里數馳遞今湯大寧以稟候之件乃
竟擅由驛傳且限六百里遞送殊出情理之
外不可不從重查辦以示儆戒著傳諭文綬
即速查明據實奏○庚午以平定兩金川
恭上

皇太后徽號遣官告祭

天

地

太廟

平定卷一十二

三八

大社

大稷○恭上

皇太后奏書

上禮服於中和殿恭閱奏書後

上升輿由右翼門至永康左門降輿大學士捧

奏書由中路前行至慈寧門下

上由東階升至門下東旁立

皇太后禮服升慈寧宮座儀駕全設中和韶樂

作

上詣正中拜位跪大學士捧奏書在左旁跪進
上受奏書恭獻授右旁大學士跪接置正中黃
案上宣讀官捧起跪宣奏書

上九拜禮成奏書曰臣聞德為福基履坤貞而
永固名因實茂符泰運而彌光忻觀昌符虔
誦上禮欽惟

聖母崇慶慈宣康惠敦和裕壽純禧恭懿安祺
皇太后仁敦厚載道契安貞併六幕之鴻熙尊
親並戴介億齡之寶筵慶善兼隆前茲月竈

實錄卷二十七

三七

恢疆吉籙頻申夫祝嘏今日星弧底績捷書

益懋夫臚歡溯五年聚米籌邊每荷

垂詢於長樂正萬里橐弓送喜幸宜歸美於

璇闈凡武功震疊於遐方皆

慈福溥將於闔寓大增兩字重九數而義叶環

生日撰初辰肇午朔而祥開大盛晉徽稱於

寧豫嘉名之遞積彌長揚懿美於升恒頌策之

親摛仍謹攷典故陳夫

冊

寶。抒誠爰率夫冠紳。伏冀

鴻慈。俯俞所請。臣不勝歡忭誠懇之至。謹奏。

是日。

上奉

皇太后幸寧壽宮。侍早膳。

皇太后賜凱旋將軍阿桂。副將軍豐昇額。及有功將校。並軍機大臣等食。賞賚有差。○諭茲因平定金川。恭上

皇太后徽號。令典所載。屆期應御太和殿。閱視

冊

實錄卷一十七

三

寶。隨奉至

慈寧宮躬進。併宣表行慶賀禮。昨奉

皇太后懿旨。是日儀典繁重。皇帝春秋已越六旬。若拜跪太久。予心憐之。止須將冊寶豫陳殿中。至時。皇帝率王公大臣行禮。即表文亦毋庸宣讀。欽此。仰見

聖母慈愛備至。

體恤周詳。但自念精力尚健。拜跪不覺過勞。因

奏

聖母云。恪遵

溫諭。酌省恭閱

冊

寶一節。以副

慈懷。其餘仍循儀典。以展尊敬之忱。至恭慶聖母九旬萬壽。當悉遵此次

恩訓而行。仰邀

俞允。洪惟

實錄卷一十七

三

萱庭集福。承

慶方長。體

懿慈。更足以申愛慕。著內閣禮部存記於辛丑

恭逢

萬壽慶典。加上

徽號。敬謹遵照。具儀以聞。○諭據裴宗錫奏該

省畢節縣。係運鉛總路。向遇人夫不敷。即於

鄰境撥雇協濟。按程給價。詎黔西州知州譚

秀儕。妄分畛域。始則推託遷延。繼復稟稱該

州里民願各湊銀幫貼。旋據州民張登鳳等具呈上控。與該牧所稟先後如出一口。并訪有已革鄉約徐純一。訟棍何瑞溥等串同里民。斂錢包訟。是譚秀儕有心取巧誤公。顯有暗中主持情弊。請旨革審。拘提案犯。逐一清查。分別辦理等語。譚秀儕著革職。交與該撫提齊案犯。嚴審究擬具奏。○是日。逆目布籠普占巴雅瑪朋阿庫魯及情重番犯。俱斬於市。○是月。江南河道總督薩載奏遵旨赴山

實錄卷一十七

三

安查勘黃河海口淤沙。詢之土人。據云從前海口。原在王家港。雍正年間。兩岸接生淤灘。至今日見淤墊。現長四十餘里。南岸遂有新淤。尖頭洋之名。北岸有二泓三泓四泓之名。就目下形勢而論。河底既有高仰。河唇又復漸遠。此即沙淤明證。但潮汐來往。人力難施。臣查現在口門。出水四五尺不等。勢尚湍急。將來黃水加長。出水亦必加多。雖不能暢流歸海。似亦不致阻滯。倘有應行籌辦之處。

容同督臣高晉會商具奏。得旨。此係海口自然之勢。似難以人力勝之。爾等再詳酌可也。

○署湖廣總督湖北巡撫陳輝祖奏。修補軍械。資用公糧。歷年不敷。營用。臣曾通酌繁簡。更定二戰一守。及戰守各半。扣存備用。定冊報部。南省各營。已大半積有餘費。北省本多守糧。更有全無戰糧者。甫經調劑。尚無積餘。查南省火藥。例止儲備三年。北省則加買一年。未免繁費。請以本年為始。除荊州駐防及

實錄卷一十七

三

武昌省城宜昌鎮標中營。仍照往例加貯。其餘營分。與南省一例停減。俾節出公糧。又可湊修裝械。從之。○烏魯木齊都統索諾木策凌。署陝甘總督畢沅會奏。瑪納斯屯兵。經索諾木策凌奏准。改駐眷兵。并移駐內地副將等官。查此項衙署兵房。急須建造。現與畢沅劄商。飛檄巴里坤鎮。在沙州等營。挑選堪任工作兵一千。并選幹練千把等官管領。即日前往。以資興作。報聞。○四川總督文綬奏前

因進勦金川。招募新兵。以資戰守。今當凱旋。除傷亡頂補外。尚有二千餘名。自應分別酌辦。請將屢經攻戰者。除情願歸農。遣回編戶。其餘留營。暫給守糧。遇缺儘補。至在後路防守。挑驗勇健者。一體暫給守糧。其餘裁汰。仍將額兵內。技力平常者。秉公革退。以便新兵頂補。統於一月內補完。得旨。著照所請行。該部知道。○貴州巡撫裴宗錫奏。黔省向照夏收冊報。詳糶開倉。多在五六月間。並非青黃不接之時。近年開糶。每致無人赴糶。民既食貴於先。倉復陳因於後。請嗣後照各省通例。於青黃不接時開糶。從之。

實錄卷二十七

雷

大清高宗法天隆運至誠先覺體元立極敷文奮武孝慈神聖純皇帝實錄卷之一千七

實錄卷二十七

五

大清高宗法天隆運至誠先覺體元立極敷文奮武孝慈神聖純皇帝實錄卷之一千八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務稽察滿洲副都統世襲騎都尉軍功加七級隨帶加一級尋常加二級軍功紀錄一次臣慶桂

總管官經筵講官太子太傅文學殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級臣董誥內大臣戶部尚書兼藍旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十一年丙申五月辛未朔恭上

實錄卷一千八百一

冊 皇太后徽號禮部恭奉

冊

寶奉安綵亭上由右翼門至永康左門

上禮服至永康左門降輿行至慈寧門外東旁

立

冊

寶設正中黃案上

皇太后禮服升慈寧宮座儀駕全設中和韶樂

作

上詣正中拜位跪左旁大學士捧

冊

寶依次跪進

上受恭獻授右旁大學士跪接置正中黃案上

宣冊官宣寶官跪宣

冊

寶訖

上九拜禮成

冊文曰

實錄卷一千八百一

堯門啟瑞樞光昭著定之模

如幄基祥帡蔭衍昇平之慶頌孚海宇忭集臣

鄰欽惟

聖母崇慶慈宣康惠敦和裕壽純禧恭懿安祺

皇太后陛下

聖裕徽音

福徵厚德

尊親並戴合萬國以臚歡

名壽兼隆臻

億齡而履順。茲值金川之底績。爰陳

瑤牒以告勲。溯彼蠻觸構爭。始猶寬其齋斧。繼

乃驅狼肆抗。終難遁其威弧。揚兩路之先聲。

兵非得已。簡八旗之勁旅。勇且知方。越險推

堅。不啻功成百戰。擣巢翻窟。於斯事歲五年。

予小子籌筆辛勤。每厯

慈詢之

垂念。師武臣劇旌勞勲。克馳捷奏。以慰

懷兵銷騰日月之光。升恒祝

實錄卷一十八

三

嘏樂作叶韶箴之盛。美善歸

親宜晉

鴻稱。用崇

燕喜。精璆聯珏。稽朝家隆重之儀。

嘉璽琬珍。抒中外喁于之願。謹告

天

地

宗廟

社稷。率諸王貝勒文武羣臣。恭奉

冊

寶上

徽號曰

崇慶慈宣康惠敦和裕壽純禧恭懿安祺寧豫

皇太后。顒捧

芝函。虔申葵悃。繹箕疇之來備。是曰

康寧。演義畫之利行。實惟

豫順。

懿美式彰。夫蒼錄。

實錄卷一十八

四

蕃釐允迓乎琅編。伏願

道契安貞。

性彌愷樂。闡

昌符於金石。寶琰恒新。熙

洪號於垓埏。羅圖益煥。常來王而常來享。共球

同紀殷篇。莫不興而莫不增。川岳長賡。周雅

臣誠懽誠忭。稽首頓首。謹言。

上御太和殿。諸王貝勒貝子公文武官員。進表

慶賀如儀。以加上

崇慶慈宣康惠敦和裕壽純禧恭懿安祺寧豫
皇太后徽號禮成。頒詔天下。詔曰。朕懋膺

景命。寅紹丕基。殫夙夜以勤求。準仁義而並用。

惟期遐邇向化。海宇乂安。益臻熙洽之隆。長

享昇平之福。茲當殄靖蕃落。掃蕩蠻氛。定一

勞永逸之模。際偃武敷文之會。鴻勲既集。慶

典宜申。兩金川者。錯居蜀徼。久隸土司。毒實

等於虺蛇。惡更甚於梟獍。懷以德而不知感。

藏其奸而無所懲。索諾木。則軀又生。羅。僧格。

桑。則蛩還附。屢始猶諒爭其蝸角。尚無庸取

彼鯨鯢。乃敢違約以噬鄰。浸至借恩而拒命。

無可赦。當正其罪。不得已斯加以兵。爰收鄂

什之侵疆。倒懸是解。遂入美諾之深穴。傳檄

而平。允渠竟喙走以潛通。逆豎敢顏行之顯

抗。輒爾逞謀以射影。公然徼覩於僨轅。尤覆

載之所不容。誠神人之所共憤。於是申命元

戎。俾專薄伐。簡八旗之勁旅。分兩路以徂征。

勇勵則所向無前。算勝則有攻必克。梯峻若

實錄卷二十八

五

從天而降。履險或絕地以登。賊衆每悉力以

負隅。我軍屢出奇而扼隘。殲厥徒醜。非竄即

誅。摧乃卡碯。靡堅弗破。勒烏圍。先翻其狡窟。

噶喇依。旋擣其窮巢。諸寨因次第剪除。羣兇

亦駢聯就縛。是役也。帑藏幾費七千餘萬。閭

閭未煩粒粟寸絲。師武臣歷百戰之辛勤。余

一人經五年之籌畫。仰賴

昊蒼昭貺

列祖洪庥。事恒集於因難。幸茲揚武功。克底於

可久。願永洗兵入桃關。而星弧載橐。謁

橋山。而露布適奏。遂乃祇奉

安輦。言舉東巡禮

岱宗而祝

慈禧告

闕里。而宣鴻捷。郊臺循勞還之典。午門行受

俘之儀。紫閣酬庸。第勲績而膺懋賞。

璇闈送喜。歸美善以晉

尊稱。謹告

實錄卷二十八

六

天。

地。

宗廟

社稷於乾隆四十一年五月初一日。率王公文

武羣臣恭捧

冊

寶加上

聖母崇慶慈宣康惠敦和裕壽純禧恭懿安祺

皇太后徽號曰

實錄卷一千八

七

崇慶慈宣康惠敦和裕壽純禧恭懿安祺寧豫

皇太后。

寧常受福符來備於箕疇

豫永延和。叶利行於義。畫用光大禮。特沛覃恩。

所有應行事宜。開列於後。一五嶽四瀆。遣官

致祭。一歷代帝王陵寢。遣官致祭。一嶽鎮海

瀆廟宇。及歷代帝王陵寢。該督撫查勘應修

葺者。動項報銷。一在京文武各員。俱著加一

級。任內有降級處分者。即予抵銷。一承辦軍

需之戶部軍需局。兵部議功所。量予議敘。一

軍營自將軍。叅贊。至將弁等。其勞績懋著者。

所有革職降級留任處分。槩予開復。其無出

衆勞績。而曾經戰陣者。所有降級留任處分。

亦著加恩寬免。一大兵經過地方。辦差官員。

俱屬急公。詎勉著各該督撫查明。咨部議敘。

一大兵所過州縣。除侵盜錢糧及貽誤軍需

外。一切降罰處分。事在五月初一日以前者。

槩從寬免。一川省軍營。前後所調馬步兵丁。

實錄卷一千八

八

借支行裝銀兩。例應於餉銀內分扣還項者。

加恩展限三年。一傷病回營兵丁。不能充伍

者。該管將弁查明本家如有子弟至戚。可以

教練差操。即令頂食名糧。免致失所。一滿兵

跟役脫逃。如無偷竊軍械馬匹等情。著照前

降寬免餘丁諭旨。交部一體覈擬發遣。一臺

站官員。已有旨查明。交部議敘。其驛站夫役

人等。軍興以來。甚屬勞苦。著該督撫加意撫

卹。一在京滿洲蒙古漢軍馬步兵丁。俱著加

恩賞給一月錢糧。一京城巡捕三營兵丁著加恩賞給一月錢糧。一滿洲兵丁披甲隨征効力被傷不能披甲及年老有疾退閒者俱加賞資。一國子監貢監生及各學教習俱免監期一月。一直隸山東軍流以下人犯業因蹕路經由降旨減等發落。其在京刑部及各直省軍流以下人犯並著加恩槩予減等發落。一凡流徒人犯在流徒處所身故其妻子情願回籍者該地方官報明該部准其各回原籍。一各省要路橋梁間有損壞者地方官查勘應修之處詳報督撫奏明修理。一各處養濟院所有鰥寡孤獨及殘廢無告之人有司留心以時養贍毋致失所於戲帡鴻禧於六幕揚徽昭者定之祥。頒鳳詔於十行。會極溥平康之治。布告天下。咸使聞知。○是日

上奉

皇太后居暢春園。○幸圓明園。○壬申。

實錄卷二十八

九

上御勤政殿聽政。○諭曰福德現在途中患病請假調理。藩院侍郎員缺著博清額補授。福德到京時另候諭旨。○刑部奏逆苗索諾木及其兄弟大小頭人等暨各犯家屬二百五十餘人械送至京。歷蒙廷鞫並交臣等分別辦理。除因病身死各名外索諾木係賊酋首犯其兄莎羅奔岡達克索諾木彭楚克甲爾瓦沃雜爾主謀助惡其姑阿青自郎卡殁後一切聽其專主及官兵攻討抵拒肆橫皆其調度。山塔爾薩木坦丹巴沃咱爾雍中旺嘉勒七圖甲噶爾思甲布阿木魯綽窩斯甲俱係用事大頭人都甲喇嘛雍中澤旺堪布喇嘛色納木甲木燦助逆咒詛以上十二犯罪大惡極均經凌遲處死。索諾木之母阿倉頭人尼瑪噶喇克巴阿布頗魯格什納木喀爾結達什色格桑達爾什納木甲達爾什桑卡爾喀什巴拉木布籠普占巴雅瑪朋阿庫魯達什溫布策旺沙巴祖普阿布穆木里撒

實錄卷二十八

上

思丹扎布僧格格布爾章阿杉車斯烏斯達拉等。或黨惡與謀。或領兵抗拒。又斯丹巴。係首逆索諾木之弟。七圖阿申。係逆犯七圖安堵爾之子。阿咱納。係逆犯蒙固阿什咱阿拉之子。以上十九犯。均經處斬。此外番犯及家屬等。永遠監禁者十六名。發往伊犁給厄魯特為奴者五十二名。索倫兵丁為奴者四十五名。三姓為奴者三十四名。賞功臣之家為奴者五十八名。跟役班第喇嘛發往江寧喇

實錄卷一〇〇八

十一

嘛寺安插役使者十五名。通計渠魁首惡。以及逆黨餘孽。或寘之重典。或貸其餘生。悉準情罪之重輕。以彰威德。茲當獻俘事竣。請將先後辦理緣由。宣示中外。報聞。癸酉。孝誠仁皇后忌辰。遣官祭

景陵。

上詣暢春園問

皇太后安。還宮。○以江蘇蘇松糧儲道孔傳

炯為江蘇按察使。是日起。

上以夏至祭地於

方澤。齋戒三日。○甲戌。吏部左侍郎劉秉恬。湖廣總督富勒渾。四川總督文綬。山西巡撫鄂寶。四川提督桂林。浙江布政使郝碩。河南布政使顏希深。布政使銜李湖。會奏臣劉秉恬等。現已先後抵省。會同臣文綬等。將奏銷按照案次。上緊督催。惟每辦一路銷冊。必須將一路站員齊集。方能迅速定案。現分檄各路

實錄卷一千八

十二

將各站員調回。分頭趕辦。查造既屬無難。銷追亦可立判。至軍需支放。雖有口內口外之分。而按款覈銷。必須彙成一貫。臣等現會集省城。若仍遵前旨。各歸各辦。添局既多。糜費覆覈亦恐遲延。請將各路報銷。令各站員造報。由總理覈明。隨案移交報銷局。各司道覆覈後。呈送臣等覈定具題。其有例案參差。應銷應追。臣等各就知聞。覈實酌定。於會辦之中。仍寓分查之意。事理既便。自不稽延。得旨。

好盡心妥速為之。○調正黃旗護軍統領景
燭為鑲黃旗護軍統領。正紅旗護軍統領春
寧為正黃旗護軍統領。以正白旗滿洲副都
統普爾普為正紅旗護軍統領。○乙亥諭吏
部郎中王昶。在軍營出力年久。頗著勤勞。著
加恩陞授鴻臚寺卿。並賞戴花翎。仍在軍機
處司員上行走。○又諭曰。董天弼。前在布朗
郭宗駐守。庸懦貽誤。雖死不足蔽辜。因將伊
子發遣。以示懲戒。今大功已經告成。所有各

實錄卷一千八

十三

項功罪。俱應確覈。念董天弼。初隨征勦時。尚
有出力之處。著加恩將伊現在遣所諸子。俱
放回本籍。其各本身原有前程。仍著給還。至
宋元俊。獲罪本由自取。念其在川年久。亦有
微勞。伊子著一體加恩釋放回籍。復其衣頂。
以示朕肆眚施惠之意。○諭軍機大臣等。據
文綬奏。打箭鑪尚有存米一萬八千餘石。儲
峙甚充。凡西藏一路各臺。應需官弁兵役口
糧。現在足敷支撥。并請查照舊例。量為借給。

明正番民。分限照數易還。稞麥。並將阜和協
應支兵米折色。暫行改支本色一摺。已批該
部議奏矣。及覆加披閱。覺該督所辦。未為妥
協。此等米石。運費甚多。今請借給番民。以青
稞易米。價值貴賤。既屬懸殊。而兵米向例折
色。為數諒屬有限。自不值以重價轉運之米。
漫為散給。該督雖意在出陳易新。且寓體恤
官兵之意。然亦當覈計所給之米。腳價所費。
較之折色。浮多若何。若所差不過十之一二。

實錄卷一千八

十四

尚不妨暫為給發。倘價值相懸幾半。即不便
如此籌辦。致多糜費。著傳諭文綬。另行酌覈
妥議具奏。尋奏。現據明正土司頭人稟稱。番
民借米。任意花銷。催還時。又復拮据。不願領
借。無庸辦理。至阜和協。改支本色之處。價值
相懸幾半。自未便改支。臣悉心另議。查該處
兵丁所需食米。原向內地採辦。目下軍務甫
竣。秋成尚早。請准於存米內借支。以供日食。
俟米價平減。仍照數還倉。其打箭鑪殷實鋪。

戶有願借者亦照此辦理報聞。○又諭曰富德前在軍營多用賞號銀兩朕以軍營官兵凡有奮勉出力者俱覈其功績分別陞拔賞賚各項加恩之處不為不多何以復有賞號名色節經降旨查詢並交部覈辦矣今日據阿桂奏稱賞號一項係沿川省之舊不但將軍叅贊等各賞號備用即總督衙門亦有賞需銀數千兩等語總督養廉豐厚遇有獎賞之事理應於養廉內自行賞給何得復備賞需款項此實相沿陋習亟宜刪除惟新設之成都將軍管轄衆番每有必需賞犒之事而所定養廉較少若再令其自行發賞未免不敷用度自應酌量加添俾無缺乏著傳諭文綬即將該督衙門所有賞需一款永遠裁去其成都將軍每年應添給養廉數千以供實用但不必仍留賞需名色將此由四百里傳諭知之仍將作何酌定之處即行覆奏○又諭據海成奏拏獲在逃之巡檢丁楚江究

審定擬一摺內稱丁楚江實因患病心迷思往廬山遁迹中途風阻輾轉遷延至三月十八日始抵星子縣城外經僧綱司報縣獲解沿途並無不法事端及知情藏匿之人等語所訊供情尚屬不實不盡丁楚江於上年十二月十二日潛逃距就獲時已經三月有餘萬安至星子程途有限豈能久住舟中從未上岸且所攜止有一役若俱匿跡船艙不敢露面則其數月之間日用所需又何人代為照料此理之顯而易見者况正當查緝遁逃之時該犯如停舟逗留日久經過之地又豈全無盤詰聽其躲避至今尤非情理此必岸上別有收留容隱之家該犯懼累他人不肯供吐該撫何以任憑該犯狡詞支飾不加切實嚴究海成平日辦事尚屬認真此次訊供何竟顛預若此著傳旨申飭仍即將該犯詳悉研訊務得實情仍即錄取確供速行覆奏毋再含糊干咎○又諭現在糧艘陸續抵通

其過天津時一切照料催趲俱係該總兵之責。吳掄元甫自天津隨至良鄉。閱時未久。此次巡幸熱河。不必前來接駕。將此傳諭知之。
○丙子夏至祭

地於

方澤

上親詣行禮。○詣暢春園問

皇太后安。○幸圓明園。○丁丑以故奉恩輔國

公旌訥亨子積拉堪襲爵。故奉恩將軍成翰

子敏凱明堯子阿爾吉圖襲職。○戊寅宗人

府都察院奏議處黃新莊接駕王大臣未候

召見退散二摺。諭曰宗人府議處王公等俱

議以罰王公俸二年。而都察院於程景伊永

貴僅議以降二級留任。實屬徇情。程景伊永

貴著改為革職留任。其都察院堂官著交部

議處。○又諭現在川省軍務告竣。文報往來

無須加緊馳遞。所有沿途驛站自應照舊辦

理。其添設之軍臺各站俱著裁撤。○諭軍機

大臣等本日戶部議駁弘昫等奏盛京各城

兵丁隨缺地畝請交地方官按則徵租將所

得租銀折中定價改給米石一摺。所駁甚是。

已依議行矣。各城兵丁賞給隨缺地畝俾其

自為耕種以資養贍。所以體卹兵丁者。至為

周渥。弘昫等乃因其地有遠近。輒欲官為徵

收。按價折米。設或豐歉不齊。採買無資。又將

作何籌辦。該將軍等何未計及於此。至從前

定議時。原令將現在閑空荒甸就近均勻分

撥。何以兵丁等受撥之田悉皆寫遠。是當時

已屬辦理不善。即或因地畝不能就近分撥。

有斷難照辦之勢。當時即應據實奏明。另為

設法妥辦。乃歷年相沿已久。忽欲一旦更張。

又不計其事之是否可行。是徒欲邀譽衆兵

而未知通盤籌畫。有是理乎。著傳諭弘昫等

即將因何如此改辦緣由。明白回奏。仍照部

議將其中有無弊混之處。據實奏覆。此旨著

由四百里傳諭知之。○刑部奏審訊已革參

贊富德。扣罰土兵鹽菜銀兩。彌補賞需一案。富德仰蒙廷訊。俯首認罪。無可置喙。查富德於賞需項下。扣得元寶六個入已。又收受保舉知府曾承謨。餽金五十兩。又任性叅革副將廣著。不候明旨。即令充當兵丁。致廣著自戕身死。以上各款。業已罪有應得。至密封清字奏單。所稱阿桂手持黃帶。口發狂言一節。據供因被嚴叅。自知必死。心懷憤恨。砌款陷害等語。富德屢獲重罪。蒙恩復用。並不奮勉立功。猥鄙貪詐。至將狂悖大逆之詞。寫列叅單。上達御座。以律應寸磔之罪。有心誣陷。應照誣告大逆律擬斬。請旨即行正法。至已革總兵英泰。於富德剋扣兵糧。通行舞弊。應發往伊犁充當苦差。開泰係富德保舉陞用。於叅奏廣著徇私附和。及押解富德時。並不嚴加管束。一任伊家人前站騷擾。迨恐彰著難掩。始以一稟塞責。實屬狡詐。應發往烏魯木齊當差。候補知府曾承謨。因富德之母生辰。

餽送金兩。殊屬不合。應請交部嚴加議處。得旨。富德著即處斬。英泰開泰曾承謨均如所議行。○子故叅贊大臣多敏祭葬如例。○已卯。

上詣暢春園。問

皇太后安。○工部等部議准。陝甘總督勒爾謹疏稱。添設皋蘭平番二縣主簿。裁哈密酤水巡檢。移駐嘉峪關各事宜。○皋蘭主簿。專管黃河橋梁船隻。支領水手工食。并料理糧餉。抽收木稅。○平番主簿。專管水利。及民間爭水詞訟。并私銷私鑄私鹽私茶等項。俱准拏解送縣查辦。其餘詞訟。不得撓越。○主簿署將所裁肅州九家窑州判署。變價建蓋。不敷銀兩。借間款添補。在該員養廉內。分年扣還。巡檢署。照從前所裁酤水巡檢例建造。○主簿照內地佐雜例。各額設養廉六十兩。巡檢係邊缺。設養廉二百兩。其俸銀俱照例支給。○鑄給皋蘭縣主簿管理河橋。平番縣主簿。

管理水利各條記肅州分駐嘉峪關巡檢司印信。一主簿定為要缺。巡檢定為邊缺。均令在外揀選調補。從之。○予故陝西延綏鎮總兵烏爾納祭葬如例。入祀昭忠祠。○庚辰諭軍機大臣等刑部議駁周元理咨辦旺楚克多爾濟一案。請將該犯及原解原拏人等解京嚴行審擬一摺。所駁甚是。已依議行矣。旺楚克多爾濟係已革扎蘭。因在土默特冒戴銅頂拏解至京。經刑部會同理藩院擬發往

實錄卷二十八

三

烏魯木齊充當苦差之犯。自應沿途派委兵役。小心押解。毋致疎虞。乃該犯行至清苑縣地方。輒敢帶同跟役騎馬潛逃。經該縣兵役趕至山西五臺縣。始行拏獲。經過地方並未盤詰。已難辭咎。該督獲後。即應嚴審定擬。奏聞辦理。何以仍行咨請部示。並為聲請應否毋庸再行加罪等語。明係曲為開脫。其解役兵卒如何疎縱。致令潛逃之處。亦未訊取確供。周元理久任封疆。不應輕率若此。著傳旨

申飭。並將旺楚克多爾濟主僕二人及原解原拏人等派員押解來京。交在京軍機大臣會同刑部嚴行審訊。定擬具奏。仍飭沿途地方文武小心管押。毋得再有疎虞。致干重咎。○以光祿寺卿塔彭阿戶科給事中宗室玉鼎柱為內閣學士兼禮部侍郎。○辛巳諭戶部議覆山西石樓蒲縣永和等三縣應補缺額丁徭銀兩。請將乾隆四十年陞補銀一百四兩零造入奏銷冊內題數。其未補銀一千

實錄卷二十八

三

五百餘兩。仍令陸續增補。以復舊額。一摺。在部臣自屬按例覈覆。但查該三縣丁缺徭存。乃自明季積習相沿。因循未加釐剔。現在雖日事籌補。究屬欠多補少。有名無實。著加恩即將此次補復之數作為正額。其未補虛額銀一千五百三十七兩零永遠豁除。以省滋累。○命侍講學士朱珪在尚書房行走。○以太常寺卿耀海為左副都御史。○以頭等待衛文常為廣州副都統。○旌表守正捐軀甘

肅靜寧州民朱典媳岳氏。○壬午。

上詣暢春園。問

皇太后安。○諭軍機大臣等。戶部議覆山西石樓蒲縣永和三縣應補缺額丁徭銀兩。按例覈覆。仍令陸續增補一摺。已降旨將此次補復之數。作為正額。其未補虛缺銀一千五百餘兩。即加恩永遠豁免矣。此等有關民瘼之事。已延三。當在京陛見時。自應面為陳奏。何得僅照常例具題。看來已延三。為人心小。心謹

實錄卷二十八

三

慎而辦事不免拘滯。又清語未甚嫻熟。奏對時。遂致格格不吐。即如前日黃檢所奏。揀發州縣。及奏請陞署道員二事。該撫在京時。並未面陳。巡撫身任封疆。凡吏治民瘼。正當於入覲之時。詳晰敷陳。豈一味拘謹。所可塞責耶。已延三。著傳旨申飭。○予故廣東高廉鎮總兵常祿保祭葬贈廕如例。○旌表守正被戕湖南零陵縣民卿尚韜妻李氏。守正捐軀河南鹿邑縣民劉貴成女劉氏。○癸未。遣官

祭

關帝廟。○

上以秋獮木蘭。奉

皇太后自圓明園啟鑒。○諭此次巡幸木蘭。所有經過地方。著加恩蠲免本年地丁錢糧十分之三。該部即遵諭行。○是日。駐蹕南石槽行宮。○甲申。諭軍機大臣等。據富勒渾奏。現在大功告竣。趕辦軍需銷算。所有川督任內專賠分賠各項銀兩。飭局查扣。並稱伊歷今三載。口外所用夫糧。偶遇一時趕辦不及。勢不能不取給糧臺。現飭各站員。據實開造賠繳等語。此奏語中。似有隱情。實大不是。已於摺內批示矣。軍營遇有無著款項。例應經手各員。分賠歸款。如富勒渾應賠木果木并糞國勲之案。雖屬分所當然。而覈其情節。或尚有可原。若以本省總督。往來口外。並非將軍等可比。其一切夫價口糧。本應於養廉內自行給發。何得取給糧臺。令站員經手。又於事

實錄卷二十八

三

後飭令開造賠繳耶。伊從前既不應如此辦理。此時又忽為此奏。不過因現值查辦糧站。恐被文綬查出。因而豫占地步。冀蓋前非。此實難逃朕之洞鑒者。富勒渾既誤於前。又圖掩飾於後。實屬大非。著傳旨申飭。又諭據文綬查明成都等各屬。為富德豫備夫馬公館一摺。內稱因富德解京。行走迅速。或恐山路崎嶇。雨水泥濘。夫馬疲乏。是以傳知寬為豫備。至公館。即係尋常過客住宿。亦非另辦等語。富德係有罪之人。革職解京。沿途地方。自不應豫備夫馬公館。但因解送文武各員。行程迅速。夫馬寬為豫備。尚屬情理所有。富德案已完結。其沿途應付之各州縣。止須分別記過。毋庸叅處。將此傳諭文綬知之。○是日。駐蹕密雲縣行宮。○乙酉。諭軍機大臣等。議覆阿桂等奏。兩金川善後事宜摺內。所有番境應設綠營兵六千五百名。歲需屯墾鹽菜銀七八萬兩。請於江蘇。安徽。浙江。江西。湖

北。山東。河南。山西等內地省分。酌減名糧抵補一款。尚未妥協。朕平定兩金川。不惜七千餘萬帑金。原為綏靖邊圉。一勞永逸之計。何靳此七八萬鹽菜之需。況江浙等省營分。雖居腹地。亦有差操防汛之事。若酌減名糧。於各該省兵丁生計。殊屬有礙。自可毋庸裁減。所有川省歲需屯兵鹽菜之費。著該督文綬即於正項內動支。至番地初定。新設營汛。全資將軍控馭彈壓。自應令將軍。每年至兩金川新設營分。巡查兩次。副都統亦當每年巡查一次。將所有滿兵輪派隨往。庶駐防兵丁。常得演習勤勞。即綠營官兵。亦知所觀法。○是日。駐蹕要亭行宮。

大清高宗法天隆運至誠先覺體元立極敷文
奮武孝慈神聖純皇帝實錄卷之一千八

實錄卷一千八

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉
吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂
總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務
世襲騎都尉軍功加九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣陸費執經經筵講官太子少保工部尚書紀錄六次臣曹振鏞等奉

敕修

乾隆四十一年丙申五月丙戌諭軍機大臣

實錄卷一千九

一

等據伊犁圖綽克托奏稱伊犁錢文與烏什
普爾雖異乍看不能區別奸民愚回往往互
相攙混請旨永遠禁止等語奸商趨利若鶩
現在伊犁錢賤普爾價昂將伊犁錢文帶往
回地攙和使用乃必有之事固宜禁止但趨
利之徒慙不畏法雖經禁止未必即遵朕意
與其有名無實不如將伊犁錢文與回地普
爾畫一辦理使奸商無所獲利自然不復滋
弊但不知彼處情形能否如此辦理舒赫德

阿桂俱曾久駐伊犁。諳悉該處情形。伊二人識見。又優於伊勒圖。綽克托。此事著傳諭舒赫德。阿桂。公同熟商。妥議具奏。併傳諭伊勒圖等知之。○是日。駐蹕兩間房行宮。○丁亥。上遣額駙扎蘭泰。赴要亭行宮。問

皇太后安。○諭留京辦事王大臣等奏稱伊等將撤回之吉林頭起官兵內。補行帶領引見之驍騎校薩木哈卓林。保照例驗放。遣回外將防禦巴爾呼。雲騎尉福舒。遣赴避暑山莊。

實錄卷十九

帶領引見等語。軍營奏請補放官員等。雖例應補行引見。但吉林索倫隊內大員。俱係應管所屬隊伍。撤回原處之人。非京城各營官弁可比。今若將防禦以上官員。俱遣赴避暑山莊。帶領引見。則管隊行走之人。僕僕往返。伊等亦多糜費。且此等由軍營奏放官員。均因著有勞績。將軍等保舉陞授者。即送來引見。亦必准其陞授。並無更改之處。何必紛紛遣送。致令伊等多費。將此交留京辦事王大

臣等轉飭兵部理藩院。將陸續撤回應補行引見之吉林索倫官員。不必視其職銜。即著王大臣等驗放。令伊等加意約束。本隊兵丁。各回原處。○是日。駐蹕常山峪行宮。○戊子。諭軍機大臣曰。伊齡阿奏。兩淮協解雲南餉銀被竊一案。究出竊鞘賊犯。係解員陳文棟。差役錢玉。及研訊錢玉。又據供係陳文棟。遣之長隨王天榮。起意商竊。二月初十日。貫鞘時。王天榮在內相幫。十二日晚。王天榮復

實錄卷十九

向約會。至起更後。王天榮閃至鞘邊。錢玉即幫擡一鞘。到堂簷口。王天榮用所穿套袍藏匿而去。復於十四日。在船邊給錢玉銀五兩。並告以日內。即同親戚前往山西甘肅等語。所供情節。雖係一面之辭。但既供王天榮。係竊鞘正賊。自必嚴緝獲犯。三面質對。方成信讞。該犯既稱由山西一路前往甘肅。著傳諭該督等。速即派委員弁。沿途躡緝務獲。一面奏聞。一面嚴密鎖押。解至江寧。交與高晉收

審定案。所有伊齡阿原摺供單。並著鈔寄閱看。再王天榮籍隸浙江海寧。或此時潛回本處。亦未可定。並傳諭三寶一體派員嚴緝。毋致漏網。○又諭曰。伊齡阿奏兩淮解凍餉銀。在運使大堂失鞘一案。現將解員陳文棟之差役錢玉。嚴加審訊。錄供呈覽。朕細閱此案。前後疑實甚多。似非實情。已於摺內批示。此項餉銀。於初十日在運使大堂貫鞘後。該解員陳文棟。即派錢玉看守。至十二日失鞘。安

實錄卷十九

知錢玉非即首犯。因畏懼重罪。捏稱王天榮起意。以圖稍減罪名。又稱現在山西甘肅等處。俾輾轉關拏。冀延時日。其實有無。王天榮其人。均未可知。否則錢玉並無同謀共竊之事。因畏刑誣認。捏造供情。以致案多疑實。不然千金銀鞘。分量甚重。據稱用線布套袍裏著。抱在胸前。直出運使衙門。豈有不被人看見盤問之理。若果王天榮一人力能偷出。從前何以又令錢玉幫同擡至堂口。致令漏信

分贓。又稱王天榮偷鞘後。不知藏匿何處。則所供私給銀五兩。并呈出之鹽銀半錠。又從何來。况竊憑贓定。既有藏匿原鞘之供。何以不根究原贓。任其狡卸。種種情節。均未脗合。其餘供情。支離甚多。不足以成信讞。看來伊齡阿於審理此案。未能得其竅要。著傳諭高晉將案犯提至江寧。另行悉心研鞫。務得實情。究出正犯。定擬具奏。至起解鞘銀。係何人賠補。其傾銀裝鞘。必有經手確據。亦應究明

實錄卷十九

切實下落。又錢玉既有此供。則從前擲入井中銀兩。又係何人捏出。並應究明具奏。至兩淮餉銀。於初十日兌撥。堆貯運使大堂。至十四日。始行起解。該運使何以僅聽解員派役看守。並不自行選派妥人。協同照管。巡邏以致銀鞘被竊。何至疎忽若此。並著高晉查明辦理。將伊齡阿摺鈔寄閱看。並將此傳諭伊齡阿知之。○補行乾隆四十年大計。貴州不謹官一員。年老官三員。有疾官三員。才力不

及官一員。浮躁官一員。分別處分如例。○以故雲南永昌府孟定土知府罕大亮子梁發襲職。○是日。駐蹕喀喇河屯行宮。○己丑。

上駐蹕避暑山莊。至八月甲寅。皆如之。○庚寅。

軍機大臣等議奏。兩金川解到番子男婦一百八十九名口。遵旨照回人入旗例。編一佐領。入內務府正白旗。請設佐領一員。驍騎校一員。領催四名。馬甲七十名。但番子初入內地。既不曉事。又不識字。其新設佐領一缺。暫

實錄卷二十九

由內務府揀員補放。交禮部照例鑄給圖記。再由內務府派驍騎校一員。領催二名。馬甲三名。率領番子中新設驍騎校。領催等辦事。至新設馬甲缺。由內務府撥給三十五缺。再新設三十五缺。應得錢糧。暫行存公。不必分給。另派內務府幹員。博節經理。養贍伊等。統俟數年後。番子等漸諳事務。其新設佐領。再由番衆揀選充補。應得錢糧。按名分給。并將內務府兼理之官裁撤。至伊等棲止之所。請

交健銳營大臣。於香山附近。令其建碕居住。從之。○辛卯。湖北巡撫陳輝祖疏報。乾隆四十年分。鶴峯州開墾下則旱地。七頃八畝。有奇。○壬辰。諭曰。大學士于敏中。著賞給人復一觔。○吏部議准。貴州巡撫裴宗錫疏稱。遵義府屬仁懷通判。遠駐赤河。與四川瀘州。合江。敘永廳三面聯界。五方雜處。最易藏奸。應改為直隸要缺。同知。在外揀選題補。原設之廳照磨。歸新改同知管轄。案件例由該管巡

實錄卷二十九

道覈轉。惟原管之貴西道。駐劄威寧。程途紆遠。應改隸省城之糧道較便。又畢節縣知縣。原定要缺。後改中缺。查該縣當黔川門戶。人烟稠密。現在水城。威寧兩路。運川鉛觔。匯出其途。兼有例應代運鉛料。應仍定為要缺。在外揀調。舊定苗疆要缺內。有貴陽府屬長寨同知。地處簡僻。民苗安靜。應作為中簡缺。改歸部選。從之。○以太僕寺卿德爾秦為太常寺卿。○以國子監祭酒奇臣為光祿寺卿。○

命內閣學士錢載提督山東學政。○癸巳。

孝恭仁皇后忌辰。遣官祭

景陵。○

上奉

皇太后駐蹕避暑山莊。○命刑科給事中邵庚

曾提督河南學政。○甲午。諭此次巡幸山

東。天津兩處召試所取二等之舉人。貢監。生

員。著照上屆巡幸天津召試二等各生之例。

有願在四庫全書處効力者。俱准其在謄錄

實錄卷十九

八

上行走。○諭軍機大臣等。甘肅地土瘠薄。民

間生計本艱。屢經傳諭該督等。以烏魯木齊

等處沃野不啻千里。閒曠未闢者甚多。若貧

民前往墾種。贍養較在內地窮苦度日。利且

數倍。因令地方官勸民自往耕作。餬口。勒爾

謹陞見時。詢問及此。據稱數載以來。願往者

尚覺寥寥。此固愚氓安土重遷。亦由未知新

疆沃壤可耕。如果勤於力作。大可樂業。是以

觀望不前。即如山東無業貧民。出口往八溝

喇嘛廟等處。傭耕度日者。難以數計。蓋由此

等流寓民人。在彼耕作得利。藉以成家業者

甚多。遠近傳聞。趨之若鶩。皆不憚數千里。挈

眷而往。若甘省百姓。得知新疆之可資樂利。

亦何所憚而不往耶。著傳諭勒爾謹飭令各

屬設法化導。務令邊地貧民。咸知口外墾種

之利。自皆踴躍樂從。使其端一開。聞風而往

者必衆。所謂民情難與圖始。大率如此。但須

善為勸化。若徒出示曉諭。轉似毆以所難。仍

實錄卷十九

七

前衷足無益也。勒爾謹務善體朕意。妥協為

之。仍將籌辦情形若何。據實覆奏。又諭曰。

王亶望奏甘肅蘭州鞏昌平涼西寧寧夏等

各府州屬。於四月十一二日。得有細雨。尚未

霑透。民情望雨甚殷。現在設壇祈禱。若旬日

間得雨。於田禾尚有裨益等語。前畢沅亦經

奏及。王亶望此奏。距畢沅所奏。又六七日。尚

未得雨。恐旱象已成。甘肅土瘠民貧。若雨澤

稍愆。閭閻生計。即倍形艱窘。且該省又有被

霜被雹之處。雖已經播種翻犁。亦藉雨膏滋長。未識近日曾否均霑渥澍。朕心深為軫念。著傳諭畢沅。即將現在有無得雨。田禾情形若何。據實速行覆奏。若業已成災。不可不急籌撫恤。勒爾謹現已在途。著該督迅速趕程回任。督同藩司等。確查被災各屬。妥協籌辦。務期貧民口食有資。勿致稍有失所。此旨著五百里發往。仍著將曾否得雨。及勘辦情形若何。迅速由驛覆奏。并傳諭王宣望知之。

實錄卷十九

命禮部尚書曹秀先在尚書房行走。○以散秩大臣黃文燦為鑲白旗漢軍副都統。○乙未。諭向來旗丁餘米。准在通州變賣。以資日用。現在各省糧艘陸續抵通。若旗丁於兌足正供之外。尚有多餘米石。情願出售者。仍著加恩。准其在通州糶賣。在旗丁等既所樂從。而地方糧石益充。於市價民食。均為有益。該部即遵諭行。○諭軍機大臣等。據畢沅奏。陝甘兩省各營將備。現俱帶領凱旋兵丁回營。

內有打仗出力。經將軍參贊奏請陞任者。均應送部引見。又各營題陞豫保各員。緣近年本營乏人署事。亦未給咨送部。現俱紛紛請咨。共計有六十餘員。請分作兩班給咨送部等語。所辦亦好。已於摺內批示。但此等人員。俱係軍營出力。經將軍等奏請陞擢者多。即送部引見。亦不過仍令回任。無可另為甄別。且伊等甫經凱旋。其本營事務。自須稍為經理。至本省題陞豫保各員。亦有署任交代之事。均不必亟亟概行送京。况人數多至六十餘員。即分作三班輪替來京。亦無不可。著傳諭畢沅。如頭班業已起程。即將後班分為兩起。若目下頭班尚未起程。即酌量分作三四班進京。并俟前班引見回營。再將其次給咨送部。庶營務不致乏人料理。勒爾謹回任後。即照此接辦。其湖廣雲貴四川各省回營將弁內。有似此者。均著一體辦理。將此諭令各督撫知之。○廣西巡撫吳虎炳疏報乾隆四

實錄卷十九

十年分武宣天保奉議三州縣開墾水田六十畝有奇。丙申諭曰福德著授為額外內閣學士仍在軍機司員上行走。又諭據畢沅奏甘省歷年承辦軍需應行支發款項甚多。司庫別無閒款。請於附近省分撥銀二十五萬兩來甘。以便分別歸款還項等語。前因平定金川大功告成。將部庫撥解四川備用銀三百萬兩。截留存貯西安藩庫。著即於此內撥銀二十五萬兩。就近解交甘省備用。該

實錄卷一百一十九

部即遵諭行。○又諭據圖思德奏請將安籠鎮總兵福興調補古州鎮總兵一摺。福興朕所素知。在內地總兵尚可。於苗疆要缺不甚相宜。所有古州鎮總兵員缺著烏大經調補。即赴新任。所遺江西南贛鎮總兵員缺。即著梁朝桂補授。○諭軍機大臣等據英廉奏。現在京師錢價日增。紋銀一兩止易大制錢八百八十五文。較之四月少換制錢七十文。恐有狡獪商民囤積錢文。乘間射利。現在嚴密

訪查。仍出示曉諭。並請勅下順天府五城一體查辦等語。市肆錢價隨時長落。亦屬常有之事。何至數日之間驟長至七八十文。且恩賞錢糧尚未支放。何以自五月以來即行增價。其中必有奸商囤積居奇。藉詞射利。止須將倡言為首者訪拏重治。數人自皆聞而知畏。錢價定當漸就平減。庶為正本清源之道。若交五城通行查辦。必致跡涉張皇。至於出示曉諭。尤恐奸民自幸其計已售。益復肆為

實錄卷一百一十九

蠱惑。於事轉屬無益。著傳諭英廉。選派妥幹兵役於京城內外嚴密訪查。並交索守伺。將賜榮一體設法密查。如確訪有倡言擡價之徒。即行嚴拏。從重治罪。以示懲儆。仍將查辦情形及現在錢價有無增減之處據實覆奏。○丁酉諭熱河引見吏部月選等官。著仍照往年之例。派福隆安一體帶領引見。○諭軍機大臣曰。孫嘉樂奏考試情形一摺。據稱歲考各屬諸生每多疵類之卷。不敢妄邀虛譽。

嚴定等第統計兩道劣等較前多至數十人等語其說固是但只可用之江浙不宜用之滇省已於摺內批示滇黔粵西地處邊陲其人文原不及內地學政按試各學只須嚴切訓諭俾各生恪守卧碑祇遵功令遇有唆訟滋事者隨時究治至考試生童惟當秉公甄拔并嚴查鎗冒撞騙之人勿使滋弊自足以昭勸懲而飭士習其文風高下只宜因地取材量為培養若必求全責備去取從嚴且欲經解詩賦事事淹通此於江浙等大省則然邊方士子見聞淺陋未必盡能領會繩之太過大率欲從末由轉不能使其心皆誠服孫嘉樂銳意求精未免過當所謂知其一不知其二也將此傳諭該學政並令廣西貴州學政知之○戊戌旌表逼嫁捐軀山東單縣民程學曾妻張氏○己亥諭軍機大臣等據英廉等覆奏京城錢價畧為稍減每銀一兩多易小制錢十餘文是必奸獪之徒稍聞查拏

之信心知警懼故漸行減價現在嚴密訪拏等語所辦是已於摺內批示矣奸商敢在輦轂之下倡言擡價以致數日之間驟長至七八十文及一聞查拏即漸次稍減是錢價之長落由於市儈之把持其情甚屬可惡不可不拏獲一二人懲一儆百以靖刁頑而安市肆著傳諭英廉會同袁守偁將賜榮一體設法上緊嚴密訪查務得數人訊究確實從重治罪毋致日久生怠仍將現在有無查獲緣由據實覆奏○是月兩江總督高晉江南河道總督薩載會奏臣高晉在工二十餘年歷經黃流倒灌河道停沙通塞靡常變遷莫定不惟海口茫茫萬頃無可施工即黃河坍漲亦難疏治惟有將清口內通湖引河設法挑挖使得暢流匯黃東注併力刷沙則黃河不濬自深海口不疏自治補偏救弊此或一法向來洪湖誌椿存水九尺是湖水未能暢出遇黃盛漲必有倒灌之慮則黃運兩河淤墊

在所不免。臣等再四熟籌，必須於冬春水落時，照依各引河寬長丈尺兩頭煞壩，大加挑挖，并將清口東西壩基址移下一百六十丈，使清水暢流有力。批：此係治本之論，宜實力為之。又奏清口之西所建各架木龍，原以挑溜北趨，冀刷陶莊積土，使黃不逼清之意。歷年雖著成效，但驟難盡刷。若於陶莊連上積土之北，開挖引河一道，使黃水離清口較遠，清水益得暢流。至周家莊會黃東注，不惟可免倒灌，而二漬并流，河海淤沙漸可攻刷。即堰圩工程，亦可資穩固。所謂治淮即以治黃，舍此別無良法。批：此亦一法，勉為之。又奏現在伏汛將屆，情形不定，請於霜降後相機酌辦。得旨：此奏皆合機宜形勢，是治淮黃一大關鍵，屆時妥為之。○江蘇巡撫楊魁奏：臣於五月初四日到蘇任事，蘇城烟戶浩繁，民食最重，目下糧價雖平，究係青黃不接，現飭禁海口透漏，並察富商囤積等弊。至刑名案件，

實錄卷一百一十

二

一

加緊趕辦倉庫錢糧，徹底清釐，斷不敢少有因循。得旨：好諸事勉為之，要之以久，轉不必以新到任見更張風利也。○江南河道總督薩載奏：高堰山圩二廳磚石要工，向遇風浪撞掣塌卸，始隨時購辦，動經數月，只得暫將柴草先為縷護，稍不堅實，續掣堪虞。請照沿海石塘豫辦工料之例，在庫貯項下酌發二廳石料銀各一千兩，樁木銀各一千兩，勒限購辦，運工備用。遇有修防動用，就款開銷，仍照數買還，以足額貯。得旨：嘉獎。○署湖廣總督湖北巡撫陳輝祖奏：兩湖弁兵近年從征川省，由軍營拔擢咨回本省補用者，當時止按得功先後，不拘遠近，遇缺即補。今凱旋歸伍，有拔補之缺，距原籍在二千里內外者，共計六七十員，既於操防巡查情形未能熟悉，且有親老子幼，難於攜帶，情殊可憫。請將遠補各弁互調各歸近處，以示體卹。從之。○山西布政使黃檢奏：前因臣護撫篆，奏請揀發

實錄卷一百一十

二

州縣。陞署道員二摺。於撫臣起程後。辦理過
急。奉旨訓飭。惶懼實深。嗣後當虛心謹慎。不
敢稍有驕縱。得旨總之不可躁進。躁進適所
以自遲。慎之。不可孤朕教訓期望之意。朕即
忘汝。肯忘汝祖父乎。

實錄卷十九

文

大清高宗法天隆運至誠先覺體元立極敷文
奮武孝慈神聖純皇帝實錄卷之一千九

大清高宗法天隆運至誠先覺體元立極敷文
奮武孝慈神聖純皇帝實錄卷之一千十

纂修總纂官經筵講官太子太傅文蔚閣大學士文淵閣領閣事領侍衛內大臣稽察欽奉 上諭事件處管理
吏部理藩院事務黃旗滿洲副統世襲副都統軍功加七級隨帶加一級尋常加二級軍功紀錄一次 臣慶桂
總纂官經筵講官太子太傅文蔚閣大學士文淵閣領閣事稽察欽奉 上諭事件處管理刑部戶部三庫事務
世襲副都統軍功加十九級隨帶加二級又加二級 臣董誥內大臣戶部尚書鑲藍滿洲副都統軍功紀錄五次
尋常紀錄十四次 臣德瑛經筵講官太子少保工部尚書紀錄六次 臣曹振鏞等奉
敕修

實錄卷二十

一

乾隆四十一年丙申六月庚子朔置文淵閣
官制。諭昨四庫全書館呈進袁集永樂大典
散篇內有麟臺故事一編。為宋時待制程俱
撰。具詳當時館閣之制。所載典掌三館祕閣
書籍。以執政領閣事。又有直祕閣。祕閣校理
等官。頗稱賅備。方今蒐羅遺籍。彙為四庫全
書。每輯錄奏進。朕親加披閱。釐正。特於文華
殿後。建文淵閣。弁之以充策府。而昭文治。淵
海縹緗。蔚然稱盛。第文淵閣國朝雖為大學
士兼銜。而非職掌。在昔並無其地。茲既崇構

鼎新琅函環列。不可不設官兼掌。以副其實。自宜酌衷宋制。設文淵閣。領閣事總其成。其次為直閣事。同司典掌。又其次為校理。分司註冊點驗。所有閣中書籍。按時檢曝。雖責之內府官屬。而一切職掌。則領閣事以下各任之。於內閣翰詹衙門內兼用。其每銜應設幾員。及以何官兼充。著大學士會同吏部翰林院定議。列名具奏。候朕簡定。令各分職繫銜。將來即為定額。用垂久遠。至於四庫所集。多人間未見之書。朕勤加採訪。非徒廣金匱石室之藏。將以嘉惠藝林。啟牖後學。公天下之好也。惟是鐫刊流傳。僅什之一。而鈔錄儲藏者。外間仍無由窺覩。豈朕右文本意乎。翰林原許讀中秘書。即大臣官員中。有嗜古勤學者。並許告之所司。赴閣觀覽。第不得攜取出外。致有損失。其如何酌定章程。並著具議。以聞。尋議請參仿宋制。置文淵閣。領閣事二員。以大學士。協辦大學士。翰林院掌院學士。兼

充總司典掌。置文淵閣直閣事六員。以由科甲出身之內閣學士。由內班出身之滿詹事少詹事。侍讀侍講學士。漢詹事少詹事。侍讀侍講學士等官兼充。同司典守釐輯。置文淵閣校理十六員。以由內班出身之滿庶子。侍讀侍講洗馬。中允贊善。編修。檢討。漢庶子。侍讀侍講洗馬。中允贊善。修撰。編修。檢討。及由科甲出身之內閣侍讀等官兼充。分司註冊點驗。以上皆為定額。仍仿宋代館職結銜例。一切章奏文移。令其繫銜於本銜之上。如遇缺員。領閣事直閣事由翰林院具疏請簡。校理由領閣事大學士會同掌院學士。遴員引見。如遇出差。照日講官例請署。再管鑰啟閉。內府司存。亦宜參仿宋制。置提舉閣事一員。以內務府大臣兼充。如遇缺員。即由內務府具疏請簡。再排次清釐。似非內府員役所能。亦宜參仿宋制。置文淵閣檢閱八員。以由科甲出身之內閣中書兼充。如遇缺員。由領閣

事大學士遴員奏補。至閣中書籍。若概許開函繙閱。不無駭損。請俟全書告竣後。各藏副本於翰林院。如大臣官員欲觀祕書。准其告之領閣事。赴署請閱。有願持筆札就鈔者。亦聽不許私攜出院。如遇有疑誤。須對正本者。令其識明某書某卷某頁。彙書一單。告之領閣事。酌派校理一員。同詣閣中。請書檢對。從之。○辛丑。諭曰。高晉奏審明兩淮運使大堂失鞘一案。解員陳文棟庫大使宋炎知事劉天燾私自賠銀。捏報撈獲。陳文棟業經革職。請旨將宋炎。劉天燾革職審問。並將兩淮鹽運使邊廷掄交部嚴加議處等語。宋炎。劉天燾俱著革職。交該督提同案內人證嚴審分別定擬。邊廷掄著交部嚴加議處。○諭軍機大臣曰。高晉奏審明兩淮運使大堂失鞘一案。將鹽運使邊廷掄附參。已有旨交部嚴加議處矣。邊廷掄身為運使。本署大堂有失鞘之事。即應一面嚴緝賊賊。一面將解員庫使

據實揭參。乃僅責令庫官等速緝賊賊。遲則揭參治罪。空言飭嚇。已屬非是。及該解員等通同賠銀。擲入簷前井內。妄稱撈獲。該運使又不能究出實情。輒爾顛預稟報。其咎實無可逭。豈堪復勝運使之任。至高晉奏雖有該運使等揭報前來之語。乃復徂於外省陋習。欲為邊廷掄寬免處分。其實此事。係高晉查出。與邊廷掄何涉。豈容妄為開脫耶。著傳諭舒赫德阿桂於議處此案時。查明定例。將邊廷掄或予降調。或予革職。即行妥議具奏。并不得援揭報免議之例。○又諭曰。高晉奏審明兩淮運使大堂失鞘一案。解員等私自賠銀。捏報撈獲。已有旨交該部辦理矣。此項餉銀。據稱於二月十二日裝齊。堆貯運使大堂。至次日天明查點。已失去一鞘。當時運使邊廷掄聞知。即應將該解員并庫大使等揭參。何以僅令速緝賊賊。遲則揭報。空言飭嚇。至解員陳文棟批領餉銀。疎防失鞘。出銀賠償

分所當然。彼時若據實稟明。尚可原宥。乃與庫官。知事。商同湊銀。裝入剝鞘。乘夜拋擲井中。捏稱撈獲。裝點欺詐。其咎實由自取。而邊廷掄以近在署中之事。既不能豫為防範。復不能早為覺察。其人尚堪勝運使之任耶。至此案贓犯。前據伊齡阿奏。係王天榮錢玉所竊。朕以其情節支離。難成信讞。諭令高晉另行審辦。著傳諭高晉。仍遵前旨。徹底根究。務獲正賊。起出原贓。審明定擬具奏。至摺內所稱據該運使等揭報前來之語。殊屬非是。此事乃高晉查出。並非邊廷掄舉發。何由揭報。高晉加入此語。不過徇於習套。欲為邊廷掄開脫。冀免處分耳。高晉不宜出此著飭行。○吏部議准。貴州巡撫裴宗錫疏稱。大定府屬水城通判。管理福集廠鉛運。每年額解二百二十餘萬觔。該廳管轄地方。僅常平。永順二里。本處夫馬不敷。查水城廳外。有隸寧遠州之時豐歲稔崇信三里。距州甚遠。請就近撥

歸水城通判。夫馬雇覓較易。實於運務有益。該三里額徵秋糧一千九百餘石。應改令赴廳完納。該州舊轄九里。額定進學十五名。今既以三里歸廳。亦應裁州額三名。撥添該廳附入府學。從之。○壬寅

上詣

皇太后行宮問安。○癸卯。諭軍機大臣等。昨據富明奏報。五月二十六日。正定等處得有透雨。今日又據達齊奏報。五月二十六日。宣化等處得有透雨等語。正定宣化等處。此時始據奏報得有透雨。則前此未透可知。前據周元理於五月內。奏報雨水情形。雖云各屬均已霑足。未經詳悉分叙。不知正定宣化兩處。從前所得之雨。是否足資霑潤。該處田禾。曾否及時耕種。或得此次透雨。始行補種齊全。著傳諭周元理。即將正定宣化二府屬雨水田禾。實在情形。查明據實迅速覆奏。尋奏得。雨霑足。雜糧暢發。晚禾布種齊全。得旨覽奏。

欣慰。○甲辰旌表守正捐軀江西新昌縣民吳身端妻李氏。○乙巳諭軍機大臣曰英廉等覆奏查辦京城錢價頗貴一事。查獲經紀馬成騏勾通商人高擡時價。現在設法研訊。仍將擡價之奸商鋪戶。上緊訪查等語。已於摺內批示。此事既經查出經紀馬成騏希圖用錢暗中增價。供認不諱。即係倡議增價之人。止須將該經紀照例治罪。其餘鋪戶人等俱可不必深究。但恐奸商等妄以為法不及衆。日久仍復效尤。著傳諭英廉素守伺。將賜榮等即徧行出示曉諭。以此次尚係初犯。且一聞查拏。錢價即日就平減。是以止將為首之人懲治。嗣後如有不法商儉。仍然商通擡價者。定行嚴加窮究。一併拏獲治罪。決不再為寬貸。於京城內外及錢市鋪門。黏貼多張。俾奸商猾儉。觸目警心。庶不敢逞其故智。○又諭曰。伊勒圖奏。據安插巴里坤之安南廠徒內有祁山崑。祁盛小等三十三人呈稱。伊

等原籍俱有父母妻子。懇請行文本省查明送至巴里坤。一同居住。其伊犁烏魯木齊等處。現在一體查詢辦理等語。所奏可准行。祁山崑等原籍既有親屬。情願搬移同住。若遣送前往。伊等得以團聚安居。即可借以羈絆其身。免致在配脫逃滋事。於口外安插匪犯事宜。亦屬有益。從前發遣時。原應詢明各犯有無願帶家口者。奏聞分別同遣。此即熊學鵬辦理不善之處。著傳諭李侍堯俟伊勒圖等移咨到日。即按單查明。各該廠徒原籍家口。辦給口糧車輛。咨明經過各省。遞送巴里坤等處安插居住。至此案廠徒江蘇安徽浙江河南四省。均有分別安置之犯。並著傳諭各該督撫查詢各該犯等。如有情願將原籍家屬搬至配所一同居住者。即咨明本省一體辦理。並著附便奏聞。○又諭據伊勒圖奏安插廠徒一摺。另單內開發遣烏魯木齊巴里坤等處廠徒九百零三名。除沿途患病留

養脫逃已故一百四十二名等語。此等廠徒私越邊境滋事。逃回內地。其罪本無可逭。因其人數太多。是以酌量情節輕重。發往新疆及各省安插。屢經降旨沿途督撫嚴飭各屬小心管解。毋致疎虞。如有脫逃。即於就獲處所。照改遣人犯例。立時正法。乃自分起押解以來。經過各省地方甚多。惟湖廣江西奏到三案。其餘各省並未報有中途脫逃之事。即湖廣江西已奏三案。除賴鵬萬楊德萬業經拏獲正法。其巫朝龍一犯。迄今未報弋獲。可見各省督撫於要犯脫逃。全然不以為事。所謂派役嚴緝者。亦不過以空文塞責。毫無實際。此等陋習。牢不可破。其何以懲奸頑而肅吏治。俱著傳旨申飭。仍著將此案發遣新疆廠徒。經由之各省督撫查明各犯在何省脫逃幾名。因何不行具奏。並曾否弋獲之處。即行覆奏。○軍機大臣議覆成都將軍明亮奏稱通藏要路之碩板多石板溝巴塘裏塘四

處。道里遼濶。間有夾壩。請於各營汛明幹都司守備內。揀派四員分駐。以資彈壓。又請於裏塘地方添駐土馬兵一百。以資巡哨。均應如所請。從之。○丙午。諭軍機大臣等。連日召見正定鎮總兵嵩安及建昌鎮總兵靈山。二人俱在軍營著有勞績。人亦明白。去得。因降旨列入後五十功臣。將原擬之福珠里倭昇額二人換去矣。靈山尚在熱河。已令軍機大臣將伊帶兵出力之處。詢明具奏。嵩安於初二日召見後。即令回京。束裝赴任。計其到京後。自尚有數日居住。著傳諭舒赫德等將嵩安勞績。詢明覆奏。至嵩安靈山俱應畫像。並著阿桂豐昇額傳至造辦處。為伊等繪畫。○又諭據畢沅奏。甘省本年入夏以後。雨澤缺少。各屬禾苗受旱。業已成災。除被旱稍輕之處。統歸秋成勘辦。其被旱較重之蘭州鞏昌平涼涼州甘州西寧肅州秦州等各府州所屬。節候已遲。不能補種秋禾。現飭道府親往

查勘等語。甘省盼雨已久。今雖於二十四日兩次得雨二三寸。於田禾未必有濟。看來旱象已成。被災州縣約二十餘處。所有乏食貧民。亟須及早撫卹。勒爾謹此時自己回任。善為妥辦。著傳諭該督即將被旱各處切實查勘。所有應行撫卹之處。即董率各屬實心妥協經理。務使閭閻均霑實惠。毋致稍有失所。仍將如何查辦情形據實覆奏。並諭畢沅知之。又諭據文綬奏稱新設成都將軍衙

署。應需添建。擬將副都統衙門改為將軍公署。無庸修補。其副都統衙署另行添建等語。自應如此籌辦。但副都統衙署非將軍可比。止須酌蓋二三十間。足敷居住。毋得過事寬宏。致滋糜費。將此傳諭知之。又諭據文綬覆奏軍需賞號一項。現在飭查分別賠繳。至總督出口需用賞號。應於養廉內自行支給。所有相沿賞號名色。永遠裁革等語。自應如此辦理。又據稱新設之成都將軍所定養

廉較少。每年擬添公費銀或二千三千之數。以資賞犒。恭候欽定等語。將軍每年出口兩次。撫綏彈壓。賞號在所必需。自應酌添公費銀兩。俾敷應用。著每年給銀二千兩。即於餘茶息銀內照數開支。以資用度。又諭據綽克托奏稱將阿克蘇賽哩木拜城回丁共查出二千六百十八戶。現據稟稱情願將初定官租與舊住回人均攤交納。并可畧增。請將阿克蘇回人交納糧石。毋庸折交紅銅。另將

紅銅作為加增之項。每年令其解送伊犁等處等語。從前雅德等具奏喀什噶爾回子生齒日繁。請移住伊犁。令其耕種交租。朕以其所辦妥協。降旨允行。並傳諭各回城有似此者一體辦理。特因該回人等生計起見。並非令其多納官租也。今綽克托等查出阿克蘇賽哩木拜城回人餘丁。但當將初定之租令其與舊住回眾等均攤交納。若復加增。令其交納紅銅。轉非朕撫卹回人之意。著傳諭綽

克托此項查出之回丁。只令照納官租。不必另交紅銅。其應解送伊犁之銅。仍照舊辦理。併着緯克托傳諭阿奇木伯克鄂斯滿密爾普拉特阿布都爾滿等知之。○成都將軍明亮叅贊大臣舒常。四川總督文綬。四川提督桂林等會奏。自桃關出口。至巴朗拉。計十四塘。請每塘安兵五名。於內地額兵內酌撥。並於適中之卧龍關。酌派千總一員。帶兵十名駐劄。各汛文報。俱令稽察。其自巴朗拉以外。

平定縣志卷二十一

四

自松林口。至鄂克什官寨。共五站。於留駐僱拉屯防兵內撥設。仍歸美諾新營管轄。報聞。○丁未。諭曰。王杰現出學差。所有刑部侍郎事務。着錢汝誠署理。○諭軍機大臣等。據文綬奏。成都將軍擬添公費摺內。夾片聲稱。成都副都統。每年亦須出口。盤費賞犒。在所必需。可否量為加增。公費之處。恭候欽定等語。成都新設將軍。控馭番地。兼轄文武。其體制即與總督無異。是以令其每年出口兩次。撫

綬彈壓。理應酌添公費銀兩。以備賞犒之用。至副都統。本屬舊有之員。與將軍同駐省城。亦有應辦事件。若令其出口巡查。地方官自不能照將軍統屬之體相待。未免呼應不靈。於控馭番境之事。未必有益。且兩金川新設營汛之處。既有將軍一年兩次巡查。又有提督桂林常駐鎮撫。毋庸復令副都統出口巡查。其所請酌添公費之處。亦不必議給。將此傳諭知之。○又諭前因大功告竣。各路軍營。

平定縣志卷二十一

四

存貯火藥太多。諭令明亮等。於各鎮協營汛。寬為儲備外。餘送口內營協較大之處。收貯備用。今日據明亮等覆奏。以火藥五年後。類多發變。須攬合新鮮硝磺。尚可搭配。但運赴口內。腳價甚鉅。除美諾等處。所存火藥。分散各營備用外。其大板昭局內。火藥鉛丸十二萬餘。即收該局存貯等語。火藥運送口內。覈其腳價。既較內地製造。為費較多。自應即存原處備用。但火藥存貯日久。尚恐微變。而鉛

九則雖歷年久遠其質不至損壞而每年操演鉛丸非所常用其存積更多著傳諭明亮等即飭各將弁將各處所有鉛丸收貯妥密之地派撥弁兵小心看守仍不時派員稽查毋致稍有疎失其大板昭多餘火藥並著一體嚴密收貯以備將來攬合製造之用○以詹事沈初為禮部右侍郎通政使中甫為左副都御史○戊申

上詣

皇太后行宮問安○諭軍機大臣等今日召見河南卓異知府陳錫鉞詢及伊由山安河務同知卓異陞任懷慶府知府該員既由河工人員陞任在工曾否有出力之處於河務一切情形是否熟諳將來能否堪勝河工道員著傳諭高晉即行據實覆奏○又諭今日戶部奏覆福建南安縣歷年徵收陳萬策入官田地穀石多寡不同一案請委道府大員勘明酌定租數等語已派蔣允焄奇寵格前往

查覈矣此項田畝從前既收至二百數十石何以近年徵收漸次減少至一百八十餘石必係年久因循胥役等不無侵蝕漏瞞未必能儘收儘解蔣允焄奇寵格往彼履勘確覈自可得其實情著傳諭鐘音余文儀於該司道查覆到時即行覈明據實具奏已酉諭前據正白旗滿洲都統裕親王等奏郎中圖桑阿因在雲南大理府知府任內分賠代賠各項除已完銀二萬一千六百九十八兩零外尚未完銀二萬一千九百六十三兩零無力完交請將圖桑阿現報出住房田產變價入官抵項其餘銀兩於圖桑阿及伊子伯起孫永安所得俸銀錢糧全行坐扣一摺因令軍機大臣將伊應賠各項查開清單呈覽茲閱單內其自賠銀兩為數不及一萬四千餘俱分賠攤賠之項且已完交銀二萬一千餘兩計其應賠之數業已過半是圖桑阿尚有良心顧惜顏面非若諾穆親全未完繳者可

比其單內所開攤賠公阿里衮名下分賠餼養馬匹疲瘦銀三千六百五十餘兩一項豐昇額此時雖以戶部尚書署兵部將來自當仍回戶部所得分例較為寬裕可以陸續完交毋庸復令圖桑阿攤賠至其餘分賠攤賠各項自可於同案各員內攤賠歸款所有圖桑阿名下未完銀二萬一千九百六十三兩零著加恩寬免其報出田房等項仍著給還伊本身及子孫俸餉亦不必坐扣○又諭據楊景素奏招遠令朱承烈年力漸衰辦事拙滯請改補教職一摺已批交該部矣細閱摺內該員係舉人出身從前曾任教諭會試下第揀選分發等語因思教職陞用知縣人員似此揀發者少而由現任教職經督撫學政保舉堪膺民社在吏部銓選者多從前曾因保舉教職得缺後仍復改教者降旨吏部將原保之督撫學政定以處分但行之日久恐督撫等於保奏時不甚經意而於改教時

不將其曾由教職保舉之處詳晰聲叙含糊混過亦未可定著交該部嗣後遇督撫題奏知縣改教人員摺奏到部留心察覈如有曾任教職之人除由下第揀選分發及舉人進士本班截取選授知縣者毋庸查議若原保之督撫陞調他省見所保之員難勝民社不肯迴護前非據實奏請改教者自應免其處分止將原保之學政議處其餘保舉堪膺民社之教職有仍改教者所有原保之督撫學政均應照例議處若該督撫於改教摺內不將原係教職保舉之處聲叙經部查出將該督撫嚴加議處倘該督撫瞻徇原保之上司情面任意姑容經朕察出或經科道糾參必將該督撫重治其罪其如何分別定例之處並著該部詳議具奏尋議原保之學政或有陞轉與該員同省能據實查辦免其處分止將原保之督撫議處其原保之藩臬以下各上司悉視此例分別查辦至該督撫於奏請

改教時。含糊聲叙。經臣部查出。隨本查叅。照
徇情例。降二級調用。倘該督撫瞻徇姑容。查
出將該督撫革職治罪。從之。○庚戌。諭軍機
大臣等。據畢沅覆奏。甘肅蘭州省城。於二十
四日。續得雨三寸。附近州縣。亦同日均霑。俱
二三寸不等。雖土脈久乾。不能透足。而受傷
未甚之禾苗。頗足以資長發。其被災處所。現
在確查妥辦。並先行酌借倉糧。使貧民口食
有資等語。前以甘省土瘠民貧。今歲被災較
重。朕心深為廕念。已傳諭勒爾謹速行回任。
統率各屬切實查勘。善為撫卹。今日據勒爾
謹奏到。接奉此旨。星馳回任。已於摺內批示。
勉力妥辦矣。今年甘省被旱處所較多。且係
積歉之區。閭閻生計。不無拮据。必須及早撫
綏。俾免失所。著傳諭勒爾謹將應行撫卹各
事宜。督飭各屬妥協經理。至辦理災賑地方
官。自不敢藐法侵蝕。但不肖吏胥里長人等。
剋扣中飽。想所不免。該督自宜飭屬嚴加查

察。如有此等蠹役。即從重處治。懲一儆百。務
使貧民均霑實惠。以副朕軫念災黎至意。將
此由五百里傳諭知之。○以正黃旗蒙古副
都統普爾普兼署正白旗滿洲副都統。○辛
亥。諭軍機大臣等。據阿桂等奏。繪畫功臣圖
像。現在陸續進呈。並將已畫未畫及行文查
取小像各員。分別開單呈覽。自應如此辦理。
至另片所奏。行文明亮處。咨取各土司土舍
等圖像一單。其事殊有關係。番人素性多疑。
忽見將軍處。令伊畫取小像。必心生猜懼。妄
意以為圖形鎮壓。甚或疑天朝於平定兩金川
後。又將辦及綽斯甲布等土司。致令傳布驚
惶。各懷顧慮。於安輯蠻貊之道。大非所宜。且
此等土司。列在後五十功臣。非若前五十功
臣。另須彙畫成卷。親書像贊者可比。其畫像
與否。本屬無關緊要。阿桂豐昇額。在彼統兵
已久。伊等面貌。皆所熟識。而番人形狀。彼此
相仿者多。即當就在京所有番衆內。擇其約

畧相似者。指示畫工。令其繪像備數足矣。又何必遠道求圖。致生疑畏。且番境傳神。未必即能酷肖。復經摹寫。更至失真。其與彷彿擬畫者。又何以異耶。或此時暫行寫得。俟伊等輪班朝覲時。再行改定。使其見內地將軍大臣等。皆有畫像。彼亦得廁身圖列。必以為榮。而不以為懼。不過遲早之間。而事之可否。相去判然。阿桂等平日辦事精細。豈於此等處。竟未計及耶。經朕指示。阿桂等諒必心服。亦

平定六二一

必自笑其疎也。所有行文明亮咨取土司土舍圖像一節。如尚未行文。即行停止。若已經發去。著阿桂等由六百里寄信明亮。迅速將原文趕回。不必傳知土司。○增定解運銅鉛開行遲延處分。吏部議奏。銅鉛各運。定例二八月開行。各運員自滇黔赴瀘州。重慶以及開行抵通。俱有例限。及遲延處分。而未開行以前。該員特無限例。竟有遲逾數月者。自應增定處分。以重責成。請嗣後將委員在瀘州

平定六二一

重慶。耽延不按期開行者。逾限不及一月。降一級留任。上司罰俸一年。逾限一月。降一級調用。兩月以上。降二級調用。三月以上。降三級調用。四月以上。降四級調用。五月以上。革職。上司各降三級留任。從之。○壬子。諭據閔鶚元叅奏。定遠縣知縣倪存謨。於英山縣任內。審理僧廣明因姦致死杜得正一案。不能審出實情。轉將屍子杜如意刑嚇。誤認殺父重罪。又緣犯案已久。希圖規避處分。刪去屍親兩次呈詞。捏作訪聞詳報。以致案情顛倒。幾成冤獄。請旨將倪存謨革職等語。倪存謨著革職。○諭軍機大臣等。昨據勒爾謹奏。途次接奉諭旨。知甘省各屬被旱情形。隨即兼程馳回甘肅。率屬實力查辦。茲復據王亶望奏。皋蘭等二十九州縣。禾苗被旱。業已成災。五月二十二。三。至二十八。九等日。各處有得雨五六寸至深透者。雖夏禾不及接濟。於秋田大有裨益等語。已於摺內批示。一切妥為

之以救窮黎矣。勒爾謹回任。自必督同王宣望飭屬確勘妥辦。但竭伊等心力。不過就災辦災。恃有國家帑項。董率地方官詳慎勘查。實心賑卹。嚴禁吏胥等扣剋侵肥。使災黎得以均霑實惠。此雖足卸牧民之責。何嘗通盤籌畫。計及久遠之計哉。如甘省捐監收糧貯倉。原以備賑贍糶供之用。其法仍不離乎豐斂而歉散。現在被災之處。夏禾既已無望。其糶價自必加昂。若再令買穀交倉。則市中糧食價必更長。閭閻日糶餬口。倍覺艱難。自應將此成災之二十九州縣廳暫停捐監。多留市米以供民食。其餘不被災各屬糧充價平之地。又當多為收捐。運至辦災處所。以資接濟。此亦酌劑盈虛轉移利便之一法。不知勒爾謹等現係如此籌辦否。至甘省地瘠民貧。災歎幾無虛歲。惟將賑濟周給。賴以生全。年復一年。究非長策。在朕念切痼瘼。惟恐一夫失所。原不惜歲費帑金。而為地方大吏者。目

擊民艱。豈可不早為悉心規畫。必待其既荒始藉賑恤。以為補救乎。即如烏魯木齊一帶地皆沃壤。可耕之土甚多。貧民果能往彼墾藝。不但可免於飢窘。并可贍及身家。此乃天地自然之美利。供民取攜。昔為外夷地。固不可行。今幸入我版圖。近在邊地。百姓自當咸就樂土。共享豐饒。是以屢諭該督等善為勸導。俾其羣往謀生。自求樂利。而歷任督臣總未有辦及者。大率以為人情安土重遷。難以勉強。此固愚氓之昧於自計。亦由大吏之心存畏難。若云小民憚於遠涉。則山東之距塔子溝等處。較之甘肅至烏魯木齊。其道里約畧相仿。何以每歲山東出口之人。扶老挈幼。不可數計。雖禁之亦不能止。而甘肅之人。獨不聞有赴新疆之事。甚且勸之仍裹足不前乎。蓋百姓可與樂成。難與圖始。如知有利可圖。自皆趨之若鶩。直隸各口外。即其明驗。甘肅督藩等。何獨不能設法勸民。俾之聞風鼓

舞而徒聽其終歲嗷嗷待哺乎。從前招徠之民出邊。曾有辦過之案。督臣等每因資送需費。不肯多辦。此在常時則然。若當被災之餘。撫卹賑濟。每戶原不無所費。設以十年而計。每年每戶。約須賑卹若干。若合五年之費。為資送之需。亦當足用。雖現在所費較多。而算至十年。則已省其半。且此時多送一人。往邊外耕作。將來邊內。即少一待賑之人。如此遠籌。其省更不知凡幾。在國家為一勞永逸之計。在閭閻為去苦就樂之圖。而出邊戶口日

平定縣志卷二

三

多家計日益饒裕。邊鄙窮黎。自皆聞風趨赴。并可不再煩官為勸諭。一舉而兼數善。該督等。又何所畏而不為乎。著傳諭勒爾謹王。宣望。即照此旨。實心熟籌。善體朕意。妥為經理。毋負朕諄切委任之意。仍將作何酌定。妥辦之處。迅速詳悉覆奏。將此由五百里傳諭知之。○癸丑。以盛京開原城守尉恒山保為鑲黃旗漢軍副都統。○甲寅。諭曰。郝碩。顏希深。

各有應行革任之案。因其在軍營辦事。節經諭令該部於軍務告竣後。再行請旨。今據吏部奏。郝碩議處共三案。顏希深議處共二案。朕細覈情節。兩人因公處分之案。其過尚輕。惟郝碩於浙江按察使任內。有孝豐縣盜犯陳永加串通禁卒。越獄同逃一案。顏希深於木池軍營。有轟燒火藥一案。均屬伊等咎所應得。但念其均在軍營出力數年。著加恩各照應議之案。於布政使任內。以革任註冊。至

平定縣志卷二

三

白瀛近在阿桂一路。辦理糧務。甚為奮勉出力。所有軍營兵丁口糧。於通行各站文內。統行半折半支。奉行舛錯。部議降二級調用之處。著該部查明此案。如係辦理糧餉各員公錯。所有白瀛應得處分。即可加恩寬免。如係白瀛一人專辦之事。即著將所降之級。帶於按察使新任。

天

十一卷

五六九

僅餘五十五萬餘兩。可供動支。而四十年兵餉項下。應支若干。應存若干。奏銷尚未題到。無憑查覈細數等語。著傳諭勒爾謹。即查明甘省司庫實存項下。除歲需應支若干。實在尚餘若干。是否足敷今年賑卹各屬災黎之用。倘或不敷。前有部撥解川銀三百萬兩。因金川大功告成。截留存貯西安藩庫。著該督即行奏聞。於此內酌撥銀若干萬兩。就近運解甘省藩庫。以備賑卹。該督仍董率各屬。妥協經畫。務使災民均霑實惠。毋任蠹吏奸胥。侵冒中飽。將此由四百里傳諭知之。丙辰上詣

皇太后行宮問安。○以少詹事金士松為詹事。兼翰林院侍讀學士。○以通政司副使張若淳為通政使。○旌表守正捐軀河南永城縣民趙三妻梁氏。○丁巳。諭盛京吉林等處。乃我

祖宗肇迹興王之所。前因皇輿全圖。刊載地名。

不能賅備。命於

實錄內恭查。詳列清單。將原圖并交將軍弘昫等查明添補。嗣據弘昫等按其道里形勢。將所開地名添繪成圖呈覽。已交輿圖處將舊圖增改刊刻。但舊圖方幅有限。詳載地名。字體已小。不能復列事蹟。於幽岐之締造。尚不足以示昭垂。緬維

列祖

天作基祥。

鴻業經營。規模大備。如我

太祖

太宗大破明師於薩爾滸山。及凡戰勝攻取之地。

開初艱難。皆有山川疆域可考。自宜節舉大要。分注圖中。俾我世世子孫。按圖瞻仰。並得曉然於

景命所貽。

前勞所啟。一切欽承敬畏。以鞏億萬載丕丕基。

詒謀垂裕之道。無有大於此者。著將盛京等處地方。另行展拓。繪為大圖一幅。溯自長白發祥。至奄有遼瀋。

建國遷都。暨

神武戡定各事蹟。並為標目。兼清漢字分注圖中。俾皆瞭如指掌。以備觀省。而示久遠。即交大學士舒赫德協辦大學士尚書公阿桂。尚書英廉督率所司。敬謹辦理。其如何覈計里數。展圖若干。足敷標識之處。著令西洋人悉心測算。並即飭工繪樣呈進。俟閱定。即壽諸棗梨。用昭

世德鴻圖之盛。凜遵毋忽。○又諭曰。圖思德奏。滇省差務繁多。前次發往之丞倅州縣等員。業經用竣。現在乏員差委。請揀發同知二員。知州二員。知縣四員。來滇委用等語。所奏殊不曉事。揀發人員。俱係引見發往。向因各督撫。有於行在奏請揀發者。屢經降旨申飭。並令各督撫嗣後如遇應需試用人員。適當巡

幸之時者。或趕在啟蹕以前。或待至回鑾以後。具摺奏請。節次所降諭旨甚明。圖思德在外任已久。豈尚未知。乃於朕駐蹕熱河時。率爾漫奏。著傳旨申飭。其所請各員。著派豐昇額。英廉嵇璜會同該部。於候補候選人員內。照例揀選。隨下次月選各官。帶赴熱河引見發往。○又諭。前日貴州按察使國棟奏報起程。陛見一摺。據稱臬司印務。移交糧驛道國棟署理。正署同名。殊易相混。因思雍正年間。

曾奉

諭旨。遇有與大臣同名之人。令官小者改避。今國棟雖非大臣。但黔省一司一道同名。究非體制。著將道員國棟改名國梁。嗣後著各督撫留心查考。如一省內有司道同名者。將道員奏請改名。有道府同名者。將知府改名。以示區別。餘著以此類推。著為令。該部知道。○又諭。今日增福奏報。乾隆四十年熟田錢糧奏銷全完一摺。竟似通省全無尾欠。及閱楊

魁所奏清單。則上年熟田錢糧。雖已全完。而災田地丁漕項民欠。尚共有六萬餘兩。增福摺奏。自應將已完未完字樣。敘入事由。方合據實敷陳之體。乃僅云奏銷全完。而於未完之款。隱而不提。未免取巧。此乃庸陋幕友。欲藉此為見好之地。增福久任藩司。錢糧是其專責。何於入告奏銷之摺。竟不留心檢點。若此。增福著傳旨申飭。○諭軍機大臣曰。楊魁代龍承祖謝恩一摺。所奏殊未明晰。初稱據原任江蘇按察使龍承祖。繼稱謝免革任恩。後稱現已卸事。而於其丁憂離任之處。並無一語聲敘。若非朕記憶龍承祖。係丁憂人員。竟不知該臬司之因何卸事。揣其意。不過避丁憂字樣。遂爾含糊。設過題奏屬員等丁憂事故。更當如何遷就。況現在又非萬壽之月。復何所用其避忌。此必庸陋幕友所為。楊魁初任封疆。於章奏事件。豈竟全不寓目。任其率畧若此。楊魁著傳旨申飭。○又諭。前據文

綬具奏。審擬投首逃兵彭士仁。汪國才。一摺。已批交該部覈擬矣。此等逃兵。如在軍務未竣以前。聞拏投首。其人尚知畏法。或可貸其一死。若係大功告竣以後。明知不復用兵。始行投首。是已心存倖免。不可不申明軍律。俾營伍中共知儆戒。因命軍機大臣查明該二犯投首月日。於部覆到日。提奏。今據刑部按律定擬。具摺覆奏。而該犯等原供。並無投首年月。無憑查覈。著傳諭文綬。即查明該二犯於何時脫逃。何時投首。如在大功告竣以前。即據實奏聞。候朕另降諭旨。如係大功告竣以後。即將該二犯照擬正法。以示懲儆。○戊午。諭據齊呼克特奏稱。昌平州披甲尼雅哈。醉後在防守尉阿爾綑阿門首。肆行吵鬧。因令人捆縛看守。尼雅哈不知畏懼。反混行詈罵。經阿爾綑阿與防禦五什公同板責。尼雅哈回家身死。請將阿爾綑阿五什交部分別查議等語。齊呼克特所辦非是。若阿爾綑阿

與尼雅哈素有嫌隙。特尋事毆死。或無故酷刑。即應治罪。今尼雅哈身係披甲。曾因酒醉。經該防守尉阿爾綢阿教訓。不知悛改。膽敢又復飲醉。在阿爾綢阿門首。混行詈罵。目無法紀。阿爾綢阿五什。公同板責。理所當然。且係按法責處。並非任意酷刑。尼雅哈之死。實所自取。阿爾綢阿等。何罪之有。況各處將軍大臣。防守尉等。俱有管轄兵丁之責。尼雅哈如此酗酒肆鬧。若不懲責。何以儆衆。今若將

阿爾綢阿等議處。防守尉等。尚何能管轄所屬耶。阿爾綢阿五什。俱不必交部議處。將此通諭各駐防將軍大臣等。嗣後若有似此案件。俱照此辦理。○諭軍機大臣等。據陳輝祖奏到二麥收成。及雨水情形一摺。內稱湖南武陵縣。於四月十五六日。因上游辰河水發。由德山橋口。漫入城北各村。低田被淹。十一二頃。三四日內。水即消退。秧苗俱已及時補種。秋成均屬有望等語。前此敦福具報地方

雨水一摺。僅稱四月中旬。疊降大雨。溪河漲發。江湖水勢驟長。旋即消退。隄岸田禾。均無妨礙。而於辰河水發。漫淹田畝。急須補種情形。並未奏及。雖被淹田畝。止十一二頃。且補種後。秋成仍可有希望。并不得謂之一隅偏災。但地方大吏。按時奏報。凡有關旱潦之事。理宜據實直陳。以副朕軫念民依至意。不應隱飾不言。著傳諭敦福。將從前因何不行具奏。及現在情形若何。即行據實奏聞。毋稍諱捏。

干咎。○又諭。據薩載奏。運河及駱馬湖水勢驟漲。搶護平穩情形。所辦甚合機宜。已於摺內批示。薩載初任總河。偶遇河湖盛漲。即能啟閉宣洩。搶護培築。井井有條。深可嘉尚。薩載辦理巡撫事務。實心稱職。朕所深知。雖高晉曾言其可勝河督之任。朕實未之試也。今春見吳嗣爵衰憊多病。於河務恐非所宜。適薩載亦至山東接駕。因即擢為南河總河。令隨高晉學習。冀日久諳練河防。足資倚任。不

意其甫辦河工。竟料理妥協若此。薩載果能如此處處留心講求。事事實力籌辦。自可勝任有餘。朕無意中得一好總河。實為喜悅。薩載惟當益殫蓋誠。自可仰承。

上蒼嘉佑。受朕恩眷弗替也。勉之望之。○又諭據薩載奏。查勘徐屬各廳工程。及水勢情形。一摺。內稱丁家集北岸灘上。經高晉審度酌籌。估定引河一道。春間亦經挑挖完竣等語。已於摺內批示。令將此處繪圖貼說呈覽矣。

實錄卷二十一

十

至高晉等前奏。擬於陶莊引河之北。開挑引河一道。使清水益得暢行。至周家莊會黃東注。可免倒灌之虞。是亦治淮黃之一大關鍵。經朕硃筆圈出。令將圖處放一大樣貼說來。以便觀覽。何以至今尚未奏到。此時高晉辦理秋審已畢。自應前赴清河防汛。與薩載籌辦河防事宜。著即遵前諭迅速繪圖貼說呈進。將此由五百里傳諭知之。○己未。旌表守正捐軀廣東大埔縣民羅奕榮妻曾氏。○庚

申。諭軍機大臣等。今年京師及熱河各處雨水調勻。即各省督撫所奏晴雨亦均應時。看來秋收可期。豐稔惟甘肅一省。前據畢沅等奏。皋蘭等二十九州縣。禾苗受旱。當經傳諭該督等及早勘辦。嗣據勒爾謹奏於途次接奉諭旨。兼程馳回查辦。並續據王亶望奏。五月二十二三至二十八九等日。各處得雨五六寸不等。朕恐彼處旱象已成。所得之雨未必有濟。隨經諭令該督查明具奏。此旨由五百里馳遞。迄今未據奏覆。是甘省於五月下旬得雨以後。未必復得透雨。恐成災較重。且被災地方較廣。所需賑卹之項必多。前日曾降旨令勒爾謹豫行覈計。如甘省存庫銀兩不敷賑濟。即於陝省截留部撥川餉銀三百萬兩內。酌撥若干萬兩。奏聞解甘備用。辦賑銀兩既多。災黎自更得普霑渥澤。著再傳諭勒爾謹。即將近日甘省曾否續得甘霖。及已成災各屬情形若何。並應否酌撥陝西銀款

實錄卷二十二

十一

之處。迅速由驛覆奏。將此由五百里傳諭知之。尋奏甘省夏禾雖已被旱。秋成尚可。有收至所需賑卹銀兩。先借款支動。俟辦賑完竣後。再遵旨於西安藩庫內撥銀歸款。下部知之。○辛酉。刑部奏。秦廷基在寓自縊。輒往商蘇爾德移屍入獄。捏報病故之黃邦寧。依律擬斬監候。其不將秦廷基收禁之前署廣西按察使周升桓。請嚴叅究審。所有聽從送入司監之臨桂縣知縣姚文坤。不行稟阻之桂林府知府顧馨。請分別叅處。得旨。此案既據黃邦寧供。係周升桓署臬司任內之事。是秦廷基當時並未監禁。皆周升桓所為。其情罪甚重。周升桓即著革職拏問。著吳虎炳派委妥員。解交刑部。審明治罪。至黃邦寧接署臬篆。不即據實稟出。復令移屍捏報。其罪已無可逭。黃邦寧著照部議擬斬監候。秋後處決。又據黃邦寧供移屍之事。係與蘇爾德商量辦理等語。蘇爾德已經革職。應令沿途督撫。

催押來京。交刑部一併質訊明確。定擬具奏。至知府顧馨。知縣姚文坤。於黃邦寧令其移屍時。不能持正阻止。又未據實稟報。自有應得之咎。然究係上司指使。勢難相抗。尚不至於革職。顧馨姚文坤俱著交部嚴加議處。○壬戌。遣官祭

火神廟。○癸亥。諭向來道員委署兩司。其應奏交代等事。俱詳請督撫代奏。固遵定例辦理。但兩司為錢糧刑名總匯。各任內俱有應行入告之事。道員既經署篆。其責任即與實缺藩臬無異。如遇應奏事宜。原應照兩司具摺。既於公務有益。並可藉以覘其才識如何。亦屬集思廣益之道。何必轉詳督撫。多此一番轉折乎。且雍正年間。道府原有許其自行具摺者。後因其無所建白。遂行停止。若道員既署司篆。則又不必拘於此例矣。嗣後道員中有委署兩司者。俱准其照藩臬一體具摺奏事。著為令。其或喜事之徒。因有此旨。於署

理兩司時。妄行陳奏。心存覬覦。傾陷此等伎倆。亦難逃朕洞鑒也。將此通諭知之。○甲子。諭奉

皇太后懿旨。順嬪晉封為妃。欽此。所有應行典禮。各該衙門查例辦理。○又諭。據揚景素奏。平陰縣知縣饒鵬飛。於捕役李七。誣良嚇詐。毆打耿世元。斃命一案。既漫無覺察。又復規避處分。始終朦混。典史蔣開嘉。草率具報。請旨一併革職等語。饒鵬飛。蔣開嘉。俱著革職。其誣良斃命之捕役等。仍著該撫嚴審定擬具奏。該部知道。○乙丑。諭

關帝在當時。力扶炎漢。志節凜然。乃史書所謚。並非嘉名。陳壽於蜀漢有嫌。所撰三國志。多存私見。遂不為之論定。豈得謂公。從前世祖章皇帝曾降

諭旨。封為忠義神武大帝。以褒揚盛烈。朕復於乾隆三十二年。降旨加靈佑二字。用示尊崇。夫以神之義。烈忠誠。海內咸知敬祀。而正史

猶存舊謚。隱寓譏評。非所以傳信萬世也。今當鈔錄四庫全書。不可相沿陋習。所有志內關帝之謚。應改為忠義。第本傳相沿已久。民間所行必廣。難於更易。著交武英殿。將此旨刊載傳本。用垂永遠。其官板及內府陳設書籍。並著改刊。此旨一體遵入。○諭軍機大臣等。據瑪興阿奏稱。回子呼達拜底。達禮雅忒克勒底。將伊家主呢雅思豁卓。用斧砍死。復將呢雅思豁卓之妻刀傷。請將呼達拜底。達

禮雅忒克勒底。即行正法。示眾等語。朕以呼達拜底。達禮雅忒克勒底。膽敢將伊主用斧砍死。又將主母刀傷。情殊可惡。應照奴僕殺死家主例。凌遲處死。內地如有此等事件。尚且律以凌遲。回疆地方。尤當處以重辟。乃瑪興阿等。僅將呼達拜底等。擬以斬決。實屬輕縱。著傳旨申飭。新疆非內地可比。不但此等案件。宜從重辦理。即尋常鬪毆等事。亦應嚴加懲治。向來回疆此等罪犯。僅止枷杖。嗣後

如有罪犯發遣者。悉照內地之例問擬。庶新疆回衆。知所畏懼。至發遣之例。視罪之輕重。分路之遠近。如係烏什回人。即發遣葉爾羌。喀什噶爾。係葉爾羌。喀什噶爾回人。即發遣烏什庫車。哈喇沙爾等處。著傳諭回疆各城辦事大臣。凡遣犯定地。悉視此一體遵照辦理。○丙寅。增定故入失入人罪律。諭據御史李廷欽奏。已革英山縣知縣倪存謨。於僧廣明。因姦致死杜得正一案。不能審出實情。反

實錄卷二十二

十六

將屍子杜如意。疊加嚴訊。以致畏刑誣服。幾成冤獄。僅予革職。實乃罪浮於律。請嗣後凡大逆極刑。併決不待時之案。如有任情顛倒。率意刑招之員。除嚴行叅革外。即照誣告人死罪而未決定擬等語。所奏亦是。地方官承審命案。其故入人死罪而已決者。即以其罪罪之。所以儆酷吏而重民命。定例不為不嚴。惟枉坐人罪。經上司審明改正者。向因囚尚未決。止照革率定案例叅革。但遇事關逆倫

重案。如此案屍子畏刑誣服。即應寸磔。若非該撫等審出實情。另行定擬。幾至沉冤莫雪。自非尋常無心失入人罪可比。僅予革職。實不足蔽辜。但所寃之人。究未決訖。其應如何酌定條例之處。著該部詳議具奏。尋議查故入人罪未決本律。應擬滿流。凡讞獄枉斷者。原有本律可引。請嗣後除業經定罪招解者。仍按律定擬外。其雖未招解。業已定供通詳。經上司平反。囚未及決者。即照本律減一等

實錄卷二十二

三

問擬。如故入者。擬以滿徒。失入者。擬徒一年。不得僅以革職完結。從之。○諭軍機大臣等。據明琦奏。有民人高寶童。在哈密唱戲營生。因口角起釁。將同班王敏。用小刀戳傷致死。問擬斬候一摺。已交該部覈擬矣。新疆各地方。五方雜處。易滋事端。凡關係刑名案件。用法不得不嚴。俾兇頑共知儆懼。是即辟以止辟之義。此案高寶童持刀故殺。雖按律止應斬候。若照內地常例。入於明年秋審予勾。恐

日久可忘。仍不足以示懲戒。并恐其在監病斃。轉得倖逃顯戮。自應入於本年秋審情實辦理。並著刑部存記。嗣後凡伊犁回部等處。問擬斬候絞候重案。如在未勾到以前具奏者。俱照此例。趕入當年情實辦理。若已過勾到之期。方可歸入下年。將此傳諭刑部堂官知之。○丁卯。諭軍機大臣等。據禮部奏稱。朝鮮國大。通事官李詹等呈訴。在錦州所屬地方住宿。夜間被竊。失去銀一千兩。請將迎送

實錄卷一〇一一

八

官七十一等。交部嚴加議處。竊犯交盛京將軍。府尹嚴拏務獲。從重治罪。如竊賊不獲。即著落七十一等賠補等語。又據弘昫奏。朝鮮國人被竊銀兩。請著落錦州府知府協領知縣等。照數賠補。仍交部議處。副都統德福等一併交部察議。已批交部嚴議。但弘昫等摺內。并未聲敘被竊情由。閱李詹呈內。有在潘傑家住宿。夜間被竊。隨即徧尋。有銀袱一個。包銀印紙二張。擲於鄰院。包銀席片草繩。在

本家竈內燒燬等語。觀此。必係該驛丁夥同偷竊。查拏尚屬無難。著傳諭弘昫等。將驛丁潘傑。併鄰人等。拏獲嚴審。務將正犯究出。朝鮮乃外夷之人。入我邊境。弘昫等。即應派委幹員。沿途照料。住宿地方。亦當加意防守。弘昫等。俱係專管地方之員。所司何事。豈不為朝鮮所笑。弘昫等。聞報此事之後。即當一面緝捕。一面將被竊銀兩。先行照數給發。方合天朝體制。當時既未賠給。即屬不知事體。今又欲著落屬員賠補。更屬非是。此項銀兩。即著弘昫。莽古賚。德福。富察善。銘通。照數賠出。俟朝鮮人回至盛京。即行發給。此案賊犯。甚屬可惡。務須拏獲。從重治罪。斷不可以銀兩已賠。即行疎縱。以致漏網。將此傳諭知之。○又諭曰。裴宗錫奏。查辦民數情形一摺。據稱黔屬在在漢苗雜處。而向來民數。有僅報漢民者。亦有僅報苗民者。且有漢苗全不造報者。現在通行嚴飭。確查實在數目。分別漢苗

實錄卷一〇一一

八

一體開報等語。所辦非是。各省歲報民數。用以驗盛世閭閻繁富之徵。原止就內地編氓而言。其邊徼苗徭。本不在此例。國家休養生息。戶口殷繁。各省滋生之數。不啻歲增萬倍。豈藉此數處苗民。以形阜庶。况苗性多疑。只應以鎮靜撫馭為主。伊等箐居崗處。滋息相安。素不知有造報戶口之事。忽見地方有司。逐戶稽查。漢苗悉登名冊。必致猜懼驚惶。罔知所措。甚或吏胥保長。藉此擾累。致滋事端。於綏輯苗疆之道。甚有關係。斷不可行。若云恐漢奸藏匿。惟在地方官實力體察。有犯必懲。奸徒自知斂迹。若整飭不得要領。雖按戶挨查。又何足以懲頑詰慝乎。著傳諭裴宗錫。所有漢苗一體查造之處。即速停止。且不獨黔省為然。其雲南兩廣兩湖等省。凡有苗徭黎獠等類。其戶口皆不必查辦。陝西四川之番夷。及福建之生熟番境。並遵此旨。一體妥辦。毋稍滋擾。將此遇便傳諭各該督撫知之。

平康奏卷二十一

三

○定各省將軍養廉。軍機大臣議奏。各省將軍。原定歲支養廉。及米豆草折銀兩。多寡懸殊。似宜均齊。以昭平允。除盛京將軍。原支二千兩。伊犁將軍。原支三千兩。兩處事務較繁。自應照舊支給。其餘各駐防將軍。繁簡約畧相仿。請均以一千五百兩為率。其新設成都將軍。亦如之。報可。○戊辰。諭軍機大臣等。前據陳輝祖奏。拏獲逃遣鄭禮名。審明正法一摺。因命軍機大臣檢查原案。尚有同逃之軍犯宋燦。未經弋獲。該犯籍隸奉天。於乾隆三十四年。在貴州南籠府脫逃。迄今已閱七載。非潛回本籍。即竄匿他省。何以經久未獲。雖宋燦本係軍犯。即拏獲審明。不過改發外遣。然此等人犯。在配脫逃。即不當聽其日久竄匿。可見外省查緝奸匪之毫無實際矣。又如山東逆匪歸太。劉煥。二要犯。各省嚴緝。已將兩載。並未就獲。歸太曾經販馬。口外之地。熟識者多。或恐其外逸。然蒙古地面。查緝均無

實錄卷二十二

三

蹤跡。自仍在內地躲藏。至劉煥則據其妻供稱。壽張事發之日。即與其父同逃。商量往山西一帶躲避。似更無難物色。或該犯因有臨逃之語。恐官捕追躡。轉向南至江浙福建等省避匿。亦未可知。然此等要犯。彼時即令各省通緝。又屢經傳諭飭詢。而至今尚未弋獲。是各省督撫之所謂懸賞購線。嚴密搜捕者。仍視為海捕具文。惟以空言塞責。何嘗實力嚴緝乎。著再傳諭各督撫。嚴飭各地方派委員役。將應拏之要犯歸太。劉煥務須緝獲。勿使遠颺漏網。即軍犯宋燦。亦當一體偵緝。將此遇各督撫等奏事之便。諭令知之。○已已。

上詣

皇太后行宮問安。○諭軍機大臣等。據邁拉遜參奏司員科靈阿等。於錢法衙門題銷寶源局用過銅錫鉛觔一案。數目不符。該司員等既經查出。並不回堂。私行付查該局。以致錢法衙門。得以自行具奏。顯有瞻徇情弊。請將

承辦司員科靈阿等。交部嚴加議處等語。此案在邁拉遜。因該司員等。既經查出數目舛錯。不即回堂。先行付查。疑有情弊。是以具摺參奏。但董誥亦係工部堂官。非不應與聞之人。今因該司付局行查。董誥即聞而自行檢舉。設或該司官回堂。又何能獨令董誥不知乎。若其事不過如此。不足為異。抑或另有別情。至崧璜德成之不同列銜。或以向例如此。毋庸參奏。或有偏向董誥之處。並著留京王大臣。詢明覆奏。邁拉遜摺著鈔寄閱看。○朝鮮國權署國事李祘奏。朝鮮國王李昫。於乾隆四十一年三月初五日薨逝。一摺。得旨。朝鮮國王李昫。謹守藩封。五十餘年。恭順事上。慈愛撫民。深為可嘉。忽聞患病溘逝。朕心不勝軫惻。應得卹典。著察例具奏。該部知道。○是月。直隸總督周元理奏。滄州捷地壩口。舊築石海墘以外。僅有石簸箕八大。下即灰土工程。每遇漲發。易於衝塌。漸至搖動石工。請

於石籬箕外。添築大石坦坡。並灰土工程各七丈。為一勞永逸之計。下部知之。○大學士管兩江總督高晉奏。臣所轄三省。秋審之前。惟赴江蘇會訊。安徽江西二省。只覈招冊。從不會勘。自因江寧至蘇。郵程較近。故歷年如斯辦理。但秋審大典。民命攸關。不宜以遠近繁簡為軒輊。請嗣後分年輪勘。江蘇會勘之次年。赴安徽。又次年。赴江西。俾三省。問刑官吏。警動耳目。於案件益當盡心。而藉此出巡。

於察吏操防。益加周密。得旨。所奏甚是。自應如此。著為例。該部知道。○陝甘總督勒爾謹奏。甘省被旱較重。臣兼程回任。現督同司道認真查勘。務使災民生計有資。得旨。甘省地瘠民貧。早已諭汝一切賑恤。勉力為之。又片奏。甘省貧民。現設法勸導前往烏魯木齊墾種。容詳加籌畫。另行奏聞。得旨。覽。此實與甘肅有益之事。毋視為具文。而遇災更可為移民就粟之舉也。○雲南布政使朱椿奏。滇省

投誠各土夷。向皆仰給於官。但滋生日見繁衍。國家經費有常。勢難增給。此時固未便將現食口糧議裁。至其屬下丁壯。請飭令於安插地方。或佃種傭工。或小本貿易。更有年力盛壯者。酌挑入伍。該土夷等既得長霑樂利。而歲給口糧。亦有限制。得旨。所奏似有所見。待朕徐酌之。

大清高宗法天隆運至誠先覺體元立極敷文奮武孝慈神聖純皇帝實錄卷之一千十一

大清高宗法天隆運至誠先覺體元立極敷文奮武孝慈神聖純皇帝實錄卷之一千十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理
吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履歷
總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部庫事
務世襲騎都尉軍功加十九級隨帶加二級又加二級臣量揅內大臣戶部尚書鑲黃旗滿洲都統軍功紀錄五
次尋常紀錄十四次臣德瑛經筵講官太子少保工部尚書紀錄六次臣曹振鏞等奉
敕修

乾隆四十一年丙申秋七月庚午朔享

太廟遣誠郡王弘暢恭代行禮○辛未諭軍機大臣等據勒爾謹奏甘省續得雨水情形一摺但稱六月二十日省城續獲甘霖入土深透茲秋禾大有裨益而於被災各屬得雨是否有濟及現在作何籌辦撫卹情形均未提及著傳諭勒爾謹速遵節次所降諭旨將臬蘭等屬此次曾否一體得雨能否稍資補救及現在勘辦災務情形若何即速由驛奏覆慰朕廑念至另摺覆奏收捐監穀一事稱被

災二十九州縣均係一隅偏災非普被災傷可比若概令停捐必需撥運未免需費不貲等語既有此情形自當酌量妥辦但須實心籌畫不使糧價過昂致妨民食又據奏籌辦貧民出口墾種一事尚未能得要領因思易與樂成難與圖始本屬常情總須令其自知新疆一帶有自然美利到彼耕作即可共享豐饒如山東百姓之趨赴口外雖禁之不止方為妥善若如所稱咨行新疆大臣查明地畝若干可以安插窮民若干詳細咨覆一面設法曉諭再行陸續送往小民見係官辦尚似驅令遽移即一時勉強相從仍不能冀其源源樂赴此時籌辦之始止可詢問貧民有願赴新疆墾種而力量不給者官為資送不露強迫情形向後願往者多可不煩資助方為經久良法再傳諭勒爾謹等另行熟籌妥辦仍將如何設法便民之處據實覆奏將此由五百里傳諭知之○壬申

上詣

皇太后行宮問安。○諭曰：索琳不勝尚書之任。著降補理藩院侍郎。仍帶革職留任。所遺理藩院尚書員缺。著伍彌泰補授。○諭軍機大臣曰：高晉等奏覆開挑黃河周家莊引河一摺。并展大圖貼說進呈。朕披閱圖內所繪引河形勢。尚覺太窄。已於圖內批示。從來河不兩行。既經開挑引河。則黃河大溜。即應由引河行走。必須開挖寬深。方能引溜全注。細閱貼說。但稱計長一千零五十丈。而於寬深丈數。均未奏及。恐高晉等因省費起見。是以不肯開寬。朕念切愛民。凡有關民間利病及保障之事。從不稍為靳費。況此項引河。為黃淮緊要關鍵。若果能開放深通。使黃流不致停淤。清水得以暢出。實為最善之舉。即多用帑金。亦所不惜。但須覈實經理耳。國家籌辦要務。若行之有益。縱數逾鉅億。亦不為多。若為而無成。雖費僅千餘。亦屬虛擲。即如近日征

勦兩金川。用至六七千萬。而大功既成。足為一勞永逸之計。不得謂之糜費。此其明效大驗也。著高晉等悉心籌度。將擬開之引河。一律挑挖寬深。其引溜處尤宜寬展。使正溜易於趨注。高晉等即將河身擬挑寬若干丈。較現在河身幾分之幾。底深若干。於圖內詳晰貼說覆奏。再圖說內稱。俟引河開就。應於對岸另築挑水壩。挑溜引注新河等語。朕意似可將第四木龍畧移向上。在硃圈記出之處安置。便可借以挑溜。但未知能得力否。又就圖內河流形勢而論。於新開引河。似可再移向上。於第二木龍對岸。徑直開下。似更便捷。該督等或因彼處大溜趨勢尚未甚急。恐不能引流直注。如建瓴之勢。是以欲於稍下施工。抑或可照朕所指。量為移上否。並著高晉等一併詳加勘度。據實覆奏。至摺內稱東西兩壩。因每年頻折頻築。歷歲已久。壩底不能剗挖淨盡。或為柴土壅塞。或為倒灌淤積。以

致清水不能暢出。請將舊壩基址創盡。以期清水出口得力等語。此係向來辦理不善所致。已於摺內批示。展收清口。實為緊要機宜。自應將壩根創盡。使無壅滯停淤。方為妥善。何竟草率從事。若此。歷任承辦之人。均難辭咎。朕此時亦不將伊等治罪。所有現擬創挖舊壩基址之費。即著落乾隆二十七年以後。原辦之歷任總河及該管河道。按年分賠。以示懲儆。將此傳諭高晉等知之。尋奉查勘。現在河身寬一百四丈。酌擬挑寬引河。河頭四十丈。河身三十五丈。河尾三十丈。較現在河身三分之一。河底擬深一丈。至一丈五尺不等。至新開河頭。移於第二木龍對岸開下。溜行更為便捷。第四木龍。移上安置。惟河面寬濶。仍擬於對岸築挑水壩。俟霜降後覆勘。請旨辦理。得旨。覽奏俱悉。屆時更當相機妥為之。○癸酉。豁免四川馬邊廳屬。乾隆三十九年。起科地內不能開墾砂地。三百九十八頃。

八十九畝有奇額賦。○甲戌。上奉

皇太后幸卷阿勝境。侍早晚膳。○諭軍機大臣曰。勒爾謹奏。興漢鎮標兵丁黃聚寶等毆傷興安州吏目毛文銘一案。已交行在軍機大臣會同該部速議具奏矣。黃聚寶以鎮標兵丁。因吏目喝禁楊魁等在街口角。輒敢隨至衙署。肆行辱罵。推倒公案。及吏目告知該管遊擊。復敢招引各兵。攔截毆打。目無法紀。兇頑已極。不可不從嚴治罪。以示懲儆。該省從前曾有固原鎮屬兵丁鼓譟之案。當經嚴行懲治。今歷年稍遠。未免時過事忘。復有兵丁毆官之案。可見該省營兵。桀驁不馴。積習甚為可惡。該管之督撫提鎮。平時均當嚴行管束訓誨。不使驕縱恣橫。輕罹法網。畢沅現請陞見。已著軍機大臣存記。俟伊到時。即詳悉告知。著傳諭勒爾謹。伊係總督。兩省營伍。皆其統轄。此案現雖辦結。其餘各處營協。俱應

加意整飭。嚴加鈐約。如稍有違犯。隨時按律重懲。毋稍寬縱。俾衆兵咸知儆惕。不敢再滋事端。此旨著隨議摺由六百里發往。並著勒爾謹轉行各該提鎮知之。○又諭據勒爾謹奏。延綏鎮總兵三德寧夏鎮總兵斐慎。因奏准陛見。皆不待委署之員到任。即將印務一面交中軍遊擊。一面起程前往。即此一節。已見該鎮等未諳體制。似於總兵不甚相宜。請改予內用等語。所奏甚謬。已於摺內批示矣。三德斐慎。不待委員接印。即行起程。其意不過急於陛見。並非大過。謂之不諳體制。則可。該督乃因此一節。遂以為不宜總兵。實屬過當。而不合乎理。如該鎮等回任後。果有貽誤營務之處。該督原不妨據實具奏。請改內用。豈可豫存成見。逆料其不能勝任。急為此奏耶。況三德曾任潼關副將。斐慎由雲南遊擊。歷任副將。皆曾辦營伍之事。又何以謂其未能練習耶。且三德斐慎在軍營頗為出力。是

以擢用總兵。昨來行在陛見。召對時。視其材具器識。均尚可勝總兵之任。密為記載。著將原片二件。封發勒爾謹閱看。令其閱畢。仍即繳回。俾知朕於總鎮等之是否相宜。一經召見。無不密記。以備考覈。文職道府以上亦然。總因人材難得。故時刻留心。冀備任使。朕於用人之道。慎重若此。勒爾謹身任封疆。豈可不為國家愛惜人才乎。朕意勒爾謹之為此奏。不過因伊在京陛見時。朕曾面訓平日過於姑息。令知悔改。遂急欲以此見其風力。尤屬誤會朕旨。朕所以飭為姑息者。乃就伊所短。概指其性情辦事而言。惟當隨時儆覺。遇事整頓。以副朕教誨成全之意。豈無端劾兩總兵。便得謂之不憚改過。實力振勵。以見其風力乎。又聞該督同日奏到。請以趙登高委署寧夏鎮總兵一摺。稱其訓練精勤。官兵畏服等語。趙登高前經畢沅奏請。留補潼關協副將。該督不過因趙登高在甘年久。欲朕將

伊補放總兵。合兩摺以觀。其肺肝如見。勒爾謹愚而取巧。甚屬非是。著傳旨嚴行申飭。○刑部議覆吏部左侍郎管順天府尹素守伺奏稱。各省恭遇恩旨減等人犯。在途會赦。令各督撫確覈案情。分別辦理。其不應減等者。不得概行遞回。應如所奏。從之。○乙亥。諭軍機大臣等。上年鎮算總兵楊大業。至盤山行在。陛見召對畢。諭以出去。而該鎮即奏請回任。實屬見小。不知大義。降旨交部議處。嗣經兵部議以革職。朕復念其究非大過。仍予從寬留任。但該鎮所見如此。其才識自屬平常。鎮算為苗疆最要之缺。恐楊大業不足以當此任。著傳諭陳輝祖。將該鎮辦理營務何如。於苗疆要缺是否相宜之處。即行據實具奏。○留京辦事王大臣等奏。遵詢邁拉遜叅奏司員科靈阿一事。查取錢法衙門題蒙并科鈔覈對。其數目不符。係出語錯誤。委無他弊。寶源局與虞衡司。時有查覈事件。向例俱用

付行查。科靈阿係照例辦理。並非瞻顧。嵇璜德成因司付行查。其來已久。不得謂私。是以此摺未經列銜。並無偏向董誥之處。得旨此事邁拉遜未免有意搜求。辦理公事。不應如此。邁拉遜著飭行。○命大學士舒赫德。于敏中。充文淵閣領閣事。署內閣學士劉墉。詹事府金士松。翰林院侍讀學士陸費墀。陸錫熊。侍講學士紀昀。朱珪。充文淵閣直閣事。○丙子。諭軍機大臣等。現在兩金川全境蕩平。設鎮安營。駐兵控制。實為一勞永逸之模。至該處各地方。雖經阿桂等繪圖進覽。彼時尚未親履其地。山川形勢。不過約畧遙計。未能悉準。又兩金川四境接壤。係何土司及通藏之路。從何行走。前圖俱未詳晰。著明亮即將兩金川四境所有各土司地界。遠近次序。及有幾路通藏之處。逐一確查。按準方向。繪為總圖。詳加貼說呈進。俾該處境壤一覽瞭如。將此傳諭知之。○丁丑。諭前據勒爾謹奏。興漢鎮

標兵丁黃聚寶等毆傷興安州吏目毛文銘一案。已將該兵黃聚寶等分別斬絞正法。從嚴辦理。以示懲儆矣。茲畢沅來至行在。陛見。詢及此案。據稱。因該鎮保寧進京。陛見。將總兵印務交中軍遊擊唐輝先行起程。該處無大員彈壓。致兵丁得以藐玩滋事等語。前日勒爾謹亦有總兵三德斐慎皆不待署員到任。即行起程。陛見之奏。該鎮等急於瞻覲。固屬臣子依戀情殷。但提鎮為專閫大員。責任綦重。自當以營伍公務為念。各鎮奏請陛見。朕多批以問之總督。於可來時來。此即令其待署印人之意也。其偶有批准來者。若一聞准其陛見。即將印信交付中軍起程。既於體制未協。且恐兵丁等見統轄無人。易生玩縱。於事甚有關係。陝甘如此。恐他省應行陛見之提鎮亦有相似者。著通諭各省提鎮嗣後如有奏准陛見及事故離任者。俱著俟署印之員到任。交代後方准起程。違者該部查明

照例議處。○又諭此次平定金川。所有各省綠營調往馬步兵丁。其借支行裝銀兩。應於回營後扣餉還項。因伊等俱曾効力行間。業於恩詔內展限三年分扣。今復念該兵等應扣之項較多。若於三年內扣完。恐月餉所存無幾。不足以資養贍。著再加恩。照從前平定伊犁回部之例。分作十年坐扣。以示體卹。○諭軍機大臣曰。高晉等奏籌辦瓜州江岸坍塌情形一摺。據稱瓜州城外查子港工迤下。殷家莊接連迴瀾壩江岸。於六月初十日。忽然裂縫。坍塌入江。約長一百餘丈。西南城牆塌去四十餘丈。現在水勢已平。兩頭壩工業經裹護穩固。請將瓜州城量為收進。讓地於江。并於沿江靠岸一帶築成土壩。以通緯路等語。祇可如此辦理。已於摺內批示。從來水行無事。難與爭地。河流尚且不可。況江勢浩濶。豈人力所能抵禦。朕從前巡幸江南。親閱瓜州一帶江工。恐江溜奔注。侵至城根。欲將

城牆稍收。以讓水勢。嗣復諭令高晉勘閱籌辦。高晉以溜已開行。江岸平穩。遂未辦及。惟照舊拋填碎石。為補苴無益之計。今果如朕所料。使早將城垣收進。何至猝為江溜所衝。頽則數年來拋石之費。不歸於虛擲乎。著傳諭高晉。當以前事為鑒。妥善經理。以資鞏固。並諭薩載知之。○又諭前據高晉奏。查封熊學鵬家產一案。兩淮總商江廣達。賣給伊子熊之台鹽窩。又代為經營。及至查封時。不即呈明。議令該總商追出原價。贖回鹽窩。加倍罰銀三萬一千餘兩。朕因江廣達家計素窘。現係賞借銀兩。助其資本營運。安能加倍罰銀。諭令伊齡阿。傳詢該商。看其所供如何。再行降旨。今據詢明覆奏。江廣達將自有鹽窩。賣給熊之台。原無不合。至既賣之後。復代熊之台營運。及省城查封熊學鵬家產時。出示曉諭。江廣達並不即時稟首。其過自無可辭。但念伊究係商人。不足深責。所有高晉議令

加倍罰銀三萬餘兩之處。著加恩寬免。將此傳諭高晉并伊齡阿知之。○戊寅上詣皇太后行宮問安。○己卯孝懿仁皇后忌辰。遣官祭景陵。○諭向來滿洲蒙古用為道府人員。丁憂回旗。仍在原衙門行走者。曾經諭令每過三年。吏部將該員等帶領引見。量加簡錄。茲自乾隆三十八年冬間查辦以後。迄今又閱三載。因思此等滿員。曾任道府。於地方事務較為熟習。自可仍以外用。而旗員向例百日期滿。即可當差行走。原不必待至三年服闋。始令引見。嗣後著吏部查明滿洲蒙古人員。有道府丁憂回旗。已滿百日。在部行走者。俱於每年十月內。帶領引見一次。即自今歲為始。○庚辰。諭據弘旰奏。本旗蒙古補放步軍校。將擬正之委步軍校穆克登額補授。其擬陪之驍騎校阿什達。照例記名坐補。似覺過優。

請作為委步軍校行走等語。所奏甚是。嗣後八旗有遇此等補放員缺。將擬正者補授。其擬陪者。皆作為委步軍校。不必記名。著為例。○辛巳軍機大臣等議覆成都將軍明亮等奏稱兩金川善後事宜。已辦有就緒。所有塘馬。除郫縣灌縣映秀灣桃關四站。照內地例歸地方官經管外。其桃關口外草坡至噶喇依共二十五塘。自草坡至二道橋。令桃關汛員經管。自卧龍關至已朗拉。令卧龍關汛員經管。至桃關口外。經過瓦寺鄂克付兩土司番地。道路荒遠。各塘止有汛兵五名。請酌派土兵五名當差。再自成都至廣元一帶。每驛奏留臺馬八匹。以供馳遞。今請裁。均應如所奏。從之。○壬午。

上奉

皇太后幸卷阿勝境。侍早晚膳。○諭前據刑部議覆文綬奏。審擬投首逃兵彭士仁汪國才。照例即行斬決一案。朕以此等逃兵。如在軍

務未竣以前。聞拏投首。其人尚知畏法。若係大功告竣以後。明知不復用兵。始行投首。不可不申明軍律。俾營伍共知儆戒。因諭令文綬查明該二犯投到日期。據實奏聞。今據覆稱查明彭士仁係於上年十月十二日。在銅梁縣投到。汪國才於上年十一月初十日。在巴縣投到等語。此等兵丁。在軍營潛行脫逃。原屬法無可逭。但既查明該二犯均係軍務未竣以前。自行投首。尚屬心存畏法。較之徹兵以後。妄冀倖免。始行投到者。究屬有間。尚可格外施恩。於萬無可貸之中。宥其一死。著交刑部。仍照從前投首例。減等發落。其大功告成以後投首者。不得復援此例。○又諭據圖思德奏貴州委員永從縣縣丞劉集禧採買滇銅。因腳戶杜厚培虧缺。押令將閩省銅觔抵免。以致杜厚培自刎身死。請將劉集禧革職審究等語。劉集禧著革職。交該督與案內有名入犯一併嚴審究追。定擬具奏。諭軍

機大臣曰。據圖思德奏。已降旨將劉集禧革職。交該督嚴審究擬矣。人雖在滇省。而事則黔省之事。裴宗錫何未奏聞。劉集禧前已呈報於二月初十日。全數掃幫。運出滇境。何以四月二十三日。劉集禧尚在滇省逗留未回。其所解銅觔。曾否報入黔境。有無陸續運到。該撫於該員稟報後。曾否行催。此項銅觔。現在有無虧缺情弊。並著裴宗錫。詳晰查明。據實覆奏。尋奏。劉集禧承運滇銅三十六萬六千三百四十觔。據報二月初十日。掃幫運出滇境。因與腳戶覈算運腳。以致耽延。所解銅觔。臣於該員稟報運入黔境後。均經隨時行催。陸續運到。現已全數收局。並無虧缺。除原叅之案。聽督臣審斷外。請勅部將臣議處。以儆疎忽。下部議。○癸未。諭曰。三寶奏。杭州東防同知陳虞盛。現在告病。所遺之缺。請以秀水縣知縣張圖南陞署等語。近年海塘情形。頗有可慮。西塘一帶。迴溜頂衝。鑲墊等事。均

須辦理。該同知係專管塘務之員。工程正資熟手。何以急急告病。安知非見近年潮溜北趨。惟恐有事干礙。先為規避之計乎。該撫理應委員勘驗。並親加覆勘。不應遽爾准行。即使其病屬實。亦當留於工所。未便即准回籍。三寶何竟見不及此。著查明據實覆奏。至向來道府。遇有告病之事。督撫具題到日。該部以應否准其回籍兩請。內閣俱稟擬雙簽請旨。朕視其本任無急需承辦事務。及原缺無關緊要。又非規避上司者。多准其回籍調理。其丞倅以下。俱不由部覈議。舊例尚未允協。嗣後同知通判及知州知縣。遇有告病乞休等事。應作何覈議兩請之處。著該部另行定例具奏。至該撫所請以秀水縣知縣張圖南陞署杭州東防同知之處。併著該部議奏。○大學士禮部會議。朝鮮國王妃金氏奏。請追賜故世子李緯爵諡。及故世子婦趙氏誥命。與例不符。應毋庸議。得旨。朝鮮國王李昫已

故長子李緯前經封為世子。因其早逝。未及襲爵。今該國王妃金氏請以世孫李祘襲封國王。因為故世子李緯陳請追賜封典。照例議駁。固是。但念其以宗統繼序為請。情詞懇切。揆之禮制。事屬可行。著加恩照所請。給與爵諡。誥命。該部遵照辦理。以示朕優卹藩封之意。○遣散秩大臣覺羅萬福內閣學士嵩貴賜祭。故朝鮮國王李吟諡莊順。追賜故世子李緯爵諡。謚恪愍。封世孫李祘為朝鮮國王。敕諭曰。皇帝勅諭朝鮮國王世孫李祘覽奏爾祖王吟薨逝。朕心惻然。據王妃金氏奏稱。爾自幼聰明。性敦仁孝。夙有長人之德。為國人所願戴。請冊承襲。朕俯順輿情。特允所請。茲遣官齎詔。誕告爾國。封爾為朝鮮國王。繼理國政。封爾妻金氏為國王妃。佐理內治。并賜爾及妃誥命。彩幣等物。爾宜永矢靖共。懋繼承於侯服。迪宣忠順。作屏翰於天家。爾其欽哉。毋替朕命。故諭。○甲申。中元節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○

上命。

皇十五子顯琰祭。

孝賢皇后陵。○遣官祭。

端慧皇太子園寢。

大清高宗法天隆運至誠先覺體元立極敷文
奮武孝慈神聖純皇帝實錄卷之一千十二

實錄卷之一千十二

主

大清高宗法天隆運至誠先覺體元立極敷文
奮武孝慈神聖純皇帝實錄卷之一千十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲部統世襲將軍都統軍功加七級隨帶加一級尋常加二級軍功紀錄一次臣 鹿桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部二庫事務

世襲騎都尉軍功加十九級隨帶加二級又加二級臣 董浩內大臣戶部尚書鑲黃旗滿洲部統軍功紀錄五次

尋常紀錄十四次臣 德瑛經筵講官太子少保工部尚書紀錄六次臣 曹振鏞等奉

奏修

乾隆四十一年丙申七月乙酉諭軍機大臣

實錄卷之一千十三

一

等。據阿思哈奏常州府白糧幫旗丁王益周
回空漕船行抵夏津縣屬油坊地方跟幫住
泊。於七月初五日二更時分有劫賊多人紮
頭明火持械上船行劫。打傷副丁王本周。肆
行擄劫。逮運弁李世登等。鳴鑼傳集船丁捉
拏。賊即負賊逃逸等語。覽奏深為駭異。回空
漕船被劫。實屬從來未有之事。且油坊為南
北通津。乃賊匪敢於糾眾持械。黑夜行劫。尤
屬目無法紀。情罪甚為可惡。該處距臨清不

遠前歲王倫滋事。業經殲戮匪徒。大加懲創。附近之人。應知儆戒。今為時未久。何以復有此等案件。或者彼時漏網兇犯在中。亦未可知。必須速獲首夥各犯。盡法究治。庶足以戢奸究而安良善。此事楊景素何以尚未奏到。至夏津地方。為兗州鎮瑪爾清阿所轄。緝匪乃其專責。況該鎮現在沿河督催漕船。何以尚有強徒肆劫糧船之案。該鎮所司何事。及閱該鎮今日奏到之摺。但稱上緊嚴催回空。

糧船。及沿途莊稼情形。而於漕船被劫一事。並未提及。殊不可解。豈竟毫無聞見。抑視此等事無關緊要耶。瑪爾清阿著傳旨嚴行申飭。此案著即交楊景素。及瑪爾清阿嚴飭地方文武。上緊查拏。務將要犯全行緝獲。嚴究黨羽。從重定擬。以示懲儆。毋使一名漏網。至油坊地界。與直隸毗連。恐賊匪聞拏緊急。竄匿該省。並著周元理一體飭屬嚴密查緝。如有弋獲。即審訊明確。一面奏聞。一面正法。不

必轉解東省。致稽顯戮。將此由六百里傳諭周元理楊景素及瑪爾清阿知之。仍將現在曾否拏獲盜犯之處。迅速具奏。○丙戌。

上詣

皇太后行宮問安。○旌表守正捐軀直隸隆平縣民任隆妻張氏。○丁亥。諭曰。巴延三即著實授山西巡撫。鄂寶著調補湖南巡撫。俟辦理川省軍需奏銷事竣。再行請訓赴任。所有湖南巡撫印務。仍著布政使敦福護理。○又

諭曰。原任總兵靜海著來京。署理鑲白旗護軍統領事務。○諭軍機大臣等。據舒赫德等奏。將盛京等處地名。另行展繪全圖。標題紀載。並將各事蹟。兼清漢字。依次附載圖後。用備稽考。繪圖呈樣。自應如此辦理。此圖繪成刊刻時。應將朕前日所降諭旨。列於圖首。以昭久遠。至皇輿原圖。盛京僅有兩排。止須將新查地名。添入原圖。照舊標識地名。毋庸紀載事蹟。將此傳諭知之。○又諭。據巡視中城

御史敦岱等奏六月二十二日。有山西監生楊亨昇。控告開韶皮鋪之孫宏亮。誣騙本銀六千八百餘兩。清錢五百餘千。本月初六日。又有山西民人曹盛德。控告孫宏亮。欠銀五千兩。俱批交兵馬司指揮查訊。初八日。左都御史素爾訥進署。即傳指揮繆永垣問及此案。提查原訊供詞。並云孫宏亮不應鎖押。又言此係民間浮債。何須如此催追。伊既開有皮鋪。不必管他。但令自行清理等語。此事為向來所罕見。楊亨昇等控告孫宏亮。負欠不還。至萬餘兩。先後俱在該城遞呈。批交該指揮查訊。孫宏亮既係被告。自應拘提鎖押。該都御史何以進署。輒行問及。轉以鎖押為非。且孫宏亮竟負欠至如許之多。既經控告在官。豈可不官為審斷。即或原告誣賴。訊明亦有應得之罪。未可一概付之不問。乃素爾訥竟指為浮債。不必官追。而欲聽其自行清理。實非情理所應有。素爾訥偏向孫宏亮。若此。

恐其中或有請託別情。不可不徹底查辦。著將此案。交留京辦事王大臣秉公查審。務得實情。並傳素爾訥詢問。因何開脫被告緣由。并切訊孫宏亮有無鑽謀賄囑情弊。先行據實覆奏。○以江南壽春鎮總兵李化龍。山東登州鎮總兵李奉堯。對調。○戊子。諭曰。熱河道庫存貯銀兩。每年有放餉及應需備賞之項。著於戶部庫銀內撥三十萬兩。發交存貯備用。○工部左侍郎德成奏。京通各倉。每年修理事宜。得旨。所奏是。嗣後各倉廩座。應行拔草修理時。即著工部堂官。揀派司員。帶領工匠。前往妥協辦理。無庸交各該倉自雇匠役。至所奏太平萬安兩倉。地形稍窄。嗣後如遇工程。即將拆下渣土。隨工出運。仍造冊送部查覈之處。亦著照所請行。○己丑。土爾扈特郡王舍楞。台吉伊班入覲。○建甘肅奇台廳倉廩二十間。從署陝甘總督畢沅請也。○

庚寅

上奉

皇太后幸卷阿勝境。侍早晚膳。○諭曰。楊景素奏回空漕船在夏津縣油坊被盜一案。請將廢弛諱飾縱盜不職之夏津縣知縣范君傑武城汛把總王培進一併革職等語。范君傑於旗丁具報失事之後。輒敢意存諱捏。刪改各供。並抑令事主自認妄報。種種巧詐情節。甚屬可惡。更非尋常諱盜為竊可比。僅照諱盜常例革職。未足蔽辜。范君傑著革職。發往軍臺効力贖罪。王培進著革職。至油坊汛兵並不支更防護。及聞鳴鑼往看。謊稱旗丁並未告知。又不登時協力追捕。綠旗兵玩弛積習。殊可痛恨。所有該處汛兵。著查明姓名。於失事地方枷號一年。滿日發往烏魯木齊種地。以示懲儆。其專轄統轄各員。並著查明參奏。○諭軍機大臣曰。文綬奏據阜和營遊擊等稟報。打箭鑪一帶。連日大雨。六月二十六日亥時。明正司地方海子山。大水陡發。衝倒

南門。城內文武衙署。監獄兵房。衝去數百間。化為石灘。淹斃兵民甚多。又據榮經縣詳稱。六月二十七日。山水暴發。沿山溝河。多被衝壓。即日自省起程。親往查辦等語。看來此次打箭鑪被水情形較重。文綬既親身前往。即著查明實力撫卹。毋致失所。至打箭鑪城內存貯錢糧軍火器械甚多。其鑪關稅務亦屬緊要。文綬到彼。應將錢糧軍火器械及關稅庫貯衙署等項。作速清理。其存貯米石內。查明如有被水浸濕者。即行撈取。亦可酌量搭放賑卹。至該處係通藏衝途。及赴番地要路。其城垣倉庫官署營房均宜速行修葺。但鑪城舊基適當山水頂衝。雖水發非常有之事。但既修葺城垣。自應悉心相度。擇其地勢較高。不當山水頂衝處所。將城垣另行移建。為一勞永逸之計。並著文綬妥速籌辦。將此由五百里傳諭文綬知之。仍將作何辦理情形迅速覆奏。○又諭前據荊州將軍興兆奏。此

次往四川軍營之荊州駐防兵丁。內有委署官八十餘人。其原給頂帶。應否仍令其戴用等語。朕因此項委署官員。何至如許之多。諭令阿桂。豐昇額。查奏。並傳諭吉林黑龍江等處將軍。將有無似此委署人員。及作何辦理之處。一併查明具奏。茲據阿桂等奏稱。此等委署官員。除缺出挨次補用外。亦有叅贊大臣等。在前敵見有出力兵丁。偶然賞給空翎頂者。徹兵時。應行摘去。從前辦理。準噶爾。回部。有似此者。徹兵時。俱即摘去。此次自應一體照辦等語。此次在軍營之駐防滿洲兵內。既有委署人員過多之事。綠營諒亦有之。徹兵後如何辦理。未據各該督撫等奏及著傳諭各該督撫。將此次派往四川各營。有無似此委署之人。及是否戴用頂帶之處。遇便覆奏。○又諭前因甘省皋蘭縣等屬。夏禾被旱。節經諭令該督等。上緊查勘撫卹。並將各處曾否續得雨澤。據實奏覆。今據勒爾謹奏稱。

七月初四日。省城及鞏昌平涼涼州秦州階州等。六府州屬。俱陸續稟報得雨二三四五寸。至深透不等。確查各屬。凡平川窪地。稍可薄收者。現在尚敷餬口。其夏禾無濟。可以翻種晚秋者。借給籽種等語。所辦恐屬無益。得雨已屆七月初旬。即亟亟補種。六十日成熟之晚禾。亦須再遲兩月。方能收穫。計彼時已屆九月初旬。邊地氣寒霜早。豈能結實收成。所云借籽補種。仍屬有名無實。看來該省今年已成旱災。各處惟當加意撫卹。轉不必稍存諱飾之見。著傳諭勒爾謹。即速董率各屬實力妥為撫綏賑卹。務使邊地災黎。均霑實惠。毋致一夫失所。將此由五百里傳諭知之。仍將如何辦理情形。迅速奏覆。○又諭據明山奏。科布多所用之斛。大小不同。已另製木斛收糧。較部頒鐵斛微大等語。收放米糧。斗斛宜歸畫一。收糧之斛。即應為放糧之斛。毋得大小兩歧。以致豐取剋與。著傳諭明山諸

事宜得大體。勿以瑣屑事件。更改滋弊。○辛卯。諭軍機大臣曰。勒爾謹奏。此次平定金川。所有甘省綠營調往馬步兵丁借支行裝等項。應扣追銀十五萬餘兩。請代完銀三萬兩。布政使王亶望代完銀二萬兩。餘於總督提督。至道府叅遊等員。各照養廉攤扣。以清款項等語。此項應扣銀兩。昨已降旨加恩。照從前平定伊犁回部之例。分作十年坐扣。兵力自可不致拮据。毋庸代為完繳。將此傳諭知之。○壬辰。諭軍機大臣等。前據阿思哈等奏。回空漕船在油坊被刦一案。已屢諭楊景素上緊查拏。務獲各犯。從重定擬。茲楊景素奏。稱據東昌府知府赫紳泰。臨清州知州李濤。於沿河當店。查起原贓。於鄭家口緝獲盜犯王二。沈二。供出首夥各犯姓名。現在多鈔年貌清單。飛飭沿河文武。迅速嚴拏。並飭該府州。會同營員。押解盜犯王二。沈二。赴省研訊等語。所辦未為妥協。此案盜贓。係知州李濤

於臨清附近之河邊當店查出。且該州牧又同知府赫紳泰查獲盜犯王二等。訊取供詞。現在分頭嚴拏。是赫紳泰李濤為此案專司緝盜之人。自應飭令上緊躡緝。務獲。毋任遠颺。何以轉令該府州押犯赴省。則現在追緝首夥各犯之事。又責之何人。辦理殊屬疎畧。且該撫於此等刦盜重案。聞信後。理應親身馳往查拏。庶所屬文武。咸知實力奮勉。羣盜或可及早弋獲。昨已飭令楊景素。即速親往督拏。該撫接奉前旨。諒已往彼查辦。所有此案已獲之王二。沈二。止應就近在臨清州嚴行監禁。遇有續獲之犯。可以隨時質對。俟盜首弋獲。質訊明確。即當在失事地方。一面傳旨正法。以示懲儆。一面奏聞。不應照尋常盜案例。解省審訊。以致輾轉稽時。楊景素平日尚能認真辦事。何以辦理此案。不諳事體。輕重若此。再據盜犯王二。等供稱。將刦得衣服。拿到吉安幫十三號排子船上。賣獲銀錢分

用等語。糧艘被刦。前後各幫。自無不知。該幫旗丁。於盜犯賣贓時。應將其人扣留。報官拏究。乃竟圖利私買盜贓。非尋常不知情買贓可比。所有原買贓物之人。及本船旗丁。俱應查明從重究治。其該管之押運千總。及吉安幫之管運衛守備等。均難辭咎。並著阿思哈查明叅奏。至楊景素知有幫船買贓之事。自應徹底嚴究。不應僅以委員查起原賣贓物完結。阿思哈於糧船被刦之後。即應飛飭前後各幫。留心偵緝。及聞有賣贓之事。尤當嚴查叅處。不應僅以曾經奏報。而置諸事於不問。阿思哈楊景素。辦理此案。均未能周到。著傳旨申飭。其未獲盜犯。仍著楊景素督率文武。嚴緝務獲。毋使一名漏網。仍將續獲要犯審訊情由。迅速覆奏。將此由五百里傳諭楊景素。並阿思哈知之。○吏部議准。大理寺少卿江蘭奏稱。嗣後州縣自理詞訟。除責成道員按例稽查外。應並飭令該管知府直隸州

實力查催。倘州縣任意稽延。該管府州漫不查催。即令巡道揭叅議處。從之。○癸巳。諭軍機大臣等。據留京辦事王大臣覆奏。詢問素爾訥因何開脫被告孫宏亮之處。傳集素爾訥及該御史。指揮逐加質詢。素爾訥稱。孫宏亮已願將鋪貨抵欠。該指揮勒限五日清結。限期過迫。恐指揮偏向原告。是以當堂囑咐。及研訊孫宏亮。亦堅供弟兄俱被禁押。並無請託情事。現將該指揮原差。孫宏亮鋪夥人等。拘傳詳鞫等語。此案孫宏亮即有鑽營請託情事。此時自斷不肯承認。其原差鋪夥諒亦相同。竟可無容追究。至素爾訥標該指揮勒限過迫。恐有偏向原告之處。所言亦未嘗無理。但素爾訥以指揮將被告辦嚴。疑為偏袒原告。然則素爾訥欲將被告從寬。獨非偏袒被告乎。此理之顯而易見者。朕亦不欲復究其事。姑置不問。並非素爾訥之強辯所能混飾也。王大臣等。止須將本案訊明。照例辦

理具奏。將此傳諭知之。○又諭。前據三寶奏杭州東防同知陳虞盛現在告病。所遺之缺請以秀水縣知縣張圖南陞署一摺。朕因該同知係專管塘務之員。工程正資熟手。何以急急告病。安知非心存規避。降旨該撫查明具奏。並令吏部將丞倅以下告病乞休等事。作何覈議兩請之處。另定條例具奏。今據吏部奏稱該同知陳虞盛已於本年三月分發掣貴州思州府知府。行文調取引見。該撫於五月內具題告病。其中有無規避陞缺行令該撫查明覆奏等語。陳虞盛三月內已簽陞知府。乃於五月間具呈告病。自因貴州邊缺。憚於遠行。心存規避。三寶何以不察明情偽。率行轉請。抑或如部中所疑。該撫因該員病廢。恐接到部文。始行奏請。轉干平日不行甄別之咎。亦未可定。二者必居一於此。著三寶即行明白回奏。毋稍支飾干咎。將此由五百里傳諭知之。○甲午。

上奉

皇太后章卷阿勝境。侍早晚膳。至戊戌皆如之。○賜扈從王公大臣蒙古王公台吉土爾扈特郡王等食。至戊戌皆如之。○諭。前據舒赫德奏山西候選吏目嚴譜至其家投遞包封一件。內有稟啟奏摺。其摺內稱貪官作福。謀利害民。及訊以何所指據。又稱得自風聞。毫無指實。隨差人至其寓所搜查。查出謄清摺子一個。呈啟四阿哥一紙。將各件密封進呈。朕詳加批閱。其中種種悖誕不法。敢於肆行污蔑。實屬可惡。嚴譜乃微賤莠民。何由知宮闈之事。妄生議論。必有向其傳說之人。且欲向四阿哥投遞。其居心尤不可問。因交舒赫德阿桂英廉嚴密審訊。昨據舒赫德等奏覆研訊嚴譜其於貪官仍無指實。而於議立正宮一事。則以為在途過人傳說。及詰訊其人姓名。堅不吐實。尤為狡詭。因思嚴譜敢於逞造逆詞。譁張為幻。不可不令廷臣公同確訊。

明正其罪。如所稱貪官謀利害民之事。若內外臣工。果有其人。彼將姓名指出。自必徹底窮究。朕臨御四十一年。辦理庶務。一秉至公。內外臣工。如有貪黷敗檢之事。有犯必懲。並未稍為寬貸。乃天下臣民所共見共聞者。若毫無指實。豈能憑空窮治。況內而大學士尚書。外而督撫大吏。皆為朕辦事之人。朕待下惟開誠布公。從不豫存逆億。豈有因該犯無稽之一言。概疑諸大臣之簠簋不飭。設或該

犯捏稱內外大臣有謀逆之事。亦豈能不察虛實。概繩以法。轉以妄言之人為盡忠。獨加擢用。有是理乎。至其請立正宮。妄言宮闈之事。且欲啟告四阿哥。併思離間父子。實為亂民之尤。罪大惡極。必當審訊明確。典刑肆市。以示與眾棄之之義。著交九卿三法司會同嚴審定擬具奏。○諭軍機大臣曰。嚴譜悖誕不法一案。已明諭九卿三法司會訊覈擬矣。茲復據舒赫德等奏審訊嚴譜所供貪官。僅

指一二縣令。亦稱得自風聞等語。知縣如果有貪黷劣蹟。上司自必訪查叅劾。不敢稍為姑容。且該犯所言大臣謀利害民。自係內而大學士尚書侍郎。外而總督巡撫。實有其人。其語方為不妥。豈州縣下僚足以當之。恐該犯尚有狡詭不吐之處。自應切實嚴訊。至所供御史叅奏禮部。隨即發遣之說。云得自同鄉梁二。愚民妄為傳說。亦事所常有。竟可毋庸拘究。即該犯同鄉京官。或有與之交往之

人。亦止須留心訪查。若以此事向該犯刑訊。或伊將平日讐怨之人。信口誣扳傾陷。致拖累無辜。亦可無事窮詰。以免蔓延。至該犯罪大惡極。自作之孽。與其親屬無涉。且該犯父母妻子俱亡。其弟姪等。併可無庸查拏緣坐。止須將該犯即速訊明。照律擬罪完結。不必延緩株連。將此諭令九卿法司等知之。○又諭昨據舒赫德奏審訊嚴譜一案。所供仍毫無指實。因思嚴譜敢於捏造謗言。妄談宮闈。

離間父子。非寸磔不足蔽辜。若不令衆訊明確。典刑肆市。恐外間無識之徒。轉因辦理慎重。妄生猜疑議論。業經明降諭旨。令三法司九卿會同審明定擬具奏矣。著傳諭舒赫德阿桂英廉。此時且不必過用重刑。以致刑斃。俾得倖逃顯戮。且俟九卿法司公訊擬罪。將其明正刑章。以示與衆共棄之義。其別摺底二件事。皆已往。不必一體發訊。惟將原底另行密封進呈可也。將此由六百里傳諭知之。

○豁除江蘇清河縣乾隆四十年修築挖廢田地四頃十三畝有奇額賦。○乙未諭軍機大臣曰。陳輝祖奏據湖南耒陽縣稟報六月二十五日。河水涌發數丈。城外及對河民房被淹。東北城牆磚坍數處。水浸入城。民房間有倒塌。常平倉亦被水浸。又永興縣稟報六月二十四日。大雨。山水約高二丈餘。由垛口灌入城內。民房被浸。間有倒塌。田禾多沒水內。又據湖北鄖西縣稟報西鄉石灘河山內。

驟發蛟水。雙掌坪五掌坪等處。衝壞沿河山腳草房十餘間。淹斃男婦二十餘名口等語。湖南自永興山水漲發。流注耒陽。水勢較大。其被災情形亦較重。據稱護撫敦福現在親赴督辦。著傳諭敦福迅即督率地方官。將實在被淹村莊。損傷人口名數。詳細確勘。分別撫卹。並查各處田畝。是否成災。倉穀是否不致浸損。其附近州縣有無被淹之處。一切妥為經理。務令災黎均霑實惠。勿致稍有失所。

至湖北鄖西地方。係蛟水驟發。自屬來猛去速。其衝倒房間。及淹斃人數亦較少。著飭令委員。會同該地方官。照例妥協撫卹。仍各將查辦情形。據實具奏。將此諭令陳輝祖敦福知之。○軍機大臣等奏。遵議伊犁博羅塔拉塔爾巴哈台屯駐土爾扈特遣回游牧所遺田地。應酌量辦理。今伊犁圖來京會議。據稱此項田地。應俟發往烏魯木齊之安南人等移駐伊犁。分給耕種。餘者給綠營兵等語。應

如所議從之。○丙申。諭曰。山東臨清直隸州知州李濤。昨歲調取來京。引見。看其人頗明白。當經記名。原欲即以知府擢用。因臨清員缺緊要。正資幹員辦理。是以未即陞用。今據楊景素奏。常州幫旗丁王益周。回空糧船被劫一案。先據李濤查獲盜賊。併將盜犯王二。沈二盤獲。茲又於東昌府三里鄉。拏獲起意盜首段老。併夥盜孫余。又於阿城地方。灑緝鄧八。趙猴兒。張四。小二子。李九等語。此案盜犯十六人。現已拏獲九名。兼獲盜首。俱係李濤會同各員。躡訪緝獲。洵屬能事。可嘉。著賞給知府銜。仍留臨清州之任辦事。以示獎勵。○諭軍機大臣等。據楊景素奏。常州幫旗丁王益周。回空糧船被劫案內。夥盜十六人。已陸續拏獲九名。且盜首已獲。易於審結。楊景素即可毋庸赴彼查辦。如該撫接到前旨。業已起程前往。於審辦此案後。亦可即行回省。至其餘逸犯。現在上緊緝拏。自無難一併弋

獲。即或有數人未能全獲。亦不必將首夥各盜監候質訊。致稽顯戮。著即將現獲各犯。審訊明確。不分首從。問擬斬決。一面具題。一面傳旨正法。並將盜首梟示失事地方。以示懲儆。至該州李濤於此案認真訪查。拏獲多犯。殊屬能事。可嘉。已另降諭旨。賞給知府銜。以示鼓勵矣。將此由四百里傳諭楊景素知之。○調陝西興漢鎮總兵保寧。為河南南陽鎮總兵。江西南贛鎮總兵梁朝桂。為陝西興漢鎮總兵。河南南陽鎮總兵吳掄元。為江西南贛鎮總兵。○丁酉。諭前據阿思哈等奏。山東夏津縣地方。有常州幫王益周。回空糧船被盜之事。旋據楊景素奏。拏獲首夥盜犯段老等九名。訊出俱係沿河短絳。糾夥行劫。現今審明。按律定擬。分別斬梟矣。沿河短絳。多係無業窮民。羣聚覓食。晝則隨幫受雇。夜則乘機為匪。其中最易藏奸。而漕艘經行上下。遇有頂風淺水。添雇幫絳人夫。亦屬必不可少。

莫若令沿河州縣酌量安設緯夫並選派夫頭照管以供受雇其各幫雇覓緯夫並令押運千總督率旗丁查點稽覈按站交替不許攜帶過站亦不許中途私雇庶各有責成不致滋事其應如何酌定章程之處著直隸山東江南江西浙江湖廣各督撫會同漕運總督確商妥議具奏○諭軍機大臣曰楊景素奏拏獲盜犯江二等在蒙陰縣地方行劫客商王嵩審擬斬決梟示一摺已批交法司覈

議速奏矣該省係南北通衢前夏津地方甫有常州幫糧船被劫之事今蒙陰又有此案雖盜犯旋即破案首夥多經弋獲而一月之內盜劫頻聞且一係行劫漕船一係白晝搶奪可見該省文武各員於防緝盜匪之事多屬廢弛不可不亟為整頓著傳諭楊景素即嚴飭各屬實力嚴防密緝務使奸宄絕迹地方寧謐其武職各員並飭各該鎮等董率將弁加意巡查偵捕毋任宵小潛蹤致滋事端

倘有疎防之事即將該管文武各員從重叅處○大學士九卿等議奏審訊嚴譜情節請照大逆律凌遲處死得旨嚴譜著從寬改為斬決諭軍機大臣曰據大學士九卿等將嚴譜照大逆律凌遲處死具奏業經降旨改為斬決以彰國法至該犯罪大惡極自作之孽與其親屬無涉且據供父母妻子俱亡其弟姪等自可無庸緣坐亦經明降諭旨並據舒赫德等奏明已行文該撫停止查拏矣但該

犯敢於造作狂悖語言肆行誣讎其平日恐尚有不法字蹟藏留家內亦未可定著傳諭巴延三即派黃檢速赴該犯澤州府高平縣原籍住處將該犯家內嚴密搜查如有不法字蹟書籍即行封固進呈至該犯族屬疎遠者原可無庸查辦其親弟兄子姪並著黃檢細加察看若係務農愚蠢之人即遵前旨省釋倘有形迹詭秘居心狡詐及平日不安本分之人收藏該犯狂悖字蹟者即著黃檢拏

至省城。交按察司嚴行監禁。迅速奏聞請旨。將此由六百里傳諭知之。尋奏遵派藩司黃檢往嚴譜家嚴搜。該犯無住房產業。借住胞弟嚴誦家內。查無存留不法字蹟。察看伊弟嚴誦係椎魯鄉民。姪嚴履安守分課讀。姪孫嚴會全尚幼。俱無詭秘情狀。報聞。○戊戌。諭據阿思哈奏長淮衛宿州二幫漕船。於本年三月。在洪澤湖漂沒二十五隻。其漕米業蒙加恩豁免。所有船隻均應購料補造。除例給

料價銀五千二百餘兩外。各旗丁尚有應行自備造費。現在湊辦趕造等語。該幫漂沒多船。丁力疲乏。購造船隻。未免拮据。著加恩於道庫恩借款內。賞借銀一萬兩。給發各船。購料趕造。接兌新漕。其借項自明年冬漕為始。分作五年。於各丁應領錢糧內。扣還歸款。並免其加息。以示體恤。○蠲免安徽桐城鳳陽臨淮定遠盱眙滁州全椒廣德建平九州縣。乾隆四十年。被水學田九十五頃六十二

畝有奇租銀。○己亥。諭向來奉天所屬州縣原係滿漢人員兼用。嗣因府尹蘇昌等於辦理流民案內奏稱。奉天各州縣凡詞訟等事。關涉旗民者。俱會同旗員審理。往任意見參差。致難完結。若將旗員銓選。較為畫一等語。經軍機大臣議覆。降旨允行。今思奉天地方旗人居處者多。旗員在彼。不無粘涉親故。遇有審理事件。恐不免心存偏徇。即有拘謹之人。聽斷時過避嫌疑。亦不得謂之公當。且恐

緣事被劾之員。接任仍係旗員。或遇應查事件。不無瞻顧情面。輾轉滋弊。地方公務。必致積欠廢弛。殊非整飭吏治之道。嗣後奉天各州縣缺出。著照各省。仍以滿洲漢人通行補用。惟是奉天地方。兼管旗民。較為繁劇。初任之員。恐難辦理裕如。所有各州縣缺出。應交該部。於候補人員揀選引見。候朕簡員補授。其作何酌量兼用滿漢人員之處。著該部詳悉定議具奏。○又諭曰。原任副都統達色。近

來辦事尚好。著加恩開復。○又諭曰春寧著授為領隊大臣。前往伊犁。更換存泰來京。所遺正黃旗護軍統領事務。著奎林署理。○諭軍機大臣曰高晉等奏。勘辦丁家集引河情形一摺。並繪圖貼說進呈。據稱該處引河。前於水長開放時。雖未能掣動大溜。而因此分洩其勢。溜行中泓。實為有益。但因中河水勢陡落。引河頭生有嫩灘。現今於河身淤淺處。所再挑引渠。俟水長時。再為分掣。引溜北趨。

以收成效等語。高晉等既欲掣溜北趨。自當就其溜勢引之。方能得力。今閱圖內所繪引河形勢。逼近老灘。在黃河曲處。溜已趨南。自難挽之東注。故止可分洩河流。未能掣動大溜。且過水既緩。日久漸至停淤。亦勢所必至。高晉等前此或因省費起見。恐向北施工較長。是以如此辦理。朕意與其少費而無益。不如多費而有濟。因於圖內迤北處。用硃圈標記。若於其地挑挖引河。正當河溜平來。掣溜

較為直捷。而下注亦甚得勢。但得溜勢暢流。刷去泥沙。引河自不致更有停淤。庶為一勞永逸之計。且黃河不通南岸。丁家集一帶。可保無虞。即或此時改挖引河。用帑稍多。若辦成之後。可省每年修築隄堰。及被水賑卹之費。而瀕近田廬。亦皆安堵。通盤覈計。其得失利病。更屬顯然。著將硃圈原圖發去。令高晉等詳加勘度。妥協籌辦。即行據實奏覆。○又諭據工部奏。江寧織造基厚。織辦解部駕

衣片一千件內。揀選得堪用者。止八十二件。其餘俱有徽點。應行駁換等語。覽奏殊為駭異。派織駕衣。係織造分內之事。乃一千件內。尚不及十分之一。而徽壞者竟至十分之九。即辦理草率。亦不至荒唐若此。果如工部所奏。不但應駁令賠。并當將該織造參奏治罪。況基厚係朕加恩擢用之人。伊父西寧。現為鹽政。伊叔高晉。現為總督。承受恩眷。至為優渥。於此等應辦事件。尚不能留心檢點。一任

家人胥役。以徽污綢片。苟且搪塞。豈朕用伊為織造。專令其安享厚祿。及為欽差榮寵乎。設果係如此。基厚豈可復為織造。即應將伊革職。發箭匠拜唐阿上効力贖罪。以示懲儆。仍行責令賠償。但恐工部司員筆帖式。或有意苛求。堂官等並未親加覆驗。率爾具奏。甚或胥役等。因需索不遂。過於吹毛求疵。皆未可定。如此。又何以服基厚之心。朕辦理庶務。一秉至公。務協於情理之正。不肯因工部此

奏。聽其朦混。伊父西寧。現在熱河。著派總管姚良同西寧。即日起程進京。特派英廉。金簡會同工部堂官。面同姚良。西寧。將此項駕衣逐一點驗。如每件徽跡大而且多。實難應用。不必多至九百餘。即有四五百件。應行駁換。基厚之咎。已無可逭。自應據實奏。將基厚革職治罪。若係零星徽點。本屬無多。其顏色並無改變。儘堪留用。則係司員等。搜求妄駁。其過不在基厚。而在部員。即當嚴究胥吏等

藉端需索。及司員擅作威福之弊。若果有其事。即著舒赫德。阿桂。同英廉。金簡。嚴行審訊。務令水落石出。但舒赫德等。不必同英廉等前往查驗耳。總之。此事務須徹底根究。以辨真偽。斷不容顛預了事。工部堂官。自不能稍有迴護。若英廉。金簡。瞻徇基厚。思欲調停兩可。工部堂官亦必不依。朕又何難將此項駕衣。取至行在。親加看閱乎。將此傳諭英廉。金簡。及工部堂官。仍將查驗情形。先行覆奏。并

諭舒赫德。阿桂。知之。○是月。江南河道總督薩載。奏查勘洪湖水勢。陸續加長。五滾壩內。義禮二壩。久經過水。若將仁智信三壩全放。高寶一帶。恐難容受。臣等議將清口東壩。拆去三丈口門。共寬六十大。深有二三丈四五丈不等。俾湖水出口益暢。將仁智信三壩封培攔禦。得旨。好。欣慰覽之。○又奏。山峯海防二廳工程。墊塌處。俱鑲修堅整。惟水勢浩濶。雲梯關內北岸。隆塘莊漫灘五六里。南岸。周

門漫灘二十餘里。雲梯關外南岸。灘勢較高。七巨九巨等處。間段漫水。北岸地勢較矮。二套至五六套。普面漫灘。臣等相度形勢。周門。隆塘莊。靠隄縷護。開溝宣放。二套。五套。在雲梯關下。不能設隄。與水爭地。當聽水落。自行挂淤斷流。得旨覽奏俱悉。此或亦海口淤塞之一證也。然無計可施。爾等補偏救敝可耳。

○浙江巡撫三寶奏杭州府海防同知捐陞知府陳虞盛患病情真。並無捏飾。該員經管

工程。均係石塘。本屬平穩。非現需鑲做緊要可比。是以五月十九日具題開缺。而銓選思州府部咨。於五月二十六日准到。並無規避。報聞。

○山東巡撫楊景素奏漕船被刦一案。當密委東昌府知府赫紳泰等。馳往躡緝。恐各盜聞風遠遁。未即親往。嗣陸續拏獲盜犯九人。該處止有一監。而距省僅二百餘里。是以飭令解省審究。此臣辦理錯謬之實情。今臣於七月二十日。帶同按察使陸燿前赴該

州督拏。并提犯審辦。報聞。

○陝甘總督勒爾謹奏。遵勘甘省被災各屬。自五月半以後。甘澍依旬。酌借籽種。便可翻犁。其有被霜被雹處所。一併撫卹。下部知之。

○署雲貴總督覺羅圖思德奏。今歲移駐鎮協官兵出防。係初次派撥。應妥定章程。查出防隴川。蓋達。張鳳街三路。需兵三千一百名。應撥騰越兵二千一百名。永昌協兵一千名。出防龍陵三台山一路。需兵一千名。應於龍陵協調撥。出防緬寧一路。需兵四百名。應撥順雲營兵三百名。分防緬寧汛兵一百名。報聞。

大清高宗法天隆運至誠先覺體元立極敷文
奮武孝慈神聖純皇帝實錄卷之一千十三

實錄卷一千十三

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千十四

監外總辦官經提督官李永傳文淵閣大學士文淵閣領事領侍衛內大臣稽察欽奉 上諭事件處管理
吏部理藩院事務黃旗滿洲都統世襲副都統軍功加七級隨帶加一級尋常加二級軍功紀錄一次臣唐桂
總辦官經提督官李永傳大學士大學士文淵閣領事稽察欽奉 上諭事件處管理刑部都察院事務
世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次
尋常紀錄十四次臣德瑛經提督官太子少保工部尚書紀錄六次臣曹振鏞等奉

敕修

乾隆四十一年丙申八月庚子朔諭此次山

東接駕廢員據吏部查開履歷案情朕詳加
檢閱覈其緣事情節稍輕之屠士相王引楷
王裕餘金譽王沛獻姚龍光何燦范金等八
員著該部行文調取來京俟迴鑾時引見再
降諭旨○諭軍機大臣曰文綬奏查勘打箭
鑪一帶被水情形及分別籌辦一摺所辦均
屬妥協已於摺內批示矣各處村莊田畝被
水衝淹其應行撫卹者著傳諭文綬即善為
經理并董率所屬照例賑卹務使均霑實惠

毋致稍有失所。至摺內稱鑪城被水衝塌。南門內外積石高並女牆。既不可因高加築。亦難搜挖舊基。東門一帶。波流迅激。水道已改。日後亦難保無衝決之虞。現於城垣坍塌處。即用水推積石。壘作石牆。暫為禁限等語。披閱所奏單內。該城原建周圍一千一百餘丈。現被衝塌一百六十餘丈。不過十分之一。自毋庸另議移建。而曾被水衝之地。亦不便復行補築。或將舊城收小。讓出水道。壘作石牆。以為限制。著將該處情形。即行繪圖呈覽。其各項衙署。亦當各按地形。量為修建。至瀘定橋為打箭鑪外通諸番要津。修復亦不容緩。自應俟秋深水落。酌量情形。妥為修整。仍將賑卹籌辦各事宜。隨時奏聞。將此由四百里傳諭知之。尋奏查勘打箭鑪城內河西山上地名白土壩。平漫易開。可建千把總衙署四所。兵房三百八十間。尚少把總衙署一所。兵房四十一間。勘得北門內雅納溝地方。原

有兵房地高。現未被水。即於該處隙地添建。其監督衙署。有城內西北角郎卜院地方。可建。附以筆帖式衙署。其同知衙署倉庫監獄廩房及照磨衙署。於城內西北子耳坡地方建造。查該城地勢。河西高於河東。今衙署等項。悉改建河西高地。可永保無虞。東南二門。城垣門樓。皆難仍舊。查舊城原依東西兩山高下築牆。今東門則於東山城上。開造門樓。就山腳築基。即建稅房。其南門另於河西山上移建。得旨知道了。具一圖貼說奏來。更覺明悉。又奏此次被水內地。業經清溪二縣。衝淹田地。不過數頃。業經飭令補種。現可有秋。尚不成災。瀘定橋打箭鑪衝塌房屋。及失業貧民。均已照例給卹。該處係土司地方。窮民原以雇工背運為生。既撫卹銀米接濟。仍可自食其力。毋庸加賑。至駐鑪城兵丁。借領米二百石。准其分季還倉。明正土司亦借給米一百石。兵民番眾。均無失所。至瀘定橋鐵索

橋座已專委熟諳索橋工程之員前往估計辦料俟水落修復該處現有船隻濟渡並無阻滯報聞○辛丑

上奉

皇太后幸卷阿勝境侍早晚膳至乙巳皆如之

○賜扈從王公大臣蒙古王公台吉土爾扈特郡王等食至乙巳皆如之○壬寅軍機大臣等議覆西安將軍傅良等奏稱西安八旗兵丁紅白事件向以拴養馬匹壓溜節省草料銀兩充用今將馬廠地畝一半撥給民人墾種收租作為兵丁紅白事件賞項覈算有餘所有扣收壓溜馬匹節省銀兩請停止等語應如所奏從之○旌表守正捐軀江西南康縣民黃大憫女黃氏○癸卯軍機大臣等議覆涼州副都統長額里奏稱涼州莊浪新駐官兵殘廢孤寡者尚無養贍請於各佐領下裁馬甲五缺改為養育兵十五缺以資養贍所裁馬甲俟出缺後陸續裁汰再涼州莊

浪駐兵餘丁雖多皆未成丁以至步甲匠役缺出俱不得人請於各佐領下暫裁步甲五缺數年後餘丁成立請旨挑補足額均應如所請從之○又議覆署伊犁將軍索諾木策凌奏稱哈薩克布魯特來投之厄魯特等如伊犁塔爾巴哈台等處實有伊等親屬者准其安插若因地方豐饒來投者概不准收等語查向例俱相沿收受今驟然不收伊等無處棲身勢將行竊酌議仍令照舊收受安插如有在該處肆竊行兇及誘攜哈薩克布魯特子女等情查明嚴辦得旨依議速行○甲辰遣官祭黑龍潭

昭靈沛澤龍王之神玉泉山

惠濟慈佑龍王之神○土爾扈特郡王策伯克多爾濟等入覲○以告休廣西上林縣土知縣黃憲子九如襲職○乙巳諭曰候補知府曾承謨前因餽送富德金兩案內革職並經文綬審明定擬俟伊將節年經手錢糧

報銷事竣。發往北路軍臺。効力贖罪。該督自屬照例辦理。但念曾承謨。究因富德向其勒索。不能抗違。始行餽送金兩。其罪在富德而不在曾承謨。著交該部將曾承謨調取來京引見。再降諭旨。○諭軍機大臣等。前經降旨。令明亮將兩金川四境。所有各土司地界。遠近次序。逐一確查。按準方向。繪為總圖。貼說進呈。至該處現已設鎮安營。駐兵控守。其規制亦俱詳備。著傳諭明亮。即於圖內地方。注明何處設立總兵副將。何處安營。分駐叅將都司等官。及何處駐兵若干之處。一併詳加貼說進呈。俾該處情形。一覽瞭然。將此由四百里傳諭知之。○大學士舒赫德等奏查明駕衣徽迹緣由。請將江寧織造基厚。交內務府議處。得旨。此項駕衣。經英廉。金簡等會同工部堂官及西寧勘驗。其定為三等者。雖徽迹較多。並非大片徽污。尚堪備用。自係工部原奏過於苛求。基厚毋庸交內務府議處。其

駁下之三等衣片。亦毋庸另行製造。但基厚派員解送時。將箱封鎖。不令委員沿途抖晾。究屬辦理不善。著即將駁為三等之衣片六百四十二件。不准開銷。以示懲儆。並令該織造嗣後解送駕衣。不必封鎖。務令委員小心啟看。隨時抖晾。勿致微黧。○丙午。遣官祭關帝廟。○諭曰。程景伊帶領引見事竣。著即回京。不必隨往木蘭。所有行在吏部事務。著福隆安兼署。○丁未。祭

先師孔子。遣大學士舒赫德行禮。○戊申。太宗文皇帝忌辰。遣官祭昭陵。○諭曰。烏里雅蘇台將軍瑚圖靈阿。身體臃腫。現在又復患病。遇事不能行走。應將伊換回拉旺多爾濟。係固倫額駙。猶朕子也。伊亦頗可造就。將伊授為將軍。更換瑚圖靈阿。必能勝任。但此缺係定邊將軍。非喀爾喀副將軍可比。今若以拉旺多爾濟補放。伊祖母伊父伊叔。皆曾任此將軍。恐無知之人。視若伊

家世襲之缺。巴林王巴圖才具好。人奮勉。著授為定邊左副將軍。前往更換瑚圖靈阿。再伊犁將軍。較烏里雅蘇台尤為緊要。伊犁圖辦事固好。但眼素近視。馬上不甚利便。操練彼處兵丁。最為緊要。拉旺多爾濟材技優長。著授為伊犁叅贊大臣。隨同將軍伊勒圖學事。其操練兵丁一事。專令管理。俟學習二三年。朕仍令其回京。將來伊勒圖年邁。朕必召其來京。彼時自可授拉旺多爾濟為伊犁將

軍矣。朕如此辦理。想來眾必心服。巴圖且不必速往。俟木蘭行圍事畢。回游牧治裝。再行前往。巴圖治裝後到任。瑚圖靈阿年前儘可到來。並不遲誤。伊若情願攜眷。聽其帶往。拉旺多爾濟暫且不必前往伊犁。俟行圍事畢。回京後治裝前往。亦聽其攜眷。○己酉。秋分

夕

月於西郊。遣固山貝子永碩行禮。○庚戌。

太祖高皇帝忌辰。遣官祭

福陵。○軍機大臣等議覆。安西提督俞金鼐奏。稱沙州接壤青海。雖屬要區。究不比安西路當孔道。差務繁多。請將原設沙州副將都司移調安西。即將安西叅將守備原額兵數移調沙州等語。應如所請。惟查安西沙州距烏魯木齊二千餘里。各屬弁兵考驗。未免稽延。今請除哈密以西各協營。仍歸烏魯木齊提督統轄外。其安西沙州兩處協營。俱改隸肅州鎮。歸於甘肅提督統轄。則控馭得力。營制較為聯絡。又據稱巴里坤迤西至瑪納斯幅員二千里。酌設墩塘等語。但應於何處安設。何處安兵若干。作何稽查控馭。應令該提督會同該總督。都統就近酌量情形。議奏得旨。所議是。所有巴里坤迤西一帶。添設墩塘各事宜。著伊勒圖於回任之便。勘明。會同勒爾謹。叢議具奏。○浙江巡撫三寶疏報。嵊縣常山開化三縣。乾隆四十年分。開墾田五頃五十九畝有奇。○辛亥。

上奉

皇太后幸卷阿勝境。侍早晚膳。○賜扈從王公大臣蒙古王公台吉土爾扈特郡王等食。○諭曰大學士舒赫德於九月初間。即應赴熱河行在。辦理秋審。勾到事宜。至時著添派英廉留京辦事。○諭軍機大臣等。據三寶奏報。仁和海寧二州縣海塘工程沙水情形一摺。並照例繪圖貼說進呈。據稱時值秋汛。潮水稍旺。南岸河蔣巖峰兩山之北。陰沙逐漸淤延漲起。以致水勢直向北趨等語。潮勢既向北趨。則老鹽倉一帶塘工。最關緊要。潮信遷移無定。固非人力所能強為。而塘岸抵禦潮頭。不可不盡人事。以為防衛。其華家街及鎮海塔各處。俱值迴溜頂衝。尤為險要。所有一切塘工。務須上緊鑲築堅固。以資保障。仍著將何時修補完竣。及現在沙水情形。迅速覆奏。將此傳諭三寶知之。尋奏遵勘。本年潮汛。坍卸各工。自華家街東白字號起。至華家街

西伏字號止。鑲修柴工三百丈。業於七月二十六日完工。嗣因華家街之西護沙。又經潮刷低七十餘丈。所有新修柴塘。其未經水臨塘脚者。尚有六十餘丈。惟恐溜勢上提。應再豫為鑲修。隨於伏字號起。至道字號止。又接修二百丈。業經開工。不日完竣。其東塘鎮海塔至四里橋。現在漲沙仍長九百餘丈。又四里橋至陳文港一帶。現在陰沙已露。計長一千九百餘丈。與鎮海塔迤東。陳文港迤西。老

沙俱已聯絡。保護塘工。大為有益。報聞。○巡視通州漕務御史索興阿奏。漕政以米色為先。簽驗以抵淮為準。欲察米色之高低。總在過淮之驗放。請勅漕臣。眼同弁兵。逐船比對。務期一律純潔。方准過淮。倘有撓難低潮。一面奏聞。一面責令收漕監兌各官。及時賠補。庶米色無不齊之慮。過淮後。弁兵等亦不致藉詞原兌米色平常。敢於作奸舞弊。下部議。尋議查各省兌運糧務。除山東河南幫船。例

不過淮外。其江蘇安徽浙江江西湖廣等省。均係過淮盤驗。但近年來。米色不能一律純潔。自應如所奏。嚴加查辦。惟查漕員責任。各有專司。處分自應區別。安徽江西湖廣等省。監兌官。例在水次驗兌。並不押幫赴淮。倘中途徽暗攪和。止應將在幫各員叅處追賠。江蘇浙江即以監兌之員押運抵通。應與督押領運等官一體查辦。如過淮之時。米色不純。即將該管道府及監兌押運各員并嚴叅追賠。過淮以後。如有以徽暗之米交倉。則係弁丁等。不能勤加風瞭所致。專將該幫員并叅處追賠。再各省吏胥。或因此次整頓。將民間完納好米。故意勒掇。不即兌收。該管上司立即揭報嚴叅。從重治罪。請勅交有漕省分各督撫。嚴行訪查。明示曉諭。從之。○壬子。萬壽節。遣官祭太廟後殿。○遣官祭福陵。

昭陵。昭西陵。孝陵。孝東陵。景陵。泰陵。○遣官祭孝賢皇后陵。○遣官祭顯佑宮。東嶽廟。城隍廟。○上詣皇太后行宮行禮。○御澹泊敬誠殿。扈從王公大臣官員蒙古王公台吉土爾扈特郡王等行慶賀禮。○奉皇太后幸卷阿勝境。侍早晚膳。至甲寅皆如之。○賜扈從王公大臣蒙古王公台吉土爾扈特郡王等宴。至甲寅皆如之。○癸丑。吏部議覆貴州巡撫裴宗錫奏。稱外省官員大銜借

補小缺者。例照原銜陞轉。遇有因公降調。亦照原銜議處。惟因才力不及浮躁。大計劾參議降。尚未另著專條。致與因公處分無別。近見吏部議處六法官內。才力不及之河南開封府巡檢饒晉堽一員。例應降二級調用。該員係縣丞借補巡檢。縣丞降調二級。尚有正九品官可補。以縣丞借補巡檢。猶且才力不足。則較巡檢優品之缺。復安望其勝任。由此類推。如同一轍。至居官浮躁。例降三級調用。

貶其官。正以抑其性。設在借補任內。照原銜遞降。亦覺有名無實。請嗣後大街借補小缺之員。如係計叅才力不及浮躁兩項。應降調者。無論何項原銜。概照現任品級議處等語。查計叅六法人員。自應與隨時叅處者分別辦理。但大街借補小缺。品級各有等差。不可不分晰查辦。應請嗣後大計劾叅才力不及浮躁等員內。有大街借補小缺者。除原銜正九品本無二級可降。從八品本無三級可降。

吏部奏

十

十

仍照例革職。及原銜係正七品借補正八品。即照現任議降。尚有餘級可補者。亦照現任所降之級補用外。至原銜內有級可降。而現任無二三級可降者。悉照現缺議以革職。止於原銜內除應降之級。給以所餘職銜休致。不准補用。從之。○甲寅。吏部議奏。嗣後丞倅以下。及州縣等官。遇有患病題請解任乞休者。令該督撫即將該員現任之缺。有無承辦緊要經手事件。於疏內詳晰聲敘。其無前項情節。臣部仍照舊例開缺。附入彙題。如有承辦緊要經手事件。臣部一面開缺。一面於本內聲明。仍將可否准其回籍之處。照道府例兩議請旨。倘有規避捏飾諸弊。及該督撫徇庇。不將實在情節聲敘。察出。即照例嚴行覈議。從之。○又奏。嗣後奉天州縣缺出。除應調之缺。仍令該府尹於現任屬員內。揀選陞調外。其應歸部揀補缺出。遵旨即於候補州縣人員內揀選。惟漢員應補州縣人數尚多。滿

吏部奏

十

十

員州縣丁憂回旗。百日孝滿。仍在原衙門行走。按班以主事。小京官筆帖式補用。並無仍補外任之例。今既滿漢並用。應請即於此項人員內。揀選引見。再記名同知及截取知縣之筆帖式二項。雖未歷外任。俱係在部院行走。經該堂官保送。與進士舉人未經筮仕者不同。嗣後丁憂回旗人員。不數揀用。請即於記名同知知縣之筆帖式內。揀選引見。如該員到任後。或以不能勝任題叅。仍將原保之堂官議處從之。○漕運總督阿思哈奏吉安幫並無排子船。查有贛州幫十三號。係排子船。頭工王育才。舵工蔣國明。水手蔣鎮彩等。曾在王家淺地方。買過岸上人衣服。起贓查對符合。訊據各犯俱供不知盜贓誤買。請將各犯杖枷。領運千總唐植坊。隨幫李國相革職。總運建昌府通判席續。交部議處。下部議。

實錄卷千十四

十一

大清高宗法天隆運至誠先覺體元立極敷文奮武孝慈神聖純皇帝實錄卷之一千十四

實錄卷千十四

十一

大清高宗法天隆運至誠先覺體元立極敷文
奮武孝慈神聖純皇帝實錄卷之一千十五

監修總纂官經筵講官太子太傅大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲副都統世襲副都統功加正級隨帶加一級尋常加二級軍功紀錄一次臣慶桂

總纂官經筵講官太子太傅大學士大學士文淵閣領閣事稽察欽奉 上諭事件處管理刑部三庫事務

世襲副都統功加十九級隨帶加二級又加二級臣董誥內大臣戶部尚書鑲黃旗滿洲副都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十一年丙申八月乙卯

上詣

皇太后行宮問安。○自避暑山莊啟鑾幸木蘭。

○是日駐蹕中關行宮。○丙辰諭曰陳輝祖奏請除豫印空白陋習一摺。已交該部速行詳議具奏矣。豫印空白。本非例所應有。沉付之書役攜帶。更難保無從中滋弊。自當亟行禁止。但該署督既欲剔除積弊。又為條列代印章程。未免另生枝葉。久之仍恐有名無實。且文武各衙門。繕辦案牘冊籍。理應詳慎校

覈俾無舛誤。如辦理未能妥協。經兩司查出應改者。即可聲明更正。視其事小而錯少者。量為記過。事大而錯多者。即為叅奏。予以處分。庶有司辦公。不敢草率。且可永除豫印空白之弊。方為盡善。湖廣一省如此。各省諒亦相同。自應一體嚴禁。其如何分別定例之處。並著該部一併詳議具奏。○軍機大臣等議准。察哈爾都統常青等奏稱。達里剛愛牧場地方寒冷。差使亦多。應照商都達布遜諾爾等處之例。酌籌滋生銀兩。以為官兵一切差使之用。查太僕寺右翼牧場田租。每歲得銀八千餘兩。現積存銀三萬五千兩。請撥出三萬兩。作為本銀。每年生息銀三千兩。給與官兵。其本銀於官兵俸餉內。分作六年扣還。從之。○是日駐蹕波羅河屯行宮。○丁巳。上遣郡王鄂勒哲特穆爾額爾克已拜赴避暑山莊。

皇太后行宮問安。○遣官祭昭忠祠。○命熱河

設學。諭朕每歲木蘭秋獵。先期駐蹕熱河。數十年來。見該處戶口日增。民生富庶。且農耕蕃殖。市肆殷闐。儼然成一都會。惟絃誦之風未盛。由於口外人多樸魯。無所師承。且未另立學額。更無以示鼓舞。因思熱河各廳所屬編氓。及僑居年久者。其子弟應不乏秀良。誠能教育而振興之。未嘗不足以示造就。自宜叙設義學。延師訓課。以勵文風。並當建立學宮。酌定庫額。俾得藉以上進。其如何興建籌辦各事宜。著該督周元理悉心勘議具奏。至學校章程。並著會商學政羅源漢酌議奏聞。副朕嘉惠塞民。廣學毓材至意。○又諭考選未上衙門之世職等步射。務令每人多射數枝。詳加試看。始可分別優劣。酌定等第。從前遇考試年。派出王大臣驗看步射。不過令每人射一二枝。即行挑選。此特王大臣等欲作速看完耳。嗣後派出考試世職之王大臣等。必令各員俱射三枝。加意詳閱。再定等第挑

選。不得祇射一二枝。即行挑選。其軍政等處。特派王大臣考試步射者。照此一體遵行。著為令。○又諭曰。湖南鎮軍鎮總兵員缺緊要。著黃模調補。所遺員缺。著觀成補授。○又諭上年湖南鎮軍鎮總兵楊大業。至盤山行在。陛見。召對畢。諭以出去。而該鎮即奏請回任。實屬見小不知大體。是以交部議處。經部議革職。念其尚非太過。仍予從寬留任。因思鎮軍為苗疆要區。該鎮才識平庸。恐不足以勝任。諭令陳輝祖將該鎮年來辦理營務如何。於苗疆是否相宜之處。據實具奏。今據覆稱。楊大業前任宜昌總兵時。精力較之少壯。已覺少遜。自調任鎮軍。陛見回任後。留心體察。該鎮於地方情形。文稟稀疎。即有措置亦未能周到。且於考驗官員之事。均不能留心甄別。併聞精力日減。遇事輒多遷就。恐難久膺專閫等語。鎮軍鎮員缺緊要。未便容其戀棧。楊大業著以副將品級休致。其員缺已經降

旨簡員補授矣。至陳輝祖覆奏該鎮之不能勝任。皆有實跡可指。並非因朕降旨詢問。稍為文致迎合也。將此明白曉諭。陳輝祖原摺著一併發鈔。○軍機大臣等議覆西安將軍傅良等奏稱。前奏請賞給西安兵丁孤寡養贍。經戶部議駁。令就該處情形。通融籌辦。不應動支正款。今於本處養育兵丁一百二十缺內。通融二十缺。再動支每年地租餘銀一千八百兩。兵餉餘平銀七百兩。每月每人給銀一兩。應如所奏。從之。○以鑲黃旗滿洲副都統金簡。正藍旗滿洲副都統和珅。對調。鑲黃旗蒙古副都統珠爾格德。正黃旗蒙古副都統博清額。對調。正白旗滿洲副都統薩哈岱。鑲藍旗滿洲副都統高樸。對調。鑲紅旗蒙古副都統德赫布。鑲藍旗蒙古副都統瑚尼勒圖。對調。○是日駐蹕張三營行宮。○戊午。

大社

祭

大稷遣理郡王弘曉恭代行禮。○上行圍。○是日駐蹕阿貴圖大營。○已未。上遣侍衛丹巴多爾濟。赴避暑山莊。皇太后行宮問安。○行圍。○諭曰。劉秉恬等奏。據彭縣知縣李德舉。稱順慶府知府朱紹章。勒令出具彭縣印領。借支帑銀一萬兩。交與谷噶站員縣丞洪成龍支用。今差竣回省。疊次向其催繳各等因。查李德舉。先既聽從具領。及朱紹章催討還項。始於事後稟揭。況此項銀兩。均歸洪成龍支用。朱紹章何所為。而勒令李德舉具領。李德舉因何即行聽從。而藍衣經。又何以向索夫價銀七千兩。均屬不成事體。至洪成龍借出之銀。零星約計二千餘兩。又借給典史尉雷銀七千餘兩。更屬大干法紀。請旨一併革職。嚴審等語。朱紹章。李德舉。洪成龍。俱著革職。交與文綬。提集案內有名犯證。將各種情節。秉公嚴訊確情。按律定擬具奏。○諭軍機大臣等。據明亮奏。建

昌道賈凝吉患病員缺。請將陳奉茲補授一摺。內稱目下新疆善後事宜。惟有松茂道查禮堪資倚任等語。查禮原屬川省能事之員。前因郭羅克查拏匪犯一事。曾令查禮前往。旋即仍回至軍營辦事。後因查辦禮塔爾被害一案。經文綬於本年二月內。奏派保寧府知府倭什布。及叅將李天貴馳往。會同理藩院郎中阿林諭令該土千百戶。將要犯吹斯枯爾拉布坦。及同往之屬下人等。勒限全行拏解。迄今半年有餘。未據獲犯。郭羅克部落。雖屬光禩。今大兵勦滅兩金川。諸番自皆震悚。及此時勒令查拏。諒必不敢遷延袒庇。若遲之日久。番衆心漸懈弛。更難完結。今促浸光渠逆黨。尚且盡數俘擒。豈有最爾郭羅克。任其頑梗不率之理。文綬現在作何籌辦。各犯曾否全獲。久未奏及。至明亮為成都將軍。且亦深知其事。亦不可不速將此事辦竣。著即會同文綬。務嚴飭該土千百戶。迅即獲犯

解審。毋任稽延。恐原派之知府倭什布。叅將李天貴。不能承辦此事。查禮既係熟練夷情。自應即令前往。將郭羅克緝犯之事。迅速辦妥。其經手報銷之事。隨帶辦理。亦不致有誤。將此傳諭知之。仍著文綬將飭拏郭羅克犯。曾否就獲之處。迅即覆奏。○又諭據劉秉恬等叅。秦順慶府知府朱紹章。勒令彭縣知縣李德舉。出具印領。借支帑銀一萬兩。交谷噶站員洪成龍支用。請旨革審一摺。已降旨。將朱紹章等革職。交文綬嚴審定擬矣。此事實堪駭異。李德舉至谷噶站。係二月十二日。已經大功告成之後。所辦不過凱旋差務。及善後安站各事宜。而混領混借混用。荒唐一至於此。則軍興時各站員之混冒妄費。尚可問乎。富勒渾文綬均係總督。一在軍營。一駐省城。同辦軍需事務。稽覈站員。乃其專責。豈竟全無董飭覺察。任憑各該員恣意妄為。即劉秉恬等。督辦糧運。往來其地。又豈全無聞

見。何以前此竟未早為辦及。直至此時。尚係據李德舉之稟揭。始將此叅奏乎。著傳諭劉秉恬。文綬。富勒渾。鄂寶等。即行查明。據實覆奏。至此次辦理兩金川。悉行掃蕩。滅醜獻俘。實為一勞永逸之計。即多費帑金。朕心原所不惜。但必須實用實銷。豈可聽憑站員等。任意花銷。飽其慾壑。而置帑金於無著。即如軍需奏銷。戶部議定。分為舊案新案覈辦。而舊案中。又將各藩司任內。分為三節。今劉益一

任。已經題結報銷。僅九萬餘兩。較之原報動用之四十餘萬。尚不及四分之一。則所少之三十餘萬兩。作何著落。舊案一節如此。其餘大概可知。且通計節次發往川省軍需銀。共六千一百餘萬。聞其中實可開銷者。僅四千餘萬。則其餘二千餘萬。如何糜耗。又作何歸結。豈有將國家實發之庫帑。一任各劣員之浪費侵漁。消歸烏有。即使水落石出。將侵虧之輩。及辦理不善之人。治罪追抵。亦未必能

足數。豈竟欲俟之日久。率以人亡產盡。概請豁免乎。劉秉恬及該督現辦此事。自必通盤籌覈。亦曾計及將來奏銷報完之後。所缺帑項。作何歸款。不致懸宕乎。著傳諭劉秉恬等。將實在情形。及將來作何歸帑之處。據實迅速覆奏。毋稍支飾。將此由六百里諭令知之。

○軍機大臣等議准。烏什辦事大臣綽克托奏稱。葉爾羌。和闐。成丁。餘回。一千六十七戶。請給地耕種。照額納貢。又庫車。沙雅爾。庫爾

勒布古爾。成丁。餘回。皆均攤納貢。應歸入舊納貢物回人數內。從之。○是日駐蹕海拉蘇台大營。○庚申。

上行圍。○諭軍機大臣等。貴州湖南等省。兼轄苗疆。在在漢苗雜處。而古州鎮。兩處。向俱曾有漢奸至彼滋事。是以其地專設文武大員。稽察彈壓。嚴禁漢奸潛至苗地。即其餘苗疆地方。亦不許內地民人混入。例禁本屬周詳。但行之日久。地方文武。是否實力查察。恐

積漸廢弛。或視為具文。虛應故事。於撫馭苗疆之道。甚有關係。苗民本屬無知。伊等箐居尚處。滋息相安。原可共享昇平之福。自有漢奸竄入其中。潛相煽誘。仇殺之事。因之而起。全在地方官實心訪察。詰懲懲頑。以為杜漸防微之計。著傳諭凡有苗徭黎獯地方各督撫將現在漢苗雜處之地。平時作何稽查防範。及現在是否實力奉行。據實具奏。但當不動聲色。密為留心。不得因有此諭。稍涉張皇。

致胥吏藉端滋擾。○又諭向來各省苗民雜處地方。如湖廣鎮筵貴州古州俱曾有漢奸滋事。因設文武大員彈壓。不許漢奸潛入苗地。其餘凡有苗疆省分。例禁俱嚴。但恐奉行日久。地方官或視為具文。現已另降諭旨。令各該督撫留心整飭矣。至川省近年來。如僭拉之虎兒。促漫之張坤忠。俱以該省民人潛竄其地。構釁滋事。則漢奸之尤甚者。今兩金川全境蕩平。兩逆犯又俱就獲誅磔。自皆稍

知畏憚。但川省民情狡黠。其通事及貿易人率多習為番語。與番蠻聲氣相通。易於竄入滋事。即如布拉克底。巴旺。綿斯甲布。三雜谷等處。未必不有內地民人在彼。第此時大功初蒞。兵威震疊。自當以鎮靜為主。不宜因此稍露端倪。然亦不可不隨時稽察。豫防其漸。著傳諭將軍明亮。總督文綬。均各留心實力整飭。總宜不動聲色。妥為經理。仍將如何籌辦之處。即行覆奏。尋奏兩金川番境設鎮屯田。方事招徠。其中奸良不一。宜隨時稽察。前經飭辦屯各員。仿內地保甲設法編查。并諭各土司如有內地人逃入番境。即令拏送。屯防文武。臣等現即再加譯諭各土司遵照。至通事人等。通飭慎選誠實馴良。有產業親屬者。取具保結承充。該管官仍不時查察報聞。○添建甘肅玉門縣倉廩六十間。從總督勒爾謹請也。○是日駐蹕呼嚕蘇台大營。○辛酉。

上行圍。○是日駐蹕納爾蘇台達巴罕西大營。

翼日如之。○壬戌。

世宗憲皇帝忌辰。遣官祭

泰陵。○癸亥。

上行圍。○諭軍機大臣等。今歲入秋以來。天氣晴和。昨於二十一日。海喇堪山前行圍。密雨霑灑。旋即晴霽。因思京師自初三日得雨之後。迄今二十餘日。未據留京辦事王大臣奏報得雨。現在正屆翻犁播種秋麥之時。得雨

方屬有益。以此甚為厯念。著傳諭留京辦事王大臣。將半月以來。曾否得雨之處。即速據實具奏。○是日駐蹕都穆達烏拉岱大營。○甲子。

上行圍。○賑卹甘肅皋蘭金縣狄道渭源靖遠沙沉州判紅水縣。○隴西安定會寧通渭平涼隆德靜寧固原鹽茶廳撫彝廳張掖山丹武威永昌古浪平番靈州西寧秦州肅州高臺河州等二十九廳州縣。本年水旱霜雹災

民。緩徵新舊額賦有差。○是日駐蹕巴顏布爾噶蘇台大營。○乙丑。

上行圍。○是日駐蹕巴顏溝大營。○丙寅。

上行圍。○是日駐蹕達顏達巴罕昂阿東大營。○丁卯。

上行圍。○遣官祭賢良祠。○諭軍機大臣等。前因川省辦理軍需一事。通計節次發往帑銀共六千一百餘萬兩。聞可以報銷者。僅四千餘萬兩。則其餘二千餘萬兩。將來作何歸著。

不可不通盤覈計。使帑項不致虛懸。曾諭令劉秉恬文綬富勒渾等。將現在籌辦情形。及日後如何歸款之處。據實查奏。此奏尚未到。昨據戶部奏金川軍需奏銷。原議分為舊案新案覈計。而舊案又就各布政使任內承辦之案。分為三段。今劉益任內第一段。共十四案。業經隨案覈覆完結。僅報銷銀九萬二千九百餘兩。較原奏動用銀四十萬一千七十兩之數。尚少銀三十萬八千餘兩。雖題銷各

案內有聲明口外供支銀糧。另行覈造。及覈減長支。借墊應繳各項。飭追歸款之語。但其中應另造覈銷者若干。應行追繳者若干。未據聲敘明晰。事關軍需錢糧。未便含糊懸宕。請勅交劉秉恬等。即行徹底清查。據實具奏。等因一摺。已依議速行矣。此事實屬大奇。軍需動項既多。原不能悉皆符數銷算。但或零星未清。或所差不過十分之一。尚屬情理所有。今第一段奏結之案。報銷者止十之二。而

不能符數者十之八。其故實不可解。即有口外另行覈造之案。為數諒亦無幾。而所謂飭追歸款者。屬之何人。若云舊案第一段。係阿爾泰。劉益辦理不善。應令追賠。則二人俱已治罪。家產亦皆查抄。又將如何追繳。若應現在承辦之人代賠。則文綬富勒渾等。安能賠償如許。且此後未結之案尚多。又豈能責令二人獨任之理。而劉秉恬則木果木一案。已賠完五萬餘兩。又豈可復令代賠。若欲於四

川通省各員養廉內。分攤扣抵。無論川省歲需養廉有限。完繳無期。且後來之人何辜。而代前人代還欠項。更何以為辦事之資。則此後除授川省各員。不幾視為畏途乎。大約前此辦理軍需各員。其中急公辦事。間有賠累者。固不乏人。聞從中染指。侵冒肥橐者。亦復不少。若漫無區別。凡經手者。概行賠償。亦未為平允。諒從前支發之項。俱有冊檔登記。自可按籍而稽。並宜詳細訪查。將承辦各員之

曾經侵漁耗費者。察出治罪。即將其貲產抄沒抵還。如果曾賠墊辦公者。又當釋之不問。方足以示勸懲。而昭公當。至經辦之商人等。如止按其應得之數。謀利自贍。原不為過。若有曾經壟斷居奇。多獲重利。以致帑項難歸者。此等奸商惡賈。亦應查明確實。查產追賠。不使其得以封殖漏網。亦為情法之平。倘不分別妥辦。惟俟奏銷全完之日。將無著銀兩。著落數人追賠完事。致積數纍纍。懸宕難追。

遲之日久。概以產盡人亡。邀請豁免。有是理乎。征勦兩金川之事。本屬至難。而將士等不避艱險。奮勉宣力。遂成大功。至軍需報銷。雖頭緒繁多。究係坐辦。較之用兵攻戰。其難易相去何如。司事者豈可諉為難辦。而不實心甄覈乎。朕成此大功。為一勞永逸之計。多費帑金。原所不惜。然必須實用實銷。使款皆有著。方不負朕籌餉綏遐至意。豈可聽貪黷之徒。侵肥糜耗。而使實發之帑金。消歸烏有乎。

設或果有急於辦公之員。當時恐誤軍需。多費錢糧。今覈之部例。難以報銷者。原不妨將實情具摺陳明。如果確有柄據。奏到時朕原可加恩寬免。但不可因朕有此旨。將無著之項。悉作為實在賠墊具奏。無論難逃朕之洞鑒。即令伊等捫心自問。可妄為文飾。而甘蹈欺罔乎。且朕於劉秉恬。文綬。富勒渾等。不令賠償。體恤至此。伊等豈尚忍稍昧天良。負朕恩意乎。至李湖係朕特命前往之人。熊學鵬

則身獲重懲之人。念其平日尚知認真辦事。是以發往川省。幫辦軍需奏銷。伊二人若不知共發良心。實力查覈。妄以為隨辦之人。非其專責。輒思顛預了事。則其獲譴更重。不能復為寬宥矣。總之此事。非實在用心體察。不能得其要領。今戶部雖曾奏定一年半之限。而現在題結者。僅二百餘萬。不過三十分之一。其六千餘萬。分案覈報。為數尚多。恐未必果能依限完竣。而其中應行查覈。使帑項不

致虛懸。更非可潦草塞責。看來劉秉恬。富勒渾。郭寶等。高不宜即赴新任。若不將軍需全局辦清。難離川省。即郝碩顏。希深。雖非總辦大員。亦須將各人承辦之案。逐項查清。方可各回本任。將此由六百里發往。傳諭劉秉恬等。并令轉諭郝碩顏。希深。李湖。熊學鵬。知之。仍將如何查辦緣由。先行詳晰速奏。○吏部議奏。嗣後營盤冊結到司。有不合式。可於題咨後補送者。仍照向例辦理。其例得由司道

覈正彙造者。即行造轉。將底冊發換送存。其中並無因舛漏以致遲延之處。督撫量為記過。年終咨部查覈。若必須營縣另造。隨同送部之件。有因舛漏以致遲延者。駁令該員詳覈另造。該督撫於咨題時。將因舛漏遲延緣由聲明。按例分別議處。其豫印空白之處。仍嚴行禁止。從之。○是日駐蹕扎克丹鄂佛羅大營。○戊辰。

上行圍。○諭軍機大臣等。據滿斗奏。蘭溝行宮。

於本月十九日夜間。被賊竊去軟簾十四架。硬簾兩架。擄去月白綾裏一幅。別物並無遺失。現將看守行宮之外委沈國柱及兵丁二十三名。交內務府大臣嚴審究治等語。已於摺內批示矣。行宮重地。兵丁防守甚嚴。賊匪何從越牆而入。且十四架軟簾。兩架硬簾。束之成一大捆。一賊豈能持以踰牆。尤情理所易明者。此必看守兵丁。於平時陸續偷盜。恐一旦敗露。裝點被竊情形。捏詞具報。其中情

弊。顯而易見。滿斗何竟想不及此。著交英廉將該弁兵等。嚴加訊究。務得確情。至行宮所用軟硬各簾製造式樣。與外間不同。無難蹤跡。英廉可選派妥幹番役。於蘭溝附近之城鎮典鋪。細心訪查。如得有簾具實據。即可從此追究正賊。易於審明定案。英廉務須上緊查辦。一得實情。即行具奏。○又諭據滿斗奏。蘭溝行宮。於本月十九日夜間被竊。請將該管之地方文武各官。一併查叅交議等語。尤屬不諳事理。各處行宮。設有總管各官。專司稽查。又有內外圍千把外委兵丁。巡邏看守。使平時防範嚴密。查察認真。何至有偷竊官物之事。如果容賊匪踰牆入內。則圍牆外之堆撥兵丁。所司何事。自應嚴行責處。至文職州縣等官。係專辦地方事務。看管行宮。非其職守。況相去遙遠。豈能責以疎防。且東北兩路行宮。非香山湯山盤山可比。向來專交總管等員。派人看守。與綠營兵弁。亦屬無涉。況

就偷竊情形而論。由於該處兵丁者。十居其八。若此時遽將地方文武概行議處。是直指為外賊。轉令行竊之兵。恃以安心。而該管官員等。得以卸責。滿斗何不曉事若此。且前此石槽湯山行宮。俱有被竊官物之事。可見該總管等平日之漫不經心。著傳諭滿斗及各該總管等。嗣後各處行宮。務須督率員弁兵丁。小心看守。將存貯物件。時常點查。毋得再有怠玩疎失。致干重戾。○兵部議覆甘肅提

督法靈阿奏稱。向例每年甄別綠營千總。汰去百之二三。近見提鎮等甄別千總時。人數浮於百之二三。即扣留一二員。以備下年勒革。殊非崇實之道。請嗣後甄別。有可勒革之員。總兵不行辦理。經提督調驗勒革者。將總兵以徇庇例叅處。提督不認真考覈者。照例叅處等語。查各省甄別千總。如所去不及百之二三。將該督撫提督叅處。而總兵向未議及。殊未公允。應請定提鎮不認真之處分。但

若照徇庇例議處。事屬難行。應請即照督撫查閱營伍。叅劾衰庸將備。其不行豫揭之該提鎮。降二級留任。從之。○是日駐蹕伊綿溝口大營。○是月。大學士管兩江總督高晉江南河道總督薩載奏。查勘銅沛廳屬韓工。內係石岸。岸內有越隄。足為保障。與其用料鑲修。莫若放淤。可期一勞永逸。督令於埽工第三段。開挖進黃溝槽。工尾挑挖出清溝槽。於八月初八日開放。甚為妥順。俟內塘淤平。埽

工即可無庸再修。得旨。知道了。此猶小喜。若陶莊引河成而溜走北。實大喜。朕誠望之。爾等於何時興工。何時放溜也。○江西南贛鎮總兵吳淪元奏。請赴京請訓。得旨。不必來。汝係綠營能員。但恐深入綠營積習耳。○河東河道總督姚立德奏。加河廳屬滕縣山河。在種家渡入運。其入運處。河身彎曲。山水驟發。掃刷沙山。斜衝對岸。西裹頭致溜勢洄旋。沙土停滯。不能徑達引渠。應於余家橋下。孟

家莊後改挑新河一道。長五百丈。直接口門入運。堵築舊山河尾間。藉作沙囊。得旨好。知道。○四川總督文綬奏。遵查川省派往軍營綠旗征兵。奮勉勤勞者。即未委署銜缺。亦暫給空頂。撤兵後。似應量加錄敘。因現未拔補。飭令概行摘去空頂。仍將名冊覈明存記。遇有額缺。酌量挑補。至現駐番地屯防各兵。曾給頂帶者。應請暫准帶用。撤回內地後。仍摘去。下部知之。○貴州巡撫裴宗錫奏。黔省酌留加增腰站馬匹。原為馳遞滇省邊防文報。今軍務已竣。自當全裁。惟黔中山高站遠。馬力難勝。酌將玉屏青谿鎮遠施秉清平貴定龍里貴筑安平普定郎岱阿都田白沙關劉官屯等十四腰站。於本驛馬五十匹內。酌撥六匹。設站接遞。下部知之。○貴州提督寶璣奏。川省節年調撥黔兵。隨帶器械。除遺失外。帶回者堪用無幾。宜通融籌辦。無庸動帑。查各營解司之截半養廉銀兩。係備修武職

衙署。今軍械為要。應請派撥修製。再請賞借各營年半公糧。分作五年扣還。得旨好。知道了。

大清高宗法天隆運至誠先覺體元立極敷文奮武孝慈神聖純皇帝實錄卷之一千十五

大清高宗法天隆運至誠先覺體元立極敷文奮武孝慈神聖純皇帝實錄卷之一千十六

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務黃旗滿洲都統世襲騎都尉軍功七級隨帶加一級尋常加級軍功紀錄一次臣等謹

總裁官經筵講官太子太傅大學士大學士文淵閣領事稽察欽奉 上諭事件處管理刑部戶部庫事務

世襲騎都尉軍功加九級隨帶加二級又加二級臣等謹將內大臣戶部尚書欽差辦理滿洲都統軍功紀錄五次

尋常紀錄十四次臣等謹將經筵講官太子少保兵部尚書紀錄六次臣等謹將尋常

教修

乾隆四十一年丙申九月己巳朔

上行圍。○諭裴宗錫奏貴州平越府知府阿林才識拘迂氣局不能開展雖屢加指示教導未見振作辦事每形竭蹶似此才不勝任之員恐致貽誤地方若降府佐尚堪供職請將該員送部引見等語阿林著即送部引見另降諭旨其平越府知府著即開缺照例歸部選員補授阿林係由主事保送直隸州記名陞補陝西鄜州知州又由知州推陞知府直隸州與知府職任相仿阿林既不勝知府之

任則從前保送之該堂官及推陞時出具考語之督撫均不能無咎著交部查明察議具奏至向來直隸州知州員缺吏部行文各部院將主事都事經歷等官咨取保送引見記名選用雖係舊例相沿但直隸州職司民社兼有表率屬員之責非若同知通判佐貳閒曹可比以主事等官驟膺斯選原難期其勝任此例未為妥協著吏部另行改議具奏○又諭據楊景素奏常州幫回空糧船在夏津

縣被劫一案業經拏獲盜犯段老等十二名分別斬決梟示奏聞在案續據沂水縣拏獲逸盜田二歪胎膊一犯並據已革夏津縣知縣范君傑差家丁購線訪獲逸盜王老兒馬二等二犯起有賊據俱即審明斬決等語范君傑前據該撫參奏於旗丁具報失事之後刪改供詞意圖諱飾革職尚不足蔽辜因降旨發往軍臺効力贖罪以示懲儆今范君傑差家丁協同臨清州差役先獲盜犯鄧八等

五名。現又訪獲王老兒等二名。是該革令於
叅革後。尚知悔懼。力圖自効。著加恩免其發
往軍臺効力。至此案自阿思哈奏聞。朕即傳
諭楊景素。令其嚴飭地方文武。上緊緝拏。今
於一兩月間。節次弋獲十五名。僅餘劉老一
名未獲。可見地方官於緝盜一事。果能實心
偵捕。匪犯原可立時就獲。不致遠颺漏網。且
審明即行正法。更足以昭炯戒。而儆兇頑。若
各省捕盜官員。皆能如此認真辦理。盜風自

平糶本二二五

三

當盡戢。乃承緝者既不肯上緊購訪。而督撫
等。又以非奉特旨查拏。不加督促。雖有四叅
議處。及年終彙奏之例。亦多視為具文。每致
逸盜經久未獲。是以盜不知懼。而犯法者轉
多。豈除暴止辟之道。著通諭各督撫。嗣後遇
有盜案。務照山東緝獲油坊盜犯之樣。嚴飭
所在州縣。實力擒拏。全獲勿使稽延竄匿。以
副朕綏靖閭閻之至意。○諭軍機大臣等。據
裴宗錫奏。准咨截留兩淮運司大堂失鞘案。

內之解員鹽運司知事劉天燾。現在委員押
解起程。由湖南湖北。層次接遞。轉解江寧質
審等語。劉天燾於失鞘一案。商同庫官宋炎
私自賠銀。捏報撈獲。自有應得之咎。但伊係
接解餉鞘之員。被竊緣由。無從而知。轉不必
向伊根究。至此案前據伊齡阿奏。係解員陳
文棟差役錢玉夥同已革長隨王天榮。起意
偷竊。錢玉現已拏獲。王天榮已往甘肅。朕因
所奏摺內。疑竇甚多。曾經傳諭高晉將案犯
提至江寧。悉心研鞫。務得實情。並諭畢沅等。
速將王天榮躡緝務獲。嗣據畢沅奏。已將王
天榮拏獲。解交江督收審。迄今已逾數月。王
天榮亦應解到。該督曾否審得偷竊確情。未
據奏及。著傳旨詢問高晉。將王天榮是否係
竊鞘正賊。抑另行審有蹤線。究獲賊贓。及現
在作何查辦之處。迅速據實覆奏。將此由四
百里諭令知之。尋奏查賊憑贓定。此案該府
縣初審錢玉供詞。並無賊據。所供情形。亦多

閃爍。今提王天榮與錢玉質審。王天榮極口
呼冤。稱係錢玉挾嫌誣扳。錢玉亦稱到案被
追究妄認。將素有微嫌之王天榮指為起意
偷竊。其實皆非正賊。反覆詰明。已無疑義。至
此案賊贓。尚未獲有蹤跡。現嚴催地方文武
上緊躡緝。劉天燾尚未解到。俟到時。即提同
陳文棟等。審擬具題。報聞。○是日駐蹕安巴
究和羅昂阿大營。○庚午。

上行圍。○是日駐蹕烏蘭哈達大營。○辛未。

上行圍。○四川成都將軍明亮等奏。番地籽種
先經採買四十餘石。不敷散給。飭茂州。保縣
於存倉內撥五百名。解往噶喇依底木達等
處。於內地採辦麥一千石。解赴美諾勒烏圍
等處。至牛隻。先經採買五百餘頭。隨飭於松
潘所屬番地。採買一千六百頭。內地附近各
屬。採買四百頭。陸續解往。各項農具。軍營存
貯生鐵多。熟鐵少。除內地製解外。雇鐵匠十
名。赴屯打造。再小金川納木覺爾宗一帶。土

鹽味苦。內地兵夫不能食。現酌令兵丁遇換
班等便。准其帶鹽前往接濟。報聞。○是日駐
蹕坡資昂阿大營。○壬申。

上行圍。○遣額駙扎蘭泰。赴避暑山莊。

皇太后行宮問安。○貴州巡撫裴宗錫疏報。銅
仁府黃平。普安。施秉。三州縣。乾隆四十年。開
墾田地二十七畝有奇。○是日駐蹕塔哩雅
圖昂阿西大營。○癸酉。賜扈從王公大臣蒙
古王公台吉。土爾扈特郡王等食。○諭軍機

大臣等。前據滿斗奏。蘭溝行宮。被竊軟硬門
簾一案。將看守行宮之外委兵丁。交內務府
大臣審辦。當即交英廉嚴行查訊。今日據英
廉奏稱。該弁兵等。已據滿斗交昌平州看禁
等語。所辦非是。行宮諸事。及該處弁兵等。皆
內務府所管。況滿斗已奏明交內務府大臣
審辦。自應即將應訊之人。解交內務府查審。
因何轉交地方官看禁。滿斗何不曉事。若此。
著傳旨申飭。再滿斗前奏。請將該地方文武

官查議。朕以看守行宮堆撥。若係綠營所派兵丁。則該管武員。自難辭咎。若即係本處行宮兵丁安撥看守。即不能問及綠營武職。至文員職司民社。如地方公務有誤。朕必不為寬宥。至行宮地面。與彼無涉。該員等亦無暇照料及此。曾諭知該總管。今日駐蹕張三營。令詢問該處行宮堆撥。即係本處兵丁看守。則各處可以類推。是其事於該營武職。尚不相屬。况文職乎。滿斗前奏。妄請概予議處。惟思諉過於人。而不審情理之當。何不明之甚耶。將此一併諭令知之。○是日駐蹕張三營行宮。○甲戌。諭曰。圍場內偷打牲口砍伐木植人等。膽敢拒捕。情殊可惡。嗣後拏獲圍場內偷打牲口砍伐木植人等。仍照舊例治罪外。若有緝拏之時。拒捕不肯就擒者。拏獲時著加重治罪。其敢於拒捕。致傷緝獲之人者。拏獲時著即行正法。○是日駐蹕波羅河屯行宮。○乙亥。改四川成都副都統衙署為將

軍衙署。協領衙署為副都統衙署。從總督文綬請也。○是日駐蹕中關行宮。○丙子。

上詣

皇太后行宮問安。○遣官祭

歷代帝王廟。○遣官祭

都城隍之神。○是日駐蹕避暑山莊行宮。至

癸未。皆如之。○丁丑。

上奉

皇太后幸卷阿勝境。侍早晚膳。○諭據楊景素

奏審擬王之彬挾仇連殺董長海王三麻子等六命。將王之彬依律凌遲處死。妻劉氏子王小雨改發伊犁為奴等因一摺。覽奏深為駭異。王之彬因挾董長海王三麻子挑撥微嫌。輒持刀將董長海及王三麻子夫婦子女同時扎死。連斃六命。兇惡慘毒。實屬從來罕有。然按律不過凌遲處死。實覺罪浮於法。至伊妻劉氏子王小雨。雖據該撫從重擬發伊犁。給與種地兵丁為奴。尚不足以蔽其辜。夫

王三麻子全家俱被殺害。而兇犯之子。尚令倖生人世。以延其後。豈為情法之平。若云王小雨年僅十歲。則該犯所殺之王四娘王五妮。皆孩穉無知。尚未至十歲。一旦盡遭慘死。何獨兇犯之子。轉因其幼而矜原之乎。且此等兇惡之徒。為戾氣所鍾。不應復留餘孽。即伊四歲之幼女王三姐。亦不宜輕宥。如查明被殺之家。尚有子嗣。即將兇犯妻劉氏及伊幼女。一併賞給死者家為奴。若現已無人。即發往伊犁。給與厄魯特為奴。此案即著行在刑部。速行覈擬具奏。至刑部律例所載。惟及殺一家非死罪三人而止。至全家被殺多人之犯。作何加重。未經議及。此等兇徒。明知法止其身。或自拚一死。逞其殘忍。殺害過多。以絕人之嗣。而其妻子仍得倖免。於天理人情。實未允協。朕非欲改用重典。但為民除害。不得不因事嚴防。俾兇暴奸徒。見法網嚴峻。殺人多者。其妻孥亦不能保。庶可稍知斂戢。是

即辟以止辟之義。其應如何增改律例。並著刑部。另行妥議具奏。○諭軍機大臣等。軍機大臣奏據舒濂明山保。稟報查拏周二等搶刦賊犯一案。拏獲拒捕之周二方賢等二十名。訊供稟報。並應否先行起解。請示遵行等語。周二等既經就獲。訊明實係拒捕要犯。著即交該通判。先行押解熱河。交軍機大臣審訊。並著明山保等多派兵役。沿途小心防範。管解毋任再有疎脫。舒濂明山保仍留該處。將胡國祥等要犯。嚴行躡緝務獲。毋使一名漏網。獲到時如朕已回鑾。即著明山保選派妥幹員弁。帶領兵役。隨同舒濂管押解京審訊。至方賢供內稱胡國祥從前在盛京去過。有無在高橋地方。偷過高麗銀子。實在不知道等語。該犯是否因舒濂等將此案詰訊。始有此供。抑係並未訊及。該犯自行供出。著傳諭舒濂明山保。即速據實具覆。將此由五百里傳諭知之。○吏部等部會議。盛京將軍弘

煦奏稱鳳凰岫巖二城事務責令岫巖通判管理與京一城事務歸與京通判專理無庸旗員經管應如所奏從之○戊寅

上詣

皇太后行宮問安○諭軍機大臣等據英廉奏審訊蘭溝行宮被竊軟硬簾一案初據看守行宮之該兵丁等供稱自初六日員外郎陳政查點之後直至二十並未開門及經嚴訊又供出十三十六十七曾開門三次等語是官簾被竊即在此三次開門之內即當從此嚴切追求著英廉速將該弁兵等嚴加審訊務得實情即行擬議具奏至夾單內稱各處行宮內圍俱有內務府千把兵丁看守惟蘭溝行宮內圍向無內務府弁兵止有綠營外委一名兵二十三名在外圍看守巡查一切鋪設掃除出入等事亦係伊等管理鎖鑰並係外委收掌等語各處行宮均派有內務府千把看守朕以為必係伊等為竊故屢有旨

諭英廉嚴問千把等乃蘭溝行宮委之綠營弁兵并將鎖鑰付其掌管此即上年修理之後英廉所辦未妥之故著交總管內務府大臣另行辦理具奏將此傳諭英廉知之仍將曾否究出正賊之處迅速覆奏○刑部議准兵部左侍郎高拱奏稱各省命盜案件由督撫審擬具題案犯供情造揭帖咨部但揭帖中該犯當堂畫押原供向不咨送是以州縣改削諱捏致犯案者越訴赴控伏思口供微有增刪即繫罪名出入請嗣後各省命盜大案審確定擬者令承審州縣於取供畫押時要犯畫供二紙一照舊存署一申送府道臬司審辦由督撫隨案送部查覈倘因有申送之例抑勒畫押該上司究出揭參尋常外結案亦照此例從之○己卯諭前因郭羅克賊番殺害青海公禮塔爾一事派理藩院郎中阿林前往四川會同該省派出之保寧府知府倭什布及叅將李天貴至番地諭令該土

司等將兇犯吹斯枯爾拉布坦等勒限全行拏解。今據明亮等奏。郎中阿林等勒拏兇犯。僅據該土司瑪克蘇爾衮布等稟稱。吹斯枯爾拉布坦逃避無蹤。將其寨房拆毀。搜獲犯屬男婦九名口。及牛馬等物解送。懇請徹回官兵。寬限擒拏等語。所辦大謬。已傳旨嚴行申飭矣。阿林等派往該處。董司緝犯之事。理應督同該土司到處搜拏。將兇犯緝獲。方可完案。乃惟憑該土司一面之詞。及綠營虛誑惡習。輒思遷就了事。甚屬不堪。阿林倭什布。李天貴俱著交部嚴加議處。○諭軍機大臣等。明亮等奏。郎中阿林。參將李天貴。知府倭什布。前往郭羅克勒拏兇犯。據該土司瑪克蘇爾衮布等稟稱。吹斯枯爾拉布坦逃避無蹤。將其寨房拆毀。搜獲犯屬男婦九名口。及牛馬等物解送。懇請徹回官兵。寬限擒拏。隨令阿林等回赴省城商辦。將官兵暫撤。揀派熟諳夷情備弁一員。暗駐境上。嚴督該土司

偵捕兇犯等語。所辦大謬。已於摺內批示。郭羅克境壤有限。吹斯枯爾拉布坦等雖欲逃匿。諒未必遽能遠颺。李天貴倭什布。係該省派令專辦之員。阿林由京派往該處。董司緝犯之事。理應督同該土司到處搜拏。將所有地界。遍行親歷。兇犯一日不獲。阿林等一日不回。官兵等一日不撤。該土司自不敢以誑言欺飾。乃阿林等惟憑該土司一面之詞。妄以殺人首犯。誣之綽克宗加爾。又云其已經墮礮身斃。更屬死無證見。且言吹斯枯爾拉布坦等。杳無蹤跡。僅將犯屬解送。率請撤兵寬限。明係該土司狡詐遷延。有何難察。至所云該土司欲跳河自明心跡。經把總攔救。尤必無之事。此乃綠營虛誑惡習。何足為憑。番性素不肯輕生。即如索諾木等。經大兵圍困。勢窮力蹙。尚欲偷生乞命。該員等並未將土司逼迫。何至欲自投河。尤可見其虛誕。至所稱賊番係該土司部落之人。雖恐不無代為

隱庇。今既拆毀賊番所住碉房。獲其家屬牛馬。其悚懼實屬真情等語。更不成話。碉房雖拆。何難再砌。其家屬止係婦女幼孩。並無成丁之犯。而殺人兇犯。僅獲其賊。何足示儆。即頂經誓兒。尤番人狡獪長技。如何可信。至該土司願出銀一千兩。賠贖服罪。尤為不成事體。幸而仍飭發還。若再收之。不更貽笑柄耶。總之撫馭番人之道。懾以威嚴。則皆畏服聽命。待以姑息。必致玩忽生心。從前兩金川之事。實由川省歷任督提。優柔遷就。釀成事端。遂致大費兵力。多發帑金。又得阿桂堅心籌辦。不避艱險。經五年之久。始得掃穴擒渠。今大功甫竣。正諸番膽喪之時。而在土境勒緝殺人兇徒。並非難事。自當嚴切督捕。使番衆技無可施。罪人斯得。庶可懲一儆百。共知震懾天威。永靖邊徼。乃當功成之後。初辦此事。即受該土司欺哄。遽徵官兵。草率完局。衆番又將毫無忌憚。必以為天朝雖設鎮安營。董

以大員彈壓。不過仍循故轍。郭羅克既以詭譎獲免無事。衆皆尤而效之。設或綽斯甲布各土司。復有類此者。又當如何辦理。抑似前此之養癰貽患乎。此案阿林李天貴倭什布。承辦勒緝兇犯之事。輕信該土司虛語。據以稟告。惟圖將就了事。甚屬不堪。已另降旨。交部嚴加議處。至明亮等。不察委員等庸懦無知之見。竟爾撤回官兵。置之不辦。實大不是。文綬桂林。知識短淺。且蹈外省積習。無怪其然。明亮舒常帶兵征勦有年。習聞朕之訓諭。且深知阿桂實心督辦軍務。不稍假借。因得成功。何尚茫無定見。不思效法。且明亮舒常。朕特委以管轄諸番。理應持正。今一事如此。其淺見可知。尚安望其能整飭制馭。使羣番敬畏乎。並著傳諭嚴行申飭。據伊等奏稱官兵暫撤。賊番聞事寢息。勢必回覓舊巢。土司得以分頭密捕。是縱之適所以擒之。不致稍有漏網。較之守候緝拏。似更妥速等語。試問

伊等徵兵以後該土司果如所計。獲犯縛獻尚可。若此旨到時。仍然無獲。伊等又何言自解乎。朕前因阿林李天貴倭什布往彼勒緝兇犯。半年有餘。未見覆奏。深知該委員等之無用。曾諭令派查禮前往。妥辦此事。令阿林等。果不出朕所料。至前旨由六百里發往。距今已逾二十日。明亮等早應接奉。何以尚未覆奏。豈因有此奏。妄思允准完案。遂意存觀望耶。此事責成明亮等四人。妥速勒緝。要犯務獲。毋任免脫稽誅。如一年之內。不能獲犯。即明亮等。亦當從重治罪。將此由六百里傳諭知之。仍即將查禮曾否派往。及現在如何籌辦之處。迅速覆奏。○又諭據滿斗奏。前赴南石槽。密雲縣。羅家橋。各處行宮。按冊查點。南石槽行宮。被賊偷去夾布牕簾一掛。密雲縣行宮。偷去綢夾軟簾十三掛。並坐褥三個。又羅家橋行宮。偷去門簾三掛。椅墊三個。請將三處看守行宮內外圍千總外委兵丁。交

與內務府大臣英廉一併嚴審。其北路總管福泰。係專管稽查之員。請交內務府嚴加治罪。并自請嚴加議處等語。蘭溝行宮被竊軟硬簾一案。朕初意以門簾被竊至十六掛之多。自非外賊所能持以踰牆。或即係看守兵丁零星偷去。因而裝點賊情。冀圖掩飾。今復據滿斗查出各處行宮內門簾坐褥。均有遺失。自係外來賊匪無疑。朕辦理庶務。從不稍存成見。前此止知蘭溝一處。自即係看守之人陸續潛竊。今又查出數處。而密雲行宮。並經該千總私製賠補。其非自盜可知。此等賊犯。敢於偷竊行宮官物。必係積慣猾賊。熟習行宮內門簾等物。易於攫取。故敢屢肆偷竊。似各處俱係一賊所為。或即係前年偷盜銀庫之賊。亦未可知。不可不即行嚴拏。務獲立寔重典。著傳諭英廉一面將蘭溝一案。詳悉嚴訊。務得實情。一面選差明幹兵役。嚴密訪拏各處偷盜官物賊犯。剋期弋獲。毋任遠颺。

漏網。至各典內查出門簾已較蘭溝原失之物為多。自係各行宮所失之簾亦有典當者。但統計各處所失之數似尚未盡典完。英廉當密諭各典鋪如再有持門簾赴典之人即行盤獲。密報提督衙門拏獲或可由此得其蹤跡。至看守弁員遺失物件並不即時稟報并私行賠補致賊匪益無忌憚該弁兵各有應得之罪均當查明責懲。福泰滿斗平日漫無稽查亦難辭咎并當交總管內務府大臣議處。所有滿斗兩摺並著鈔寄英廉閱看仍著英廉將如何查辦緣由迅速覆奏。○又諭曰軍機大臣等奏據舒濂明山保稟報續獲胡國祥之子胡柱兒等六名訊供稟報等語前日據報拏獲賊犯周二等二十名當經降旨令派該通判福慶押解行在審訊今又續獲胡柱兒等六犯並著明山保即派委妥員押解熱河交軍機大臣一併審訊飭沿途多派兵役小心防範毋任稍有疎脫至胡國祥

一犯糾約多人結盟拜把自係慣行肆竊要犯所有高橋地方偷竊高麗銀兩之事自即係該犯所為不可不嚴緝務獲著傳諭舒濂明山保仍留該處將胡國祥嚴行躡緝就獲毋任免脫漏網。胡國祥未獲到案舒濂明山保不可遽回俟拏到時明山保即選派妥幹員弁帶領兵役隨同舒濂管押解回審訊將此由五百里傳諭知之仍將現在作何緝捕曾否弋獲要犯緣由迅速據實具奏。○庚辰

上詣

皇太后行宮問安恭送

皇太后迴鑾○御依清曠勾到秋審官犯服制及雲南貴州情實罪犯停決官犯十五人服制斬犯三十九人絞犯一人雲南絞犯二人貴州斬犯二人絞犯二人餘四十五人予勾○諭曰健銳火器二營管理大臣過多舒赫德福隆安著照舊總理外健銳營著派奎林海蘭察和隆武管理舒亮噶塔布永平伍岱輪

班操演。火器營著派綿恩、福康安三保管理。烏什哈達、都爾嘉、扎勒泰、阿爾薩朗輪班操演。其有在內廷行走者。亦著常川前往。扎拉豐阿、努三、弘旿、普爾普拉旺多爾濟、豐昇額、圖爾都春、寧額、森特俱不必管理。○豁免浙江仁和錢塘海寧、烏程等四州縣。乾隆四十年分坍沒田地一百三十四頃五十畝有奇額賦。○辛巳諭吏部議奏嗣後直隸州知州一項。請於各部院京察保送引見。准其一等之主事等官內。出具切實考語。保舉引見。按班陞用一摺。所議尚未允協。六部主事。分辦部務有年。事多諳練。京察時經該堂官保列一等。必擇其才猷卓越之員。以之陞補直隸州知州。自堪勝任。至太僕寺等衙門主事。及與主事陞轉相同之經歷、都事、寺丞、署正等官。平日本無事可辦。遇京察之年。該堂官祇就其循分供職者。列為一等充數。實非六部主事可比。一旦驟膺直隸州之選。必致竭蹶。

貽誤。阿林即其驗也。且六部堂官衆多。就本部滿漢主事內。甄覈保舉。原可得人。若小衙門堂官。不過數人。且係三四品京堂。其保舉本不能如六部尚書侍郎之明公。且所屬主事等員數無多。不過因地取材。安能名稱其實。從前御史陸秩條奏。吏部議准。均屬姑息未安。豈宜復沿其誤。嗣後直隸州知州缺。止應於六部京察一等滿漢主事內。保舉引見。記名銓用。其小衙門之主事等官。概不准其陞用直隸州。如有京察保列一等者。止可令其改用六部主事。如外省調繁之例。以資造就。諒此等閒曹散秩。擢用部員。未必能遽膺上考。設其中果有才具出衆之員。在部復經保列一等者。原未嘗不可錄用。庶於慎重吏治。甄拔人才之道。均為有益。其如何酌定章程之處。著軍機大臣會同行在吏部另行妥議具奏。○又諭滿洲蒙古人員。由道府丁憂回旗。已滿百日。在部行走者。曾降旨於每年

十月內該部查明帶領引見至滿員內曾任丞倅州縣丁憂回旗在原衙門行走者伊等曾膺外用於地方事務自較諳習著吏部一併查明照道府回京人員之例亦於每年十月帶領引見一次○又諭曰弘昫奏據廣寧防守尉貴勒賀知縣伊湯安拏獲逆犯張毅審擬一案即批交行在法司議以凌遲處決已依議速行矣此等逆犯實為法所難寬若地方文武員弁稍事姑息必致漏網稽誅所

有拏獲該逆犯之防守尉知縣等尚屬實心任事著交部議敘以示獎勵○諭軍機大臣曰弘昫奏拏獲樂亭縣逆犯張毅審擬一案已批交行在法司叢議速奏矣該犯逆詞內有龐姓四奴通漢鈎旗欺君盜庫字樣詰問龐姓何人據供是京城包衣龐大龐二龐四龐五弟兄四人曾請教書一月即行逐去我心裏懷恨罵他並非實有其事等語逢本音龐此人將孟子內逢誤認作逢轉訛逢馮為

龐英廉係包衣馮姓馮逢同音故該犯呼為龐姓亦未可知且英廉現有子四人似該犯從前曾在英廉家教讀英廉見伊有乖張不法形跡因而逐出又欲為之消弭未經奏明究辦英廉頗能辦事惟素有大事化為小事小事化為無事之見往往意存姑息所短實在乎此其實此等狂悖逆犯乃天理所不容神人所共憤何所用其憐憫一有見聞即當舉發嚴辦安得稍為隱諱耶著傳諭英廉即

將該犯曾否在伊家教讀并因何逐出之處詳悉據實具奏如有該犯所存字跡悉行呈出倘敢稍有隱飾或將字跡銷燬甘蹈欺罔試問英廉其能當此重戾乎設或該犯實未英廉家教讀即速查明包衣下龐姓兄弟四人係屬何人訊明如何延請該犯及因何驅逐之故有無存留該犯字跡一併據實奏覆將此由六百里傳諭知之尋奏查包衣有拜唐阿龐保恩弟兄四人傳訊據供張毅經

周鵬舉薦來教讀屬實。因該犯忽患瘋顛辭去。並無存留張毅字跡。及加搜查龐周兩處。俱無悖逆文句形跡。但龐保恩等見張毅妄誕狂謬情形。並不報官究辦。均屬冒昧不合。應酌加懲儆。得旨不必責處。令各回去可也。

○壬午。

上御依清曠勾到四川。廣西。秋審情實罪犯。停決四川斬犯六人。絞犯十四人。廣西斬犯二人。絞犯三人。餘八十六人。予勾。○以湖南長寶

道梁敦書為福建按察使。○癸未。諭刑部進呈秋審招冊。朕詳加披閱。內浙江僧靜峯起意毆死其俗家胞弟周阿毛。圖賴邢直武等一案。照故殺期親弟妹律。擬絞監候。又江西省郭義煒謀財殺死小功堂姪郭了頭仔一案。照尊長謀殺本宗卑幼已殺者。依故殺律。擬絞監候。雖皆擬入情實。而所引之律。俱未允協。僧人披剃出家。即不當復論其俗家卑幼。且致死人命。即已犯其殺戒。今靜峯因周

阿毛癡呆無用。輒行謀死。圖賴洩忿。兇殘殊甚。彼既不念手足之誼。何得復援尊長之條。刑部所以引此者。因律有為僧於本身親屬有犯。仍按服制定擬等語。遂爾概行比附。殊未思律言有犯。專指尊長而言。如僧人犯其祖父伯叔。自不可因已出家。稍為末減。若卑幼本不可言犯。又安得由犯尊之律。推而下及乎。是僧人致死俗家卑幼。斷不當復以服制論也。至郭義煒因其六歲幼姪郭了頭仔

頸戴銀項圈。輒行起意扭取。見其哭喊。遂行推跌。糞坑溺斃。兇惡殘忍。情殊可惡。且該犯意在圖財。視伊姪如草芥。盜攫而殘其命。於死者恩義已絕。又豈可復引謀殺卑幼之條乎。夫尊長之於卑幼。或不遵教誡。或干犯名分。責打致斃。本律原止擬流。若因財產起釁。則不得概用此律。從前曾降諭旨。勅部準情定擬。是以有兄及伯叔因爭奪財產。將弟姪故行殺害者。擬絞監候一條。然此亦第專指

尋常索財爭產。因傷斃命而言。蓋弟姪原有
瞻給尊長之義。故尊長之罪。尚可稍輕。若謀
財害命。及強盜得罪。致死弟姪。更復有何倫
理。以及圖姦卑幼之妻。復將卑幼謀殺者。此
等兇徒。身已蔑倫傷化。定擬時轉因倫紀原
情。又豈明刑弼教之本意乎。朕辦理庶獄。鑑
空衡平。輕重悉視其人之自取。而於秋讞大
典。披覽再三。期於無枉無縱。若此二條。舊例
尚未合情理之正。著刑部另行改議具奏。以

昭平允。○諭軍機大臣等。據英廉奏。蘭溝等
四處行宮被竊門簾等物一案。已將正賊蘇
雲程拏獲。現在嚴行鞠詰等語。所辦甚好。行
宮重地。該犯敢於屢肆偷竊。恐同夥必不止
一人。并尚有窩家為之容留藏匿。自當詳悉
研求。將其黨與一併拏獲。從重定擬。此種賊
匪。情罪實為重大。所當明正典刑。以示懲創。
著傳諭英廉。務令該犯多受痛楚。俾其逐一
供吐。毋任狡飾。但不可因刑致斃。轉使倖逃。

顯戮。至此賊或係從前偷盜銀庫之人。亦未
可定。並著英廉設法究詰。務令供吐實情。但
須詳加體察。從前所查銀庫閣下牆邊。曾有
血跡一塊。自係賊人跌傷所致。如該犯頭面
有跌傷舊痕。更可從此根究。但不得因該犯
原係應死之人。即將前此偷盜銀庫之事。歸
併該犯。以圖銷除舊案。所有番捕留心緝獲。
當商據實指線。並著量加獎賞。可將此由四
百里傳諭知之。仍將如何審究之處。即行奏
覆。尋奏將蘇雲程詳細究詰。據供向在口外
喇嘛廟偷馬數次。後復隨營偷竊屬實。至京
城內路徑尚不能全識。不曾偷竊過別項官
物。王玉之外。亦再無同夥賊人等語。刑夾再
三。堅供如前。又查驗該犯頭面。並無舊日跌
損傷痕。報聞。○又諭三座塔結盟搶犯案內
各犯。陸續就獲。止餘正犯胡國祥一名。餘犯
數名。現已飭令各該廳上緊緝拏。諒亦無難
擒獲。明山保舒濂可無庸在彼督緝。且熱河

現在建蓋

文廟一切運送木植等事。亦須明山保料理。著傳諭明山保。即回至熱河。舒濂亦即回京。○工部等部會議。巡視通州漕務御史索興阿奏稱。通惠河各閘工程。請改歸通永道管理等語。應如所奏。以專責成。仍令坐糧廳會驗。詳報倉場侍郎。隨時查察。從之。○豁免浙江錢清場西興豐寧歲三圍。乾隆四十年。冊沒沙壓田蕩一萬二千五十畝。有奇。額徵

課銀

大清高宗法天隆運至誠先覺體元立極敷文奮武孝慈神聖純皇帝實錄卷之一千十六

大清高宗法天隆運至誠先覺體元立極敷文奮武孝慈神聖純皇帝實錄卷之一千十七

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務處總辦滿洲都統世襲副都統軍功加七級隨帶加一級尋常加二級軍功紀錄一次 臣履桂

總裁官經筵講官太子太傅大學士文淵閣領閣事稽察欽奉 上諭事件處管理刑部主事事務

世襲副都統軍功加九級隨帶加二級入加二級 臣量括內大臣戶部尚書鑲藍旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十一年丙申九月甲申

上自避暑山莊迴鑾遣額駙扎蘭泰赴兩間房皇太后行宮問安。○軍機大臣等議奏嗣後六部主事京察一等奉旨允准者以直隸州知州陞用步軍統領衙門事務亦繁主事內每有出色之員亦請照六部辦理其太僕寺等各衙門主事經歷都事寺丞署正等官京察保送引見准其一等者以六部主事調補從之。○是日駐蹕喀喇河屯行宮。○乙酉駐蹕常山峪行宮。○丙戌

上御行殿勾到廣東福建秋審情實罪犯停決廣東斬犯七人絞犯七人福建斬犯十二人餘一百十四人予勾。○諭曰豐昇額回京後著即赴本任辦事現在川省軍需奏銷之事未竣英廉仍著兼署戶部尚書至戶部堂官在內廷行走者多該部事務殷繁不可無人坐辦索守伺雖在軍機處行走著每日到署專辦戶部事務遇朕至圓明園之日不必隨往其豐昇額福康安梁國治和珅並著每日輪流一人到署辦事。○又諭據永德奏福州副都統偉善年力衰邁呈請代奏解任等語偉善著准其原品休致。○諭軍機大臣等昨禮部奏據道錄司陳資炎呈稱龍虎山上清宮署提點司詹資國咨稱提點婁近垣病故所遺員缺請將現在署協二提點改為正副提點換給劄付等因查上清宮額設提點一人本無署協之分嗣因婁近垣在京難以兼顧申請揀派署理協理經禮部給以劄付提

點條六品頂帶。如果一人照料不周。亦應奏明設立。禮部遽准給劄。實屬疎忽。請將原辦之堂司各官。交部查議。至提點等項法官。為正一真人所屬。凡遇頂充。自應報明真人。查其賢否。覈實報部。乃詹資國即以本人具文請充。並未呈明轉請。殊與體制不符。未便遽准。請飭交江西巡撫轉飭正一真人查明報部。再行辦理等語。所駁甚是。已依議行矣。龍虎山上清宮額設提點法官等項。本係正一真人所屬。其管理齋醮香火。亦係本山事務。從前婁近垣

簡放四品。乃

世宗憲皇帝特恩。並非定例。今婁近垣業經病故。提點法官等項。自應仍歸正一真人管理。員缺應補。亦應真人揀選。報部頂充。乃詹資國並不呈請。竟自具文報部。恐不無多事擅專情弊。著傳諭海成。查明詹資國自署提點以來。是否安靜守分。其辦理此事。曾否告知

真人張存義。其上清宮諸務。應作何歸併查覈之處。逐一妥議。據實覆奏。○又諭前據弘昫奏。訪緝高麗人被盜銀兩一案。有胡國祥等。曾偷竊行路客商銀兩。當差捕役在三座塔扣布特邨。將胡國祥拏獲。旋被周二等糾眾奪犯。並將捕役毆傷等語。當派軍機司員舒濂。會同熱河道明山保。馳往該處。將奪犯毆差之周二等二十五犯。并伊子胡柱兒。先後拏獲。解交行在刑部。嚴審定擬。其未獲之

胡國祥。現飭各該處嚴緝務獲。押解赴京。從重究治矣。向來各省差役。至鄰省緝拏要犯。俱行文咨照所在督撫。并令捕役於應行緝犯之處。密向該州縣掛號。選差幹役協緝。蓋恐外省差役。越境拘拏要犯。村人不能識認。易滋事端。若見有本處公差。知係官司勾攝。自不敢於違抗。且本地差役。跟尋犯人住址。亦易於緝獲。設遇大案要犯。文武員弁。并可親身前往。不致漏網。前日盛京緝拏胡國祥

之案。因該差於中途。躡知賊匪在三座塔地方。即往查拏。自不及先行稟報將軍。該將軍等。亦無由行文咨會直隸。尚非將軍等之疎忽。但盛京各處。毗連直隸者多。緝拏人犯。亦所常有。嗣後遇應行差赴直境緝犯之事。如已查有要犯居址者。一面飛咨直隸總督。飭屬妥辦。並令該差到境。迅赴地方官掛號。添差協緝。設或貪差時。未知該犯住址。經差役臨時訪得者。自當星即往捕。若俟稟報本官。

再行移咨會緝。必致要犯遠颺。又無此拘泥貽誤之理。竟當於差票內。豫行注明。如該差有沿途訪得犯人蹤跡。在於鄰境者。該差即持票迅赴所在地方官掛號。令速添差協拏務獲。仍令選派兵役護解出境。並令沿途地方官。隨到隨派差遞送。以免疎虞。若盛京派差時。不於票內注明。及所在地方官聞知。不實力協緝。及到境不小心護解者。均難免應得之咎。將此傳諭盛京。吉林。黑龍江等處將

軍副都統及奉天府君遵照辦理。並就近交該督通飭各屬一體遵行。○是日駐蹕兩間房行宮。○丁亥。諭據劉秉恬。當勒渾。鄂寶。桂林奏稱。川省辦理軍需。蒙發帑金六千餘萬之多。凡例准開銷者。現在隨案覈銷。其與例不符。應行刪減者。約計千百餘萬。除於承辦各員名下追賠。及該管上司分賠外。為數尚多。擬於川省養廉內。扣半攤賠。猶恐歸結無期。帑仍懸宕。請令各直省督撫以下。州縣以

上等官。於應得養廉。酌扣十分之三。代為賠還。不出十年。即可全數完結等語。所奏大非。無此辦法。朕征勦兩金川之故。因其係服屬土司。敢於負恩抗拒。吞噬鄰封。實為邊圉之患。勢不得不行剪除。五年以來。朕宵旰運籌。調兵裕餉。幸將士宣勞用命。掃穴俘酋。大功告成。為一勞永逸之計。即用數千萬帑金。朕心原所不惜。但須覈實報銷。使用項悉歸有著。不得謂之妄費。若貪劣之員。藉端侵冒。自

為法所必誅。設其中有因軍務緊急。趨辦過費。致踰成額。難以按例准銷者。如果覈實奏聞。未嘗不可格外加恩寬免。即如站員冀國勲。承辦糧臺諸事。濫用無度。至於累萬盈千。法司議以大辟。擬入秋審情實。朕猶念其訊未入己。且究因急公所致。是以勾到時並未予勾。亦可知朕辦事準情酌理。務期至當。而不肯稍有偏倚矣。今劉秉恬等。乃因軍需奏銷。例應刪減者多。恐帑項懸宕。欲令各省將養廉酌扣攤賠。所見鄙謬。不能深體朕意。至於如是乎。夫金川軍務。係四川一省之事。若因經手之人。辦理不善。致多糜費。於各員名下追賠。並著落該上司分賠歸款。理所宜然。或因為數過多。於通省養廉分年攤扣。尚係就川省以完川省。然朕猶以為各官養廉。扣至一半。辦公不免拮据。且事屬已往。後任何辜。而令其代為前人賠累。亦未平允。併恐川省各官所得者少。不足以養其廉。致有贖貨

病民之事。更滋流弊。近經降旨與劉秉恬等矣。至各直省官員。與此事尤毫無干涉。顧可從而波及之乎。且如軍行所過省分。一切皆官為資給。絲毫不擾閭閻。雖用兵而人不知兵。朕之體卹下情。若此其周且至。安肯以軍需無著之項。貽累率土臣工乎。況此次軍需。共發帑六十餘萬兩。刪減即至千百餘萬。不過十分之二。方今府庫充盈。並不必急欲歸還此千萬之數。若劉秉恬等所奏。竟似因軍需費多。而令天下官員。公同填補。成何政體乎。昔康熙年間。江南藩庫。虧帑二百餘萬兩。部臣議請賠究。皇祖諭云。此必因朕屢次南巡。墊用之故。朕為太平天子。省方觀民。即動帑金以供巡幸。亦無不可。毋庸追賠究治。煌煌聖訓。人皆感誦。今朕因征勦叛蕃。綏靖邊徼。致費帑項。豈不能效法皇祖之概行寬免乎。劉秉恬等係朕特派會同

該督文綬等。數辦軍需。奏銷大員。惟應各發天良。將用過軍需各項。徹底清查。覈實銷算。以次題結。通計准銷者若干。應刪減者若干。分別明晰。勿使稍涉朦混。至於刪減之項。總不離各站員經營。伊等支領收放。俱有冊檔可稽。其實用多寡。難掩衆人耳目。劉秉恬等。在軍營董辦糧運年久。亦應早有見聞。若有站員於事後浮冒捏開。查無確據。即屬藉端肥橐。或將官銀私自花費。膽敢侵蝕軍需。其

罪實浮於冀國勲。即當查明叅奏。必不姑寬。勿使貪劣之員。得以侵帑倖免。若有因軍需緊迫。必需多費。以免貽誤。查係衆見確鑿。實有憑據。如冀國勲之類者。雖與部定之例未符。而其急公之心可諒。不但不當治罪。并不當復向追賠。該侍郎等。即當據實奏聞。候朕施恩豁免。但不得因有此旨。輒思將劣員侵冒妄費之項。濫行混入。以圖掩蓋彌縫。為邀譽市恩之事。非特難逃朕之洞鑒。即伊等撫

心自問。亦恐為天理所不容矣。至所奏各省攤扣養廉之說。斷不可行。將此明白宣諭。使咸知朕意。劉秉恬。富勒渾。鄂寶。桂林。均著嚴飭行。並通諭中外知之。○是日駐蹕要亭行宮。○戊子。

上御行殿。勾到奉天。陝西。秋審情實罪犯。停決奉天斬犯二人。絞犯五人。陝西斬犯二人。絞犯四人。餘九十二人。予勾。○是日駐蹕密雲縣行宮。○己丑。

上詣

皇太后行宮問安。○諭曰。韋謙恒前在護貴州巡撫任內。因蘇橋侵貪一案。不即揭叅。尚非大過。伊係翰林出身。學問亦優。著加恩賞給編修。在四庫全書處行走。○諭軍機大臣等。據楊景素奏。東省採訪遺書。兩次進呈書籍內。有借鈔一百餘種。同揀存未解之書五十餘種。遵奉前旨。齎發各州縣。轉飭各原主收領。取有領收附卷。並無遺漏。亦無胥役從中

滋弊等語。所辦甚是。前經降旨。令各督撫將各家揀存之書。令承辦書局人逐一查驗。按照所呈原單造冊。先行發還。並飭該管官嚴行稽查。仍將如何還給。及何日給還之處。奏覆。嗣據各督撫陸續具奏發還遺書。俱已給領完竣。惟海成及裴宗錫摺內。有現在飭令各屬。將本家領狀報查。統俟報全之日。查明另行專摺奏聞等語。迄今未據奏及。該省是否全行給領。有無收字可憑。何以未經再奏。

海成尚在江西。裴宗錫雖已調任貴州。閔鶚元到任後。此事曾否查及。著傳諭海成。閔鶚元。詳悉查明。遇便覆奏。○恩賞原任大學士朱軾孫監生朱世德。在四庫全書謄錄上行走。○是日駐蹕南石槽行宮。○庚寅。

上迴鑒奉

皇太后居暢春園。○詣

安佑宮行禮。○幸圓明園。○辛卯。

上詣暢春園。問

皇太后安。○壬辰。諭曰。曹秀先。蔡新現在阿哥書房行走。張若潛年逾七旬。俱不必辦理。四庫全書總裁事務。遇有算法等書。仍著蔡新閱看。沈初。錢汝誠。劉墀俱著充四庫全書處副總裁。○諭軍機大臣等。據勒爾謹奏。乾隆戊戌年。新疆各處。應需貿易備賞綢緞。開明各項色樣數目。請飭江寧。蘇州。織造。暨山東。山西巡撫。照依議定丈尺織辦。解甘分運等語。著傳諭楊景素。色延。三基。厚。舒。文。福。海。即

照勒爾謹單開所需各綢緞。如式妥協製辦。務使質地厚重。顏色鮮明。不得稍有粗糙輕減。致滋挑駁干咎。並著遴委委員。如期解運。以資貿易之需。至所需秦紗三十匹。著畢沅一併照辦解往。○癸巳。諭曰。寶璣現准其來京陛見。該省總兵。俱係新任。未能兼署。所有貴州提督印務。著裴宗錫暫行署理。○賑卹湖南耒陽。郴州。永興。興寧。宜章等五州縣。本年被水災民。○甲午。

上詣暢春園問

皇太后安。○詣

大高殿。

壽皇殿行禮。○還宮。○諭曰。顯親王。蘊著。都統

素爾訥。四格。皆年邁。不能辦理旗務。俱不必

管理。都統。四格。著以都統銜。管理內務府大

臣事務。○吏部議覆。署浙江布政使徐恕奏

稱。南米關係兵糈。請酌定初。叅未完。不及一

分。及一二分以上。三叅處分等語。於清釐積

欠之道。似有裨益。應請嗣後。初叅州縣官。欠

不及一分者。罰俸三個月。戴罪催徵。叅後違

限不完。加倍議處。至未完一二分以上之經

徵各官。二叅限滿不完。亦加倍議處。再該管

上司有督催之責。亦應酌議。除未完不及一

分之督催各上司。例無處分。毋庸增定外。其

未完一二分以上之督催各官。二叅後違限

不完。亦按其未完分數。照二叅例加倍處分

從之。○乙未

孝慈高皇后忌辰。遣官祭

福陵。○諭曰。鑲白旗滿洲都統。著福康安調補。

鑲藍旗滿洲都統。著弘旻調補。鑲白旗蒙古

都統。著綿恩補授。仍管左翼前鋒統領事務。

鑲白旗漢軍都統。著伍彌泰補授。正紅旗漢

軍都統。著理郡王弘曉管理。努三年老。著不

必管理。右翼前鋒統領。所遺員缺。著奎林兼

管。○諭軍機大臣等。據刑部奏。審訊周升桓

不將秦廷基收禁一案。據周升桓供稱。熊巡

撫有要密辦的意思。故此不便問。止照看守

的原牌辦理等語。復提訊蘇爾德。供亦相同。

此事殊不可解。各省設立兩司。原係幫同巡

撫辦事之人。承審此等要件。斷無不令兩司

與聞之理。況藩臬俱面為請示。何以熊學鵬

輒云不令其管。即或審擬此案時。兩司論欲

從寬。與熊學鵬意見不合。原可切實教導。若

教而不從。偏執如故。即當據實叅奏。乃竟撤

却兩司。在署獨辦。其意何居。若云熊學鵬審

擬秦廷基一案。獨欲持正從嚴。恐兩司袒護同官。阻撓爭論。故不令與聞。果爾熊學鵬竟似不顧情面者。又何以問擬斬罪以後。不即飭令收禁。仍聽在寓安居。此非瞻顧寬縱而何。種種皆出情理之外。著傳諭文綬即訊取熊學鵬確實供詞。先行迅速覆奏。至此事必須熊學鵬到案。三面質對。方成信讞。伊係業經革職之人。即著拏解來京。並令文綬派委妥員沿途小心管押。毋致稍有疎虞。將此由六百里諭令知之。○又諭曰。刑部奏審訊周升桓不將秦廷基收禁。致在寓自縊一案。僅據周升桓等一面之詞。亦不足盡信。已傳旨文綬將熊學鵬拏解來京。與蘇爾德周升桓等質訊矣。况刑名案件。係臬司專責。熊學鵬不令兩司干與。廣德即應與之據理切言。并不妨請教巡撫。因何不令同辦。或熊學鵬偏執自專。兩司皆有奏事之責。即當據實奏聞。何以廣德於審訊此案時。僅一稟請如何辦

理。及熊學鵬答以不要你們管。廣德遂默無一語。直至獄成定罪。竟若置身局外。尤非情理。且廣德前在福建。與總督鐘音意見不同。每致抗辭辯論。何於滿洲總督。尚敢遇事爭論。而於漢巡撫。轉多顧忌。一經熊學鵬斥阻。輒爾緘默不言。有是理乎。著傳諭廣德。即速據實明白回奏。將此由五百里傳諭知之。○丙申。諭刑部審訊宗室穆騰額。因身有服制。未束黃帶。路遇正紅旗蒙古施氏之僕七兒等。錯認為相識之人。欲同飲酒。穆騰額不允。七兒等遂將伊衣服撕破一案。將七兒定擬具奏。宗室覺羅分至尊貴。束紅黃帶。以別常人。理宜自尊體統。若棄紅黃帶不束。使人無從識別。辱由自取。宜加重懲。嗣後宗室覺羅等犯罪之時。如束紅黃帶者。依宗室覺羅例辦理。如未束者。即照常人治罪。永為例。著宗人府曉諭知之。○刑部議奏。嗣後殺一家四命以上。致令絕嗣者。兇犯凌遲處死。其子無

論年歲。概擬斬立決。妻女發伊犁給厄魯特為奴。若死者有子嗣。即將兇犯子擬斬監候。秋後處決。妻女給死者家為奴。如死者家不願收領。即改發伊犁給厄魯特為奴。從之。○是日起。

上以孟冬享

太廟。齋戒三日。○丁酉。

孝敬憲皇后忌辰。遣官祭

泰陵。○兵部疏請。滿員補放綠營。緣事降調。除

提督總兵帶領引見。恭候欽定外。其副將叅將以下。按所降之級。覈明應用之缺。一併聲明。帶領引見。交該旗降品補用。得旨依議。此等人員到部。改補旗員。未能一時得缺。著該部帶領引見。朕視其才具。如有可用綠營者。仍著交部照例銓補。其應以旗員用者。即照部議降補。俾各及時得缺。並內外輪流間用。以示體恤。○戊戌。諭。昨四庫全書薈要處。呈進鈔錄各種書籍。朕於幾餘披閱。見黏簽考

訂之處。頗為詳細。所有各簽。向曾令其附錄於每卷之末。即官版諸書。亦可附刊卷尾。惟民間藏版及坊肆鐫行之本。難以槩行刊入。其原書訛舛。業經訂正者。外間仍無由得知。尚未足以公好於天下也。前經降旨。令將四庫全書總目及各書提要。編刊頒行。所有諸書校訂各簽。並著該總裁等。另為編次。與總目提要一體付聚珍版。排刊流傳。既不虛諸臣校勘之勤。而海內承學者。得以由此研尋。凡所藏書。皆成善本。亦以示嘉惠士林至意。○又諭。曰。兩金川喇嘛。均係邪教。不便仍留其地。但番人習奉佛教。該處獨無喇嘛。似非從俗從宜之道。應於噶喇依美諾兩處。酌建廟宇。即於京城喇嘛內。派往往持。所有應派人數。著理藩院議奏。其建廟事宜。著文綬妥酌辦理。○庫爾喀喇烏蘇都統西津泰降調。伊犁協領格綢額賞給副都統銜。駐劄庫爾喀喇烏蘇辦事。○是月。大學士管兩江總督

高晉江南河道總督薩載奏遵勘丁家集引河。欽奉硃筆標記圖內處所。臣等初勘時。原擬自彼施工。因計長一千八百餘丈。工長費多。又彼處淤灘稍高。河頭不能得勢。是以在迤下開挑。近日水消。溜走中泓。外面復生嫩灘。該處更不得河頭之勢。現在引河雖經疏濬。因秋汎水未大長。亦未開放。查丁家集民堰外生淤灘。嗣後水勢漸消。不致衝刷民堰。止須於淤灘上舊民堰處。築木筏一架。挑溜北趨。不但保護南岸。淤灘並可漸廣。而溜走中泓。霜降後。北岸河勢自有定形。再覆勘辦理。得旨覽奏俱悉。○又奏估計陶莊迤上引河。共長一千零六十丈。河頭寬四十丈。深一丈。河身寬三十五丈。深一丈二尺五寸。河尾寬三十丈。深一丈五尺。連移紫木龍。築挑水攔水壩。共需銀八萬五千六百餘兩。擇九月十六日開工。得旨好。知道了。○署湖廣總督湖北巡撫陳輝祖奏遵查湖南耒陽永興宜

章郴州興寧等州縣。一隅水災。已分別撫卹。沙壓衝缺之田。勸民挑復補種。俟確勘收成。分數。區別應否賑貸。妥辦。湖北鄖西縣石灘河地方。五月水發。衝塌草房二十一間。淹斃男女三十一口。俱經給貲撫卹。至沿溪地多石坂。本少種植。其泥土處。禾稻雜糧。水過仍含苞吐實。現俱收穫。並無減損。其自觀音堂以下。即出大江。暢流平緩。並無淹溢。報聞。○山東巡撫楊景素奏。查通省中鄒平等處。常平倉穀。現在額貯。共缺穀八萬三千三百二十七石零。係歷年賑撥。並本年蠲免之項。應以各屬溢穀。糶價買補。因各屬豐收。穀賤尚未全糶。除將現存糶價發買外。餘於四十一年地丁銀內。先動支買補足數。其各屬溢穀。飭令來年青黃不接時出糶。將價解司。得旨好。知道了。○陝甘總督勒爾謹奏。巴里坤屯田遣犯。原額三百五十名。今有年久安靜。照例編入民籍者十四名。除將不種地遣犯四

名補入尚少十名請於發遣烏嚕木齊人犯經過巴里坤時照數截留撥補嗣後照此辦理報聞○陝西巡撫畢沅奏遵查臣標左右兩營節次進征金川馬步兵丁有康連等八名經將軍叅贊委署行營把總外委徹兵回營俱即摘頂並未戴用得旨覽○欽差吏部侍郎劉秉恬四川總督文綬等奏川省軍興以來費用浩繁一切章程俱從嚴辦理但動帑至六千餘萬承辦各官至數百餘員難保無侵欺浮濫情弊臣等逐案清查除實係賠墊辦公者分別辦理外其並無實用之項虧缺帑金者即根究嚴治將任所本籍貲財抄沒賠補至各商領運米石俱係零星小商實無壟斷居奇多獲重利之人得旨覽○又奏川省此次軍需凡民間應幫貼之數一時未能湊齊先動官項酌借今大功告竣應速催繳除已解繳歸款外統計各州縣逾年未完者不下百餘萬為數稍多議將各州縣欠數

自來歲為始在三千兩以下者定限二年完繳三千兩以上者三年完繳得旨如所議行

大清高宗法天隆運至誠先覺體元立極敷文奮武孝慈神聖純皇帝實錄卷之一千十七

大清高宗法天隆運至誠先覺體元立極敷文
奮武孝慈神聖純皇帝實錄卷之一千十八

監修總裁官經筵講官太子太傅文淵閣大學士文淵閣領事侍衛內大臣稽察欽奉 上諭事件處管理

吏部理藩院事務兼管滿洲部統世襲騎都尉軍功加七級隨帶加一級尋常加二級軍功紀錄一次 臣慶桂

總裁官經筵講官太子太傅文淵閣大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級 臣董誥內大臣戶部尚書鑲黃旗滿洲部統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十一年丙申冬十月己亥朔享

太廟。

上親詣行禮。○遣官祭

永陵

福陵

昭陵

昭西陵

孝陵

孝東陵

景陵。

泰陵。○遣官祭
孝賢皇后陵。

端慧皇太子園寢。○頒乾隆四十二年時憲

書。○諭曰福隆安管理步軍統領事務以來。

辦理一切俱為妥協。但已閱十年。理應更換。

所有步軍統領著豐昇額補授。豐昇額尚係

生手。諸事恐未諳習。仍著福隆安兼管。○庚

子。

上御乾清門聽政。○御懋勤殿。勾到湖廣浙江

情實罪犯。停決湖廣絞犯一人。浙江絞犯一

人。餘九十九人予勾。○諭曰福隆安管理地

方過多。不能徧及。除緊要部旗等處。不可卸

離。仍令管理外。其雜項地方。理應開缺。武備

院事務。著和坤管理。暢春園。聖化寺。火藥局

事務。著邁拉遜管理。善撲。善射營。著福康安

管理。俄羅斯佐領。著奎林管理。奉宸苑事務。

著金簡管理。此時福隆安仍照舊兼管。俟過

一年。金簡熟習後。福隆安再停其管理。○辛

丑。飭禁各省貢獻。諭向來各省督撫例進方物。如雲南雲產石。福建柑橘荔枝之類。隨所產陳獻。仍不外乎任土作貢之義。乃閱時既久。督撫等踵事增華。即有購覓古玩充貢者。其始因恭逢

皇太后七旬。八旬萬壽大慶。及朕六旬萬壽。各督撫備物以申忱悃。尚非過分。伊等遂習焉不察。於每歲萬壽年節。亦一例呈進。朕因其既已遠致。不得不量收數種。以聯上下之情。

其實內府所藏古器珍玩。何物不有。豈藉外間貢物以為觀美。且伊等進到者。仍充宴賚分頒之用。今積久愈多。又豈宜復今日漸增益乎。朕簡任封疆大臣。委以地方政務。惟視奉職。程其殿最。豈因進貢衡其短長。即如總督中。惟高晉不令屬員代辦。而伊所進貢品。亦不及他省。衆所共知。朕因其平日實心辦事。不愧封疆之寄。特加恩用為大學士。恩眷獨優。亦衆所共知者。不更可曉然於朕意之

所在乎。乃伊等不能善體朕意。專以此為誇多鬪靡。甚無謂也。況古玩非布帛菽粟可比。饑不可食。寒不可衣。本非貴重之物。而一經各省購覓。市僧即從而高價居奇。其間自行售辦者。固亦有之。而令屬員代備者。恐或不免。併有以多報少。畧領價值。以為逢迎結納之具。此於吏治大有關係。不可不防其漸。至在京臣工。如王公及頭品大臣。前因

聖母及朕躬大萬壽。准其呈進慶祝貢品。今亦每年踵以為常。相率效尤。實所不取。且每逢慶節之前。反覺繁冗可憎。又何益乎。至藩司尤係不應進貢之人。近亦有於陞見時面為陳懇者。朕因業已加恩擢用。難以概行屏却。遂亦許其呈進畧觀。量存一二。究屬非體。又如內廷翰林於年節書寫詩冊詩扇及春帖子。恭進分所應然。又何必以購及古玩為事耶。至近日人情漸趨於華。殊失淳樸之意。昨偶閱熊學鵬家入官物件。內有珠繡蟒袍。此

必伊任巡撫時所辦。或備而未進。或進而未收。俱未可定。此等費工價而不適於用。朕甚鄙之。因即以賞人。並未留御。猶憶皇考時。怡賢親王。曾進珠繡黃褥。當即飭訓。並諭其過當。朕遵守。

家法。宮中服御。從不用及珠繡。又如象牙織簾。工巧近俗。又不平滑便用。遠不及尋常茵席之安適。因亦擯而不用。久有旨勿許再進。即此亦可知朕之好尚矣。嗣後各省督撫。除土貢外。毋得復有進獻。在京王公頭品大臣及內廷翰林等。亦當一體遵照。並將此通諭知之。○壬寅。

上御懋勤殿。勾到江西安徽江蘇情實罪犯。停決江西絞犯一人。安徽絞犯一人。餘八十五人予勾。○諭諸王襲爵。經朕酌定。由軍功封晉者。世襲罔替。其餘恩封諸王。襲爵時。皆應以次遞降。又念親王郡王以下。不過六七傳。即至奉恩將軍。心有不忍。曾經降旨。凡親王

以次遞降者。至鎮國公而止。郡王以次遞降者。至輔國公而止。其公爵均著世襲罔替。蓋襲爵延恩。若不定以等差。則國家億萬年之久。王爵愈積愈多。又不免於冗濫。昨四庫全書薈要處。呈進繕本宋史。朕幾餘披閱。見宗室世系表內。其燕王楚王之子。即降為公。公之後。降為三班奉職。是其再傳而後。即已下同齊庶。視現今所定恩封之親王。郡王。以次遞襲者。仍得世膺公爵。其厚薄為何如耶。且

朕於諸子中。惟皇長子。皇五子。皆因病劇時。始加封親王。至於皇四子。皇六子。則以出嗣諸叔。得襲郡王爵。餘尚未有特予冊封者。非朕沽名而薄待已子。正因理當然耳。所以昭示久遠之道。無有大於此者。我世世子孫。所當遵守勿替。著將此旨錄示阿哥書房。並諭令宗室王公等知之。○又諭曰。容保年老多病。著來京陛見。再降諭旨。綏遠城將軍員缺。著伍彌泰補授。鑲白旗漢軍都統員缺。著王

進泰補授。古北口提督員缺。著長清調補。雲南提督員缺。著海祿補授。○諭軍機大臣等。據刑部議覆。閔鶚元條奏。捕役誣良斃命。擬抵一摺。所駁甚是。已依議行矣。向例。凡誣良拖斃及拷打致死。將事主。旁人。并捕役。分別斬絞監候。蓋以誣指雖由事主。旁人。而私擎拷逼。實由捕役。覈明情節。分別擬抵。向來定例。本為平允。若照閔鶚元所奏。以事由誣指者。將事主。旁人。抵償。而捕役則予以減等。是欲於平人加重。轉於捕役議輕。何以懲惡。臺而安良善。是必閔鶚元為地方官所愚。率為此奏。閔鶚元係刑部司員出身。且久任按察使。海擢巡撫。於此等情罪重輕。不應漫無衡量。若此。閔鶚元著傳旨申飭。○癸卯。

上御太和殿視朝。文武陞轉各官謝恩。○諭據鑲白旗滿洲都統奏。戶部郎中西蒙額。呈送伊子原任兵部筆帖式阿爾泰。不守本分。日入醉鄉。口稱放火殺人。種種妄為。請將阿爾

泰發遣。併審訊錄供。奏聞等語。西蒙額呈控阿爾泰。乃以父控子。有何屈抑。即有屈抑。審明後。反坐伊父之罪乎。抑將伊子寬免乎。竟可不必如此究訊。若係繼母。於伊夫亡故後。呈控前妻之子。恐有冤抑。研究辦理。尚屬可行。如西蒙額以父控子。似此審訊。殊為過當。西蒙額之子阿爾泰。即著照伊呈送發遣。嗣後如有父送子者。即著照所控辦理。不必審訊。○諭軍機大臣等。昨已降旨。將海祿補授

雲南提督。長清調補古北口提督。王進泰補授鑲白旗漢軍都統矣。其天津鎮總兵員缺。尚未簡授。著傳諭周元理。即選委副將一員。奏明前往署事。並著傳諭海祿。俟署任之員到時。即來京請訓。再赴雲南新任。長清俟海祿到滇交代後。再行起程。赴古北口接篆任事。王進泰俟長清到後。再回京到都統之任。○又諭。今日召見甘肅慶陽府知府周人傑。朕因其在甘年久。詢以該省地方情形。據稱

甘省連年被災。皆因土本磽瘠。兼乏水利。其地高陡。不如南方平衍。到處蓄水。藉資灌溉。即有雨澤。亦建瓴直瀉。不能多停時日。若該處百姓。能於有河道處。多開溝渠。以分黃河水勢。引灌田疇。於旱地實為有益。其無河道處。遇有雨水。廣開池塘溝洫。俾高處之水。隨地存留。亦可滋潤土脈。長發禾苗。緣該百姓等。習於安逸。憚於勤勞。每致廢棄水利。若各州縣到處建閘築壩。有池有塘。則西北之水。隨處停滯。上游多一分水利。即東南淮揚一帶之黃水亦少一分水患等語。其言似有所見。著傳諭勒爾謹。即將該處水利實在情形。是否可以建閘開渠。引流灌溉之處。速委明幹大員。據實查明。逐一覆奏。○甲辰。

上詣暢春園。問

皇太后安。○幸圓明園。○諭曰。瑪興阿駐葉爾羌已四載有餘。著派侍郎高樸前往葉爾羌。換回瑪興阿。明琦在哈密自備資斧効力。亦

屆三年。佛德著賞給知府職銜。令其前往哈密。自備資斧辦事。換回明琦。再各處駐劄大臣內。除攜眷前往。在外已滿三年者。亦著查奏。○理藩院奏。土默特五旗。年已及歲之恭濟旺扎布等。四百一十一人。請照例給與四等台吉。蘇尼特三旗。年已及歲之袞布等。三百八十二人。請照例給與四等台吉。塔布囊從之。○廣東巡撫李質穎疏報。徐聞恩平廣寧新興陽春五縣。乾隆四十年分。開墾地十一

頃十三畝有奇。○署雲貴總督圖思德疏報。永善昆明文山永北四廳州縣。乾隆四十年分。開墾地二十一頃一十畝有奇。○命英誠公阿克棟阿在領侍衛內大臣上行走。○以鑲紅旗漢軍都統奎林為理藩院尚書。○以散秩大臣元方為福建福州左翼副都統。○調直隸宣化鎮總兵仁和為天津鎮總兵。以陝西慶陽協副將興奎為直隸宣化鎮總兵。○乙巳。諭曰。據誠郡王弘暢奏。遠派宗室族

長缺出。揀選往往不得其人。請照八旗補授公中佐領之例。於同族宗室中。揀選大員補授。弘暢所奏甚是。嗣後遇有缺出。著揀選大員帶領引見。倘有不願充當。託故規避者。即行叅奏。其現在閑散宗室族長。並著查明更換。○諭軍機大臣奏。據熱河道明山保呈稱。差出塔子溝千總劉富生。前赴教漢旗庫里圖山溝。將要犯胡國祥及案內人犯四名拏獲。即令該員押送赴部審訊等語。千總劉富生奉差緝捕。即能擒拏要犯。頗為奮勉。俟伊解犯到京。即著兵部帶領引見。○諭軍機大臣等。據文綬等奏。打箭鑪被水衝失。阜和營存貯兵餉等項銀一萬餘兩。飭令遊擊岳瀚等派出弁兵挖出銀四千一百三十餘兩等語。該弁兵等搬運積石挖至二丈有餘。頗為出力。著該督酌量獎賞。以示鼓勵。至此項衝失銀兩。僅則出十分之四。其未得者為數尚多。恐附近居民潛行剽取。或所派之兵丁等

私下檢存。俱未可定。仍著該督等嚴飭委員督率弁兵再行加意跟尋。剽挖毋致日久迷失。將此傳諭知之。○陝甘總督勒爾謹疏報秦州屯。乾隆四十年分。開墾地二頃十一畝有奇。○丙午。諭軍機大臣等。據寅著奏本年徵收淮宿海三關稅務。計收正額盈餘銀四十二萬六千九百兩零。比較上屆多收盈餘銀四萬三千九百餘兩。但較之雍正十三年盈餘之數。仍不敷銀六萬九千餘兩。請於應得養廉內。分年賠繳。並請交部議處。已批該部議奏矣。關稅盈餘短少。自應照數賠繳。但淮關監督養廉有限。伊從前已有應賠之項。今復應賠六萬餘兩。為數稍多。恐分年扣賠。力量未免拮据。念其平日辦事尚屬謹慎。已降旨調補兩淮鹽政。至伊齡阿辦理鹽務。尚無不妥。但伊今春至山東接駕時。見其進貢獨多。伊一人養廉斷不能辦。且諸事頗露高興。與鹽政不甚相宜。伊曾任淮關徵收稅務。

尚係熟手。因將伊調管淮關。著傳諭寅著。伊齡阿等。務當各知感激。益加奮勉。一切實心經理。毋致稍有貽誤。○又諭。據明亮等覆奏查辦郭羅克一案。請於上阿壩地方添駐官兵五百名。令遊擊路連英帶領彈壓勒緝。并沿塘安設汛兵等因。一摺。已於摺內批示。及閱進到之圖。伊等現擬駐兵地方。在阿壩土司。及郭羅克土司之間。未為妥協。兇犯吹斯枯爾拉布坦。自不可不勒令該土司即行緝獲。如該土司知將軍提督之意。不肯將就完事。自不敢託故遷延。前此明亮等。令阿林等將兵撤回。竟似置此事於不問。辦理實屬大謬。是以傳旨申飭。今伊等因有前旨。故以此奏敷衍。又未能得其要領。不知郭羅克土司。本非兩金川逆酋可比。其事自不值大辦。而所駐不過綠旗兵丁。豈能令番衆畏懼。况前此該處曾經駐兵。日久因循。綠營兵丁在彼。轉為番人所輕。是以撤去。今復派兵往

駐。在番人視之。仍與前相似。於事未必有益。且此次駐兵。若專為緝犯計。原可毋庸遠駐。設或稍遲月日。又當何如。若竟欲在彼久駐。僅添數百無用之川兵。亦未必能制郭羅克等之不他出搶劫。徒爾添塘設汛。過涉張皇。亦不成事體。著傳諭明亮等。令其深籌熟計。此舉能即得兇犯。並可制其永不夾壩。則可。若不能保其如此。則所派之五百官兵。尚未起程。或已起程。尚未出口。即當停其前往。如已至彼駐劄。只可暫時帶兵勒緝。不必為久駐計。將此由六百里傳諭明亮等知之。仍將接奉此旨後。作何辦理。並將兇犯現在曾否就獲情形。迅速覆奏。尋奏。所派營兵五百。尚未起程。已遵旨暫行停其前往。現飭松茂道等。分頭躡線跟尋。一有兇犯蹤跡。不動聲色。就近添兵。星夜前進。可期一鼓咸擒。以彰國法。報聞。○又諭。據高晉奏。河臣薩載。撫臣楊魁。閱鶚元均。應進京陛見。現在商擬。薩載。俟

明春入覲。楊魁、閔鶚元於十月十一月先後進京等語。薩載前已奏明。俟開挑陶莊引河工竣後。再行來京。楊魁前曾降旨。令於十月間來京。此時想已起程。高晉現在兼署江蘇撫篆。至閔鶚元並無亟須面請訓示之事。且安省現有鳳陽、泗州等處偏災。該撫尚須查辦。毋庸即來。其印務亦不便令王顯緒護理。自應俟楊魁回任後。閔鶚元將安徽撫篆交高晉兼署。再行起程進京。將此傳諭高晉並

閔鶚元知之。○命尚書袁守侗、曹秀先、奎林侍郎福康安、梁國治、和珅在紫禁城騎馬。○丁未。

上詣暢春園。問

皇太后安。○還宮。○戊申。諭據左都御史張若淮奏稱。現年七十四歲。久病未愈。行動維艱。請回籍照例開缺等語。張若淮行走有年。尚為勤慎。今既以老疾陳情。著准其回籍。以原官休致。○諭軍機大臣曰。吳虎炳奏據全州

知州稟稱。有全州生員蔣謙投遞伊父四川龍安府平武縣知縣蔣振閭關文內稱。上年在則朗丫口。辦理臺站。有族姪蔣泰赴站幫辦。詎蔣泰盜賣軍米三百三十四石。潛逃回籍。請添差協拘著追。隨提蔣泰到案親訊。堅不承認。已將蔣泰鎖押赴川等語。盜賣軍米至三百三十餘石。約計銀一萬餘兩之多。事關重大。閱該縣關文內。有報明總理字樣。何以文綬及總辦奏銷之劉秉恬等並未奏及。

又未飛咨粵西提犯質訊。殊不可解。今蔣泰等既經吳虎炳押赴川省審辦。著傳諭劉秉恬、文綬等嚴訊此案實情。如果係蔣泰盜賣。自應從重治罪。查產抵補。若係蔣振閭自行侵蝕。誣過伊姪。亦即訊明嚴參。重治其罪。并查抄家產抵還。劉秉恬、文綬等務須據實訊辦。毋稍徇飾。仍將因何不行奏聞之處迅速覆奏。吳虎炳摺並著鈔寄閱看。此旨著由五百里發往。并諭吳虎炳知之。○又諭據吏部

議駁伊齡阿奏。請將捐納運判方受疇。仍留兩淮試用之處。與例不符。應毋庸議一本。已依議行矣。外省各官。遇有推陞他省者。尚不准督撫等奏留。屢經明降諭旨。至鹽務官員。更非地方官可比。伊齡阿何得率行陳奏。伊今春在山東接駕。朕見其諸事頗露高興。不宜鹽政之任。是以將伊調任淮關監督。并傳旨諭及。今觀此奏。亦足見其高興之一端。伊齡阿著傳旨申飭。○廣東巡撫李質穎疏報

廣州潮州肇慶高州廉州五府羅定嘉應二州。乾隆四十年分。開墾水田二十頃六十畝有奇。○己酉

上御懋勤殿。勾到河南山東情實罪犯。停決河南斬犯一人。絞犯六人。山東斬犯一人。餘八十八人予勾。○諭曰。閔鶚元奏審擬已革英山縣知縣倪存謨於僧廣明因姦致死杜得正。不能審出實情。轉將屍子杜如意誣擬極刑一案。請照新例。將倪存謨杖一百。徒三年。

不准援減等語。所擬尚不足蔽辜。此等重案。為縣令者。不能悉心訊究。任聽兇僧教唆。姦婦串供捏飾。轉將屍子刑求。幾成冤獄。其罪實難輕宥。如原詳所云。杜如意撞遇伊父與伊妻有姦。持斧欲砍。廣明見其手軟。接斧連砍致斃等供。試問杜得正如果拉姦伊媳。必係無人之處。或伊子歸家撞遇尚可。僧人廣明何由在旁。此乃情理之顯而易見。不必悉心詳究。而始知其情者。倪存謨併不能見及

於此。一味嚴刑誣服。率擬凌遲重辟。又復刪改兩次控詞。捏作訪聞。其情節更屬可惡。非尋常故入人罪可比。杖徒尚覺法輕情重。倪存謨著改發伊犁。永遠不准回籍。以為州縣濫刑誣枉者戒。至此案。若非該州倪廷模訊出實情。幾令奸僧漏網。屍子含冤。可謂能事著該撫即行送部引見。向來各省地方有拏獲鄰省盜犯。尚令引見錄用。以示獎勵。若為知府直隸州者。能將審轉之案。虛公研鞫。立

予平反。則所屬可無冤民。較之實心緝盜。尤有益於吏治。嗣後凡知府直隸州。有將關係生死出入大案。審出實情。改擬得當。經上司覈定題達。部議准行者。交該部查明。奏請送部引見。著為令。並將此通諭知之。○庚戌吏部議准。護理湖南巡撫布政使敦福奏稱。鹽驛道庫。向無專員管理。該道公出。庫務無人稽查。請令按察司照磨兼管。從之。○辛亥上御懋勤殿。勾到山西直隸情實罪犯。停決山

西絞犯三人。直隸絞犯二人。餘八十四人。予勾。○諭正藍旗滿洲都統事務較繁。努三年老。不能辦理。著誠郡王弘暢調補。豐昇額調補正藍旗漢軍都統。努三調補正藍旗蒙古都統。○禮部奏。冬至節應行慶賀禮。得旨。奉皇太后懿旨。今年冬至。著停止行禮。○調刑部尚書崔應階。為都察院左都御史。以福建巡撫余文儀。為刑部尚書。署吏部左侍郎。德保署福建巡撫。○壬子。諭曰。阿思哈奏稱。向有

頭暈氣喘之症。本年督運北上。前疾復發。至今氣促喘急。日重一日。腿足浮腫。精神疲頓。實有不能支撐之勢。懇請解任調理等語。阿思哈著准其回京調理。俾得安心醫治。以期痊可。其漕運總督員缺。著鄂寶補授。鄂寶現在川省。辦理軍需奏銷。著將伊所管一路經手事件。迅速趕辦完竣。即赴新任。其未到任之先。著德保前往。暫行署理。俟鄂寶到後。即行赴閩。所有福建巡撫印務。著鍾音兼署。○

諭軍機大臣曰。漕運總督員缺。已令鄂寶補授。鄂寶在川承辦軍需奏銷。非劉秉恬可比。止須將伊所辦北路軍糧事件。自行稽覈清楚。便可造冊轉交劉秉恬等覈題。伊即來京請訓。前赴總漕之任。至郝碩係隨富勒渾在大板昭一路辦理糧務。其事亦屬易辦。並著郝碩。即將經手各件。覈算就緒。造冊送局覈題。伊即來京請訓。仍赴浙江布政使之任。可將此傳諭鄂寶。郝碩。並令劉秉恬文綬。富勒

渾知之。○癸丑諭軍機大臣曰。伊齡阿奏。兩淮綱食口岸。兩載以來。營運紆徐。鹽引暢銷。各商感恩。叩懇面請聖訓等語。所奏大謬。已於摺內批令不必來。並傳旨嚴行申飭矣。伊齡阿。今春於山東接駕時。見其諸事頗露高興。進貢數次。勤而且多。朕以其斷非一人。養廉所能購買。必係派令商衆代辦。伊齡阿攘為己有。所謂慷他人之慨。尤屬非理。當加飭訓教導。總覺其不甚安分。鹽政實非所宜。是

以將伊調任淮關監督。至伊齡阿。今春甫於山東行在召見。閱時未久。又欲奏請陞見。不過思於來京面見時。代商人奏請呈進銀兩貢物。藉以獻勤討好。所見甚屬小器。至口岸暢銷。私販絕跡。各商營運紆徐。於衆商自屬有益。伊等皆近利三倍之人。力量從容。正可藉霑餘潤。豈真願悉出其所有。以為貢獻。况前此金川用兵之時。衆商懇請出貲助餉。尚屬有因。今大功告成。部庫尚存六千餘萬。朕

方以日漸盈積。籌所以裕民藏富之道。豈可復令商人。為此無名之捐助耶。看來伊齡阿識見鄙瑣。若此。在鹽政任內。不知如何多事。高晉以大學士管理總督。又兼管鹽務。且常往來淮揚之間。豈竟毫無聞見。如伊齡阿。果有不妥之處。即應早為具奏。今經朕傳旨查詢。已覺遲緩。若再稍存瞻徇迴護。則更自取重戾矣。著高晉即速秉公確查。據實覆奏。慎勿徇飾干咎。將此由五百里傳諭知之。尋奏。

伊齡阿聰明外露。遇事有意見長。頗露高興。其辦理鹽務。均係率由舊章。尚無更張多事情弊。得旨覽。○吏部議覆。浙江巡撫三寶奏。石門縣地當孔道。事務殷繁。應改為衝繁難要缺。德清縣。賊重事繁。幅員綿亘。應改為繁疲難要缺。瑞安縣。原定海疆。在外揀調。查所轄並非外洋。應刪去海疆字樣。改為衝繁中缺。慈谿諸暨兩縣。丞。本無專司。止供差委。亦請改歸部選。應如所請。從之。○以湖南布政

使敦福為湖南巡撫。江西按察使白瀛。為湖南布政使。

大清高宗法天隆運至誠先覺體元立極敷文奮武孝慈神聖純皇帝實錄卷之一千十八

大清高宗法天隆運至誠先覺體元立極敷文奮武孝慈神聖純皇帝實錄卷之一千十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理吏部理藩院事務正黃旗滿洲副都統世襲騎都尉軍功加七級隨帶加一級奉常加二級軍功紀錄一次臣等謹將總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務世襲騎都尉軍功加十九級隨帶加二級又加二級臣等謹將內大臣戶部尚書鍾麟滿洲副都統軍功紀錄五次尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆四十一年丙申十月甲寅。

上御乾清門聽政。○諭曰。據貝子沙克都爾札布。控告貝子丹巴達爾濟。有修蓋房屋製造弓矢可疑之語。所告太過。眾蒙古受恩至重。各守游牧。即修蓋房屋。亦屬常事。現在羅布藏多爾濟等之住宅。與內地華屋無異。亦係雇募內地匠役修理。有何可罪。即製造弓矢。亦非奇事。蓋弓矢為行圍所必用。偶有損壞。覓人修理。若於此即謂其有異志。乃必無之事。朕視諸蒙古如子孫。焉有子孫而蓄異志。

於祖父者。不惟朕無此疑。即諸蒙古夢寐中亦必無是想。所有沙克都爾札布控告之處不必究。章京等亦免其治罪。並通諭各蒙古知之。○諭軍機大臣曰。伊齡阿甫於今春在山東召見。閱時未久。茲又欲來京面見。不過欲代商人呈進銀兩貢物。藉以獻勤討好。所見甚為小氣。已於摺內批示不必來京。傳旨嚴行申飭。並令高晉查其辦理不妥之處。據實奏覆矣。督撫兩司。婪索屬員贓物。尚不多

見。如良卿方世儒錢度諸人。俱經隨時發覺。嚴行懲治。自皆知所警惕。若鹽政於商衆藉公事為名。派索分肥。其事甚易。伊齡阿在任辦貢辦差等事。以及此次欲來京面請訓示之處。必不能不派累衆商。或竟因此從中染指。俱未可定。今調寅著為鹽政。伊齡阿平日行事。明察暗訪。無難得實。且寅著人尚誠實。小心。諒不敢稍存瞻顧。著傳諭寅著於到任後。即將伊齡阿在鹽政任內有無婪索入已

之事。迅速訪察確實。即行據實奏聞。毋稍徇飾干咎。將此由五百里傳諭知之。尋奏查伊齡阿平日辦事。不無矜長好勝。該商等有意迎合。致多糜費。實無勒索侵肥情事。得旨。料伊亦不敢不必吹求矣。○以鑲白旗滿洲副都統都爾嘉。鑲藍旗蒙古副都統德赫布。對調。○以福建臺灣道馮廷丞。為江西按察使。○乙卯。諭據曹學閔奏。請禁水烟一摺。雖屬無關緊要。但火烟已屬無益。因相沿日久。未

便飭禁。今更流為水烟。尤非所宜。著交步軍統領衙門。暨五城御史。槩行禁止。並著甘肅等省一體飭禁。○丙辰。諭軍機大臣等。聞浙省向來徵收漕糧。積弊甚多。州縣每委之吏胥。任其需索勒捐。苦累糧戶。而不肖有司。並有從中染指者。三寶在浙數年。豈竟毫無見聞。抑知有弊病。而為之曲徇隱飾。所司何事。目下正屆十月開徵之期。著傳諭三寶。實力整飭。並留心密行訪察。如收漕州縣有官吏

勒索病民之處。即據實叅奏。毋稍袒庇干咎。仍將有無弊病之處。即行查明。據實覆奏。將此由五百里傳諭知之。尋奏。臣於三十八年到任後。稔悉漕務弊竇。每於接見屬員時。諄諄戒飭。並明察暗訪。尚無官吏勒索病民之事。臣仍不時稽查。倘收漕州縣稍有情弊。即當據實叅處。得旨。知道了。實力行之。毋為空言。若果所辦好。則此言何自而來耶。○兵部奏。侍衛處鑾儀衛等處軍器。向由本管大臣奏請點驗。但未定有年限。請照例定為五年一次。得旨。摺內各該處軍器。嗣後遇應行點驗之期。俱著交兵部一體奏派王大臣點驗。毋庸自行奏請。再旗員內。如護軍校筆帖式等微末員弁。所有軍器。可無庸點驗。以示體恤。其應如何酌定章程之處。著兵部另議具奏。○丁巳。諭曰。漕運總督阿思哈。老成勤謹。宣力有年。擢任總漕。方資倚畀。前以喘疾。陳請解任。曾降旨准令回京調理。以冀就痊。茲

聞溘逝。深為軫惻。所有伊歷任降革之案。俱著加恩開復。其應得恤典。仍著該部察例具奏。○又諭曰。四格供職多年。恪謹黽勉。已逾八旬。今聞溘逝。深為可憫。朕心為之惻然。所有四格革職留任之處。著加恩開復。其應得卹典。著該部照都統例給與。○戶部議覆。江蘇巡撫楊魁疏稱。安東阜寧清河桃源蕭縣海州沐陽淮安大河九州縣衛。本年被水。分別蠲緩賑卹。應如所題。得旨。依議。安東等九州縣衛災田。及勘不成災田地。應徵本年漕項銀米漕糧。節年舊欠漕項銀米。及四十二年新賦舊欠災緩漕糧。俱著照該撫所請速行。○戊午。上詣暢春園。問皇太后安。○幸圓明園。○諭。據李質穎奏。署三水縣事海豐縣知縣馬師曾。於接遞新疆遣犯重務。並不親點。任聽解役陸超等。託故不行。以致該犯潘亞三。張亞子中途脫逃。實

非尋常玩忽可比。請旨革職。留於地方協緝。該管知府李天培。請交部議處等語。馬師曾著革職。留於地方協緝。李天培著交部議處。其解役人等有無賄縱別情。仍著該撫嚴審定擬具奏。所有脫逃遣犯潘亞三。張亞子。二名。著該撫迅即督飭各屬。並飛咨鄰省嚴緝務獲。從重辦理。毋使遠颺漏網。該部知道。○吏部奏。銅船過境。催趲不力。以致逾限之山東臨清州知州。奉旨以知府用李濤等。請分別降革。得旨。銅鉛船隻過境。地方官催趲不力。以致逾限。處分固所應得。但州縣各官。俱有應辦地方事務。如因命盜相驗等案。迅速前往。不能親身督催者。亦屬事所常有。若概予實降實革。未免太重。嗣後運京銅錫鉛觔。運員違逾統限。沿途催趲不力之地方官。應議降調者。改為降級留任。應議革職者。改為革職留任。此案議以降調之李濤等。即照此旨行至。例應降革各員。業經加恩從寬留任。

其降留罰俸處分。應如何遞減之處。仍著該部定議具奏。尋議。嗣後銅鉛過境逾限。其專催督催各員。罰俸處分。仍照舊例辦理。其應降調者。改為降留。革職者。改為革職留任。從之。○己未。諭前因刑部奏。審訊周升桓不將秦廷基收禁。致在寓自縊一案。廣德於審訊此案時。默無一語。竟若置身局外。因降旨傳諭廣德。令伊據實明白回奏。茲據廣德奏稱。當日隨同熊學鵬審訊此案。熊學鵬曾將摺稿。給令閱看。廣德以秦廷基身為監司大員。有心徇庇屬官。膽敢通同作弊。擬以大辟。本不為枉。乃熊學鵬所擬罪名。同一斬候。而必引用交結近侍之例。轉似牽強。曾與撫臣辯論等語。所奏甚屬取巧。此案業經文綬將訊問熊學鵬供詞奏覆。據稱。當日提訊秦廷基時。原係率同蘇爾德。廣德周升桓。審訊。我問擬秦廷基死罪。原向司道說知。廣德說。秦廷基雖奉旨革職。加倍治罪。不至於死。蘇爾德

俱是知道的等語。茲廣德何以又稱曾向熊學鵬有秦廷基徇庇屬員。通同作弊。擬以大辟。本不為枉之言。顯屬有心取巧。看來此案非熊學鵬廣德到案。三面質對。難成信讞。熊學鵬業已拏問。起解在途。廣德身為臬司。豈能無罪。著革職。來京質訊。著吳虎炳派委妥員。將廣德迅速押送進京。所有廣西按察使事務。並著吳虎炳於道員內遴選一員。奏明署理。另候諭旨。○庚申。諭軍機大臣等。本年夏秋。雨暘時若。京畿及各直省。收成俱屬豐稔。唯甘肅臬蘭等二十九廳州縣。夏禾被旱。成災情形較重。屢經降旨。令該督統率各屬。切實查勘。妥協賑卹。災黎自可不致失所。但恐明春正賑已畢。尚屆青黃不接之時。民食不無拮据。是否尚須加賑。以資接濟。此外如江蘇安東等七州縣。安徽泗州等七州縣。秋禾間被水災。均經各該督撫陸續奏明題報。照例分別賑卹。其明春是否尚須量予加恩。

或酌借糧種牛具之處。著傳諭各該督撫。詳悉查勘。據實迅速覆奏。候朕新正酌量加恩。此旨。甘肅著由五百里發往。江蘇安徽由三百里發往。該督撫仍照原發里數奏覆。○以湖南岳常澧道彭理。為廣西按察使。○辛酉。上詣暢春園。問。

皇太后安。○還宮。○戶部議覆。安徽巡撫閔鶚元疏。稱宿州鳳陽虹縣靈璧泗州盱眙天長五河等八州縣。并鳳陽長淮泗州三衛。被水成災。分別蠲緩賑卹。應如所題。得旨。依議。宿州等八州縣。并坐落各州縣之鳳陽等三衛。本年災田應徵漕項。及帶徵舊欠災緩漕項銀兩。本年漕糧。及帶徵舊欠災緩漕糧。俱著照該撫所請速行。○山西巡撫覺羅巴延三奏。太原縣西五里有風峪口。兩旁俱係大山。大雨後。山水下注。縣城猝遇水災。捍禦無及。請自峪口起。開河溝一道。直達於汾。所占民田。計止四十餘畝。太原一城可期永無水患。

得旨嘉獎。○甘肅布政使王亶望奏署任人員。往往借項修署。辦理多不認真。請嗣後暫署人員。概不准借項修署。以杜冒濫。下部議行。○壬戌。陝甘總督勒爾謹奏。願往新疆種地者。共六百四十二戶。查係無業貧民。請官為資送。得旨嘉獎。○旌表守正捐軀山東夏津縣民張彬妻張氏。○癸亥。諭軍機大臣曰。姚立德奏。各省重運漕船。向來俱係冬兌冬開。次年得及早過淮。五月全入臺莊。回空於

九月初。亦得全入臨清開河。總無遲逾之事。近年以來。兌開既遲。長途不能趲程。年復一年。回空亦未能依期歸次。不無阻淺守凍之虞。前與阿思哈面商。意見相同。茲阿思哈病故。恐冬兌冬開之例。仍不能實力奉行。請勅諭有漕各督撫。責成各糧道。妥協料理等語。所奏甚是。各省漕糧。冬兌冬開。自屬正辦。迨後開兌遲緩。實係歷年因循所致。雖催趲尚無貽誤。究不若照例於冬月開幫之為服豫。

目下正屆收兌漕糧之期。若能於今歲冬間辦定章程。嗣後即無難遞年遵辦。著即傳諭有漕各督撫。一體實力妥辦。其江蘇安徽浙江各省糧艘。務令歲內全數開行。其江西湖廣各幫。亦須將回空之船。迎催歸次。必於正月內掃幫前進。毋致遲逾。至德保業已起程。著諭令前赴濟寧。與姚立德面商熟悉。實力妥辦。此旨著由五百里傳諭知之。姚立德摺並鈔寄各督撫閱看。仍將作何遵辦緣由。據

實覆奏。○吏部議准。廣東巡撫李質穎奏。稱向例州縣等官。本境逃盜未獲。雖獲鄰境巨盜。止予加級紀錄。不准送部引見。請嗣後令該督撫奏明。將應得加級紀錄。暫行註冊。限內將本境逃盜弋獲。仍准送部引見。逾限不獲。將加級紀錄抵銷。從之。○甲子。諭軍機大臣等。今年甘肅省皋蘭等二十九廳州縣。夏禾被旱成災。節經諭令該督實力賑卹。又恐明春正賑畢後。民食不無拮据。昨已諭令勒

爾謹確查覆奏。候朕新正量降恩旨。因思甘省地瘠民貧。又每年常有被災之處。曾於乾隆三十六年降旨。以民間節年所借籽種。口糧牛本等項。積欠甚多。加恩將舊欠倉糧四百餘萬石。概行豁免。其舊欠各項銀兩。一百三十餘萬。分作六年帶徵。以紓民力。嗣因該省歷年均有偏災。復節次加恩。分別展限徵收。俾得從容輸納。近年該省此項積欠銀兩。究竟已完若干。未完若干。能否按限全完。抑或民力實疲。雖展限亦有難於催徵之處。著傳諭勒爾謹。即速確切查明。據實奏覆。候朕酌量降旨。將此由四百里傳諭知之。尋奏三十五年以前。舊欠銀一百三十餘萬兩。徵完銀四十八萬餘兩。仍未完銀八十四萬餘兩。邊地災黎。於應完本年正借銀糧之外。加徵舊欠。民力實疲。緣數年來疊荷恩施。未敢冒昧陳請。得旨。新正有旨。概予豁免。○禮部奏。皇太后萬壽聖節慶賀禮儀。得旨。是照例行禮。

奉

皇太后懿旨。今年停止筵宴。○兵部議准。陝甘總督勒爾謹奏。稱。陝西鳳協管轄之富平營。相距甚遠。查察難周。請改隸潼關協管轄。從之。○乙丑。

上御懋勤殿。勾到朝審情實罪犯。停決官犯二人。常犯二人。餘二十五人。予勾。○諭。向來秋朝審人犯內。有業經緩決三次以上。人數積多者。每屆數年。勅令刑部量為減等。以示法外之仁。乾隆三十九年五月。因祈雨清理刑獄。曾降旨。將三十八年以前緩決一二次以上各犯。概予減等。幾於圈空。今自查辦之後。計至本年秋讞。擬入緩決者。又積有六千餘名。其數已為不少。著刑部堂官。將本年秋朝審緩決至三次各犯。逐一查明。各按所犯情節。照例分別減等。以昭矜恤。○又諭。原任吏部侍郎加尚書銜吳紹詩。老成謹慎。宣力有年前。歲以老病乞休。准其回籍頤養。今春

東巡時。尚能速出迎鑾。特晉階以示優眷。方冀其延享遐齡。不意遽爾溘逝。所有應得卹典。著該部察例具奏。○又諭曰。果星阿達色德文。出差各處。已逾三載。著伍岱前往塔爾巴哈台。阿爾薩朗。前往喀什噶爾。觀音保。賞給副都統銜。前往哈喇沙爾。更換伊等來京。○諭軍機大臣等。據明亮等奏。請將兩金川屯防兵六千名。分作三班。更換等語。所辦尚未允協。兩金川屯政初開。必得勤妥兵丁。留駐墾耕。以期久遠之利。川省綠營兵衆疲玩者多。若令分班更換。安得如許有用之兵。選派前往。况屯墾貴於熟習地利。非駐藏換臺者可比。設伊等知有及瓜之代。惟盼如期換回。且以所種之地。並非恒產。誰肯安心盡力。徒令僕僕往來。仍無實濟。莫若令屯駐之兵。挈眷前往。使各有室家可戀。自皆安居樂業。力耕作以期贍給。方於屯政有裨。即搬眷應籌資助。亦不過此一時酌辦。較之每年換班。

繁費。其省便相去何如。或其中有不願挈眷者。諒亦無多。不妨及此初辦之時。於內地另選精壯兵丁。挈眷往代。庶乎一勞永逸。可為經久良圖。將此由五百里傳諭知之。仍將如何籌辦緣由。即行妥議覆奏。尋奏綠營兵丁有田業者。憚於棄產長戍。即無恒產者。亦以婦女等不能越嶺攀林。遠赴番地。臣等悉心籌議。似應仍照原奏辦理。得旨。如所議行。○丙寅。戶部議覆。調任兩淮鹽政伊齡阿疏稱。

板浦中正臨興。各場被水成災。應徵錢糧。分別蠲緩。應如所請。得旨。依議速行。○命刑部尚書余文儀在紫禁城內騎馬。○旌表守正捐軀湖北天門縣民馬達聰女馬氏。○丁卯。以戶部尚書公豐昇額兼管樂部事務。○旌表守正捐軀河南祥符縣民劉振公妻劉氏。戊辰。

上詣

奉先殿

壽皇殿行禮○是月安徽布政使王顯緒奏本年鳳陽等處被災業經奏明賑卹稽覈不可不嚴現於十月初二日自安慶起身前往泗鳳一帶抽查所定飢口既不容其冒濫更不准有漏遺務使災黎均霑實惠得旨實力為之○江西巡撫海成奏峽江縣監生蕭習舜六世同居一門敦睦請照例子旌下部議行

大清高宗法天隆運至誠先覺體元立極敷文
奮武孝慈神聖純皇帝實錄卷之一千十九

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十

修補總裁官經進講官太子太傅大淵閣大學士大淵閣領閣事領侍衛內大臣稽察欽奉 上諭事件處管理吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂總裁官經進講官太子太傅大學士大淵閣大學士大淵閣領閣事稽察欽奉 上諭事件處管理刑部工部工部事務世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次尋常紀錄十四次臣德瑛經進講官太子少保工部尚書紀錄六次臣曹振鏞等奉

乾隆四十一年丙申十一月己巳朔諭曰總兵都依納現有處分其直隸泰寧鎮總兵員缺著福興調補所遣貴州安籠鎮總兵員缺著張和補授○諭軍機大臣曰李質穎奏高要縣童生梁暢善向將軍永瑋處程遞稟帖並具請復均田表文懇其代奏據永瑋將該犯差員押送前來現在訊供查辦等語井田之法已非三代以後所能做效若均田則更斷不可行此必該犯窮極無聊借上書而圖希冀但以無知愚賤敢於妄逞臆說懇求將

軍代奏。實屬不安本分之徒。著傳諭李質穎。即將該犯嚴行審訊。按律定擬具奏。○吏部議准。署雲貴總督圖思德奏稱。曲靖府屬五槽通判。向隸廣西府。因廣西改州。通判歸曲靖府管轄。五槽距曲靖八站。查察難周。請裁通判。改直隸州判。隸廣西州。從之。○庚午。諭曰。邁拉遜。現署工部尚書。其吏部侍郎。尚未開缺。仍著兼辦吏部侍郎事務。高樸係兵部侍郎。兼署禮部侍郎。今派往葉爾羌。將瑪興阿換回。瑪興阿到京後。即著以禮部侍郎。兼署兵部侍郎。至高樸起程以後。瑪興阿未到以前。所有禮部侍郎事務。著景福兼署。兵部侍郎事務。著阿肅兼署。○諭軍機大臣曰。勒爾謹奏。請將候補知府李承瑞補授西寧府知府一摺。已批交該部准行矣。李承瑞曾任甘肅知府。現發該省候補。今值西寧府缺出。甘省既無可調之員。而李承瑞又堪勝任。即據實奏請補授。本屬數言可了。今閱摺內反

覆聲叙。轉至眉目不清。朕於外省奏牘。皆逐細披覽。從不憚煩。但章奏之體。貴於簡明。豈宜繁冗鋪叙。即此可見該督之辦事未能簡當。著傳諭勒爾謹知之。○禮部議覆直隸總督周元理學政羅源漢奏稱。熱河建立學宮。科歲二考。熱河廳取進文童四名。其餘六廳取進二名。武童減半。應如所請。從之。○以故奉恩將軍定祿子揚慶襲職。○予故漕運總督阿思哈祭葬如例。謚莊恪。都統四格祭葬如例。謚勤恪。○辛未。署漕運總督德保奏。刻下正漕船回空收兌之時。一切章程。均應迅速辦理。臣現即星夜馳赴濟寧。與姚立德面商。妥速籌辦。得旨。覽。又批。自應如此。亦順路也。○壬申。上詣暢春園。問皇太后安。○幸圓明園。○吏部議准。廣西巡撫吳虎炳奏稱。思恩府印信。舊有軍民字樣。係沿前明舊制。今該處並無軍衛。名實不符。請

改鑄從之。○癸酉。諭軍機大臣等。昨據貴州鎮遠鎮總兵教成奏稱。先於七月內奏請陞見。奉有硃批。准令來京。嗣准圖思德具奏。以該鎮甫經到任。方資料理。俟緩至一年之後。再令趨赴闕廷。因復奏明。俟一年後。另請陞見等語。所辦未免拘泥。該鎮未到任之先。業經奏署有人。一切營務。原可代為料理。自應遵照前旨。令其即行來京。況該鎮係在紫光閣前五十功臣之列。到京後尚須繪像。著傳

諭圖思德即將鎮遠鎮事務。仍令原奏之員署理。令教成起程來京。陞見。並諭教成知之。○以故輔國將軍亮清子恒維襲職。○甲戌上奉

皇太后還宮。○遣官祭

先醫之神。○諭軍機大臣曰。姚立德奏籌取曹單廳汎內。年久枝枯之大幹楊樹。以備添派開板之用等因。一摺。亦通融辦理之一法。惟是此等楊樹。從前原係官栽。今因年久枝

枯不堪備用。砍鋸其幹。以作開板。仍令如數另栽新樹。自屬以公辦公。即因開員購覓大木非易。令其為添補之用。亦無不可。但每年開板例准添換二塊。必有開銷。若將此項楊樹全給開員。而額換之開板。仍舊開銷。則無是理。且開員急公捐辦。相沿已久。今有此大材。免其購覓之勞。已屬便易。設令一無所費。坐享其成。恐各員習以為常。視為應得。此項木植用完之後。必致因循貽誤。朕非靳惜物料。而籌辦公事。不可不通融覈計。自應將所砍楊樹若干。各開共需換板若干。約數幾年額換之用。不復於歲款內開銷。或以其半。分給各開員備用。並應省其每年所費之半。方為允協。姚立德摺內。未將如何分給開員。及歲換開板作何節省之處。均未敘及。殊欠明晰。著傳諭該總河。即行妥協辦理。據實覆奏。尋奏單汎楊園所鋸開板。共三百五塊。統計一年需板一百九十五塊。其餘板一百一十

塊酌給各開官。為添備之用。並遵旨每塊減半作價。得旨覽。此雖小事。莫謂朕忽而視之也。○已亥。

上詣

皇太后宮問安。○諭軍機大臣等。本日兵部議駁王亶望奏請調劑甘省驛站一摺。據稱各省驛站。經上年軍機大臣會同兵部議奏。如有馬匹過少。不敷遞送者。令各督撫酌劑撥用。嗣據勒爾謹覆奏。自肅州酒泉驛起。至涇州瓦靈驛止。所設馬匹。向有定額。無庸置議。該布政使亦隨同造冊報部。是該省驛站。上年已定有章程。未便復議更張等語。所駁是已。依議行矣。甘省涇州等驛。甫經該督查辦。並據該布政使造冊報部。何以王亶望此時又有更調驛站之請。或上年查辦時。王亶望未經詳悉計及。亦未可定。但驛站為郵政所關。如有應行調劑之處。原可隨時酌改。且所請裁減南大通沙河二驛之馬。改設安國鎮。

神林堡商家所翟家所四站。以紓馬力。於原馬額數。並未加增。尚不致更張紛擾。著傳諭勒爾謹。即將河東河西兩處驛站。實在情形。悉心查覈。如王亶望所奏無當。即照部議行。設或南大通沙河兩驛。必須議裁。安國鎮等四處。必須添站。於郵傳方有裨益。即不妨據實敘明。再行陳請。○賑卹甘肅皋蘭金縣。西和漳縣涇州崇信靈臺鎮原寧州環縣東樂縣丞鎮番寧夏寧朔中衛平羅禮縣等十七州縣。及分防縣丞。本年水雹霜災貧民。其寧遠伏羌華亭安化正寧合水花馬池州同碾伯大通秦安清水安西玉門敦煌等十四州縣。及分防州同。並予緩徵。○丙子江南河道總督薩載奏。十月中旬以來。各處水勢。有長有消。溜勢縣緩。工程一律穩固。現在督飭泰將遊擊。將來年應修工程。查照舊定章程。分別確估。覈明造冊。以憑覆查。其邳州宿遷一帶。河水已經消退。洪澤湖內。日來水亦報消。

三寸目下清水黃水。大小合宜。仍留心察看。如應收束。即相機接築。隨時奏聞。得旨覽奏。俱悉。○又奏。回空漕船。時屆冬令。河水充裕。足資浮送。現在渡黃船。共三千七百餘隻。未渡黃者。止有三百餘隻。初旬內。即可全數渡黃。歸次不致遲誤。至各省已值收漕之際。臣節經查照。向定章程。嚴飭州縣運弁。務選乾圓潔淨之米。徵收交兌。並行令各糧道就近親查。其餘丁造船。並委弁領運諸事。現據各

糧道具詳。隨到隨辦。得旨嘉獎。○署雲貴總督覺羅圖思德奏。本年冬防官兵。應於移駐之騰越等鎮協營內。就近派撥。經臣奏定章程。茲臣巡閱營伍之便。隨至騰越。親加訓練。各官兵馬步技藝。俱各熟習。而就近赴防。不須遠涉。兵心尤為踴躍。定於十月初八日。遣令將弁管領。依次起程。前赴各處。蓋達一路兵丁。令開化鎮總兵錦山。統領巡防。張鳳街大營。仍令總兵吳萬年駐劄。其隴川防兵。令

龍陵協副將谷國祥統領。三台山一路。仍令鶴麗鎮總兵喀木齊布統領。至提督有統轄之責。令其駐劄騰越。居中調度。臣復往來稽查。務令聲勢相聯。軍威嚴肅。報聞。○調湖南按察使永慶。為浙江按察使。福建按察使梁敦書。為湖南按察使。以福建糧驛道奇寵格。為福建按察使。○是日起。

上以冬至祀

天於

園丘。齋戒三日。○丁丑。戶部議駁貴州巡撫裴宗錫奏。請於鎮遠府添設稅口。並請旨將裴宗錫交部嚴議。得旨。所駁甚是。依議。鎮遠府關稅。因蘇塢每年徵多報少。將餘銀四五千兩。侵肥入己。按律治罪。是以該部奏交督撫委員試收一年。據實奏報。該撫自應董飭管稅之員。實力妥辦。以定章程。乃徵收甫經九月。輒以稅額不敷。咨部請添稅口。殊屬非是。此項稅務。蘇塢管理兩年。皆有多餘。何以一

經歸官。即形不足。必無是理。至添設稅口。尤為滋擾。即貪黷如蘇橋。亦非收自正口之外。顧可藉詞創增。以累商民乎。裴宗錫平日辦事尚屬認真。不應荒唐如此。裴宗錫著交部嚴加議處。○諭軍機大臣等。戶部奏駁裴宗錫咨請於鎮遠府添設稅口一摺。所駁甚是。已依議行。並降旨將裴宗錫交部嚴加議處矣。鎮遠府開稅前因蘇橋每年徵多報少。將餘銀四五千兩。侵肥入己。按律治罪。是以該部奏交督撫委員試收一年。據實奏報。今徵收甫經九月。該撫輒咨稱稅額不敷。何以蘇橋浮收入己之時。連歲俱有多餘。而一經歸公。接徵之員。即形不足。斷無此理。且添設稅口。必致苦累商民。蘇橋任內多收之數。亦係侵隱正稅所餘。並未別添稅口。豈可於清釐之時。轉藉詞創增。致滋貽累乎。裴宗錫前在山東直隸。歷任辦事。俱屬認真。是以屢加擢用。即自安徽調任雲南貴州巡撫以來。亦頗

能整飭。何以辦理此事。荒唐如此。殊不類其平日所為。著傳諭裴宗錫。令其速行明白。曰奏。戶部摺並鈔寄閱看。此旨著五百里發往。尋奏。鎮遠府開稅。惟至冬季為旺。逐月分給。似覺不敷。通年彙計。歷有盈餘。今徵收甫經九月。尚未期滿。臣按月覈算。每不符額。咨請增設稅口。荒唐之罪。實無可辭。得旨覽。汝向來辦事不如此。此實大謬。此次姑寬。以後慎之。○陝西巡撫畢沅奏。關中形勝之地。山川雄秀。都邑縱橫。甲於他省。其名區勝蹟。紀載務在精詳。每取府州縣志。考覈諮詢。實多謬誤。臣不揣愚昧。欲先將各府志次第纂輯。查有就職州判莊圻。學問優長。人亦勤慎。在陝修志二年。於往蹟舊聞。頗能搜採。今遵例加捐分發。應赴部掣籤。可否將莊圻分發陝西候補。令其修纂志乘。實於地方文物有裨。報可。○以江南河標左營副將許世亨為雲南開化鎮總兵。○戊寅。

上詣

南郊齋宮齋宿。○己卯冬至祀

天於

圜丘

上親詣行禮。○遣官祭

永陵

福陵

昭陵

昭西陵

孝陵

孝東陵

景陵

泰陵。○遣官祭

孝賢皇后陵

端慧皇太子園寢。○庚辰

上詣

皇太后宮問安。○諭朕御極之初。大學士等奏請避朕御名。朕以避名之典。雖歷代相沿。實

乃文字末節。無關大義。特降諭旨。遇朕御名。上一字。少寫一點。下一字。將中間末字書為木字。以存其義。至臣工命名有相同者。概不令改易。彼時趙宏恩曾請改避。亦未允行。若二名不偏諱。聞之孔子。而嫌名不諱。則韓愈諱辯言之甚詳。是以朕於御名同音之字。凡臣工奏對。俱不令迴避。衆所共知。至於清字。既不可缺筆。而十二字頭之字本少。每一字必對音數字。至十餘字不等。與漢字嫌名無異。更何必諱乎。即漢字亦有不能盡同者。如永字。世所習用。而體義亦不宜缺筆。綿字。為民生衣被常稱。尤難迴避。且皇子輩永字。乃皇祖欽定。皇孫輩綿字。則朕所命名。而近派宗支蕃衍。依次取名者。愈久愈多。我世世子孫。自必遵朕舊章。不令改易。第恐後來臣工等。不能深體朕意。妄謂於心不安。輕有所請。或致無可適從。自當豫示折衷。以垂法守。朕以為與其改衆人之名。以避一人之名。莫若改

一人之名。使衆無可避。較為妥善。將來繼體承緒者。惟當以永作頤。以綿作昊。則係不經用之字。缺筆亦易。而永綿等字。均可毋庸改避。至於清文。則仍其舊。總不必改避。其奕字輩以下。則所謂過此以往。朕未之或知。然亦可推廣此意。永遠遵行。此旨著軍機大臣。敬謹存記。並繕錄二通。一交內閣封存。一令阿哥等於書房恭貯敬識。朕常有願俟春秋八十有五。即當歸政。至時再行宣示。○辛巳。

聖祖仁皇帝忌辰。遣官祭景陵。

上詣

奉先殿

壽皇殿。行禮。○諭據陳輝祖奏。前任建始縣知縣吳森。於利川縣民劉明先被竊拒捕。戕傷身死一案。將無辜之馬老三。濫刑逼供。若非提省。委員徹底細鞫。幾成冤獄。請旨革去職銜等語。吳森承審竊盜殺人重案。不能虛

公研鞫。審出捕役私拷教供等情。乃偏執刑求。幾令無辜被陷。僅擬革去職銜。不足蔽辜。吳森著革去職銜。交部另行按律改擬。此案著該撫嚴飭審緝正兇。定擬具奏。○陞任湖南巡撫布政使敦福。遵旨覆奏。漢苗雜處地方。留心查察情形。查湖南省九府四直隸州。除長沙常德岳州澧州四府州外。其餘各有苗徭雜處之區。自康熙年間。至乾隆初年。先後勦撫。並設總兵道員。彈壓撫馭。久已懷德畏威。抒誠向化。現居近城市。衣冠耕讀。無異編氓者。十居五六。其未經改裝。與齊民耦居。互相姻婭者。十居二三。其餘簪居尚處耕鑿自安。畏官守法。從不與漢人往來。向例止令千戶百戶。督率崗長。寨長嚴密稽查。如有漢奸竄入滋事。隨時稟究。仍責成塘汛弁兵。及附居保甲。互相覺察。並督飭文武。認真稽防。未敢稍懈。是以近年來。漢奸煽誘滋事之案甚少。臣於上年巡閱營伍。親歷其地。見各苗

徭甚屬寧帖。誠恐日久懈弛。隨在嚴飭。有苗各屬。慎密稽查。以期永遠綏靖。報聞。○旌表守正捐軀廣東番禺縣民郭仁瑞妻洪氏。○壬午。

上御乾清門聽政。○河東河道總督姚立德奏署漕督臣德保到濟。與臣面商速運事宜。查今歲糧船回空。出閘已為不早。先經札會江南河臣薩載一體督飭沿河將備加緊嚴催。今德保一入江境。即分派標弁催趕渡黃出

江。自可不致遲滯。刻下江南各幫約計均已歸次。安徽浙江各幫現已抵次不遠。惟江西湖廣各幫程途較遠。德保到任後。即飛檄各該省糧道專員迎催。務期迅速交兌。得旨嘉獎。○癸未。諭據索諾木策凌等奏。精河屯田都司昫安圖降調員缺。查有革職遊擊徐璉於屯務邊情實屬諳悉。懇恩賞以都司職銜。令其自備資斧。接管精河屯田。實屬人地相宜等語。著照所請。徐璉賞給都司職銜。令其

自備資斧。前往精河。接管屯河軍臺游牧等事。果能奮勉出力。俟三年後。該都統等再行奏聞請旨。○又諭曰。永慶等奏。烏魯木齊所屬中左濟木薩三營並瑪納斯屯四十一分。種地兵丁每名收穫細糧均在十五石以上。又中左三營並瑪納斯屯四十一年分。種地遣犯每名收穫細糧均在六石六斗以上。並與議敘給賞之例相符等語。所有該管官員並著交部議敘。兵丁賞給一月鹽菜銀兩。遣犯日給白麵半觔。以示獎勵。該部知道。○又諭曰。永慶奏。庫爾喀喇烏蘇精河二屯四十一年分。種地兵丁每名收穫細糧均在二十石以上。又庫爾喀喇烏蘇種地遣犯每名收穫細糧七石六升零。均與議敘給賞之例相符等語。所有該管官員並著交部議敘。兵丁賞給一月鹽菜銀兩。遣犯日給白麵半觔。以示獎勵。該部知道。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十一

監修總裁官總纂修官太子太傅文淵閣大學士文淵閣領事內閣學士內閣秘書
吏部理藩院掌書黃旗滿洲都統鑲黃旗都統副都統加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士滿洲領事稽察欽差 上諭事件處管理刑部戶部工部事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十一年丙申十一月甲申

上詣

皇太后宮問安○諭前因景輯四庫全書諭各省督撫編為採訪嗣據陸續送到各種遺書令總裁等悉心校勘分別應刊應鈔及存目三項以廣流傳第其中有明季諸人書集詞意抵觸本朝者自當在銷燬之列節經各督撫呈進並勅館臣詳悉檢閱朕復於進到時親加披覽覺有不可不為區別甄覈者如錢謙益在明已居大位又復身事本朝而金堡

屈大均則又遁跡緇流。均以不能死節。醜顏苟活。乃托名勝國。妄肆狂狷。其人實不足齒。其書豈可復存。自應逐細查明。概行燬棄。以勵臣節。而正人心。若劉宗周、黃道周、立朝守正。風節凜然。其奏議慷慨極言。忠蓋溢於簡牘。卒之以身殉國。不愧一代完人。又如熊廷弼受任疆場。材優幹濟。所上封事。語多剴切。乃為朝議所撓。致使身陷大辟。嘗閱其疏內。有灑一腔之血於朝廷。付七尺之軀於邊塞。

二語。親為批識云。觀至此。為之動心欲淚。而彼之君若不聞。明欲不亡得乎。可見朕大公至正之心矣。又如王允成、南臺奏稿。彈劾權奸。指陳利弊。亦為無慚骨鯁。又如葉向高。為當時正人。頗負重望。及再入內閣。值逆閹弄權。調停委曲。雖不能免責賢之備。然觀其綸扉奏草。請補閣臣疏。至七十七上。幾於痛哭流涕。一概付之。不答。則其朝綱叢脞。更不可問而知也。以上諸人所言。若當時能採而用。

之敗亡。未必若彼其速。是其書為明季喪亂所關。足資考鏡。惟當改易違碍字句。無庸銷燬。又彼時直臣如楊漣、左光斗、李應昇、周宗建、繆昌期、趙南星、倪元璐等。所有書集。並當以此類推。即有一二語傷觸本朝。本屬各為其主。亦止須酌改一二語。實不忍並從焚棄。致令湮沒不彰。至黃道周。另有博物典彙一書。不過當時經生家策料之類。然其中紀本朝事蹟一篇。於李成梁設謀甚害。具載本末。

尤足徵我朝

祖宗行事。正大光明。實大有造於明人。而彼轉逞狡謀陰計。以怨報德。伏讀

實錄。我

太祖高皇帝。以七大恨告

天師。直為壯神戈所指。肇造鴻基。實自古創業者所莫及。雖彼之臣子。亦不能變亂黑白。曲為隱諱。存其言。并可補當年紀載所未備。因命館臣酌加節改。附載。

開國方畧後。以昭徵信。近復閱江蘇所進應燬書籍內有朱東觀編輯崇禎年間諸臣奏疏一卷。其中多指言明季秕政。漸至瓦解而不可救。亦足取為殷鑒。雖諸疏中多有乖觸字句。彼皆忠於所事。實不足罪。惟當酌改數字。存其原書。使天下萬世。曉然於明之所以亡。與本朝之所以興。俾我子孫永念祖宗締造之艱難。益思兢兢業業。以祈天而永。

命。其所裨益。豈不更大。又何必亟燬其書乎。又若彙選各家詩文內有錢謙益屈大均輩所作。自當削去。其餘原可留存。不必因一二匪人。致累及衆。或明人所刻類書。其邊塞兵防等門。所有觸礙字樣。固不可存。然祇須刪去數卷。或刪去數篇。或改定字句。亦不必因一二卷帙。遂廢全部。他若南宋人書之斥金。明初人書之斥元。其悖於義理者。自當從刪。涉於詆訾者。自當從改。其書均不必燬。使無礙。

之書。原聽其照舊流行。而應禁之書。自不致仍前藏匿。方為盡善。著四庫館總裁等。妥協查辦。粘籤呈覽。候朕定奪。並將此通諭中外知之。○以廣東廣州協領穆格為熊岳副都統。○乙酉。諭軍機大臣等。據戶部奏江蘇安徽兩省。乾隆二十六等年耗羨登答。兵馬奏銷登答各案。久逾例限。節次行催。尚未查覆。請旨飭交該撫等嚴飭所屬。迅速查明報部。以憑覈辦等語。外省奉部行查案件。均有一

定期限。自應按限查覆。以憑覈結銷案。況前項未結各案。皆係陸續辦剩尾零。無難計日清釐。何以逾限已過半載。屢催莫應。皆因外省陋習相沿。視部案為無關緊要。任意沉擱。以致塵案積累日多。殊屬非是。著傳諭該撫等。將行查各案。嚴飭所屬。迅速查明報部。並將承辦逾限各官。應行叅奏者。即行查叅。仍令嗣後咨查各案。務須按限答覆。毋得遲延逾限。以清案牘。戶部摺并鈔寄閱看。○丙戌。

諭奉

皇太后懿旨。貴人鈕祜祿氏。貴人伊爾根覺羅氏。俱著晉封為嬪。欽此。所有應行典禮。各該衙門照例辦理。○丁亥。

上詣

皇太后宮問安。○以兵部尚書公福隆安。為國史館正總裁。戶部右侍郎和珅。為副總裁。○旌表守正被戕四川溫江縣民文某女。文氏。○戊子。諭。昨閱國史館進呈徐治都傳。伊在

湖廣提督任內。攻勦叛賊。頗著勞績。得有雲騎尉世職。因襲次已滿查銷。著加恩仍賞給伊家世襲罔替。至徐治都之妻許氏。當吳逆犯順時。率僕禦賊。中礮身死。義烈可嘉。著交該部補行旌獎。○又諭。據博興奏。前往黑龍江接取家眷之藍翎侍衛綏坤保。至驛不騎換給之馬。令跟役至廐所挑馬。任意馳騁。因馬力稍疲。伊跟役氣忿。持刀將馬扎傷。請將綏坤保交部議處等語。綏坤保係加恩賞騎

驛馬之人。至驛不騎換給之馬。輒令跟役至廐所混挑。及騎至中途。又因馬力稍疲。持刀將馬扎傷數處。以致倒斃。殊屬目無法紀。綏坤保著革職。解往本處。交該將軍嚴加管束。其在京所得各項。俱著繳回。至扎死馬匹之跟役。著交盛京刑部嚴審。從重治罪。○大學士管兩江總督高晉。遵旨覆奏江蘇省。安東等七州縣。安徽省。鳳陽等六州縣。均毋庸加賑。止須明春借給口糧。惟泗州。盱眙。并泗州衛。被災較重。請加賑一月。得旨。屆時有旨。○己丑。諭。據索諾木策凌奏。原任同知塞珠倫。自發往伊犁。在印房行走以來。自知罪過。諸事盡心。塞珠倫。可否賞給主事銜。應得各項。概不給與。令其在富森布所遺章京缺上行。走三年期滿。出具考語。送部引見之處。請旨等語。塞珠倫辦理印房事務。實心奮勉。著加恩賞給主事銜。應得各項。不准給與。令其在富森布所遺章京缺上行走。仍照索諾木策

凌所請。俟三年期滿。出具考語。送部引見。○
豁除安徽貴池縣。乾隆三十八年水衝沙壓
地四頃二十一畝有奇額賦。○旌表守正被
戕河南遂平縣民安有才妻李氏。○庚寅

上詣

皇太后宮問安。○旌表守正捐軀江蘇無錫縣
民孫祖昌女孫氏。河南汲縣民李建成妻王
氏。○辛卯

上幸瀛臺。○壬辰

上詣

皇太后宮侍膳。○諭刑部議駁李質穎咨稱革
監倪宏文。賒欠喫咭喇國夷商翁等貨銀萬
餘兩無還。議將倪宏文。改擬杖流監追一摺。
已依議行矣。此案李質穎辦理甚屬錯謬。外
國夷商。販貨來售。內地民人與之交易。自應
將價值照數清還。若因拖欠。控告到官。尤宜
上緊嚴追給領。並將拖欠之人。從重究治。庶
免夷人羈滯中華。而奸徒知所懲儆。今倪宏

文拖欠夷商貨銀數至盈萬。實屬有心詭騙
遠人。非內地錢債之案可比。至所供落價虧
本。及賒與客販。舟覆貨沉等語。均係狡詞支
飾。豈可憑信。乃該撫僅將倪宏文減等擬徒
援赦杖責。殊屬寬縱。又令該犯戚屬。互結保
領在外。設法措繳。是倪宏文仍可藉端延宕。
徒使夷商旅居守候。而贖本終歸無著。豈為
平允。幸而部臣議駁。改擬監追。若竟朦朧照
覆。則是地方官庇護內地奸商。而令外夷受
累。屈抑難伸。其事實乖平允。殊非體卹遠人
之道。李侍堯欠任封疆。於撫馭邊夷事宜。辦
理向為妥善。此等賒欠夷商貨本之案。自應
督撫會同訊辦。以期允協。乃竟置若罔聞。惟
任李質穎草率定案。咨部完結。殊屬非是。李
侍堯著傳旨申飭。至李質穎平日尚能認真
辦事。何以審擬此案。荒唐若此。著交部察議。
並著速飭承追之員。先將倪宏文監追。轉飭
該犯原籍。查產變抵。照數給與夷商收領。其

不敷之數。勒限一年追清。如限滿不能全完。即令該省督撫司道。及承審此案之府州縣官。於養廉內按數攤賠。即傳朕旨。賞給該夷商清賬歸國。勿使向隅。其各員所賠之數。俟倪宏文名下追出抵還。仍將倪宏文照部議發配。並將遵照辦理緣由。即行具摺覆奏。○又諭據永慶奏。本年分。巴里坤營種地兵丁。每名收穫細糧在十五石以上。古城等營種地兵丁。每名收穫細糧在二十四石以上。並巴里坤種地遣犯。每名收穫細糧在十五石以上。均與叙賞之例相符等語。所有巴里坤古城等處管屯官員。及管遣犯官員。俱著交部議敘。兵丁著賞給一月鹽菜銀兩。遣犯著賞給一月口糧。該部知道。○陝甘總督勒爾謹覆奏。遵查皋蘭金縣安定會寧鹽茶廳武威平番肅州八處。本年夏禾被旱成災。情形較重。現在正賑已畢。青黃不接之時。民食拮据。應再懇展賑一月。其餘河州等二十一處。

已蒙賑卹。請於明春酌借籽種口糧。足資接濟。毋庸展賑。得旨。屆時有旨。○以廣西布政使孫士毅雲南布政使朱椿對調。○癸巳。皇太后聖壽節。遣官祭太廟後殿。○上詣壽康宮行慶賀。皇太后禮王大臣於慈寧門。東官於午門行禮。○奉皇太后幸壽安宮。侍宴。翼日如之。○甲午。諭軍機大臣等曰。據刑部奏駁李質穎咨稱革監倪宏文。賒欠嘆咭喇國夷商翁等貨銀萬餘兩。無還。問擬杖責。未協議。將倪宏文改擬杖流。監追一案。已依議行。並明降諭旨。將李侍堯申飭。李質穎交部察議。令將倪宏文家產變抵。仍勒限一年監追。再照部議發遣。如該犯限滿不完。即令該省督撫司道。及承辦此案之府州縣。於養廉內照數攤出。并傳

朕旨賞給該夷商收領歸國。以示體卹矣。此等夷商估舶冒越重洋。本因覓利而至。自應與之公平交易。使其捆載而歸。方得中華大體。若遇內地奸民設局賒騙。致令貨本兩虧。尤當如法訊究。乃李質穎僅將該犯擬以薄懲。而欠項則聽其自行清結。所謂有斷無追。竟令外洋孤客負屈無伸。豈封疆大臣懲惡綏遠之道。幸而刑部奏駁。朕始得知其詳。為之更正。若部臣亦依樣葫蘆照覆。其錯謬尚可問乎。中國撫馭遠人。全在秉公持正。令其感而生畏。方合政經。若平日視之如草芥。任聽地棍欺凌。而有事鳴官。又復袒護民人。不為清理。彼既不能赴京控訴。徒令蓄怨於心。歸而傳語島夷。豈不輕視督撫。鄙而笑之。且或慮粵商奸惡。致呼籲仍復成空。將來皆裹足不前。洋船稀至。又復成何事體。且朕此番處置。非祇為此事。蓋有深慮漢唐宋明之末季。多昧於柔遠之經。當其弱而不振。則藐忽

而虐侮之。及其強而有事。則又畏懼而調停之。姑息因循。卒至釀成大釁。而不可救。宋之欺明之亡。皆坐此病。更不可不引為殷鑒也。方今國家全盛。諸屬國震懾威懷。自不敢稍生異志。然思患豫防。不可不早杜其漸。嘆咭喇夷商一事。該督撫皆以為錢債細故。輕心掉之。而不知其關係甚大。所謂涓涓不息。將成江河者也。朕統御中外。一視同仁。如內扎薩克諸藩。恭順誠服。其輩行本小。朕皆撫若兒孫。每至必歡欣踴躍。與舊滿洲蒙古之執役無異。即新附之準夷。回部年班來者。朕亦必聯之以情。待之以禮。厚其餼賚。而遣之。眾亦莫不懷德感恩。幾與內扎薩克相等。此皆內外臣工所共知者。即如伊犁與哈薩克。易馬一節。辦理亦須妥善。或哈薩克所驅至者。本不皆善馬。原不妨如法擇而取之。若既是可用之馬。即當按其所值。與之市易。始能經久無弊。設或所給緞匹輕薄。暗減其價。致所

得不償所售。哈薩克貿易已非一日。皆能悉其底裏。口即不言。而心豈能允服。既違立法通市之本意。其流弊且無所底止。朕每以此厯懷。該伊犁將軍不可不實力妥辦。以裕永遠之規。若聽其日趨日下。而不知返。朕一有所聞。惟該將軍是問。恐不能任其咎也。又如朝鮮安南琉球日本南掌及東洋西洋諸國。凡沿邊沿海等省分。夷商貿易之事。皆所常有。各該將軍督撫等。並當體朕此意。實心籌辦。遇有交涉詞訟之事。斷不可徇民人以抑外夷。即苗疆番境諸省。亦當推廣此意。要行。若仍視為具文。再有此等事件。一經發覺。或經朕訪聞。及為言官糾劾。必將該將軍督撫重治其罪。不能似此案之僅予議處也。將軍督撫皆朕委任之人。惟當善體朕意。毋怠毋違。自可寓久安長治之計。即我世世子孫敬體朕訓守而勿失億萬年無疆之慶。詎不在是耶。此旨著傳諭各將軍督撫一體遵照。並

著入於交代。令各後任永遠遵行。勿稍玩忽。并另錄一分。交尚書房。俾皆恪循罔懈。○乙未。

上詣

皇太后宮問安。○辛瀛臺。○丙申。浙江巡撫三寶。遵旨覆奏。浙省漕運原係冬兌冬開。近年逐漸壓遲。實由旗丁在途託故稽延所致。現嚴飭監運各員加意催運。不許停泊。務與江蘇各幫銜尾而上。嗣後遞年均恪遵訓旨。一體認真督辦。務與河臣所奏相符。報聞。○丁酉。勉諸王等習騎射。諭曰。朕恭閱

實錄。當

太宗文皇帝時。王貝勒內即有懶於騎射之事。今承平日久。想諸王中亦必有廢弛者。我國自開基以來。首重騎射。理宜恪遵舊典。服習勤勞。即如朕每歲行圍。猶能於馬上馳射。此乃衆所共見者。著通諭阿哥諸王。各宜凜遵祖訓。詎勉奉行。億萬斯年。傳之子孫。毋替。○又

諭據明亮奏帶領各土司頭人計日按程。應於十二月十五日先後三起俱可抵寶店。擬於十六日全帶進城等語。為期畧早。著傳諭明亮將各土司頭人等沿途緩程前進。於十二月二十日全行帶進京城。候二十一日朕親詣瀛臺。明亮於是日即帶領各土司頭人於西華門外。同年班朝正之準噶爾回部人等一體跪覲。更覺觀瞻愈肅。○諭軍機大臣曰。福建海壇鎮總兵陳汝捷係捐納衛守備。前在直隸捕蝗出力。經方觀承保奏。並言其熟悉水師。是以屢加遷擢。用至總兵。茲陛見來京。召對時見其神氣就衰。且口角微歪。似有痰氣。恐於專閫之任不宜。著傳諭鍾音將該鎮在任時精力若何。辦事有無貽誤。如不能勝任。即據實奏聞。勿稍徇飾。又據陳汝捷奏稱。每年出巡八個月。朕因詢以在外日久。考拔兵弁等事。如何辦法。復據稱可以隨時回營考覈等語。該鎮如果每年出巡八個月。

遠在大洋。何以又能隨時回營。恐止係海船出洋八個月。該鎮未必自始至終皆在船巡哨。而其言亦未明晰。並著鍾音一併查明。詳晰奏覆。將此由四百里傳諭知之。尋奏。總兵陳汝捷平日辦事尚屬認真。惟該鎮係福建歸化人。官話費力。應對每形艱澀。其神氣就衰。或因途中染疾所致。容臣俟伊回閩察看具奏。至考覈兵弁。該鎮實係乘便回營。非自始至終在船巡哨也。報聞。○又諭。據明亮奏。已革知府倭什布。已革參將李天貴。現已派令協同松茂道查禮。仍赴郭羅克。督同該土司勒限緝拿兇犯。查參將李天貴原因出師金川。著有勞績。賞戴花翎。口外番人。惟知以翎頂為重。若見該革員並無翎頂。未免呼應不靈。可否懇恩俯准倭什布。李天貴暫帶原銜。姑用各原帶翎頂。令其緝賊自効等語。倭什布。李天貴既派往郭羅克地方協緝兇犯。自應准其暫用原銜翎頂。使番人不敢輕視。

但伊二人均係已經革職之員。若不定以限期。伊等轉得藉緝賊為由。冀常邀頂戴榮耀。豈肯上緊督緝。著勒限一年。令其緝賊自効。如能於限內緝獲兇犯。該員等不但虛博翎頂之榮。并可加恩予以革職留任。若一年限滿。仍然未獲。該員等并不必留彼協緝。徒令賺戴翎頂。即當解京治罪。以示懲儆。將此諭令文綬等並諭明亮知之。○是月。河南巡撫徐績奏。安陽湯陰臨漳林縣武安等邑。均得雪一二寸不等。冬至後瑞雪再得。普霑可卜來牟之慶。目下糧價平減。捆載盈途。實有盈寧之象。得旨知道了。似覺畧望雪。何不明奏。○河東河道總督姚立德奏。塘河長河。今冬輪屆小挑。臣於空幫全過濟寧時。即帶同運河道章輅。先赴臨清等處查勘。各塘應挑。深自二三尺。至四五尺不等。長河應挑。自數寸至尺餘不等。均於河心釘立誌樁。崖上築做封墩。蓋用灰印。以杜偷減。期於重運有益。得

旨嘉獎。

大清高宗法天隆運至誠先覺體元立極敷文奮武孝慈神聖純皇帝實錄卷之一千二十一

大清高宗法天隆運至誠先覺體元立極敷文奮武孝慈神聖純皇帝實錄卷之一千二十二

纂修總纂官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務黃旗滿洲都統世襲副都統加七級隨帶加一級尋常加二級軍功紀錄一次臣慶桂

總纂官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲副都統加九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十一年丙申十二月戊戌朔

實錄卷之二十二

上幸瀛臺。○諭軍機大臣等。前因沈德潛選輯國朝詩別裁集。進呈求序。朕偶加披閱。集內將身事兩朝。有才無行之錢謙益居首。有乖千秋公論。而其中體制錯謬。及世次前後倒置。亦復不可枚舉。因於御製序文內。申明其義。並命內廷翰林。為之精校去留。俾重鋟版。以行於世。其原板自應一併銷燬。但閱時既久。此板曾否銷燬。任聽存留。而沈德潛身故後。其門下士無識者流。又復潛行刷印。則大

不可著傳諭楊魁。即查明此板現存何處。如未經銷燬。即委員將板片解京。並將未經刪定之刷印原本。一併查明恭繳。○禮部奏。明年元旦慶賀禮儀。得旨是。照例行禮。奉

皇太后懿旨。停止筵宴。○己亥。

上詣

皇太后宮問安。○幸瀛臺。○以莊親王永璫大

學士舒赫德充

玉牒館總裁。理郡王弘晈。協辦大學士程景伊

實錄卷之二十三

尚書永貴充副總裁。○庚子。命國史館編列明季貳臣傳。諭昨閱江蘇所進應燬書籍內。有朱東觀選輯明末諸臣奏疏一卷。及蔡士順所輯。同時尚論錄數卷。其中如劉宗周黃道周。指言明季秕政。語多可採。因命軍機大臣。將疏中有犯本朝字句。酌改數字。存其原書。而當時具疏諸臣內。如王永吉龔鼎孳吳偉業。張縉彦。房可壯。葉初春等。在明已登仕版。又復身仕本朝。其人既不足齒。則其言不

當復存。自應概從刪削。蓋崇獎忠貞。即所以風勵臣節也。因思我朝開創之初。明末諸臣望風歸附。如洪承疇。以經畧喪師。俘擒投順。祖大壽。以鎮將懼禍。帶城來投。及定鼎時。若馮銓。王鐸。宋權。謝陞。金之俊。亮。崇雅等。在明俱曾躋顯秩。入本朝。仍忝為閣臣。至若天戈所指。解甲乞降。如左夢唐。田雄等。不可勝數。蓋開創大一統之規模。自不得不加之錄用。以靖人心。而明順逆。今事後平情而論。若而人者。皆以勝國臣僚。乃遭際時艱。不能為其主臨危授命。輒復畏死倖生。覲顏降附。豈得復謂之完人。即或稍有片長足錄。其瑕疵自不能掩。若既降復叛之李建泰。金聲桓。及降附後。潛肆詆毀之錢謙益輩。尤反側僉邪。更不足比於人類矣。此輩在明史。既不容闖入。若於我朝國史。因其畧有事蹟。列名敘傳。竟與開國時范文程。永平時李光地等之純一無疵者。毫無辨別。亦非所以昭褒貶之公。若

以其身事兩朝。概為削而不書。則其過蹟。轉得藉以揜蓋。又豈所以示傳信乎。朕思此等大節有虧之人。不能念其建有勲績。諒於生前。亦不因其尚有後人。原於既死。今為準情酌理。自應於國史內。另立貳臣傳一門。將諸臣仕明。及仕本朝各事蹟。據實直書。使不能纖微隱飾。即所謂雖孝子慈孫。百世不能改者。而其子若孫之生長本朝者。原在世臣之列。受恩無替也。此實朕大中至正之心。為萬世臣子植綱常。即以示彰瘅。昨歲已加謚勝國死事諸臣。其幽光既為闡發。而斧鉞之誅。不宜偏廢。此貳臣傳之不可不覈定於此時。以補前世史傳所未及也。著國史館總裁。查考姓名事實。逐一類推。編列成傳。陸續進呈。候朕裁定。並通諭中外知之。○辛丑。諭軍機大臣等。據楊景素奏。覈議東省沿河安設糧船。緯夫章程。按各州縣水道。開座之順逆難易。分別用夫之多寡等因。一摺。自係就該

省情形籌辦。但山東與直隸。江蘇。境壤相連。必須通盤覈計。昨周元理在京面奏。以糧艘自景州至天津。皆係順水。若遇風靜波平。并可無須緯挽。或偶值逆風稍大。即須添雇短緯。向來漕船北上。俱有短緯隨行。以備雇用。而雇夫之事。多在中途。臨時應急。地方官斷難沿途為之豫備。若無故聚集民夫數千。隨路分佈。又不免於滋擾。至此等短緯。惟在沿河地方官嚴查賊匪。不使潛蹤滋事。而各船押運官弁。復實力稽查。宵小自無從逞其伎倆等語。所奏頗覺有理。何以尚未據具摺奏聞。著傳諭周元理。即照前日面奏事宜。詳晰確覈。迅速覆奏。又浙江省。已據該撫奏稱。毋庸設立緯夫。至江蘇省。作何籌辦。至今未據奏覆。並著諭令該督撫。將如何酌定章程之處。即速妥議具奏。俟覆到時。同楊景素摺。一并交軍機大臣。會同該部覈議具奏。將此諭令周元理。高晉。楊魁。並令楊景素知之。○又

諭曰。圖思德奏。探聞緬酋惜駁已死。及關外信息等因一摺。此事非圖思德所能辦。已於摺內批示矣。看來圖思德之意。頗以惜駁之死為幸。妄冀緬匪一事。即可從此完局。此非曉事之見也。緬甸數年以來。並未實有悔罪輸誠之舉。雖內地嚴守關隘。不與貿易。恐亦有名無實。未必能制其死命。總之緬匪若不將拘留內地之人送還。及實在進貢乞恩。斷不能准其開關通市。其局不能完結。轉不繫乎惜駁之死與不死。況緬匪狡詐異常。從前曾經捏報惜駁已死。日久乃知其詐。此次安知非其故智復萌。即或果有其事。而其子不能改父之過。又與惜駁何異。圖思德此時惟當靜聽。並不必遣人向關外探訪彼處信息。為其所愚。使賊匪從而輕笑。設果得魯蘊親自到關。懇請通貢。圖思德竟當明白開導。諭以汝果出於誠心。竟宜親身進京。朝見大皇帝。如能將楊重英。蘇爾相諸人全行送回。并

誠懇納貢。大皇帝不但准汝仍通貿易。并且格外加汝大恩。汝若不親去。本督部堂難以代汝轉奏。至於中國撫馭外夷。全恃威信。從不肯賺其入而置之死。即如秤管猛到京數年。今仍遣令歸巢。皆汝等所深悉者。且使果欲殺汝。亦非難事。汝既已親來。我等總督提督。現在邊境。皆可執汝誅之。又何必俟汝到京再辨。汝當反覆自思。若非親自叩覲大皇帝。此事斷不能完。如汝驚疑顧慮。不敢進京。本督撫亦不相強。即令汝回去。亦不代汝奏聞。如此曉諭。察其神色。即行據實奏聞。候朕定奪。此時緬酋處。如差小頭人到關。惟當諭以汝等之言。不足為憑。如果有誠心懇請之處。可令汝大頭人等自來。本督部堂另有諭示之語。若彼投遞緬字文稟。總須付之不答。仍將原稟馳奏。將此由六百里傳諭知之。○吏部等部議准。左都御史崔應階奏稱。因瘋殺人。向例追埋葬銀兩。永遠監禁。至因瘋連

殺二命之犯。亦照此辦理。似未允協。應改擬絞候。從之。○旌表守正被戕奉天錦縣民張科舉妻王氏。○壬寅。

上詣

皇太后宮問安。○幸瀛臺。○兵部議覆陝甘總督勒爾謹疏稱。甘肅興武營。一切兵馬事宜。祇有都司一人經營。查察難周。請將大壩堡千總移駐興武。撥寧夏鎮標後營把總一員移駐大壩。應如所請。從之。○旌表守正捐軀

河南孟津縣民王東孝妻王氏。○癸卯。

孝惠章皇后忌辰。遣官祭。

孝東陵。○諭曰。觀保在尚書房行走有年。尚屬小心勤謹。今聞其患病溘逝。著加恩給還左都御史原銜。○諭軍機大臣等。據勒爾謹覆奏。甘省除寧夏外。再無他處可以分黃河之勢。周人傑所稱建閘開渠。分引黃河灌田之處。誠屬冒昧等語。所奏似不免稍存意見。水利為農田首務。所係於民生者甚鉅。而甘省頻年。

又每因缺水致旱成災。如果於附近河流之處。相度地勢。設法開渠。以資灌溉。自於旱地有益。雖甘省山阜較多。難以施之通省。但其中豈無近河稍低之地。可以引溉田疇。即或僅有數處可行。而數處民生。已霑其利。該督正宜虛心採訪。不可固執己見。況周人傑在朕前。並奏稱伊在慶陽。曾經力行水利。該督覆奏此摺時。該府尚未回任。何不俟其到時。詳晰面詢。其在慶陽時。如何興水利。何處辦

有成效。並就彼所知他府屬。何處尚可以仿辦。不妨就其所言。酌量擇而行之。如果有利於民。不應咎該府所言之過。若該督以周人傑奏及此事。輒目為冒昧。則朕諮詢民隱。誰復敢據實直陳。即該督如此存心。亦非集思廣益之道。設或周人傑所見果屬冒昧。或伊在朕前所陳。皆屬虛詞。亦不宜於此時加之責備。俟將來大計時。就其優劣。再行覈辦。亦未為晚。著傳諭勒爾謹。即速詳詢確覈。據實

覆奏。毋得稍存迴護。○又諭。昨據楊景素奏。沿河安設漕船短絳一摺。朕以山東與直隸江蘇境壤相接。必須通盤覈計。且前日周元理在京。面奏此事。頗覺近理。隨諭令該督及高晉等。即速妥議奏覆。俟奏齊時。交軍機大臣。會同該部定議。今日高晉等。亦將絳夫一事。議定章程具奏。獨周元理至今尚未奏到。此事必合各省彙辦。方可通行。現屆開兌冬漕之時。轉瞬新春。糧艘便須北上。南省之夫

即當早備。難以復行稽遲。著傳諭周元理。即照前日面奏事宜。詳晰議定。迅速覆奏。○大學士管兩江總督高晉。遵旨覆奏。漕運冬兌冬開。現飛飭糧道及各州縣。凜遵妥辦。如監兌廳員。不能督催趲運。立即叅處。嗣後每年遵守。自克副冬兌冬開之限。不致再有遲逾。其安徽江西二省。已飛飭各糧道。一體趕緊辦理。安省均於歲內開行。西省務於正月掃幫前進。報聞。○旌表逼嫁捐軀山東鄒平縣

民楊某聘妻孫氏。○甲辰諭據高晉奏。審擬在籍知縣趙時煥。毆傷胞兄趙時烈一案。將趙時煥問擬杖徒。不准援赦寬減等語。所辦未為允協。趙時煥曾任縣令。非齊民可比。寧不知弟毆胞兄。有傷倫化。使伊在任時。遇此等事。控理到案。豈能不按律嚴懲。乃與胞兄爭釁。輒敢動手。抵毆兩傷。實屬犯長茂倫。亦且知法犯法。非但不應援赦末減。並當較尋常弟毆胞兄者。加等問擬。用以飭名教而儆敗類。今該督僅照律以杖徒科罪。實不足蔽辜。此案著交刑部。從重改擬具奏。至高晉以大學士管理總督。主持風化。弼教明倫。是其專責。不應寬縱若此。高晉著交部議處。○旌表守正捐軀河南汝陽縣民高勲妻牛氏。○乙巳。

上詣

皇太后宮問安。○幸瀛臺。○諭京察為激揚大典。各部院堂官。自應秉公舉劾。將滿漢屬員

中才具出衆者。登之薦剡。衰頹庸鈍者。予以糾叅。方足鼓勵人才。澄清吏治。乃向來部院各堂官。每屆計典。除薦舉外。不過約畧劾去一二員。以符成例。其餘概與優容。姑息瞻徇之習。皆所不免。殊不知一部院中多一衰庸戀棧之輩。即少一出力辦事之員。既難保無闕冗誤公。且使候缺者上進無階。不得及鋒而試。於理亦未為允協。所有從前辦理京察各部院堂官。俱著傳旨申飭。明年又屆京察之期。各該堂官。務將滿漢司員及筆帖式等。秉公覈實。舉劾沙汰。毋許稍事姑容。倘仍有心存徇庇。致衰病庸劣之徒。濫竽曠職者。或經朕訪聞。或為科道糾彈。必將該堂官從重議處。將此通諭各部院衙門知之。○又諭。繙譯鄉會試停止以來。已二十餘年。近日滿洲學習清文。善繙譯者益少。著加恩以乾隆戊戌年八月考試繙譯舉人。已亥年三月考試繙譯進士。既與文武科場日期。兩不相礙。且

予伊等一年之功。俾得從容究心。繙譯益臻精熟。○丙午。諭吏部議湯萼棠調補撫州府知府之處。因屬照例覈駁。但朕向遇知府員缺緊要者。雖即簡補有人。仍令該督撫於所屬揀員調補。而以所遺之缺用其人。總期有裨地方。今海成以新放撫州府知府蔡葵。初蒞江西。恐於土俗民情。未能熟習。請與南安府知府湯萼棠對調。為人地相需起見。事屬可行。即其缺有美惡。手有高下。不必深求也。

湯萼棠等。著即照該撫所請調補。嗣後遇有似此指缺簡放。而該省督撫復奏請調補者。吏部除按例議駁外。仍著夾片聲明。候朕定奪。○又諭曰。明亮著在御前侍衛上行走。在京之日。兼軍機處行走。○又諭曰。額森特不勝護軍統領之任。著在副都統上行走。所遺鑲白旗護軍統領員缺。著靜海補授。正藍旗漢軍副都統舒泰。出差復興。又有腿疾。舒泰之缺。著靜海兼署。○又諭曰。傅良年老。恐難

勝將軍之任。著留京在散秩大臣上行走。俟有都統缺出。奏請補授。西安將軍員缺。著伍彌泰調補。即赴新任。綏遠城將軍印務。著博成暫行署理。○諭軍機大臣等。據兵部議覆四川總督文綬奏。稱署川北鎮標左營遊擊德勝。不識漢字。難堪綠營之任。呈請回旗當差等語。此事文綬辦理未協。綠營員弁。不識漢字者甚多。即總兵不識漢字。亦頗有人。豈遊擊轉因此不堪勝任。抑或另有別情。該督藉詞具奏。亦未可定。設或該員性情行事。於綠營外任。實不相宜。該督何妨據實奏聞。不應借不識漢字微退。但該督原疏。稱該員仍請回旗當差。尤非情理。該員如果不願外任。何不於揀選時據實呈明。乃業經發往川省。復行呈請回旗。豈伊見補用無期。遂爾心生改悔耶。朕令旗員簡用外任。既使綠營弁兵有所效法。即於旗人生計。不無稍裨。若既發外省。仍令回旗。不特僕僕道途。諸多拮据。即

起身領借盤費銀兩。回京後又須坐扣。更何以度日當差。是因揀發而轉致苦累。豈朕體恤旗人之意。文綬係滿洲總督。何於此等情形。竟未能計及耶。著傳諭文綬。即將德勝因何呈請回旗之故。據實覆奏。毋稍含糊迴護。兵部摺暫存。俟文綬奏到時。再降諭旨。○又諭今日三寶壘奏。今年甄別過教職首領佐雜各官。俱將已未俸滿。及留任。告病。勒休。叅革等項。分別開單呈覽。惟場員一項。止於摺內將去留緣由聲敘。並未另列清單。場員與教職佐雜等官。同係甄別。自應畫一辦理。未便兩歧。著傳諭三寶壘。將甄別各場員。仍照彙奏教職等款式。開單補奏。嗣後並即遵照辦理。將此傳諭知之。○賑卹甘肅華蘭金縣狄道。河州。渭源。靖遠。沙泥州判。紅水縣丞。隴西安定。會寧。通渭。平涼。隆德。靜寧。固原。鹽茶廳。撫彝廳。張掖。山丹。武威。永昌。平番。古浪。靈州。西寧。秦州。肅州。高臺等二十九廳。州。縣。分防

州判。縣丞。本年旱災貧民。○旌表守正捐軀河南確山縣民王文佐妻孫氏。○丁未諭軍機大臣等。據周元理奏。承准廷寄。粵省審擬革監饒宏文。賒欠夷商貨銀一案。諭旨。遵即移行。大小文武衙門。入於交代遵行。並另札天津道府。將此案傳示各商。俾伊等往來海洋。宣揚德意等語。所辦未為妥協。此案李質穎辦理不合。已降旨將伊交部察議。各省俱可一體恪遵。至傳寄諭旨一道。其中有統論中國撫馭遠人之道。止宜將軍督撫留心經理。不便宣示外夷。是以未經明發。而令各將軍督撫入於交代。俾各後任永遠遵行。該督撫奉諭後。惟當謹貯署中。列入交代冊檔。并毋庸移行文武大小衙門。至於海口夷商。即欲宣揚德意。亦祇可將明旨通傳。其廷寄內之語。豈宜傳示。况將軍督撫辦理此等事務。惟在實心妥辦。又何藉文告虛詞。周元理所辦。未免誤會前旨。著傳諭周元理。如尚未通

行。即為停止。若已行文。仍速撤回。直隸一省如此。恐他省亦有似此者。並著再諭各將軍督撫。接奉前此傳寫諭旨。止存貯入於交代。不必宣示遠近。○又諭。據李侍堯奏。商船莫廣億。帶到暹羅國搭送回籍雲南人楊朝品等三人。並鄭昭文稟一件。稱因連年與緬匪仇殺。再懇賞買硫磺一百擔。若天朝用兵阿瓦。願懇諭知其期。豫為堵截。緬匪後路。詢之楊朝品等。據供似屬真情等語。楊朝品等出邊。雖未經用兵以前。但以內地民人。赴緬甸貿易。曾被拘禁。復又轉入暹羅。在外年久。自不便遣回。騰越著李侍堯派員將楊朝品等三犯解京。沿途小心管解。勿致疎脫。俟解到時。訊問明確。再行辦理。至鄭昭見內地民人在彼。即行資助送回。尚屬恭順。前已准其所請。聽買硫磺鐵鍋。此次請買硫磺。仍可准其買回。看來鄭昭與緬子仇殺。似非飾詞。但中國現在並不征勦緬匪。即欲掃除醜類。亦無

藉海外彈丸協擊。或伊欲報故主之仇。聽目為之。李侍堯仍仿上次檄稿之意。給與回文可耳。將此由五百里傳諭李侍堯知之。○又諭。本日吏部將拏獲在洋刼奪各盜。並究出奸民李阿集等私越外番。得受偽職之廣東瓊山縣知縣汪垕。帶領引見。已降旨令其回任。以同知陞用矣。朕觀汪垕。不過謹慎老實。即該督所出考語。亦屬中平。並非才具出眾者。何以能查拏盜犯。盤獲重案。如是之能事。是否係該員留心察訪。親自拏獲。抑其中另有別情。著傳諭李侍堯。即行查明。據實覆奏。尋奏。汪垕才具雖非出眾。但遇事頗能奮勉。此案李阿集一犯。實由該令細意根究。得悉罪狀。報聞。○命成都將軍明亮。員勒垂濟扎勒。在紫禁城內騎馬。○戊申。上御乾清門聽政。○詣皇太后宮問安。○諭軍機大臣等。本日圖思德奏地方情形一摺。竟於年分之下。遺寫月日。

實為疎忽之至。已於摺內批飭矣。督撫等封奏事件。自宜敬謹閱看。豈可委之幕友之手。並不悉心檢點。以致疎漏如此。圖思德著傳旨嚴行申飭。○又諭。據富察善。銘通奏民穀數一摺。又糧價清單一件。字畫細小。殊不便於批覽。此皆該侍郎等遇有奏牘。率付之書辦之手。並不細心詳閱所致。奏摺與本章不同。其字體大小。自有一定程式。富察善向在內閣。且曾為司員。豈尚不知。即著傳諭富察善等。嗣後摺奏內字畫。不得仍前細小。以便披閱。○以黑龍江副都統雅朗阿。為綏遠城將軍。○旌表守正被戕四川鄧都縣民范金文妻張氏。○己酉。以戶部左侍郎梁國治充經筵講官。○調正藍旗蒙古副都統都爾嘉為黑龍江副都統。○庚戌。諭。從前不准滿洲侍郎坐轎者。特令其不廢弛滿洲舊規。服習勤勞也。但伊等既已年老。仍令時常騎馬。恐伊等力不能支。嗣後滿洲侍郎等。年至六十歲。

著加恩概准坐轎。○諭軍機大臣等。據海成奏。將各屬續獲應燬書籍。分晰開單進呈。並稱自展限倍價購買以來。據各屬蒐買。以及民間繳呈。應燬禁書。前後共有八千餘部之多。雖屢經家喻戶曉。乃尚不能一時淨盡。再請展限購求等語。所辦甚好。看來查辦遺書一事。惟海成最為認真。故前後購獲應行燬禁書籍。較江浙兩省尤多。江浙為文物所聚。藏書之家。售書之肆。皆倍於他省。不應購獲各書。轉不及江西。且海成此次具摺。尚恐屢買未能遽盡。仍請展限。竭力購求。而江浙兩省。自呈繳數次後。即未見陸續呈繳。又未將如何購求。及作何展限設法妥辦。務期淨盡之處。據實奏聞。皆因該督撫視為無關緊要。徒以具文塞責。並不實力查辦。則藏匿應禁之書。何由盡出。高晉。三寶。辦經數年。楊魁。亦已到任半載。何以輕率若此。俱著傳旨嚴行申飭。並令該督撫再行嚴飭所屬。加意收查。

務使應燬之書。盡行繳出。勿敢稍有隱匿。如此番查辦之後。民間尚有違禁潛藏者。將來別經發覺。除將本人治罪外。仍惟該督撫是問。恐不能當其罪也。將此由四百里諭令知之。海成摺並鈔寄閱看。○以署理刑部侍郎德福為鑲藍旗蒙古副都統。○添設盛京蓋州復州二處嚴座。從盛京戶部侍郎喀爾崇義請也。○辛亥。

上詣

皇太后宮問安。○軍機大臣會同戶部議奏。漕船沿途雇覓緯夫。設立夫頭各事宜。據直隸總督周元理奏稱。自天津轉衛。需用緯夫。多寡不同。每一州縣。酌立夫頭五六名。十餘名不等。責令不時詳察。遇有面生可疑者。即令攆逐。至山東省韓莊以南。閘多水溜。需夫較多。今該撫請分為三段。每段設夫五百名。隨時受雇。每百名設夫頭一名。事竣仍令歸農。江南江西二省。據高晉奏。漕船一入瓜儀。即

需添備短緯。自五百名至八百名不等。每夫五十名。設夫頭一名。選派土著民人充當。給與執照。其散夫亦給與腰牌。隨時查驗。均應如所請。得旨依議速行。○戶部議覆安徽巡撫閔鶚元疏報。宿松青陽二縣。漂失賑米五千五百九十五石。實係山水陡發。人力難施。應如所題豁免從之。○壬子。

上御太和殿視朝。文武陞轉各官謝恩。○諭曰。陳世官著加恩賞給三品銜。並准其照銜食俸。羅衡武世倬俱著加恩賞給五品銜。○吏部議覆廣東巡撫李質穎奏。稱分發佐雜人員甚多。補用需時。有請呈明回籍者。聽起假時由原籍督撫給咨。仍將往返日期報部。應如所請。并行令各省照辦從之。○浙江學政王杰奏。請將御製詩三集。頒發各省布政使刊刻。廣布藝林。永為盛事。至浙省一部。并請自行選工敬刊。允之。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十二

實錄卷一千二十二

二十三

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲副都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書領侍衛內大臣副都統軍功紀錄五次

尋常紀錄十四次臣陳瑛經筵講官太子少保工部尚書紀錄六次臣曹振鏞等奉

教修

乾隆四十一年丙申十二月癸丑月食○諭

二十二年十一月

據常青等奏察哈爾總管拉瑪扎布過年班
報稱眼疾查驗頗輕顯係託故請將拉瑪扎
布交部嚴議等語察哈爾總管等四年始輪
班進京一次拉瑪扎布遇班推患眼疾不來
京陛見甚屬不堪拉瑪扎布無庸交部著即
革去總管其總管之缺該部揀選人員帶領
引見補放○以山西殺虎口副將明安為浙
江處州鎮總兵○以故靖海侯施純愷子鏢
三等男趙永興子坦各襲爵○甲寅

上詣

皇太后宮問安。○湖北巡撫陳輝祖遵旨覆奏。湖北各屬經徵漕米。十月下旬即可全完。受免後俱能依限渡淮。未敢遲誤。間有落後。實因旗丁等置買土宜。冀霑餘潤。其殷實之丁。俱能迅速辦完。其力稍疲乏者。專資公費等銀備辦。臣已飭糧道豫為籌備。及早散給。並嚴檄沿江營縣實力稽查。毋任停滯。報聞。○以福建漳州鎮總兵李國樑為福建陸路提督。調福建寧鎮總兵董果為漳州鎮總兵。○以故一等公德祿子松山襲爵。○蠲免山東德州平原禹城齊河長清德州衛泰安滋陽曲阜寧陽鄒縣泗水恩縣濟寧東平東阿東平所陽穀壽張鉅野聊城堂邑博平清平東昌衛嘉祥汶上臨清夏津武城三十州縣衛所。乾隆四十一年各地畝額賦銀二萬三千二百一十八兩有奇。○乙卯諭曰。御史炳文奏請嗣後科道京察止令都御史帶領引

見去留。俱候欽定一摺。所奏殊為錯謬。科道職司言路。遇有內外大臣。贓私不法。及吏治民生所係。如果確有聞見。原准其自行具摺。據實糾陳。朕必徹底清查。覈實辦理。是國家待言官之道。已屬從優。但既歸都察院統轄。則當京察激揚大典。自應聽該堂官考察。以符體制。且科道等平時言事。其識見孰優孰劣。朕原可約畧而知。至其才具之短長。行走之勤惰。非堂官不能深悉。若不令其甄別註考。概候朕於引見時裁定。有是理乎。設或京察時。都御史舉劾不公。科道原可指名參奏。乃炳文於舉行京察之前。輒思變更成例。妄為此奏。使堂官不得操其黜陟。明肆阻撓。隱占身分。冀諸事得以自專。其有關於世道人心者。良非淺鮮。明李臺諫諸臣。遇事生風。紛取不已。遂至黨同伐異。貽害無窮。最為彼時秕政。我朝網紀肅清。科道咸知奉法。不敢復蹈覆轍。惟雍正初年。因六科改隸都察院。給

事中等連章爭競經

皇考嚴加懲儆。力為整飭。益復謹凜。恪遵至今。乃炳文此奏。借慎重言官考覈為由。欲翻堂官考覈成例。效明末諫垣門戶惡習。此風斷不可長。況炳文身係宗室。尤不應為此沽名之事。豈堪復為御史。炳文著即革去御史。發往伊犁。以司官効力贖罪。將此通諭知之。○又諭據署伊犁將軍索諾木策凌奏稱。哈薩克布魯特等惑於經文。妄生疑懼。惟祈永為

高宗實錄卷一〇二三

臣僕。不遭屏棄等語。看來以朕適減金川。恐一併及彼。故假借經言。託詞嘗試。此蓋不知朕撫卹伊等之意。天朝之於外藩。恭順則愛育之。鴟張則勦滅之。兩金川負朕深恩。恣意欺隣。併思窺伺內地。是以明正天討。擣穴擒渠。哈薩克等內附多年。頗為恭順。豈有無故屏逐之理。今特降旨曉諭。阿布賚。阿布勒比斯。汝等嗣後。但益加恭謹。以期永受朕恩。毋滋疑慮。○吏部議覆。戶部尚書兼管順天府

高宗實錄卷一〇二三

事務。素守伺奉。直隸屬員。陞調至順天府屬者。向係督臣與臣等會銜題咨。但臣等與直隸官員。多不識面。賢否難知。嗣後請令督臣專銜題咨。至順天府屬人員。臣等原有考覈之責。遇有陞調。請令督臣主稿。臣等會銜。應如所請。從之。○以浙江樂清協副將保成。為福建建寧鎮總兵。○旌表守正捐軀河南永城縣民張寅女張氏。○丙辰。諭軍機大臣等。據圖思德奏。緬目得魯蘊。遣人投遞緬稟。情願送還內地官人。輸誠貢象。懇求賞准開關。已飭該鎮。州給與回文等語。所辦大段尚是前經該署督奏。探聞緬酋惜駁死信。並得魯蘊欲親來還人納貢。懇通買賣等因。已將辦理此事關鍵。詳悉傳諭圖思德遵辦矣。惜駁之死信真偽。無關緊要。如果匪酋等。有悔過輸誠之意。將拘留之蘇爾相。楊重英等。盡行送回。並誠懇進貢。原亦可以完局。但此說只可存之於心。斷不可於緬衆前。稍露天朝有

趁伊等投誠速圖了事之意。賊匪狡獪異常。倘窺見內地有欲圖遷就情形。彼必以為奇貨可居。轉多稽阻。若見督提等。不以為事。處之淡然。彼或具有真誠。必急切懇籲。欲冀俯納。中國撫馭外夷之道。大率如此。圖思德不可不知。即或得魯蘊到關叩懇。亦當遵照前諭。令其親自進京。於大皇帝前誠切懇請。或可邀恩通市。否則難以轉奏。且看其誠偽如何。再行定奪。圖思德如或接見賊目。惟當義

寶錄卷二二三

下

正辭嚴。明白開導。勿稍示伊等以將就完事之心。方為妥協。將此由六百里諭令知之。○又諭。據鐘音奏。浙江永嘉縣佃民胡挺三。糾眾抗租。經業戶稟官飭禁不遵。典史往諭被毆拘留。據溫處道楊漢督率該縣傅永綽。都司侯國雄。帶同兵役查拏。擒獲嚴亞寶等九名。該犯等恃眾拒捕。復又追獲潘應富等三名。縣丞俞上運。拏獲胡明玉。陳芳蘭二名。縣役緝獲陳紹華。暨首先倡議減租之楊我兆。

並據莊保拏獲首犯胡挺三解案。現在嚴拏餘黨。並馳札撫臣三寶督飭迅速究辦等語。此案胡挺三以佃民聚眾抗租。毆官拒捕。實屬大干法紀。且首犯業已就獲。其餘各犯。亦經拏獲多人。自應即行奏聞。迅速嚴訊。重治其罪。並查緝餘黨。俾無漏網。何以未據三寶奏。及此係浙省之事。鐘音遠在閩省。現經具奏。三寶近在本地。何轉遲延未奏耶。著傳諭三寶將此事現在如何審辦。及案內逸犯有

寶錄卷二二三

下

無全獲之處。迅即具奏。並將因何不即奏辦之處。據實覆奏。將此由四百里傳諭知之。○又諭。本日吏部將富德案內。餽送金兩之已革知府曾承謨。帶領引見。業經降旨。仍以知府用矣。當木果木失事之後。當噶爾拉大兵未撤之先。糧員內如榮昌縣知縣張永升。西充縣典史馮世昌。先回至達烏等處。惟曾承謨一人。隨將軍參贊等。一同撤出。彼時朕若聞知。必重治其罪。今雖不必追究。若仍令其

列名仕籍。坐待陞遷。斷無是理。著傳諭劉秉恬。文綬會同查明。叅奏革職。以示薄懲。將此由四百里傳諭知之。○以故奉恩將軍德特赫子烏訥璽襲職。○旌表守正捐軀四川德陽縣民曹良美聘妻蕭氏。○丁巳。諭平定兩金川後。現於其地設鎮安營。所有該處道里形勢。及各土司疆域界址。均應繪圖。纂入方畧。雖番境地圖。屢經該將軍等呈進。但不過約畧而計。其方隅偏正。恐尚未能悉準。著派

聖錄卷二二三

八

傳作霖。於開春隨將軍明亮前往成都。並著明亮同文綬。派委妥員。隨其往各該處。逐加測量。另繪新圖呈覽。伊事竣回省。仍著明亮文綬派員送伊回京。○諭軍機大臣等。盛京吉林為本朝龍興之地。若聽流民雜處。殊於滿洲風俗攸關。但承平日久。盛京地方與山東直隸接壤。流民漸集。若一旦驅逐。必致各失生計。是以設立州縣管理。至吉林原不與漢地相連。不便令民居住。今聞流寓漸多。著

聖錄卷二二三

九

傳諭傅森查明辦理。並永行禁止流民。毋許入境。○又諭戶部奏。江西省安插土司。撥給地畝。價值與原定之數不符。未便准銷。應令該撫仍照定價召買。造冊報部等因。一摺。已依議行矣。此等土司。均係曾經獲罪之人。遷撥各省安插。已屬恩施格外。該土司等既到安插省分。又經撥給官房棲止。尤得各有寧居。至其餬口之資。止須每名酌賞銀兩。令其各自謀生。以贍家口。何必動項多購田畝。分撥。致滋糜費。此案業經辦給田地。毋庸追繳。著交戶部存記。嗣後如再有遷撥安插土司之事。令該督撫遵照此旨辦理。並將此諭令有土司省分。及向曾安插土司省分各督撫知之。○吏部等部議覆。陝甘總督勒爾謹疏。稱特訥爾州判。改阜康縣。應設訓導。典史二員。以裁汰莊浪縣二缺。移改。仍隸迪化州。州判舊署。改作縣署。添建訓導典史署二庫房二監獄一。奇台通判。改奇台縣。經收房課牲

稅應設訓導一員。以平涼縣裁汰缺移。改典史一員。以裁汰濟木薩巡檢一缺移。改仍隸鎮西府。通判舊署。改作縣署。添建訓導典史署二庫房一。二縣歲科兩試。各取進文章四名。武童四名。奇台撥府學文武童各一名。泰安縣屬隴城巡檢。改迪化城巡檢。以舊遺倉大使署。改巡檢署。瑪納斯縣丞署。並倉廩。俱建新城。東吉爾瑪泰巡檢。歸奇台縣管轄。移駐古城。迪化州錢糧。歸烏魯木齊都統覈辦。具奏。阜康。濟木薩。糧石。分案造報奏銷。毋庸歸入迪化州。哈密。闡展。二處錢糧。由巴里坤道申報都統。鎮西府屬捐監實收。亦歸都統查覈。東吉爾瑪泰。額捐監糧。歸奇台縣收捐。新疆口內外犯軍流徒罪。照哈喇沙爾流犯例。於新疆地方分別改發。哈密。闡展。二處命盜案。該大臣奏辦。巴里坤。至迪化州。共十六站。設馬八十三匹。分巡巴里坤糧務兵備道。改鑄分巡鎮迪糧務兵備道兼管哈密。闡展。

之關防。並將改設各缺關防印記。刊鑄頒給。各該處文廟。分別建立。從之。○戊午。

上詣

皇太后宮問安。○幸瀛臺。○庫車三品阿奇木伯克阿克伯克等十三人。哈薩克阿布賚使臣鄂托爾齊等八人。明正土司甲爾參得沁。木坪土司甲爾參納木卡。瓦寺土司策楞雍中。孔撒土司策丹納木扎勒綽窩土司朋楚克喇布坦。裏塘土司丹津衮布。巴塘土司衮布嘉木。拉林楚木長官司巴爾傑策爾丹等。及各土舍頭目二十九人。瞻觀。各賜冠服有差。○諭。四川邊外各土司所戴帽頂。自應照阿桂等所奏。各按品級戴用。但此次征剿兩金川。該土司等。或多派土兵。協同攻剿。或派出烏拉。餽運軍糧。已屬奮勉出力。現在共抒瞻就。趨赴闕廷。其誠悃尤屬可嘉。所有伊等官階。仍照原授品級外。著加恩均賞戴二

品紅頂。並令子孫承襲後。一體戴用。至隨來之土舍頭人。向有於本職上。越級戴用帽頂者。亦著加恩。仍舊賞戴。以示優獎。○己未。諭軍機大臣等。據三寶奏。永嘉縣佃民胡挺三。糾衆抗租。毆官拒捕一案。現在嚴審究擬等語。此案逆犯所得甚速。地方官尚屬能事。有應送部引見者。即送部引見。前據鐘音奏到。已諭令該撫嚴行審辦矣。胡挺三等。倡議減租。竟敢糾集多人。將典史毆打拘留。已屬目無法紀。迨至該道等會同查拏。猶復挺身抗拒。毆傷官役。似此梗頑不法。情罪實為可惡。著傳諭三寶。將現獲各犯。嚴行審訊。從重定擬。多辦數人。一面奏聞。一面正法。庶刁民知所懲儆。並嚴訊案内逸犯。速緝務獲。毋使漏網。至温州所屬。從前記曾有聚衆滋事之案。蓋其地瀕海。民風犷悍。遂至目無法紀。幾於福建漳泉等郡無異。不可不實力整飭。所有該處鎮道大員。必須明練強幹者。方足以資

彈壓。現在總兵孟兆熊。溫處道楊漢。是否堪以勝任。並著鐘音會同三寶。即速查明。據實具奏。將此由四百里諭令知之。尋奏溫處道楊漢。一聞典史被毆。即親督知縣。都司前往查拏。頗能迅速。至總兵孟兆熊。由水師兵丁出身。補授今職。刁民滋事時。該鎮正在洋巡察。接都司稟報。即馳回督拏。現在案內多犯止餘一名未獲。孟兆熊。楊漢尚堪勝任。報聞。○辛酉。諭據伊勒圖。索諾木策凌奏稱。烏魯木齊之厄魯特等游牧地方狹窄。請移駐齋爾。與彼處原有之厄魯特等合居。請於烏魯木齊添設領隊大臣一員。酌留全鑑。同永慶管轄滿洲兵丁。並請另揀領隊大臣一員。派往塔爾巴哈台管轄厄魯特等語。已依議行矣。所有全鑑員缺。著將頭等侍衛伊里布。賞給副都統職銜。授為領隊大臣。前往塔爾巴哈台管轄厄魯特。○諭軍機大臣等。據温州鎮總兵孟兆熊奏。永嘉縣佃民胡挺三。糾衆

抗租。毆官拒捕一摺。已於摺內批示。孟兆熊之意。尚視為尋常聚衆之案。實屬不知事體輕重。此案前經鐘音。三寶陸續具奏。業已諭令該撫將現獲各犯。嚴行審訊。從重定擬。多辦數人。一面奏聞。一面正法矣。胡挺三等倡議減租。輒敢糾集人衆。將典史毆打拘留。迨該道等督同兵捕。前往擒拏。猶復倚恃人衆。益肆猖獗。竟敢持棍登橋抗拒。不法已極。自當盡行擒捕。將為首及濟惡各犯。速示刑誅。

實錄卷一百一十二

十四

以正人心而申國法。至拆壞橋邊坑屋。必非一人所能之事。情罪均屬可惡。其拋擲椽瓦者。固不可從輕。即係隨同拆屋之人。亦當審明問擬外遣。毋得稍存姑息。温州地方瀕海。從前記曾有聚衆滋事之案。今胡挺三等復敢毆官拒捕。可見該處民風獷悍。該撫不可不嚴行辦理。俾刁民知所懲儆。稍加斂戢。方合辟以止辟之義。至佃戶交租。既有定額。若倡率議減。則業戶何以辦糧。此風亦不可長。

並著該撫於辦完此案後。妥定章程。出示嚴

禁。將此由四百里傳諭知之。○又諭。據綽克

托奏稱。德風揭報常福任意妄為。常福著革

職。交綽克托。瑪興阿審擬具奏。常福係和闐

領隊大臣。和闐係葉爾羌應管地方。常福在

彼任意妄為。瑪興阿豈無聞見。乃並未查叅。

迨德風揭報後。始行具奏。其咎實無可辭。前

已令高樓前往葉爾羌。更換瑪興阿。此時不

准回京。即作為和闐領隊大臣。過三年再行

實錄卷一百一十三

十五

更換。併傳諭綽克托知之。○又諭。瑪興阿現

留和闐。作為領隊大臣。更換尚須時日。所有

禮部兵部侍郎員缺。仍著景福。阿肅。兼署。○

壬戌。

孝莊文皇后忌辰。遣官祭

昭西陵。○

上詣

皇太后宮問安。○諭軍機大臣曰。吳虎炳奏將

四川平武縣知縣蔣振閭。及伊姪蔣泰。家產

嚴密查封。並恐尚有出借銀兩。以及存留在外之項。已飛咨川省。取供查辦等語。此事竟可毋庸辦理。前據吳虎炳奏到。蔣振閭關追伊姪蔣泰盜賣軍糧一案。將蔣泰押解赴川。並請將伊兩人家產查封備抵。彼時以蔣泰如果盜賣軍糧。大干法紀。自應重治其罪。查抄家產。當經傳諭該撫遵辦。並諭令劉秉恬文綬等。詳悉查究。嗣據劉秉恬等查明蔣振閭從前歷管昆色爾。則朗噶克丫口各站。當即委員將一切文卷賬目。逐一確查。按照接收上站。並轉運下站。以及本站支銷各米數目。詳悉覈對。俱屬相符。並無虧缺。蔣振閭因蔣泰經管倉糧。不辭而去。心生疑惑。查算米數。又復短少。恐係伊姪盜賣。輒動關文。至原籍關追。後於昆色爾糧務卷箱內。揀出則朗噶克丫口官兵支領口糧領狀。覈對前數已符。蔣振閭心生懊悔。寫信回粵。阻止投遞關文。業已無及等語。是蔣泰不過因私自回粵。

致蔣振閭生疑妄控。實無盜賣軍糧之事。即蔣振閭於經管糧務。亦並無虧短。或伊等別有挾嫌滋釁情由。審明時果有應得之咎。然均非大過。不致查封家產。所有粵西查封蔣振閭及蔣泰產業著吳虎炳照數查明。仍行給還。其本案各情節。仍著劉秉恬文綬即行查明具奏。朕辦理庶務。無論事之大小。悉惟鑑空衡平。各視其人之自取。若糧員等果有盜賣軍糧之事實。為法所難寬。必當籍沒家財。從重治罪。今此案既查無侵盜官糧情弊。其家產雖經該撫查封估值。亦必仍行給還。以昭平允。斷不肯稍為過當也。將此由四百里傳諭吳虎炳。並劉秉恬文綬等知之。○湖南巡撫敦福。遵旨覆奏湖南漕米無多。徵收尚易。每年均於十一月運赴岳州水次。原無遲誤。惟漕船回空較遲。臣與司道公同商酌。限定回空漕船。於十二月初十日前。全行歸次。即押令修艖完固。於歲內兌竣開行。正月

初旬。掃幫出境。至漢鎮齊幫後。即令迅速前進。毋許逗留。如遇守風日期。令地方官具結通報報聞。○癸亥。丁酉年立春。順天府進土牛春山寶座。○

上以歲暮禋祭

太廟。是日起齋戒三日。○甲子。以內閣學士彭元瑞署工部左侍郎。○乙丑。以歲暮禋祭。遣官祭太廟中殿。

後殿。○諭軍機大臣等。據高晉等奏。開挑陶莊

引河完竣。驗看工程如式。因時屆嚴寒。黃河凍結冰凌。恐水底水流微弱。難資衝刷。請俟交春後。天暖冰融。再行放水等語。所奏甚是。陶莊開挑引河。於全河極有關係。開壩時。必須乘勢引放。俾大溜直趨暢注。方為有益。自當俟春融後。趁桃汛相機妥協為之。至引河為河工要務。並須選用吉日。著傳諭高晉。薩載等。即豫行擇吉。先期迅速奏聞。再行辦理。又高晉另摺奏稱。現因閔鶚元進京。陛見暫

署安徽撫篆。俟閔鶚元回任後。接兼河篆。俾薩載即行赴京等語。現在開放引河。為總河專責。必須在工督視。不便遽行離工。且薩載此時並無急須陛見請示之事。著傳諭薩載。於引河放溜後。細視新河上下。是否循流順軌。俟大局全定。即行奏聞。一面將總河印務。交高晉暫行兼署。起程來京。○命署工部左侍郎彭元瑞充三通館副總裁。○丙寅。禋祭太廟。

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○遣官祭

太歲之神。○丁卯。

上詣

皇太后宮問安。○御保和殿賜朝正外藩筵宴。

左翼科爾沁和碩親王恭格喇布坦旺扎勒

多爾濟。多羅郡王納旺色布騰。鄂勒哲特穆

爾額爾克巴拜。多羅貝勒古穆扎布。輔國公

諾觀達喇。公品級一等台吉拉旺。和碩額駙

實錄卷一〇二三

三

雅喇木丕勒。一等台吉色楞丹巴。敏珠爾多

爾濟。薩木丕勒。四等台吉端多布。喀喇沁多

羅郡王喇特納錫第。固山貝子多羅額駙扎

拉豐阿。輔國公拉扎布。溫都爾瑚。和碩額駙

納木扎布。一等塔布囊格勒克薩木魯布。三

等塔布囊旺扎勒。丹巴多爾濟。奈曼多羅郡

王拉旺喇布坦。一等台吉素彌喇。固山額駙

端多布。阿巴噶多羅郡王鼎布坦。常忠。固山

貝子朋楚克。教漢多羅郡王巴勒丹。固山貝

子固山額駙羅布藏錫喇布。垂濟扎勒。輔國

公桑濟扎勒。和碩額駙朋蘇克喇錫。多羅額

駙巴勒丹。二等台吉濟克濟扎布。固山額駙

扎爾瓦。翁牛特多羅貝勒諾爾布扎木素。多

羅額駙班珠爾。二等台吉三濟扎布。巴顏巴

圖爾。哈斯巴圖爾。烏珠穆沁多羅貝勒達什

袞布。輔國公瑪哈布爾尼雅。阿巴哈納爾多

羅貝勒車登扎布。固山貝子達克丹朋蘇克。

鄂爾多斯多羅貝勒棟囉布色。凌公品級二

實錄卷一〇二三

三

等台吉袞扎布多爾濟。蘇尼特多羅貝勒恭

桑扎勒。巴林固山貝子多爾濟喇布坦。輔國

公和碩額駙德勒克。一等台吉索特納木多

爾濟。二等台吉索諾木。土默特固山貝子色

布騰棟囉布。輔國公索諾木旺扎勒。四等台

吉巴勒丹多爾濟。扎魯特一等台吉朋蘇克。

克什克騰一等台吉根敦達爾扎。右翼喀爾

喀和碩親王固倫額駙拉旺多爾濟。和碩親

王諾爾布扎布。親王品級郡王車布登扎布。

多羅郡王桑齋多爾濟。德木楚克。多羅貝勒。德木楚克扎布。達克丹多爾濟。輔國公德勒克多爾濟。三都布多爾濟。巴圖濟爾噶勒。公品級一等台吉三都布多爾濟。扎薩克一等台吉納旺車凌。衮楚克。一等台吉蘊端多爾濟。厄魯特和碩親王羅布藏多爾濟。公品級一等台吉旺沁班巴爾。青海多羅郡王衮楚克達什。納罕達爾濟。輔國公吹忠扎布。回部郡王品級貝勒霍集斯。輔國公圖爾都。和什克。額色尹。扎薩克一等台吉瑪木特。綽羅斯多羅貝勒富塔喜。二等台吉納木扎勒。杜爾伯特鎮國公雙和爾。四等台吉布達扎布。察哈爾輔國公敏珠爾多爾濟。及領侍衛內大臣等。召科爾沁和碩親王恭格喇布坦。旺扎勒多爾濟。多羅郡王納旺色布騰。多羅貝勒古穆扎布。喀喇沁多羅郡王喇特納錫第。固山貝子多羅額駙扎拉豐阿。柰曼多羅郡王拉旺喇布坦。阿巴噶多羅郡王鼐布坦常忠。

教漢多羅郡王巴勒丹。固山貝子固山額駙羅布藏錫喇布。垂濟扎勒。輔國公桑濟扎勒。烏珠穆沁多羅貝勒達什衮布。阿巴哈納爾多羅貝勒車登扎布。鄂爾多斯多羅貝勒棟囉布色凌。蘇尼特多羅貝勒恭桑扎勒。喀爾喀和碩親王固倫額駙拉旺多爾濟。和碩親王諾爾布扎布。親王品級郡王車布登扎布。多羅郡王桑齋多爾濟。德木楚克。多羅貝勒德木楚克扎布。達克丹多爾濟。厄魯特和碩親王羅布藏多爾濟。青海多羅郡王衮楚克達什。納罕達爾濟。回部郡王品級貝勒霍集斯。杜爾伯特鎮國公雙和爾等。至御座前。賜酒成禮。○是月。浙江提督李杰龍奏。溫州佃戶。藐法毆官。差中軍叅將先行馳赴該處辦理。批。此即應親往之事。何必差員。再如此推諉。必取罪矣。慎之。續奏。臣於二十八日。輕騎前往督緝。現在首犯已獲。民情寧謐。得旨覽。○署雲貴總督覺羅圖思德奏。請將

滇省安插之內外夷目一併改遷他省。則伊等離邊既遠。無土可歸。安心內地。各自謀生。可與齊民無異。得旨待朕徐酌。非刻不可緩之事。○是年。追予金川出師陣亡之署叅領多爾濟等七員。副叅領平保等六員。候補副將趙琮一員。二等侍衛達蘭泰等三員。佐領托進一員。叅將惠世溥等四員。遊擊沈涪等二員。都司左明德等七員。三等侍衛納松額等三員。土都司銜坤朋一員。藍翎侍衛穆克登保等二員。署閑散章京哲昆保等八員。防禦董邦起一員。雲騎尉沙爾呼達一員。守備馬進忠等十八員。驍騎校得保等四員。親軍校佛木丕一員。前鋒校平保等三員。副前鋒校福全等三員。護軍校喜住等三員。千總方士貴等五十員。署七品官科靈阿等二員。把總折雄等三十一員。外委張卓等三十九員。護軍披甲馬步兵二千二百六十七名。祭葬卹賞如例。俱入祀昭忠祠。○旌表孝子江蘇

等省江雲等十四名。孝女浙江等省張氏等二口。守節合例。八旗滿洲筆帖式塞隆阿繼妻烏雅氏等九十九口。蒙古護軍英住妻崔氏等十二口。漢軍教爾布管世貴妻李氏等八口。內務府鑲黃旗拜唐阿德明妻李氏等四口。奉天等處駐防閑散巴魯妻吳氏等六十五口。直隸等省民穆子蘭妻吳氏等四百五十九口。夫亡殉節江蘇等省生員李呂器妻魏氏等二十五口。未婚守志直隸等省袁進舉聘妻梁氏等二十四口。百歲壽民婦浙江等省金達先等十一名口。各給銀建坊如例。○一產三男。直隸等省劉祥妻聶氏等八家。○會計天下民穀數。各省通共大小男婦二萬六千八百二十三萬八千一百八十一名口。各省通共存倉米穀四千三十萬二千五百九十二石九斗四升八合五勺。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十三

實錄卷之二十三

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十四

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉春正月戊辰朔

實錄卷之二十四

上詣

奉先殿行禮○詣

堂子行禮○率王以下文武大臣詣

壽康宮慶賀

皇太后禮成御太和殿受朝作樂宣表如儀○

詣

大高殿

壽皇殿行禮○遣官祭

太廟後殿○御乾清宮賜皇子皇孫親王等宴○已

已。

上奉

皇太后幸重華宮侍宴。○諭。昨歲甘肅省夏秋二禾統計收成七分有餘。惟鞏蘭等二十九廳州縣夏禾被旱。又有被霜被雹之處。在通省雖僅一隅。而成災究覺稍重。屢經降旨。令該督切實查勘。妥協賑卹。貧民自可不致失所。第念今春正賑已畢。尚屆青黃不接之時。民食未免拮据。著加恩將鞏蘭金縣安定會

平糶米二十二石

寧鹽茶廳武威平番肅州八處各展賑一個月。又續報秋禾被災較重之鎮番中衛二縣並著一體展賑一個月。用敷春澤。其餘被災較輕之河州等二十一處。今春如有缺乏籽種口糧之戶。並著該督隨時體察。酌借以資接濟。該省係積歉之區。災黎尤堪廛念。勒爾謹務董率所屬。實心妥為料理。俾得均霑實惠。以副朕軫恤邊氓之至意。該部遵諭速行。○又諭。甘肅地處邊陲。民貧土瘠。一遇水旱

平糶米二十二石

偏災。即降旨蠲賑緩帶。殆無虛歲。民間節年所借籽種口糧等項。積欠甚多。曾於乾隆三十六年降旨加恩。將舊欠倉糧四百餘萬石。概行豁免。其舊欠各項銀兩一百三十餘萬。分作六年帶徵。以紓民力。嗣因該省歷年均。有偏災。復經節次加恩。分別展限徵收。俾得從容輸納。近年以來。僅完銀四十八萬餘兩。仍未完銀八十四萬餘兩。地方官以欠項定有年限。自應按數催徵。第念該省係積歉之區。上年夏禾又被旱災。民力實多疲乏。況每年均有應徵地丁籽種等項。若同時新舊並徵。輸將不無拮据。朕心深為軫念。乘春布澤。用沛恩膏。著加恩將該省自乾隆二十三年至三十五年。民借折色未完銀八十四萬餘兩。概予豁免。俾荒瘠邊黎得免追呼。共享昇平之福。該部即遵諭行。○諭軍機大臣等。本日富察善銘通奏到年終彙奏各摺七件。已逐一批示矣。此等彙奏之事。一交十二月。即

應陸續具奏。遲至年底。已屬非宜。何以該侍郎等。直至新正初二日。始行奏到。況奉天距京甚近。更非滇黔閩廣等遠省可比。何至遲滯若此。富察善銘通。俱著傳旨申飭。○庚午。上詣

皇太后宮問安。○諭據傳玉奏稱。此次由金川撤回黑龍江官兵。損壞弓矢鎗刀棉甲等項。應分析補造。所需工價銀兩。即於官兵俸餉內生扣。分年償還等語。從前軍營陣亡人等。損壞軍器。俱經施恩免其償還。撤回官兵所損軍器。其補造工價。俱著落官兵賠還。此次官兵所損軍器。雖應照上屆辦理。但此次官兵進勦金川。俱屬勇往奮勉。自應加恩。所有應行補製軍器棉甲等項工價銀兩。俱著加恩免其賠補。其刀箭所需鐵料。交該部官為辦給添補。再該省現有棉甲三千餘副。即有所需。足敷應用。無庸急為補製。○辛未。諭上年夏秋雨暘時若。京畿及各直省。俱獲豐收。

惟安徽泗洲等七州縣。秋禾間有因潦被災之處。江蘇安東等七州縣。瀕水窪地。亦畧有一隅偏災。業經降旨各該督撫。照例撫恤蠲賑兼施。貧民已可不致失所。第念東作將興。青黃不接。茅檐口食。未免拮据。著加恩將被災八分之泗州。盱眙縣及泗州衛。無論極次貧民。均各加賑一個月。俾資接濟。其餘無庸展賑各州縣。及泗盱三州縣衛。五七分災貧民。今春如有應行酌借籽種口糧牛具之處。並著該督撫察看情形。分別妥辦。務俾均霑實惠。以普開韶恩澤。該部即遵諭行。○壬申。上詣

雍和宮行禮。○癸酉。享

太廟。遣理郡王弘曉恭代行禮。○遣官祭

太歲之神。

上詣

皇太后宮問安。○御紫光閣。賜蒙古王公台吉及回部郡王等宴。○召大學士并成功將佐。

及內廷翰林等茶宴。以新正紫光閣賜宴聯句。○甲戌。

世祖章皇帝忌辰。遣官祭

孝陵。○乙亥。

上詣

大高殿行禮。○奉

皇太后居長春仙館。○詣

安佑宮行禮。○幸圓明園。○詣長春仙館問

皇太后安。○諭軍機大臣等。本日閏鶚元奏到

各摺。已逐一批示矣。內如甄別佐雜教職等事。俱係年終彙奏之件。一交十二月。即應陸續具奏。何以遲至新正。始行奏到。況安徽距京尚近。非邊遠省分可比。何至遲滯若此。再該撫所開甄別佐雜單內。有布經府經字樣。此係外省文移陋習。省字以圖簡便。尤非入告之體。豈該撫於陳奏事件。一任庸陋幕賓繕寫。不加檢閱耶。閏鶚元初任封疆。不應疎忽若此。並著傳旨申飭。○丙子。

上御閱武樓閱兵。命諸王。滿漢文武大臣。及朝正外藩蒙古王公台吉。並年班回部庫車三品阿奇木伯克。及哈薩克使臣金川土司等。從觀。是日。設帟帳於丹陛上。建纛於橋南海螺鹿角咸設。健銳營八旗火器營前鋒護軍漢軍官兵。皆按旗成列。屆時。饒歌大樂作。上升座。總理演兵王大臣等咸左右立侍。橋南左右列侍衛各六人。貫甲立馬以候。傳令官在其前。滿洲索倫蒙古善馭馬侍衛十六人。不環甲。按翼立侍衛後。

上命賜坐。王公大臣及蒙古王公台吉等與觀者。皆坐。迺奏鳴角。樓下蒙古畫角先鳴。各旗分列海螺以次遞鳴。司礮舉礮三。迺行陣。伐鼓鳴螺。整隊前進。鳴金止。一字成列。領隊甲士麾紅旗。鎗礮齊發。鳴金止。再伐鼓。整列並進。鳴金麾旗發鎗礮。如初。如是者三。第四進鎗礮連環齊發無間。鳴金三。迺止。開鹿角。藤牌兵出舞。畢。施放進步鎗。八旗齊鳴螺呼譟。

而進兩翼協隊乘馬斜向前進營中鳴螺迺振旅退為殿之八旗滿洲火器營礮位鳥鎗護軍驍騎及首隊前鋒護軍次隊驍騎各立本旗大纛下八旗分鹿角為八行火器軍結隊退首隊兵殿後兵以次鳴螺各列初成列之地禮成饒歌清樂作

上還圓明園行賞如例○奉

皇太后幸九洲清晏侍晚膳○丁丑

上詣長春仙館問

皇太后安○御山高水長賜蒙古王公台吉同部郡王等宴○諭曰贊禮郎扎郎阿於贊引時著照德明之例戴二品帽頂花翎○諭軍機大臣等據伊勒圖奏甘肅狄道州大佛寺喇嘛遜朗素等八人在歸化城同知處討取路引路經烏魯木齊該處大臣等並未查問換給路引請嗣後由該處大臣覈查換給同知給發路引之處永行禁止等語伊犁烏魯木齊均係新疆地方距哈薩克布魯特邊界

甚近此等化緣喇嘛行同乞丐如任其在新疆各處行走偶出邊卡至哈薩克布魯特地方殊多關礙非但不宜令往哈薩克布魯特地方即喀爾喀地方與俄羅斯境界相通亦不可令其前往此等喇嘛至烏魯木齊時想索諾木策凌因不在彼是以遺漏未行查辦永慶所司何事理宜查訊辦理乃聽其徑往伊犁殊屬不合永慶著嚴行申飭再該喇嘛係三十八年由本寺外出之人行至歸化城向該同知處討取前往伊犁烏魯木齊等處路引本非照例辦理之事該同知並未查覈又不稟明該管大臣甚屬糊塗不曉事體著將歸化城同知交巡撫巴延三查明參奏仍將此通諭陝甘總督山西巡撫劉新疆各處大臣烏里雅蘇台科布多等處將軍大臣等嗣後如內地喇嘛及實在商人出境駐劄該處大臣等查明准其換給路引遣往若此等化緣遊方行乞之喇嘛等務須嚴查實力

禁止毋許出口。○又諭曰。阿布賚使人鄂托爾齊等至京。告稱。阿布賚請將伊微貢之塔什罕三萬餘戶人丁獻納。經軍機大臣詢明具奏。從前四十年間。阿布賚遣鄂托爾齊至伊犁。欲將塔什罕地方進獻。伊勒圖知其意存微倖。曾經駁回。乃阿布賚意尚未息。此次復行呈請。殊屬無厭之至。上次鄂托爾齊所呈書內。因有屏逐伊等之語。朕是以降旨。署將軍索諾木策凌。令其曉示。但阿布賚素性多疑。近見大兵殲滅金川。恐乘勝辦理伊等。是以托詞探試。鄂托爾齊朝覲時。朕若不面加開諭。阿布賚疑懼不釋。著將開諭阿布賚諭旨。鈔寄伊勒圖。俟鄂托爾齊回至伊犁。令伊等帶回。傳諭阿布賚。看來彼不惟多疑。且其意向無定。伊勒圖惟當加意妥協辦理。以副朕撫綏遠人之意。將此諭令知之。○勅諭阿布賚曰。爾使鄂托爾齊等朝覲京師。呈爾所奏托特字表文。內稱爾願將數世微貢之

塔什罕三萬戶人丁獻納等語。所奏非是。前者爾使鄂托爾齊至伊犁。將此事呈請將軍。將軍知爾心存僥倖。剖晰情理。行文飭駁。奏到時。朕謂其所辦甚當。今爾使鄂托爾齊來京。復以此為請。則是爾僥倖之念。尚未止息。朕統一區宇。爾哈薩克。布魯特。霍罕。安集延。回衆。皆朕臣僕。朕一視同仁。毫無偏向。從前爾因爭塔什罕土地。向霍罕額爾德尼構兵。因遣都勒特克呼前來請援。經伊犁將軍飭駁。朕曾降旨宣示。爾今復以塔什罕為爾數世微貢之屬裔。欲納於朕。是爾從前無力爭奪。欲假天朝威力以取之耳。爾哈薩克與塔什罕。皆係朕之臣僕。豈肯為爾攻彼乎。況爾欲謀取塔什罕。即允所請。倘他部落中如有欲謀取爾哈薩克者。朕亦將允其請乎。汝惟知多方謀取塔什罕。以冀僥倖。而並未實計其利害。殊屬非是。阿布賚。汝奉朕此諭。惟宜善自保守游牧。結好鄰邦。以期永荷朕恩。斷

不可妄生覬覦。構禍鄰國也。再爾使鄂托爾齊所呈表文。內稱哈薩克阿澤。曾言經內有云。白帽之人屏逐默克。哈薩克布魯特等。深懼斯言。情願永為臣妾。惟期不為屏逐等語。斯言甚屬怪異。不知從何而起。諒必因我兵新滅金川。前此將軍伊勒圖。曾遣回爾使。恐我兵乘勝。併將哈薩克辦理。是以假借經文。託詞嘗試。則是爾未知朕撫綏之意。而妄自疑懼矣。夫天朝之於外番。恭順則撫恤之。鵠

張則討滅之。邇來大小金川。負朕厚恩。恣意侵鄰。遂加天討。乃不知警懼。復敢抗拒王師。始命將出師。殄滅小醜耳。今爾哈薩克歸順已久。朕方加惠撫恤。豈肯無故即加屏逐。且屏逐爾等。空其土地。將復畀之何人。朕已諭將軍傳諭爾等。然非朕親諭。不足以釋汝之疑。朕故特降諭旨發往。阿布賚。惟期永荷朕恩。恭順是効。毋得妄行億逆。以自速禍也。特諭。○戊寅。

上還宮。○是日起
上以祈穀於

上帝。齋戒三日。○己卯。河東河道總督姚立德奏。泰充一帶。春雪融化。泉源旺盛。各湖收水數餘。足濟運務。麥苗亦旺。可期豐稔。得旨。欣慰覽之。○庚辰。

上詣

南郊齋宮齋宿。○辛巳。祈穀於

上帝。

上親詣行禮。○幸圓明園。○以

皇太后聖躬不豫。詣長春仙館問安。○奉

皇太后幸同樂園侍晚膳。○御奉三無私殿。賜

皇子皇孫諸王等宴。○江西南贛鎮總兵吳淪

元奏查驗營伍。親標四營及南安永鎮永新興

國橫岡各營。陣勢整齊。弓力足勁。騎射刀牌。

均各熟練。鎗靶準頭。亦屬優長。其吉安袁州。

龍泉萬安寧都羊角六營。稍次之。文英臨江。

永豐三營。又次之。當經分別獎賞責懲。仍嚴

加訓飭。勒限令其演練純熟。得旨。諸凡實力為之。毋為空言。○壬午。

上詣

安佑宮行禮。○詣長春仙館問

皇太后安。○御正大光明殿。賜朝正外藩等宴。

名科爾沁和碩卓哩克圖親王恭格喇布坦。

和碩達爾漢親王旺扎勒多爾濟。多羅扎薩

克圖郡王納旺色布騰。多羅貝勒古穆扎布。

喀喇沁多羅郡王喇特納錫第。固山貝子多

羅額駙瑚圖靈阿。扎拉豐阿。奈曼多羅達爾

漢郡王拉旺喇布坦。阿巴噶多羅郡王鼐布

坦。常忠。敖漢多羅郡王巴勒丹。固山貝子固

山額駙羅布藏錫喇布。垂濟扎勒。輔國公多

羅額駙桑濟扎勒。蘇尼特多羅貝勒恭桑扎

勒。烏珠穆沁多羅額爾德尼貝勒達什衮布。

阿巴哈納爾多羅貝勒車登扎布。鄂爾多斯

多羅貝勒棟囉布色梭。喀爾喀和碩親王固

倫額駙拉旺多爾濟。和碩親王諾爾布扎布。

親王品級郡王車布登扎布。多羅郡王桑齋。多爾濟。德木楚克。多羅貝勒德木楚克扎布。達克丹多爾濟。厄魯特和碩親王和碩額駙羅布藏多爾濟。青海多羅郡王衮楚克達什。納罕達爾濟。回部郡王品級貝勒霍集斯。杜爾伯特鎮國公雙和爾。明正土司宣慰使甲爾叅德沁。木坪土司宣慰使甲爾叅納木卡。瓦寺土司宣慰使策楞雍中。孔撒土司安撫使策丹納木扎勒。綽窩土司安撫使朋楚克喇布坦。裏塘土司宣撫使丹津衮布。巴塘土司宣撫使衮布嘉木沁。拉林楚木長官司巴爾傑策爾丹等。至御座前。賜酒成禮。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十四

實錄卷之一千二十四

六

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十五

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉正月癸未

實錄卷之一千二十五

二

上詣長春仙館問

皇太后安○御正大光明殿賜大學士尚書等

宴○諭朕於二月初三日御經筵所有應行

事宜各該衙門照例豫備○甲申

上詣長春仙館問

皇太后安○諭軍機大臣等本日鐘音奏到各

摺已逐一批示矣內如甄別佐雜教職等事

俱係年終彙奏之件一交十二月即應陸續

具奏何以遲至此時始行奏到況福建距京

尚非遙遠省分可比。不應遲滯。乃爾。鐘音著傳旨申飭。○又諭。據長清奏提臣海祿已於十二月二十四日抵張鳳街。自應遵旨起程赴任。緣孟矣等蒙恩放回。因與圖思德商酌。先令孟矣波一出口。備細開導遣行。其秤官猛。暫羈張鳳大營。俟有信息。續行遣去。再知孟矣等到老官屯。即日送下阿瓦。計回信約需時日。擬暫駐張鳳街。與海祿同籌辦理。如緬子等有信息前來。以便相機妥辦等語。所奏是。已於摺內批示矣。長清所調新任。並無急須應辦之事。而得魯蘊前曾差人具稟。今孟矣又往阿瓦。緬匪此時必有一番計議。送信。長清在滇已久。緬匪素知其名。其與提督文稟。自止知長清。而不知海祿。就現在情形而論。長清竟以留駐張鳳街。籌辦此事為安。即發往文檄。仍當用長清雲南提督舊銜。海祿之銜。暫且無庸並列。外夷性多疑懼。止認熟人。若見內地遽易提督。彼必驚猜。以為別

有舉動。且俟現在之局。辦有就緒。長清再行奏聞。前赴古北口新任。亦未為晚。至得魯蘊前稟所云。願送還拘留內地之人。輸誠貢象。如果出於誠心。悉如所言。還人納貢。從此完局。自屬甚好。但恐該提督等。各存將就了事之見。或潛遣人招誘。致為賊匪所輕。則大不可。總之賊匪狡獪異常。儻窺見內地有欲圖遷就端倪。彼必以為奇貨可居。轉多羈阻。若見提督等不以為事。處之淡然。而彼或蓄有真誠。自必急切懇籲。欲冀俯納。便可相機妥辦。中國撫馭外夷之道。大率如此。該督撫等不可不知。前已將此意詳諭。該提督自當善體此意。不致舛誤也。又去冬據圖思德奏。探聞惜駁已故。及關外信息。並續奏得魯蘊遣人投稟。還人具貢兩摺。節經諭令該署督。斟酌妥計而行。兩次諭旨。俱係十二月初四日發往。距今已四十餘日。何以尚未覆奏。著傳諭圖思德。即將前兩次發往之旨。及此次之

旨。一并奏覆。勿再遲緩。至現在緬匪有無信息。誠偽若何。並著圖思德。長清。即由驛速奏。此旨著六百里發往。並諭令海祿知之。○軍機大臣等議覆。烏魯木齊都統索諾木策凌奏。稱願往口外墾地。民人六百四十二戶。查阜康縣近城。又瑪納斯。呼圖壁等處。地廣泉多。足資居住。請交地方官度地分授。所有各戶例借建屋銀兩。即交地方官同該營豫為建造。毋妨農作。其例給馬匹。於滿漢各營酌撥散給。仍行文伊犁等處。購解歸額。應如所請。至該戶民所需口糧農具。並飭該地方官豫備發給。毋致短少。從之。○大學士管兩江總督高晉。江南河道總督薩載。覆奏陶莊引河。冰凌漸解。第春水未生。溜勢綿緩。查每年桃汛。總在二月發生。今年立春較早。臣等豫行諏吉。擇正月二十五。二月初六。初十。十五等日。會籌相機開放。以期成功。得旨嘉獎。○乙酉。

上詣長春仙館。問

皇太后安。○諭。緬甸自徹兵以來。已經八載。每歲沿邊派人駐守。究屬不成事體。而其地水土惡劣。朕意又不欲用兵。惟嚴令各關隘絕其貿易。稍足使之畏懼耳。但向來雖有禁遏之名。仍恐具文塞責。徒爾因循歲月。總未能完此事之局。原擬令阿桂為雲貴總督。前往經理邊務。其事庶可早竣。茲據圖思德奏。聞得緬首惜駁已死。其子贅角牙襲職。前據該處頭目得魯蘊具稟。鎮將等稱。情願送還內地之人。輸誠納貢。懇請開關。隨遣諭來人。先回。俟其到關再定。今據張鳳銜辦事之騰越州知州吳楷稟稱。派送孟矣等出口之擺夷。南多木比等回關。據稱孟矣等至老官屯。向該頭目綻拉機。稱揚大皇帝威德。嚴重。及地方廣大富庶光景。該頭目甚為感畏。孟矣等即日登舟赴阿瓦。聞得魯蘊現在阿瓦料理貢物。并將蘇爾相。多朝相。接往阿瓦。要同楊

重英俱從天馬關送還內地。并欲親自到關。叩懇納貢等語。緬匪果知悔罪投誠。還人納貢。自可就此完事。但受降通市。及善後章程。必須曉事之重臣。相度妥辦。方能合機宜而符體制。著阿桂。即速馳驛前往雲南。辦理受降諸事。完竣。即行回京。至開關以後。沿邊一切事宜。均關緊要。非圖思德所能經理。所有雲貴總督員缺。著李侍堯調補。兩廣總督員缺。著楊景素補授。山東巡撫員缺。著郝碩補授。圖思德著回貴州巡撫之任。裴宗錫著回雲南巡撫之任。郝碩現在四川辦理軍需奏銷之事。尚未能即赴新任。所有山東巡撫印務。著國泰暫行護理。○諭軍機大臣等。據圖思德奏。聞得魯蘊在阿瓦辦貢。將蘇爾相。多朝相。接往阿瓦。要同楊重英。俱從天馬關送還內地。并欲親自到關。叩懇納貢等語。果爾。即可就此完局。但受降諸事。必得重臣經理。而善後事宜。均關緊要。亦非圖思德所能辦。

已降旨派阿桂。前往雲南。經理其事。所有雲貴總督員缺。將李侍堯調補矣。阿桂日內即起程。馳驛赴雲南。行程甚速。李侍堯接奉此旨後。亦即束裝。馳驛迅往雲南。其兩廣總督印務。即著李質穎暫行署理。阿桂及李侍堯未到雲南之前。緬匪或另有文稟。或得魯蘊親自到關。圖思德務須相機妥辦。諭以大皇帝現差協辦大學士阿公到後。即可定局。至前諭有得魯蘊如親自到關。諭令親身進京朝見之語。係就彼時情形而言。今緬匪既情願還人納貢。即可完局。又無庸令該頭目進京。致使懷疑生畏。圖思德又不可拘泥前旨。致有舛誤。至此時。圖思德如有奏摺。已諭令阿桂沿途遇見。即行拆閱。如有應辦緊要機宜。即一面奏聞。一面行知。圖思德遵照。圖思德務須妥協為之。俟李侍堯到滇交代後。再赴貴州巡撫之任。雲貴總督現在辦理此事。為最要之缺。各省總督老成有識。能辦大事。

實無出李侍堯之右者。是以將伊調補。李侍堯到滇。將諸事妥為經理。至開關通市以後。所有內地民人出口。定數稽查。及嚴禁沿邊百姓。不許前往茂隆廠生理諸事。已詳悉面諭阿桂。李侍堯先見阿桂時。即可問明。一切妥商為之。既定章程。阿桂即可回京。而實力永久查辦。則惟李侍堯是賴。楊景素接奉此旨。將印務交國泰護理。即起程來京請訓。再赴新任。至裴宗錫前在滇撫任內。辦理銅廠鹽務諸事。最為盡心。是以將伊調任。裴宗錫俟圖思德到黔後。即赴雲南新任。諸事仍須妥協辦理。所有雲貴廣東。俱著由六百里加緊發往。山東。由四百里發往。○丙戌。

上詣長春仙館問

皇太后安。○諭曰。阿桂現在前往雲南。辦理受降諸事。著給與欽差大臣關防。○諭軍機大臣曰。圖思德於地方民事。尚可承辦無誤。至於邊務夷情。茫無主見。不能得事之要領。即

實錄卷一百二十五

下

實錄卷一百二十五

九

如秤官猛等到滇後。圖思德概行交送長清處。經長清以秤官猛係苗溫所遣。與老官屯另是一路。將其暫羈張鳳街大營。先令孟奚波一出口。隨即具摺奏聞。如此分別料理。自屬正辦。然尚係長清之意。圖思德即未能見及於此。乃接到長清回札。因其將秤官猛暫留。復奏稱於南多木比等回關之日。即札知長清遣其出口。此又圖思德不曉事之處。秤官猛係木邦苗溫所屬。即遣其回。亦未必前往阿瓦。與得魯蘊辦貢還人之事。毫無干涉。何必急急遣往。如長清接到圖思德回札。已遣秤官猛出口。即無庸另辦。若秤官猛尚未起程。仍將伊暫留張鳳街。俟阿桂到滇時。再行酌定辦理。將此由六百里加緊。諭知圖思德。長清並令海祿知之。○以陝西按察使孫含中為浙江布政使。○丁亥。

上詣長春仙館問

皇太后安。○山東巡撫楊景素奏。汶上縣境宋

家窪。坡水匯聚。有礙民田。向有順隄引渠。自牛鼻潭入趙王河。經新挑河。牛頭河。達南陽昭陽二湖。年久淤墊。今議逐加挑挖。又黃姑閘。金門狹窄。應挑月河一道。牛鼻潭渠頭亦須接挑。再挑支河二道。作吸川之勢。使窪底水盡引入渠。其趙王河合流處。恐有頂阻。應於白家橋下。另開支河。俾渠水直達鄭家橋。入河歸湖。現據汶上。嘉祥。濟寧。三州縣民呈請。各出夫力挑修。恐間有口食不足之戶。請

令該州縣。覈算夫數。擬每夫借給倉穀三斗。計需穀二千九百餘石。秋後免息還倉。批。竟當給與。不必令還。又奏。窪水引歸南陽。昭陽二湖。仍可歸入微山湖濟運。與下游有益無損。得旨嘉獎。○以陝西督糧道王時薰為陝西按察使。○戊子。

上詣長春仙館。問

皇太后安。○諭。昨因簡放陝西按察使員缺。檢閱各省督撫所奏屬員賢否單。其陝甘兩省

進到之單。未將王時薰列入。查其單。係吳達善任內所奏。而勒爾謹單沅。到任並未據續奏。府道以上賢否名單。殊不可解。王時薰近因卓異送部引見。知其任陝西歷官已久。並於請訓時。詢問所及。奏對頗為明晰。看其入亦去得。是以密記擢用。若僅憑督撫奏單。不幾遺漏乎。朕令各省督撫。體察屬員賢否。開單密奏。原以備陞調時之考覈。兼可察督撫等之注考。是否平允。今勒爾謹單沅。在任俱

已數年。於屬員賢否。早應深悉。乃竟未列單具奏一次。殊屬不合。勒爾謹單沅。俱著飭行。並著勒爾謹單沅。將陝甘兩省所屬府道以上各員。加具切實考語。開單密奏。至其餘各省。恐亦有似此者。並著遵照此旨辦理。將此通諭各督撫知之。○諭軍機大臣等。據舒常等奏。查拏裏塘。已塘一帶。夾壩賊犯。格戎七立等十三名。審擬分別斬決發遣一摺。已批交三法司覈擬速奏矣。裏塘一帶。為通藏大

路。各番等敢於搶劫塘馬。及過路行人衣物。實屬大干法紀。自應追捕盡獲。從重辦理。方足以示懲儆。現據奏將所獲之犯。嚴行鞠訊。其為首之犯。即行斬梟。濟惡之犯。亦即斬決。所辦尚是。此案夾壩各犯。惟安錯一犯。尚未弋獲。亦當上緊緝拏。勿使漏網。至裏塘巴塘兩土司。現俱在京。已令軍機大臣曉諭。伊等屬下。派出土兵。隨同官兵。協拏脫逃各犯。頗為出力。即賞給緞匹示獎。并諭以夾壩兩次搶劫。係裏塘之濫泥壩。大海子二處。巴塘之黑漆溝地方。皆兩土司所轄。今犯已就獲。姑免深求。嗣後當嚴行約束。屬下番人。不使復有夾壩之事。設再有犯者。該土司即速查明。獲犯縛獻。方不負大皇帝恩德。伊等咸叩頭感悅。將此諭令舒常。文綬等知之。○成都將軍明亮奏。駐防清字事件。向有章京繕辦。但現在統轄沿邊州縣營汛。所有設鎮開屯。夷務邊情。稟報批發。皆用漢字。分別咨行文稿。

所關緊要。該章京難期勝任。請會同督臣。於川省分發人員。擇文理明通。行走勤慎者。遴選兩員。赴將軍衙門効用。以資辦公。從之。○署成都將軍副都統舒常等奏。種地降番。上年賞給籽種口糧。奏明在案。茲查各番戶收獲雜糧。或收石餘。或僅數斗。緣番境久荒。耕屯伊始。未能一律收成。所獲有限。又須留來年籽種。若將口糧概行停支。窮番口食無資。請將不敷口食之戶。分別酌借口糧。以資耕作。俟春收。准其以麥抵還。報聞。○己丑上詣長春仙館。問皇太后安二次。○諭曰。阿桂現在出差。所有協辦大學士事務。著英廉暫行署理。○刑部議奏。定擬辦理秦廷基一案。捏報袒護之已革布政使蘇爾德。按察使廣德。署按察使周升桓等罪名。諭此案秦廷基袒護屬員。稟懇總督求免。問擬斬罪。實所應得。然覈其情節。尚較康坦獄之換犯教供。營私作弊者。稍覺有

間。使照例解京辦理。朝審時尚不至予勾。或數年後。發往新疆効力。并不至久繫囹圄。乃不將伊即行收禁。致令在寓自戕。黃邦寧復敢移屍獄中。捏報病故。實出情理之外。若非吳虎炳據實叅奏。則上下相朦。伊於何底。然吳虎炳亦因李侍堯近在東省。恐其覺察。自干罪戾。不得不和盤托出耳。總由粵西官官相護惡習。錮蔽已久。為天理所不容。故爾盡行敗露。實皆若輩之自罹法網。其黃邦寧一犯尤屬罪無可逭。業於勾到時。明正典刑。至原署臬司之周升桓。藩司蘇爾德。臬司廣德。均有應得之罪。並拏解來京。併提熊學鵬到京。交刑部一併質訊。今據刑部審明定擬具奏。朕披閱供情。詳加覈定。當秦廷基結案時。周升桓正署臬司。豈不知該犯問擬重罪。理應即行收監。乃托辭熊學鵬未將奏稿行知。又未飭令收禁。此等荒詞。豈能卸罪。刑部擬以發往軍臺効力。自屬允當。即著照所擬行。

至熊學鵬。審擬秦廷基恐擬以輕罪。不能逃朕洞鑒。故不敢不將該犯擬斬。而秦廷基在省。未經收禁。並非不知。故作朦朧。不為查察。是其定讞雖似執法。而於該犯仍不免徇情。熊學鵬亦無可置辯。但已經革職查產。足蔽厥辜。熊學鵬著仍往四川。辦理軍需奏銷。以觀後效。至蘇爾德廣德。俱係滿洲世僕。尤當實心辦公。且蘇爾德曾任巡撫。後因獲罪罷斥。復經棄瑕錄用。用為藩司。自應屏絕情面。以圖報効。當黃邦寧因秦廷基在寓自縊赴署面商。伊護理巡撫。卸事未久。若能持正阻止。黃邦寧必不敢徑行作弊。其移屍之意。倡自何人。黃邦寧已死。無可對質。但蘇爾德明知黃邦寧欲行掩飾彌縫。聽從弊混。與誘人犯法何異。即立置重辟。尚復何辭。廣德身任臬司。秦廷基定罪時。廣德既以為定擬過重。向熊學鵬爭執不從。臬司原有奏事之責。何妨就已見陳奏。候朕裁奪。乃在外惟以辯論

沽名而在朕前。又不敢據實入告。已屬不堪。及兩次傳旨詢問。復敢巧詞隱飾。意涉欺罔。照律斬決。亦無可貸。但朕臨御至今。從不肯輒興大獄。從前如錢度貪婪敗檢之案。尚不欲稍有株連。況此案康坦。獄黃邦寧二犯。已經勾決。蘇爾德、廣德無庸。即予駢誅。均著從寬。改為應斬監候。秋後處決。餘依議。朕辦理刑獄。從不豫設成心。輕重悉視其人之自取。至外省吏治。袒護徇私。皆所不免。今就已破

卷一百一十五

之案。懲一儆百。各省督撫司道。俱當倍加警惕。勿負朕諄切告誡之意。將此通諭知之。○諭軍機大臣等。前據圖思德奏。聞得魯蘊現在阿瓦料理貢物。并將蘇爾相多朝相接往阿瓦。要同楊重英俱從天馬關送還內地。并欲親自到關叩懇納貢等語。已令阿桂馳驛前往雲南。經理受降諸事。又調李侍堯為雲貴總督。並將籌辦機宜。詳諭圖思德矣。計此時得魯蘊或已辦貢投誠。並將楊重英、蘇爾

相等送還內地。亦未可定。到時圖思德即可收受。差人送京。此等送回之人。恐其心生畏懼。其實蘇爾相原係彰寶派往老官屯投遞檄文。致被拘留。伊本屬無罪。即楊重英亦係木邦失事之後。被賊裹去。拘留緬地最久。勢亦處於無可如何。其罪亦不至於死。圖思德可派委妥員。伴送來京。不必加以鎖押。惟沿途宜留心防範。勿稍疎虞。致令自戕。轉屬不成事體。所有楊重英家產已經盡抄。其妻子現在監禁。及蘇爾相妻子已經發遣之處。皆不可令伊等聞知。致使驚惶。至其餘送回之人。如有官員在內。自應解京。若文職巡檢典史武職千總把總。俱無庸解京。但此等人員斷無仍令列名仕版之理。即當令其各回原籍。其送回兵丁等。如有八旗之人。亦一并送京。若係綠旗兵。均不必解京。但亦不便仍令食糧。自當查明各原籍。發回安插。令各安分謀生。圖思德辦理此事。務須分別妥辦。其伴

卷一百一十五

送楊重英等。尤須選委妥員。途中防閑周密。毋稍疎忽。致干咎戾。將此由六百里加緊。諭令圖思德。並諭阿桂。李侍堯。知之。○吏部議奏。向例同知以下官。因公來京。告病回籍者。取具同鄉官印結。委司坊官驗實。准其回籍。暫停開缺。俟行查任所督撫。有無未清。及規避情弊。文到開缺。原以杜規避串通之弊。但既據呈驗實。准其回籍。行查如有前項情弊。無難即予處分。自不必俟查覆到部。始行開缺。致原缺久乏正員。公務易至廢弛。請嗣後驗准回籍。即行開缺。從之。○戶部議覆廣西布政使孫士毅奏。稱粵西官荒地土。向未查明定界。開墾後。居民彼此互爭。甚至有械鬪匿匪等弊。應如所請。飭各州縣。親身會勘。或建石碑。挖壕塹。使疆界分明。并取圖結存案。如仍有爭控。即將經管官叅處。應咨吏部酌定處分。從之。○庚寅子刻。

皇太后疾大漸。

上至長春仙館問侍。丑刻。

崇慶慈宣康惠敦和裕壽純禧恭懿安祺寧豫

皇太后崩。

上哀痛號呼。擗踊無數。摘冠纓。易素服。命備黃

輿。恭奉

大行皇太后還宮。

上哭無停聲。先詣

壽康宮東配殿祇奠。辰刻。

大行皇太后黃輿至

慈寧宮。

上翦髮。服縞素。跪迎於永康左門外。親扶安奉

大行皇太后於

慈寧宮正殿。禮部奏奉升

梓宮吉時。豫陳儀駕。張幕設供。屆時。

大行皇太后大殮。一切儀服隆備。盡禮盡誠。

上痛哭失聲。擗踊不已。既殮。行奠獻禮。脩食如

視膳時。

妃嬪及皇子皇孫等。皆成服。親王以下有頂

帶官員以上。公主。福晉以下。侍衛佐領等妻以上。並內務府佐領。拜唐阿等男婦。皆齊集成服舉哀。○自中夜迄日暮。

上哀慟深切。水漿不御。羣臣環跪。懇

上節哀。

上悲不自勝。左右皆感泣。莫忍仰視。○以含清

齋為倚廬。席地寢苦。王公大臣懇請還宮。

上不允。朝夕詣

梓宮前供奠。日凡三。自是日至啟奠前。有常禮。

哭必極哀。○是日丑刻奉

大行皇太后遺誥曰。予以薄德。祇膺

昊蒼眷佑。

列聖篤祥。誕育帝躬。丕紹

鴻緒。今皇帝秉性仁孝。承歡養志。克敬克誠。視

膳問安。晨夕靡間。每當巡幸所至。必披輦同

行。親見億兆呼嵩。尊親並篤。合萬國歡。以天

下養。信可謂之兼備矣。且木蘭秋獮前期。必

奉子幸避暑山莊。以協夏清之理。新正御園

慶節。必奉子駐長春仙館。以愜宴賞之情。至

凡遇萬壽大慶。必躬自起舞。以申愛敬。每當

宮庭侍宴。必親製詩畫。以博欣愉。子因益怡

樂康強。頤和晚景。又見皇帝神武懋昭。廟謨

廣運。平定準夷。回部。廣拓幅員。而近年征勦

兩金川。宵旰焦勞。運籌五載。大功幸得告成。

皇帝之心始寬。予懷亦因以大慰。方謂際茲

海宇乂寧。豐登迭奏。予更得長延景福。葆養

天和。惟念年齒日高。未免桑榆景迫。深惕於

衷。猶幸體氣素強。精神未耗。期頤或可漸臻。

皇帝每見予康健如常。喜形於色。詎意昨者

偶遘寒疾。寢至沉疴。皇帝侍藥問安。憂心時

切。日叩

天神保佑。祈子速就痊可。予亦思調理向愈。以

安皇帝之心。不期延至二十三日丑時。大數

垂盡。遂至彌留。子壽已八十有六。母儀尊養。

四十二年。因集勛歸美。而三晉徽稱。遇萬壽

祝釐。而三舉慶典。中外一統。五世同堂。稽之

史冊實罕倫比。今予福壽考終。夫復何憾。惟念皇帝孝思肫篤。久侍膝下。孺慕終身。今大故忽嬰。慮必過於悲痛。宜勉自節哀。勿致稍毀。惟當以國事為重。中外文武羣臣。恪恭奉職。共襄郅治。予靈與庶少安焉。其喪制悉遵典禮。皇帝持服。當依以日易月之制。二十七日而除。

天。

地。

宗廟。

社稷之祭。不可久疎。百神羣祀。亦不可輟。故茲誥諭。其各遵行。○諭朕蒙

聖母皇太后。鞠育恩慈。情深罔極。臨御四十二年。承

歡奉養。深荷

慈愉。且見

聖母動履康強。不煩扶掖。私心慶慰。第

壽日益高。萬年豈真可祝。欣喜之餘。并不敢存

孔子一則以懼之想。惟有誠祈

天佑。益算延祺。而朕躬愛日之惓惓。實無能一刻稍置。今春恭奉

皇太后幸御園。初九日。於九洲清宴。侍

膳觀燈。五世一堂。同伸歡忭。是日

慈顏康豫。不減常年。朕方慶幸。以望七之齡。得侍

望九聖母。實從來史冊所未有。十一日。進宮齋戒。十四日。

祈穀禮成。回御園請

安。知

聖母偶爾違和。旋進參藥調治。體亦稍安。不意

疾尋反復。

聖母猶不欲令朕知

慈躬病劇。恐朕憂煩。然勢日以增。急難平復。朕

昨兩次詣

寢宮問

安。

聖母言笑如常。惟氣力稍覺疲倦。

諭朕云。願養數日。可即就痊。朕亦冀可克副

慈諭。詎意將及夜分。痰忽上湧。遂至大漸。遽於

二十三日丑時

仙馭升遐。奄棄朕躬。一何迅速。昨日未時請

安以後。竟無由再仰

懿顏。呼天搶地。痛何能極。朕嘗命皇六子推測

算法云。乾隆五十一年。六十年。皆正旦日食。

朕私計以五十一年丙午。

皇太后春秋已九十有五。朕年亦七十有六。是

歲或遇

聖母大事。雖未滿百歲。而已屆期。且係人生

必有之事。庶稍無憾。其六十年乙卯。則係朕

當歸政之年。均可以應懸象。孰意距丙午尚

十年。

皇太后忽爾賓天。竟不能遂朕之願。則朕將來

歸政。亦恐難如奢望。此究係朕心不誠。未能

仰邀

天鑒。今呼號無及。哀痛之外。更復何言。至於孝
服日期。

皇太后遺誥。令朕止穿孝二十七日。然追憶雍

正十三年。遭

皇考大故。朕欲持服三年。因奉

聖母慈諭。止令穿孝百日。朕即遵從。今值

皇太后之事。朕仍當依

前諭。穿孝百日。其餘王公大臣官員等。並照例

二十七日而除。所有

大喪禮儀。著派皇四子永璘。皇六子永瑤。莊親

王永璘。協辦大學士尚書英廉。尚書永貴。署

尚書邁拉遜。侍郎金簡。管理。其一切應行事

宜。並著詳稽舊典。悉心覈議。隨時具奏。至於

聖母慈愛朕躬。每

諭朕勿過憂勞。惟當以國事為重。今朕遭此大

故。雖不能節哀。亦不敢過毀。至國事所繫。惟

當益勉孜孜。朝乾夕惕。以副天下臣民之望。

以慰

聖母在天之靈。將此通諭中外知之。○又諭閑散宗室覺羅等。俱著穿孝。○又諭蒙古王公台吉等。現今在京者。俱著穿孝。○又諭現遇大行皇太后大故。其年班及木蘭應來之內扎薩克喀爾喀杜爾伯特烏梁海土爾扈特和碩特等蒙古王公額駙台吉回子伯克及一切人等。今年明年俱著停止前來。該部院即遵諭行。○諭軍機大臣等。前令楊景素來京請訓。再赴兩廣總督之任。今

皇太后升遐。猝遭大故。朕心哀痛。伊即到京。朕亦不能召見訓示一切。爾等可傳諭楊景素。此時竟不必來京。徑赴兩廣總督之任。俟今年冬底。伊於該處吏治民情。漸可熟悉。再行奏聞。朕見。○軍機大臣等議奏。禮部所奏儀注。內有姻戚大臣之妻一語。奉諭。

皇太后係天下

聖母。即屬親族。亦不得以姻親為詞。實為至當。請將儀注內姻戚字刪去。此項人等。均令一

體穿孝二十七日。報聞。○又奏附近

坤寧宮等處太監。俱不必摘冠纓。祇穿素服。其餘各宮太監。俱穿孝服。准出入內右門。及隆宗門。景運門。行走。但不准由乾清門經過。報聞。○辛卯。命大學士九卿議。恭上

大行皇太后尊謚。諭曰。

大行皇太后。坤元協德。懋著徽音。四十二年。母儀天下。尊養兼隆。福德備至。實古今史冊所未有。今忽遭

仙馭升遐。朕心哀痛。不能稍釋。敬稽典禮。宜隆謚號。以表尊崇。第

至德難名。實非臣下擬議所能切當。朕欲親尊為

孝聖憲皇后。其令大學士。九卿。公議可否如是。所有節次。晉加

徽號。其中或有按例應行酌減。及應增加字樣。仍著敬謹詳議具奏。○又諭朕自登極以來。即尊養

皇太后於暢春園。迄今四十二年。視膳問安。承

歡介景。所以奉

懿娛而盡愛敬。為時最久。今奄遭大故。遵例於慈寧宮辦理喪儀。痛深罔極。因念奉安

梓宮於

陵寢地宮。諏吉鳩工。尚需時日。稽諸舊典。理宜殯宮移奉。以展哀誠。與其另擇暫安奉殿。自不若暢春園為

皇太后頤和娛志之地。

神御所安。最為妥適。業於

九經三事殿。易蓋黃瓦。敬設

几筵。謹蠲本月二十九日。舉行奉移禮。所有應行事宜。各該衙門。即速敬謹豫備。○又諭曰。

泰東陵為

皇太后萬年吉地。典禮綦重。著派誠郡王弘暢。侍郎劉浩。前往敬謹辦理。○又諭。現在禮部辦理喪儀。關係重大。尚書永貴。年逾七旬。經

理未能周到。著派豐昇額兼管。○命普免天下錢糧。諭前因

聖母萬壽。特宏錫類之仁。普蠲各省錢糧。以昭慶惠。朕本欲俟恭祝

聖母九旬萬壽之年。再溥

恩施一次。茲者

仙馭升遐。此後更無可推廣

慈仁之處。現在部庫帑項。又積至七千餘萬。著再加恩。自戊戌年為始。普蠲天下錢糧。仍分

三年輪免。俾寰宇億兆人民。仍得共被

慈恩。永申哀慕。而朕終天罔極之忱。雖不能仰

酬萬一。庶幾藉茲稍展。其如何輪派年分。著

戶部即速悉心覈奏遵行。○又諭曰。旺沁班

巴爾。曾經降旨指婚。定於本年冬下嫁。今遇

大行皇太后大故。宮中格格與眾格格不同。應

俟二十七月後下嫁。即鄂勒哲特穆爾額爾

克已拜。豐紳濟倫。皆公主之子。亦應俟二十

七月後完婚。○飭禁各省進貢。諭軍機大臣

曰。向來各督撫鹽政。關差織造等。於年節慶典。每備物呈進。雖屢經飭禁。而諸臣仍有再三懇請。以盡悃忱者。朕亦難以固拒。因閱收一二。以備賞賚之用。今奄遭

皇太后大事。五中摧絕。哀痛難窮。永無奉侍承歡之日。即遇佳時令節。方觸景傷情。彌增悲慟。豈復能行慶宴賞。著傳諭各督撫鹽政等。今年概不許呈進貢品。如或不遵。以違制論。其各仰體朕意。恪奉母違。○和碩顯親王蘊著

大學士舒赫德。率同宗室王公。滿漢文武大臣等。奏懇稍節哀情。暫請還居養心殿。得旨。知道了。朕心不忍移居。且過明日再定。○和碩顯親王蘊著大學士舒赫德。率同宗室王公。滿漢文武大臣等。再奏。恭閱

實錄

世宗憲皇帝居

仁壽皇太后喪。因念

宗廟

社稷之重。曾在宮內。居喪齋次。今日天氣甚寒。皇上既因哀毀彌至。偶患頭痛。若再居喪次。實非所以仰體

皇太后在天慈愛之心。禮記所稱七十處於內者。原以倚廬。非高年所宜。

皇上春秋已高。宜循禮經。以協正理。謹合詞懇誠。再懇得旨。朕猝遭

聖母大故。哀痛方深。實不忍移居宮內。今王公大臣等援據典禮。再三懇籲。勉從所請。於今

日

午奠後。暫居養心殿。○還居養心殿。○壬辰

上詣

大行皇太后梓宮前。行殷奠禮。陳

大行皇太后冠服於几筵。儀駕全設。王以下百

官齊集。屆時。

上舉哀。視饌。讀文致祭。成禮而退。○定二十七

日內。大祀朝服用樂之制。諭。昨據禮部奏

大行皇太后喪儀。二十七日之內。所有

社稷壇等祭祀。援照雍正九年

孝敬憲皇后喪儀。素服致祭。樂設而不作等因。

朕以

郊

廟大祀。典禮綦重。似不應因大喪而稍畧其禮。

因命軍機大臣查明具奏。茲據奏稱。會典所

載康熙年間

列后之事。遇大祀典。祭日即穿朝服作樂。禮部

此奏。未將遠年舊例細查。僅引雍正九年。乾

隆十三年。近年之例。所辦原未周到。今公同

酌議。二十七日之內。如遇

郊

廟大祀。仍作樂。穿朝服行禮。其餘尋常祭祀。均

用素服致祭。樂設而不作等語。所奏甚是。

孝敬憲皇后聖母大事。係九月二十九日。翼日

即遇孟冬時享

太廟。彼時禮官。或因為期太近。不及詳查會典。

從權率辦。本不可據以為例。至

孝賢皇后喪事。係三月十一日。至仲秋祭祀。

已在百日以外。尤不當引雍正年間二十七

日以內之例。其時禮部所辦。本屬未協。朕亦

忽畧看過。未為覈定。今既知其誤。自應更正。

著照軍機大臣所議。二十七日内。如遇

郊

廟

社稷及

日壇諸大祀。雖係遣官致祭。仍當作樂穿朝服

行禮。其餘尋常祭祀。均用素服致祭。樂設而

不作。方為允當。著交禮部。即照此辦理。其從

前誤辦之案。不必存稿。即以此著為令典。○

命議百日後服色禮制。諭曰。雍正十三年。

皇考龍馭上賓。朕欲持服三年。羣臣請循以日

易月之制。朕皆未允。嗣奉

聖母慈諭。令朕持服百日。因即遵行。然百日釋

服後。仍素服滿二十七月。今遭

聖母大故。自應仍遵

懿旨。持服百日。昨已明降諭旨矣。其素服二十七月。亦照前例。惟遇

壇

廟大祀行禮。及致齋三日。閱視

祝版。先期詣

壇。並視朝聽政。諸事。朕從前惟準理而行。並未載在令典。此時當詳議及之。又如王公大臣官員。持服二十七日而除。素服則滿百日。至百日後。用何服色。及陪祀齋戒。常朝坐班。並

一切典禮。應如何定制。亦當酌定章程。頃檢閱雍正十三年。王大臣等所定條款。頗為該括。著將原摺交軍機大臣。會同辦理喪儀王大臣等。悉心詳議具奏。○又諭。朕於本月二十九日。敬移

皇太后梓宮。於

九經三事殿安奉。朕即在暢春園之無逸齋居住。以便朝夕侍奠

几筵。用伸哀悃。○禮部議奏。向例頒發

遺誥。由各部院揀員齋往。未免稽遲。臣等酌議。朝鮮國。照例奏派大臣前往。其應頒各省遺誥。即敬謹封交提塘官遞送。似更妥協。得旨是。○癸巳。顯親王。蘊著。大學士。舒赫德。率同宗室王公。滿漢文武大臣等。奏滿洲向例。奉移之日。即回原處居住。○圓明園。為世宗憲皇帝。

皇上久居之處。即與宮中無異。懇於禮成後。即回圓明園居住。諭。朕本意。俟

皇太后梓宮於

九經三事殿奉安禮成。即在暢春園之無逸齋居住。以伸哀悃。茲據王公大臣等合詞具奏。滿洲舊例。奉移之日。應回原處居住。且稱圓明園。係

皇考及朕久居之處。即與宮中無異。請於是日。即回圓明園等語。既舊例如此。著照所請。於二十九日。奉安

皇太后梓宮禮成。仍回圓明園居住。至朕遭

聖母大故。理應於

皇祖

皇考前告哀。但

壽皇殿在城內。二十九日步送

梓宮後。自揣實不能再行禮。且應即往暢春園

恭候奉迎。因思

安佑宮。係

皇祖

皇考神御所在。與

壽皇殿相同。擬於二月初一日。躬詣祇告。初二

日。仍至暢春園之無逸齋。設苦次居住。以伸

哀戀。○又諭曰。

大行皇太后梓宮。於二十九日奉移

九經三事殿。王大臣官員等於每日齊集後。即

退歸辦事。○又諭。圓明園之長春仙館。正殿

偏殿。俱著改為佛堂。將暢春園內現供佛座

移往供奉。並添設佛像。○又諭曰。總兵喬照

在伊犁九年。理應更換。著照伊勒圖所請。派

西寧鎮總兵劉鑑。前往更換。○諭軍機大臣

曰。富椿等奏稱。吉林寧古塔。去歲支放淺票。

較前共少放二千四百張。均由伊等辦理不

善所致。請交部議處等語。從前降旨。吉林人

淺所獲若少。惟富椿是問。特令伊等實心辦

理。嚴查勒捐偷漏之弊耳。非少放淺票。將伊

等議處。即可了事也。伊等果能實心辦理。嚴

查所屬。不令放票人等。恣意勒捐。并派兵弁

於各隘口嚴行緝查。不使偷漏。即不能多獲。

亦屬無可如何。於伊何罪。若徒有辦理之名。

而不嚴行稽察。任其勒捐。又不派委妥幹兵

弁緝查。以致淺票少放。是伊等並非實心辦

理矣。即將伊等議處。亦有何益。此事惟出伊

等本心。非議處即可了事。朕今并不將伊等

交議。惟令伊等各矢天良。加意妥協辦理。倘

草草塞責。惟謂將伊等議處。即可了事。則有

負朕之諄諄訓飭矣。著傳諭富椿知之。○甲

午。以奉移

梓宮日期祇告

大行皇太后前。行啟奠禮。○諭曰。雍正十三年。皇考世宗憲皇帝龍馭上賓。其時各省督撫提鎮。及藩臬等。多有陳請叩謁。

梓宮者。曾經降旨停止。今遇

聖母皇太后大事。周元理得信後。即起身來京。恐各省督撫等聞之。亦有具摺陳請者。直隸距京甚近。且辦理

陵寢重務。與周元理交涉事件甚多。將來尚須

往來經理。此時來京持服。理所宜然。至他省遠近不同。督撫提鎮等。各有本任應辦之事。若皆請叩謁

梓宮。僕僕道途。於地方要務。轉恐貽誤。伊等惟當為朕實心任事。不在儀節虛文。著通諭督撫提鎮等。各遵旨不必來京。并毋庸具摺陳請。○諭軍機大臣等。據索諾木策凌奏覆。口外隻身傭耕民人。搬取眷口事宜一摺。自當如此分別辦理。其張錦等三百四十六戶。據

該都統稱。俱係傭趁餬口。赤貧無力之人。其搬移戶口。自應官為資給。著勒爾謹。即速照該都統咨送細冊。確查各原籍眷口。妥協經理。又馮玠等二百七戶。雖據稱在烏魯木齊年久。積漸小康。其力量尚能搬接眷口。無需官為資送等語。自係實在情形。但伊等因年來力作。屢獲豐收。頗堪自贍。究非富饒之戶。可比。今欲接取眷口。道途所用車輛口糧等項。俱不無所費。亦宜格外加恩。著傳諭勒爾謹等。即行查明此二百餘戶。照資送赤貧戶口之例。資給一半。俾其行李裕如。用昭體卹。至孫世替等九百八十七戶。雖據稱俟二三年後。生計寬餘。再行搬眷。此語未必出於戶民等本心。室家完聚。誰不樂從。愚民未必能見及於此。或地方官因人眾難辦。授之以意。亦未可定。朕惠愛邊氓。恩施稠疊。不惜多費帑金。今有力無力者。俱准搬移眷口。獨孫世替等九百餘戶。令其俟數年後再辦。未免向

隅亦著加恩賞給一半資助。俾若輩咸皆感激歡欣。即遠近聞之。亦必鼓舞踴躍。動其趨赴樂土之心。較之勸諭招徠。尤為有益。著傳諭勒爾謹。務飭屬將應賞之項。實力妥辦。使之均霑實惠。將此一并諭令知之。○乙未。

上詣

大行皇太后梓宮前供奠。○諭曰。

大行皇太后萬年吉地。今定為

泰東陵。此後著各衙門敬謹遵照繕寫。○又諭。

昨因永璚。乃

皇太后之孫。曾經派出於念經之日行禮。永璚

母孝未滿。公觀音保。乃

皇太后之姪。著加恩授為散秩大臣。代永璚行

禮。○諭軍機大臣等。據弘暢等奏。敬詣

泰東陵。查得宮殿俱皆整肅堅固。惟布瓦與琉璃瓦製式不同。椽望等木。有應更換之處。柱

頂階條各項石料。及牆垣甃塊。亦須添補修

砌等語。自應如此詳勘辦理。但約計何時可

以告竣。未據聲叙。至供案陳設。從前曾命海望。哈達哈。豫備一分。存貯工部。現今工部堂官往查。各項俱極齊全。惟油飾金色。稍須修葺。即可應用。毋庸另行隨工成做。其月臺陳設之銅鼎。鑪。鶴。鹿。即現交造辦處上緊趕鑄。以便運送。至於

陵寢工程重大。一切備辦物料。需用銀兩。應赴戶部支領。其覈估報銷。亦當由工部查辦。方合大體。今摺內欲向廣儲司銀庫領銀。及由內務府查銷之處。殊屬未協。應即覈明總數。奏聞。交部領辦。又摺內自稱奴才。亦屬非是。此必劉浩狃於包衣下小見。弘暢不應如此。嗣後具奏列銜。但著稱臣。其添建房間。應令欽天監審視方向。並令選擇興工吉期。俱照所請行。將此諭令知之。○又諭。昨經降旨。自乾隆戊戌年為始。普蠲天下錢糧。仍分三年輪免。以推廣

慈仁。茲據戶部將分年蠲免省分。詳議具奏。已

依議行矣。因念前次加恩普免。曾令各該督撫。遇輪蠲之年。徧行勸諭各業戶。就所蠲之數。準值減租。俾食力佃農。一體仰邀慶惠。現在自應仍舊辦理。但此等事。不宜明張告示。致刁佃藉口抗租。止須密行札知各該州縣。勸諭業戶等。量減佃租。伊等如感戴朕恩。推施亞旅。出於伊等天良。或其中有不能分逮者。亦聽其便。毋庸官為勉強。蓋佃戶俱係鄉愚。倘出示曉諭。必以為奉旨減租。刁風漸長。

實錄卷一〇二五

四二

現今浙省。即有永嘉縣佃民抗租聚眾之案。所謂民可使由。不可使知。大率如此。著傳諭各督撫。遇輪蠲之年。務須督率屬員。妥協辦理。俾業戶佃農。霑實惠而無流弊。○王公大臣等奏。無逸齋屋僅數楹。並無寢室。久居辦事。既多未便。且恐稍失調攝。非所以體

皇太后平素慈愛之心。圓明園乃

世宗憲皇帝。

皇上辦事聽政之地。並非園亭。距暢春園甚近。

與在無逸齋無異。仰懇初二日。申奠後。仍回圓明園居住。得旨。

皇太后梓宮。於二十九日。安奉

九經三事殿。朕於初二日。恭詣

几筵申奠後。即在暢春園之無逸齋居住。於心

始得稍安。王公大臣所請不准。○軍機大臣

等議奏。圓明園太監人等。入賢良門之兩旁

左右二門。俱脫孝衣。更素服。冠去纓。出左右

二門。俱穿孝衣。得旨。宮內因供

實錄卷一〇二五

四二

祖宗神位。是以至中一路者。不准其穿孝衣行走。

皇祖

皇考時。即定有成規。現在自應遵照辦理。至圓

明園。係朕辦事之所。並無供奉。所有太監人

等。出入賢良門兩旁左右二門。俱無庸更換

素服。伊等均俟至二十七日後。再行脫去孝

衣。○戶部議奏。自戊戌年為始。普蠲天下錢

糧。請將直隸。江蘇。安徽。四川。陝西。甘肅。雲南。

貴州。八省錢糧。於戊戌年蠲免。山東。江西。浙江。湖南。湖北。五省錢糧。於己亥年蠲免。奉天。並吉林所屬。山西。河南。福建。廣東。廣西。六省錢糧。於庚子年蠲免。從之。○丙申。恭移。

大行皇太后梓宮。安奉。

九經三事殿。

上先詣。

梓宮前親奠。呼搶盡哀。

靈駕啟行。

實錄卷一三上

上痛哭前導。由永康左門出。

梓宮升大輦。

上西向跪哭。攀掖步送。王公大臣叩懇再三。始

於第二班處。先赴暢春園宮門外祇候。是日。

儀駕全設。

大行皇太后御用器物。俱恭捧前行。辦理喪儀。

王大臣。內務府。禮部。工部大臣等。俱在兩旁。

敬謹隨護。王以下。滿漢文武大臣官員等。俱

分翼齊集。

梓宮由西華門。西安門。西直門出。俟

梓宮至。咸舉哀跪迎。候過。隨行。

梓宮至暢春園大宮門前。

上出次跪迎。

妃嬪等豫候於殿後。隨安奉。

梓宮於。

九經三事殿。

上號泣行奠祭禮。○

上居圓明園。○諭曰。德成和爾經額承辦。

實錄卷一三上

九經三事殿。易蓋黃瓦。甚屬妥速。著交部議敘。

現在。

泰東陵工程緊要。著德成和爾經額前往會同。

誠郡王。劉浩。迅速辦理。○諭軍機大臣等。今

日奉移。

大行皇太后梓宮於暢春園之

九經三事殿。安脩。

聖靈。蓋緣暢春園乃

皇祖舊居。雍正九年。

皇妣孝敬憲皇后喪儀。即在此安奉。朕恭奉聖母皇太后頤和養志四十餘年。於暢春園神御所安。最為怡適。是用易蓋黃瓦。敬設

几筵。奉移成禮。所謂禮緣義起。行乎心之所安也。若圓明園之正大光明殿。則自

皇考世宗憲皇帝爰及朕躬。五十餘年。莅官聽政於此。而門前內閣及各部院朝房。左右環列。規模遠大。所當傳之奕禩子孫。為御園理政辦事之所。恐萬年後。子孫有援

九經三事之例。欲將正大光明殿改換黃瓦者。則大不可。且觀德殿及靜安莊所建殿宇。宮門體制閎整。以之移奉暫安。足以備禮盡敬。何必別議改作乎。至園內之長春園及宮內之寧壽宮。乃朕葺治。為歸政後所居。將來我子孫有紹美前休。耄期歸政者。亦可留為憩息之地。均不宜輕事更張。若暢春園則距圓明園甚近。事奉

東朝。問安視膳。莫便於此。我子孫亦當世守勿

改。著將此旨錄寫。封貯尚書房軍機處。各一分。傳示子孫。以誌毋忘。○

大行皇太后大事。阿桂得信。即星馳來京。持服。現在滇省。尚無緊要應辦之事。且一切事宜。前已詳諭圖思德。無難遵辦。阿桂既已來京。著過二月初七日。初祭後。再行馳驛前往。將此傳諭圖思德。並令李侍堯知之。○是月署湖廣總督陳輝祖奏。乾隆三十七年。兩湖軍政。經督臣富勒渾奏請展期。嗣因官弁多出。兵金川。經臣將應行斥休各員。先行劾奏。軍政大典。請俟凱旋舉行。計至四十年。屆二年半舉劾之期。又經奏請一併展期。自上年凱旋後。臣等逐加考驗。兩湖地方遼濶。目下將次考竣。惟是本年十月。又屆軍政之年。請統於三月內。合併辦理。下部知之。○貴州巡撫裴宗錫奏。從前試採鉛廠。奏明在案。茲查松桃廳屬巴壩山一處。即名大豐廠。地近楚省。遵義縣屬新寨一處。地近川省。所產純係白

鉛礦砂盛旺足資撥運請以大豐廠鉛全撥楚省額運新寨鉛酌撥京運一百餘萬觔較蓮花福集廠辦理既易兼可節省水陸腳費四萬餘兩其蓮花福集二廠減運鉛觔仍照數積貯得旨嘉獎

實錄卷五十五

四八

大清高宗法天隆運至誠先覺體元立極敷文奮武孝慈神聖純皇帝實錄卷之一千二十五

大清高宗法天隆運至誠先覺體元立極敷文奮武孝慈神聖純皇帝實錄卷之一千二十六

藍修經總管經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣履桂

總管官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲副都統軍功加十九級隨帶加二級又加二級臣童誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆四十二年丁酉二月丁酉朔

上詣

安佑宮於

聖祖仁皇帝。

世宗憲皇帝神御前行告哀禮。○祭

先師孔子。遣協辦大學士程景伊行禮。○誠

郡王弘暢等奏。請將

泰陵侍衛營房。空閒房間拆卸。建造

泰東陵內務府營房。以備應設官員兵丁人等

居住。得旨。現在

陵工甚關緊要。理宜趲辦。先行告成。其拜唐阿太監等房間。即一時修蓋不及。彼處現有拜唐阿太監等住房。令其暫行通融居住。其查出有侍衛等空閒房間。毋庸拆卸。即可修理。令其居住。想為路亦不甚遠。即或寫遠。須行拆卸。另為蓋造。亦祇須緩辦。何必急欲辦理。尋奏除查有空閒房屋。撥給居住外。其應添建房屋。俟本年秋冬。在本地燒造磚瓦。購辦物料。明春興修。從之。○戊戌祭

大社

大稷。遣簡親王積哈納恭代行禮。○

上詣九經三事殿。

大行皇太后梓宮前供奠。○居無逸齋。苦次。○

諭朕從前原欲於皇孫內遣派一人恭赴

泰陵承祀。因仰體

皇太后高年。以孫曾繞

膝為樂。

聖意不欲令其遠離。是以未經辦及。今遭

大行皇太后大事。現在敬辦

泰東陵工程。即日

山陵禮成。著封綿德為鎮國公。前往

泰陵。

泰東陵侍奉貝子弘曠。著即回京。所有弘曠住

宅。原係官為建造。應即給與綿德居住。綿德

係朕長孫。茲令其祇奉

皇考

皇妣陵寢。於理為宜。至伊昨歲曾獲罪愆。因將

伊王爵。令綿恩承襲。今賞伊公爵。仍係推

聖母慈愛之心。伊務宜倍加敬慎。承受恩澤。毋

負朕教育成全至意。○又諭朕於百日釋服

後

坤寧宮。每日照常祭祀外。所有春季禮。立杆大

祭之處。另選吉期致祭。○諭軍機大臣等。據

弘暢等奏。

泰東陵工程。須於五月告竣。其應行置辦物料

各項。請暫向戶部支領銀三萬兩等語。

泰東陵工程關係緊要。昨已添派德成和爾經額前往幫辦。弘暢劉浩務須與之和衷確商。妥速經理。以期及早集事。今蠲吉於四月內安奉。

山陵尤須上緊速辦。劉浩勿復存五月完工之見。再劉浩辦事每多膠柱鼓瑟。而於關係錢糧之事尤拘泥不肯輕發。令

泰東陵工程重大。所有應發銀兩。交戶部即日發往。伊等於領到銀兩時。工匠遇有應行支領之事。俱應公同商覈。隨時支發。勿稍稽誤。將此諭令知之。○又諭。

泰東陵工程自宜上緊辦理。但地宮內有無積水。甚關緊要。急宜詳細查看。從前

孝賢皇后梓宮。安奉地宮。竟有積水。三和等皆不得其解。朕細思係地宮低於寶城。其工兩層成做。不能不滲水。後乃補成一層。費無數工作。始得堅妥。今

泰東陵地宮工程未識如何。聞

泰東陵之工係照

孝東陵一層成做。果爾可以無水。著即傳諭弘暢等迅速將

泰東陵地宮工程敬謹閱看。如乾燥無水。自屬最妥。即地氣稍潮。非有水可比。亦屬無妨。可即趕辦工程。以副四月吉期之用。若有水。又非可以猝辦。必須妥酌施工。方能完固。弘暢等尤當即行查明。據實由驛覆奏。勿致稽誤。

此旨著由四百里發往傳諭知之。尋奏詳細察看。乾燥堅妥。並無潮濕。報聞。○顯親王蘊著。大學士舒赫德率同宗室王公滿漢文武大臣等奏。無逸齋屋既無多。且俱淺窄。

皇上誠孝純篤。固不肯自求安適。惟

聖壽已高。實不可不加以意調護。今初二日已在無逸齋居住。

聖心亦可稍安。仰懇上念

聖母慈旨諄諄。養身即所以盡孝。於初三日

朝奠後仍回圓明園居住。得旨。王公大臣等屢奏勸朕仰體

皇太后聖心。善為調攝。朕不得不勉從所請。於初三日

朝奠後。仍回圓明園。○辦理喪儀。王大臣奏。漆飾

梓宮。欽天監擇二月初五日己時吉。臣等會同工部堂官。敬謹監視。得旨。是。○己亥。

上詣

大行皇太后梓宮前供奠。○迴圓明園。○諭軍機大臣等。據陳輝祖奏。接敦福札稱。恭請陞見。已奉旨。允。所有巡撫事務。應交何員護理。以便起程等因。查湖南藩司白瀛。尚在四川。署藩司事永慶。調任浙江。新任臬司梁敦書。陞見尚未回任。即使將撫篆交署藩司暫護。一時亦少遞署之員。可否俟白瀛到任後。再令敦福入覲等語。敦福上年奏請陞見摺內。已據聲明。俟白瀛到任後起程。何以甫經

批准。輒向署督商請委員。殊不可解。且巡撫印務。委藩司護理則可。若因委臬司署理藩司。遂令并護理撫篆。則階級相隔更遠。於體制大有未便。現令藩司白瀛。在川未回。臬司梁敦書。亦未到楚。敦福乃急急向陳輝祖札商。委人。豈欲將巡撫印務。交道員護理耶。敦福所見如此。甚屬不知事體。著傳旨申飭。並諭陳輝祖知之。○又諭。據巴延三奏。驚聞皇太后大事。即於二十九日星奔赴京等語。昨

已明降諭旨。令各省督撫得信後。不必陳請叩謁

梓宮。因各省俱非如直隸之距京甚近者可比。往來僕僕。轉於地方公務。或致貽誤。巴延三此奏。自尚未接奉前旨。著再傳諭巴延三。務須遵旨。不必來京。不拘行次何處。接奉此旨。即速回任。○又諭。曰。土爾扈特自歸附以來。各授地方安插。耕作均已得所。此內率先來歸者。係渥巴錫。策伯克多爾濟二人。今渥巴

錫已故。伊子策凌納木扎勒已錫汗爵。策伯克多爾濟錫封親王。伊志願已滿。甚屬安靜。且伊等俱係倡始來歸之人。即回俄羅斯。俄羅斯亦不肯收納。伊等必無異志。惟默們圖既非率先來歸之人。且人亦詭詐。微有伎倆。倘伊奔回俄羅斯。必謂初來時非其本願。特為渥巴錫等迫脅所致。則俄羅斯未必即將伊辦理。默們圖念及於此。恐即生無厭之想。蓄意投回。雖未必實有其事。但亦不可不慮。伊現在伊犁塔爾巴哈台境內居住。彼處駐劄之大臣。防範甚嚴。斷難越過。但竟置之度外。則甚為不可。朕豫料及此。著傳諭伊勒圖慶桂。令其切記在心。尤須嚴密。不可稍露形跡。致生疑懼。○大學士九卿等恭擬上

大行皇太后尊謚目

孝聖慈宣康惠敦和敬天光聖憲皇后得旨是依議。○理藩院以郭爾羅斯公錫喇博第旗分蒙古等勒索民人一案。奏請查辦。得旨。著

派侍郎博清額。馳驛前往郭爾羅斯。會同昭烏達盟長侍郎貝子羅布藏錫喇布審辦。○庚子。

上詣九經三事殿

大行皇太后梓宮前供奠。○諭軍機大臣等。降諭阿布賚勅書。已鈐寶發付伊勒圖。令俟鄂托爾齊到伊犁時。交伊等齎回。傳諭阿布賚矣。茲

大行皇太后大事。亦宜曉諭伊等知悉。著傳諭

伊勒圖。俟其至伊犁時。即諭以現因

皇太后大故。奉大皇帝諭旨。在伊犁居住之土爾扈特。和碩特等。明年俱令停止入覲。爾等回告阿布賚。此時且不必遣人請安進貢。即使遣人。天朝制度。大喪期內。亦不筵宴舉樂。爾等使人。亦不能瞻仰天顏。如阿布賚等感戴深恩。不遣人請安。於意不愜。必欲遣人進京請安。亦當於後年年終遣人。由此處料理赴京入覲。將此明白宣諭知之。○王公大臣

等奏懇間一二日親詣

梓宮前奠祭得旨所奏不准○辛丑

上詣九經三事殿

大行皇太后梓宮前供奠○遣官祭

關帝廟○軍機大臣等議奏

大行皇太后梓宮謹擇於四月二十五日奉安

地宮如照欽天監所定四月十七日恭移

梓宮於二十一日始能至

陵其奉安致祭奉移遷奠之禮俱不能行因交

欽天監另擇於四月十四日卯時恭移

梓宮則十八日可以至

陵十九日行奉安致祭禮二十一日行百日致

祭禮二十三日行奉移遷奠禮二十五日奉

安

寶城諸禮俱可從容辦理得旨是依議○入奏

恭查

孝恭仁皇后梓宮五月二十六日奉安

壽皇殿

世宗憲皇帝於二十七二十八二十九日連詣

三次後六月初二初三初五初六初十十六

十九二十等日皆間詣行禮當日自因漆飾

梓宮之故茲

皇上已連詣四次今日初次漆飾

梓宮懇請明日暫停一日報聞○又奏

大行皇太后安奉

泰東陵由黃新莊半壁店秋瀾村梁格莊西處

黃新莊至半壁店程站稍長加添人夫行走

亦不至遲滯其道路本應豫備兩條臣等奉

諭以彼時青苗在地正當茂盛若仍另開新

道恐於農畝有妨舊路原有兩條并加修葺

即可敷用應行知總督周元理遵照辦理從

之○壬寅諭軍機大臣等上年金川大功告

厥所有該處地界經將軍等繪圖奏明歸入

版圖安屯耕種原應如是辦理茲朕檢閱平

定金川方畧內如從前綽斯甲布布拉克底

已旺黨壩等各土司即有被金川侵占地方

此時以我大軍之力。全境掃平。前金川所吞鄰境。尺寸莫非我土。但念該土司等。數年以來。跟隨打仗守卡。出於誠悃。其勤勞亦屬可憫。所應特沛殊恩。示以獎勵。現已面諭明亮齎此旨。俟到川時。會同總督文綬。提督桂林。將綽斯甲布。布拉克底。已旺。黨壩土司等。被金川侵占地方。逐加詳勘。查明無礙田土。可以取給者。繪圖具奏。候朕降旨。酌量賞給。以示優卹。遠番。逾格加恩之至意。將此傳諭文綬。桂林。知之。○又諭。據國柱奏。驚聞

皇太后賓天。將學政關防。暫交護理巡撫印務黃檢。飛馳赴京等語。實屬錯謬之至。前經明降諭旨。令各省督撫。不必來京。昨山西巡撫已延三。奏請叩謁。

梓宮。已降旨。令其即行回任。正恐伊等不知事理。僕僕往來。轉致貽誤政務。至各省學政。不過司文之員。況有應辦考試之事。何得輒將關防交出。即行起程。由此類推。則外省司道。

知府等官。亦將紛紛就道耶。至所稱伊係內廷之人。更為不知分量。國柱不過在紅本上當差。並非內廷行走大員。所見實屬謬妄。國柱著嚴行申飭。並令伊奉到此旨。不拘行次何處。即行回任。○又諭。據黃檢奏。懇請趨叩皇太后梓宮一摺。前經明降諭旨。令各省督撫。聞信後。不必來京。恐於地方公務。轉致貽誤。昨山西巡撫已延三。奏請赴京。又經諭其務遵前旨。不拘行次何處。即行回任。黃檢係屬

藩司。更可毋庸前來叩謁。將此傳諭知之。○又諭。前曾降旨。著巴圖於明歲木蘭陞見。辦理綿惠阿哥成婚之事。今遭

大行皇太后大故。著巴圖明歲不必前來。於四十四年再赴木蘭。○癸卯。

上詣九經三事殿。

大行皇太后梓宮前。行初祭禮。陳

大行皇太后冠服於几筵。儀駕全設。陳楮幣於大宮門外。王以下百官齊集。屆時。

上舉哀視饌。讀文致祭如禮。○遣官祭昭忠祠。
○諭軍機大臣等。前據圖思德奏。緬夷現有
情願還人納貢之信。因令阿桂前往經理。並
將籌辦機宜。屢次詳悉傳諭李侍堯。圖思德
矣。此時得魯蘊當已辦貢投誠。并將楊重英
蘇爾相等。送還內地。茲阿桂因行至直隸境
上。聞

大行皇太后大事。進京叩謁

梓宮。留住數日。今已於初八日出京。計算阿桂
到滇時。得魯蘊早可款關。李侍堯。圖思德。應
遵照前旨。將得魯蘊所辦貢物。及來使。並送
還之楊重英。蘇爾相等。即行接受。派委妥員
送京。不必俟阿桂到彼。方接收辦理。免使緬
夷等心生疑懼。其派員送京時。途次迎見阿
桂。所有辦理情形。并沿途行走事宜。阿桂原
可在途指示料理。毋庸等候。至楊重英。蘇爾
相等。派員伴送來京時。仍遵前旨。勿令驚惶。
不必加以鎖押。留心防範。勿稍疎懈。其餘送

回官員兵丁。俱遵照前旨。妥協辦理。此次阿
桂到彼。重在辦理開關善後事宜。已詳悉面
諭阿桂。到滇時。與李侍堯相度機宜。妥辦。務
使一勞永逸。以崇體制。而重邊防。此時阿桂
現在起程。倘李侍堯尚未到滇。圖思德意存
觀望。於辦理此事機宜。大有關係。著再傳諭
李侍堯。圖思德。令其遵照妥辦。將此由六百
里加緊傳諭知之。○甲辰。遣官祭

先醫之神。○諭曰。軍機大臣等查奏。二十七
月內御殿視朝儀注。查乾隆元年元旦。已過
百日後。奉

聖母皇太后懿旨。以御極之初。應受百官朝賀。
且朕應恭詣

皇太后宮行禮。是以陞殿受賀。至此後二十七
月內。均未經舉行。茲乾隆四十三年。四十四
年。元旦。非元年可比。又尚在二十七月內。所
有陞殿受賀之處。不必行。至尋常御殿視朝。
恭查

皇考世宗憲皇帝時。曾於二十七月內。舉行數次。蓋尋常陞殿。與御門聽政無異。若隔至二十七月之久。於體制似有未協。自應遵照舉行。所有百日後陞殿之處。著該衙門屆期奏請。候朕降旨。○又諭。前因兵部議四川總督文綬奏。署川北鎮標左營遊擊德勝。不識漢文。難堪綠營之任。呈請回旗當差一摺。朕以綠營員弁。不識漢文者多。恐其中或有別情。因傳諭文綬。將德勝因何呈請回旗之故。據實覆奏。茲據文綬奏稱。面詢德勝。據稱。伊出兵三次。前因軍營揀選。不敢規避。今軍務已竣。自揣不能辦理綠營事務。若勉強因循。恐誤公獲戾。是以情願回旗當差等語。德勝者。准其回京。仍以副烏鎰護軍叅領補用。○軍機大臣等議覆。湖南巡撫敦福奏稱。湖南糧船進瓜州口後。必需繹夫。查江南瓜儀及山東運河。前經該省督撫等奏明添備短繹。設立夫頭。其直隸省。由天津轉衛。用夫多寡

不等。亦經督臣奏明。只設夫頭。臨時雇覓。均議准在案。至該撫所奏。未過淮。責之道廳。既過淮回空。責之押領員弁。應如所請。從之。○欽差吏部侍郎劉秉恬。四川總督文綬。覆奏。遵旨查叅不俟大兵。先回達烏之知縣張永升。典史馮世昌。除馮世昌業經身故。茲調訊張永升。據供。伊原係協辦南路軍營鑄礮物料之員。三十八年六月。礮局裁撤。在營已無應辦之事。適奉總理李藩司。委赴達烏。催趲夫糧接濟。遵即星夜馳赴。密詢原管總理李世傑。并驗原札。皆屬相符。自係實情。再該員居官勤妥。是以此次大計。文綬列入卓薦。懇免其叅革。得旨。雖免叅革。亦不宜卓薦。○以戶部左侍郎梁國治。充四庫全書館副總裁。○乙巳。上詣九經三事殿。大行皇太后梓宮前供奠。○軍機大臣等議奏。恭擬御用服色。一百日內。服縞素。百日釋服。

外。二十七月內。素服。詣

大行皇太后几筵前。冠摘纓緯。一百日內。遇祭

天壇。

地壇。

太廟。

社稷壇。

日壇。遣官行禮。齋戒日。素服。冠綴纓緯。帶齋戒

牌。百日外。親詣行禮。齋戒日。常服。不掛朝珠。

閱視

祝版。先期宿

壇。常服。掛朝珠。不御龍褂。龍袍。祭日。朝服。作樂。

還宮時。導迎鼓樂。設而不作。一百日外。祭

堂子。御龍褂。龍袍。一百日內。祭

奉先殿。戴纓冠。青褂。青袍。百日外。珠頂冠。金龍

褂。藍袍。一百二十七月內。祭

月壇。

歷代帝王廟。

先師孔子。

先農等壇廟。俱遣官行禮。一宮內祀

大神。百日後舉行。親詣行禮。龍褂。藍袍。掛朝珠。

一百二十七月內。遇元旦前後七日。御貂褂。掛

朝珠。御門聽政。百日外舉行。常服。不掛朝

珠。一百二十七日外。召見臣工。及引見官。俱在

便殿。服縞素。一遇

萬壽節七日。常服。一閱視

大行皇太后冊寶。素服。冠綴纓緯。先期齋戒三

日。如之。帶齋戒牌。一閱視

玉牒。朝服。一十二月封

寶。正月開

寶。龍褂。一傳臚。不陞殿。一經筵耕藉等禮。二十

七月後舉行。一

山陵禮成。二十七月內。前往恭謁。途中青長袍

褂。不摘纓緯。還亦如之。謁

陵時。青長袍褂。冠摘纓緯。一

內廷主位。二十七日釋縞素。二十七月內。常

服。遇元旦前後七日。

萬壽前後七日吉服。

內廷主位親蠶。百日內。奏派王福晉一人恭代。朝服。百日外。二十七月內。照常行禮。吉服。不用朝服。二十七月內。紫微週圍。門上對聯。門神。及寧壽宮各門殿。至太和門止。照舊張掛。餘處。俟二十七月後張掛。酌議。王大臣官員服色。王公文武大臣官員。二十七日內。服縞素。二十七日外。至百日。素服。帽綴纓緯。夏戴雨纓帽。至

大行皇太后几筵前。摘纓緯。百日外。至二十七月內。青褂。袍不拘色。夏戴緯帽。詣

大行皇太后山陵前。青袍褂。帽綴纓緯。百日

內。遇祭

天壇。

地壇。

太廟。

社稷壇。

日壇。遣官恭代。所遣之官。先期省牲。視牲。素服。

齋戒。祭日。承祭執事官。朝服。作樂。百日外。恭

遇。上親詣行禮。齋戒日。常服。掛朝珠。

上閱視。

祝版。及先期省牲。視牲。宿

壇。補褂。冬。貂褂。掛朝珠。不服蟒袍。祭日。朝服。作

樂。百日外。祭

堂子。執事隨駕各官。補褂。蟒袍。朝珠。百日內。

祭

奉先殿。執事隨駕大臣官員。青袍褂。百日外。補

褂。朝珠。百日內。祭

月壇。

歷代帝王廟。

先師孔子。

先農等壇廟。遣官致祭。承祭執事官。素服。行

禮。樂設不作。百日外。素服。齋戒。祭日。朝服。作

樂。二十七月內。元旦日。補褂。蟒袍。朝珠。前

後三日。常服。朝珠。

萬壽前後七日。常服朝珠。一百日外。遇御門聽政。常服朝珠。二十七日外。百日内。引見人員。青袍褂。百日外。青褂。袍不拘色。一百日外。二十七月內。遇陞殿常朝坐班。朝服。一百日内。兩衣兩帽。不論品級。均青色。百日外。帽按品級。衣青色。外省來京官員。赴天安門謝恩。朝服。遇鄉試會試。停止筵宴。內外簾各員。常服。謝恩。朝服。對聯門神。二十七月後。張掛。各衙門封開印告條如舊。從之。○丙午。

上詣九經三事殿。

大行皇太后梓宮前供奠。○丁未。

孝康章皇后忌辰。遣官祭

孝陵。○

上詣九經三事殿。

大行皇太后梓宮前供奠。○諭軍機大臣等。據索諾木策凌等奏。革職叅將王希曾。自調赴烏魯木齊。辦理屯務。已屆三年。歷經差委。俱能悉心辦理。援照富昆之例奏請。可否准其

送部引見一摺。因命軍機大臣等。查王希曾等原案。王希曾於廣東叅將任內。因守備林子彰。請修箭道廳蓬。估計銀一百二十八兩。嗣經署守備何者剛修理。止用銀三十八兩。零。署叅將楊春榜。仍照原報浮銷。王希曾不行首舉。反侵收工料銀八十餘兩。後因楊春榜。忿恨自戕。經李侍堯奏。革職發往伊犁効力。情罪本重。至富昆原案。因巴里坤遊擊任內。所管厰馬。被遣犯竊取。併傷及兵丁。經總兵存泰奏。革職發往伊犁。所犯係屬因公。情節較輕。從前俞金鰲將二人同摺保奏時。已有偏向王希曾之意。今索諾木策凌援照富昆之例。請將王希曾送部引見。竟為俞金鰲所愚。王希曾所犯。係侵收銀兩入己之員。未便仍留新疆辦理屯務。伊係漢軍。著令回旗當差。所請送部引見之處。不准行。將此傳諭索諾木策凌。俞金鰲知之。○戊申。春分。朝

日於東郊。遣平郡王慶恒行禮。○

上詣九經三事殿。

大行皇太后梓宮前供奠。○諭曰。吏部奏。現在出有湖北督糧道員缺。係簡缺。可否即以病痊赴部候補之道員修禮補用。抑仍歸部按班銓選等語。修禮於上年引見時。朕見其病尚未痊愈。是以降旨以簡缺道員補用。但其患病已久。一時恐未能即行就痊。伊原係內務府當差之人。著仍以內務府對品之缺補用。所有湖北督糧道一缺。仍歸部照例按班銓選。○又諭。現因

大行皇太后大故。來京穿孝之蒙古王公等。於二月十九日前到京者。著於十九日回去。十九日以後到京者。著於叩謁

梓宮後回去。○予故浩齊特扎薩克多羅郡王達什喇布坦致祭如例。○已酉。諭曰。軍機大臣等議。內廷妃嬪等。於二十七日釋服。其九經三事殿如何分班住宿之處。未經議及。二

十七日釋服後。

大行皇太后梓宮尚安奉

九經三事殿。妃嬪等若各還本宮。於禮制未協。應仍分班輪往住宿。著內務府存記。○軍機大臣等議奏。雍正元年上

孝恭仁皇后尊謚。及升祔禮。因隨

聖祖仁皇帝合祔。共頒詔兩次。今恭上

大行皇太后尊謚。及升祔

太廟。敬照

孝惠章皇后之禮。擬於升祔後。統行頒詔一次。得旨。是。○又奏。恭上

大行皇太后尊謚。欽天監謹擇於三月十六日吉。報可。○庚戌。

上詣九經三事殿。

大行皇太后梓宮前供奠。○諭。據圖思德奏。緬目到關。訂期投誠一摺。內稱先據總兵吳萬年。提臣長清。海祿。各稟札稱。得魯蘊差頭目等。致送禮物。并要親送官人。進表納貢。復於

正月二十四日。得魯蘊差頭目四名。持有緬字稟帖。來至隴川。見圖思德。據供。小邦蒙大皇帝深恩。將孟矣等全行赦回。我王子感仰天朝厚德。遣得魯蘊前來。投誠貢象。送還官人。定於二月十五左右。得魯蘊親貢象隻。并帶同官人交還等語。經圖思德面諭。令得魯蘊親自進京朝見。不僅施恩赦罪。開關通市。還有格外加恩之處。伊等聞諭喜躍。領命而去。又據阿桂奏。二月十二日。內邱途次。遇圖思德四百里驛遞奏摺。即遵旨拆看。所奏情節。及譯出緬文。較上次所奏近實。辦理亦無錯誤。惟得魯蘊不必令其親自來京。及俟阿桂到後。再辦開關事宜之諭。旨未符。已於摺內批諭。伊果欲親來。亦係好事。何必阻之。蓋緬夷等性多疑懼。伊若不願來京。原不必強。若如所奏。伊現在等候象隻。親自帶同官人送還之語。則是誠心來京朝見。自應准其前來。且應格外加恩。以示獎勵。又阿桂所奏

緬文內稱。將蘇爾相等十餘人。接到阿瓦。得魯蘊親自送出。而於楊重英。未經提及。楊重英。係必應索取之人。但不便因一人未到。將蘇爾相等。概不接收。仍一面嚴諭索取送出。毋任稽延。所奏甚是。但此時得魯蘊已可到關。計阿桂行程到滇。尚須時日。著傳諭李侍堯。圖思德。於得魯蘊到關時。如伊情願來京。即令其將貢象。并送還官人。一齊送京。不可稽遲觀望。阻其仰慕之誠。如得魯蘊不願來京。伊尚有貢使陪臣。即可令其護送貢物來京。至楊重英。如未經送出。即一面傳旨嚴諭。伊係最關緊要之人。自應首先送出。如不送出。仍不准其開關通市等諭。迅速發往。至阿桂接到此旨。亦即日加緊趕程前進。到滇辦理。將此由六百里傳諭知之。○又諭。聞安徽霍邱縣知縣琨玉。在任多有虧空。該員前經卓異進京。起身時。自必委員交代。何以未經敗露。且該員雖經李質穎保舉卓異。而給咨

係閔鶚元任內之事。何以交代之際。並未查出。遽行令其赴部。殊不可解。此事若令閔鶚元會辦。恐有迴護。高晉平日辦事秉公。朕所深知。自不致有瞻徇迴護。現已派刑部侍郎阿揚阿前來查訊。高晉可即往安徽。會同查辦。如有虧空。據實叅奏。如實無虧空等事。高晉亦不致冤屈人。作之以罪。據實奏聞可也。將此由四百里傳諭高晉。並阿揚阿知之。○辛亥。定首告忤逆發遣律。諭昨江蘇巡撫楊魁題請。將桃源縣民孫謀。掌毆伊父孫尚太。并咬落指節。擬以斬決一疏。已批法司覈奏矣。查閱本內。孫尚文供。伊子孫謀。平昔不孝。屢次違犯。曾於三十七年九月。稟縣枷責等語。彼時辦理。實屬非是。該犯孫謀忤逆。既經伊父稟縣。即應嚴行懲治。或發烟瘴。或發他省。使伊父得安居守業。豈可僅以枷責從輕發落。此等不孝之徒。所謂下愚不移。何得留於其家。復致日後釀成事端。向來刑部辦理

呈告忤逆之案。皆按律科罪。即從輕亦擬發遣。前此孫尚文控告伊子時。地方官若照此辦理。何至尚留敗類。任其回家。肆行狂悖。幸而孫尚文被咬未死。設使因傷致斃。或竟有逆倫之事。則是因一時姑息之心。留此梟獍。使得肆毒於其父母。於倫紀風教。大有關係。所有從前辦理此案之府縣。實屬疎縱。至臬司刑名總匯。巡撫察吏安民。何俱漫不經心。若此。著查明一併交部議處。嗣後各省似此首告忤逆之案。俱應照例坐以發遣。著刑部定議具奏。尋奏。嗣後忤逆之案。其父母呈控到官。懇求發遣。及屢次違犯。逆跡顯然者。即將伊子發烟瘴地方充軍。若係旗人。發往黑龍江從之。○又諭。上年桂林之母病故時。因軍營尚有事件。伊未得來京。今大功告成。俟明亮回至成都後。桂林即著來京守制。再行赴任。桂林起程後。提督事務著舒常暫署。俟桂林回任。再行來京。○諭軍機大臣等。據舒

常等奏。拏獲僭拉地方刼殺盜犯。已將倡首刼殺之鐵成。凌遲處死。其澤布止。魚貫保勒木甲。奔布止。西犯。亦即正法。梟示等語。此案拏獲迅速。分別治罪。所辦甚是。已於摺內批示矣。至將成支。勒石著勒只。什勾。勾添戎。四犯。照情有可原之例。免死發遣。所辦非是。金川甫經平定。屯種伊始。安插漢番人等。俱宜使之安堵無恐。方為妥協。迺熟番敢於肆行刼殺。初犯時若不盡法懲治。何以示炯戒而安善良。成支等四犯。自應不分首從。立予駢誅。著即於該犯等犯事地方。正法梟示。嗣後如有似此刼殺重案。俱照此辦理。毋得稍存姑息。至案內逸犯阿婁。仍著嚴緝務獲。從重辦理。將此由四百里傳諭知之。○戶部議覆。安徽巡撫閔鶚元奏稱。耗羨不敷。借動未歸地丁銀八萬餘兩。請就款開銷。查從前江蘇安徽。雖有議准之案。但概准就款開銷。恐借項愈積愈多。非慎重正項錢糧之道。請嗣後

耗羨不敷。如江蘇安徽等省。遇災賑急需。及蠲緩之年。養廉役食無出等要務。准其奏明借動地丁墊發。如實無可補。即行奏交臣部覈實。於別省積存耗羨數多者。撥補歸款。所有安徽前項。請即照此辦理。仍令非有刻不容緩之項。不得濫動地丁。亦不准恃有撥補。並不實徵節用。得旨。所奏是。依議。江蘇安徽兩省。耗羨既不敷用。原應以此省之有餘。補彼省之不足。但臨期奏撥。未免辦理周章。著該部通盤覈算。如何於鄰近積存耗羨數多省分。每年酌量奏明。撥解若干。以資接濟之處。即行妥議具奏。尋奏。查附近江南之江西省。耗羨積存三十餘萬兩。所有安徽借款銀兩。請於江西省。照數撥解歸還。查安徽省額徵耗羨。於章程冊有定各款。尚足敷用。災賑急需。亦非常年必有之事。若按年撥協。恐積存過多。轉滋弊竇。請於河南省。撥銀六萬兩。山東省。撥銀四萬兩。交安徽另款留備。遇有

急需題明動用。如有不足。臣部另行籌撥。至江蘇耗羨。前因辦災不敷。近年尚無竭蹶情形。應令樽節辦理。毋庸另籌。再臣等更有請者。查浙江省耗羨內。有備公銀十萬兩。係自雍正六年為始。於地丁項下。每年劃給。續於雍正十一年。因閩省耗銀不敷。於前項按年撥協福建二萬兩。今浙江積有三十餘萬兩。福建積有四十餘萬兩。不但閩省無需撥協。浙江積存。亦足敷數年之用。未便仍照往例。遞年以正項劃作閑款。除福建撥協。永行停止外。請將浙江備公銀。停其劃給。俟積存用完。或須接濟。該省題明。臣部即照安省例。酌於鄰省撥協。從之。○蠲緩江蘇安東。阜寧。清河。桃源。蕭縣。海州。沭陽。淮安。大河。九州縣衛。乾隆四十一年成災五七分。及不成災之興化。江寧。二縣。額賦有差。

實錄卷二十六

十一

大清高宗法天隆運至誠先覺體元立極敷文奮武孝慈神聖純皇帝實錄卷之一千二十六

實錄卷二十六

三

大清高宗法天隆運至誠先覺體元立極敷文奮武孝慈神聖純皇帝實錄卷之一千二十七

監修總纂官廷議官太子太傅文淵閣大學士文淵閣領侍衛內大臣傅家欽奉 上諭軍機處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次是慶桂

總纂官廷議官太子太傅文華殿大學士文淵閣領侍衛內大臣傅家欽奉 上諭軍機處管理刑部戶部三庫事務

世襲副都統軍功加十九級隨帶加二級又加二級臣董福同次臣戶部尚書銀星滿洲都統軍功紀錄五次

尋常紀錄十四次臣德瑛廷議官太子少保工部尚書紀錄六次臣曹振鏞等奉

敕修

乾隆四十二年丁酉二月癸丑

實錄卷一千二十七

上詣九經三事殿

大行皇太后梓宮前供奠○諭

大行皇太后大祭後著四阿哥六阿哥八阿哥

十一阿哥十五阿哥綿德綿恩輪流每日二

人在

九經三事殿住宿獻奠其餘衆阿哥等俱不必

在彼著照常讀書遇朕親往獻奠日隨往○

甲寅諭現今已屆

大行皇太后大祭此際前來之蒙古王公額駙

所進曼達著不必收其所進馬匹兩翼稅務處未收者不必交納即給還本人以前所進曼達不必令堪布帶去亦著給還原人嗣後再有來者俱不必收○諭軍機大臣等據高晉奏於二月初八日將兩江總督印務移交楊魁兼署安徽巡撫印務交王顯緒暫行護理即日起程會同河臣薩載相機開放陶莊引河即渡黃兼程進京叩謁

實錄卷一千二十七

大行皇太后梓宮等語高晉昨已降旨令其前往安慶會同侍郎阿揚阿查辦霍邱縣知縣

琨玉有無虧空一案查明據實具奏是伊現有經手緊要事件毋庸進京至陶莊引河前

據薩載奏於二月十五日開放已傳旨令其於開放後十餘日查看情形據實速奏今高

晉在彼一同開放伊於河務最熟其開放後水勢情形大約如何著傳諭高晉即速由驛

遞四百里先行馳奏後再往安慶會辦琨玉之案○吏部議准陝甘總督勒爾謹奏稱莊

所進曼達著不必收其所進馬匹兩翼稅務處未收者不必交納即給還本人以前所進

曼達不必令堪布帶去亦著給還原人嗣後再有來者俱不必收○諭軍機大臣等據高

晉奏於二月初八日將兩江總督印務移交楊魁兼署安徽巡撫印務交王顯緒暫行護

理即日起程會同河臣薩載相機開放陶莊引河即渡黃兼程進京叩謁

大行皇太后梓宮等語高晉昨已降旨令其前往安慶會同侍郎阿揚阿查辦霍邱縣知縣

浪地方與隆德靜寧連界靜寧幅員遼闊未便再行歸併若全歸隆德則距縣較遠村落凡遇完糧訴訟等事往返維艱應將分駐寧羌驛之河州州判裁汰改設莊浪縣丞其州判所管之事仍歸河州管理從之○兵部議覆察哈爾都統常青奏稱太僕寺兩翼牧廠馬數及一切差使相等惟所設護軍多寡不齊請將右翼額外護軍於缺出時酌撥左翼一百三十名以歸畫一應如所請從之○蠲免安徽宿州鳳陽虹縣

中興志卷之七

三

靈璧泗州盱眙天長五河八州縣鳳陽長河泗州三衛乾隆四十一年水災額賦有差鑄給烏魯木齊滿營左右翼領隊大臣關防從都統索諾木策凌請也○乙卯

上詣九經三事殿

大行皇太后梓官前行大祭禮儀與初祭同○丙辰遣官祭黑龍潭

昭靈沛澤龍王之神玉泉山

惠濟慈佑龍王之神○諭軍機大臣等前於正

月二十九日召軍機大臣等面降諭旨以圓明園之正大光明殿為

皇考及朕躬數十年來聽政之所當傳之奕祺子孫不得援

九經三事之例改換黃瓦至暢春園距圓明園甚近事奉

東朝亦于孫所當世守勿改已令記錄此旨封存尚書房軍機處各一分至於

列聖

實錄卷之七

列后安奉

神御

神位之處禮緣義起朕惟一奉

前規不敢不及亦不敢有過所應詳晰訓諭俾并

錄存記者如

壽皇殿安奉

聖祖仁皇帝

世宗憲皇帝御容至

列聖

列后。向年惟除夕元旦兩日恭奉

御容瞻拜於此。若

恩佑寺原奉

皇祖御容。嗣於圓明園內建立

安佑宮。朕即奉移

皇祖御容並奉

皇考御容。至現在之

恩佑寺。惟供佛像。歲時誦經展禮。蓋緣

神御尊嚴。不敢瀆奉。昔我

皇祖為

孝莊文皇后於南苑建

永慕寺。亦止奉禮佛像。用申誠敬。是以朕昨命將

悟正菴改建

恩慕寺。為

聖母皇太后恭薦

慈福。少抒哀慕之忱。並無供奉

神御之事也。至養心殿之

東佛堂。圓明園之

東佛堂。因

皇考時曾恭奉

皇祖神位並恭奉

孝恭仁皇后神位。是以朕亦遵奉此制而行。不敢

有所損益。至避暑山莊之

永佑寺。則止奉

皇祖

皇考御容。此皆子孫所當敬謹遵奉。又宮內之長

春宮。向有

孝賢皇后及皇貴妃等影堂。朕不過每歲於臘

月二十五忌辰之日一臨。但思

列后及

聖母。均未有專奉

聖容處所。則長春宮即歲暮亦不便懸像矣。此事

著停止

列后神御俱尊藏

壽皇殿內

神厨。將來朕之子孫。遵照安奉。亦足以昭敬慎。將

此旨令皇子等一并錄寫存記。用誌毋忘。○又諭據圖思德於二月初四、初五兩日，自騰越拜發奏摺二件，係覆奏前次接奉諭旨，其初五日摺內，有將秤官猛於正月二十五日放令出口等語。查從前並未奏過，此係邊關緊要情節，何以不及早奏明，足見糊塗著傳旨申飭，并諭令阿桂知之。○革職留任倉場侍郎嘉謨，以徇庇千總賴窩揚罪革任。○丁巳上詣九經三事殿。

大行皇太后梓宮前行月祭禮。○諭廣西按察使彭理來京，陛見年力已衰，難勝臬司之任，著留京以對品京堂補用。彭理如此衰邁，不但勝臬司之任，即岳常澧道亦難稱職。敦福何以姑息不行奏聞？昨裴宗錫因道員徐堂年老，即據實奏請休致，督撫察吏之道，自應如此。前敦福因奏請陛見，向陳輝祖札商巡撫印務，應交何員護理，已屬不知事體。今又不將彭理年老之處據實具奏，難勝巡撫

之任。敦福著調補倉場侍郎，仍著交部嚴加議處。其湖南巡撫員缺，著顏希深補授。○又諭曰：嘉謨昨因徇庇千總一案降旨革任，茲滿斗現有來京詢問事件。

東陵內務府總管員缺，著加恩以嘉謨補授。所有原任內降革罰俸處分，俱著帶於新任。○又諭曰：敦福現在調補倉場侍郎，其未到京以前，著德福暫行署理。○禮部議奏恭上

大行皇太后尊謚敬遵會典儀注辦理，其捧帛

獻爵，仍照例用宗室侍衛二人，得旨是。捧帛獻爵不必派宗室侍衛，著派四阿哥永斌、六阿哥永瑤捧獻。○理藩院奏已為喇嘛之台吉塔布囊應否襲職，得旨：既為喇嘛，即係出家之人，一切皆當棄而不顧。若仍令襲職，於理未協。嗣後已為喇嘛之台吉塔布囊內，若於未曾出家以前所生之子，將伊職銜令其子承襲，如無親子，弟兄胞姪俱不准承襲，著為令。○戊午遣官祭賢良祠。○諭軍機大臣

等據長清奏。於二月初二日。接准圖思德札商會奏稿內。未將秤官猛業經遣出緣由敘入。當日札覆。令其一併敘入會奏等語。秤官猛遣令回巢。見得魯蘊傳諭一切。係此事緊要情節。乃圖思德並不專摺具奏。及長清札覆。令其一併敘入會奏。又未照札併敘。是其所見。轉不如長清。何以勝邊疆重任。看來圖思德於辦理尋常地方事務。尚可黽勉。至雲貴總督。實非所宜。不得不酌量改補。期於公

實錄卷一百二十七

事有濟。著傳諭阿桂。李侍堯。遵照前旨。悉心妥辦。並諭令圖思德知之。將此由四百里發往。○又諭。昨經降旨。將敦福調補倉場侍郎。其湖南巡撫員缺。著顏希深補授。現在湖南藩司白瀛。尚未到任。該省無護理撫篆之人。著傳諭顏希深。將經手川省奏銷事件。交與鄂寶辦理。即赴湖南新任。不必來京請訓。俟藩司白瀛到任。再行奏請陞見。至顏希深。未到任以前。巡撫印務。仍著敦福暫行署理。將

此由四百里傳諭知之。○以湖南布政使白瀛。江西布政使圖桑阿。對調。以貴州按察使國棟。浙江按察使永慶。對調。○以河南按察使榮桂。為河南布政使。湖北驛鹽道趙銓。為河南按察使。○以直隸大名道哈靖阿。為廣西按察使。○調河南南陽鎮總兵保寧。為直隸馬蘭鎮總兵。以湖廣督標副將傅宗孔。為河南南陽鎮總兵。○已未。

上詣九經三事殿。

實錄卷一百二十七

大行皇太后梓宮前供奠。○遣官祭

歷代帝王廟。○諭軍機大臣曰。弘暢奏。

泰陵隆恩門前。至二道河平石橋甬路。現有磚

墁者一半。其餘三百餘丈。尚未墁磚。查

風水牆外。禮部人役營房等處圍牆城磚。似堪

應用。而劉浩稱。若用此磚。將來工部覈銷。不

許重複。必致賠累等語。此段甬道。既未墁磚。

自應迅速通融籌辦。乃劉浩先恐賠累。糊塗

見小。至遲五六日未決。弘暢能據實具奏。甚

是即著照所奏趕緊辦理。至拆用圍牆城磚舊料較之新磚更為堅好。將來砌成甬路毋庸改墁。其臨清磚亦不必催令辦造運送。至補砌圍牆即就近採辦虎皮石亦儘足以肅觀瞻。將此傳諭弘暢德成和爾經額知之。劉浩並著傳旨申飭。又諭馬蘭鎮總兵滿斗現被遵化州糧書徐成傑供出伊任內受賄營私並砍

風水內樹株及家人招搖不法各情節呈出款

實錄卷三十七

蹟單二紙業將滿斗革職研訊該督周元理平日豈竟一無見聞何以不行具奏又據徐成傑供起解進京時伊祖及伊妻父等將所開款蹟單另鈔一分帶往保定省城控告等語此案如果在周元理處呈控自應即時入告何以未見奏及宣周元理瞻徇滿斗情面觀望遷延自取重戾耶著傳諭周元理令其即行據實覆奏尋奏馬蘭鎮總兵滿斗營私不法臣毫無覺察咎實難辭至臣衙門並無

徐成傑之祖并伊妻父前來控告並詢之兩司亦無伊等赴司呈控之事報聞○又諭據阿揚阿奏於琨玉書箱所貯歷任舊卷內查有署滁州知州關催琨玉交代銀兩文移三件周杏江向琨玉借銀一千兩文契一紙并將借契呈覽等語觀此情節則琨玉不無虧空之事已於摺內批示伊接署係屬何人若非琨玉短少不清何以接任之員關催交代銀兩琨玉如果虧空屬實該上司何以不行參奏轉將伊卓薦此案關係裴宗錫李質穎閔鶚元及歷任藩臬道府等官甚衆即高晉亦係會薦有名獨阿揚阿係局外之人此案與伊毫無干涉自應秉公嚴查務使水落石出若一任地方官蒙蔽隨聲附和顛預率結則是自取咎戾恐伊不能承當此罪也將此由四百里傳諭阿揚阿知之○庚申諭製造神牌典禮重大所有奉先殿神庫及

實錄卷三十七

泰東陵配殿。監造行禮之事。著派尚書永貴。嵇璜。○諭軍機大臣等。據高晉奏。會同薩載。開放引河。業於二月十八日。將開放暢順引河功成情形。專差會摺奏報等語。陶莊開放引河。此時辦理關鍵。朕心時切懸念。高晉等既經開放暢順。自應由驛馳奏。以慰廑懷。乃僅差人齎摺。此時尚未到京。何以不權事體輕重。若此。至引河既經開放。則舊口自應嚴緊堵禦。或將木龍相度移置。或竟度地堅築埽工。俾引河永遠暢流。以資鞏固。高晉等接奉此旨。務須盡心籌畫。相度機宜。妥協商辦。一面派熟練之員。詳加指示。令其在工料理。薩載即進京陛見。高晉前赴安徽。查辦琨王之案。完竣後。地方事務緊要。仍遵前旨。不必來京。可將此由四百里傳諭高晉。並薩載知之。仍將會同籌辦情形。詳悉覆奏。○吏部議覆。貴州布政使鄭大進奏。稱黔省跬步皆山。非特州縣多係苗疆。即州同。州判。經歷。縣丞。吏

目。巡檢等官。均有地方之責。苗疆佐雜缺出。每難其選。請嗣後苗疆州同等官。照知縣以上例。未屆俸滿。遇有事故離任者。俟該員應補時。由本籍給咨赴原省。以苗疆要缺即用。亦屬慎重邊缺起見。應如所請。嗣後各省苗疆。海疆。烟瘴。佐雜各缺。未屆俸滿人員。緣事離任。該督撫覈其才具可用。并熟悉風土。於咨內聲明。俟該員應補時。由籍給咨赴補。從之。○戶部議覆署雲南巡撫圖思德疏。稱騰越州山多田少。孤懸邊外。毗連龍陵。所有該鎮不敷兵米。請照龍陵每石定以一兩三錢採買。應如所請。從之。○辛酉。諭曰。兵部奏請陝西西鳳協副將伸泰。母老終養一摺。旗員向無終養之例。我滿洲從來淳樸之習。但知尊君効力。家計有所弗顧。即外任有因親老情願回旗者。原不妨據實呈明。該上司回京當差。候朕酌用京職。既得遂其私情。又有俸祿養贍。若照綠營終養之例。回京閒住。轉屬

非是。而其人不得俸祿。亦必致艱窘。如因該員養親事畢。仍得外用。則旗人更不應如此存心。計圖便宜。伊等外用。原係朕特恩。豈可因此希圖繼職。沾染外官習氣。設使奉派出差出兵。伊等亦得因親老呈請終養乎。所有嗣後旗人終養之例。著停止。其有親老情願回京者。准其具呈督撫。奏明送部引見。文員以部屬用。武員或用侍衛。或用旗職。候朕酌量降旨。仲泰著即照此例行。○兵部等部議

覆署湖廣總督陳輝祖奏稱。洞庭協中號戰船十八隻。舊式底平身笨。淺瀨平流。既不能擊楫如意。衝風折戣。又不如小號船之旋折輕靈。請一律如小號船式成造。既適於用。兼可節省工料。應如所請。從之。○旌表守正捐軀直隸雄縣民王士勇女王氏。○壬戌

孝昭仁皇后忌辰遣官祭
景陵。○諭朕從前屢次南巡。閱視清黃交會處。悉其倒漾之患。因思若能引向陶莊以北而

流。則清口通暢。庶免黃流倒灌。因未躬臨陶莊一帶閱視。是以踟躕。及詢之歷任河臣。亦未有能任此事者。昨歲薩載赴山東行在召見時。諭令赴黃河海口上下察看。伊即奏請。若於陶莊開挖引河一道。使黃水繞北下注。相距清口較遠。清水益得暢行。與朕意適相符合。因與再三籌酌。伊果能遵照指示。剔挑完竣。今據奏報。於二月十五日。將引河開放過水。新河內大溜暢注。衝刷寬深。形勢甚順。

各等語。黃河大溜。既由陶莊北行。離清口甚遠。可免黃水倒灌之虞。並收清水刷沙之益。即就近險工。亦俱化為平穩。薩載辦理此事。實心實力。其所辦引河。實為全河一大關鍵。非尋常築隄打埽開河者可比。薩載著交部查照齊蘇勒之例。從優議敘。以示獎勵。其在工出力各員。交高晉薩載查明。交部議敘。吏部尋奏。河督薩載開挖引河。非尋常有益河工者可比。請照齊蘇勒之例。賞給騎都尉世

職從之。諭軍機大臣等。據高晉等奏報。陶莊引河開放功成。大溜暢注情形。一摺。覽奏深為欣慰。已於摺內批示。並明降諭旨。將薩載交部議敘矣。陶莊開挑引河。為治黃一大關鍵。今開放之後。新河內大溜暢注。衝刷寬深。形勢甚順。從此清黃分流。直至周家莊匯歸東注。清口可免倒灌之虞。實為一勞永逸。非

河神默佑。不能成此鉅功。自應於該處立廟。

以酬

神貺。又另摺內所稱通湖引河勘辦情形。此皆其餘事。惟當謹防舊河口。最為關係緊要。又老黃壩工程。尤關緊要。更宜悉心詳慎防護。以期永遠鞏固。至摺內稱原估挑水壩工計長七十七丈。其餘河面僅有二十七丈。與其留此河泓旁洩。不若一律估築。使水無分注。則全河溜勢。自必盡歸新河。雖所用工料加增銀八千餘兩。於要工更為有裨等語。所

奏甚合機宜。自應如此辦理。其舊河內未築壩工。據稱旬日內可趨堵告竣。現在曾否已經堵築畢工。並著上緊妥辦。至現在河身挑寬若干。及河流暢注之處。自應繪畫全圖。貼說註明。以便省覽。何以伊等見未及此。著傳諭高晉薩載。速即詳晰繪圖貼說。並將工所立廟。及老黃壩工程。如何防護之處。迅速據實覆奏。將此由四百里諭令知之。○又諭據國奏奏。各屬民壯烏鎗。應令實力操演。以收實用。并嚴定營員處分一摺。此所謂知其不知其二也。各省地方。設立民壯。所以巡緝盜匪。防護倉監。原欲其協助營兵。同資守禦。但民壯之設。本係由鄉民召募充當。雖係在官。究與入伍食糧者有間。况火藥所關甚鉅。亦未便散給人役。若概使演習烏鎗。并令熟練進步連環之法。於戢暴防奸之事。並無裨益。况各省訓練純熟火器者多人。則又不可不豫防其弊。即如前年山東逆匪王倫滋擾

一案。幸若輩烏合之衆。不善施放鎗礮。所以一舉殄平。此其驗也。國泰此奏不必行。其各州縣既有額設民壯。自當嚴飭有司。盡心訓練。操演尋常技藝。與兵丁等同資捍禦。以收實效。其烏鎗一項。不必演習。將此傳諭國泰。並遇便密諭各省督撫知之。○禮部題。朝鮮國王李昫遣使表賀。

萬壽冬至元旦三大節。及進歲貢方物。賞賚如例。○又議准。江蘇學政謝墉奏請嚴廩生出

貢之例。應令嗣後廩生內。如有詞訟牽連。經地方官審明。申詳督撫。發學戒飭者。即將該生出貢之處。扣除註冊。仍將原案報明查覈從之。○大學士管兩江總督高晉。江南河道總督薩載。會奏舊河兩岸。原估挑水壩工計長七十七丈。其餘河面僅有二十七丈。與其留此河泓旁洩。不若一律估築。使水無分注。則全河溜勢。自必盡歸新河。雖所用工料。加增八千餘兩。於要工更為有裨。得旨。甚是。又

奏。照選定吉期二月十五日。開放過水。

河神默佑。新河內大溜暢注。衝刷寬深。形勢甚順。得旨。以手加額。覽之。此處不應立廟。以酬

神貺乎。又奏。從此清黃分流。直至周家莊匯歸東注。清口可免倒灌之患。得旨。何不具一圖來。餘有旨諭。○又奏。河廳屬張福口。裴家場。張家莊。天然太平等處。通湖引河五道。茲屆水消灘現。逐細查探。惟張家莊。裴家場。引

河。水勢淺滯。宣洩不暢。臣等派委工員。先於兩頭煞築柴壩。將水岸乾實。力興挑已於正月開工。一俟挑竣。再起除柴壩。以資暢洩。得旨。陶莊改流。則無倒漾之患。此皆其餘事。但當謹防舊河口為要。又老黃壩更要緊。慎之。○癸亥。清明節。遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。○遣官祭

孝賢皇后陵。

端慧皇太子園寢。○

上詣九經三事殿。

大行皇太后梓宮前行禮。○詣

安佑宮行禮。○甲子。

上臨西花園。視皇四子履郡王永璘疾。○皇四

子履郡王永璘薨。○諭曰。皇四子履郡王永

璘。秉性醇良。持躬端謹。朕諸子中次序最長。

昨因遘疾。竟至不起。著派八阿哥永璘。穿孝。

與金簡辦理喪儀。所有一切典禮。加恩照親

王儀注行。○乙丑。

上詣九經三事殿。

大行皇太后梓宮前供奠。○臨履郡王永璘第

賜奠。○回圓明園。○丙寅。諭

東陵總管內務府大臣嘉謨。著照滿斗之例。協同貝子允祁管理。

陵寢事務。○諭軍機大臣等。據高晉接奉諭旨。

由驛覆奏陶莊引河開放後情形。并往滁州

確查。琨玉有無虧空各緣由。一摺。均於摺內

批示矣。此次開放新河。并堵築舊河。為全局

一大關鍵。自應繪圖貼說。方能瞭如指掌。何

以高晉等。總不具圖呈覽。實屬疎忽。至摺內

所稱河無兩行。原擬估做挑水兜水壩。與其

留此河面。任其分流。不若一律估築堵閉。所

奏甚是。正與朕前降諭旨相合。但所稱僅存

上口七丈。下口五丈。薩載現在駐工督辦。旬

日內亦可完竣等語。此時曾否竣工。向來河

工習氣。如上口七丈。雖經堵築。其下口五丈

內。必尚留罅隙。使餘水仍得走洩。以為日後

做工冒銷地步。著傳諭高晉薩載等。於堵閉

時。務須悉心講求。設法籌築。厚實堅固。務使

點滴不漏。方保無虞。不可輕信河員飾詞完局。仍一面詳晰繪圖貼說具奏。俟薩載辦竣後。來京時。再為按圖指示善後保固各事宜。將此由四百里傳諭知之。○又諭。據袁守伺奏查看

景陵後五花嶺上兩峯對口。舊有石牆。滿斗因走此路近便。又嫌上坡窄狹。遂令將牆拆去。又於正關城內。

風水禁地之頭道龍溝。二道龍溝處。砍伐樹木。

添立木柵。共計砍木八百四十餘株等語。實堪駭異。該貝子等。久在

景陵。一切皆應查察。况拆毀石牆。以及砍伐樹木。皆係衆人所共聞見。耳目昭彰。何以不行據實參奏。且貝子允祁。平日與滿斗本不相合。既有伊舉動如此謬妄。正宜參奏。何乃始終緘默不言。將此傳諭該貝子等。令其明白回奏。尋奏。未能查出。實屬昏昧糊塗。得旨。交宗人府嚴加議處。○又諭。滿斗因事革職。交

部審訊。已將保寧調補馬蘭鎮總兵。馬蘭鎮有護守

陵寢之責。關係緊要。現在彼處無人。著傳諭保寧接奉此旨。即馳驛來京請訓。速赴新任。○是月。閩浙總督鍾音奏。臺灣所轄淡水一廳。臺灣鳳山。諸羅。彰化。四縣。自釐定界址。私越既杜。並設立隘口。添建望樓。文武員弁。嚴密防查。並無漢奸竄入。近年絕無生番戕民之事。至熟番分隸廳縣。另列番社。所有通事。緣番民同處年久。習知漢語。遂換番人充當。將漢通事盡行禁革。並無漢奸盤踞滋擾。地方極為寧輯。報聞。○陝甘總督勒爾謹奏。昌吉縣應建

文廟。原議秋收後。派屯兵修理。又昌吉縣知縣衙署。以裁缺之寧邊通判衙署居住。均經奏明在案。茲查屯兵自春徂秋。實無閒暇。至九月天寒。又不能工作。應請雇用民夫修理。再寧邊通判衙署。止有土房十一間。年久傾

圯不敷居住。應請改建知縣衙署一所。下部知之。○陝西巡撫畢沅奏。黃河水勢。至朝邑縣之上新莊北岸。正當旋轉之處。一經漫溢。即抵縣城。查城北舊有東西長隄一道。創始雍正七年。動撥民夫夯築。乾隆十七年。復按田出夫。修築完固。今年久坍。遺址僅存。以致三十八年猝被水患。自應速籌修築。上年凱旋事竣。又致年豐。臣等正在勘估籌辦。該處士民。不待勸諭。同聲籲請。照往例按田出夫。分段修築。已於本年二月初三日興工。約計四月初間可竣。報聞。

實錄卷一百一十七

五

大清高宗法天隆運至誠先覺體元立極敷文奮武孝慈神聖純皇帝實錄卷之一千二十七

實錄卷一百一十七

五

大清高宗法天隆運至誠先覺體元立極敷文奮武孝慈神聖純皇帝實錄卷之一千二十八

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭軍機處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次臣履桂

總纂官經筵講官太子太傅父華殿大學士文淵閣領閣事稽察欽奉 上諭軍機處管理刑部戶部三庫事務

世襲副都統軍功加十九級隨帶加二級又加二級臣董誥內大臣戶部尚書兼藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

教修

乾隆四十二年丁酉三月丁卯朔吏部議覆

平定人二十

戶部咨稱廣西布政使孫士毅以粵西官荒地土請清釐界址以後如有爭控不清案件即行叅處臣等詳查舊例凡失察械鬪及藏匿逃犯並命盜等案互相推諉俱有降革處分至報墾陞科或有隱漏及捏報並不按年分起科者定例悉有專條惟爭控地土未清案件未經定有查勘不實處分應請嗣後粵西官荒地土自立石定界後遇有爭控未清案件其從前查勘不實之州縣官降一級調

用該管上司罰俸一年從之○戊辰上詣九經三事殿

大行皇太后梓宮前供奠○諭據陳輝祖奏湖廣提督段秀林入春以後飲食漸減已成噎膈醫治難期速痊等語段秀林著准其解任回籍調理所有湖廣提督員缺著寶璜調補其貴州提督員缺著教成補授○又諭理藩院辦理蒙古王公額駙格格台吉等俸銀俸緞於二月支領後如在三月三十日以前病

平定人二十

故者仍令繳回但業經由庫支領又令其回繳未為允當且京師各王公大臣官員等亦無如此辦理者此例應刪去嗣後王公額駙格格台吉等俸銀俸緞支領後如有病故俱不必繳回○諭軍機大臣等據彭理於軍機處具呈內稱緬匪性情疑惑貪利無知惟伊母尚知尊卑上下囑令斷不可違背天朝今既投降仰懇轉奏與伊母稍加恩賜使其畏威戴德又雲南省城等處江西湖南人居多

緬匪投誠後。倘蒙恩准其交易。其江西湖南人。應請不許過雲南省城。並令永昌等處各關口。嚴查禁止等語。經軍機大臣據呈轉奏。彭理此呈。不過希圖見長。其呈內所稱。亦係衆共聞知之事。著傳諭阿桂。李侍堯。留心確訪。彭理所言緬匪之母。是否實係勸令伊子投降。從前懽駁何以不聽。今贅角牙是否聽從懽駁之母。投誠納貢。若果如此。自應酌量加恩賞賜。以示獎勵。其江西湖南人。如何設

法嚴禁。不令過關之處。並著阿桂。李侍堯等。悉心籌酌。妥議覆奏。再前據圖思德等奏。得魯蘊等。約於二月十五日到關投誠。計今已半月有餘。何以尚未見奏到。日內有何信息。並著據實速奏。將此由五百里傳諭知之。○戶部議覆。河東鹽政瑞齡奏。稱鹽務做照兩淮。行鹽引張。分別給驗。曬鹽畦地。責成運商稽查。及稽查私鹽。宜設總巡。應如所請。其消耗請加。與例不符。不准行。得旨。依議。至該鹽

政請做照兩淮。每引量加耗鹽之處。戶部照例議駁。但據該鹽政奏稱。河東鹽觔。陸運易於損耗。又遇夏秋雨水。虧折尤多。自屬實在情形。著加恩准其做照兩淮。於五。六。七。八等月。酌半加添。每引量加耗鹽五觔。以示體卹。○又議覆貴州巡撫裴宗錫疏。稱。普安州屬連發山。產有白鉛。現在開墾試採。獲礦頗旺。每月約出鉛四五萬觔。應准其開採。仍照例抽課採買。以資鼓鑄。從之。○己巳祭

先蠶之神。遣怡親王福晉行禮。○定嚴查隻身民人私赴奉天例。吏部等部議覆。山東布政使國泰奏。稱隻身流民。積漸成夥。較攜眷就食者。更易作奸。請由地方官。給票出口之處查禁。應如所請。嗣後如有藉稱尋親出口赴奉天。並無確據者。不許給票。如濫給。滋事發覺。即將給票官。降二級調用。至該布政使稱。偷越總由船戶。亦應如所請。嗣後山東登萊等處有票船隻。如有夾帶無照流民。私渡

奉天者杖九十。徒二年半。船隻入官。從之。○
以湖南永順協副將盧光裕為貴州鎮遠鎮
總兵。○庚午。諭曰。多鼎奏稱。圍場總管諾爾
本於二月二十九日病故。諾爾本前在軍前
著有勞績。茲聞溘逝。殊堪憫惜。加恩賞銀一
百兩。著多鼎由該處庫內支給。○吏部議覆
調任湖南巡撫敦福奏稱。岳州府屬臨湘縣
濱江近湖。盜賊出沒。軍七民三。風俗刁悍。永
州府屬零陵縣。係附郭首邑。水陸交衝。差務
紛繁。郴州屬宜章縣。為川陝黔楚赴廣捷徑。
商賈絡繹。訟獄繁多。以上三缺。現在情形。非
強幹熟練之員。弗克勝任。又衡州府屬清泉
縣。與衡陽縣同城。事務皆繁。今少。與中簡各
缺相等。永順府屬桑植縣。境內土苗。久經雜
髮衣冠。與漢人無異。易於治理。長沙府屬湘
潭縣。縣丞分駐朱亭。近年商販稀少。地方安
靜。以上三缺。均非繁劇。請將臨湘。零陵。宜章
三縣。俱改為衝繁難兼三要缺。在外揀選調

補。其清泉改為疲難中缺。桑植刪去苗疆字
樣。改為簡缺。與湘潭縣縣丞。均歸部選。查地
方繁簡。今昔互異。自宜隨時酌改。應如所請。
從之。○裁虹縣歸泗州。以其城為泗州治。從
安徽巡撫閔鶚元請也。○辛未。諭。今年京察
屆期。吏部開列在京各部院三品以上大臣。
暨各省督撫等。奏請甄別。內閣大學士。以領
袖班聯。向不與列。第念大學士舒赫德等。或
贊襄機要。兼統部曹。或敷歷封疆。勤勞懋著。
均能敬公稱職。宜加優敘。以昭恩眷。舒赫德
高晉。于敏中。李侍堯。俱著交部議敘。○又諭
曰。吏部開具在京部院三品以上官。請旨甄
別。以重考績大典。協辦大學士尚書阿桂。程
景伊。署協辦大學士尚書英廉。尚書豐昇額。
袁守侗。福隆安。綽克托。奎林。侍郎福康安。梁
國治。和珅。慶桂。均勤慎稱職。宜加優獎。著交
部議敘。其左都御史素爾訥。大理寺卿尹嘉
銓。精力就衰。難以供職。均予原品休致。餘著

照舊供職。○又諭今年京察屆期。吏部將各省督撫開列名單進呈。請旨甄別。總督周元理。鐘音。文綬。楊景素。河道總督薩載。巡撫三寶。陳輝祖。畢沅。裴宗錫。均宣力封疆。克稱厥職。著交部議敘。餘俱照舊供職。○又諭據阿揚阿。高晉奏。遵旨前往安徽之滁州。查辦琨玉虧空一案。將該州倉庫逐一盤查。俱無虧缺。惟乾隆四十年春糶穀價錢文款內。經琨玉動用制錢三千五百八十千零。墊發本年辦賑紙張飯食等項。詳明領回歸款。乃琨玉於四十一年正月卸事後。在安徽省城將此項銀兩自行領出三千二百兩。攜帶進京。至五月內。藩司將給過緣由。飭知該州李秉義始知係琨玉捏詳連名冒領。詳請咨追。藩司王顯緒批令自行移催。巡道棟文批候據情移查等因。琨玉於卓異交代到省之時。輒敢捏名冒領庫項。居心巧詐。實出情理之外。琨玉著革職。交軍機大臣會同刑部嚴審定擬。

具奏。王顯緒棟文於李秉義稟報時並不嚴查揭叅。一任琨玉冒領。以致虧缺庫項。顯係有心玩縱。非尋常徇庇可比。王顯緒棟文俱著革職。交阿揚阿。高晉國泰派員解京。一併質審。○諭軍機大臣曰。戶部奏滇省運京年額京銅開行遲延。節經行查。始終以瀘店並無底銅一語抵塞。請將管廠各員並專轄之司道以及從前奏報不實之督撫職名查明議處。並請飭交新任督撫悉心詳籌妥議。務使瀘店多備底銅。俾各運開行例限永無貽誤。一摺。已依議行矣。銅勛鼓鑄攸關。最為緊要。自應依限趕運。如果銅廠缺少。亦應據實聲明。豫為籌辦。乃管廠各員既不能辦銅足額。專轄之司道亦不上緊督催。據實詳報。直至各運逾限。節次行催。該撫並未實力查覈。設法調劑足額。徒以紙上空言。希圖塞責。殊屬非是。圖思德著傳旨申飭。令其明白回奏。此後如何籌辦足額。並多備底銅。以期趕赴。

例限之處。著傳諭李侍堯裴宗錫悉心詳籌妥議。據實具奏。○吏部議覆鑲黃旗滿洲都統叅奏。安徽霍邱縣知縣琨玉赴任逗留。遲逾三月。應照例革職。伊父薩郎阿有心徇隱。降三級調用。失察之佐領那當阿等。分別罰俸。并請嗣後外任文武旗員來京。俱由各部院衙門。將該員來京緣由。併回任給照日期。咨明本旗。以憑查催。應如所請。得旨。琨玉已於另案降旨革職。伊所犯係外任之事。伊父薩郎阿無由得知。其不催令伊子赴任。尚在情理之內。薩郎阿著改為罰俸一年。免其降調。至該管佐領那當阿等。雖有失察之咎。但外任文武旗員來京。向不知照本旗。琨玉逗留情事。無憑查覈。著加恩免其議處。餘依議。○江南河道總督薩載奏。旬日以來。臣駐劄清口。將舊河壩工趕緊接築。於二月二十四日。一律完竣。舊河即經斷流。并於壩外鑲做邊埽一道。以為外護。新河大溜較原估刷深

六七尺。往後日加衝刷。即可與舊河一律寬深。其善後事宜。新河之南。即係陶莊積土。應翻築隄工一道。從新壩根起。直至河尾。以防漫灘水勢。新河之北。舊有縷越隄工。縷越近在河崖。應聽自行塌去。使河身舒展。越隄離河較遠。應加高培厚接長。以越作縷。俾資攔禦。新河頭下唇。溜勢旋轉著力。應俟灘土塌定。鑲柴裹護。以順其勢。再清口舊有木龍七架。內五。六。七。三架。淤入土中。應折起。以為改紮木龍之用。至頭。二。三。架。正對新河。挑溜有力。第四架。已在新河口下。應移在二龍迤上紮做。更有裨益。謹繪圖貼說。由驛奏報。得旨。諸凡妥協。嘉慰覽之。○閩浙總督鍾音疏報。漳州場墾復鹽埕三十二坵。升科如例。○壬申。

上詣九經三事殿。

大行皇太后梓宮前供奠。○諭。武英殿御書處。雍和宮事務。俱著八阿哥永璇管理。○又諭。曰。

戶部議駁。劉秉恬等題銷舊案軍需。內運送雜谷。腦梭磨。曾頭溝等處米石。以官運開銷。商運腳價。計多銀二萬二千餘兩。與例不符。難以准銷一摺。按例自應議駁。但據劉秉恬等稱。當日運道初開。山路險窄。糧運均多停滯。軍糈關係緊要。不得不設法趕運。以應急需。實無浮冒等語。所奏亦屬實情。此二案。著加恩准其照商運例開銷。此後不得援以為例。○諭軍機大臣等。據薩載奏。於二月二十

九日赴京。所有總河關防。即交於李奉翰暫行護理等語。總河關防。自應總督兼署。今高晉現赴安省。距工次既遠。所有總河關防。著德保暫行兼署。將此傳諭薩載。德保知之。○又諭。據圖思德奏。於二月十六日。接到提督長清等札。據遊擊哈三等稟稱。有緬目孟幹。孟占拉等二名。持緬稟來至張鳳大營。據稱係得魯蘊。綻拉機。差來。從前得魯蘊。原許二月十五日來。因象隻未到。差我等來稟知。並

打發節蓋。到馬脖子。求大人們差官到彼。還有說話等語。又譯出緬稟。內有此事。並非小可。不是速於完得的。至大人吩咐來的話。多有不信我的意思。若後有字與我。務要直直道道等因。是誠何語。可惡之極。已於摺內批示矣。得魯蘊屢次來稟。於二月十五日。還人貢象。係伊自定期約。今忽翻改。實屬狡詐之至。象隻到關遲早數日。尚在情理之內。至稱差官前往馬脖子。則於還人進貢之事。毫無關涉。不過欲誑騙差官到彼。探聽內地情形。或竟行用強扣留。均未可定。長清等不肯照伊所請。但令孟幹等差一跟役。諭知節蓋。令其進關說話。其孟幹暫留張鳳大營。所辦亦是。又阿桂奏稱。看其情形。酌量辦理。如不肯前來。則竟不必差人往催。並不必探聽信息。惟嚴飭邊關。示以不測。所奏甚是。緬匪狡獪異常。而綻拉機尤為奸猾。從前在老官屯時。懽駁即係聽信綻拉機之言。以致肆行無

忌。昨還人進貢之稟。看來係得魯蘊意圖藉此開關。今已經約定日期。忽又翻改。未必非綻拉機之意。緬匪如此狡詐。惟有嚴飭邊關。絲毫不許走漏消息。亦不必差人催探。致得遂其奸計。若伊差人。及節蓋到關。亦應扣留。不遣。必待全數將人送出。方准開關放還。緬目著傳諭阿桂。李侍堯。到彼務須悉心會商。嚴密妥辦。毋庸差人催探。以防緬匪等留住。探聽消息。並應嚴問其節蓋孟幹等。如此反覆。究屬何心。總之辦理外夷。諸凡舉動。當示以威嚴。不可稍露遷就完事之意。阿桂。李侍堯。均係能辦事之人。詳籌妥酌。自合機宜。仍將奉到此旨。及現在辦理緣由。迅速由六百里奏覆。將此由六百里發往傳諭知之。○以安徽按察使農起。為安徽布政使。調湖北按察使秦雄飛。為安徽按察使。以廣東肇羅道福川。為湖北按察使。○旌表逼嫁捐軀湖南桂陽州民龍遇震妻雷氏。○癸酉。兵部奏稱。

原任廣西蒼梧道周升桓之母俞氏。具呈代子贖罪。得旨。秦廷基一案審結時。周升桓正署臬司。並不收禁。以致釀成此案。周升桓乃此案罪魁。理應正法。朕不欲興大案。故從輕發往軍臺。實伊罪所應得。即將來年滿。尚不應令其回籍。所有呈請贖罪之處。不准行。○又議准。署雲貴總督圖思德奏稱。副將以下武職到任交卸日期。照文員按月造冊咨部。撫標聽撫臣彙咨。其餘各營。由提督及督標中軍。覈送督臣。分咨戶兵二部。以歸簡易。從之。○以病休青海扎薩克多羅郡王衮楚克達什子。索諾木多爾濟襲爵。○旌表守正捐軀河南寶豐縣民任永正女任氏。○甲戌。諭今年鄉試屆期。所有應行開列試差之進士出身人員。著於三月二十五日。在正大光明殿考試。仍著吏部照例按各衙門次序。於二十七日帶領引見。○申伏法罪人不得復讐之禁。刑部議駁。直隸總督周元理議沈萬良。

毆殺王廷修。誤引子孫報讐例。諭此案沈萬良之父沈三。行竊拒捕。原係有罪之人。被事主王廷修知覺。趕毆致斃。將王廷修。照黑夜偷竊。被事主毆打致死例擬徒。本案已經完結。法非應抵。義不當讐。乃伊子沈萬良。忽於十餘年後。復將已伏罪之王廷修。乘機殺害。該督援照子孫報讐例。擬以杖流。經部議駁。甚是。從前各省辦理復讐之案。如廣東曾士標。毆死曾會昌。律擬斬候。而曾會昌之子曾

朝宗。復毆死曾士標之子曾亞二。律擬斬決。朕特明降諭旨。改為絞決。又河南省智洪義。因父智順。被趙二毆死。趙二問擬絞候。智洪義藉言報復。輒殺其子趙倉。律擬斬候。九卿閣臣。於勾到招冊內。夾簽聲明。又經朕明降諭旨。通諭問刑衙門。以我朝明罰勅法。審慎周詳。生殺悉由讞司。豈容一介不逞之徒。私行報復。況國法既彰。則私恨已洩。讐殺之端。斷不可啟。訓示最為明晰。即子孫復讐之例。

若因伊父死於非命。而兇手竟得漏網。冤無可伸。其復讐猶為有說。今沈三原係罪人。王廷修又已伏罪結案。則國法已伸。王廷修即屬無罪之人。乃沈萬良復逞兇故殺。即應照故殺例問擬。若如該督所擬杖流。將來此風一開。誰非人子。皆得挾其私忿。藉口復讐。逞兇撓法。何所底止。豈辟以止辟之義耶。周元理引律不當。著飭行。此案著照部議。交周元理。另行照律改擬具題。並將此通諭內外。問刑衙門知之。○諭軍機大臣等。據圖思德奏。自乾隆三十二。三。等年。辦銅短絀。已不敷額運之數。又將瀘店底銅。撥給外省。辦理益形拮据。懇將領運京銅。展至次年正月開幫。七月掃幫。俾厥期寬展。得以從容辦理。不致再有貽誤等語。滇省銅運。前據戶部奏。額運京銅。開行延緩。請將管廠各員。並專轄之司道。以及從前奏報不實之督撫。查明議處。當經依議允行。並傳旨申飭圖思德。令其明白。回

奏並令李侍堯、裴宗錫妥議具奏矣。今圖思德復以瀘店並無底銅，另請展限。此摺若批交部議，該部必按例議駁。於籌辦銅務全局，不能實有裨益。今李侍堯已赴新任，阿桂亦在滇省。兩人皆能辦事之人，著即傳諭令其會同悉心通盤籌畫。將此後如何採辦足額籌備底銅充裕，以期趕赴例限，不致廠運各員再有短少遲延之處。悉心妥議，據實具奏。再圖思德前所奏得魯蘊等遣緬目孟幹等

來關之事，今又隔數日，節蓋等有無來信，亦即據實速奏。況欽差前往之事，亦有關係，何以結局。著將此由六百里傳諭阿桂、李侍堯知之。其圖思德所奏銅運一摺，並著鈔寄閱看。○大學士管兩江總督高晉覆奏清黃分流，直至周家莊匯歸東注，與黃河下游各工并老壩口工程均無妨礙。新河頭現在刷寬至七十餘丈，河身河尾現寬五六十丈，河底水深一丈四五尺，兩岸尚高出二三尺，兩岸

應築隄工。南岸就陶莊積土翻築。北岸以越作縷，加高培厚。從前會奏，因舊河口尚未竣工，未經繪圖。昨形勢大局既定，已由河臣薩載繪圖奏聞，得旨覽奏俱悉。○旌表守正捐軀安徽當塗縣民賈鼎臣妻蔣氏。○乙亥，上詣九經三事殿。

大行皇太后梓宮前供奠。○祭先農之神。遣平郡王慶恒行禮。○諭朕於本月十六日恭閱

大行皇太后冊寶後，送往

九經三事殿。大禮攸關，甚為緊要。一切典禮，自應敬謹酌定。其恭送時，著交領侍衛內大臣奏派前引大臣十員，同禮部堂官在前導引。仍派後護侍衛十對，照管行走。領侍衛內大臣，在後帶領後護隨行。前引黃繖著交鑾儀衛用九鳳曲柄黃繖。侍衛執提鑪，其部議前引御仗二對，著不必用。○江南河道總督薩載覆奏老黃壩工程北岸縷越隄工，分別加

培高厚。陶莊積土外。添築新隄一道。其南岸一帶老隄。直至清口舊西壩止。均屬高厚。東首河灘。今春舊河口築壩時。即於灘上斜築攔水隄一道。長一百四十丈。業於二月二十八日。繪圖貼說奏聞。至建廟地基。擬在新河頭。舊河口。適中地方建立。謹繪圖貼說覆奏。得旨。覽。汝不日即面會。一切再細講。○予故郭爾羅斯扎薩克鎮國公錫喇博第祭如例。○旌表守正捐軀直隸南宮縣民趙大妻張氏。○丙子。江南河道總督薩載奏。查舊河清黃界壩。計寬九丈。督臣高晉。自工起身時。原存上口七丈。下口五丈。臣日夜駐工。督率辦理。於二月二十四日。平安合龍。其時口門下水。離壩三四丈外。間有翻花黃水。臣又督令實力追壓。上加厚土。旋即閉氣。上下察看。壩外水已澄清。壩內停淤。甚為穩固。斷不敢輕信人言。草率完局。報聞。○浙江巡撫三寶疏報。慈谿縣鳴鶴場壑復沙塗五百五十五畝。

有奇。○丁丑。

孝賢皇后忌辰。遣官祭

陵寢。○諭曰。喀喇沁王喇特納錫第等。聞四阿哥之事。來請朕安。其餘蒙古王公額駙台吉等。聞信後。必有趕來者。但伊等近日纔回游牧。且時令亦漸暑熱。伊等往返勞苦。朕心甚為不忍。著交該衙門。即速行文。將欲來者。概行停止。○諭軍機大臣等。前經傳諭阿桂李侍堯等。將得魯蘊等還人進貢一事。悉心會商。嚴密妥辦。至欽差前往。尤有關係。將來如何結局。阿桂等奉到此旨。自即遵照籌辦。迅速覆奏。今已隔數日。未見圖思德等奏到節蓋。孟幹等信息。實深盼望。看來此次還人進貢。原係得魯蘊希圖開關。有益於彼。即滇省商民。及地方文武各員。亦無不欲開關了事。圖思德。長清等。據屬員所稟具奏。其中似不無粉飾之處。至從前圖思德屢次奏聞。還人進貢之摺。專係據得魯蘊來稟。昨所奏摺內。

譯出緬稟。又有綻拉機名字。查從前乾隆三十八年。彭寶奏。與得夾供內。老官也。沒到過。只聽得換了頭目綻拉機。那舊頭目諾爾塔。因辦事不好。調到阿瓦。已經殺了等語。是綻拉機原在老官也。得魯蘊在木邦。何以兩人又同在一處辦事。均應密訪確實奏聞。再綻拉機。與得魯蘊意見不合。贅角牙此時必偏向一人。就目前情形而論。緬匪忽求差官到馬脖子面商一切。明係綻拉機從中作梗。贅角牙偏聽其言。若果如此。則得魯蘊計議不行。伊必心生疑懼。或可乘此機會。設法招致。如果得魯蘊帶其所轄木邦人衆前來投誠。亦係好事。朕必加恩賞以官職。且可得緬匪真實信息。此朕偶然想及。不過如偏方治病之類。或可如此辦理。阿桂深悉緬地情形。著與李侍堯。相度機宜。悉心籌畫。此時已屆三月。轉瞬間瘴氣即起。難通信息。阿桂係欽差前往受降之人。衆共聞知。試思若不能結局。

延至秋深。又將如何辦理。朕心深為厯念。著阿桂。李侍堯。將此等關係緊要情形。一一熟籌詳議。迅速由六百里覆奏。此旨著由六百里發往。○戊寅。上詣九經三事殿。大行皇太后梓宮前供奠。○以吏部侍郎邁拉遜。為左都御史。○命原任雲南布政使王太岳。在四庫全書館總纂上行走。○補行四川省乾隆三十七年。及乾隆四十年。三次大計。卓異官十二員。不謹官一員。罷軟官一員。年老官十一員。有疾官四員。才力不及官三員。分別議敘處分如例。○己卯。上詣雍和宮行禮。○還宮。○以福建漳州鎮總兵董果。臺灣鎮總兵顏鳴皋。對調。○予故履郡王永城謚曰端。○庚辰。諭據鐘音奏。福寧鎮總兵官德滋。因患痰喘。不能動履。醫治難痊。請予休致。回籍調理等語。官德滋著准其以原

品休致。所有福建福寧鎮總兵員缺。著常泰

補授。○諭軍機大臣等。前據黃檢奏報。於正

月二十五。六等日。得雪四五寸。嗣已延三回

任後。二月二十二日。奏到各摺內。並無報雨

之摺。茲據陝甘總督勒爾謹奏。於二月十九

二十等日。得雨七八寸。山西距陝甘不遠。何

以未見奏到。該省自正月後。是否得雨。麥苗

望澤甚殷。朕心深為廕念。著將此由四百里

傳諭已延三。即速查明據實覆奏。○以故浩

平報入二二

三

齊特扎薩克多羅郡王達什喇布坦子敏珠

爾多爾濟襲爵。○辛巳。以恭上

大行皇太后尊謚。遣官祇告

天。

地。

太廟。

奉先殿。

社。

稷。○諭前以恭奉

大行皇太后冊寶。送

九經三事殿事關大典。最為緊要。所有前引大

臣。帶豹尾槍行走之領侍衛內大臣。並前引

後護侍衛等。俱經特行揀派。至恭請

梓宮奉安

地宮後。恭奉

神牌回時。所關更重。所有應派大臣侍衛及一

切應行事宜。俱著照恭送

冊

實錄卷十二

三

寶之例行。○又諭。四月十四日。恭奉

大行皇太后梓宮前往

泰東陵。福隆安。豐昇額。俱應隨往。所有步軍統

領印務。著英廉在京署理。協辦大學士程景

伊著派隨往。同大學士舒赫德。豫備題

主事宜。

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十八

實錄卷一千二十八

十五

大清高宗法天隆運至誠先覺體元立極敷文
奮武孝慈神聖純皇帝實錄卷之一千二十九

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉三月壬午恭上

實錄卷一千二十九

大行皇太后尊謚

上素服詣太和門恭閱

冊

寶行三拜禮由別道出神武門豫詣暢春園大

宮門外幄次易編素祇奠

冊

寶至跪迎隨入屆時

上就拜位率羣臣行九拜禮興跪進

冊

寶。

上行九拜禮。迺行致祭禮。奠帛。讀祝。三獻爵。均

如儀。禮成。○迴圓明園。○

冊文曰。崇儀告備。薦玉策以伸虔。

懿行垂光。勒琅函而闡寶。報劬勞之

厚德。禮洽馨聞。嚴對越之

鴻名。義隆睿作。欽惟

皇妣大行皇太后。

順體天經。

化彰人極。

萱庭示範。仰宮中之有

聖人。瑤甸歸仁。臨天下而為

大母。自流徽於京室。荷篤慶於藐躬。億兆騰歡。

萃萬方為尊養。曾元衍瑞。裕五世以融怡。緬

義訓之常昭。洵颺言之莫罄。賁

鳳綸而賜復。澤及葭蓬。扶

翟輅以觀民。呼鯨萬岱。益圖旅賀。來庭之鷄鵲

駢臻。偃伯承

禧。絕徽之干戈並戢。是皆

慈暉普照。覃徽漸而含和。用能

純履康綏。麗乾坤而集福。憶昨者金泥絢祝。十

八字疊演。算疇冀來茲寶琚鐫華。億萬齡重

增姬算。惟愛景情殷

顧復。依旬之臚頌何窮。宜

慈躬祉懋升恒。晉冊之揚麻未艾。何

升遐之忽覲。竟攀慟之難追。率土纏悲。終天銜

恤。肇

尊稱於殷禮。念形容無得而名。稽上諡於周書。

極擬議於斯為盛。有

孝實原有德。本百行於地天。乃

聖即協乃神。婉獨隆於堯舜。一詞莫贊。敢憑素

悃以追攀。萬世為公。並詢僉言而咸翕。爰遵

彝典。請命於

天。謹奉

冊

寶。上尊謚曰。

孝聖慈宣康惠敦和敬天光聖憲皇后於戲。朔
璣闡徽音大行。宜特隆冠古之聲。頌清廟昌後
燕天庶稍展崇

親之愜伏冀

神靈式妥

陟降在茲。文琬貽型。抒慕誠之罔極。彤毫述德。
荷申錫於無疆。宏啟嘉符。茂昌景祚。謹言。○
癸未。定科場酌用虛字例。諭。昨檢閱內廷舊
存摺奏內有康熙五十六年。詹事王奕清密

奏。請於考官入闈後。即諭謄錄官。凡七藝中
破承開講等虛字。概不謄寫。以防關節等語。
王奕清所奏。自屬防弊之一法。但將破承起
講等虛字。概不謄寫。於文理既不明順。且篇
幅不完。體制尤多未協。朕思與其暗防弊竇。
不若明示章程。況近今鄉會頭場。改為書藝
三篇。尤易防範。嗣後令順天。及各省主考官。
於刊發題目時。即酌定三篇內承題。起講。應
用虛字。明白開列。另行刊印一紙。分給舉子。

如此科首篇承題用夫字。次篇用蓋字。三篇
用甚矣。起講首篇用今夫。次篇用且夫。三篇
用嘗思之類。即將此等承講虛字。錯綜更換。
總聽主考官臨期酌定。俾眾共聞。知通場一
體遵用。違者貼出。如此於不齊之中。寓以齊
則雖欲暗藏關節。應無所施其伎倆。而定以
主考官臨期酌定。不出之房官之手。則士子
無從摹擬。不致別生弊竇。於防範更為周密。
至會試。亦著照此例行。將此旨通諭中外。並
刊入科場條例。○諭軍機大臣等。昨因已延
三回任後。並無報雨之摺。令其查明覆奏。今
據該撫奏到。二月十九。二十等日。省城得雪。
除融化入土二寸外。積地尚厚四寸。其餘各
屬。亦各得雨雪三四寸。至八九寸不等等語。
雨雪為二麥所關。朕心時為廛切。自應隨時
奏報。乃陝甘遠省。以十九。二十之雨。早經奏
到。晉省獨遲之至今。始行奏聞。實屬延緩。且
二月已屆春深。何以晉省尚報得雪。未聞得

雨該處天氣本寒。是否於麥苗無礙。摺內亦未詳悉聲明。已延三著傳旨申飭。仍將現在有無續得時雨之處。迅速據實覆奏。○又諭上年因索琳奏稱。德布色克地方平頂山產有煤苗。請招商開採。當經降旨。令常青。已延三會同覈查定議具奏。茲據已延三等奏稱。平頂山所產煤苗。創試之初。線路尚寬。久而壠口稍深。漸次微細。開鑿深入。俱係煤石相間。難以成窰。應請封閉等語。平頂山煤苗微細。即開採亦屬有名無實。自應封閉。但既經查明實在情形。何以不即時具奏。遲待試採一年。始知迄無成效。所奏亦屬遲延。可將此諭令常青。已延三等知之。○甲申。

上詣

安佑宮行禮。○貝子允祁。以未參滿斗罪降鎮國公。輔國公寧盛額。降不入八分輔國公。○

乙酉。

上詣九經三事殿。

孝聖憲皇后梓宮前。行二滿月祭禮。○諭香山各項陳設。著派福康安前往查明。交與該苑丞收貯。盤山各項陳設。著派保寧會同嘉謨查辦。兩處查辦之後。所有太監。均即撤回。其盤山太監人數無多。著撥在圓明園當差。至香山太監較多。著分撥圓明園一分。清漪園靜明園一分。瀛臺三海一分。令其當差。○命馬蘭鎮總兵保寧兼總管內務府大臣。同公允祁總管內務府大臣嘉謨管

陵寢事務。○河南巡撫徐績奏。河南省城二月十九二十等日。得有透雪。續據九府四州所屬稟報。均得雨雪。二麥長發。可期大稔。得旨看此。則三月尚未得雨。覺望澤否。○丙戌。諭現將綿德錫封公爵。綿恩襲封王爵。嗣後不必檮寫阿哥字樣。即寫伊等現封之爵。再朕諸孫。雖皆係內廷阿哥。凡遇應書之處。亦不必檮寫。○又諭。據理藩院奏。喀爾喀土謝圖汗車登多爾濟報稱。汗山盟長親王齊巴克

雅喇木丕勒病故等語。齊巴克雅喇木丕勒曾在軍營。甚為出力。今聞溘逝。殊堪憫惻。著施恩賞銀五百兩。遣散秩大臣一員。往奠茶酒。○又諭烏魯木齊從前因有滿洲兵丁。及厄魯特兵丁。曾補放領隊大臣二員管理。今厄魯特兵。俱經移駐塔爾巴哈台。烏魯木齊滿兵無多。有都統一員。副都統一員。足資管理。不必補放領隊大臣二員。分翼管轄。全簡即留烏魯木齊。授為領隊大臣。協同索諾木

策凌管理滿兵。永慶著來京。○又諭據常青等奏稱。察哈爾八旗所屬佐領多寡不同。事務繁簡不一。而總管等辦事。亦有優長。循分供職之不同。請將總管等對調補用等語。常青等所奏是。自應酌量人材調補。即著照伊等所奏。將正藍旗總管溫布。調補正黃旗。正紅旗總管伊爾古。調補正藍旗。其正黃旗總管敏珠爾。多爾濟。著調補正紅旗。○戊子。諭曰。瑚世泰。轉補吏部左侍郎。慶桂。調補右侍

郎。○又諭曰。慶桂吏部右侍郎員缺。著福康安暫行署理。索琳著補授理藩院侍郎。仍令富興署理。○又諭曰。法福禮著前往西寧駐劄辦事。更換惠齡來京。法福禮員缺。著授恒山保為叅贊大臣。前往烏里雅蘇台辦事。○諭軍機大臣等。前因巴延三報雨遲延。是以降旨查詢。令其據實覆奏。乃昨三月十七日。始據奏報。二月十九。二十等日得雪。已屬太遲。其摺內將三月初五。初十日。續得雨雪分寸。牽混叙入。於後竟似得雪而未得雨。而某府州得雨雪幾寸。究未分別聲叙。披閱之下。殊不明晰。今於二十二日覆奏摺內。則止稱連得甘霖。通省霑透。亦不分叙府分。且兩摺內感名休和。白叟黃童。賡揚帝德等語。鋪張文飾。尤屬無謂。各省奏報雨澤。民瘼攸關。惟應據實查明。即時入告。乃巴延三遲至經月始奏。及經查詢。又復牽混不清。殊屬非是。已延三。著傳旨申飭。○以通政使司副使王昶

為大理寺卿。○己丑。

上詣九經三事殿。

孝聖憲皇后梓宮前供奠。○諭軍機大臣等。現今法福禮前往西寧辦事。更換惠齡來京。以恒山保為烏里雅蘇台叅贊大臣矣。著傳諭法福禮奉到此旨。不必速赴西寧。俟恒山保抵烏里雅蘇台。伊來京請訓後。再往更換惠齡。○又諭。據勒爾謹奏。蘭州府知府蔣全迪久任甘省。為知府中出色之員。懇恩以該員補授甘肅驛傳道缺。實於地方有益等語。朕因蔣全迪來京引見時。觀其材具。尚可勝任道員。曾經密記。是以降旨將伊補放。並非因勒爾謹此次保奏之故。監司大員。有董率屬員之責。向來缺出。俱候朕簡放。非督撫所應干與。乃該督輒將知府蔣全迪奏請補授。殊屬非是。若此端一開。嗣後皆得援以為例。致啟屬員營求干謁之漸。於政體大有關係。勒爾謹著傳旨申飭。○又諭。據阿揚阿。高晉奏。

查明琨玉別無虧空。將王顯緒。李秉義等分別解京質審一摺。所奏殊未明晰。此案經阿揚阿。高晉叅奏。既將王顯緒押至定遠。自應面加審問。錄敘供詞具奏。阿揚阿係專差前往審案大員。並非僅令提解人犯。高晉雖係原保上司。但經朕久加任用。令其會同查辦。伊亦有何可引之嫌。從前王顯緒等未經到案。尚得諉為未見。今王顯緒。李秉義俱已提到。其因何發給琨玉銀兩。是否與李秉義同具印領。抑係琨玉私用戳記。冒領肥己。何以擅行發給。其與琨玉有無別項情弊。及李秉義稟明並未領銀到庫。何以不行揭叅之處。俱應逐一根究。乃並無隻字提及。實出情理之外。即使伊等審明現在情節。有與原叅不符之處。何妨據實檢舉。其處分亦不甚重。何以全未慮及。一味模糊了事。僅以解京審訊即可置之不問耶。阿揚阿。高晉辦理此案。實屬非是。著傳旨申飭。並令其將何以不措一

詞處明白回奏。此旨著由四百里傳諭知之。
○庚寅諭。今日據劉墉奏。昨進四庫全書內少陽集。謄寫錯字。伊未經看出。請交部議處。一摺。四庫全書。謄寫屢有錯誤。經朕指出更正者不少。若不定以處分。將來魯魚亥豕。累牘連篇。成何事體。但將奏請處分之人交部。其未經奏請者。轉得置身局外。何以得情理之平。著自今年正月起。所有進過書籍訛錯之處。交軍機大臣通行查覈。經朕看出錯訛者。其分校覆校名下。錯至兩次。總裁名下所校。錯至三次者。均著查明。奏請交部議處。處分原輕。不過示以知愧。既已分閱。可不悉心乎。此後著交軍機大臣照此。每三月一次查辦奏聞。其總纂官紀昀。陸錫熊。總校官陸費墀。所辦書籍既多。竟應免其處分。而伊等應更詳慎辦理。期於無誤。設或因此稍有懈弛。則非朕體恤伊等之意矣。將此諭令四庫館總裁等知之。○又諭。齊巴克雅刺木丕勒

所遺盟長員缺。著土謝圖汗車登多爾濟補授。三都布多爾濟所遺副盟長員缺。著郡王銜貝子達什丕勒補授。車登多爾濟所遺副將軍員缺。著桑齋多爾濟補授。○又諭。錦山並未出兵。且清語生疎。不勝總兵之任。著離任。授為二等侍衛。在大門上行走。○諭軍機大臣等。據陳輝祖奏。護安襄鄖道姚茶。率同知府沈樹聲。知縣馬乾怡。史湛等。將逆犯嚴金龍案內。應行緣坐之嚴韓氏。何李氏等。及應遣之張志高等。共七十二名。拏獲分別定擬等因。一摺。已批交該部議奏矣。姚茶等於逆案內。未經緝獲之犯。能悉心體訪。前後緝獲多犯。頗屬能事。姚茶已於上年因係舊記可用之人。特調漳州府繁缺。此案是否即係姚茶訪查。抑係沈樹聲等分投訪緝。著傳諭陳輝祖。據實查明覆奏。並將知府沈樹聲。知縣馬乾怡。署知縣史湛等。平日居官如何之處。一併確查。如尚能實心辦事。即著出具切

實考語。給咨送部引見。○以湖南沅州協副將郝壯猷。為福建寧鎮總兵。○旌表守正捐軀河南嵩縣民仝四妻張氏。○辛卯。諭曰。尚書公奎林。著馳驛前往張家口。查辦事件。○山西巡撫巴延三覆奏。晉省山多氣冷。南北相距二千餘里。更寒燠迴殊。本年二月十九。二十。二十七等日。通有雨雪。雖暫時存積。旋即融消。至三月初五。初十等日。省南均係得雨。省北多係得雪。查省南各府州。二月內所得之雪。俱隨時融化。於麥苗並無妨礙。至省北向無冬麥。尤屬無妨。再晉省於十八日夜。及十九日。太原府屬。復得雨四五寸不等。澍澤甚普。得旨。若諸事如此糊塗。如之何可。○壬辰。

上詣九經三事殿。

孝聖憲皇后梓宮前供奠。○諭軍機大臣等。今日據阿桂李侍堯等奏。先後行抵雲南省城。面商籌辦緬匪事宜。內稱圖思德所奏。得魯

蘊遣孟幹等到關。藉詞象隻未到。並請差官赴馬脖子。與節蓋說話。經提臣等。將孟幹暫留。飭令跟役。先後前往曉諭。節蓋不敢進關。迄今尚未據圖思德等知會信息。計此時瘴癘盛發。目下已無可辦。前說似覺荒唐。臣等即起程前赴永昌。察看情形。面商另奏等語。所奏是。已於摺內批示矣。蓋開關通商一事。自圖思德。以至滇省文武官民人等。無不願為。想因適有得魯蘊遣人來稟。遂皆從憑稟報。圖思德輒據以入奏。經朕洞燭情偽。明晰諭知。今果不出朕所料。至進貢還人之事。係得魯蘊先遣人稟知。何以中途反覆。藉詞象隻未到。又添出與綻拉機商量情節。並請差官赴馬脖子。與節蓋說話等情。種種支離謬妄。可惡已極。此事係得魯蘊先發其端。並非自我而起。今節蓋既不敢進關。朕意以為竟應或用計。或用力。使幹弁帶兵一二百。至馬脖子。將節蓋拏進關內。詢以得魯蘊何故如

此說謊。其意竟欲何為。訊得實情。即應將節蓋留住。另遣伊手下明白夷目回緬。曉諭得魯蘊等。以此事從前緬匪敢於將蘇爾相等扣留。則此時拿獲節蓋留住。實所應當。況此次貢象還人之說。由爾等先行具稟。今忽又反覆。豈有不拏人究問明白之理。如此傳諭詰問得魯蘊等。諒伊亦無可置辯。即因此復生事端。伊如果敢於侵犯邊境。則正可乘此機宜。以逸待勞。大加懲創。滇省兵力。亦儘可辦理。蓋進兵往緬。則尚限於地勢氣候。恐徒傷病我人。故不肯用兵。若彼既離巢遠來。至我邊境。則剿殺實不為難。朕意定以如此辦理。著傳諭阿桂。李侍堯。悉心籌酌。一面辦理。一面奏聞。自古中國之駕馭外夷。自應示之以威。令其懾服。則可保邊境寧謐。若稍存將就姑息之見。則是示之以弱。未有不因此受害。此理甚明。恐啟邊釁。乃漢唐宋無能為之言。非我大清國全盛時之言也。阿桂。李侍

堯等。皆通達事務之人。自應見及於此。圖思德。長清。各有本任事務。今緬匪現在既無可辦之處。留駐於彼。亦屬無益。自應各令回任。將此由六百里加緊發往。仍即速回奏。諭令阿桂。李侍堯等知之。○癸巳。大學士管兩江總督高晉奏。提訊滁州書役王兆禮等。據供琨玉發給辦賑公費。係二月前事。其琨玉在司領銀。乃三月後事。伊等并未續領。即訊之已革把總張廷棟供稱。係正二月內作保。此後不知。李秉義亦堅以琨玉領銀未經歸款是實。與原叅情節無異。是以前次未將供詞錄叙。至王顯緒。始則照領給發。繼又不肯揭叅。現有提到案據為憑。因其有心徇隱。無可置辯。是以未加審問。實屬糊塗。惟求交部從重議處。得旨。汝實不應如此糊塗。總俟案定有旨。○甲午。河南巡撫徐績覆奏。三月內。據開歸等九府及許。汝。陝。光。四州。暨所屬各州縣。節次稟報。於初十。十八。二十等日。得雨二

三寸至五六寸。暨深透不等。省城亦於二十三日得雨二寸。河南府陝州雨勢尤大。二麥現已吐穗。楊花俱極暢茂。報聞。○旌表守正捐軀山東膠州民仇小成。聘妻遲氏。○乙未諭。據周元理奏。滿城縣馬夫。遞送軍機處發貴州巡撫圖思德公文一角。提督長清海祿公文一角。俱係限日行六百里加緊。乃黑夜遺失。徧尋無獲。請將滿城縣知縣謝燿革職。該管上司交部議處等語。遞送六百里加緊公文。關係緊要。理應慎重馳送。何至中途遺失。實從來所未有。著軍機大臣。即行查照補發。其漫不經心之滿城縣知縣謝燿。著革職。該管知府劉致中。著交部嚴加議處。周元理達爾吉善著交部察議。○又諭。昨理藩院具奏。准伊犁將軍伊勒圖咨報。土爾扈特親王策伯克多爾濟。於本年四月完婚。今遇皇太后大故。暫且停止。聽候部議。朕已降旨。不必令其停止。聽其自便矣。所有扎薩克喀爾

喀等衆蒙古。感戴朕恩。或照京城王公大臣一體停止嫁娶。亦未可定。此次

皇太后大故。蒙古王公額駙台吉。均聞信赴京成服叩謁。

梓宮與朕請安。意甚誠篤。深堪嘉獎。伊等已屬盡心。若再停止嫁娶。伊等俱係生長口外。何必拘照內地之例。著交該部通行曉諭。各蒙古王公扎薩克等。令其不必停止嫁娶。聽其自便。此內如有指配近派宗室格格者。與衆

不同。仍俟二十七個月後完婚。○軍機大臣等奏。遵查承辦未竣書籍。共十六種。內通典通志二書。派有專管總裁。日下舊聞考亦派有總裁。惟一統志西域圖志及遼元明史熱河志。明紀綱目通鑑輯覽音韻述微太學志等書。未經特派。應派專管之員。責成定限速纂。並統交稽查上諭處稽查。至蒙古源流一書。內有翻切對音之處。又臨清紀畧金川方畧。詳悉原委。亦須一手編纂。請仍交軍機處

趕辦得旨。依議。蒙古源流。著派舒赫德。奎林。臨清紀畧。著派舒赫德。彭元瑞。金川方畧。著派福隆安。豐昇額。一統志。著派袁守侗。和珅。西域圖志。著派福康安。劉墉。元史。遼史。俱著派金簡。錢汝誠。明紀綱目。著派和珅。彭元瑞。明史。著派英廉。錢汝誠。通鑒輯覽。熱河志。俱著派梁國治。和珅。通志。通典。俱著派錢汝誠。彭元瑞。日下舊聞考。著派英廉。劉墉。音韻述微。太學志。俱著派梁國治。金士松。○定直省彙奏各款限期。軍機大臣議奏。向例各省甄別教職等十款。定於年內具奏。藩庫實存銀數等六款。定於開印後具奏。臣等統於三月中查覈。止分別年內開印。未經立有一定日期。是以各省督撫。每有遲誤。查彙奏並非難辦之事。各省程站有定日期。可以先行扣算。請嗣後各省彙奏事件。應年內具奏者。近省於十二月初十內。遠省於十二月二十內。奏到。不得過封印日期。應開印具奏者。亦總於

正月內拜發。不得遲至二月。如有遲逾。查覈叅奏。從之。○是月。欽差吏部侍郎劉秉恬奏。臣以吏部侍郎。在川辦理各路報銷。及臣本管段內銷冊。向無關防印信。凡一切行文事件。俱係向鄂寶。富勒渾處借用。所存欽差大臣關防一顆。嗣以成都將軍印信尚未頒到。暫留明亮處行用。近將軍印信已到。舒常署理提督。俱無用處。現擬派員齎送恭繳。臣現在辦事。有需用關防之處。相應奏明。留於臣處行用。於辦公更昭慎重。從之。○調雲南巡撫現任貴州巡撫裴宗錫奏。黔省古州一帶。均係新闢苗疆。其間有著名牛皮大箐者。綿長數百餘里。東連八寨。南接丹江。西通古州。清江。台拱。北枕都江。山深林密。人跡罕經。乾隆元年。列屯置軍。僅在各廳腹地。獨此箐未經議及。臣思苗疆重地。非可因承平無事。稍存怠忽。求其防慮周備。莫若寓防於屯。查該箐坦壤

可墾者甚少。惟山半腰以南。名雷公地。丹江廳所屬。約可墾田四五百畝。又雷公地以下。有歐牧勇荒蒿菁一處。約可墾田三四百畝。此地山菁深險。開墾之利小。而藏匿之害大。況各衛屯軍。生齒日繁。額田每虞不給。今既有可墾平原。應令附近之威震等堡屯軍。派撥子姪人等。赴菁認段試墾。責成丹江廳稽查。毋許流匪竄入滋事。俟墾熟。即在該處立堡。以資防守。再請於四十里之雞溝汛。抽撥千總一員。兵丁五十名。擇適中處。設卡駐守。以資控制。得旨。此事所辦甚可嘉。可謂留心封疆之大臣。交圖思德。妥為之。

大清高宗法天隆運至誠先覺體元立極敷文奮武孝慈神聖純皇帝實錄卷之一千二十九

大清高宗法天隆運至誠先覺體元立極敷文奮武孝慈神聖純皇帝實錄卷之一千三十

監修總裁官總纂官太子太傅文淵閣大學士文淵閣領閣事領侍衛內大臣稽察欽奉 上諭事務處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣履桂

總裁官監修纂官太子太傅文華殿大學士文淵閣領閣事稽察欽奉 上諭事務處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書保蘇麟滿洲都統軍功紀錄五次

尋常紀錄十四次臣德瑛監修纂官太子少保工部尚書紀錄六次臣曹振鏞等奉

敕修

乾隆四十二年丁酉夏四月丙申朔享

實錄卷一千三十

太廟遣怡親王弘曉恭代行禮。○諭曰。倪承寬。

汪永錫現在尚書房無事。倪承寬著同朱珪。

在十五阿哥處課讀。汪永錫著同阿肅。在十

七阿哥處課讀。○諭軍機大臣等。今日戶部

奏稱。於巡漕御史王猷報鉛錫過境公文內。

拆有崔莊宗選。控告山東泰安縣民嚴光玉

等。不法悖逆呈詞一紙。閱其語多謬妄。字亦

訛錯。自係挾嫌誣控。未必實有其事。但既經

呈控。自不可不嚴密確查。究明虛實。且印封

內。何以私行裝入此等呈詞。其於何站裝入

何人寫作之處。尤應逐站挨查。務使正犯弋

獲。從重懲治。查封面有從平原縣原來。與德

州景州無干等語。則此案弊端。自應即在德

州以上各站。著將逆詞並原來官封。發交國

泰。即行查照嚴密辦理覆奏。將此由四百里

傳諭知之。尋奏臨清知州前任泰安縣知縣

王溥。熟悉該處情形。委赴崔家莊。查訊嚴光

玉。並無不法形跡。隨向驛號究出。貼寫朱立

實錄卷一千三十

德素與嚴光玉有隙。私撰逆詞。捏寫宗選姓

名。裝入公文誣陷。得旨好。王溥可謂能事。○

丁酉。

上詣九經三事殿。

孝聖憲皇后梓宮前供奠。○諭軍機大臣等。前

因彭理來京陛見時。看其年力已衰。不勝臬

司之任。加恩降旨以京堂補用。自應在京靜

候。乃伊於該旗佐領處具呈。請將伊原典買

價銀四千四百餘兩之房產。繳抵分賠代賠

銀二萬六千餘兩。並稱此外別無房產。實係盡絕。並無絲毫隱匿。餘俟補官日。將俸銀扣繳等情。所呈實屬取巧。旗員追賠官項。自應遵照例限。按期完納。如果家產盡絕。力不能完。方准其由佐領族長。取具結狀。呈明都統查辦。豈有分毫未經交納。輒請將房屋繳抵之理。彭理久經外任。家產何以僅止此數。況聞彭理此次來京。不過隨身行李。跟役亦止二三人。如此行徑。尤非情理。是必伊於進京

實錄卷一千

三

之先。豫為安置停妥。是以一聞留京。遂亟呈繳家產。向來漢軍習氣。多於外任私置產業。以為日後安享地步。彭理久任湖廣。雲南。豈不防慮及此。所有伊歷官處所。隱匿寄頓。或於直隸近京地方。私置產業。諒所不免。著傳諭周元理。李侍堯。裴宗錫。陳輝祖。敦福。於彭理歷任各屬。及近京州縣。密訪嚴查。有無隱匿寄頓財產物件之處。逐一詳查。據實覆奏。毋稍徇縱。亦不得聲張滋擾。○又諭本日

已延三奏到屬員賢否摺。首行為密奏事。朕意該省或有別項緊要之事。及閱至下文。乃係遵旨陳奏屬員賢否單。殊屬不通。已於摺內批抹矣。各省督撫。體察屬員賢否。詳悉註考。開單入奏。留備檢閱。從未發出。至摺內不過照例聲敘。況此次係接奉明旨。遵照辦理。更毋庸密奏。已延三於摺奏事件。行文不通至是。若辦理地方要務。亦如此不通。何以勝封疆重任耶。已延三著傳旨申飭。○欽差侍

實錄卷一千

四

郎阿揚阿覆奏。琨玉冒領辦賑公費銀三千二百兩。係豫用空白文。捏寫李秉義名。連銜朦領。旋即入京。李秉義曾具詳辨明。藩司王顯緒。徇庇未叅。臣從前未經錄供具奏。實屬糊塗。得旨該部查議具奏。尋議。應照不據實查辦例。降一級調用。係革職留任之員。無級可降。應行革任。得旨阿揚阿著從寬免其革任。仍註冊。○戊戌。諭四月初六日。舉行

常雩典禮。例遣親王恭代。敬念

天壇。

地壇。

祈穀壇大祀。禮尤尊重。更非

太廟可比。所有上

壇承祭執事之人。自宜蠲潔將事。以肅精禋。況看守

郊壇人員。遇有大事。並不摘冠纓。而祭時朝服樂章。又一切如常。未便仍留長髮從事。現在派出承祭之親王。及

壇上執事官員。俱著先行薙髮。再進

壇行禮。用申誠敬。其陪祀各員。在

壇壝以外者。毋庸論。將此永著為令。○諭軍機大臣等。據弘昉奏副總管達明阿將已馬在官所餵養。以致羊瘦等語。

陵寢備祭牛羊。所關綦要。似此弊端。皆由該大臣漫無稽察所致。著傳諭各總管嗣後務宜加意嚴查。飼養肥壯供用。如再有此弊。即行參奏治罪。○諭軍機大臣等。前此屢經傳諭

阿桂。李侍堯。令其悉心籌辦。得魯蘊等差人進貢。並往拏節蓋一事。此時諒可陸續接奉。相機妥辦矣。前因圖思德等奏得魯蘊約定日期。貢象還人。確鑿有據。是以專差阿桂。赴滇辦理。開關受降等事。而善後事宜。則非圖思德所能辦。因特調李侍堯為雲貴總督。董率文武。實心妥辦。並令阿桂於受降事後。將關隘應行查覈章程各機要。告之李侍堯。酌量妥辦。阿桂即可回京。昨據阿桂奏。緬匪迄

今尚無信息。目下瘴氣盛發。已無可辦。前說似竟荒唐等語。則從前圖思德所奏。實被通省文武商民人等惑通。冀圖將就了事。露有端倪。致得魯蘊等窺破。翻行捏說欺朦。而圖思德等復為所愚耳。至昨降旨令阿桂或用計。或用力。選派幹弁。帶兵一二百。至馬脖子。將節蓋拏進關內。審問確供。在天朝體制。自應如此。但節蓋果否實在馬脖子地方。殊難深信。且馬脖子距老官屯不遠。似無令節蓋

在彼獨住之理。不過飾為此言。欲誘內地官員出外。復為羈留耳。此等情形。阿桂自能籌度妥辦。如因瘴氣已盛。兵弁難以出關。阿桂自亦能悉心酌定。若得魯蘊等既無消息。而節蓋之事。又難往拏。則阿桂在滇並無可辦之處。若留駐永昌。坐待緬匪納貢誑言。更覺不成事體。阿桂只須將交彼會同李侍堯辦理之事。告明李侍堯。及查辦銅鹽諸事完畢。即可回京。至於嚴守關隘。設法稽查。及每年

一
卷一百三十一

七

無庸多派提督等。統兵防邊之處。其大綱細目。阿桂自當與李侍堯面為酌定。即起程來京。李侍堯素稱能事。自必實心籌辦。且以本省總督。在彼專辦。則事權歸一。更可期有成效。李侍堯諒能善體朕心。不負委任也。將此由六百里加緊傳諭阿桂。李侍堯知之。仍令將遵辦緣由。先行迅速覆奏。尋奏四月十五日。據報綻拉機節蓋已將蘇爾相由馬脖子退回賊巢。事無可辦。若再試探。恐為所輕。批。

一
卷一百三十一

七

是圖思德何能見及此。故為其所愚耳。又奏張鳳銜一帶兵。撤回避瘴。並令弁目等。不與緬夷稍通言語。會辦銅鹽事竣。臣阿桂即回京。得旨知道了。該部知道。○吏部帶領王大臣京察驗看之四五品京堂通政使司叅議陳孝泳等。四十二員引見。得旨陳孝泳。江蘭緒。廷璋。陸錫熊。德昌。紀昀。陸費墀。準泰。俱准其一等。博通阿。色布騰。俱著降二級調用。德成。德成格。朱奎揚。良格。陳科捷。俱著以原品休致。良格所遺太僕寺少卿員缺。著國子監祭酒良誠調補。○庚子。諭軍機大臣等。據敷福奏。稱彭理係河員出身。督率屬員。修隄防險。尚無貽誤。未將年力就衰之處。隨時具奏等語。所奏甚屬錯謬。湖南水勢安流。又有洞庭瀟蓄。從無可防之險。朕臨御四十二年。各省水利險要處所。無不體察周知。時加厘念。湖南並無險工。敷福何得漫為此奏。總由外省惡習。諸事粉飾迴護。一任庸劣幕友。妄砌

浮詞率行入告。即此一端。可見其糊塗不勝封疆之任。敦福著傳旨申飭。再昨因彭理呈繳值銀四千餘兩之房屋。請抵賠項二萬六千餘兩。實屬取巧。意其任所。必有私置產業。以為日後安享之計。業經降旨。令敦福密訪嚴查。敦福接到前旨。倘仍不知實心查辦。再有徇庇疎縱之事。則獲咎更大。令伊自思。能當此重罪乎。將此傳諭知之。○旌表守正捐軀直隸磁州民董有成妻楊氏。○辛丑常雩。

實錄卷五十三

七

祀

天於

園丘。遣簡親王積哈納恭代行禮。○以

泰東陵恭懸扁額。遣官告祭

孝聖憲皇后几筵。○諭。據李質穎奏。革監倪宏

文。賒欠喫咭喇國夷商貨銀一萬一千餘兩。

監追無著。經伊胞弟倪宏業外甥蔡文觀代

還銀六千兩。餘銀五千餘兩。遵旨於該省督

撫司道。及承審之府州縣官。照數賠完貯庫。

俟夷商等到粵給還。並請將倪宏文。即照

部議發配等語。倪宏文赤手無賴。肆行欺詐。

賒欠夷商貨銀。多至累萬。情殊可惡。而其應

交銀兩。半係伊弟伊甥措繳。半係地方官代

賠。伊轉得脫然無累。僅予發遣。實不足以蔽

辜。倪宏文著發往伊犁。永遠安插。以示懲儆。

○又諭。昨總兵巴克坦布。來京陛見。朕問及

伊所戴花翎。據奏。係由前鋒叅領補授總兵。

緣在軍營行走。是以將軍大人等。令其照常

實錄卷五十三

十

戴翎等語。朕察其勞績。仍准戴用外。又交軍

機大臣等詳查。有無似伊戴翎人員。經軍機

大臣等。查出總兵仁和等十一員。並繕寫履

歷清單呈覽。仍奏請。交各省將軍督提等查

覆。有無似此人員。另行請旨辦理。朕閱其勞

績。俱各出力打仗奮勉。既已戴翎。著加恩令

伊等照常戴用。但花翎係獎賞軍營奮勉之

人。不應含混戴用。今大功告成。此十一人。朕

既加恩令其戴翎。其餘亦不必交各該將軍

大臣等查奏矣。此係朕曲為加恩。不可援以為例。○軍機大臣奏。查正月至三月。辦理書籍錯誤各員。請分別議處。得旨。此次總裁三月以來。訛錯三次以上之總裁程景伊。兩次之纂修黃壽齡。黎溢海。覆校汪鏞。分校袁文邵。俱著交吏部。都察院。分別察議。其餘未及次數者。俱著加恩。無庸察議。嗣後每次總裁。均照此例。不必積算上次。總裁等校勘書籍。經朕偶爾抽閱。即有訛舛。可見校勘時。原未盡心。今量予察議。亦不過罰俸而止。非重處分也。所以如此者。欲令各心知愧勉。若此番加恩後。尚不悉心校閱。仍前錯誤。試令伊等撫心自問。不益滋愧乎。○旌表守正被戕江西樂平縣民程夢麟妻袁氏。○士寅。

上詣九經三事殿

孝聖憲皇后梓宮前供奠。○諭軍機大臣等。朕閱四庫全書館所進鈔本朱彝尊經義考。於歷代說經諸書。廣搜博考。存佚可徵。實有裨

於經學。朕因親製詩篇。題識卷首。此書現已刊行於世。聞書板尚在浙江。著將御製詩錄寄三寶。就便詢問藏板之家。如願將朕此詩添冠卷端。聽其刊刻。亦使士林咸知朕闡崇經學之意。○

御製題朱彝尊經義考詩。秦燔弗絕。殆如繩。未喪斯文。聖語曾疑。信雖滋後人議。述傳終賴漢儒承。天經地緯。道由託。一貫六同。教以興。藜閣炎劉。校誠違。竹垞昭代。撰堪稱。存亡若彼。均詳註。文獻於茲。率可徵。遠紹旁搜。今古會。焚膏繼晷。歲年增。考因晰理。求其是。義在尊經。靡不勝。枕藉寧惟資汲鑒。闡崇將以示孫曾。○京察本年滿漢各官。年老有疾。官五十八員。不謹官一員。罷軟官五員。才力不及官三十一員。浮躁官二員。分別處分如例。○旌表守正捐軀河南項城縣民趙國卿妻胡氏。○甲辰。諭軍機大臣等。據阿桂。李侍堯等奏。緬匪近日大概情形。並現在辦理各緣由。

頗合機宜。已於摺內批示矣。緬匪反覆狡詐。實為可惡。大約得魯蘊。尚欲送人完事。而綻拉機阻之。圖思德等。又露有招致之意。致被賊識破。遂爾屢變其說。果不出朕前旨所料。至摺內稱。三月初五日。緬目差孟令持緬稟。同原隨蘇爾相之兵丁蔡世雄。汪有才前來。譯出緬稟。有問及蠻暮木邦土司之語。又三月十五日。綻拉機差碎凍具稟。同通事寸博學進關。請遣回孟幹孟團。阿桂等將蔡世雄。

實錄卷三十三

三

汪有才。寸博學等留住。又以孟團係緬匪任用之人。現飭羈留不遣。所辦甚是。至緬稟內。忽詢及蠻暮木邦土司。現在是否存活。顯係不肯將蘇爾相等即行送回。故問及兩土司下落。欲圖彼此對換。其詭惡伎倆。尤堪髮指。阿桂等擬作檄稿。既直折其居奇之心。且辦理邊務。與向時忽復一變。俟送到蘇爾相後。仍扣留孟團等。再行勒送楊重英。深合制馭賊匪之道。此外亦別無辦法。其稟內復請差

人至馬脖子。與節蓋說話。而節蓋則不肯令其進關。明係欲誘內地官員到彼。復行留住。阿桂等自必不為所惑。輕率差人前往。至彼差來之人。則應拘留不遣。一應書稟。概置不理。使綻拉機等。一切奸詭伎倆。無可復施。俟其果有悔心。實欲送人納貢。再行相機妥辦。前令阿桂馳往永昌。原因得魯蘊等有進貢還人之語。今緬匪既屢變其說。前稟之誑捏顯然。阿桂斷無因賊匪欺飾無據之談。在邊

實錄卷三十三

十四

等候之理。現在發去回檄。若緬匪翻然畏懼。實欲還人完事。阿桂察其確切。即酌將此事辦畢。再行回京。若回檄去後。別無信息。或仍以空言搪塞。阿桂在彼久駐。亦不成事體。前諭阿桂等。派兵一二百。往拏節蓋。馬脖子既距關不遠。此時雖有瘴氣。諒不甚盛。阿桂審度節蓋如果在彼。業已派兵往拏。則阿桂俟辦完其事。再行回京。若其事亦屬難行。阿桂酌量在彼並無可辦之事。即遵前諭將應辦

邊隘各事宜。與李侍堯面論明晰。即可起程來京。不必速行。至孟團。既係緬匪得用之人。阿桂可帶其來京。以備訊問。其送回隨蘇爾相之兵丁蔡世雄。汪有才。及通事寸博學等。亦著一併帶來。將此由六百里加緊發往。傳諭阿桂。李侍堯知之。仍令將奉到諭旨籌辦緣由。迅速覆奏。尋阿桂奏。現在事已無可辦理。臣將嚴飭關隘事宜。與長清等商定。到省留數日。俟會辦事竣。即將孟幹。碎凍。親帶回

實錄卷一〇三〇

五

京。至通事寸博學。兵丁蔡世雄等。已於本月初十日解京。報聞。○軍機大臣等議奏。遺奠字樣。考會典所載。並不詳遺字之義。徧檢儀禮經注。亦無遺奠明文。惟孔穎達士喪禮疏內。始有此說。唐代沿用。見於通典。考儀禮。葬日將行。祭畢。苞牲體之車。名為遣車。其義與祭禮不相涉。穎達牽合成文。於禮不合。稱謂尤屬未安。又考儀禮。叙將行之祭云。徹巾苞牲。鄭康成注。苞者。象既饗而歸賓俎者也。又

實錄卷一〇三〇

十六

禮記雜記。曾子曰。夫大饗既饗。卷三牲之俎。歸於賓館。所以為哀也。鄭注。既饗歸賓俎。所以厚之也。言孝子哀親之去也。據此。是將行之祭。原用饗禮。以明哀親之去之義。應將會典內遺奠二字。改用饗奠。清語不必更改。得旨是。依議。○調貴州安龍鎮總兵張和為雲南普洱鎮總兵。以貴州大定協副將彭廷棟為安龍鎮總兵。○乙巳。諭。向例鄉會試同考官。分經閱卷。易書詩三經卷。分三四五房。春秋。禮記卷。止分一二房。以一二二人專閱一經。則暗藏關節。易於識認。立法不能無弊。況各經卷多者。一房閱至數百卷。甚且多至十卷。其卷少者。一房止閱一二百卷。校閱多寡。亦太覺懸殊。辦理未為盡善。各省主考。既以一人兼閱五經卷。則房考官同係科甲出身。諒無不能閱看他經之理。著自乾隆丁酉科為始。鄉會同考試官。俱不必拘泥五經分房。如房考官十人。場卷五千本。則每房各閱五百

本。均勻分派。其每經分中卷數。仍照原額。如此各房通看。即欲呈送關節。勢不能徧送多人。於防範更為周密。而各房考均勻派閱。亦不慮多寡相懸。致滋草率之弊。將此通行傳諭。並刊入科場條例。一體遵行。○予故固山貝子弘景致祭如例。○丙午。

上詣九經三事殿

孝聖憲皇后梓宮前。行三滿月祭禮。○以奉移

孝聖憲皇后梓宮往

泰東陵。遣官告祭

天。

地。

太廟後殿。

奉先殿。

社。

稷。○陝甘總督勒爾謹奏。據烏魯木齊都統索諾木策凌等咨稱。烏魯木齊兵。自三十七年後。改設州縣。差使繁多。若仍撥往塔爾巴哈

台換班。實屬不敷等語。請仍由內地各提督派撥。報聞。○丁未。諭軍機大臣等。前經降旨。令將各省進到書籍。於每書面頁註明年月姓氏。押以翰林院印。交總裁等詳校。分別應刊應鈔。其餘則止存書名。彙為總目。俟校辦完竣。仍即給還原獻之家。俾得留藏善本。無致散佚。邇年以來。各督撫鹽政採訪遺編。陸續奏進者。均交四庫全書處。逐一纂辦。將次告竣。除辦過應行刊鈔各書。及已經發還外。其現在辦竣及祇須彙存書目各種。並應及早發還。即有尚須鈔錄者。正副本辦畢之後。亦當陸續檢發。均毋庸復留原本。著交總裁。督同總纂提調纂修等。即通行查檢各書。開列清單。行知該督撫。酌委妥便之員。赴翰林院領回。給還藏書之家。俾得將原獻書籍。久遠珍藏。並嚴飭承辦各員。善為經理。勿任胥役等扣留需索。至其中有經該督撫等自行購進。及借本鈔謄。毋庸給還本家者。亦著該

督撫等。於收到書籍後。再行查明送繳。留備館閣之儲。將此傳諭各督撫等知之。○都察院奏。江蘇興化縣民徐賡揚。具控革蠹虞景山等婪索。請查審辦理。得旨。此案著派胡季堂。馳驛前往。秉公查審。定擬具奏。其隨帶司員。亦著一併馳驛。原告徐賡揚。即著帶往質審。○戊申。

上詣九經三事殿

孝聖憲皇后梓宮前。行祖奠禮。酉時。行辭奠禮。

實錄卷一千三十

元

哭盡哀。王公大臣官員。俱齊集舉哀。○諭軍機大臣等。昨都察院奏。江蘇興化縣民徐賡揚。具控革蠹虞景山等婪索一案。已派侍郎胡季堂前往查審。著傳諭高晉侯胡季堂到時。即會同秉公查辦。毋得稍有徇護。○追予原任太子太傅廣西巡撫傅宏烈春秋致祭。從江西巡撫海成請也。○是日。

上居無逸齋苦次。○己酉。

孝聖憲皇后梓宮發引。

上躬親奠獻。哀戀切至。恭奉梓宮。由

九經三事殿出。

上先趨立暢春園宮門外。候

梓宮升大昇輦。跪視啟行。哭泣步從一里餘。由

別路先往

蘆殿。敬視陳設。跪迎

梓宮。奉安於

蘆殿。行夕奠禮。致敬盡哀。是日。親王以下。有頂

實錄卷一千三十

示

帶官以上。公主福晉以下。侍衛妻以上。及內務府佐領拜唐阿等男婦。俱齊集舉哀。恭送與不克恭送王大臣官員。皆哭泣隨行。至途次二班外。隨從之王大臣官員。將近

蘆殿時。從別路先往排立。

梓宮至。跪迎。供奠時。皆隨

上行禮舉哀。○諭。現在恭奉

孝聖憲皇后梓宮。詣

泰東陵安奉。宜加渥澤。用廣

慈恩著將沿途經過地方。本年地丁錢糧。蠲免十分之五。易州蠲免十分之七。該部遵諭速行。○又諭。現在恭奉

孝聖憲皇后梓宮詣

泰東陵。所有沿途辦差兵丁。著加恩賞給一月錢糧。以示錫類施仁至意。○是日。駐蹕黃新莊行宮。○庚戌。

上詣

蘆殿於

實錄卷三十三

主

孝聖憲皇后梓宮前。行朝奠禮。跪送

梓宮啟行。哭泣步從一里餘。由別路先往半壁

店

蘆殿。祇候

梓宮至。跪迎。奉安於

蘆殿。行夕奠禮。致敬盡哀。隨從之王大臣官員。

朝夕皆隨

上行禮舉哀。○是日。駐蹕半壁店行宮。

大清高宗法天隆運至誠先覺體元立極敷文奮武孝慈神聖純皇帝實錄卷之一千三十

實錄卷三十三

主

大清高宗法天隆運至誠先覺體元立極敷文奮武孝慈神聖純皇帝實錄卷之一千三十一

監修總纂官經筵講官太子太傅文淵閣大學士文淵閣閣學領侍衛內大臣稽察奏 上諭事件處管理

吏部理藩院事務正黃旗滿洲都統世襲副都統軍功加七級隨帶加一級尋常加二級軍功紀錄一次 臣慶桂

總裁官經筵講官太子太傅文華殿大學士文淵閣閣學稽察奏 上諭事件處管理則部戶部三庫事務

世襲副都統軍功加十九級隨帶加二級又加二級 臣董誥內大臣戶部尚書錢謙益滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十二年丁酉四月辛亥

上詣

蘆殿於

孝聖憲皇后梓宮前行朝奠禮跪送

梓宮啟行哭泣步從一里餘由別路先往秋瀾

村

蘆殿祇候

梓宮至跪迎奉安於

蘆殿行夕奠禮致敬盡哀隨從之王大臣官員

朝夕皆隨

上行禮舉哀○諭本月十八日恭奉

皇妣孝聖憲皇后梓宮至

泰東陵道由

泰陵東經過自應朕躬恭代向

皇考世宗憲皇帝

皇妣孝敬憲皇后陵寢行禮而禮部儀注未經

議及蓋由康熙初年

孝康章皇后大事未行此禮是以部臣無可援

引然其時

皇祖尚在沖齡廷臣又忽於禮意遂致闕畧朕

思

皇妣升祔

太廟之日朕恭捧

神牌進殿門豫設拜位安奉朕躬代於

列祖

列后及

皇考

皇妣前行禮然後請

神牌升座。正可援以為例。是日早。朕先展謁

泰陵。再詣

泰東陵。恭閱工程畢。豫至

泰陵分路處。候

梓宮至。恭請

靈輿暫停。朕即於道旁。向

泰陵恭代行禮。再奉

梓宮啟行。朕仍先至

隆恩門外跪迎。安奉

隆恩殿。所謂禮以義起。必如是於心始安。亦足

為萬世法守。著交禮部。增入會典遵行。○以

廣東惠州協副將關津保。為山東兗州鎮總

兵。○是日。駐蹕秋瀾村行宮。○壬子。

孝端文皇后忌辰。遣官祭

昭陵。○

上詣

蘆殿。於

孝聖憲皇后梓宮前。行朝奠禮。跪送

梓宮啟行。隨從之王大臣官員。皆隨
上行禮舉哀。

梓宮至古謝村。奉安於

蘆殿。遣皇八子永璿。恭代行夕奠禮。至翼日朝

奠禮亦如之。○諭曰。永璿現在穿孝。伊未當

差以前。

陵寢事務。著綿德暫行管理。○又諭曰。嘉謨所

遺

東陵內務府總管員缺。著保寧補授。仍兼總兵。

○諭曰。國泰泰甯惠傷死前幫千總張繼渠

一摺。著該部覈擬具奏。此案甯惠因向張繼

渠索取糧船零件賠數起釁。彼時陞任糧道

汪圻。既已賠修船隻。其繩索等項。所費無多。

自應一體賠補。乃仍責令窮弁丁措辦。殊屬

見小。至甯惠因索欠未得。曾向糧道曹錫寶

具控。乃不即審理。仍令張繼渠就近查追。以

致釀成人命。殊屬推諉非是。汪圻曹錫寶均

著交部嚴加議處。○是日。駐蹕梁格莊行宮。

至庚申皆如之。○癸丑。

孝聖憲皇后梓宮啟行。

上先往恭謁。

泰陵未至碑亭。即降輿慟哭。步入

隆恩殿。上香。詣

寶城前。恭奠行禮。號慟良久。王大臣官員隨行禮。

上出。猶揮淚徐行。瞻仰慕戀。感動左右。詣

泰東陵閱視工程。至

神路分道處。候

梓宮至。暫停。躬代

孝聖憲皇后。向

泰陵行禮。奉

梓宮啟行。仍先至

泰東陵。祇候

梓宮至。跪迎。哭泣隨行。奉安於

隆恩殿。供奠行禮。悲哀篤至。王大臣官員俱隨

行禮舉哀。○以

孝聖憲皇后梓宮至

陵。遣官告祭

泰陵

泰東陵后土。

永寧山神。○諭曰。誠郡王弘暢此次派赴

泰東陵。經理

陵工事務。一切實心調度。獨持定見。準酌合宜。

因得如期告厥。事速工堅。甚屬可嘉。弘暢著

加恩晉封親王。所有應行事宜。著各該衙門

照例辦理。○甲寅。

上詣

泰東陵。未至碑亭。即降輿舉哀。步入

隆恩殿。於

孝聖憲皇后梓宮前。行饗奠禮。慟哭良久。王大

臣官員。俱隨行禮舉哀。○乙卯。諭。昨因弘暢

經理

泰東陵工程。受速。已加恩晉封親王。所有在工

出力之監督等。亦應量為獎勵。著交弘暢查

明奏聞。交部議敘。○又諭現在

泰東陵工程告歲。昨已降旨將弘暢加恩晉封親王。在工出力之監督等。分別交部議敘矣。其管理

泰陵事務公永敬。

泰陵內務府總管托恩多。敬勤襄事。亦應量予嘉獎。俱著交部議敘。至

泰陵工部之承辦各員。俱著綿德。托恩多查明奏聞。一併交部議敘。○大學士管兩江總督

高晉。江南河道總督薩載會奏。臣薩載奉面諭。清黃壩上首。加壩一道。頭架木龍上。添紫木龍。現於新河頭下脣起。至第三架木龍。遮上止。斜建壩工一道。長一百三十丈。寬五丈。南岸添紫木龍。已興工。又奉諭查從前挑陶莊引河。其寬深丈尺。因何未成。俟詳查奏聞。批並當查古有在陶莊迤北河流之事否。或自宋明以來。即流陶莊以南之處。詳悉查明。以便作記也。又奏應建

河神廟。估計繪圖進呈。得旨諸凡皆妥。知道了。○丙辰。

上詣

泰東陵。未至碑亭。即降輿。舉哀。步入

隆恩殿。於

孝聖憲皇后梓宮前。行百日大祭禮。慟哭良久。

王大臣官員。俱隨行禮舉哀。

上釋縞素。更青素服。冠綴纓緯。回行宮。○諭曰。

阿桂等奏。籌辦邊務緣由一摺。已於摺內批

示矣。據稱賊匪正在遲回觀望。若遷就招徠。固萬萬不可。而相機設法。隨宜辦理。乃臣等必應竭盡之心。總以無妨國體。不長賊志為主等語。所奏自屬正理。阿桂亦只可如此籌畫。前已傳諭阿桂。如賊匪竟無信息。阿桂自不值久駐邊境等候。或已發兵往擒。節蓋俟其就擒。再定行止。否則將應辦邊隘事宜。面與李侍堯講論。交其妥辦。阿桂即可起程回京。計阿桂等拜發此摺時。尚未奉到前旨。阿

桂此時如尚有機會可乘，自宜悉心籌度。若賊匪仍似前此之荒唐狡譎，竟不必視以為事。倘賊匪復差人來投文稟，即將來人拘禁，或擇其中之無用者一人，驅逐歸巢。其稟總付之不答，並嚴飭邊隘，不許內地民人攜貨偷出。此外亦更無別法。至令阿桂赴滇受降，雖已明發諭旨，今賊匪反覆變更，前說盡屬誑語，其曲自在賊匪，不足重輕。阿桂即遵前旨回京。原屬無礙，將此由六百里傳諭阿桂等知之。○丁巳，太子太保武英殿大學士舒赫德遺疏聞，諭曰：大學士舒赫德老成端重，練達有為，朕御極之初，即膺任使，宣猷中外，四十餘年。前此平定回城，懋著勞績，嗣於西陲撫輯，歸順遠藩，東省勦捕悖逆匪眾，悉心籌畫，動合機宜，實為國家得力大臣。自簡任綸扉，日直內廷，兼綜部務，勤勞匪懈，倚毗良深。茲以

聖母孝聖憲皇后

山陵大禮，扈從前來，至期應恭點神主襄事。乃於十九日，忽遘時疾，即派太醫院堂官診視，頻加存問，以冀速痊。茲遽聞溘逝，深為震悼。隨即賞給陀羅被，遣額駙福隆安帶領侍衛十員，往奠茶酒。俟進京，仍親臨賜奠，並著加恩晉贈太保，入祀賢良祠。其任內革職降級之案，概予開復。伊子舒常已諭令即行馳驛來京治喪。所有應得卹典，仍著該部察例具奏。○又諭曰：曹錫寶現有交部嚴加議處之案。昨春於山東行在召見，看其才具，原不勝外任。著來京以部員用。其山東督糧道員缺，著棟文補授。所有革職之案，仍著帶於新任。○諭軍機大臣曰：大學士舒赫德於四月二十二日病故，舒常應來京穿孝，不必俟桂林回任。伊奉到此旨，速即馳驛來京。其所署提督印務，著明亮署理。○戊午，上摘冠纓，詣

泰東陵，未至碑亭，即降輿，舉哀步入。

隆恩殿。於

孝聖憲皇后梓宮前。行遷奠禮。哀慟良久。卯時
恭奉

梓宮至

寶城前

蘆殿內。安奉

龍輜上。奠酒行禮。悲傷號泣。哀戀篤至。王大臣
官員。俱隨行禮舉哀。○諭本月二十五日。

聖母孝聖憲皇后

山陵禮成。恭點

增錄本三十一

神主。例應滿漢大學士各一員。敬謹將事。今舒

赫德病故。著永貴暫署滿大學士。敬襄點

主大典。至現在吏部滿尚書無人。並著永貴署

理。○又諭行在刑部事務。著袁守侗署理。○

諭軍機大臣曰。李侍堯奏籌辦緬甸邊務情

形。所慮亦是。已於摺內批示。據稱緬匪屢以

詭詞欺誑。藉此窺我動靜。其反復已非一次。

甚為可惡。查從前定議閉關禁市。絕其資生

之路。原屬制緬要策。現在該酋來稟。亦籲懇

開關。使生計果真窘迫。自當力圖完局。因何

屢有變更。茲悉心體訪。緬地物產。棉花頗多。

次則碧霞玳。翡翠玉。近年以來。彼處玉石等

物。雲南廣東。二省售賣頗多。皆由內地。每差

土人擺夷。出關偵探。兵役因見官差要務。於

隨身行李。搜檢未嚴。夾帶勢所不免。究之所

偵探者。止在野人地界。撫拾無稽。不但不能

得彼真情。轉將內地信息。從而洩漏。至棉花

增錄本三十一

一項。臣在粵省時。見近年外洋腳船進口。全

載棉花。頗為行商之累。因與監督德魁嚴行

飭禁。嗣後倘再混裝棉花入口。不許交易。定

將原船押逐。初不知緬地多產棉花。今到滇

後。聞緬匪之晏共羊翁等處。為洋船收泊交

易之所。是緬地棉花。悉從海道帶運。似滇省

閉關禁市。有名無實等語。所陳悉中緬匪情

弊。著傳諭楊景素會同李質穎。德魁。於海口

嚴行查禁。如有裝載棉花船隻。概不許其進

口。務當實力奉行。勿以空言塞責。仍不時留心訪察。如有胥役等受賄私放者。立即重治其罪。至滇省嚴查邊隘。毋許內地民人帶貨偷越。圖思德邇年所辦。似亦不過具文。未必實能禁絕。今李侍堯既見及此。自能設法嚴查。不似從前之虛應故事。惟當實力為之。要以及久而勿懈。至於內地差人出關偵探。從無確信。轉致洩漏內地風聲。實無益而有損。此後差人偵探一事。竟當停止。想李侍堯必能妥辦也。又據奏暹羅頭目鄭昭收合餘衆。欲為故主復讐。始而稟臣轉求恩賞封號。經臣曉以大義。奏明檄覆。繼則情願合擊緬匪。豫懇示期為請。曾以青靈所獲之瀉都燕達及男婦人等來獻。近年復得緬匪所留內地兵民。節次送回。並稱連歲攻擊。軍火缺乏。求買硫磺。頗見小心恭順。節經臣奏明。仍作已意。准其買回。並予獎勵。窺其心。惟冀邀大皇帝施恩封賞。俾主國事。臣從前入覲時。曾蒙面

諭。外夷原不必深求。如鄭昭再有稟乞恩。汝可酌量具奏。向特疑其或與暹羅舊部別構釁端。謬思依仗天威。巧圖懾服。其與緬匪讐殺。亦無目覩之人。保無捏詞欺誑。茲詢之通士寸博學。及送回騰越州民楊朝品等。僉供鄭昭誘殺緬匪多人。且海商傳言。鄭昭漢子甚好。竟是緬匪勁敵。而近日得魯蘊之說詞欺闊。又焉知非因鄭昭之故。慮及天朝加兵。故為此延緩之計。可否勅下兩廣督臣。作為已意。檄詢鄭昭。謂詔氏雖已無子孫。而天朝原頒勅印。現在是否存失。微露其意。鄭昭自必乞恩求封。俟其稟到時。據情轉奏。仰懇施恩錫封。伊得有天朝符命。更易號名鄰番。努力殺賊。雖未必能縛渠獻馘。而緬匪頻年疲於攻戰。俟其困頓。揚言大兵進剿。彼時畏懼。腹背受敵。搖尾乞憐。人象到關。准其納款。亦可藉完此局等語。此亦治病偏方。姑試為之。原屬並行不悖。但檄文仍宜作李侍堯之意。

現令軍機大臣代擬檄稿發去。諭以本閣部堂在粵省數年。屢次接閱來稟。知爾收合餘衆。欲為故主報讐。曾誘殺緬匪多人。是爾尚知大義。且節次送回緬匪所留滇省兵民。具見爾小心恭順。是以爾兩次需用硫磺鐵錫等物。並准買回。以示獎勵。且代為奏聞大皇帝。亦深為嘉予。至爾從前稟懇。欲邀天朝封號。彼時以爾妄冀恩澤。未為正理。且詔氏雖已無人。而天朝原頒勅印。現在或存或失。未經聲明。不便入告。因而駁回。原欲俟爾稍有出力之處。及查明原頒勅印下落。陳請有名。再行代爾奏懇加恩。今大皇帝因雲貴地方緊要。將本閣部堂調任雲貴總督。而簡任楊大人為兩廣總督。本閣部堂已將爾歷次稟懇之事。詳細告知。爾此後如有稟。即稟知新任楊大人。自必照本閣部堂所籌。為爾酌辦。今啟行在即。特將此遇便諭令知之。楊景素於接奉後。即照李侍堯任內檄諭鄭昭之例。

附誠實洋船發往。令其寄到。如鄭昭續有稟懇之事。即迅速驛奏。以便籌度辦理。惟是以蠻夷攻蠻夷。雖亦籌邊之策。但須中國兵力能至其地。控制得宜。方足以收其效。今暹羅與緬甸接壤之處。遠隔重洋。斷不能發兵往彼協剿。若專藉鄭昭之力。彼或貪得其土地。人民。冀圖自利。不能於中國有益。且暹羅爭戰之處。不過緬匪邊界。未必徑至阿瓦城。更不足制其死命。設或鄭昭果欲實心勦殺緬匪。亦只可聽其自為。若稍漏借助外番之意。彼必要求無厭。而此時發檄詢問。尤不便輕露端倪。致彼居奇觀望。撫馭外夷之道。大率如此。李侍堯楊景素皆不可不知也。再大學士舒赫德忽於二十二日病故。其員缺自應阿桂補放。但定例大學士缺。須俟一月後始行降旨。現在滿大學士無人。阿桂接奉此旨。可速將邊境應辦要務。告知李侍堯酌量妥辦。即行起程回京。至緬匪求降一事。固由圖

思德輕聽屬員慫恿。希圖完事。因適有得魯蘊投稟到邊。遂信以為真。據詞入告。其實捏飾詭詐。罪在緬匪。並與圖思德無涉。此時惟嚴飭邊境各員。實力稽查。不許內外貨物偷漏出入。若彼遣人投稟。即設法將來人拘囚。其稟概付之不答。或知著急。亦未可定。舍此更無他法。至舒赫德之事。昨日下午始出。朕方為之震悼。今早遞到滇省軍報。止係李侍堯出名。不知所奏何事。心甚憂疑。啟函時為之手顫。及至披閱。則係李侍堯條陳暹羅之事。驚心始定。雖李侍堯各抒所見。不必與阿桂連銜。然阿桂又何妨另奏一事。與之同發。致朕懲羹吹虀。多此一番疑慮耶。此旨著由六百里加緊發往。傳令阿桂李侍堯楊景素知之。其嚴禁洋船棉花進口一節。並著諭令李質穎德魁一體遵辦。○庚申

上摘冠纓。詣泰東陵。未至碑亭。即降輿。舉哀。步行至蘆殿。於

孝聖憲皇后梓宮前行禮。跪拊梓宮號哭良久。辰時上躬送梓宮入地宮。安於寶牀。恭奉冊寶。安於石座。上於梓宮前。伏地慟哭。號呼哀戀。於將閉元宮時。始退出。詣祭臺前。行大葬告成禮。王大臣官員隨行禮。禮臣奏點主吉時屆。上冠綴纓緯。更龍袍袞服。王大臣官員同點主大學士。皆更朝服。上詣隆恩殿。向上立。王大臣官員各於班次排立。大學士于敏中暫署大學士永貴恭點。

神主奉安

寶座行虞祭禮。王大臣官員隨行禮。

上恭捧

孝聖憲皇后神牌安

黃輿內。

神牌黃輿啟行。王大臣官員跪候過。隨行。

上更青袍褂。冠綴纓緯。步隨至。

隆恩門外。跪送。由別路先詣宿次。祇候

神牌黃輿至。供奉

黃幄。行日夕上香禮。○以

孝聖憲皇后梓宮奉安

地宮禮成。遣官告祭

泰陵

泰東陵后土。

永寧山神。○諭曰

聖母孝聖憲皇后大事。工部承辦一切事宜。均

屬妥協。除德成劉浩派辦

泰東陵工程。意見拘執。幾至貽誤。毋庸議敘外。

其餘各堂官。俱著交部議敘。其辦事出力之司員。並著該堂官查明。分別等第。交部議敘。至禮部查辦儀注檔案。屢有舛誤。經特派大臣董理。始能襄事。不必予以議敘。又現在恭

繕

聖母孝聖憲皇后神牌。及前此恭寫

玉冊。俱屬敬謹工妥。所有承辦之翰林中書並著該衙門查明。交部議敘。○諭軍機大臣等。昨據李侍堯奏稱。在粵省時。見近年外洋腳

船進口。全載棉花。頗為行商之累。因與監督德魁嚴行飭禁。嗣後倘再混裝棉花入口。不許交易。定將原船押逐。初不知緬地出產棉花。今到滇後。聞緬地土產棉花最多。而緬匪之晏若羊翁等處。尤為洋船收泊交易之所。是緬地棉花。悉從海道帶運。似滇省開關禁市。有名無實等語。所奏甚是。業經傳諭楊景素會同李質穎德魁。於海口嚴行查禁矣。外洋海面。處處皆通。恐洋船裝載緬地棉花求

售者。因粵省各口查禁。復往他省混行入口。亦未可定。况內地處處出產棉花。供用極為寬裕。何藉取給外洋。與之交易。致滋弊混。著傳諭凡有海口之將軍。督撫設法嚴行查禁。如有裝載棉花船隻。概不許其進口。務令實力奉行。勿以空言塞責。仍不時留心訪察。或有胥役等受賄私放者。立即重治其罪。仍將如何設法查禁之處。具摺覆奏。將此遇各該將軍督撫奏事之便。傳諭知之。○賑恤甘肅循化。皋蘭。紅水縣。永金縣。狄道。沙泥州。渭源。靖遠。河州。鹽茶廳。固原。安定。靈州。中衛。巴燕戎格。西寧。碾伯。大通。莊浪。武威。鎮番。永昌。古浪。平番。撫彝。廳。張掖。山丹。東樂。肅州。高臺。安西。三十一廳州縣。乾隆四十年旱雹災飢民。○辛酉。

上自梁格莊行宮啟鑾詣

黃幄奉

孝聖憲皇后神牌黃輿啟行。至秋瀾村

黃幄行。日夕上香禮。○諭軍機大臣曰。阿桂等奏。馬脖子為老官屯外最要隘口。若輕兵撲取。恐不能得手。此番賊目送人。既占負隅之勢。又竭力隄防。非單兵可以輕試。若果離其巢穴。侵犯近邊。則飛速調集兵丁。尚有二千內外。儘可盡力截殺。而以賊平日之畏葸計之。當並不敢出此。竟可毋庸多慮。除俟續有機會。即遵旨辦理等語。此時實無可辦理。前此賊人懇請開關納貢。送人之說。屢經反覆。固係得魯蘊計圖自利。先發其端。而綻拉機。又別懷自私之見。阻撓反悔。其曲全在於賊。亦由圖思德聽屬員慫恿。遷就完事。不免粉飾其詞。此時俱可毋庸深論。而賊匪與禽獸無異。更不足與較。現在既無可辦。阿桂自當將應辦邊隘之事。面與李侍堯言明。實力嚴查妥辦。此後賊人如或差人到關遞稟。即將來人拘禁。所稟付之不答。若果實有機會。李侍堯自能斟酌辦理。阿桂於接奉此旨即可

起程回京。將此由六百里加緊傳諭知之。○
蠲免安徽宿州鳳陽虹縣靈璧泗州盱眙天
長五河八州縣鳳陽長淮泗州三衛乾隆四
十一年水災額賦。○是日駐蹕秋瀾村行宮。
○壬戌。

上詣

黃幄奉

孝聖憲皇后神牌黃輿啟行至半壁店

黃幄朝夕上香行禮。○以

孝聖憲皇后神牌升祔

太廟吉期遣官告祭

天。

地。

太廟後殿。

奉先殿。

社。

稷。○諭曰吏部事務繁多且引見官員應滿尚
書承旨永貴年逾七旬恐精神不能周到阿

桂未到之前所有吏部尚書事務著福隆安

暫行兼管。○又諭據觀音保奏稱擬斬之土

爾扈特多斯海等脫逃復行拏獲正法原派

看守之把總張登科馬煥及兵丁六名俱斥

革枷號三箇月杖一百叅將赫森布都司馮

子裕請交部嚴加議處並自請一併交部議

處等語土爾扈特多斯海等三犯俱致疎脫

怠玩已極新疆地方尤非內地可比斷不可

不嚴加懲治把總張登科等僅擬枷號三箇

月未免過輕把總張登科馬煥及兵丁六名

俱著革退於彼處枷號示衆一年仍杖一百

叅將赫森布都司馮子裕俱著革職多斯海

等脫逃時適值觀音保前往珠勒都斯查辦

土爾扈特等游牧後因聞信即上緊將三犯

俱復行拏獲觀音保著加恩免其交部議處

○諭軍機大臣等前據圖思德奏稱本年正

月內得魯蘊差孟幹孟圖致送禮物並稱欲

將蘇爾相等送回隨遣其出口傳令得魯蘊

親來。及至二月。孟幹孟團復進關稟稱。象隻未到。現今節蓋四人在馬脖子等候。求差官到彼說話。令將孟幹孟團扣留。嗣據阿桂等奏稱。孟團係贊角牙妻父。渺萬機之用。人遞稟懇求放回。現飭拘留不遣。各等情。因孟團係緬匪得力之人。曾諭令阿桂帶其進京。以備訊問。今思得魯蘊忽爾捏詞欺誑。嗣復反悔。情節甚為可惡。其中原委。孟團必知其詳。阿桂等自應將其嚴加刑訊。詰以緣何反覆之故。令其據實供吐。勿任狡飾。況從前賊匪既敢將內地差往之蘇爾相擅行鎖錄。此時將孟團嚴刑訊鞠。庶稍解恨。而此等公膺匪眾。令其多受痛楚。又何足惜。著傳諭阿桂李侍堯。即將孟團嚴加刑訊。取具確切供情。先行迅速馳奏。仍派妥幹員弁。將孟團鎖錄解京。並飭沿途撥兵護送。嚴加管束。毋致稍有疎虞。著由六百里加緊傳諭阿桂李侍堯知之。尋奏。緬匪狡詐可恨。正將孟團等鎖押

提訊。以紓拘禁蘇爾相之恨。因蘇爾相已送出。現將孟團孟幹碎凍三人羈禁。勒取楊重英得旨覽。又批。既送出蘇爾相。則此三人亦不必加之刑訊矣。扣留以待勒取楊重英可也。○是日。駐蹕半壁店行宮。○癸亥。

上詣

黃幄奉

孝聖憲皇后神牌黃輿啟行。至黃新莊。

黃幄。朝夕上香行禮。○軍機大臣議奏恭查

實錄卷三十三

三六

孝惠章皇后大事。朝鮮國進香。在奉安

地宮後。禮部請停止祭祀。將所進禮物收貯。又

恭查

世宗憲皇帝梓宮尚未奉安

地宮以前。朝鮮國使臣到京。禮部題請在

雍和宮行禮。

孝聖憲皇后梓宮已奉安

地宮。朝鮮國進香使臣到京時。應恭照

孝惠章皇后

山陵禮成。停止使臣祭祀之例。辦理報聞。○調正白旗滿洲都統福隆安為鑲黃旗滿洲都統。正藍旗漢軍都統豐昇額為正白旗滿洲都統。鑲白旗漢軍都統容保為正藍旗漢軍都統。○是日。駐蹕黃新莊行宮。○甲子。

上詣

黃幄。奉

孝聖憲皇后神牌黃輿啟行。行朝晨上香禮。以恭候奉迎。

實錄卷十三

三

神牌。先還宮。遣官恭代行日夕上香禮。○軍機大臣等議奏酌改王公大臣官員服色。一百日外。二十七月內。常服。不掛朝珠。朔望掛朝珠。一百日外。祭

月壇。

歷代帝王

先師孔子。

先農等壇廟。遣官致祭。承祭執事各官。常服。

一

萬壽正日。各官蟒袍。補褂朝珠。前後三日。常服朝珠。一百日外。百日內。引見人員。青袍褂。一百日外。常服。不掛朝珠。朔望掛朝珠。一百日外。

上恭謁

山陵。隨從人員。途中照常用短襟袍。馬褂。黃馬褂。一百日外。雨衣。雨帽。照常按品服用。一百日外。各官封條官銜。仍舊黏貼。元旦對聯門神。照舊張掛。報聞。○兵部議覆陝甘總督勒

實錄卷十三

三

爾謹疏稱。巴里坤鎮標。添設城守營。應設都司千總各一缺。把總經制外委各二缺。額外委三缺。馬步兵二百名。即將踏實沙州。二營各缺內。裁改移駐。應如所請。踏實營仍存額。外委一員。馬步兵九十四名。留駐防守。再於沙州營內。撥千總一員。移往協防。從之。○緩徵河南正陽確山二縣。乾隆三十八年分風災額賦有差。○是月。欽差協辦大學士阿桂。大學士管雲貴總督李侍堯。覆奏前在

軍營時聞。憤駿有母。頗知恭順。但彭理所云。不可違背天朝之語。並無憑據。今亦不知其存否。加恩獎勵之處。似可不辦。再潞江等處。現派員稽察。倘有江楚客商至彼。均不許出口。報聞。○江南河道總督薩載。覆奏查從前兩次挑陶莊引河。寬深不成。皆由逼近舊河。分流勢緩。易致停淤所致。今於積土以南。開挑築壩。堵塞舊河。引溜北趨。新河暢流。報聞。○湖北巡撫陳輝祖。奏蒲圻縣萬壽莊。麥秀兩歧。報聞。

實錄卷一千三十一

三

實錄卷一千三十一

三

大清高宗法天隆運至誠先覺體元立極敦文奮武孝慈神聖純皇帝實錄卷之一千三十一

大清高宗法天隆運至誠先覺體元立極敷文奮武孝慈神聖純皇帝實錄卷之一千三十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉五月乙丑朔

實錄卷一千三十二

孝聖憲皇后神牌升祔

太廟

奉先殿卯時

上御禮服出宮至幄次祇候

孝聖憲皇后神牌黃輿進大清門王大臣官員

俱朝服各於班次跪迎

上出幄次於天安門外跪候

黃輿過步行隨至

太廟甌城門內戟門外

上詣

孝聖憲皇后神牌黃輿前行三叩禮親捧

神牌入

太廟跪安於拜位躬代行禮恭捧

孝聖憲皇后神牌敬升奉安於

孝敬憲皇后之次

寶座上行升祔

太廟致祭禮如時享儀禮成

上回宮屆時

實錄卷一千三十二

上御龍袍袞服由景運門至誠肅門降輿詣恭

造

神牌處恭捧

孝聖憲皇后神牌進

奉先殿奉安於

孝敬憲皇后之次

寶座上 行升祔

奉先殿致祭禮禮成回宮命皇十一子永瑆恭

捧

孝聖憲皇后神牌進

奉先殿後殿

皇十五子 恭捧

孝賢皇后神牌。出至穿堂跪迎。隨行進右第二間寢室。贊引官跪奏。

孝聖憲皇后升祔

奉先殿後殿。行參拜

世宗憲皇帝

孝敬憲皇后禮。皇十一子永理。安奉

孝聖憲皇后神牌於拜位。恭代行禮。敬捧

孝聖憲皇后神牌。奉安於

世宗憲皇帝之右

寶座上。

皇十五子 安奉

孝賢皇后神牌於拜位。恭代行參拜

孝聖憲皇后禮。敬捧

孝賢皇后神牌。還御寢室。奉安行禮。○是日。

孝聖憲皇后神牌。奉安於

泰東陵

享殿遣皇六子永璫行禮。如四時大祭儀。○定京察比較名單例。諭向來各衙門保送京察一等人員。俱照上次數目比較。寧闕毋濫。引見時吏部開單進呈。候朕閱定。於甄簡才能之中。仍寓慎重激揚之意。惟是每次與上屆相較。固以防其濫額。然或過泥成例。此次比上屆少一人。下屆又比此次少一人。遞行減火。勢將無所底止。亦非所以示鼓勵。嗣後吏

平張卷二十二

部引見。進呈比較清單。著將上兩次數目。一併開列。若此次比上屆多一人。而較之再上一次數仍相仿。即可毋庸裁減。將來吏部較覈。亦以此為準。如此酌中定制。既無慮濫膺保薦。亦不至屈抑人才。著為令。○又諭昨召見長蘆鹽政西寧。據奏運使秦鏐才識迂滯。且自稱催科政拙等語。其言迂謬無理。所謂撫字催科者。專指力田民庶而言。至商人領運鹽引。已擅牢盆之利。所有應完綱課。理宜

按限催交。無可復以虛詞推諉。乃以富商比之窮民。謂為催科政拙。則有司糧賦。又當何如。秦鏐係科目出身。豈白居易新樂府鹽商婦之篇。亦從未寓目耶。秦鏐前在歸州知州任內。因盜犯張洪順一案。尚能持正。是以特加超擢。及用為臬司。來京請訓。見其人甚糊塗。已恐其不能稱職。而在任又有失察餘犯自縊之案。經部議降調。猶念其人尚謹飭。運使事務稍簡。是以令其補授。今識見庸陋。若此。竟係徒好名而不達事理之人。並不勝運使之任。秦鏐著來京。以部屬用。其長蘆鹽運使員缺。著錫拉布調補。○丙寅。以孝聖憲皇后升祔禮成。詔告天下。皇帝詔曰。朕惟顯親義重乎尊稱。報本典隆於告廟。粵考慈儀之懋著。爰稽殷禮為推崇。懿號載在前聞。配食彰於往牒。蓋睿德必大名始副。而升裡實萬世為昭。欽惟皇妣皇太后。

履順垂型。

坤貞示範。敦仁愛而輝流京室。荷

恩勤而慶篤藐躬。備

福壽者八十六年。受孝養者四十二載。儀天下

而為

大母。尊宮中之有

聖人。合九州萬國以迓

歡心。萃

五世一堂而徵盛事。侍春筵於仙館。奉夏清於

山莊。欣

色笑之時愉。幸尊親之倍摯。披

輦巡方而呼騰嵩岱。推

恩賜復而感逮葭蓬。紀祝

嘏在玉河入貢之年。緬承

禧於雪徼永清之會。仰藉

洪熙為普燾。喜逢宸寓之豐亨。慶典頻臻。崇勲

懋集。晉

鴻稱於一十八字。介繁祉於億萬千齡。厚福冀

自此引長。前史真罕有倫比。方念

春暉之永庇。何期愛景之難追。

慈恩遺慕於終天。

義訓縈悲於罔極。溯

徽音而同符高厚。審上諡而莫罄名言。行本

孝斯無以加。德惟

聖為不可尚。闡實一根。乎至性。考哀兼協夫羣

情。敬成大禮於

山陵。彌眷哀思於俎豆。肇

實錄卷一〇三二

七

神宮之妥祀。躋

太室以升香。燕天之

靈爽如憑。諏吉之彝章備舉。祇告

天。

地。

宗廟。

社稷。於乾隆四十二年三月十六日。率諸王貝

勒。文武羣臣。恭奉

冊。

寶上

尊諡曰

孝聖慈宣康惠敦和敬天光聖憲皇后。四月二

十五日。奉安

泰東陵禮成。五月初一日。升祔

太廟。既表崇

親之大誼。當推錫類之深仁。所有事宜。開列於

後。

歷代帝王廟及

實錄卷一〇三二

八

先聖先賢陵墓。所在地方官。隨時修護。一恭

送

孝聖憲皇后梓宮。及護從執事大臣官員。加一

級。一。直隸辦差地方文武官員。加一級。一。內

外大小各官。除現在品級。從前已得封贈外。

其陞級及改任者。照新銜封贈。一。滿漢孝子

順孫義夫節婦。該管官訪實。奏聞旌表。一。貢

監生。免坐監一月。一。在京及各省軍流以下

人犯。分別減等發落。一。各省養濟院。所有鰥

寡孤獨及殘疾無告之人。有司留心養贍。窮民無力營葬。並無親族收葬者。地方官多設義塚掩埋。於戲。懿行揚光。展悃報効勞之德。馨聞孝饗。延釐閔昌熾之庥。布告中外。咸使聞知。○諭。乾隆十三年。更定鹵簿儀駕恭詣

園。兵御玉輦。

方澤。御金輦。

中祀。御禮輿。以別等差。用昭誠敬。茲屆

實錄卷三十三

九

北郊之期。若照往年乘用金輦。朕心實有未安。所有二十七月以內。恭遇

天壇。

祈穀壇。

地壇。大祀典禮。應用玉輦金輦者。俱著改用禮輿。該衙門照例豫備。○又諭曰

聖母孝聖憲皇后大事。內務府掌儀司官員。承辦一切事宜。均屬勤妥。又造辦處鑄鑪處。恭造

泰東陵應用供器。俱屬妥速。所有承辦此事之副都統金輝並承辦司員。俱著加恩。一併交總管內務府大臣。查明議敘。○又諭曰

聖母孝聖憲皇后大事。禮部司員蘇楞額圖桑阿。承辦一切事務。較為勤慎。著加恩交部議敘。○又諭曰。大學士舒赫德應得封典。著加恩。仍行給予。○諭軍機大臣等。據已延三奏蒲州。解州等六府州呈報。於本月十九。二十等日。各得雨三四寸等語。已於摺內批示矣。

實錄卷三十三

十

該撫奏報此次之雨。止言蒲州解州等屬。而未提及他處。其未能普徧可知。所有太原等各府州。農田恐不免望澤。著傳諭已延三速將各該處有無盼雨情形。及曾否續得甘澍。即行據實覆奏。至畿輔春膏雖渥。而入夏以後。尚未得雨。朕心盼望甚殷。山東河南與直隸毗連。晴雨大畧相仿。且近日亦未見該撫等有得雨之奏。深為廑念。並著傳諭徐績國。泰切實查明。迅速覆奏。○吏部帶領京察保

送一等之內閣侍讀學士穆克登泰等四十
六員引見。得旨。穆克登泰圖桑阿俱准其一
等。慶玉善寶。崇泰。許祖京。靈保。傅森。覺羅吉
慶。那蘇圖。查隆額。海廣伊。江阿。呈麟。廣泰。廣
玉。武赫隆。興王家賓。施光輅。陸瑗。趙鏐。翰圖。
永安泰。玉德。穆圖當。保宗室五壯。宗室蔚文。
宗室書光。宗室書敬。宗室僧保住。姚梁。宗室
成惠。宗室達德。正寬。策璘。韓朝衡。李紹。穆克
登額。阿克東阿。伊勒圖。敷文。泰文。光。姜斌。俱

實錄卷一〇三二

十一

准一等加一級。誠泰著改為二等。○以署協
辦大學士刑部尚書英廉兼翰林院掌院學
士。○丁卯。

孝誠仁皇后忌辰。遣官祭

景陵。○戊辰。

上臨大學士舒赫德第賜奠。○以編修鄭際唐
為雲南鄉試正考官。中書王瓚為副考官。編
修管幹珍為貴州鄉試正考官。中書呂雲棟
為副考官。○己巳。吏部帶領保送一等之翰

實錄卷一〇三二

十二

林院侍講學士成策等五十九員引見。得旨。
成策准其一等。福克進。福明。安。評。德。揚。鍾。嶽。
吳。延。瑞。戚。夢。生。德。隆。克。星。額。富。純。張。有。年。章。
銓。楊。以。溪。和。德。張。誠。恭。觀。音。保。德。齡。舒。敏。達。
充。阿。五。靈。阿。豐。伸。新。佳。吉。靈。阿。齊。豐。阿。薩。炳。
阿。常。興。瑚。嵩。額。永。和。果。爾。敏。春。貴。覺。羅。經。祿。
海。成。白。鶴。德。溥。玉。麟。海。寧。肅。普。洞。阿。蘇。楞。泰。
文。需。萬。寧。穆。克。登。音。德。布。景。福。羅。漢。泰。羅。敏。
蘇。楞。額。陳。其。煥。圖。桑。阿。凌。雲。陸。蒼。霖。福。舍。扎。
拉。豐。阿。巴。彥。寶。扎。爾。杭。阿。德。悌。博。爾。岱。誠。林。
福。慶。俱。准。其。一。等。加。一。級。芳。桂。著。改。為。二。等。
○庚午。諭。軍。機。大。臣。等。京。師。於。初。二。日。亥。刻。
起。至。初。三。日。已。刻。止。得。雨。五。六。寸。入。土。霑。足。
續。據。周。元。理。等。奏。報。近。畿。所。屬。得。雨。情。形。約。
畧。相。同。而。王。進。泰。亦。奏。古。北。口。一。帶。俱。一。體。
霑。足。惟。西。寧。奏。稱。天。津。地。方。止。得。雨。三。寸。等。
語。似。初。三。日。之。雨。西。北。一。帶。俱。獲。普。霑。而。東。
南。雨。勢。稍。小。恐。未。能。一。律。霑。透。山。東。河。南。與。

直隸毗連。未知初三日。曾否得雨。是否優渥。現在農田有無望澤情形。朕心深為廕念。著傳諭國泰徐績據實迅速覆奏。○吏部帶領京察保送一等之兵部郎中多隆武等六十

寶錄卷五十二

五

四員引見。得旨。多隆武姜晟俱准其一等。富森布尚安盛保恒臨勒保王祿朋史夢璣音登額興德塞木琅瑛琳祿明覺羅德坤覺羅保寧明善百慶傳舉福興阿塔琦海明保成呂爾昌張登書莫異蘭王嵩桂景祿五格查克順文祿奇豐額保年李世望和盛額岳禧連桂慶興玉保伊蘭泰查克丹萬梓岳克清阿富明阿覺羅忠德傅爾嵩阿孟蘭保錫郎阿寶書悟隆阿圖爾謹俞廷垣覺羅永怡薩涵太科靈阿周道隆富森阿慶雲哈魯喀圖爾斌覺羅富鼎六十四覺羅佛德英秀俱准其一等加一級。○閩浙總督管福建巡撫鐘音疏報候官尤溪南靖建安霞浦福安漳平太湖縣承八廳縣乾隆四十年報舉首舉甲

地園共十三頃八十四畝有奇。○豁除福建南安縣水衝官田六畝有奇額賦。○賑卹甘肅皋蘭金縣西和漳縣涇州崇信鎮原靈臺寧州正寧環縣東樂縣丞鎮番寧夏寧朔中衛平羅禮縣十八廳州縣乾隆四十一年雹水霜災飢民。並予緩徵。○旌表逼嫁捐軀湖北雲夢縣民劉明雄妻陶氏。○辛未。諭元史遼史明史通志通典音韻述微蒙古源流臨清紀畧各書。仍著于敏中同原派之大臣等

寶錄卷五十二

五

閱辦。○吏部帶領京察保送一等之理藩院郎中福來等三十六員引見。得旨。福來已付已永泰永齡明安富僧額普福富通扎克三賢良玉桂保成文敏德謙已拜納隆阿榮德定桂薩哈善五正額索興阿孟邵王曾翼劉錫嘏覺羅圖思義景如柏福永圖章富爾敏瑾拔那達齊正泰德文佟海珠隆阿達冲阿俱准其一等加一級。○壬申。上御乾清門聽政。○諭曰。刑部議覆富察善等

審擬山東民人史安百日内剃頭一案。問擬斬決。固屬援照定例。但百日内剃頭之禁。我朝定制綦嚴。而直省人民。或未能盡行通曉。且此等鄉曲蚩氓。原與職官及旗人有間。若因其無知蹈法。一概繩以極刑。朕心實有所不忍。亦非仰體

聖母慈愛之心。況今已過百日。此案竟可無庸辦理。該部即遵諭行。○定宗室覺羅與人爭毆擬罪例。諭曰。刑部審擬護軍藍翎長博爾

實錄卷一百三十二

四十五

洪阿與閑散覺羅德豐互相鬪毆一案。尚未平允。博爾洪阿因尋覓同旗護軍六保昏黑中誤認德豐為所尋護軍。呼喚老六。並非有心輕視。乃德豐輒與在街爭鬧互毆。實屬多事。刑部等衙門將博爾洪阿照犯時不知之例。與德豐同擬杖責。而一則革去翎長鞭責。一則僅予折罰錢糧。雖俱照例辦理。而輕重懸殊。未為公當。且國家議親之典。專指宗室覺羅在家安分。或有不法之徒。借端尋釁者

而言。若在街市與人爭毆。則已甘自菲薄。下同齊民。其擬罪不當復有所區別。或所犯情節。不至甚重。尚可毋庸加等治罪。但當使相毆之人。亦就輕律同科。庶不致有所偏倚。若如刑部等所擬。恐宗室覺羅見有干犯之者。不論事理輕重。先被斥革鞭責。而彼僅罰月糧。損已小而損人多。自為得計。勢必倚恃護符。肆行無忌。轉非國家優恤成全之意。此案博爾洪阿無庸革退鞭責。亦照德豐之例。折

實錄卷一百三十二

四十六

罰錢糧八個月。以昭允協。嗣後此等案件。均照此辦理。著為令。○吏部帶領京察保送一等之戶科給事中成德等七十二員引見。得旨。王大鶴劉權之芮永肩俱准其一等。成德戴第元張光憲圖薩布湛露五靈安永昌保富色克興昌持莊兆蓉永存陸朝砥豐紳陳初哲黃軒王仲愚劉種之翁方綱宋銑百齡榮客善寶佛爾卿額良弼興泰廣慶世麟富森布覺羅恩洽扎郎阿德勳扎勒翰扎拉芬

多永武富永達桑阿賡音布崇文舒寧安泰
承基蘇隆阿瑯璵嵩齡滿格吳省蘭揚桑阿
王巨源永信何廷璿劉宗澍鶴齡揚桑阿訥
蘇鏗額倬令阿覺羅伍拉納成寧玉成博通
蘇爾芳阿和綸諾敏兆亮克興額圖薩布覺
羅雙保寶祥俱准其一等加一級盛祿准其
於筆帖式任內一等加一級○護山東巡撫
布政使國泰覆奏入夏後得雨者計八府一
州二麥現已登場若五六月雨足秋禾方可
有收得旨覽奏稍慰○蠲免直隸清苑滿城
定興望都樂城永年磁州趙州柏鄉定州十
州縣乾隆三十三年至三十九年分軍行緩
徵災緩災貸銀三萬九千二百七十兩有奇
穀三千七百八十石有奇米三千三百九十
石有奇○癸酉兵部奏武職向無命案處分
讐盜未明案審明係盜方補叅查讐盜之分
惟憑失物與否若害命失物即係盜殺應將
武職題叅從之○山西巡撫巴延三覆奏太

原汾州平陽大同朔平寧武忻州代州平定
遼州十府州並前得雨各屬俱於五月初三
日得雨四五寸不等農田待澤尚無急迫情
形報聞○甲戌

上詣

太廟恭進

孝聖憲皇后玉

冊玉

寶尊藏行禮○諭軍機大臣等據楊景素奏潮

寶錄卷二十三

十八

州府屬有匪竊劉阿起等多人糾夥肆竊並
有臬司衙門革役劉遂良及海陽縣役許文
泰賊分贓現已拏獲到案徹底嚴審究擬等
語積匪糾夥肆竊實為地方大害況劉遂良
係臬司衙門久革差役竟敢冒戴頂帽詐稱
職員庇賊為匪尤屬不法縣役許文有緝捕
之責乃與竊匪劉阿起等往來分贓亦屬可
惡此二犯並應從重定擬以示懲儆並著楊
景素即拘集案犯研訊確情查究餘黨一併

嚴審。分別定擬具奏。至劉遂良係按察司衙門久革差役。與現在臬司無涉。其未革役之先。歷任臬司。俱係何人。難免於約束不嚴。及失察處分。並著楊景素查明。同失察衙役。叅賊分贓之知縣。一併叅奏。將此由四百里傳諭知之。○乙亥。諭京察罷斥之筆帖式。回旗時。仍准挑披甲食餉。司員降革。向無食餉之例。但旗人俱賴俸餉資生。此等降革人員。與獲罪者有間。伊等雖不能辦理部院事務。然於看守

實錄卷二十三

七

壇

廟庫門等差。尚屬去得。若因京察降革。致失生計。朕心實有不忍。嗣後八旗降革司員內。除年老不能當差外。其餘遇有前項缺出。交該旗酌量錄用。以示體恤。○又諭向來旗丁餘米。准在通州變賣。以資日用。現在各省糧艘陸續抵通。旗丁於兌足正供之外。尚有多餘米石。情願出售者。仍著加恩。准其在通州糶

實錄卷二十三

子

賣。在旗丁等既所樂從。而地方糧石益充。於市值民食。實有裨益。該部即遵諭行。○欽差協辦大學士阿桂。大學士管雲貴總督李侍堯會奏。每年秋。提督巡隴川等處一次。總兵輪派。同騰越鎮巡查。出防兵若驟減。恐緬匪聞知。妄生揣度。今秋應仍舊額。批自應如此。又奏。乘便漸減。可資休息。再潞沔緬寧二處。為各邊總路。嚴密立法防範。又批。是雖立章程。奉行不力。何益之有。又奏。現在董率文武實力辦理。得旨。允行。○護山東巡撫布政使國泰覆奏。五月初三日。省城無雨。登州萊州青州三府。得雨二寸至五六寸不等。此外雨雖未徧。望澤尚不甚迫。報聞。○丙子。諭上年因新設成都將軍時。將各省將軍養廉。通查勻派。除盛京伊犁外。均定以一千五百兩為率。但查各該將軍。向有應得本色米石。若因勻給養廉。停其支食。未免不敷。著加恩。准其仍舊支給。其新設成都將軍。並著一體議給。

○又諭曰福僧額年老著留京在散秩大臣上行走所遺墨爾根城副都統員缺著雅齊那補授○諭軍機大臣等據福隆安奏鑾儀衛校尉高雲亭代固安縣民孫自孝等謀充校尉冀免縣差高雲亭隨得孫自孝小錢五十四串分給校尉白福楊得貴各二十串將應繳廢照貼改孫自孝名字藐法取利請交刑部審擬一摺已交部辦理矣國家正賦丁歸於地並無力役之征並嚴禁科派里下即

實錄卷千五

三

遇有公事應用夫役亦皆給以工價雇用此外更無應派差徭何致小民圖免本縣當差出資謀充校尉且孫自孝願出小錢五十餘串必其平日在縣所派之差費用尚多於此故欲避重就輕一縣如此他縣自必相等是各州縣派累之弊未能盡除著傳諭周元理即速查明固安縣向來派差之事若何並通查各屬是否相仿據實覆奏毋稍徇飾尋奏固安縣有河四道汛前撥夫挑濬係居民自

保之計例不給費又秋冬時防隄支更守柵輪挨出夫辦理已久此外無料派差務校尉係內府効力人役與紳士例免差徭得旨這所奏情節該部知道○吏部帶領京察二三等官年六十五歲以上之宗人府筆帖式宗室懇特等五十三員引見得旨宗室懇特西岷峨胡在慧誠善高謙福明劉增圖爾炳阿長庚兆昌僧保哈山賁珠挖穆齊圖寶麟賚圖巴哈塔徐揚阿杭阿裕義都爾松阿寧昶

實錄卷千五

三

石祿齡昌善岱富琦覺羅書敏佛祿成德塞欽書通阿伊勒圖薩靈阿明善坤祿張應楷賦泰定福祿克濟芳泰赫楞額黑達色平德德進薩炳阿韓保葉布冲額蘇莽阿六十八阿必達赫著郎志安馬進泰俱著留任○戶部尚書兼管太常寺豐昇額奏神樂署兩廊房屋日就倒塌請將在內居住樂舞生房屋估修得旨神樂署南北兩廊房屋若止將現住樂舞生二十九家之屋修整其餘拆卸殊

覺有礙觀瞻。自應將兩廊房屋。可以葺治者。酌量修整。其兩廊地係外園。原可令樂舞生移家居住。但不得開設鋪面。招引閒人。致滋褻瀆。所有踏勘估計各事宜。著福隆安豐昇額和珅會同總理工程大臣查辦。○河南巡撫徐績。覆奏四月後。開封歸德衛輝南陽汝寧許州光州七府州所屬。多有得雨州縣。惟河北雨少。現在祈禱得旨。若於大田有礙。必當據實先奏。○命署協辦大學士刑部尚書兼翰林院掌院學士英廉。充日講起居注官。○豁除湖北江陵縣築隄挖壓田五頃四畝。有奇額賦。○丁丑。

實錄卷千三

三

上詣

大高殿

壽皇殿行禮。○遣官祭

關帝廟。○諭滿洲舊例。喪事過百日後。即舉行大祀。今

聖母孝聖憲皇后大事。已過百日。既立杆大祀。

所有王公大臣官員。與民人等嫁娶。皆伊等要事。若必俟二十七月後。始准舉行。殊與衆無益。其如何酌量親疎品級。立定章程。遵行之處。軍機大臣會同禮部詳悉妥議具奏。尋奏近派宗室。俟二十七月後。舉行嫁娶禮。遠派宗室。覺羅及三品以上滿漢大臣官員。期年後舉行。嫁娶日准作樂。尋常作樂宴會。仍俟二十七月後。四品以下滿漢官。百日後舉行。亦准作樂。尋常作樂宴會。俟期年後。兵民人等。百日後嫁娶作樂。從之。○又諭前因明史內。於蒙古人地名音譯未真。特命館臣照遼金元三史例。查覈改訂。並就原板扣算字數刊正。其間增損成文。不過數字而止。於原書體制。無多更易。茲閱所進。載之英宗本紀。如正統十四年。巡按福建御史汪澄。棄市。並殺前巡按御史柴文顯。同時殺兩御史。而未詳其獲罪之由。不足以資論定。又土木之敗。由於王振挾主親征。違衆輕出。及敵鋒既迫。

實錄卷千三

三

猶以顧戀輜重。不即退軍。致英宗為額森所乘。陷身漠北。乃紀中於王振事。不及一語。尤為疎畧。雖本紀為全史綱領。體尚謹嚴。而於帝王刑政征伐之大端。關係國家隆替者。豈可拘泥書法。闕而不備。致讀者無以考鏡其得失。蓋緣當時紀事。每多諱飾。又往往徇徇不公。而明史修自本朝。屢淹歲月。直至朕御極以後。始克勒成一書。其時秉筆諸臣。因時代既遠。傳聞異辭。惟恐涉冗濫之嫌。遂爾意

實錄卷千五十二

五

存簡括。於事蹟要領。不能臚紀精細。於史法尚未允協。前因明紀綱目所載。本末未為賅備。降旨另行改輯。所有明史本紀。並著英廉程景伊。梁國治。和坤。劉墉等。將原本逐一考覈添修。務令首尾詳明。辭義精當。仍以次繕進。俟朕親閱鑒定。重刊頒行。用昭傳信。○吏部奏。內外各官請封。以奉詔日為始。定限二年。逾限停給。從之。○戊寅。諭。前經降旨。自戊戌年為始。普蠲天下錢糧。仍分三年輪免。福

建應於庚子年全行蠲免。但該省有臺灣府屬官莊租息一項。因與雜稅無異。例應照舊徵收。乾隆十一年。及三十五年。普蠲各案內。均經加恩。准其蠲免十分之三。現在又屆普蠲之年。所有前項官莊租息銀兩。仍著照上次之例。蠲免十分之三。俾海外羣黎。均霑渥澤。該部即遵諭行。○諭軍機大臣。曰。阿桂等奏。緬甸送還蘇爾相等。現在接收辦理。緣由一摺。其事甚奇。緬匪既反悔前說。何以忽行

實錄卷千五十三

六

具稟還人。且蘇爾相既經賊匪帶回。因何復又送出。其故殊不可解。諒不能因此別藏狡詭伎倆。必因阿桂等前次擲還原稟。置之不理。邊境又並不聲張。轉將駐兵撤去。絲毫不露端倪。賊匪無從窺測。故有此舉。抑係得魯蘊於緬酋贊角牙處。訐告綻拉機。將其撤回。得魯蘊始行其志。無虞掣肘。因得復踐前言。亦未可定。今蘇爾相等既送至永昌。阿桂等可即向其詢問賊匪此次反覆緣由。先行具

奏仍速派人將蘇爾相等即行送京並諭以伊從前原係奉差前往被賊羈留本無過失且聞其曾屢次欲尋自盡情頗可憫到京後尚欲加恩令其不必憂懼途中並毋庸鎖解即令伴送之員同其由驛來京至前曾傳諭阿桂等令將緬匪頭目孟團嚴加刑訊細究賊匪因何反悔之故原因賊匪屢變前說實堪髮指孟團係緬匪得力之人自應將其嚴鞫令吐實情並使其多受痛楚稍可解恨今

實錄卷一千三

三

緬匪既將蘇爾相送回則孟團即可無庸嚴訊即派委妥員押解來京之處阿桂李侍堯皆諳練曉事之人亦可酌量若無可問處則亦不必解來矣至所稱將緬稟詳細譯出看其詞意如何乘機勒獻表貢並送還楊重英等語自應如此辦理緬匪忽將蘇爾相送出其心必生疑怯此時乘機勒令將楊重英送還諒彼亦不敢違拗若果將楊重英送出並進表納貢原可准其開關通市完此一事設

或提及蠻暮木邦土司之說則竟當嚴飭云爾等敢於羈留內地職官本屬非理自應送回至蠻暮木邦兩土司久經安插內地豈有復行給還之理況天朝體制事皆準理而行如秤官猛等本係無罪之人留之無益因即遣回該處並非欲向爾換人今乃請將久經安插之土司欲與所留內地人員互換殊屬狂誕不達事理斷難為爾轉奏仍始終不能完事且爾果還人納貢誠心歸順即可奏聞

實錄卷一千三

三

大皇帝加恩開關通市實於爾等利益不火爾若稍有異言即是爾等自行債事中國惟嚴飭邊境不許一人出入爾即有文稟仍一概付之不理爾技復何所施禍福利害惟爾自取毋貽後悔如此詞嚴義正傳諭後看其動作若何再行定奪總之外夷情性若窺見內地稍存遷就之意即視為奇貨可居詭詐百出若內地付之不理彼無從揣測必惶惑懇求此乃一定不易之道阿桂李侍堯自能

見及於此。措置必合機宜也。况前此圖思德長清等。一聞得魯蘊之信。急欲將就完局。意存見好。轉為賊匪所窺。事多反覆。及阿桂李侍堯到後。堅拒不理。賊匪忽爾還人。或轉可因此完事。可見辦理此等要務。惟在準酌得當。不可稍設成心。而為公為私。總不能外乎天理。圖思德長清此時能無深悔乎。至阿桂現在既有應辦之事。自應暫駐永昌。與李侍堯會商妥辦。若其所約日期尚遠。即又不值

實錄卷三十三

五

在彼久待。即可起程回京。入閣辦事。惟在阿桂自行妥酌而行。將此由六百里加緊傳諭知之。仍將應奏事宜。即速覆奏。○是日起。上以夏至祭地於

方澤。齋戒三日。○己卯。署湖廣總督湖北巡撫陳輝祖覆奏。拏獲嚴金龍案內各犯。係護安襄鄖道新調福建漳州府知府姚蔭督率知縣馬乾怡。史湛。分頭緝獲。馬乾怡誠實練達。

史湛。明幹老誠。應否送部引見。批此二合著送部引見。又奏。知府沈樹聲止隨同姚蔭審訊。得旨覽。○河南巡撫徐績覆奏五月初得雨。州縣十九處。續據衛輝南陽汝寧光州四府州。均報初一至初五日。得雨一二寸及五六寸不等。省以南麥地。漸次犁種。惟河北望雨甚殷。報聞。

實錄卷三十三

五

大清高宗法天隆運至誠先覺體元立極敷文奮武孝慈神聖純皇帝實錄卷之一千三十二

大清高宗法天隆運至誠先覺體元立極敷文奮武孝慈神聖純皇帝實錄卷之一千三十三

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲駙都尉軍功加七級通帶加一級尋常加二級軍功紀錄一次臣履桂

總纂官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲駙都尉軍功加十九級通帶加二級又加二級臣董誥內大臣戶部尚書錄星旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉五月庚辰諭曰

聖母孝聖憲皇后大事

贊禮郎德明於一切讀

文贊禮等事尚屬勤慎著加恩交部議敘○

又諭

恩慕寺工程辦理甚屬妥速所有在工之監督

等著加恩交總管內務府大臣查明議敘○

又諭國史三通兩館應進之書著隨時陸續

呈進不必入於現在各書輪進卯期其所修

通志通典仍上緊趕辦不得逾原定乾隆四

十六年告竣之限○以刑部侍郎錢汝誠充

三通館副總裁○辛巳夏至祭

地於

方澤

上親詣行禮○詣

恩慕寺行禮○幸圓明園○壬午諭此次京察

一等記名以同知用人員著照外省知縣記

名之例於補缺後扣滿兩年歸入應放知府

單內一體進呈○又諭上次京察一等記名

本年仍列入一等之筆帖式克興額萬柱舒

寧蘇爾芳阿侍詔盛祿助教吳省蘭著該部

帶領引見○以內閣侍讀許祖亨為四川鄉

試正考官檢討李臺為副考官翰林院侍讀

童鳳三為廣東鄉試正考官侍講劉亨地為

副考官檢討龔大萬為廣西鄉試正考官宗

人府主事姚梁為副考官編修祝德麟為福

建鄉試正考官御史戈岱為副考官侍讀王

大鶴為湖南鄉試正考官中書李豫為副考

官○予故大學士舒赫德祭葬如例謚文襄

○旌表守正捐軀江蘇無錫縣民周勝瑞妻張氏。○癸未。諭軍機大臣等。本日楊魁奏審擬河標千總李振綱袒庇兵丁。將知縣扭跌一案。照光棍例。擬斬立決。已批交三法司覈擬速奏矣。李振綱以河標千總。因兵丁等藉端索詐。經該縣掌責。輒敢徑赴縣堂。混稱會審。復將該縣揪扭跌地。實屬目無法紀。為從來罕有之事。薩載既經該府縣稟詳。何以不據實奏。僅爾咨部斥革。殊屬不合。伊平日辦事尚屬認真。不應率意若此。且即據實直陳。該管上司處分。亦屬有限。何憚於入告。僅以一咨了事耶。薩載著傳旨申飭。○旌表守正捐軀湖北光化縣民余志萬妻王氏。○甲申。諭曰。滿斗被徐成傑訐控一案。其受贓各款。俱經審虛。即芟樹割草二款。亦屬輕罪。惟於五花嶺峯口。拆牆通路。乘馬往來。業經軍機大臣會同刑部審訊得實。按律擬斬。本屬正條。即奏請正法。亦滿斗所自取。第念該處

原係舊有小路。雖用石牆砌斷。兵民人等。仍由坡上繞走。滿斗之拆石通路。亦不過意圖近便。非有心干礙風水者可比。所謂法重情輕。尚不至罪無可逭。昨因三通館進續通志。朕偶披閱新唐書。見狄仁傑傳。載有左威衛大將軍權善才。右監門中郎將范懷義。誤斧昭陵柏。高宗詔誅之。仁傑力爭。其不應死。高宗意解。遂免其死。可見治獄務在持平。朕辦理庶獄。從不稍存畸重畸輕之見。固無事拘泥史冊。然亦不妨援古以例今。滿斗律當論斬。原不能曲為之貸。而平情度理。尚不至於決不待時。滿斗著從寬改為應斬監候。秋後處決。餘依議。並將此通諭知之。○諭軍機大臣等。據徐績奏。河南省城。於五月十四日。密雨連宵。十五日雨勢尤大。入土深透等語。又據姚立德奏。十四日大雨如注。十分優渥。入土八寸。並據附近各屬。均報得雨四五六寸不等。兩省雨勢。大約相等。況十四夜至十五

京城得雨。極為深透。周元理所奏。保定得雨。情形亦同。而是日雲氣甚濃。雨勢必廣。今河南。濟寧。均得優霑。且在山東省城之南。不應濟南一帶獨缺。何以未見國泰奏到。著傳諭國泰。速將十四日山東省城。並各屬曾否得雨。是否深透。及因何奏報遲延之處。迅即覆奏。尋奏濟南。東昌。兗州。泰安。沂州。五府屬。均於五月十四。五。六。等日得雨。省城及未得雨各屬。現在陰雲時合。沛雨後即馳奏。報聞。○

舊錄卷一百三十三

五

又諭昨據伊勒圖奏奎林復興明白曉事。堪勝塔爾巴哈台叅贊之任等語。奎林復興不過在軍營閱歷。技藝出眾而已。至於辦事。究未經練。塔爾巴哈台與哈薩克接壤。尋常事務。可與將軍商酌。倉猝有事。若無主見。必至張皇。副都統銜惠齡。自遣往西寧以來。辦事精詳。且係尚書那延泰之子。著以副都統銜補授領隊大臣。前往伊犁。更換復興。隨同伊勒圖辦事。數月後。即可知其才具。將此傳諭。

舊錄卷一百三十三

六

伊勒圖知之。○禮部議覆署刑部尚書兼管順天府府尹袁守侗奏稱八旗及各省駐防貢監生員。願應鄉試者。即由各旗咨順天學政國子監考取。徑送順天府入場。其禮部查取旗冊之例。請停止。至八旗童生。歲科兩試。亦毋庸由部取冊轉發。即由該府丞查取旗冊辦理。均應如所請。再考試繙譯舉人。生員與文場同。亦照此例。由各旗徑送順天府覈辦。從之。○補行乾隆三十七年及本年。湖廣軍政。罷軟官一員。年老官一員。有疾官一員。才力不及官一員。分別處分如例。○以署協辦大學士刑部尚書英廉充四庫全書館總裁。○乙酉。刑部奏回民結夥三人以上。執持兇器毆人。除致斃擬抵一犯外。其餘共毆各犯。應照回民結夥三人行竊例。擬軍。三人以上。徒手未執兇器者。減等擬徒。十人以上。雖無兇器而毆傷人者。仍擬軍。從之。○丙戌。諭軍機大臣曰。刑部議覆山東定陶縣回民張

四聽從沙振方糾眾謀毆趙君用。至途中扎死葛有先。將張四問擬斬候。沙振方發遣烏魯木齊等因一摺。已依議行矣。此案回民沙振方等。因與趙君用口角微嫌。輒敢糾約至十五人。執持鎗械。謀毆洩忿。行至途中。遇葛有先一言肇釁。該犯先用鎗扎。以致張四用刀。將葛有先立斃其命。不法已極。自應將首從各犯全獲。按律重懲。方足以儆兇頑而安良善。現在逸犯未獲者。尚有米貴臣等十三人。著傳諭國泰。即派委幹員。勒限嚴緝務獲。無使一人漏網。不得以海捕具文塞責。將此由四百里諭令知之。仍將現在曾否就獲之處覆奏。尋奉現飭定陶。荷澤兩縣會緝。再添委幹員。剋日務獲。得旨覽。今續獲幾名否。○直隸總督周元理覆奏。據大興宛平涿州寶坻香河等州縣。查出彭理田地房產。共十八處。又家人何晏莊地一處。緣奉密查。尚未報究。報聞。○丁亥。

孝恭仁皇后忌辰。遣官祭

景陵。○諭曰阿桂著補授大學士。管理吏部英廉著協辦大學士事務。○又諭曰尚書豐昇額昨在金川。奮勇著績。克紹祖風。且能勉承伊父阿里衮忠誠素志。曾降旨於果毅公爵加繼勇二字。以示獎勵。所有阿里衮原襲公號。亦著加此二字。用昭世臣濟美。○諭前以大學士忠勇公傅恆體國公忠。鞠躬盡瘁。尚書果毅公阿里衮宣力殫忱。克彰勞勩。俱令其入祀宗祠。所有春秋二次祭文。自應將諭旨敘及。以昭酬獎。忠勲至意。著交翰林院添敘撰擬。○又諭此次京察一等記名及上次京察一等記名之中書筆帖式。交軍機處存記。遇有簡放知府所遺同知員缺。一併呈進名單。候朕簡用。○諭軍機大臣等。前據阿桂等奏。緬甸送回蘇爾相等。現在接收辦理。俟蘇爾相到彼後。訊取供詞。並將緬票詳細譯出。看其詞意如何。來機勒獻表貢及揚重恭

看其許約日期遠近再定行止等語。所辦甚好。已詳悉傳諭矣。阿桂等前摺於五月十四日奏到。距今已經十日。何以尚未見其續奏。張鳳銜距永昌不遠。蘇爾相等行走。需日無多。因何尚未將訊供緣由具奏。或係阿桂等即欲乘此機會。向緬匪勒獻表貢。並索取楊重英俟檄諭後再行奏聞。然亦當迅速具摺。何故稽遲若此。著傳諭阿桂等速將現在辦理情形。迅即覆奏。至緬匪等雖已將蘇爾相多朝相送回。若不奉表悔罪納貢。及送還楊重英。尚不得謂之誠心款服。未可許其開關通市。儻因其已經送還蘇爾相等。遽弛關禁。又似中國遷就完事。未免為賊人所輕。阿桂李侍堯俱係歷練有識之人。必能相機妥辦也。今日已降旨令阿桂補授大學士。管理吏部事務。著阿桂自行酌量。如緬匪許約奉表伏罪。納貢還人之期較近。阿桂在永昌辦畢此事。再行起程。若所約之期尚遠。自不值在

彼久待。一切事務。交李侍堯妥辦。阿桂即可起程回京。入閣辦事。將此由六百里加緊諭令知之。仍即迅速覆奏。尋阿桂奏據孟美等供送還楊重英及貢象。須五十餘日。方有回信。其事妥否。尚在未定。現在邊務無可辦理。俟宣慰司等事辦竣。即回京。得旨是。知道了。○調禮部尚書永貴為吏部尚書。以湖廣總督富勒渾為禮部尚書。浙江巡撫三寶為湖廣總督。甘肅布政使王亶望為浙江巡撫。甘肅寧夏道王廷贊為甘肅布政使。○戊子。上御勤政殿聽政。○諭前經降旨因乾隆四十年可比。所有陞殿受賀之處不必行。至今年明年萬壽冬至。亦應停止行禮。其各省應進三大節慶賀表文。俟過二十七月後。再行奏進。○諭軍機大臣曰。富勒渾已降旨補授禮部尚書。所有禮部事務。現有豐昇額管理。富勒渾應俟軍需報銷事竣。再行來京供職。現

新授布政使王廷贊著即赴省接篆。王亶望於交代後即來京請訓。前往浙江任事。三寶俟王亶望到浙後再赴湖廣總督之任。將此由四百里傳諭富勒渾三寶王亶望並諭令勒爾謹知之。○又諭昨因阿桂等於緬匪送還蘇爾相等一事尚未續奏。業傳諭詢問。今據阿桂等奏訊取蘇爾相等供詞並譯出緬稟代擬檄稿及辦理情形已於摺內批示。緬匪既將蘇爾相等送出所有差來孟美等四人原可毋庸扣留。至前此拘存之孟幹孟圖碎凍自當仍行羈禁所辦俱為得理。看來緬匪此時稍知畏懼且向因綻拉機與得魯蘊各存意見故多反覆。今兩人既已相合此後自可不致參差。現在勒獻楊重英等並令進表納貢諒賊匪未必復似從前之違抗但所云前因萬濤中阻以致遷延其人係何職分在緬首處與得魯蘊等遠近若何不慮其阻撓成事否。阿桂等如知其詳細即行奏聞。至

實錄卷三十三

十一

得魯蘊急欲完事之意。自係希冀開關通市以圖利益未必真畏中國加兵。總之緬地水土惡劣我軍前在彼處多有病亡者此非法令所能繩治且不值以我勁旅置之毒癘之地是以決計不欲用兵。至於嚴禁關隘不容一人出入在內地尚可專主。如果嚴查沿邊一帶不許貿易奸民出口賊匪自無從覓利。即或不能制其死命亦足少折其冀倖之心。李侍堯惟當實力妥辦以待相機集事。又另摺所奏素克津泰王呈瑞馬子建俱已自盡此三人殊可嘉憫。現在交部查明再降諭旨。其劉應鳳一名本係販私之尹小生案內逸犯自應解交刑部治罪。至阿桂奏稱辦理諸務完畢即於十五日起程此時緬匪若另有確信阿桂自能酌量留彼籌辦如尚無消息原不必在彼久待。阿桂既已起身自當遵照前旨回京。將此由六百里加緊傳諭知之。尋奏萬濤職分與得魯蘊相近得魯蘊資分較

實錄卷三十三

上

陳且有謝萬幾相助不致債事。報聞。○蠲免直隸大興宛平通州三河薊州良鄉房山涿水易州東安武清天津靜海青縣滄州南皮交河東光吳橋景州故城清河津軍廳二十三廳州縣額賦有差。○命禮部右侍郎阿肅充經筵講官。○以大學士阿桂兼管正紅旗滿洲都統事務。○己丑。兩廣總督楊景素覆奏從前李侍堯檄諭暹羅或交彼處來人或給貿易船帶往。今彼處無人在廣。俟有商船

實錄卷一百三十三

三

至暹羅。即將檄諭發往。俟稟到由驛馳奏。報聞。○庚寅。定協領不兼本旗佐領例。諭據福州將軍永德等奏協領兼管佐領。請照京城於補放叅領後。調管別甲喇例。按翼更調管理等語。所奏是。協領兼管本旗佐領。若一切事件。即自行完結。雖有不妥之處。無人查察。若令調旗調翼。隔別兼管。稍有不妥。自可駁正。於公務殊有裨益。著照所請行。仍通行各省駐防地方。嗣後協領等兼攝佐領。務令調

實錄卷一百三十三

四

旗調翼。隔別管理。不准兼管本旗佐領。再京城八旗叅領內。如有兼管本甲喇之佐領。亦應更調辦理。著交八旗將現在如此兼理者。即向別甲喇更調。著為令。○辛卯。諭四庫全書館繕寫之書雖多。而各總裁校勘者少。不能供進呈披閱。即再添總裁數人。仍恐無益。著派皇八子皇十一子及書房行走之侍郎周煌內閣學士汪廷燾卿吳綬詔侍讀學士朱珪侍講姚頤。編修倪承寬分與應校之書。同該館總裁一體校勘。陸續呈進。○諭軍機大臣等。今日國泰奏覆查禁海口棉花一摺。已於摺內批示矣。前因李侍堯奏稱緬地產棉花最多。應於粵東海口嚴行查禁。隨傳諭楊景素李質穎等。實力稽查妥辦。並因外洋海面處處皆通。恐緬地棉花因粵省查禁。不能進口。復從他省混入。亦未可定。曾降旨傳諭凡有海口之將軍督撫等。令其設法辦理。現據各督撫陸續奏覆。緬地從前將內地官

民扣留不還。情罪可惡。而其地水土惡劣。從前官軍在彼。多有染病及死亡者。斷不可以用兵。惟當嚴查邊隘。不許貨物偷漏出入。以絕其求利之路。因並及各省海口。一體查禁。勿令緬地物產。混行入口交易。今緬匪已將所留之蘇爾相等。遣人送還。其心頗知畏懼。如果悔罪納款。奉表輸誠。自可仍許開關通市。滇省尚可弛禁。則瀕海各省棉花入口。更可無事禁防。並恐地方官辦理不善。或滋紛

實錄卷二十三

十五

擾。即粵省海口棉花之禁。亦可不辦。將此遇將軍督撫奏事之便。一體傳諭。並令李侍堯知之。○又諭據徐績奏。開封歸德河南南陽汝寧陳州等六府。及許汝陟光四州所屬。俱於十四五兩日。得雨三四寸及五六七寸不等。省城迤南州縣。大田已獲優霑。河北彰衛懷三府屬。同日得雨四五寸。惟查有九處未遍等語。此九處係何州縣。及該處田禾有無妨礙。摺內均未聲明。現在曾否得有透雨。深

為廛念。著傳諭徐績。即行查明詳奏。覆奏。尋奏前奏未得雨州縣。係安陽湯陰臨漳武安內黃汲縣獲嘉淇縣修武九處。今安陽湯陰武安內黃修武五縣。已得透雨。餘四縣現在望澤。高梁等類。尚無妨礙。報聞。○刑部議覆伊犁將軍伊勒圖等咨稱。年老人犯。不能種地。應如何辦理等語。查此項人犯。年雖衰老。究係有罪。即力難耕種。應責令當看守差使。給與口糧半分。從之。○命協辦大學士刑部

實錄卷二十三

十六

尚書英廉教習庶吉士。○壬辰。諭軍機大臣等。前此河南山東兩省。似俱有望雨情形。屢經傳諭詢問。嗣據徐績奏。開封歸德等處。於十四五日。得雨三四寸及五六寸不等。本日國泰亦奏報濟南省城。於二十四日。已沛甘霖。入土深透。惟晉省前據已延三於本月十八日。奏到。五月初二日。太原省城及保德等州。各得雨三四寸不等。似該省雨澤。尚欠霑足。曾於摺內批詢。迄今已及旬餘。何以尚未

見覆奏。該省自初二日得雨之後。曾否續得透雨。現在田禾有無望澤情形。著傳諭已延三。即行查明據實覆奏。尋奏五月二十四日。省城續得透雨。今據各屬報。五月內共獲甘霖三次。田疇霑足。報聞。○癸巳。諭曰。刑部題覆直隸省毛成因圖姦殺死張興。問擬斬決一本。已依議行矣。閱本內。毛成於乾隆三十九年犯案。旋即脫逃。至四十年十月。始行緝獲。業已稽誅一載有餘。而承審之知州。又以

實錄卷一千三

七

鄰境會審檢驗辦差等事。公出。以致更易三任。輾轉稽延。直至本年三月。始行結案題達。殊屬非是。此等淫惡之徒。一經就獲。自應速行審辦。早正刑誅。俾兇頑知所懲儆。死者得以伸冤。方合辟以止辟之義。乃遲至兩年。始行審結。設該犯有監斃自戕等事。轉得倖逃顯戮。即此可見外省吏治廢弛。積習相沿。於地方緊要案件。全不依限速辦。為上司者。又不實力督催。至扣限時。輒以會審辦差。紛紛

實錄卷一千三

六

藉口。尚復成何政體。況州縣既有本任應審要件。即不應復差委會審別縣之案。以致反遲其應審之案也。督撫等何漫不經心。若此。周元理著嚴行申飭。達爾吉善著交部議處。嗣後各省審辦重犯案件。尤需上緊審轉。依限題結。不得託故稽遲。儻有仍似此等遲滯者。定將該管上司。交部從重議處。將此通諭知之。○軍機大臣議奏。吏部員外郎李調元。於典史劉培章遇缺先補稿內。始而議駁。繼欲議准。擬辦兩議稿呈堂。與同司官議論紛紜。因填浮躁。得旨李調元於議駁劉培章一案。意欲兩議。尚無情弊。且詢據該堂官稱其平日辦事。亦屬勇往。尚不至於廢棄。著加恩仍以吏部員外郎用。得缺後。帶所降三級留任。○以故多羅履郡王永璠子綿惠襲封多羅貝勒。○旌表守正捐軀直隸涿州民李漢妻王氏。○甲午。諭曰。舒妃薨逝。著派六阿哥十一阿哥。綿億。綿聰。扎蘭泰。豐伸。濟倫。成服。

綿億辦理

陵寢事務。不必來京。並派六阿哥莊親王永璫金簡。辦理喪儀。○諭軍機大臣等。禮部議駁裴宗錫奏請動項改辦黔省號舍之處。應毋庸議一摺。已依議行矣。該省號舍。雖係編竹為垣。砌土為甃。然士子相安。業經百數十年。並未聞其臨時傾圮。及因牆壁不固。有乘隙滋弊之事。何以裴宗錫輒思動項改建。如果係應辦之事。則該撫在任數年。早應具奏。若

實錄卷二十二

九

因本年係鄉試之年。理須修葺號舍。則圖思德現已到任。自當聽其酌辦。乃裴宗錫於接奉調任諭旨後。急為此奏。明係該撫欲辦此一事。以邀聲譽。為黔省留去後之思耳。裴宗錫平日辦事。尚屬認真。何以有此沽名之舉。殊不可解。該撫既欲改建號舍。以圖取悅士林。且有動支趕辦之語。此時自己興工。所有估需工料銀四千餘兩。即應令裴宗錫自行認修。以遂其沽名之願。伊歷任巡撫有年。此

項工價。亦力所優為。若因有此旨。將估修之

項。分派屬員代出。甚至派累民間。則是裴宗錫自取罪戾。將來一經敗露。恐該撫不能當其咎也。將此由四百里傳諭裴宗錫。並諭圖思德知之。○又諭曰。徐績奏拏獲鄰省兇盜王二。即金第老等九犯。審擬一摺。已據刑部覈覆。分別斬決發遣矣。至該犯供稱在山東曹縣。奪犯毆差。並於山東單縣濮州直隸開州安徽亳州疊次強劫各案。現據刑部詳查。

實錄卷二十三

十

東省曾經獲盜李八等。審擬題結。直隸亦將行劫馬連芳一案。題參疎防。惟安徽亳州史大任家被盜一案。尚未咨報到部等語。亳州盜案。係乾隆四十一年十二月之事。何以至今尚未咨報辦理。殊不可解。著閔鶚沅。即行查明。據實覆奏。此等兇徒。夥合多人。隨處竊劫。情殊可惡。自應將首從各犯全獲。從重治罪。方足以示懲儆。現在豫省。雖已將首夥各盜。拏獲九人。併案審擬正法。其逸犯未獲者。

尚有馬雨亭秉信皮亦隨六陳得馮三侯二謝大漢八人著傳諭周元理國泰閔鶚元嚴飭各屬派委妥幹兵役一體查拏勒限訪緝務獲毋使漏網不得以海捕具文塞責○以故奉恩將軍靈通子恒科襲職○緩徵湖南耒陽郴州永興興寧宜章五州縣乾隆四十一年水災額賦並予賑恤○是月浙江巡撫三寶奏杭嘉湖紹四府向有解省城乍浦歸公耗米以備水利工程及煮賑等用近年無

實錄卷一千三百三十三

三

事支撥請將乾隆四十一年新米存倉其三十八年至四十年積米五千餘石於青黃不接時糶銀備用報聞○河東河道總督姚立德護山東巡撫布政使國泰會奏運河隄內東坡一帶泗水發時漫損地畝今於姜家橋上下開挑深通水由橋洞直下兜灣處開引河五道築土壩一道得旨嘉獎○護山東巡撫布政使國泰覆奏四五兩月雨澤未透秋禾雜糧黃萎者五十五州縣如六月望前得

雨祇須補種無慮成災屆期酌懇蠲免錢糧分別辦理得旨覽今既得雨可不必忙矣且偶有水旱不齊綢繆固宜亦當以鎮靜為之○四川總督文綬奏准貴州撫臣裴宗錫咨稱松桃廳屬大豐廠煎鉛煤不適用查川省秀山縣之厚薄灣產煤堪用宜移鑪就煤煎鍊報聞○察哈爾都統常青奏達里剛愛馬廠按年駐班侍衛無事可辦應裁得旨每年遣侍衛至廠之例著停止仍交該部數年中請旨一次派往稽查

實錄卷一千三百三十三

三

大清高宗法天隆運至誠先覺體元立極敷文
奮武孝慈神聖純皇帝實錄卷之一千三十三

實錄卷一千三十三

軍

大清高宗法天隆運至誠先覺體元立極敷文
奮武孝慈神聖純皇帝實錄卷之一千三十四

監修總纂官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書保蘇滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉六月乙未朔

平定人三二日

上至西花園

舒妃金棺前奠酒○江南陶莊新建

河神廟成

上親製碑記文曰成大事者必有其時事有視

若易盡人力而為之然終於弗成者則以

天弗助

神弗相而非其時也事有視若難盡人力而

為之而終於有成者則以

天所助

神所相。而適逢其時也。雖然。

天助也。

神相也。無所為告之者也。使時可乘。而人弗盡力而為之。亦難望其有成也。故舉大事。必當審事機。乘時會。盡人力。以敬祈

天助

神相。則庶乎奏平成之功。三者不可闕一焉。吾於陶莊引河。益信此理之不爽。陶莊之土。逼河南流。近清口。蓋始自宋時南徙。歷元及明。不知其幾何年矣。於是有黃水倒漾之患。於是有藉清敵黃之說。然而清水常弱。黃水常勝。雖劬補苴。終不能得其要領。而倒漾自若也。惟我

皇祖聖祖仁皇帝。首見及於此。康熙己卯歲南巡時。即命開陶莊引河。俾遠避清口。以除倒灌之患。誠釜底抽薪之計也。其後庚辰辛巳歲。壬辰甲午歲。以及雍正庚戌歲。歷代河臣。屢挑屢淤。於是引河之事。遂置而弗論。逮乾

隆己未歲。予命大學士鄂爾泰視河。仍持開引河之議。而河臣河員率以為難行。高斌向稱為善治河者。亦以為功不易就。乃創建木龍。挑溜北趨。圖補偏救弊之為。於是引河之事更罷。而無有言及者矣。然予以為陶莊之引河不開。終無救清口倒灌黃流之善策。但南巡四次。未至其地。用是耿耿於懷。適昨歲東巡。河臣吳嗣爵蘇州撫臣薩載各來覲。因見嗣爵老病。遂以薩載易之。與之談及河務。以為海口淤泥之說終難行。至陶莊引河。則必宜開。而未敢必也。命其抵任。悉心相視。及薩載之任。與督臣高晉親履其地。測量高下曲直。頭尾寬窄。繪圖貼說以聞。朕復詳酌形勢。以硃筆點記。往返相商者。不啻數次。議既定。迺於去歲九月十六日興工。以今歲二月十五日。乘春汛水長之候。放流入新河。而舊河築欄黃壩以禦之。既放之後。新河順軌安流。直抵周家莊。始會清東下。去清口較昔遠

五里。於是永免倒灌之患。而引河之工成。夫自康熙己卯。逮今乾隆丁酉。歷七十餘歲。屢舉而未成。及一舉而遂成者。豈非時有可乘。不可乘之殊。而總賴

天助

神相之所致耶。其能勅使籌畫。盡人力而不失事機。任投艱而弗猶豫者。則錫賚酬勲。國家之典具在。至夫

天恩之賜助。蓋自始事以迄成功。予實晝夜在

實錄卷千三百四

四

心。默叩禱謝。無可言喻。而

河神之佑相。非特建崇祠。其何以顯明貺達羣誠乎。爰即新口石壩。建廟妥

神。俾司事者。春秋潔祀。以邀惠於無窮。並為迎

神送

神之詞。以協律焉。河之舊兮本南。每灌清兮黃兼。

神之相兮北漸。即運河兮賴永恬。迎

神之樂兮俎豆甘。於萬斯年恩沛覃。右迎神樂。河之新兮移北。既避曲兮就直。

神之相兮南塞。去清口兮無復逼。送

神之還兮帷幕飾。於萬斯年恒戴德。右送神樂。○諭曰。舒妃喪事。御前大臣。侍衛。乾清門

侍衛。及內廷行走大臣官員等。俱著於初祭後。薙髮。其成服阿哥。王公大臣侍衛。並執事

人員。俱著於大祭後釋服。十一阿哥。亦於大祭後釋服。八月正值萬壽之期。著於七月二

實錄卷千三百五

五

十九日薙髮。○丙申。諭前以彭理在該旗佐領處具呈。將四千餘兩之房產。繳抵二萬餘兩之賠項。並稱此外別無產業等語。情節頗屬取巧。因降旨令湖南雲南各督撫。於彭理歷官處訪查。有無寄頓財物之處。覆奏。據顏希深。敦福先後查出。彭理有箱篋等物。寄頓澧州。並有朝珠等件。勒當銀兩之事。茲又據敦福奏稱。彭理於華容安鄉兩處交典生息之項。本利共有一千四百餘兩。其所當銀一

千兩之物。估計不及二百兩。彭理以監司大員。於所屬部內。違例放債。且將衣物勒當多銀。實屬貪鄙。請旨革職。伊未能先事覺察。請一併交部嚴加議處。彭理著革職。敦福著交部嚴加議處。○丁酉。吏部奏請大學士阿桂應授何殿閣。及兼銜。得旨。阿桂著授為武英殿大學士。兼吏部尚書。○戊戌。

上還宮。○江南河道總督薩載覆奏查三代時。河未南行。自漢以後。入淮旋塞。仍北行入海。

實錄卷一千三百四

六

至宋紹熙五年。河徙陽武。分二派。一由北清河入海。一由南清河入淮。黃河南行自此始。明宏治六年。河全南行。正德四年。河決曹縣。注豐沛。經邳宿。自桃源三義鎮入口。繞清河縣舊治後會淮。係在陶莊迤北。嘉靖初。三義口塞。河流南徙。出清河舊治前。與淮水會小清口。即今清口。係在陶莊以南。得旨。朕之陶莊新河碑語。大概弗錯。知道了。○湖北巡撫陳輝祖疏報。乾隆四十年。鶴峯州勸墾下則。

旱地九十四畝有奇。○己亥。

上御太和殿視朝。文武陞轉各官謝恩。○幸圓明園。○庚子。諭從前將福隆安次子豐紳果勒敏嗣與伊兄福靈安為子。承襲雲騎尉。今豐紳果勒敏病故。別無承嗣之人。著將雲騎尉暫行停襲。俟福隆安生子後。再令承襲。○又諭。據顏希深奏。湖南正佐雜職。率多舍其本任。調署別缺。轉將本缺改委別員署理。更有將苗疆人員。亦調署腹內之缺。又如吏目。

實錄卷一千三百四

七

典史。例不出差。湖南則屢有差委。任意更替。地方之廢弛。公事之闕茸。未必不由於此。現在督同司道。徹底查明。分別釐正。以專責成。等語。所奏是。州縣佐貳等官。自應各就各任。實心辦理。使地方官久於其任。事有責成。心無幾倖。方於地方有益。即或因人地相需。繁簡各異。及本任遇有緊要案件。必需能員審辦者。該督撫酌量人才。臨時調署會辦。原屬例所不禁。若任意更調。通省皆然。則督撫既

得藉以市恩。並恐開屬員僥倖營求之漸。其所繫於吏治官方者甚鉅。顏希深既有此奏。不可不徹底查辦。著交顏希深秉公確查。若通省調署各員。如顏希深所奏情節。不過十之二三。尚可無庸置議。若調委署任之事。多至過半。則是敦福自取愆尤。即應據實參奏。將敦福交部治罪。而陳輝祖現署督篆。亦難辭咎。自應一併交部議處。蓋督撫初任封疆者。多陳奏公事。以見留心地方。如四川必言

實錄卷三十四

八

嚴拏囑匪。貴州必言安輯苗疆。江蘇必言禁米出洋之類。幾成故套。迨日久相忘。又蹈前轍。而後來者復從而議之。以見整飭。顏希深既為此奏。即當實力為之。勿致始勤終怠。至調委紛紜之事。恐不獨湖南一省為然。他省或有相似者。著該督撫一體留心妥辦。○諭軍機大臣等。據顏希深奏湖南吏治情形。所稱州縣佐雜。調委過多之處。已明降諭旨。交顏希深查辦矣。至所奏上司既明以姑息市

私恩。下屬遂漸以逢迎開捷徑。地方之廢弛。公事之闕茸。未必不由於此等語。果爾。則湖南吏治。幾不可問。必當徹底確查。以定其言之虛實。阿桂由滇回京。湖南乃必經之路。著傳諭阿桂。於過湖南時。嚴密訪查。果有廢弛闕茸實蹟。即行據實具奏。諒阿桂必不肯稍為徇隱也。將此由六百里諭令知之。顏希深原摺。及朕所降之旨。並著鈔寄閱看。尋奏臣過湖南。細訪敦福官聲。尚無不好。至州縣調

實錄卷三十四

元

委過多。誠不獨該省。即雲貴亦然。緣逃兵處分甚嚴。一年未獲。不得不調他處。保全人材。又銜途差繁。酌調簡僻。以均苦樂。至佐雜亦多委署。未免瞻徇。得旨。皆是公論。知道了。○辛丑。軍機大臣議。覆定邊左副將軍巴圖奏。稱扎哈沁人等。原係庫克新瑪木特投降時。帶領同來。並非所屬。今庫克新瑪木特之孫扎木禪病故。伊子承襲公爵。若管轄日久。視為屬下。恐生事端。應將扎哈沁之佐領十員。

改設四員。選一員為總管。令掌印。應如所請。又稱扎哈沁人等。應移駐烏里雅蘇台。查移徙必致煩擾。仍應駐本游牧。令科布多大臣就近管理。再扎木禪之子捫圖什。或移駐察哈爾。或仍駐彼處。令巴圖詢問。聽便安插。仍酌歸拉旺多爾濟等旗。在烏里雅蘇台當差從之。○癸卯。諭據德保奏。湖北三幫旗丁王清卓伯青鄧英三船。在邳州河定閘。遭風漂蕩。粒米無存。例應照數賠補等語。漕船內河失事。例固應賠。但念該幫船隻。猝遇暴風。漂溺。人力難施。情尚可原。况該丁等船已漂沒。若一時全行補交。未免竭蹶。著加恩令其各買本幫餘米三百石交納。其餘四百五十餘石。同隨糧蓆竹。俱著緩俟下年搭運全完。以示體恤。其失防之押運員弁。及地方文武各官。著該總漕查明。交部察議。○諭軍機大臣等。據王進泰奏。提標營領餉京馬一項。自乾隆二十八年。至四十一年分。歷任提督任內。

共陸續積存銀一萬四千四百餘兩。除前經奏明存留開設當舖銀六千兩。並留辦草料銀二千餘兩外。再留銀一千三百二十餘兩。添補每年豫買麩豆草束之需。下存銀五千兩。可否解交內務府廣儲司庫。或解交熱河道庫之處。伏候訓示等語。直隸提標餉馬。既有積存銀兩。其督標各鎮領餉京馬。是否如此辦理。及有無銀兩積存。著周元理即行查明。據實覆奏。至此項銀兩。原係兵丁等分內應得之數。官為妥辦。得有餘存。自應即留該處。量為滋生。期於兵丁有益。毋庸解交廣儲司。及熱河道庫。其應作何經理妥善之處。著王進泰悉心詳議具奏。將此傳諭周元理。王進泰知之。○又諭曰。阿桂已於五月二十二日。自永昌起程。與李侍堯沿途商辦銅務。此時想已自省城起身。所有飭令緬匪送還楊重芳及奉表納貢各事宜。李侍堯自能酌量妥辦。至阿桂李侍堯會奏安插各土夷。及仍

復車里土司二摺。已批交軍機大臣會議具奏。自俱可照覆。其安插之人。有應改徙烏嚕木齊等處者。李侍堯務須選派妥幹員弁。小心管押。並仿照從前押解廣西省偷越安南人犯之例。沿途添派兵役護送。勿致稍有疎虞。又另摺所奏。自應即行嚴查妥辦。但據稱此皆十三版納夷衆。不忘刁氏情形之語。殊未明晰。土夷自相刦殺。與不忘刁氏情形何涉。著李侍堯即將其故詳晰覆奏。此旨著由

平定縣志卷之五

五

五百里發往。並令阿桂知之。緬匪如有遣人續稟情形。仍著李侍堯迅速具奏。尋奏。土弁刁應達暫管宣慰事。其子肆虐。衆人不服。益依戀刁紹文父子。以致滾科等刦殺。再檄諭緬匪送還楊重英及奉表納貢各事宜。阿瓦尚無回音。報聞。○軍機大臣議覆大學士阿桂等奏稱投誠土司土目。及安插各土夷。毋庸改徙者。有線甕團等二百五十餘名。酌移烏嚕木齊等處者。有召猛齊等五百餘名。應

遣還各土司本處者。有罕朝璣等三十餘名。請分賞滇黔各員者。有黃國賓等眷屬十餘名。無家可歸及單身夷僧不必移徙者。有阿隴等三名。均各就情形籌辦。應如所請。至線甕團等屬下人。耕種官莊外。准食糧當兵。其應徙夷戶啟程時。該督務派妥幹員弁。小心管押。照從前押解廣西省偷越安南人犯例。沿途各督撫。添派兵役護送。仍一面行知烏嚕木齊等處都統及辦事大臣。豫撥地畝。酌

平定縣志卷之五

十三

蓋房間。夷戶到日。庶不失所。至分賞各員夷眷。嚴加約束。夷僧亦交地方官稽查。從之。○戶部議准。署雲南巡撫圖思德題稱。建水縣普馬舊廠之大黑山。另開槽硿。鉛砂豐旺。就近撥臨安局鼓鑄。價值運費。照舊廠章程辦理。從之。○旌表守正捐軀直隸深州民王孫明媳鄭氏。廣東順德縣民梁添稼妻馮氏。○甲辰。諭寧壽宮工程處之筆帖式九格。新桂。廣泰。重光等四員。在工年久。甚屬勤勉。著加

恩交吏部帶領引見。○諭軍機大臣等昨據阿桂等奏查明滇省安插土夷情形酌請分別辦理一摺。現交軍機大臣議覆准行矣。此內有應遷烏嚕木齊等處安插夷戶五百餘名。此等夷民野性未馴。一聞移徙恐不免有逃竄等事。現已傳諭李侍堯於伊等起程時選派妥幹員弁。小心管押。並著傳諭沿途各督撫仿照從前接遞廣西省偷越安南滋事人犯之例。添派兵役。實力護送。勿致稍有疎虞。

○實錄卷一〇三四

一

○大學士管雲貴總督李侍堯雲南巡撫裴宗錫覆奏彭理前在雲南正署任所並未置產。亦無寄頓。報聞。○乙巳。諭軍機大臣等據國泰奏粵省委解點錫委員肇慶府通判李廷諒在德州病故。現已委員同該故員親丁僕從接收轉解。一面飛咨廣東省令其續派妥員兼程前進。其接解之員解送到日貯庫俟續派之員到日交納等語。解員中途病故。其距京較遠之省。自應仍由原解省分另

行派員接解。若距京既近。則本省雖另派員亦艱於趕赴。自當由經過之省派員代解。方無遲誤。今該員病故在山東德州距京不過十餘日。該督撫既已遴員接護解送。自應即令赴京交納。何必復令粵省派員。致羈時日。因交戶部詳查舊例。所辦本未畫一。已飭令分別途限。另定章程妥辦外。著傳諭國泰檄山東委員協同該故員之子。將所解點錫即行押運到京。赴部交納。並令該委員沿途小

○實錄卷一〇三四

一

心管押。毋使家人船戶乘隙滋弊。其粵東省毋庸續派委員徒勞往返。將此由五百里傳諭李質穎並諭國泰知之。○軍機大臣議覆大學士阿桂等奏稱普安營瘴盛。兵丁等憚於派撥應募。且孤懸江上。不足控制各猛。請撤普安營。其景蒙移徙來兵。仍還本營。查思茅營近九龍江。城外廠地可設營。即將元江營移往兵二百十六名。添設該處。歸思茅營遊擊管轄。原造普安營署舍。甫建旋朽。其銀

著承辦各員及各上司賠繳。以為添蓋思茅營弁兵房署及擴修城垣之用等語。應如所請。仍令李侍堯先行嚴估撥項興建。又稱刁氏管理車里夷衆。已二十四代。衆不能忘。自刁維屏棄職潛逃。曾委刁應達暫管宣慰司。轉滋事故。查有同刁維屏投歸之刁士宛。尚知奉法畏罪。請賞給宣慰土司。管理車里地方。以靖各猛之心等語。亦應如所請。並將私莊八處。給刁士宛交納額賦。刁維屏仍舊監

宣統元年三月十四

十六

禁從之。○丙午。諭前此批閱通鑑輯覽。以石晉父事遼國。而宋徽欽之於金。亦稱臣稱姪。舊史於兩國構兵。皆書入寇。於義未協。因命用列國互伐之例。書侵。以正其誤。並以大旨批示簡端。今館臣校勘刻本。復因當時所改。僅自石晉為始。其朱梁後唐諸代。尚未一律改正。將書內應改之處。黏籤進呈。已照所請行矣。朕之釐正書法。一秉至公。非於遼金有所偏向。蓋歷代相承。重在正統。如匈奴在漢。

頡利在唐。凡與中國交兵。自宜書寇。以正大一統之義。即宋室運際凌夷。然自徽欽以上。共主位號猶存。書法尚宜從舊。若五季時中國已瓜分瓦解。不獨石晉為遼所立。即梁唐諸代。亦難與正統相衡。猶之南宋以後。不得與漢唐北宋並論也。且朕意在於維持正統。非第於歷代書法為然。洪惟我

宣統元年三月十四

十六

治元年。定鼎京師。一統之規模已定。然明福王猶於江南僅延一綫。故綱目之編。及通鑑輯覽所載。凡我朝與明交兵事蹟。不令概從貶斥。而於甲申三月。尚不遽書明亡。惟是天心既已厭明。福王又不克自振。統系遂絕。若唐桂二王之竄徙無常。亦如宋末昺昽之流離瘴海。並不得比於高宗南渡之偏安。蓋能守其統則人共尊王。失其統則自取輕辱。實古今不易之通義也。朕評論及此。惟準以大

中至正之道。為天下萬世嚴子奪。即以是示創懲。且使我世世子孫。咸知恪守神器。兢兢業業。常保此統緒。以綿億萬載。丕丕基。所為詒謀垂裕之道。亦即在是也。將此明降諭旨。俾眾共知之。○以工部左侍郎彭元瑞為浙江鄉試正考官。編修茅元銘為副考官。內閣學士汪廷璽為江西鄉試正考官。編修陳嗣龍為副考官。中允張書勲為湖北鄉試正考官。禮科給事中戴第元為副考官。○戊申。諭

甲辰卷二 二二四

八

日彭元瑞現在出差。所有承辦明紀綱目。著派于敏中。錢汝誠會同原派之和坤閱辦。○諭軍機大臣曰。高晉奏蒙城縣知縣李名揚於該縣觀音庵尼僧發有身死一案。妄以盜殺為自縊。率混具詳。兇賊尚未弋獲等語。縣令遇人命案件。理宜確驗屍傷。據實詳辦。該縣李名揚於發有身死之案。既已驗明傷痕。其房內又有失去錢物。自係被竊覺追。致遭殺害。乃竟妄稱自縊。徑行詳報。生死罪名

出入所關。豈有如此昏庸之理。僅予革職。不足蔽辜。著傳諭該督另行定擬具奏。至摺內稱經臣查覈屍傷。及失錢情節。批司飭審。始經訊明。又敘及該縣尚有劉義致死伊子劉黑一案。臣因情節支離。委員確訊。覈與原詳不符等語。地方命案。例係巡撫為政。何以此二案。俱經高晉駁飭。而閔鶚元轉置之不問。則其平日所司何事。且閔鶚元係刑部司員出身。刑名諒所諳悉。何以於此等疑竇多端

實錄卷一 三十四

九

顯而易見之案。全未看出。尚藉督臣逐節指駁。著閔鶚元即行明白回奏。所有發有一案兇賊。應即飭屬上緊嚴緝務獲。從重究擬。其餘劉黑等各案。亦即作速另行覆審。定擬辦理。將此傳諭高晉。閔鶚元知之。尋閔鶚元奏發有身死一案。臣因情節未確。縣詳後委員覆審。必俟獲兇。方成信讞。劉義致死伊子一案。委員審詳。仍與縣訊相符。提犯親審。亦無歧異。正辦理間。因卸事進京。未及具題。現在

與督臣高晉商辦。嚴緝致死發有兇賊。劉義等犯。擬定即分別題咨報聞。○又諭前據敦福奏稱彭理以監司大員。於所屬違例放債。且將衣物勒當多銀等情。已降旨將彭理革職。敦福交部嚴加議處矣。昨陳輝祖以伊兼署督篆。不能早為覺察。亦請交部議處。陳輝祖兼署督篆。且遠在湖北。與巡撫敦福之近在本省者不同。毋庸交部議處。將此傳諭陳輝祖知之。○又諭曰勒爾謹奏報甘省雨水禾苗一摺。據稱鞏昌平涼慶陽等各府州屬。於十二十四等日。得有細雨。雖入土未能深透。而甘省氣候較遲。背陰早濕之地。所種二麥豌豆。可望有收。至高阜向陽之麥豆。乾旱已久。恐難結實。查皋蘭縣等九處。受旱較重。靜寧州等八處次之等語。甘肅每年多有缺雨之處。動輒成災。今皋蘭等各處。既有被旱情形。自當妥為查辦。著傳諭勒爾謹即速飭委該道府認真查勘。如有成災處所。應行賑

實錄卷三十四

三

卹者。即一面據實奏聞。一面酌量輕重。分別妥辦。務使窮民均霑實惠。以副朕軫恤之至意。將此由五百里諭令知之。仍將辦理情形及曾否得有雨澤之處。迅速覆奏。尋奏皋蘭等十七處。及續報靖遠縣等十處。夏禾已成偏災。現飭該府實力督率所屬。加意妥辦。報聞。○已酉。諭軍機大臣等。昨勒爾謹奏覆查辦甘省水利情形一摺。據稱甘省存在皆山。有一分水利之可開。小民即需一分水利之益等語。自係該省實在情形。甘肅地方高亢。每患雨水短少。如其地有可以疏濬之處。隨時挑挖引河。自於生民有益。原不必專於分引黃河。即溝澗細流。果能疏引成渠。農田即可稍資霑潤。較之置而不辦。靳人事而專藉雨澤者。不少勝乎。且地方多一工作。無論官辦民辦。總須雇用人工。即或其地偶被偏災。窮民並可藉以餬口。亦即寓賑於工之意。著傳諭勒爾謹不可豫存難辦之心。務宜時刻

實錄卷三十四

三

留心體察。如有可興之水利。即飭所屬設法疏通。實力妥辦。期於田功有益。將此由五百里傳諭知之。如有可辦之處。隨時查辦具奏。○旌表守正捐軀山西黎城縣民王聚海女王氏。

實錄卷千二十四

五

大清高宗法天隆運至誠先覺體元立極敷文奮武孝慈神聖純皇帝實錄卷之一千三十四

大清高宗法天隆運至誠先覺體元立極敷文奮武孝慈神聖純皇帝實錄卷之一千三十五

其修總管官是議官太子太傅文淵閣大學士文淵閣領閣事權衡內大臣總管欽天監事務
吏部理藩院事務黃旗滿洲都統世襲騎都尉軍功加七級隨帶加一級尋常加二級軍功紀錄一次
總管官是議官太子太傅大學士文淵閣領閣事權衡欽天監上諭事件總管理藩院都統軍功紀錄五次
世襲騎都尉軍功加九級隨帶加二級又加二級重誥內大臣都尚書錄藍旗滿洲都統軍功紀錄五次
尋常紀錄四次臣德瑛總管太子少保工部尚書紀錄六次臣曹振鏞等奉

敕修

乾隆四十二年丁酉六月庚戌月食。直隸

實錄卷千三十五

提督王進泰覆奏普恩當本。近年不敷。請於提標餉馬積存銀五千兩內添撥三千兩生息。兵丁差費益裕。再撥二千兩添備秋收出口買米。兵不關米時。每月支放二三斗扣餉歸款。得旨允行。○壬子。諭前經降旨令吏部查明滿洲人員。由道府等官丁憂回旗。已滿百日。在各衙門行走者。俱於每年十月帶領引見一次。所有武職滿員副將以下。丁憂俸滿病痊等事回京。改用京職者。著兵部依照

吏部之例。於每年年終。帶領引見一次。俟朕酌量記名。簡用外任。其不記名者。下次即無庸再行引見。○欽差大學士阿桂。大學士管雲貴總督李侍堯。覆奏緬匪幼酋新立。又與暹羅等國。連歲構兵。上年聞蕩平金川。因商辦還人貢象。後因檄諭嚴正。屢次擲還稟詞。益加畏懼。此決計送還。蘇爾相等實情。報聞。

○癸丑。

上御勤政殿聽政。○甲寅。諭軍機大臣曰。侍郎

實錄卷三十三

二

彭元瑞。以所得明臣史可法畫像。及其札藁。合卷進呈。朕親製詩一章。題於卷端。命廷臣和韻。並命大學士于敏中。書御製書事一篇。及史可法復攝政王書於卷。茲另為裝潢篋貯。著發交寅著令將此卷。弄於揚州梅花嶺。史可法祠中。並將卷內所有詩文畫像札藁。勒石祠壁。以垂久遠。至此卷。如有願求展閱者。亦聽其便。但當加意護守。勿致稍有污損。將此傳諭寅著知之。○

御製書明臣史可法復書睿親王事。文曰。幼年

即義聞。我攝政睿親王致書明臣史可法事。而未見其文。昨輯宗室王公功績表傳。乃得讀其文。所為揭大義而示正理。引春秋之法。斥偏安之非。旨正辭嚴。心實嘉之。而所云可法遣人報書。語多不屈。固未嘗載其書語也。夫可法明臣也。其不屈正也。不載其語。不有失忠臣之心乎。且其語不載。則後世之人。將不知其何所謂。必有疑惡其語而去之者。是大不可也。因命儒臣物色之。書市及藏家。則亦不可得。復命索之於內閣冊庫。乃始得焉。卒讀一再。惜可法之孤忠。嘆福王之不惠。有如此臣。而不能信用。使權奸掣其肘。而卒致淪亡也。夫福王即信用可法。其能守長江為南宋之偏安與否。猶未可知。而況燕雀處堂。無深謀遠慮。使兵頓餉竭。忠臣流涕。頓足而歎。無能為。惟有一死以報國。是不大可哀乎。且可法書語。初無詬誶不經之言。雖心折於

實錄卷三十三

三

睿主而不得不強辭以辯。亦仍明臣尊明之義耳。予以為不必諱。亦不可諱。故書其事如右。而可法之書。並命附錄於後。夫可法即擬之文。天祥實無不可。而明史本傳。乃稱其母夢文天祥而生。則出於稗野之附會。失之不經矣。

御製題史可法像詩紀文已識一篇。篤予謚仍留兩字芳。凡此無非勵臣節。監茲可不慎。君綱像斯覩矣。曠斯撫。月與霽而風與光。並命

實錄卷一三五

四

復書書卷內。千秋忠蹟表維揚。○戶部議准署雲南巡撫圖思德疏稱保山局增鑪四座。每年鑄存錢一萬四千餘串。請以錢一串二百文。作銀一兩。對半搭放兵餉等項。即以易回銀。還銅錫鉛工本。從之。○乙卯。諭東三省乃滿洲根本地方。諸宜恪守滿洲淳樸舊俗。並力挽漸染漢人習氣。近見吉林風氣亦似盛京。日趨於下。而流民日見加增。致失滿洲舊俗。此皆該將軍等平日不善於整頓之故。

將軍富椿近日所辦事件。漫無頭緒。昨保送驍騎校人員。竟至不諳清語。吉林風氣。至於如此。若不亟為整頓。則黑龍江亦必漸染漢人習氣。所關甚鉅。富椿不勝吉林將軍之任。著調補杭州將軍。額爾德蒙額年已衰老。著來京。富椿所遺吉林將軍員缺。著福康安補授。俾令加意整頓。彼處習氣。○又諭布達拉廟工程。承辦商人應行增費情節。據永和等奏。曾向劉浩商辦。伊稱俟進京時。將該商賠累緣由。在皇上前叩頭求恩等語。此事劉浩並未奏及。實屬取巧。所有應給商人之項。即著劉浩等賠補。但俟伊等交出。始行給與商人。未免為日較遲。殊非體恤小民之意。著總理工程處。即將此次工程。應行添給之處。逐一覈算。先以內府銀兩。給與該商。俟劉浩交清賠項。再行歸款。至給銀時。傳劉浩及商人當面給與。並諭知商人。以劉浩從前如果奏及。朕無不即行賞給。以示辦工恤商至意。○

實錄卷一三五

五

轉戶部右侍郎和珅為戶部左侍郎。調戶部漢右侍郎金簡為戶部滿右侍郎。工部右侍郎董誥為戶部右侍郎。工部滿右侍郎劉浩為工部漢右侍郎。以署四川提督舒常為工部右侍郎。○調鑲黃旗漢軍副都統達色為鑲藍旗漢軍副都統。○丙辰。諭曰慶桂尚未來京。所有吏部侍郎事務著和珅署理。○又諭曰福康安所遺鑲白旗滿洲都統員缺著阿桂調補。未到任以前著永貴暫行署理。正

實錄卷三十五

六

紅旗滿洲都統員缺著莊親王永瑞調補。所遺鑲紅旗蒙古都統員缺著額爾德蒙額補授。未到任以前著誠親王弘暢暫行署理。○戶部議准署雲南巡撫圖思德疏稱大理局增鑪三座加鑄三十六半卯存錢充裕應以錢作銀加二成搭放兵餉附近各廠工本亦一律搭放再有餘錢易銀歸款從之。○刑部議覆署湖南按察使衡永郴桂道汪新奏稱共毆案中。有原謀所毆傷輕餘人所毆傷重

名為餘人實乃兇首應照原謀毆有致命傷痕擬絞例減一等杖一百流三千里等語。意似從嚴不知誤會例意。轉將例內所稱下手傷重及究明何傷以傷重者坐罪應行擬抵之人改擬滿流未免失之寬縱。惟查例內所載原謀共毆亦有致命傷又以原謀為首一句在例已包括無遺。但於重輕二字未經明言。外省問刑衙門恐拘泥失當請將同謀共毆人傷皆致命原謀共毆亦有致命傷又以

實錄卷三十五

七

原謀為首一句改為原謀共毆亦有致命傷重以原謀為首如致命傷輕則以毆有致命傷重之人擬抵原謀仍照律擬流從之。○丁巳遣官祭

火神廟。○諭曰和珅現署吏部侍郎事務懇請將伊弟吏部筆帖式和琳照例迴避著照所請和琳以工部筆帖式補用。○戊午。諭軍機大臣等昨據周元理覆奏直隸通省雨澤情形保定以北之雨最為優足而南路如大

名廣平順德三府。稍遜於北路等語。現在京師尚未得雨。保定以北。大畧相同。應亦不免盼望。至畿南雨澤較少之處。其盼雨自必更甚。田土恐有乾燥之虞。尚不至成災否。該督應即留心確查妥辦。又前據奏稱該省於十四十七及二十等日得雨。迄今又閱數日。曾否續獲甘膏。深為厯念。至京師適日。炎熱異常。間有病暍者。該督現今防汛工所。距京甚近。煩歆自必相仿。未知通省氣候若何。有無

實錄卷一〇三五

八

觸暑致病者。著傳諭周元理即速查明。逐一據實覆奏。尋奏二十一日。保定又得雨寸許。迤北一帶。田禾正在結穗。望雨甚殷。畿南大名廣平順德三府。未報得雨。中旬已雨。不致成災。六月後炎熱殊甚。省城設局施藥。並令各屬照辦。報聞。○又諭據國泰奏審擬竇十調姦拒捕逞兇斃命一案。據稱竇十乘張氏之夫夏三與子夏喜外出用言調戲。當經夏三邀同妻弟張祿等與子夏喜赴竇家理論。

竇十即持刀開門。將夏喜砍傷斃命。並砍傷夏三張祿等四人。畏罪逃逸。旋於熱河地方拏獲。審明定擬。並稱該犯情罪可惡。僅按律擬斬監候。不足蔽辜。請旨即行正法等語。此等淫惡兇犯。情罪固為可惡。但按律擬以斬候。於法已無可加。若因其情罪較重。只須趕入本年秋審情實。不使久繫稽誅。尚非決不待時之犯。乃聲敘以為不足蔽辜。請即正法。恐無識者轉疑為有意從嚴。所辦未免過當。朕辦理庶獄。惟期公當。不肯稍有畸輕畸重之見。內外問刑衙門。均當體朕此意。著傳諭各督撫。嗣後如遇此等案犯。按律定擬後。即夾片聲明。趕入本年秋審情實。較之尋常案件。歸入下年秋審者。已屬從嚴。毋庸將不足蔽辜字樣聲敘。此案除交刑部存記辦理外。並著傳諭國泰及各督撫知之。○又諭據國泰奏現署靈化縣印之滋陽縣丞汪斌盤獲直隸越獄遣犯顧四即馬四訊係行竊脫

實錄卷一〇三五

九

逃。被直省阜城縣拏獲擬流。尚未發遣。越獄脫逃之犯。當經咨詢直隸督臣周元理。隨准咨會。已將越獄情由。題參疎防。具揭前來。與所訊供詞無異等語。遣犯越獄脫逃。非尋常逃犯可比。直省既有此等案件。自當即行專摺奏聞。一面嚴飭各屬。並咨會鄰省。躡緝獲犯。嚴訊定擬。使越獄重犯。不致漏網。乃僅照常將疎防職名題參了事。殊屬不合。周元理不應如此辦理。著傳諭詢問。令其據實覆奏。

實錄卷一百三十五

十

尋奏此案報越獄時。雖已懸賞嚴緝。照例題參疎防。但不即奏聞。實屬錯誤。請交部嚴議。得旨。此次姑寬。以後一切勤勉。○旌表守正捐軀江西樂平縣民胡與生妻葉氏。○己未上詣黑龍潭祈雨。○庚申。停漢鑾儀使缺。出開列提督例。諭向遇鑾儀衛漢鑾儀使員缺。兵部將本衛冠軍使。及外任提督總兵。論俸開列十員請簡。此舊例也。提督為專閫大員。俱由朕特簡補授。若人地非宜。及年力衰邁者。

斷難姑容。留俟改補鑾儀使之理。嗣後漢鑾儀使缺出。兵部只須將俸滿之總兵九員。註明年歲。及有無事故。同俸深冠軍使一員。開列進呈。俟朕簡放。其提督一項。毋庸開列。著為令。○軍機大臣會同禮部。順天府議奏奉面諭。順天鄉試及會試卷。如何分束之處。詳細酌議。查順天鄉試卷。有滿合南北中。四字之分。房考。有旗員南北中。籍貫之別。每科試卷數。滿字。合字。夾字。旦字。及中。四。北。四。約一

實錄卷一百三十五

五

十七八百至二千餘。應分為南籍房考。應掣之束。南。四。卷。約九百至一千餘。應分為北籍房考。應掣之束。旗員及邊省人員。併入北籍覈計。將此項卷。儘數酌分十八束。其貝字號卷。約五千餘。除直隸房考迴避外。餘俱可閱。將此項卷。亦酌分十八束。掣籤分閱。二三場卷。歸第一場掣定之房考閱看。至公堂按滿合南北中。四。貝。夾。旦。等字分束。概送內簾。令查號簿辦理。再會試按省分額。房考閱卷。向

止迴避本省。今應照鄉試覈辦。就上兩科各省卷數。及中額多寡勻派。並查房考迴避省分。酌分兩項。其迴避員數稍多者。卷分十束。少者分八束。每束約二百以外。知貢舉將某省若干卷。寫於封面。送內簾主考官同內監試。按房考迴避省分員數。查對卷數掣籤。二三場辦理。與鄉試同從之。○以內閣學士劉壻為江南鄉試正考官。刑部主事顧震為副考官。修撰陳初哲為陝西鄉試正考官。戶部主事程世淳為副考官。○旌表守正捐軀直隸武邑縣民范九成女范氏。○辛酉。上還宮。○以孟秋享

太廟。是日起齋戒三日。○壬戌。定副都統叅領等官。科場不迴避例。諭科場外簾各官子弟迴避之例。節經御史條奏。禮部議覆准行。其中尚有未甚允協者。如監臨知貢舉。監試提調總辦場內一切事務。其受卷。彌封。謄錄。對讀收掌等官。亦各有承辦試卷之責。自應令

其子弟迴避。以杜弊端。若兩翼副都統叅領章京。不過入場彈壓事畢。即行出闕。與考試文字。毫無干涉。至供給等所。不與士子相見。即順天府所委之巡綽等官。止於號外巡查。不能進號關照。又如磚門御史。點名後例不入場。亦可毋庸防範。所有副都統叅領章京。磚門御史及供給巡綽等官。嗣後俱不必迴避。即自今年為始。著為令。○又諭西域圖志。日下舊聞考。俱派于敏中。同英廉錢汝誠閱辦。○諭軍機大臣等。京師於二十七日夜間。得雨二寸。稍解煩歎。尚未霑足。未知近畿各屬。同日曾否得雨。分寸若何。又聞直隸境內。景州已得透雨。阜城亦已均霑。惟獻縣頗有旱意。何以該督未經奏及。現在曾否續得透雨。尚不至成災否。著傳諭周元理。即速查明。逐一據實覆奏。以慰廑念。尋奏二十一日。景州得雨三寸。獻縣阜城交河等縣。得雨二寸。雖未透足。尚不致成旱災。得旨京師亦得雨

矣。○戶部議滇省運銅鉛各員。在途病故。如係江南儀徵縣以南。該督撫飛咨本省。另委丞。俾接辦。如在儀徵以北。即由沿途督撫遣員接運。不必再咨原省。從之。○鑄給熱河道儒學印。從直隸總督周元理請也。○癸亥。諭軍機大臣等。據已延三奏。晉省所進書籍。共八十八種。內自行購進者。五十七種。經藏書之家獻進者。三十一種。俟總裁開單行知。即分別將自行購進之書。留存館閣。其應領三十一種。委員赴翰林院領回等語。所奏殊不明白。前經降旨。以各省訪進遺書。交四庫全書館纂辦。其現在辦竣及祇須存目各種。均應將原本。陸續發還藏書之家。其中或有該督撫等自行購進。及借本鈔謄。毋庸給還本家者。自應留於館閣。以廣收儲。今該撫奏稱。將自行購進之書。留存館閣。竟似該撫處另有館閣。欲將購進之書。自行存留。殊覺可笑。皆由奏摺辭不達意。敘次未能明了。嗣後奏

平定縣志卷之五十五

四

平定縣志卷之五十五

五

摺。務使留心檢點。勿但憑庸俗幕友。率意行文也。至所繳之書。既有自行購進及藏書家呈獻兩項。自應分別開單。奏明交館查覈。將購進者留貯。呈獻者發還。以省既發復繳跋涉之勞。著傳諭已延三及各督撫等。俱遵此旨。一體辦理。再前旨於四月十三日通寄。距今已兩月餘。惟山西一省奏到。其餘各省。均未覆奏。周元理近在直隸。尤不宜遲緩。若此。並著傳諭各督撫。鹽政將前奉諭旨。因何未經奏覆之處。即行具奏。○以湖南靖州協副將孫猛為福建汀州鎮總兵。○是月。直隸總督周元理奏。五月得雨四次。六月初五。六七日。日間段得雨。細察通省情形。保定以北。最為優足。得旨炎熱異常。恐致旱象。昨晚得雨。不成分寸。迤南光景若何。速奏來。尋奏南路大名。廣平。順德。三府。前已得雨。早禾暢發。望雨尚不甚急。連日溽暑熱蒸。必沛甘霖。報聞。○江南河道總督薩載奏。五月下旬。黃水長

至一丈一尺五寸以上。與欽定水誌相符。即放唐家灣。下注甚暢。得旨覽奏欣慰。○陞任浙江巡撫三寶奏曹殿迤南柴塘外添建竹簍工七百五丈。續修伏字等號簍工已竣。得旨當亦漸次南行矣。尋奏查勘老鹽倉。望汛潮不猛激。其溜勢由尖山西北。至陳文港一帶。折向西南。漸次南行。百靈効順。批不宜如此。朕不過察其消息盈虛之理。默為祈禱。至海神廟。仍當虔祭。又奏華家街迤西柴塘橋朽。應鑲築高厚。俟水臨塘脚。察勘辦理。得旨覽奏俱悉。○浙江布政使孫含中奏各營縣有領辦絲餉佐雜養廉育嬰堂經費。以及俸工役食修建大小工程等項。向止據文給役領回。恐日久弊生。現在一體行文知照。得旨知道了。○陞任甘肅布政使王亶望奏寧夏府渠工。經督臣勒爾謹督辦。現已報竣。臣逐一查勘。美利常樂等渠。向為沙壅之處。俱已深通。唐渠三百二十里。加培高厚。惠農昌

潤等渠。受水暢流。高阜俱足灌溉。至靈州漢渠。接築石工一千六百七十丈。並迎至野馬墩。黃河溜處。舊有正閘。亦經拆修。水勢建瓴而下。中衛縣七星渠。一千九百餘丈。石工亦屬堅固。唐漢二渠。原擬添建退水閘。今各渠通流無滯。應毋庸建。所領借項。皆妥幹士民分管。不經吏胥工歸實用。與原估數無溢。報聞。○湖南巡撫顏希深覆奏查乾隆四十年廣西遞犯。係由水路船載。今滇省夷戶。應照此辦理。得旨知道了。仍令派員照管。毋致滋事。○大學士管雲貴總督李侍堯奏五月十一日。綻拉機差人投稟。譯出係求放回孟幹言語支吾。意似希圖回檄。即扣留遣去之人。以抵孟幹批是。又奏不值給與回檄。又批好。又奏。惟令來夷傳語。綻拉機爾不待檄到阿瓦。徑行送稟。可見爾國全無紀綱。又批此詞亦正。又奏傳諭後阿瓦信到。即當酌辦。得旨所辦甚合機宜。知道了。○定邊左副將軍

巴圖奏。拏獲。攜帶眷屬。並馬四十匹。潛逃之厄魯特。哈什哈。請解交理藩院審辦。得旨。厄魯特。哈什哈。在額敏和卓處。牧放羊二十餘年。今攜帶眷口。並馬。潛至扎哈沁地方。顯係竊馬脫逃。著照巴圖等所請。解送理藩院審究辦理。○庫倫辦事大臣桑齋。多爾濟。奏。向例每年秋季。喀爾喀副將軍。查閱各部落軍器。帶領官兵。行圍操演。後因征勦準夷。停止。今邊陲寧謐。蒙古等安居無事。恐軍器殘缺。技藝生疎。有關武備。昨蒙恩授臣為副將軍。仍擬往各部落。將軍器查閱。並帶領官兵。行圍操演。如蒙允准。即於七月下旬前往。得旨。知道了。

大清高宗法天隆運至誠先覺體元立極敷文奮武孝慈神聖純皇帝實錄卷之一千三十五

大清高宗法天隆運至誠先覺體元立極敷文奮武孝慈神聖純皇帝實錄卷之一千三十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲部統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書銀錢滿洲部統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉秋七月甲子朔享

太廟

上親詣行禮（詣）

恩慕寺行禮○辛圓明園○諭軍機大臣等前

據勒爾謹於六月內奏稱甘省短少雨澤曾

經降旨詢問令其將該處曾否續得雨澤及

是否成災情形即行奏覆茲復據勒爾謹奏

甘肅省城於五月二十八日得有微雨不成

分寸秦州及所屬於二十八日雨日得雨三

寸其餘各府州屬有得雨不成分寸者有並

未得兩者高阜之地夏禾率多黃萎靖遠等十州縣已成偏災若十數日內大沛甘霖秋禾尚屬有濟等語深為厪念著傳諭勒爾謹即將該省曾否已得透雨及偏災處所現在作何辦理及盼雨各處是否不致成災各情形迅速據實覆奏仍一面派委大員確查有無成災之處實力妥辦務使窮黎均霑實惠○乙丑諭前因顏希深奏湖南州縣佐雜調委過多曾明降諭旨令該撫查辦并諭阿桂於回京時沿途留心體察茲據阿桂覆奏此事不獨湖南一省為然即如雲貴二省緣逃兵處分一項州縣到任後扣足一年如有未經緝獲之犯即應降調離任上司或因人材起見或因降調太多即委調他處相循輾轉遂至為數漸多等語是各督撫之遞相調署專為屬員倖免處分即此可見其事君不以誠矣州縣緝拏逃犯定例四叅限滿降調原准其出具考語送部引見即云逃兵處分基

嚴一年屆期未獲例應降調。此等尚係公過。該督撫等。如果以人地實在相需。奏請保留。朕亦無不量度情形。俯如所請。何必因此巧為設法。委調紛繁。致蹈欺飾之咎。即如王倫案內之逸犯歸太。劉煥通緝數年。至今未獲。可見各州縣之不能實心任事。然亦未嘗因此罷斥一官。則督撫等又何必為此過慮乎。現據阿桂另摺奏請酌定章程。已交部議。奏嗣後各督撫務須一秉至公。毋再輕為更調。倘敢仍蹈前轍。致滋沅弊。必將該督撫從重治罪。將此通諭知之。○丙寅。諭軍機大臣等。福隆安等奏稱。有山東沂州府郯城縣人吳煒。呈控本縣生員劉玉式等。率眾毆傷伊父。吳廷幹身死一案。該縣僅將劉玉式等四人監禁審訊。餘俱釋放等語。又陽信縣生員王鍾芳呈控。伊父王象元。因向張裕寬索欠。被殺身死一案。該縣僅將已死之張裕寬定為殺人正兇。歷次赴上司衙門呈控。亦未審出。

別情等語。固屬各原告一面之詞。但外省辦理命案。或將已死之人。當其重罪。或止就數人定擬。不另究糾。眾攢毆情由。思欲化大事為小事。皆所不免。著交國泰將此兩案。提集有名犯證。虛衷研訊。務得實情。勿因本省屬員稍存迴護。致干咎戾。審明定擬後。即行具摺覆奏。○丁卯。諭據桑齋多爾濟等奏稱。庫倫蒙古民人交涉事件。例由部院章京辦理。具報理藩院。並不具報駐劄庫倫大臣等語。庫倫若無特駐辦事大臣。所有事件。自應具報理藩院完結。今現駐有大臣辦事。令其就近兼管。甚屬妥便。況駐劄庫倫者。即係理藩院大臣。向不具報該處大臣。轉紛紛具報理藩院。本屬錯誤。嗣後庫倫章京。即著駐劄庫倫辦事大臣兼轄。凡蒙古民人交涉事件。均具報該管大臣辦理。○諭軍機大臣等。前據薩載奏。陶莊新河溜勢湍急。河頭河身。河尾現加寬濶。形勢較前更為暢順等語。其摺於

六月二十日奏到。距今二十餘日。未據續奏。現在伏汎甫過。已當秋汎之期。黃水自較前加長。不知近日新河溜勢若何。能否暢流無滯。以及清口出水。是否暢出有力。足資禦黃。朕心深為廕念。著傳諭薩載。即將該處實在情形。迅速由驛覆奏。以慰懸注。此旨著由五百里發往。并諭高晉知之。○旌表守正捐軀直隸三座塔廳民齊大妻王氏。○戊辰諭兵部侍郎事務著金輝署理。阿肅不必兼署。

又諭。據顏希深奏湖南州縣佐雜調署過多一事。朕即明降諭旨。令各該督撫一體查辦。並諭阿桂。於回京時沿途留心體察。昨據阿桂覆奏。此事不獨湖南一省為然。即如雲貴二省。緣逃兵處分降調太多。委署他處相循輾轉。遂至為數漸多等語。朕以州縣委署過多。自屬各省通弊。復降旨通諭各督撫。務須一秉至公。毋再輕為更調。倘敢仍蹈前轍。必將該督撫從重治罪。惟以儆戒將來。其既往

之咎。業已寬免矣。今敦福至京。朕令軍機大臣將顏希深及阿桂奏摺。並朕兩次所降諭旨。令敦福閱看。並詢以因何如此辦理之故。敦福自當切實引咎。亦屬已往不追。乃敦福不能體朕大公至正之諭。又不知感朕曲為寬免之恩。一味藉詞支飾。並不俯首認罪。是敦福非但毫無誠心。實屬糊塗之至矣。近日吏部議處敦福失察彭理及錯擬兵丁罪名二案例。應降五級調用。朕以為究屬公過。俱已折本。本欲加恩留任。今敦福如此覆奏。竟是无福承受朕恩。即倉場侍郎亦不堪勝任矣。敦福即著照部議降五級調用。其倉場侍郎員缺著德福補授。所有刑部侍郎員缺著博清額兼署。○諭軍機大臣曰。李侍堯奏緬匪統拉機寄稟提鎮及現在辦理情形一摺。所辦甚合機宜。已於摺內批示矣。看來統拉機此次之稟。顯係與得魯蘊不合。從中作梗。故不待遞至阿瓦。輒寄此稟。思欲激怒天朝。

致令債事。其情甚為可惡。李侍堯付之不答。所見甚是。且令遊擊哈三嚴諭來差波四等傳諭綻拉機。以得魯蘊既管不得。爾綻拉機又豈能管得。何不候檄文傳到阿瓦徑行差人送稟。殊屬非理等語。實為義正詞嚴。此後綻拉機如續有稟文。仍當置之不理。若緬酋贊角牙及得魯蘊等接到檄文。呈具覆稟。如係還人進貢。自可隨機辦理。或其詞稍涉游移。即當將綻拉機擅拆發還阿瓦檄文。妄行

續稟之事。諭知匪酋。以綻拉機敢於阻撓。爾等成議妄誕。自專。實出情理之外。或贊角牙及得魯蘊等聞知。將綻拉機治罪。便可少一梗阻之人。於事自更有益。至此時惟有嚴查邊隘。不許貿易之人。私自偷漏。餘仍不動聲色。使緬匪無可揣測。此外亦並無他法。李侍堯自能斟酌妥辦也。將此由五百里傳諭李侍堯知之。並將李侍堯原摺及所譯緬匪稟詞鈔寄阿桂閱看。李侍堯如續得有緬匪信

息。仍即由驛迅速具奏。吏部議覆。陝西巡撫畢沅奏稱。興平扶風岐山鳳翔四縣近日差使漸多。政務繁劇。請改為衝繁中缺。鄠縣整屋大荔朝邑四縣戶口日增。案牘倍於往昔。請改為繁難中缺。應如所請。從之。理藩院奏。庫倫商民崔成美被毆身死一案。請派員前往審辦。得旨著派侍郎博清額帶領司員馳驛前往。會同桑齋多爾濟索琳審明定擬具奏。○旌表守正捐軀四川大邑縣民張

先妻文氏。○已已諭軍機大臣等據勒爾謹奏。甘省入夏以來。未得透雨。致皋蘭縣等十七處及續報之靖遠縣等十處。夏禾被旱。已成偏災。現在遵旨督率各道府實力查辦等語。甘省被旱業已成災。且係積歉之區。閭閻生計。不無拮据。著傳諭勒爾謹將應行撫卹各事宜。督飭各屬妥協經理。務使貧民均霑實惠。毋致少有失所。至該省今歲成災。輕重多寡。較去歲若何。並著查明據實奏覆。又據

稱現仍率屬虔禱如數日內大沛甘霖收成尚有可望等語該督具摺後曾否續得透雨並著迅速具奏○又諭京城自初五日未時起雨甚綿密竟夜未止未知近畿一帶雨勢若何不覺過多否於田禾有無妨礙永定河水勢若何不致驟長衝突否著傳諭周元理即行詳悉查明據實速奏以慰廑念尋奏永定河水於初四日已經消落初五日固安地方又得密雨至初六日止入土五寸天已晴

霽水亦漸消臣親赴隄岸察看水勢平穩各工堅固近畿一帶初一初三等日得雨僅三四寸今又得雨一次田禾正資滋長其保定以南各處亦具報於月內月初先後得雨更於禾稼有益得旨覽奏稍慰○庚午以告退奉國將軍伊昌子內勒奉國將軍積拉敏子福珠靈阿各襲職○辛未諭現在修理履端郡王墳塋著加恩於內庫賞銀二萬兩○以署正紅旗蒙古副都統輔國公德勒克多爾

濟為鑲藍旗蒙古副都統旌表守正捐軀四川漢州民郭陞潮養媳李氏○壬申諭軍機大臣等上年金川全境蕩平所有該處地界歸入版圖安屯耕種此內有係從前綽斯甲布布拉克底巴旺黨壩各土司被金川侵占地方因念該土司等數年以來跟隨打仗守卡其勤勞亦屬可嘉自應特沛殊恩以示獎勵前曾面諭明亮并令齋旨到川會同總督文綬提督桂林將綽斯甲布布拉克底巴旺黨壩土司等被金川侵占之地伊等前往逐加詳勘查明無礙田土繪圖具奏候朕降旨酌量賞給迄今已閱半年何以未見奏到著傳諭明亮等迅速查明具奏再金川既歸版圖其地所有名山大川亦應崇以祀典如索烏甲索諸山曾經阿桂等祭祀頗為效靈自應推類查明予以春秋秩祀用彰報功之典並著明亮等詳查繪圖具奏此旨著由五百里發往諭令知之○以戶部郎中戚蓼生

為河南鄉試正考官。編修項家達為副考官。內閣學士汪永錫為山東鄉試正考官。修撰黃軒為副考官。翰林院侍讀學士褚廷璋為山西鄉試正考官。修撰金榜為副考官。○癸酉。

孝懿仁皇后忌辰遣官祭

景陵。○諭曰。蘇爾相著發往雲南。交與李侍堯。遇有遊擊缺出。即行補用。仍賞假。准其暫回原籍。省看墳塋。部署一切。再行赴滇候補。至

跟隨蘇爾相之土把總多朝相。著加恩賞銀一百兩。令其仍回隴川。其兵丁之現在隨出者。各賞銀十兩。回本營當差。其在老官屯病故者。著交李侍堯查明咨部。照出兵病亡例。減半議卹。並查明各兵子嗣。准其入營食糧。以示優卹。○甲戌。諭從前征勦緬甸時。聞遊擊素克津泰打仗未出。守備王呈瑞。馬子建。為緬匪羈留。偷生苟活。是以分別從嚴辦理。今詢據蘇爾相稱。素克津泰在阿瓦自縊身

死。王呈瑞。馬子建。亦皆投江自盡。此三人均可嘉憫。素克津泰之子阿克敦。先已犯案發遣。乃其自取罪戾。無可矜原。著加恩將伊孫色克圖。以驍騎校用。王呈瑞。馬子建二人所查家產。著賞還。並其子著查明。加恩以千總用。又諭曰。蘇爾相著賞大緞二匹。並著同遊擊永昶。及原來兵丁六名。馳驛回滇。諭軍機大臣等。昨蘇爾相來京。據稱伊出來時。得魯蘊說。我等是一心要歸順。但如今送你

出去。從前差去孟幹。孟團。碎凍等。求天朝也。賞還。感激不盡。綻拉機又說。若不能全行賞還。求先將孟團發還。舉國就有顏面等語。前因緬匪狡詐多端。於進貢還人之事。反覆不常。是以降旨。令將孟幹。孟團等暫行扣留。今蘇爾相雖回。而楊重英等尚未送出。此時孟幹等自不便發還。如緬匪即遵檄還人納貢。自可將孟幹等遣去。若緬匪仍前游移其說。復以求還孟幹等為辭。自當明白檄諭。以爾

等如果投誠修貢。將楊重英送出。便可為爾奏知大皇帝。加恩將孟幹等放回。以全爾等顏面。然此總因贊角牙得魯蘊等。力主進貢。還人之說。頗知恭順。是以准所請。並不因綻拉機亦曾有言。蓋綻拉機不明順逆。從中阻撓。屢次債事。不但違抗天朝。其情可惡。且惟知私心自利。全不顧爾緬子大局。即如前日擅拆發去阿瓦檄文。妄行具稟。此等擅專之人。實大不利於爾等。想爾等亦當知其罪惡也。又據蘇爾相稱。曾問過得魯蘊。送出楊重英一節。得魯蘊說。原要送出楊重英。因其從前曾密奏天朝。要四路進兵攻打。所以如今不敢送出。俟大局辦竣。自然送回等語。又是爾等糊塗多慮之處。四路進兵攻剿。久蒙大皇帝指示機宜。籌辦何待。楊重英之告稟。原欲俟平定金川後。即移兵分路征討。因爾等有悔過投誠之意。遂緩進師。爾等如即速還人納貢。自可永息干戈。並准開關貿易。即一

路之兵。亦不須動。復何煩四路大兵乎。惟在爾等審擇禍福。若徒事多疑觀望。實無益也。如此檄諭。或緬酋將綻拉機治罪。便少一異議梗阻之人。即不然。亦足破其首鼠兩端之見。李侍堯可就該處情形。酌量妥辦。再蘇爾相到京後。朕已加恩以遊擊用。並令其仍往雲南。交李侍堯遇缺即行奏補。連日命軍機大臣。詢問蘇爾相。據所稱情節。與得魯蘊極為熟識。幾成交好。因思得魯蘊等。如果到關進貢。還人。彼時李侍堯自應差委委員。至關口與之接見。交言。莫若即令蘇爾相承辦此事。為妥。因即令蘇爾相馳驛回滇。聽李侍堯遇缺補用。以資調度。并令軍機大臣。諭知蘇爾相。如果得魯蘊到關進貢。即令蘇爾相前往接受。為之明白宣諭。令其隨貢進京。瞻覲。即著蘇爾相伴送來京。蘇爾相既與得魯蘊相熟。所言自必深信不疑。如得魯蘊到時。朕必格外加恩。并加恩於蘇爾相。昨曾令其回

原籍看視且俟此事辦完再令隨便告假回家可耳。將此并諭李侍堯知之。此旨著由五百里發往。仍將緬匪近日有無信息迅速覆奏。○吏部議准大學士阿桂奏稱各省州縣佐雜不得調署別缺及輾轉更署如必須將實缺州縣調署者將因何調署緣由並委調若干員按季造冊咨報上季之冊下季到部如有遲延將該督撫藩司照例議處逾限不及一月者罰俸三月逾限一月以上罰俸一年並查明冊內如通省調委實缺各員數在十分之二者毋庸議十分之二以外將該督撫藩司照徇情例降二級調用各省調署之員即不逾額臣部亦將並無逾額之處於每年五月內彙奏一次從之○又議准廣西巡撫吳虎炳奏請各省督撫藩臬無論護署久暫俱令搬移進署辦事遞署之員一體照此辦理從之○豁除江蘇丹徒縣坍沒田地六十頃四十九畝額賦有差○乙亥諭軍機大

臣等本日遞到高晉等五百里馳奏之摺未啟函時朕心頗為疑慮及拆閱則係覆奏陶莊新河之事始為慰懷河工非有緊急要務不得輒由五六百里馳奏朕前此因該督等於陶莊引河情形久未奏及且時當伏秋二汛深為厯念是以由五百里傳諭詢問高晉薩載業於六月下旬將近日新河及各工情形節次奏聞則接奉前旨止須照常覆奏極速亦不過三百里郵遞乃因諭旨係五百里發往仍由五百里奏覆未免過於拘泥不達事理輕重緩急矣朕於河防諸務時軫於懷况陶莊引河新開規模尚未大定尤切心繫南顧高晉等何不能仰體朕心耶將此諭令高晉薩載知之○又諭前因暹羅頭目鄭昭屢次懇請封號曾代擬檄稿仍作李侍堯之意檄諭鄭昭發交楊景素即照向年之例附誠實洋船發往嗣據該督奏須俟五六月間始有赴暹羅船隻屆時發往令其寄到等語

此時想已發去。從前暹羅詔氏子孫。原係中國頒賞勅印。今既為緬甸侵占。頭目鄭昭復行收合餘衆。為故主復仇。誘殺緬匪多人。因而冀請封號。尚非篡據可比。且節次將緬匪所留滇省兵民。給資送回。甚屬誠心恭順。亦當予以獎勵。至於荒徼島夷。易姓爭據。事所常有。即如安南國之陳。莫黎諸姓。亦已屢更其主。非獨暹羅為然。況鄭昭籍本廣東。以內地民人。備藩外國。若令得邀封爵。必倍知感戴。天朝並非因其與緬匪交兵。藉彼一隅之力。且緬匪今已還人納款。更無事多為防制也。倘鄭昭接奉前諭。續有具稟求封之事。該督即當迅速由驛奏聞。加之封號。亦即羈縻控馭之道。再前因暹羅兩次求買硫磺鐵鍋等。俱經加恩允准。此後該處若再需用。仍當准其買回。至伊如言及協勦緬匪之事。則當諭以中國聲罪致討之兵。從不藉外邦協勦。即如近日平定兩金川。皆簡發禁旅。及選調

各省精兵。並非稍資他處番夷之力。況緬匪近已悔罪乞降。並將所留之蘇爾相等送還。奉表納貢。現已無事加兵。或該國與緬匪爭戰。聽其自為。若欲仰藉中國助兵。則斷無此理。猶之緬匪現已投順天朝。或將來緬匪因與暹羅爭釁。求助中國。亦斷不允其所請也。楊景素可視其稟文來意。如言及此事。即一併撤示。此旨著由五百里發往傳諭知之。又諭曰。寅著奏據總商江廣達等稟稱。從前所進書籍。皆係商等自行訪購。毋庸發還。又據馬裕稟稱。商人藏之書業。荷審鑒審定刊鈔。未便仍為商家藏本。並請留貯館閣。等語。江廣達等呈進各書。既係衆人訪購。自難復行分給。著如所請。即留備館閣之儲。至馬裕家以商人而能收藏載籍。至七百餘部之多。殊堪嘉尚。自當將原書仍行發還。俾得世守珍藏。毋致散失。至摺內將等字誤書得字。已屬粗心。且已請將原進書籍存留。又稱候

總裁開單行知委員請領。前後自相矛盾。此乃庸陋幕友行文不通所致。已於摺內批示。將此一併傳諭知之。丙子諭軍機大臣等。本日刑部參奏。安徽省亳州絞犯張振江。於上年五月十八日病故。該撫閔鶚元。直至今年六月初八日始行咨部。其遲延錯誤之故。又未於文內聲明。恐不無情弊。請飭交該督查究等語。已依議行矣。外省應入秋審人犯。遇有病故等事。自應即時驗明咨部。以便於

冊內開除。今張振江一犯。該撫於其初病故時。既已遺漏咨報。及九月內接到秋審部文。又並不查明檢舉。迨至時隔年餘。始以一咨了事。該撫係刑部司員出身。事例素所熟悉。何漫不經心。遲延若此。著傳諭閔鶚元明白回奏。○又諭。本日刑部參奏。安徽省亳州絞犯張振江。於上年五月十八日病故。直至今年六月始行咨部。其遲延錯誤之故。又未於文內聲明。恐不無情弊。請飭交該督查究等

語。已依議行。並令該撫明白回奏矣。張振江係監候緩決人犯。既於四十一年五月病故。理宜即時驗訊明確。咨部開除。縱使一時疎忽。遲延未報。亦應於秋審奉到部文後。查明速行檢舉。何以事隔年餘。直至今年六月始行咨部。而於此事之遲延錯誤。又並未聲明。殊不可解。況閔鶚元前於尼僧發有身死。並劉義致死伊子劉黑二案。俱經高晉駁飭。而閔鶚元轉未辦及。茲復有張振江遲延漏報

一事。該撫由刑部司員出身。事例素所諳習。何以於刑名案件漫不經心。若此。至閔鶚元前在藩司任內。辦事尚屬妥協。是以擢用巡撫。何以簡任封疆以來。諸事屢有遲誤。豈其才具僅堪藩司。而於巡撫重寄。不免竭蹶耶。朕簡用大員。惟視其能勝任與否。毫無成心。亦不肯稍有迴護。著傳諭高晉。即將閔鶚元近日辦事如何。是否勝任。迅速據實覆奏。毋少徇隱。○又諭。據王亶望奏。蘭州於五月二

十八日得有微雨。秦州所屬於二十八九等日得雨二三寸。其餘各處或間被細雨。不成分寸。現據皋蘭金縣二十七處具報秋禾被旱。俱成偏災等語。甘省被旱成災。前經該督奏報。並稱現仍率屬虔禱。如數日內大沛甘霖。收成尚可有望。業已降旨詢問。並令該督將應行撫卹各事宜。確查妥辦矣。王亶望此次奏摺。在該督發摺以前。現在該省曾否續得透雨。其成災處所情形。較昨歲輕重如何。

著傳諭勒爾謹。量率各屬妥協經理。務使貧民均霑實惠。毋致稍有失所。並將該省現在有無得雨之處。迅速具奏。又據王亶望另摺奏。盤查各屬收捐監糧。無缺一摺。所辦甚好。已於摺內批示矣。收捐監糧。原以備賑濟糶借之用。該省自開捐以來。積存糧數。賑卹案內。前後動用若干。每年節省正項銀兩若干。於災賑有無裨益。及各屬監糧。是否實貯在倉。所辦有無流弊。著傳諭勒爾謹詳悉查明。

據實覆奏。至甘省捐監一事。本責成王亶望。董率妥辦。今王亶望陞任浙江巡撫。因王廷贊在甘年久。人亦能事。是以擢任藩司。令其接辦。王廷贊能否力任其事。妥協經理。並著勒爾謹據實覆奏。將此由五百里傳諭知之。尋奏查甘省於六月底七月初等日。各屬得雨深透。於秋禾大有裨益。夏禾間被偏災。較昨歲稍輕。至甘省口內各屬收捐監糧。自乾隆三十九年冬開捐。至本年六月底。共收京斗糧七百一萬五千七百石零。連年賑卹案內動用糧二百七十四萬一千四百石零。又估支各營糧料及新疆供應等項。共糧十萬一千四百石零。較從前採買備用。每歲節省帑金一百餘萬兩。又出借籽種口糧及平糶共用糧二百二十四萬七千石零。現在應存糧。據該管道府結報。俱係實貯在倉。查捐監一事。臣與陞任布政使王亶望時刻嚴密稽查。並無虛收虧缺情弊。新任布政使王廷贊

樸誠幹練。事事認真。前在道員任內。稽查所屬監糧。極屬妥協。報聞。○豁免甘肅皋蘭。金縣狄道。河州。渭源靖遠沙泥州判。紅水縣丞。隴西安定。會寧通渭。平涼。隆德。靜寧。固原。鹽茶廳。撫彝廳。張掖。山丹。武威。永昌。平番。古浪。靈州。西寧。秦州。肅州。高臺等二十九廳州縣。乾隆四十一年夏。旱災地畝額賦。○丁丑。上御勤政殿聽政。諭軍機大臣等。據巡漕御史敦岱奏。臨清衛守備萬世通。同東昌衛千總王祖夔。統率丁舵衙役人等。至臨清閘。喝令衆人。將閘板拉起。放進改造回空船八隻。致重運糧船頂阻八時等語。實屬不法。運河設閘蓄水。以濟重運。其回空船隻。例應俟重運糧船全行出口。方准進閘。乃該守備萬世通。欲將赴次改造之空船。強行進閘。因閘官阻止。輒同千總王祖夔。率領丁舵人役。將閘板拉起。放進空船八隻。任意妄行。不可不嚴加懲儆。著傳諭德保。會同姚立德。即速查明。

據實叅革。究審定擬。具奏。將此由。四百里諭令知之。○以寧古塔右翼協領伊蘭保。為墨爾根城副都統。戊寅中元節。上詣恩慕寺行禮。遣官祭永陵。福陵。昭陵。昭西陵。孝陵。孝東陵。景陵。泰陵。泰東陵。○上命皇十五子。祭孝賢皇后陵。遣官祭端慧皇太子園寢。諭。昨據巡漕御史敦岱。

具奏臨清衛守備萬世通統率丁舵衛役至臨清閘喝令衆人將閘板拉起放進改造回空船隻稽阻重運一案已降旨傳諭德保姚立德查叅究審矣茲據德保國泰將該守備搶閘滋事緣由同日奏到並稱各證所供不符請將守備萬世通千總王祖夔閘官崔體淵一并革職究審等語萬世通王祖夔崔體淵俱著革職交與該督等嚴審確情定擬具奏以鑲藍旗蒙古副都統扎勒桑正紅旗蒙古副都統阿爾薩朗對調

實錄卷一百一十六

十一

大清高宗法天隆運至誠先覺體元立極敷文奮武孝慈神聖純皇帝實錄卷之一千三十六

實錄卷一百一十六

十一

大清高宗法天隆運至誠先覺體元立極敷文奮武孝慈神聖純皇帝實錄卷之一千三十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務並兼稽滿洲都統世襲騎都尉軍功加七級隨帶加一級嘉慶加二級軍功紀錄次臣廣柱

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部 都察院事務

世襲騎都尉軍功加十九級隨帶加二級又加二級 臣董誥內大臣 都察院副都御史滿洲都統軍功紀錄次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉七月己卯諭曰阿桂係

滿洲大學士其行走班次自應居首至漢大學士亦應有在前之人于敏中行走班次著在阿桂之後高晉之前諭軍機大臣等據李侍堯奏雲南省城自六月初四至初六日晝夜大雨山水匯注盤龍江宣洩不及城廂內外水深三四尺居民房屋致多倒塌人口田禾均無傷損等語城廂內外倉卒被水雖不致成災然被水各戶一時棲身無所情形自不免拮据著傳諭李侍堯督率各屬妥協

查勘動項撫卹務使窮黎安堵毋致失所至盤龍江應設壩閘以資啟閉蓄洩自應即時確勘興修並著照該督所奏辦理將此諭令知之仍將查辦情形即行覆奏庚辰命大學士公阿桂充

玉牒館國史館四庫全書館正總裁○辛巳諭前此揚寧在木邦所統綠旗弁兵臨陣畏蕙遇賊即行潰散情罪甚重自當速行緝獲即正典刑以肅軍紀而承緝各官玩忽從事不可不嚴定處分俾知懲儆乃接緝督緝之員日漸懈弛復經降旨令再予限一年緝拏如逾限未能全獲不但承緝各員嚴叅懲治定將彰寶李湖從重議處嗣經部臣定議分別降調降留前次所降諭旨原就彼時勒限一年俾各上緊緝獲而非永以為例也乃滇省自是年為始每屆一年即將承緝督緝之員叅奏議處一次而督撫又不自請處分此乃彰寶李湖從前辦理錯誤所致今彰寶已於

別案獲罪。李湖亦經降調。均不必咎其既往。但數年以來。承緝各員。文職降調者十三員。武職降調者。至有六十四員。同為疎防處分。而多寡懸殊若此。必有別故。昨據阿桂查奏。調署州縣過多之案。云不獨湖南為然。即滇省亦係如此。由於上司等欲為屬員倖免。承緝限滿處分。遂爾曲為遷就。此非以誠事君之道也。況文職則緝限將滿之時。上司輒為委調。令其規避。而武職則以無可藉詞。概從實降。致使向隅者眾。非朕令查。何以得知。所有從前節次實降各員。文職既經歷任督撫。徇庇巧為脫罪。則所降者人數本屬無多。其中亦未必有才猷出眾之員。轉不必查辦。其武職著交該部查明。將原議降調之千總以上。行文調取引見。至把總外委等員。著交李侍堯查明。驗其人材年力。尚堪驅策者。仍酌量奏聞。以原官委用。朕近覽明史。大率重文輕武。其時文員每妄自尊大。互相袒護。而蔑

視將弁。至以麓官目之。多方屈抑。一旦有事。文職既一籌莫展。其効力戎行者。朝臣復從而掣其肘。自速危亡。而不可救。最為弊政。我朝列聖相承。文武並重。法良意美。朕臨御以來。屢降諭旨。訓飭諸臣。毋生歧視。督撫等雖不敢顯分畛域。故蹈前車。然平日不免偏向文員。意為曲徇。而於武職。不啻秦越視之。即如滇省。叅劾承緝逃兵之案。墨吏議者。武職五倍於文員。其任情愛憎之私。已可概見。歷任督撫。本應隨案察治。今既另行查辦。其前罪姑免深求。然此等軒輊阿私之弊。恐各省皆所不免。朕既洞燭其隱。不可不明白宣示。以儆將來。督撫同受封疆重寄。文武皆其所屬。本不當意存分別。妄為抑揚於其間。且總督統司軍務。於武職尤不宜置諸膜外。公忠體國之謂何。其可不各加猛省耶。嗣後各督撫務宜肅除積習。勿復稍涉偏畸。以副朕一視同

仁之意。若再不知悔改。經朕鑒察及之。不復能曲貸也。至揚寧潰兵一案。距今已閱十年。而逃兵就獲者。既已十分之七。其未經就獲之犯。或於逃後病故。亦未可知。且緬匪已知悔罪。送還蘇爾相。懇請納貢投誠。從此邊境輯寧。更無用兵之事。所有揚寧案內未獲逃兵。其接緝督緝之文武各員。嗣後均著免其定限議處。如有能續行緝獲者。仍照前將該犯即行正法。其緝獲之員。並著該督撫奏聞。

量予議敘。以示獎勵。至該逃兵逗留藏匿之該地方官。失察之咎。實所難辭。一經訊明。即查明職名。送部議處。如此勸懲互用。庶各員益知感奮。至金川節次逃兵。非揚寧案內潰兵可比。自當嚴緝務獲。勿使漏網。其承緝接緝處分。著照緝拏重犯未獲舊例辦理。將此通諭知之。○諭軍機大臣等。山東逆犯王倫案內歸太。劉煥。二要犯俱係罪大惡極。不容漏網之人。曾經節次傳諭各督撫等。飭屬嚴

緝。勿視為海捕具文。迺迄今三年之久。尚未就獲。即此可見地方官不肯實心任事矣。該犯等自知罪無可逭。妄希竄匿稽誅。且慮及本省挨緝甚嚴。必不敢仍回原籍。即江浙等大省。人烟稠密。亦恐耳目昭著。難以潛蹤。惟雲貴川廣等邊省。地既遼遠。且外籍流寓者多。易於掩飾。該犯未必不改易姓名。計圖避匿。著傳諭邊省各督撫。密飭所屬設法躡訪。上緊嚴拏務獲。勿使要犯久逃顯戮。仍將作

何辦理緣由。即行覆奏。○以故奉恩將軍多義子翰格穆襲職。○壬午。諭軍機大臣曰。勒爾謹奏。各屬稟報。六月二十八日。暨七月初二。初四等日。得雨自四五寸。至深透不等。又省城。於七月初四日。得雨徹夜。入土深透。秋禾晚收。一切雜糧。大有裨益等語。覽奏稍為慰懷。但已經成災處所。曾否亦得透雨。於秋禾是否有濟。或可畧減災分。著傳諭勒爾謹。即速查明具奏。至被災州縣。該督迅即督飭

所屬實力妥辦務俾小民均霑實惠併查今歲被災地方較上年多寡輕重若何迅速覆奏○又諭本日楊魁奏據崇明縣知縣范國泰詳報拏獲在山東犯案之兇犯王有亮徐秀方黃友三等犯訊係在洋連斃二命分攬多贓殊屬慘惡雖東省現有夥犯待質但情罪重大應即照例在江省獲犯地方嚴審定擬未便輾轉遞解致有疎虞等語所辦甚是已於摺內批示矣各省督撫俱宜照此辦理此等兇惡重犯拏獲後即應迅速訊明定擬立寘典刑若因案涉隣省輾轉解審則該犯轉得少延顯戮且於中途或乘間脫逃甚至有情急自戕等事俱未可定前曾屢次傳諭各督撫如獲有逃盜要犯覈其情罪重大者一面移查本省原案審訊得實即在該處照擬辦結毋庸往來解送致滋疎誤節次所降諭旨甚明恐各督撫行之日久不能如前遵奉且或因事關他省稍存推諉之見致有疎

虞將此於奏事之便再行傳諭知之○癸未命大學士公阿桂充文淵閣領閣事○甲申諭軍機大臣曰嵇承謙奏陝省麥秋後得雨幾次未能溥霑正在望雨之際於六月二十八日七月初一二日連得時雨秋禾可卜豐收等語似陝省已經得雨秋成可望昨福寧鎮總兵常泰來京詢其沿途田禾情形據稱七月初一日陝西省城得雨一次未能透足微覺亢旱是該省六月間雨水較少農田望澤情殷何以該撫未經奏及現在果否得有透雨是否不致成災著傳諭畢沅即速據實奏覆毋稍粉飾又據常泰稱山西地方亦覺地土乾燥未知近日雨澤若何田禾收成是否不致少減並著巴延三查明實在情形即行覆奏尋巴延三奏太原等九府十州歸綏道屬各廳均於七月得雨二三次入土三四寸以至盈尺四境透足田禾雜糧悉皆結穗其常泰所稱山西地方地土乾燥蓋因常泰

由晉赴京。經行大路。三五日不雨。道途雖有灰塵。田畝不致乾燥。得旨覽奏欣慰。○又諭據周元理奏。通省各廳州縣。陸續所報田禾情形。有雨。固足滋培。無雨。亦惟晚種之莊。稼少減分數。與秋收大局無礙等語。前直省雨水稍短。朕心深為廕念。今周元理稱於大局無礙。是言外即有未能一律豐收之意。恐今歲收成分數。不及上年。現在京師連日得雨。甚為霑足。畿輔各州縣。是否普遍優霑。於晚稼有無裨益。著傳諭該督。即速查明。據實覆奏。尋奏。自十八至二十一日。陰雨連綿。附近各屬。無不均霑深透。早禾益藉滋溉。晚稼可望一律豐收。通省統計實收九分。較上年不相上下。得旨覽奏欣慰。京師亦既快晴。秋收或可望也。○廣西巡撫吳虎炳疏報。永淳天保奉議三州縣。開墾水旱田三十七畝。有奇。又水田一百五十埜。有奇。○乙酉。湖北巡撫陳輝祖疏報。長樂縣。開墾民賦額。外下則旱

地二頃八十四畝。有奇。丙戌。諭現在纂輯平定兩金川方畧。大學士公阿桂著一同閱辦。○又諭。前經降旨。普免直省地丁錢糧。甘肅省應於戊戌年輪免。其額徵糧草一項。本不在蠲免之例。第念該省所徵地丁少而糧草多。乾隆十年。及三十五年。普蠲各案內。均經加恩。將各項糧草。分別蠲免。現在又屆普蠲之年。所有甘肅省臨邊各屬。應徵番糧草束。仍著一體蠲免。其河東。河西。額徵屯糧草束。亦著照上次之例。蠲免十分之三。俾邊省羣黎咸霑愷澤。該部即遵諭行。○諭軍機大臣等。據勒爾謹覆奏。甘肅被災情形一摺。內稱附近省城地方。受旱與去歲相仿。其餘各處。俱比上年稍輕。雖上年夏災二十九處。今歲被旱三十二處。而一州一縣之中。即有成災不成災之分。皆因今春雨雪優霑。廣種麥豆。凡低窪近水之地。總有薄收。此與去歲情形。稍有不同等語。甘省今年被災。雖較上年

稍輕。但積歉之區。窮簷生計。不無拮据。必須實力撫綏。俾免失所。著傳諭勒爾謹遵照節次所降諭旨。將應行撫卹各事宜。督飭各屬妥協經理。其有實在極貧。刻難緩待之戶。即酌借口糧。以資食用。至今歲因烏魯木齊一帶地皆沃壤。可耕之土甚多。貧民果能往彼墾藝。不但可免於饑窘。并可贍及身家。曾傳諭勒爾謹熟籌妥辦。嗣據勒爾謹索諾木策凌節次奏稱。移往戶民六百餘戶。官為資送。酌量分段安插。籌備農具籽種。並稱烏魯木齊一帶。可安四千餘戶。現在設法勸諭。俾各處貧民互相招引。源源趨赴等語。此項戶民於何時移往。及此後是否復有願去之人。該督作何籌辦。未據奏及。著傳諭勒爾謹即行查明。據實覆奏。至烏魯木齊一帶所移戶民到後。作何安插得所。民情是否樂於耕作。鼓舞歡欣。足使內地人民聞風趨赴之處。並著索諾木策凌查明具奏。尋奏被災各處現已

分別題請賑卹。并酌借口糧。不致失所。至貧民出關。現據各屬報稱。願往者六百九十餘戶。程途遙遠。實難攜眷前行。應請照上年資送之例。酌給一半報聞。○又諭據楊景素奏暹羅鄭昭遣有夷使三名來粵。叩請進貢。並押解花肚番六名等語。霽呵霽左等。今經暹羅送到。自應委員解京。所有前次代擬李侍堯檄稿原屬詢探之意。今鄭昭既已具稟。前檄即無庸發去。至暹羅之事。屢次所降諭旨甚明。鄭昭此次稟來。楊景素即當一面奏聞。一面辦理。不必俟請旨再辦。此乃楊景素未經閱歷大事。不及李侍堯之練達。故不免拘泥也。茲命軍機大臣代楊景素擬作檄稿。諭以本督部堂接閱來稟。據稱暹羅殘破以後。朝貢久疎。今欲循舊例備貢。差人具稟。懇為轉奏等語。具見悃誠。而收合暹羅餘衆。思報故主之仇。亦能明於大義。且爾數年來屢經送回緬甸所留內地兵民。又將所獲緬匪節

次解送實屬誠心恭順。是以前任李總督嘉爾忠謹於爾兩次請買硫磺鐵鍋等物俱准買回應用。今春李總督調任雲貴時向本督部堂言爾為暹羅故主殺賊報讐遂為衆所推奉。因詔氏無人即行統攝國事。且爾心向天朝屢效誠蓋自當予以獎勵。此後如有稟懇之事不妨酌量辦理。本督部堂莅任以來悉照前例。今爾等既有備貢之請可以准行。俟爾貢物到境當為轉奏。至爾所稱必藉天威以彰民望意欲懇求封號而又不敢明言如此隱躍其詞未便據情入告。爾果虔修貢禮遣使恭進將國人推戴情殷詔氏已無嫡派明晰聲敘具稟請封。本督部堂自當代爾奏聞大皇帝恭候加恩方為名正言順。至爾欲征討緬甸為故主復讐聽爾自為之內地斷無發兵相助之理。中國征勦所至餉足兵強前此平定準部回部昨歲平定兩金川並未稍藉外邦之力諒爾亦當聞知。况緬匪近

日已知悔罪送還內地之人懇求開關納貢此後更無可加兵然亦必不助緬以攻他國爾如欲請封轉不必以攻勦緬匪為詞也將此由六百里傳諭楊景素照繕發往其來使起身時酌量以禮遣回如鄭昭依檄具稟進貢請封楊景素即可據情由驛速奏。戶部議覆大學士管兩江總督高晉等條奏。快丁既與運丁一律勾兌應照查倉運丁例辦理倘有賣富差貧等弊察出將公報不實之伍長嚴加究治經倉州縣官一并查參議處惟快丁貧富不齊轉移靡定應令州縣官隨時秉公查訪仍於四年編審軍丁冊內逐一註明昔富今貧昔貧今富字樣送部備案。凡屬運快各丁公私欠項飭令經管漕務官弁隨時查辦如有將舊丁積欠勒令新丁接受立即查明究治該管官徇隱不報察出名查參。快丁新僉到幫應領錢糧總歸經支旗丁支領恐各丁擅其扣剋責成糧道將

旗丁應支銀米確數刊刻清單給快丁收執照數支給。一江淮興武二衛運船九百六十二隻令運快各半分領運丁之船運戶更僉快丁之船快籍僉補一俟快丁僉足通詳立案每年應換之船責成糧道秉公覈明如有應行大造之船兩隻分掣一運一快一隻先運後快餘非大造無論年分遠近運快各半均分至應行僉換之船應飭該幫弁將該年應僉船數總報糧道覈明僉掣一運丁熟於駕運快丁情願貼費所貼銀兩於漕糧受兌之先呈繳糧道給丁代運逢大造之年再貼造費快丁之名仍留軍冊沿途風火事故均著代運之丁辦理。嗣後新僉快丁富戶聽其自為承運其力薄快丁不能獨運者將殷丁最少之江淮頭幫興武三幫准其循照什軍之例辦理但九丁中貧富不齊恐有欺隱情弊責成伍長據實查明公同酌議倘伍長查辦不實致有徇查出將伍長從重究治

并力能幫貼規避不肯實力出費之快丁倍加貼費以濟貧丁轉飭州縣於僉報快丁時隨報什軍備案糧道秉公察覈再泗州盱眙蕪湖三處雖丁少力疲現難僉運俟數年後或轉疲為殷仍令伍長查明公報州縣入冊備僉均應如該督等所請行從之。丁亥諭昨吏部奏進雲南開化府缺單已將候補知府之秦學溥補放本日召見該員面加垂詢據秦家有老母年逾八旬且知該員前任直隸有年於該省情形自為熟悉秦學溥著發往直隸交該督周元理遇有知府缺出補用其雲南開化府知府員缺著邱廷溶補授。又諭據國泰叅奏黃縣知縣高士敦於山西客民李元章等在奉天洋船上被舵工王有亮等謀財殺死一案經屍親訪獲夥犯黃友三赴縣喊稟隨即脫逃訊據該縣稟稱曾將黃友三嚴審不承而刑書李大本則稱該犯業將案情供認旋於交保後逃逸供詞迥異

請將該縣革審並將不即詳參有心瞻徇之登州府知府陳葆光議處等語此案兇犯雖據楊魁奏聞於崇明縣拏獲就近辦理該縣從前未加深究亦難辭咎高士敦著革職交該護撫審明具奏陳葆光著交部嚴加議處○諭軍機大臣等據國泰奏黃縣知縣高士敦於山西客民李元章等在奉天洋船上被舵工王有亮等謀財致死經屍親李添塗訪獲同船水手黃友三赴縣喊稟該縣訊供後黃友三旋即脫逃並未詳報請旨革職一摺已另降諭旨將高士敦革職交該撫究審矣摺內稱李添塗同夥王明曾在錦州撞遇黃友三查詢言語支離並於行李內搜出李元章布褂等物即赴奉天寧海縣具控該縣以人船俱係黃縣未經准理等語王有亮等在洋連斃二命分攫多贓殊屬慘惡既經王明訪獲夥犯搜出贓衣赴縣控究該縣理應訊取確實供情一面緝拏兇犯一面關查原

籍方為正辦即使以人船俱係黃縣現無證據亦應選派妥役將贓證押赴原籍究審乃視為毫無干涉並不准理明係有心推諉州縣遇地方公事妄分畛域積習最為可惡該府尹等平日所司何事一任屬員將命盜重案諉卸擔擱若此著傳諭富察善等查明寧海縣究係何人此案曾否具報據實奏國泰摺並著鈔寄閱看至此等推諉惡習各省大約相同著并傳諭各督撫務宜董飭屬員實力體察毋許妄分畛域遇事諉卸如有不遵者立即查叅勿稍袒徇將此遇督撫等奏事之便傳諭知之○又諭曰索諾木策凌奏請將昌吉縣知縣德平陞署迪化州知州所遺員缺以理事通判富明阿調補等語烏魯木齊地方官員陞遷調補雖由都統辦理自應與陝甘總督會同具奏乃索諾木策凌並不曾商勒爾謹即自行具奏殊屬不合著傳諭索諾木策凌嗣後如有地方官員陞遷調

補仍與總督會商具奏不可自行辦理並傳諭勒爾謹知之○軍機大臣等議覆貴州巡撫覺羅圖思德奏覆查明牛皮箐內地勢稍平並非泉水灌注之處多施人力可望墾熟請於該箐適中之地相度高阜處所設立汛防查丹江營鷄溝一汛舊有千把總各一員外委二員兵二百名在汛巡防即於該汛內撥千總一員兵五十名前往箐內新設汛地屯駐防守其箐口設卡一處在總汛兵內撥五名輪流稽查聯絡聲勢均令丹江營叅將總轄鷄溝汛守備專轄一切稽查訓練俱歸該叅將就近留心整飭等語應如所請又稱屯田事宜飭令丹江通判管理並督同丹江衛千總派近箐邊屯軍子弟造冊移廳給照認段開墾俟三四年後成熟按則升科亦應如所請行從之○戊子諭辦理四庫全書並薈要二處所用謄錄計六百餘名而應行繕錄之書籍甚多上屆甲午科京闈鄉試曾於

落卷中挑取補用現在又屆鄉試之期而明年謄錄中即有五年期滿應行議敘開缺者均須隨時頂補自應豫為籌備著於發榜後將未經取中之南北中興及貝字號墨卷彌封詳慎繕閱擇其字畫勻淨可供鈔錄者四字號挑取八百卷貝字號取六百卷交與吏部按照名次拆卷填註此內如有本係謄錄即行扣除餘俱出榜曉示註冊挨補其有本生告假或不願充當者亦聽其便至應派之閱卷官俟臨時再降諭旨○又諭都察院吏部進呈議處校書錯誤之四庫全書總裁等一本總裁議以罰俸半年總校分校覆校議以罰俸一年固屬援照向例因官秩之崇卑定處分之輕重但校勘載籍與部院衙門辦事不同蓋部務由各司主稿而堂官總其成遇有錯誤司官處分自應重於堂官若校書之事則總裁與分校覆校各官責成相等其疎忽致誤過失亦同且分校覆校總校等偶

或訛舛。尚有總裁等為之勘覈。若總裁復掉以輕心。其誤竟無由改正。朕於進呈乙覽時。信手抽閱。魯魚亥豕之謬。不一而足。然皆朕披覽所及。其未經閱及者。訛誤尚不知凡幾。朕蒐訪遺編。嘉惠天下萬世。總裁等理宜悉心校理。以襄右文之治。此而忽不經意。其過較分校等為重。况充總裁者。俱係尚書侍郎。其平日所得廉俸。本屬優厚。即罰俸一二年。尚不至遽形窘乏。若總校分校覆校各員。不過翰林中書等官。伊等常俸之外。又無養廉。若將一年之俸罰去。其何以贍給身家。情形未免拮据。至辦理四庫全書。本以興崇文教。諸臣既司校勘。各宜盡心。乃錯誤至於累牘連篇。自不得不予以薄懲。俾稍知儆凜。然總計過誤二三次。始行交議。亦不可謂之過嚴。但庶僚議處。轉重於大員。於情事未為平允。嗣後總裁應議者。仍令罰俸半年。其總校覆校分校各員應議者。止須罰俸三月。即自此

次為始。其從前已經議處罰俸一年之總校等官。並著照此例行。庶足以昭公當而示體卹。將此通諭知之。○已丑

上御勤政殿聽政。○諭。昨因新授雲南開化府知府秦學溥家有老母。是以將該員發往直隸補用。所遺員缺。令邱廷溶補授。本日召見邱廷溶。面加垂詢。據奏。伊父年已八旬。亦與秦學溥相同。邱廷溶籍隸江蘇。著發往安徽近省。交該督撫等遇有知府缺出。補用。其雲南開化府知府員缺。著張顧鑑補授。○又諭。本日戶部三庫帶領浙江解餉官紹興府通判張廷泰引見。聽其所奏履歷。似紹興語音。因加詢問。據奏。幼曾隨父至紹興。住居數年。遂習其土音等語。此與浙人寄籍順天者何異。而其言尚未必信然也。通判雖係閒曹。但以本籍人備官其地。於體制究為未合。張廷泰著交與鐘音於福建通判內調補。至於順天大宛兩縣土著甚少。各省人民來京居住

稍久遂爾占籍從前曾令自行報明改歸本籍其中或實係無家可歸者亦令呈明原籍某處一體迴避今張廷泰既係如此恐各省現任官員內類此者尚多著交各督撫通行確查令其自行呈明奏聞與鄰省對調此乃不罷其官何不可之有如此加恩而尚諱匿不報經該督撫察出即應治罪矣至順天應試則有審音御史驗看月官則特派九卿科道皆宜悉心詢察且朕於各官引見奏對履歷為時無幾尚能辨其語音諸臣審音驗看時如果留心聽察南北音聲無難立辨皆由諸臣視此等事不以為意遂至混淆莫辨殊失敬事之義至冒籍人員等即呈明原籍不過迴避本省於他省仍可銓授並不礙其仕進之途何所顧忌而必不肯改甚至於本籍居官非但政體有關且蒞仕之初即公然習為欺偽其於世道人心所係非淺此次降旨之後如冒籍者尚敢匿不報明其審音驗看

諸臣復不認真糾劾經朕察出除將本人究治外定查明審音御史及原派之九卿科道一併議處至仕途本寬尚有不由科目銓選者其如何分別稽覈之處並著該部詳悉妥議具奏將此通諭中外知之尋議嗣後除順天應試責成審音御史外凡赴選驗看期滿各項文結內令各該管官確查該員有無寄籍祖籍併何年月日入籍改歸之處詳細聲明報部一體迴避如實係本籍即於文結內註明委係土著字樣投供時同鄉京官印結內併令載明寄籍祖籍及實係本籍字樣以備查覈俟選缺後在部投供者責令九卿科道悉心詢察在籍者責令督撫在館者責令提調詳加詰問如有混冒查出嚴叅治罪並將濫行出結之地方官同鄉京官及不行詳查之九卿科道並督撫提調等官均照例議處至現在候選候挑各員如有寄籍祖籍從前赴選驗看期滿文內未經聲明者即由臣

部出示限三月內取具六品以上同鄉京官印結載明有無寄籍祖籍實係土著字樣報部覈辦從之。諭軍機大臣等本日戶部議駁劉秉恬等奏銷雇驛運米一摺所駁甚是已依議行矣。此項運送米石前經該督報明因軍需緊急雇用驛馬原以驛馬可日行二三站較夫運迅速何轉以驛行一日之程請銷商行三站之價實非情理且前據鄂寶文綬等奏接收陝驛二千陸續駁運該省現有

陝驛何以又置之不用反按商運例另行雇驛駁運其故亦不可解著傳諭劉秉恬等即將因何如此辦理緣由據實明白回奏。又諭昨據德保奏督催全漕不日即抵天津俟趨叩闕廷後回至臨清會同河臣審擬守備萬世通擅放閘板一案等語已於摺內批示令其不必來京即回臨清速審此案矣計德保回至臨清審擬搶閘一案事畢即應催趲回空抵次籌辦明年漕務現在鄂寶所辦川

省軍需奏銷諸事未能即竣其赴總漕新任尚早一切漕務仍係德保專責況德保於上年冬間甫經出京又何必沿襲押運舊例即請陞見耶著傳諭德保即遵照此旨妥辦仍將萬世通擅啟閘板一案速行會審明確定擬具奏。又諭前因郭羅克賊番殺害青海公禮塔爾一案兇犯吹斯枯爾拉布坦竄逸稽誅曾責成明亮等勒限一年嚴緝各犯務獲正法今據明亮等奏稱土司麻克蘇爾衮

布雖連日跟隨偵緝並不實心設法擒賊因將該土司帶至郎隋地方扣留羈押責令寄信伊弟伊子獻出從犯結果喀拉布木雍中吉策丹四名分別審辦仍將該土司扣留著落伊弟等實力緝獲兇犯等語所辦甚是此皆查禮等懼干罪譴始設法嚴辦即獲從犯四名可見凡事果肯認真斷無不見效之理今既辦有頭緒益當上緊督緝務獲正兇而後已不可因已獲從犯復事因循至重案久

懸不結。著傳諭明亮等。即董飭查禮等。照前實力妥辦。勿稍玩忽。稽延。仍將曾否緝獲。要犯緣由。每三月奏聞一次。至綽斯甲布布拉克底。巴旺黨壩等。各土司。數年以來。跟隨打仗。素著勤勞。曾面諭明亮。到川後。會同總督文綬。將綽斯甲布土司等。被金川侵占之地。逐加詳勘。查明無礙田土。繪圖具奏。候朕降旨酌量賞給。明亮到川後。已閱半年。此事亦應籌辦。前於七月初。曾傳旨詢問。此時亦應

接奉。著再諭明亮等。迅速詳查。繪圖具奏。將此由五百里發往。諭令知之。戶部議覆陝西布政使富綱奏。請嗣後應追銀兩。如虧空賠補。及覈減分賠。一切毋庸歸款等項。俱令就近報撥。行知原追省分。隨案報部結案。其有借墊等項。本省無可開除者。令追完省分。於入撥報部後。行知原追省分。酌動閒款。分別歸補。咨部存案。應如所請。從之。命大學士公阿桂。充經筵講官。庚寅。戶部奏除軍

需款項。專案查辦。並欠帑人員。指項坐扣。各官公攤。以及分限完交。並無違逾者。仍遵原定限期。挨年歸結。其餘承追覈減分賠各案。截至乾隆四十一年止。內有銀數過多。例限本寬。雖統計尚未滿限。而分年計算。未能按數完交。應令嚴飭。趕限追繳。其已逾例限各案。應照上屆奏准之例。統限二年辦竣。仍將一切承追案。由銀數先行分晰。咨部俟辦完後。該督撫等。專摺奏報。倘託故延宕。將承追

官嚴叅從之。辛卯。諭軍機大臣等。前因守備萬世通。搶開滋事一案。已諭令德保。速赴臨清。嚴審定擬矣。運弁押送回空船。擅放開板。致誤重運。實屬膽大不法。自應即速審明。重示懲儆。至開官崔體淵。擅離職守。不過一無能為之人。較漕員之罪尚輕。其事無難查辦。但聞河關係漕運。而搶開之事。又從來所無。不可不速行審結。重究。俾知炯戒。昨德保請於押運抵津後。來京陛見。朕以此案情節

重大。德保應即往臨清會審。不必來京。今姚立德請俟漕臣督運事竣過濟時會同審辦。此案尚屬拘泥舊例。所奏非是。德保現奏接奉前旨。即於七月二十六日起身馳赴臨清。計八月初即可到彼護撫國泰亦前往會訊。姚立德現在豫省防汛。如大汛已平。不過尋常防護事宜。原可交付徐績代為妥辦。姚立德即赴臨清審事。若防汛尚有應行籌辦要務。不便暫離河干。則此案原以漕員萬世通

為重。現有德保國泰在彼會訊。無難得其實情。姚立德即當一面奏聞。一面知會德保等審辦。豈可拘於常例致重案久懸乎。將此傳諭姚立德迅速酌辦。仍將如何辦理情形即行覆奏。並諭德保國泰知之。壬辰軍機大臣等議准。烏魯木齊都統索諾木策凌奏請現在頭屯蘆草溝瑪納斯三處兼管遣戶之營千總三員改為所千總實缺。所有遣戶等應徵糧石及一切戶婚錢債鬪毆等事責成

該所千總妥辦。仍報明該管州縣考核。所有添設所千總三缺照邊俸例報滿陞用。此項缺出仍於烏魯木齊各標營及換班聽差營內選調從之。○癸巳諭朕於九月初十日啟鑒恭謁

泰陵。

泰東陵所有應行事宜各該衙門照例敬謹豫備。○諭軍機大臣等前因守備萬世通搶聞滋事一案已諭令德保速赴臨清會同姚立

軍機大臣等

德。國泰嚴審定擬矣。德保等審明時自當即行按律定擬以示懲儆。至各間雖設有間官專管必有道廳等官兼司統轄當漕務緊要之時各該員不應駐宿河干來往稽查彈壓乎。此次萬世通搶聞之事德保原參有據上河通判洪世儀詳報等語是該通判即係該間兼管之員定案時自應予以處分即統轄之道員亦當有應得之咎著傳諭德保等查明定例一併參奏。並此後如何嚴定章程令

其稽察不致生事亦當一併議奏。予故多羅淳郡王弘曥諡曰慎。是月浙江提督李杰龍奏修造釣船動項有限而名色繁多請照製造軍裝例咨部報銷無庸專摺具奏報聞。湖廣提督寶瓚奏楚省賊盜頗多甚至有水賊能於水中暗竊泊舟貨物查湖南北洞庭漢陽等六協營俱係水師向未習浮水之技應請仿照閩浙水操於春尾夏季秋初演練浮水立限一年考其成效再出師川省損失軍械惟腰刀較多皆因砍木劈柵以致殘缺應請每兵添製加鋼鐵斧一柄所費較省免損腰刀利器得旨諸凡具見留心妥為之。陝西巡撫畢沅奏前陞任大學士總督黃廷桂尹繼善巡撫陳宏謀總督吳達善皆能整躬率屬實心行政著有成勞是以所居民頌所去民思應請將此四臣入祀陝西名宦祠其政蹟咨送大清一統志館以備採錄報聞。甘肅布政使王廷贊奏甘省現報偏

災者二十餘處臣由寧夏至省繞道確查並經督臣分委道府履勘臣仍詳細查察使災黎不致失所得旨好勉為之知汝能勝此任故超用汝宜盡心救濟災黎俾均霑實惠大學士伯管雲貴總督李侍堯雲南巡撫裴宗錫奏滇省倉糧歸糧道專管藩司向不盤查於體制章程未為周備應請照通例交藩司一體盤查下部知之

大清高宗法天隆運至誠先覺體元立極敷文奮武孝慈神聖純皇帝實錄卷之一千三十七

大清高宗法天隆運至誠先覺體元立極敷文奮武孝慈神聖純皇帝實錄卷之一千三十八

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部 鄭廣森

世襲騎都尉軍功加十九級隨帶加二級又加二級 董誥內大臣戶部尚書鑲黃旗滿洲都統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十二年丁酉八月甲午朔諭軍機大

臣等步軍統領衙門奏管理花兒開至大通橋北岸上汛之經制外委高起鳳將應管河兵二十名內自三十八年陸續逃革八名並未報明仍按月冒領錢糧請將高起鳳革退外委交刑部審擬一摺已交部究審矣河兵既有缺額理應報明該管上司扣除錢糧另行挑補乃外委高起鳳於所管汛內河兵自乾隆三十八年起陸續逃革八名均未具報輒敢任意按月照數冒領兵糧侵蝕入已

實屬目無法紀自應按律重治其罪通水道咎固難辭周元理何竟毫無覺察至通惠河共設有四汛今高起鳳一汛既有冒領軍糧之事恐其餘三汛或有似此者亦未可定著傳諭周元理即速詳悉查明據實覆奏毋稍迴護隱飾○豁除直隸喀喇河屯廳乾隆四十年水衝沙壓旗民地一百九十五頃六畝有奇額賦○乙未

上還宮○蠲免安徽鳳陽縣臨淮鄉乾隆四十年水災學田一十一頃三十五畝額賦是日起

上以祭

社稷壇齋戒三日○丙申諭戶部奏查覈揚關徵收稅銀較雍正十三年短少至三萬二千六百餘兩請著落經管之道員孫栝賠補一摺因命軍機大臣交戶部查該關歷年盈餘之數較雍正十三年多寡若何今閱單開各年

盈餘數目。惟乾隆十四、十七兩年較雍正十三年有贏無絀。其餘各年則節次短少。並非始自近年。各關稅課盈餘。例與上屆相比較。朕臨御之初。本不知各處所收關稅多寡之數。因諭部臣。即以雍正十三年為準。使胥吏不敢例外苛求。監督不能徵多報少。且使每年比較。不致歲漸加增。減無所底止。實於體恤商民之中。寓司關稅不致作弊。尅減之意。並非因雍正十三年關稅獨多。使各關稅必足其數也。乃行之未久。部臣因各關奏報盈餘。較雍正十三年有贏者居多。若置上屆於不問。恐監督以此舊已多。即可從中侵隱。易滋流弊。請仍與上屆相比較。又復通行日久。昨歲考覈淮關、鳳陽關較上屆屢形短絀。因令復照雍正十三年比較。則所短之數更多。自係辦理不善。今揚關亦復節年短少。且通計短少最甚者。惟此三關。若因此而遍及諸關。未免窒礙。且恐無識之徒。疑朕於關稅。

必欲從其多者相覈。實不知朕體恤商民之本意矣。若朕有意於帑項增多。則不三次通免天下錢糧。其所增益。不較此百倍乎。又思乾隆二十八年。臨清關徵收盈餘。較二十七年短少。朕曾諭戶部。令與二十五、六兩年再行比較。嗣經部臣奏稱。該關盈餘之數。雖較上屆少銀三萬餘兩。而較之二十五、六兩年。尚多銀一萬五千餘兩。即予免議。蓋稅課盈縮。率由於年歲豐歉。固難免參差不齊。而通計三年。即可得其大概。若多寡不甚懸殊。原可無庸過於拘泥。此法最為平允。嗣後各關徵收盈餘數目。較上屆短少者。俱著與再上兩年復行比較。如能較前無缺。即可覈准。若比上三年均有短少。再責令管關之員賠補。彼亦無辭。夫朕以雍正十三年為準者。本屬美意。今既有此求全之毀。嗣後此例不必行。所有揚關本年比較盈餘。交該部照此例另行覈擬具奏。並將此通諭知之。○諭軍機大

臣等據畢沅奏陝西自七月初一二得雨之後。惟漢中鳳翔興安商州四府州屬並附近南山之各州縣。續報有節次得雨之處。其西安同州邠州乾州等處。立秋以後兩旬有餘。竟未得雨。日來地土漸覺乾燥。秋陽甚烈。田禾待澤孔殷。現在虔誠祈禱。惟冀甘霖速沛。等語。看來陝省西安等處雨澤短少。似有旱象。現在節氣已遲。即得透雨。亦恐無濟收成。不無歉薄。雖關右民食以麥為重。今春麥收在八分以上。但秋禾被旱。閭閻口食難免。拮据著傳諭畢沅。即速詳悉確查。如有成災處所。務須董率屬員實力妥辦。應撫卹者。即行撫卹。使窮黎均霑實惠。不致失所。毋得稍存諱飾。將此由五百里諭令知之。仍將現在曾否續得透雨。於晚稼收業有無裨益之處。迅速具奏。尋奏西安省城於八月初八至十二日。雨勢漸密。通省普霑。西安等府屬二十九廳州縣情形相同。正可及時廣種二麥。現在

確查乏食貧民先行酌借口糧得旨覽奏稍慰其有成災者妥加撫卹毋致失所 丁酉祭先師孔子遣協辦大學士英廉行禮 諭本日火器營帶領引見補放委叅領之蘇扎漢傷痕甚重曾在軍前奮勉殊屬可憫著加恩賞給法福禮巴圖魯名號仍照例賞銀一百兩 戊戌祭

大社

大稷

上親詣行禮 幸圓明園 己亥遣官祭

關帝廟 諭刑部覈擬直隸省王錦毒死繼母王苗氏之母苗趙氏一案聲明該犯與苗趙氏並無服制改擬斬決并引例載母黨有犯除親母嫡母本生母黨仍照服制定擬外其餘均從凡論等語所擬殊未允協為人後者為所後父母持三年之服而於本生父母降服期年即五服之制亦以所後為推而於

本生皆降一等。是所後之親屬服制俱較本生為重。何於所後之外姻獨不得比於本生之有服乎。若慮所後之外姻尊長於甥及外孫。謂非其所自出。故加凌虐。或置於死。自可權其曲直。繩之以法。何必削其服制以為防乎。且如本宗尊長。非理謀殺卑幼。其恩義已絕。即照凡人擬抵。則外姻尊長亦可授以為例。並不必分所後及本生也。若卑幼敢於謀殺外姻尊長。即為干犯名義。自當一例科斷。

又豈可強為分別。而於所後之外姻。視本生轉為末減乎。況此案王錦。因覲繼母苗氏。改嫁。得以花費家財。而嗔其外祖母苗趙氏。從中阻止。遂爾懷忿。謀殺。理既甚曲。性復兇頑。其情罪實為可惡。刑部乃因其無服。輒行改擬。豈為情法之平。頃詢之刑部堂官。此例係乾隆二十一年所定。閱其例本。惟事拘牽文義。而揆之天理人情。均未允當。又豈明刑弼教之義。著刑部將此例悉心斟酌。更定。所有

王錦一案。即照新例另行定擬。具奏。尋議凡為人後者。於本生親屬。即屬降服。則為所後母之父母。自應與親母之父母一例持服。小功五月。此外為繼母之父母等項。應請悉照欽定儀禮義疏當服六項。一併增入服圖。如遇有干犯。即照卑幼犯本宗小功尊屬律。毆殺謀故。殺者。均擬斬立決。謀殺已行。已傷及鬪毆傷者。俱各照服制分別定擬。其餘為繼母之父母等項。亦均照所後母之父母一例辦理。至親母之父母。仍照本律。毆死外祖父母者。斬。謀故殺者。凌遲處死。再為人後者。為本生母之父母。服雖降小功一等。而恩亦較重。其干犯之罪。應與犯小功尊屬同科。推之各項甥舅等服制。悉按前項增入。照外姻尊卑長幼治罪。如有於非所自出之外孫及甥。故加凌虐。或置於死。臨時權其曲直。按情定罪。不必以服制為限。其王錦一案。即照新例定擬。再因母即親母。君母即嫡母之義。恐民間未

能遍悉。應於服圖內改為親母嫡母。又近時出妻繼娶者少。妻亡繼娶者多。應將母出為繼母之父母一項。依義疏內在堂繼母之文。於服圖內改為在堂繼母之父母。以便通俗引用。從之。又諭刑部覈擬張二即張丕林扎死伊妻徐氏一案。照夫故殺妻律問以絞候。所擬尚未允協。此案張二攜妻徐氏賣姦。潘三時往姦宿。索錢爭毆。迨經官責逐。張二計欲躲避。因徐氏不允。輒起殺機。奪刀扎斃。是張二甘心將徐氏賣姦。其夫婦之義早絕。乃復逞兇戕命。自當與凡人故殺同科。猶之妻妾因姦謀殺本夫者。律應凌遲。若因本夫縱容。抑勒其妻妾與人通姦。罪止斬決。則縱姦之本夫。復殺其妻。即不得以尋常夫故殺妻律擬斷。蓋其夫縱妻賣姦。已屬不知羞愧。又忍而置之於死。情更兇惡。若復拘夫婦名義。稍從末減。何以勵廉恥而維風化乎。著刑部將此例另行斟酌。改定。所有張二一案。即

著照新例定擬具奏。尋議嗣後以妻賣姦之夫故殺妻者。以凡論其非本夫起意賣姦者。仍悉依律例辦理。其張二一案。即照新例改擬從之。諭軍機大臣等。據勒爾謹奏甘省歲止一收種夏禾者。不能復種秋禾。今歲夏禾雖被災傷。而兼種秋禾之家。收成有望等語。所奏殊未明晰。既云甘省歲止一收種夏禾者。不能復種秋禾。因何又有兼種秋禾之事。若秋禾既可與夏禾兼種。即與別省情形無異。甘省歷年被旱。俱係四五月間居多。何不勸令百姓將秋禾多為兼種。以防夏旱。若因夏禾業已被旱。將枯苗拔去。復種秋禾。則又不得謂之兼種。摺內所叙情節。頗覺前後矛盾。此乃奏摺措詞。未能清晰所致。著傳諭勒爾謹。即將甘省農務實在情形。詳晰覆奏。至被災較重各處貧民。仍當飭屬妥辦。俾窮黎均霑實惠。將此一併傳諭知之。尋奏甘省地氣寒冷。民間種冬麥者。不及十分之一。夏

禾七月成熟。秋禾九月成熟。歲止一收。其地畝多者。種夏禾十之六七。餘則續種秋禾。地畝少者。及氣候早寒。或地處背陰。止種夏禾。此秋禾有兼種不兼種也。再如四月缺雨。五月得雨。尚可拔去枯苗。翻種莠麥。今歲至秋。初方得雨。是以止種夏禾者。不能翻種秋禾。幸今春雨雪優霑。廣種麥豆。凡背陰下濕之地。總有薄收。故夏災較去歲為輕。至現在偏災。臣惟率屬認真查辦。務使小民不致一夫

失所。報聞。順天鄉試。以順天府尹蔣賜榮為監臨官。戶部左侍郎梁國治為正考官。禮部右侍郎阿肅為副考官。旌表守正捐軀河南鹿邑縣民王四女王氏。夏邑縣民陳景修姪女陳氏。湖南澧州民王孫長聘妻陳氏。庚子遣官祭昭忠祠。諭朕於二十七月以內恭謁

泰陵。

泰東陵啟鑒及回蹕時在京之王公大臣官員

等毋庸迎送。又諭曰。都統索諾木策凌咨請烏魯木齊所屬各州縣戶民額徵地糧等項。應否統入甘肅省。戊戌年應免錢糧內一併查辦等因。經戶部以普免各省錢糧係專指地丁而言。其應徵糧草等項。例不應免。駁令仍舊徵收。固屬照例辦理。第念該處究屬邊陲。宜加渥澤。所有此理額徵地糧著照乾隆三十六年之例。蠲免三分之一。即於戊戌年。隨同甘肅地丁銀兩一體免徵。以示嘉惠。

邊氓之至意。諭軍機大臣等。本日邁拉遜等奏興化縣生員錢志昱呈控。因乾隆三十九四十年該縣草堰場被災。發賑武生周卓凝等串同書役侵漁賑穀七百餘石等案。請交督臣高晉研審。一摺。竈場被災。場大使管理賑務。自宜認真妥辦。如果有棍徒蠹役朋比侵冒。至七百餘石之多。該大使即應訪察嚴究。至歷控分司運使巡撫衙門更宜秉公審訊。若承審官復敢徇情偏護。尤屬不法。

均不可不徹底根究但係錢志昱一面之詞自難憑信伊並非原首之人何獨挺身赴京呈懇保無挾嫌誣控情弊著交與高晉提集案內有名犯證秉公確審務得實情毋致顛預了事又諭刑部奏審擬通州船戶梁天成盜賣漕米一案據稱案內起意偷賣之劉勝及夥同商謀之張士雄薛天福俱竄匿未獲現在行文直隸總督等一體查拏等語劉勝等以剝船船戶膽敢乘漕米起剝起意商同鑿漏船底偷盜米石情節甚為可惡均應嚴拏務獲盡法懲治未便因循致令匪徒免脫漏網况天津通州一帶為水陸衝途每年漕運銅鉛絡繹停輓邇來屢有偷竊之案不可不嚴行究辦以懲奸宄而靖地方著傳諭周元理即將此案要犯劉勝等董率各屬設法躡緝務俱速行就獲審明嚴辦並飭地方文武毋得視為具文致使要犯遠颺久稽顯戮至天津通州沿河各處該督仍飭各屬不

時留心稽察毋使宵小潛蹤滋生事端辛丑諭昨歲平定兩金川大功告歲其地已歸入版圖安屯耕種所有該處名山大川効靈助順自應列入祀典曾降旨令明亮等查奏今據奏覆金川之索烏甲索二山及小金川之墨爾多山均為番衆所敬奉大軍進勦時亦頗著靈應等語又金川大河當官兵攻勦勒烏圍時立柵沿河堅持數日適值陰雨連綿河水旋長旋消於沿灘柵寨並無妨礙及攻得勒烏圍官兵移柵後河水即陡然漲發前所立柵之處均浸水甚大河神効順實贊成功均應春秋秩祀以彰報功之義著載入祀典用垂久遠所有撰文及一切禮儀交各該衙門照例辦理定回城伯克陞轉賞費諭軍機大臣等昨據伊勒圖奏伊犁伊沙噶伯克員缺並無應補之人請將葉爾羌噶匝納齊伯克巴喇特補放伊沙噶伯克遣往伊犁等語已照所請行矣惟思各城伯克內或陞補本城及陞隣城伯克者均無攜眷遷徙之

費如已喇特由葉爾羌補放伊犁及塔本沙喇等處相距遙遠攜眷遷往諸需費用原因伊等平素妥協始由他處陞補豈可轉使拮据應酌量遠近加恩賞賚不然伊等或難於起程擅自科派或抵任不能度日因而侵蝕俱未可定著傳諭綽克托嗣後伯克內如有似此陞轉他處者計其品秩大小路途遠近量加賞給若道里較遠或一百至二三百兩俱可其如何賞給之處著綽克托酌定數目具奏如此則伊等起程不致拮据即到彼生計亦不至窘迫而私派侵蝕之事自寡矣新補伊犁伊沙噶伯克已喇特即照此賞給仍將朕施恩之處曉諭知之○壬寅

太宗文皇帝忌辰遣官祭

昭陵○諭軍機大臣等據仁和奏查獲匿名揭帖內有民人朱四林大常二孫國璽等四人與賊匪往來通信兼有邪術等因當飭令遊擊舒展前往將各犯拏獲並於孫國璽家內

搜出不法字跡現將人犯押管一面稟明督臣提審等語匿名揭帖每多挾仇圖害必須先行訪察明確再行查辦若將帖內所有姓名遽行查拏不無拖累轉得遂匿名者之願仁和所辦未免過急但孫國璽家內又查有不法字跡或非盡出於誣陷亦未可知而匿名之人亦不可不根究重治著傳諭周元理即速馳赴天津將此案詳悉鞠訊俾無枉縱仍查明孫國璽如何傳播邪教緣由並跟訪匿名人犯嚴密查拏務獲審擬具奏仁和摺鈔寄閱看繳到匿名揭帖及孫國璽家搜出字跡並交周元理比對筆跡並諭仁和知之○癸卯

上還宮○戶部議准大學士管兩江總督高晉奏嗣後俊秀報捐概令土著州縣查明軍冊註明某衛所籍貫字樣出結詳送一面移衛存案其中倘有脫軍冒民等弊即行舉報照例治罪如不行詳查冒昧出結發覺即將該

州縣照例議處從之○甲辰

太祖高皇帝忌辰遣官祭

福陵○諭軍機大臣等昨據仁和奏查獲匿名

揭帖內民人朱四等一案當經傳諭周元理

馳往審辦今據奏朱四等供稱與王六瘋子

即王朝佐有仇隨拏到王朝佐鞠訊已據供

認扶嫌不諱並於該犯家內搜出底稿覈對

筆跡相符默寫無錯又查明帖內孫國璽年

已七十七歲曾從妻真人學符治病查其家

內並無不法邪書等語看來此案自係仁和

辦理過於急遽之故昨據該鎮奏到朕即傳

諭及此今王朝佐既屬正犯自無難將其與

朱四等因何扶嫌起意誣陷之處嚴行審訊

令其水落石出著再傳諭周元理即速提犯

逐細嚴審務得實情至孫國璽年逾七十且

前此不過從真人妻近垣學習畫符而其家

中查出字帖一紙上下排寫字樣與符籙相

仿如究其向日並無傳播邪教之事即可同

朱四等一併省釋止將王朝佐照例定擬具

奏可也○乙巳兵部議准太僕寺卿富勒賀

奏稱牧廠護軍校屬翼長所轄而論其品級

與翼長相同請將翼長四員照商都達布遜

諾爾達里剛愛牧廠翼長之例食六品俸戴

五品空銜頂從之○丙午

萬壽節

上詣

奉先殿

壽皇殿

大高殿行禮○遣官祭

太廟後殿○遣官祭

福陵

昭陵

昭西陵

孝陵

孝東陵

景陵

泰陵。

泰東陵。遣官祭。

孝賢皇后陵。遣官祭。

顯佑宮。

東嶽廟。

城隍廟。陝甘總督勒爾謹陝西巡撫畢沅。

西安提督馬彪等會奏籌辦西安提標馬廠

地畝。查中右兩營廠地一百九十七頃零。坐

落咸陽興平鄠縣地勢寬平水草豐美。以提

標五營馬匹。統於二廠牧放。又左營廠地硝

磺夾雜。不堪耕種。亦仍存留牧馬。其前後兩

營坐落長安咸陽高陵三水淳化等縣馬廠

除沙磧壤灘土脈硤瘠。不堪耕種。外計可墾

地一百七十頃六十九畝。招民認墾。試種取

租。與牧馬既無妨礙。而附近貧民得地墾種。

足變無用為有用。應取租息。請遞年歸還各

營借項。得旨允行。丁未。

上詣

恩慕寺行禮。幸圓明園。諭軍機大臣等。據

三寶奏。浙省迤東各府濱臨大海。北接江蘇

南連福建。重洋浩淼。向多匪徒劫奪之案。皆

由濱海捕魚船隻糾夥出洋。本無資本。遇有

貿易商船。因而肆行劫奪。且鎮海定海二縣

洋面產魚甚多。隣省漁船雲集。多致逗留滋

事。應酌定章程等語。所辦尚為周到。此等出

洋捕魚船戶。皆無籍貧民。或於洋面遇見商

船。乘便肆劫。事所常有。但伊等所劫貨物。海

面自無從貨售隱匿。必須帶回內地潛行銷

賣。守口官弁。果於漁船進口時。查對冊檔。各

船所攜物件。此外如有多餘貨物。即嚴為盤

詰。其行劫與否。無難立辨。皆由地方文武。不

能實力盤察查拏。匪徒遂無所顧忌。此皆員

弁等怠玩因循所致。又據三寶奏稱。本年自

二月至六月。有閩省船戶張丁星。易奇發。浙

省船戶湯重慶。蕭永祥。沈長壽等。各船報稱。

在平陽臨海定海等縣。洋面被劫。據事主船

戶等。僉供盜犯口音均非本省之人等語。浙省洋面與江蘇福建毗連。或係該二省漁船恃非本境無可稽查。遂爾乘機劫掠。著傳諭江南福建各督撫將各該省漁船進口時一體嚴密稽查。匪來自無從遁匿。勿復意存畛域。稍有輕縱。仍將作何查辦情形即行覆奏。又閱三寶所奏。自乾隆三十八年到任至今。歷年緝獲盜犯共三十九名。而今歲半年之間。洋面報盜已有五案。似係近時巡緝海洋之武職各員不及從前之認真。定海黃巖溫州濱海各處俱有總兵鎮守。乃其專責。而浙江提督駐劄寧波。地近海洋。稽查亦易。何以任憑賊船橫行若此。或係該提督及各鎮等不以事為事。所屬將弁遂視巡海為具文。亦未可定。著傳諭鐘音三寶查明該提鎮等平日辦理如何。即行據實覆奏。毋得稍為瞻徇。將此由四百里諭令知之。三寶摺著鈔寄高晉。鐘音。楊魁。閱看。並於王亶望到京時令其

詳細閱看。於抵浙後查照妥辦。尋三寶奏定海黃巖溫州三鎮總兵不時親赴洋面巡邏。辦理尚屬認真。惟失事在海洋。破案多在陸路。現在督屬查緝得旨知道了。交王亶望實力督緝。勿致日久生懈。戊申。吏部議奏。計叅才力不及之廣東定安縣知縣馬用觀。係由教職保送。其申詳之司道府州縣等官。例應降級調用。俱經緣事均無庸議。其原保不愼之前任陝甘學政光祿寺卿吳綬詔。照例降調得旨。此案吏部議將原保舉之督撫學政降二級調用。其中詳之司道府州縣等官。降三級調用。所辦未得情理之平。保舉教職雖由司道府縣等轉詳。然其人之堪膺舉薦與否。則由督撫學政覈定主稿。使司道等所詳未當。督撫等原可駁正。既已列之薦剡。其處分自應較重。而原詳者酌予從輕。方為允協。今乃重議司道等官。而輕議督撫學政。本末不倒置乎。至所保堪膺民社之員。後經他

省以才力不及叅劾者其原保題之上司等固難辭咎然竟議以降級調用不准抵銷亦未免過當且才力不及尚非大過若於此而遽將原保之上司議以實降設或所保之員有犯貪婪不法者其原保官又當如何加重乎况才力不及並非實在劣跡可指若定以降調重例恐所轄之督撫與原保之督撫學政或有微嫌即以不及劾其所舉之人俾羅實降以逞其私意而督撫或有與原保官相得者於其所舉之人即實係才力不及轉為之瞻徇姑容此更於吏治有關不可不防其流弊朕辦理庶務一秉至公凡事有不協於理者雖此等尋常議疏亦不肯稍為忽畧即此可見為君之難而朕日理萬幾實無一事之不敢不加審慎矣所有議處原保上司之例著該部另行詳晰妥議吳綬詔此案即照新例另議具奏尋議嗣後保送教職人員除事犯貪酷不法等款仍照舊例分別議處如

僅以才力不及題叅或仍奏請改教者將主稿保薦之督撫學政改為降二級留任申詳司道府等官改為降一級留任此案原保之前任陝甘學政現在光祿寺卿吳綬詔照現定例降二級留任再查各部院主事等官保送直隸州知州遇有才不勝任之員原保堂官向有處分專例應請嗣後亦照此例將原保官降二級留任從之

大清高宗法天隆運至誠先覺體元立極敷文奮武孝慈神聖純皇帝實錄卷之一千三十八

大清高宗法天隆運至誠先覺體元立極敷文奮武孝慈神聖純皇帝實錄卷之一千三十九

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次 慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理理部部庫事務

世襲騎都尉軍功加十九級隨帶加二級又加二級 董誥內大臣戶部尚書鑲黃旗滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉八月己酉禮部議覆御

史劉錫嘏奏肄業貢生考試漢教習請於臨場識認以防鎗冒如現充各館膳錄者均不准考試以免趨避應如所請至滿助教考試事宜應如國子監所奏統歸吏部辦理從之
庚戌諭軍機大臣曰李侍堯奏自阿瓦脫出兵丁楊發等帶有楊重英詩稟等因一摺自係楊重英聞緬匪欲將伊送出自揣罪重故具稟以獻策為名希圖免罪大約不出乎此至楊發供詞內稱贅角牙因襲位時兄弟

成仇將伊弟捆綁丟江又與三四兩叔不和俱行抄家其大頭目萬已莽因伊女不得立正反被逐出心中懷恨與其三叔同謀占奪各等語緬甸此時或有內亂亦未可知但斷不必因此乘釁輕舉朕前此所以不肯於緬地用兵者原因其地氣候水土俱極惡劣兵丁至彼輒染疾病非人力之所能施並非法令之所能治是以決計不辦即有可乘之機而氣候水土如故亦不宜輕為嘗試况緬匪

已將蘇爾相送還俟其遣人納貢即可完事若緬匪併將楊重英送出并當准其開關交易不可失信於外夷設或不獻楊重英亦於大局無礙不過不准開關亦不值又籌另辦李侍堯此時仍當靜聽一切不動聲色惟董飭所屬將各邊隘實力嚴查密察勿使稍有偷越如緬匪遣人具稟或并送貢到關李侍堯即可隨機酌量妥辦將此由六百里傳諭知之 賑卹甘肅皋蘭河州渭源金縣靖遠

紅水縣丞安定會寧平涼靜寧固原隆德華亭張掖山丹武威永昌鎮番平番西寧碾伯大通巴燕戎格湟州肅州安西玉門隴西漳縣靈州中衛狄道三十二廳州縣衛本年旱災貧民並予緩徵。辛亥諭軍機大臣曰索諾木策凌奏烏魯木齊各屬夏季米糧時價清單僅開各廳縣每月麥豆等項價值並未注有價中價平及較上次是否相同或增或減字樣蓋由索諾木策凌未見各省奏報式樣是以所辦未能合式本日適勒爾謹奏到糧價單即著鈔寄閱看嗣後仿照辦理將此傳諭索諾木策凌知之。又諭前據楊魁奏崇明縣拏獲在山東犯案之兇犯王有亮徐秀方黃友三一案當經傳諭該撫迅速審明定擬具奏毋庸轉解東省審辦此等盜犯在洋面連斃二命分攫多贓情罪甚為兇惡現經拏獲到案自應即在江省審明情節立寘重典迄今已及一月未據審擬奏覆著再傳

諭楊魁即將該犯等嚴行審訊明確一面奏聞一面正法毋稍遲緩致重犯稍稽顯戮吏部議覆陝西巡撫畢沅奏華州近年事務倍繁請添州判一員將蒲城縣縣丞裁汰改設應如所請從之。河南巡撫徐績奏衛輝府屬汲淇二縣入秋雨少地畝薄收各民戶本年未完錢糧及春借倉穀請緩至來年麥熟後徵收再彰德府臨漳縣地方間有雨水未能均齊豐歉不無互異請照汲淇二縣一例辦理得旨著照所請行。壬子命輯滿洲源流考。諭頃閱金史世紀云金世祖居完顏部其地有白山黑水白山即長白山黑水即黑龍江本朝肇興東土山川鍾毓與大金正同史又稱金之先出靺鞨部古肅慎地我朝肇興時舊稱滿珠所屬曰珠申後改稱滿珠而漢字相沿訛為滿洲其實即古肅慎為珠申之轉音更足徵疆域之相同矣又後漢書三韓傳謂辰韓人兒生欲令頭扁押之以石

夫兒初墮地。豈堪以石押頭。其說甚悖於理。國朝舊俗。兒生數日。置卧具。令兒仰寢。其中久而腦骨自平。頭形似扁。斯乃習而自然。無足為異。辰韓或亦類是。范蔚宗不得其故。曲為之解。甚矣其妄也。若夫三韓命名。第列辰韓。焉韓。弁韓。而不詳其義。意當時三國必有三汗。各統其一。史家不知汗為君長之稱。遂以音同誤譯。而庸鄙者甚至訛韓為族姓。尤不足當一噓。向曾有三韓訂謬之作。惜未令

人盡讀之。而共喻耳。若唐時所稱雞林。應即今吉林之訛。而新羅百濟諸國。亦皆其附近之地。顧昔人無能考證者。致明季狂誕之徒。尋摘字句。肆為詆毀。此如桀犬之吠。毋庸深較。而舛誤之甚者。則不可以不辨。若夫東夷之說。因地得名。如孟子稱舜東夷之人。文王西夷之人。此無可諱。亦不必諱。至於尊崇本朝者。謂雖與大金俱在東方。而非其同部。則所見殊小。我朝得姓。曰愛辛。覺羅氏。國語謂

金曰愛辛。可為金源同派之證。蓋我朝在大金時。未嘗非完顏氏之服屬。猶之完顏氏在今日。皆為我朝之臣僕。普天率土。統於一尊。理固如斯也。譬之漢唐宋明之相代。豈皆非其勝朝之臣僕乎。又有云。我

祖宗時。曾受明龍虎將軍封號。亦無足異。我朝初起時。明國尚未削弱。因欲與我修好。借此以結兩國之歡。我朝固不妨為樂天保世之計。迨我國聲威日振。明之綱紀日隳。且彼妄

信讒言。潛謀戕害。於是我

太祖赫然振怒。以七大恨告

天。興師報復。自薩爾滸。松山。杏山。諸戰。大敗明兵。明人欲與我求和。斥而不許。彼尚安能輕侮我朝乎。且漢高乃秦之亭長。唐祖乃隋之列公。宋為周之近臣。明為元之百姓。或攘或侵。不復顧惜名義。若我朝乃明與國。當闖賊擾亂。明社既移之後。吳三桂迎迓王師入關。為之報讐殺賊。然後我

世祖章皇帝定鼎燕京。統一寰宇。是得天下之堂堂正正。孰有如我本朝者乎。至若我國家誕膺

天眷。朱果發祥。亦如商之元鳥降生。周之高禔履武。紀以為受

命之符。要之仍係大金部族。且天女所浴之布勒瑚里池。即在長白山。原不外白山黑水之境也。又金世紀稱唐時靺鞨有渤海王。傳十餘世。有文字禮樂。是金之先。即有字矣。而本

朝國書則自

太祖時。命額爾德尼巴克什等。遵製通行。或金初之字。其後因式微散佚。遂爾失傳。至我朝復為創造。未可知也。他如建州之沿革。滿洲之始基。與夫古今地名同異。並當詳加稽考。勒為一書。垂示天下萬世。著派大學士阿桂。于敏中。侍郎和珅。董誥。悉心檢覈。分條編輯。以次呈覽。候朕親加釐定。用昭傳信。而闡羣惑。並將此通諭知之。尋阿桂等奏編纂事宜。

酌擬凡例呈覽。並請欽定嘉名得旨。知道了。書名著定為滿洲源流考。又諭各省學政。現屆差滿。應行更換。順天學政著汪廷璣去。江蘇學政著劉墉去。安徽學政著劉權之去。江西學政著汪永錫去。浙江學政著彭元瑞去。福建學政著沈初去。湖北學政著洪朴去。湖南學政著唐淮去。山東學政著姚梁去。山西學政著百齡去。河南學政著王大鶴去。陝甘學政著祝德麟去。四川學政著劉錫嘏去。廣東學政著李調元去。廣西學政著李殿圖去。雲南學政著戚蓼生去。貴州學政著蕭廣運去。此內有現出試差人員。若回京請訓。再行赴任。徒勞驛傳往返。學政之職。惟在公慎自矢。整飭士習。興起文風。此外更無可訓諭。伊等接奉此旨。即各赴新任。不必來京請訓。又諭曰。江蘭奏各省遇有人命重案。俱將全案招供揭送大理寺察覈。惟盛京一處。向無隨本揭帖。請嗣後遇有斬絞各案。亦照各

省之例將招供一體揭送大理寺等語著照所請嗣後盛京遇有斬絞重案其招供揭帖並著一體送大理寺以憑查覈又諭前經降旨各省藏書家所呈書籍於辦畢後即行發還至督撫等自購呈進者俱經奏請留供石渠之藏其在京大臣官員等所進之書亦俱請備儲中秘昨歲大學士等議定文淵閣藏書章程云俟全書告竣後各藏其副於翰林院署立架分貯等語朕命纂輯四庫全書

原以嘉惠天下萬世公諸同好今外省藏書家進到之書既經陸續還給所有在京大臣等呈進書籍亦應一體還付本家俾其世守若為翰林院藏副計則各處所進書函長短寬狹不等分籤挿架不能整齊莫若俟四庫全書鈔錄四分完竣令照式再鈔一分貯之翰苑既可備耽書之人入署就閱而傳布詞林亦為玉堂增一佳話其各督撫購進諸書將來仍可彙交武英殿另行陳設收貯將此

諭令四庫館總裁等遵照辦理吏部議奏嗣後揀選除應補選人員仍照例揀選外其捐納者止准不論雙單月人員赴挑如不敷再傳單月本班之人如仍不敷方准雙月各員與挑報聞癸丑諭軍機大臣曰三寶奏查繳應燬各書若止責令地方官及各教官等勸諭呈繳勢難徧行清檢查分發教職閒空人員甚多伊等俱係本地之人派其各赴原籍府分因親及友易於詢訪并代為清查

將來即以繳書多寡為補用名次後先等語所辦甚好各省藏書之家非必盡係知書之人僅責成地方官勸令呈繳恐於違礙書籍未能檢查詳盡且或有其家竟無人為之查閱者均未可定教官籍係本省其往來原籍既可不至滋擾而於親友家所藏書籍知之必詳緝查亦易其呈繳必多今浙省既辦有成效各省均應照此辦理可將此遇各督撫奏事之便傳諭知之甲寅諭前經降旨於

本科京闈鄉試落卷內。四字號挑取謄錄八
百名。貝字號取六百名。著交梁國治。阿肅於
發榜後。同原派出之同考官閱看。湖南學

政唐淮。因病乞假。命翰林院侍講姚頤提督

湖南學政。乙卯秋分夕

月於西郊遣多羅信郡王修齡行禮

上還宮。丙辰

世宗憲皇帝忌辰遣官祭

泰陵

上詣

奉先殿

壽皇殿行禮。步軍統領衙門奏山西民人陳

大樸等控告祁縣知縣羅興禧濫徵丁銀。並

武舉等欽銀修署一案得旨。此案著派戶部

尚書袁守侗馳驛前往審辦。所有隨帶司員

著一併馳驛。以浙江杭州駐防協領額爾

布。為福建福州副都統。丁巳

上幸圓明園。戊午。封閉復州屬五虎嘴。元台

子等處煤密。從盛京將軍宗室弘昉請也。
己未

上御勤政殿聽政。諭據李宗文奏。現患痰火
病症。業經請假調治數月。未能速痊。懇請開
缺等語。李宗文著准其解任。回籍調理。俟病
痊之日。仍來京候補。其禮部侍郎員缺。著范
時紀調補。所遺倉場侍郎員缺。著蔣賜榮補
授。至兼管府尹之尚書袁守侗。現在出差。所
有順天府尹事務。仍著蔣賜榮暫行兼管。

又諭。據高晉奏。山陽縣民杜永茂。自縊身死
一案。訊出該縣金幼淳任聽差役。需索滋擾。
請將金幼淳革職。審究等語。已批交該部矣。
金幼淳前在縣丞任內。經該督以其辦事勤
慎。奏請陞署知縣。今查出該縣縱役滋擾。又
復曲為開脫。意圖取巧。即行指實糾參。並不
稍存迴護。深得公正大臣之體。各督撫均當
照此辦理。將此通諭知之。又諭。候補翰林
院侍講彭冠著仍在阿哥書房行走。其未得

缺以前。著加恩令其食俸。諭軍機大臣等。聞淮揚一帶運河久未挑濬。河身逐漸淤高。不特有礙漕船。或遇水大之年。河淤則易致泛溢。所係甚大。著傳諭高晉薩載。即速將淮揚運河逐段查勘測量。有應行挑濬者。迅即確實勘估。一面擇日興工。一面奏聞。不可稍存惜費之見。致有貽誤。務使河身一律寬深。期於運道河防。均有裨益。庚申遣官祭賢良祠。諭侍郎金簡派往吉林會同將軍福

康安查辦事件。金簡及帶往官員人等俱著馳驛。諭軍機大臣等。據國泰奏省城一帶於八月初七八九等日甘雨連綿。十二日又繼以密雨等語。山東與直隸境壤毗連。晴雨大畧相仿。畿輔七月間稍覺缺雨。直至八月初八日始得渥霑。今國泰所奏山左得雨日期。與此間相同。則該省七月內雨水自亦短少。雖據稱得雨後麥田俱可翻犁播種。但自八月初旬以來。曾否續得雨澤。於秋麥情形

有無妨礙。著傳諭國泰。即速查明據實覆奏。又諭今日國泰奏到各摺。頗露急於見長之意。不宜若此。即如巡撫入闈監臨。係循例奏報之事。祇須將搜檢有無弊病。及士子三場是否安靜。奏聞足已。乃國泰摺內將各卷並無干犯

廟諱御名及違式貼出。與筆誤免貼之處。逐一聲敘。並稱謄錄對讀之錯誤。抽對硃卷各等語。殊屬瑣屑。此皆監臨分所應辦。無足為異。國泰鋪張入告。不過欲顯其諸事認真。其底裏已畢露矣。又另摺所奏委員藍嘉瓚緝獲要犯多名。亦祇須據實敘明。將應否送部引見之處。聽候部議。乃稱該員係加捐分發郎中。懇恩賞指一部。學習行走。自必益知感奮等語。尤屬節外生枝。且為屬員希恩瀆請。更覺多事。國泰自擢用兩司以來。於地方公務頗知實力奮勉。其才具尚堪造就。未嘗不可備他日之簡任。若過於熱中。恐以躁進之心。

流為喜事。轉不免因而獲戾。且伊父文綬現任總督。伊年力正當強壯。已用至藩司。兼護巡撫。亦當知足。理應循分自安。以期承受恩眷。何不可待之有。而為是汲汲耶。國泰著傳旨申飭。辛酉。諭曰。沈初現在出差。王杰到京後。即著署理禮部侍郎。不必辦理刑部事務。其刑部侍郎員缺。仍著錢汝誠署理。戶部議覆。署漕運總督德保護山東巡撫國泰等覆奏。回空應造船。先行造冊詳明。並船尾書寫打造字樣。每起不得過五隻。重運尾幫出口後。即令先為起幫進開。俾得及早抵次。赴廠成造。如河內重運連橋行走。回空船隻。即於河面寬處。暫停讓行等語。應如所奏。至重運盛行。回空將到之際。責令該管廳員。駐宿河干。專司彈壓。道員往來稽查。嚴定處分。亦應如所奏。令各員妥協辦理。倘仍有搶開等事。並聞官故意留難勒指。該督撫立即據實指叅。從之。○壬戌。伊犁將軍伊勒圖烏嚕

木齊都統索諾木策凌奏。請嗣後齋爾厄魯特所交滋生羊隻。每年塔爾巴哈台查驗。即令該處游牧官員酌派厄魯特一二名解至瑪納斯。令烏嚕木齊官兵前赴收送。並令厄魯特於每年八月解送一次。得旨嘉獎。○是月。大學士管兩江總督高晉。江蘇巡撫薩載等奏。豐碭廳屬唐家灣倒勾引河。為減洩黃河盛漲之水。由毛城鋪石壩下注。歷洪河以達淮河。經孟山等五湖。匯歸洪澤湖。每年伏秋大汛。以徐城水誌長至一丈一尺五寸。開放減洩。查下游洪濰二河。兩岸土堰。一遇水勢驟長。即行出崖漫灘。堰工易致浸蟄。下江之蕭縣。上江之宿州。靈璧。虹縣。臨河窪地。每致被淹。揆其水大之由。皆緣唐家灣引河居徐城上游。相距二百餘里。待徐城水誌至一丈一尺五寸。而上游水已逾誌。再為知會開放水勢。更長。是以開放後。奔騰下注。洪濰二河。難以容納。臣等再四熟商。與其減於既漲

之後莫若洩於未漲之先查上游河寬下游岸狹本年以唐家灣水誌長至九尺五寸即令將該處倒勾引河開放當毛城鋪過水初不過二三尺安流順軌下注洪灘並未出槽漫灘堰工穩固已有成效應請嗣後水誌尺寸當以唐家灣為準一俟長至九尺五寸即將倒勾引河草壩啟放俾盛長之水由毛城鋪及時分洩不獨循序下注可免漫灘壩堰之患而黃河水勢亦可隨長隨減得旨好此

清實錄

卷五十九

見甚是早應如此辦理又批此即朕定清口開壩之意徐殺其盛漲於事先治河之策無過於此又高晉奏海州沭陽三州縣低田已經潤出補種惟安東阜寧二縣被淹之區驟難消涸勘實成災七分現在照例辦理其餘各屬晴雨調勻早稻雜糧俱已刈穫晚禾茂盛亦可豐收得旨覽奏稍慰其成災處所加意妥恤陝甘總督勒爾謹奏哈布塔塔哈喇山開採金砂近年愈少應請封禁并派

弁兵巡查以杜偷挖本年課金九兩四錢有奇請全數賞給阿拉善王羅布藏多爾濟報聞

清實錄

卷五十九

大清高宗法天隆運至誠先覺體元立極敷文奮武孝慈神聖純皇帝實錄卷之一千三十九

大清高宗法天隆運至誠先覺體元立極敷文
奮武孝慈神聖純皇帝實錄卷之一千四十

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務五品頂戴滿洲都統世襲騎都尉軍功七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部都察院掌印

世襲騎都尉軍功加十九級隨帶加二級又加二級臣董誥內大臣都察院兼理滿洲都統軍功紀錄五次

尋常紀錄十四次臣德瑛經筵講官太子少保部尚書紀錄六次臣曹振鏞等奉

敕修

乾隆四十二年丁酉九月癸亥朔諭曰吳虎

炳奏彭理遣家人劉陞前往雲南東川昭通
順寧四府借得銀兩劉陞將銀花費串商船
戶捏報被竊情節請將劉陞照例擬絞並將
各該府印封原札進呈等語原摺已批交該
部議奏矣印信官封原以備呈送地方公務
文稟之用若尋常書稟往來不特鄰省不應
加用印封即於本省上司亦不宜輕用今雲
南各府均以印封裝貯候函付給彭理家人
齎回廣西此乃外省相沿惡習恐不獨雲南

一省為然著傳諭各督撫通飭所屬嗣後除
詳稟地方公事准用印信官封外其尋常稟
啟俱行禁用仍留心稽察如有故違者即據
實參處所有雲南各該府等即著交部察議
（豁免浙江乾隆四十一年仁和縣坍沒沙
地一十九頃三十九畝潮衝沙壓地三十六
頃七十八畝海寧州坍沒沙地六頃七畝有
奇瑞安縣坍沒田地沙塗三十五頃四十一
畝有奇額賦 甲子諭曰豐昇額現在患病
啟鑒後所有步軍統領事務著英廉暫行管
理（又諭據李侍堯奏前任雲南劍川州知
州嵇承豫於乾隆三十三年辦運滇省軍糧
案內有運夫尹天喜誤運米石該州因運戶
逃亡將應加腳價銀四百五十三兩扣留未
發代尹天喜買米補運其果否買補亦係糧
書一面之詞此外有無剋扣尚須徹底嚴究
嵇承豫現任湖北歸州知州請革職解滇質
訊等語嵇承豫著革職解赴雲南交該撫秉

公嚴審。歸案分別定擬具奏。諭軍機大臣等。昨日召見新放廣東惠潮嘉道劉世寧。看來不過中平之才。該員從前原係惠潮嘉道。終養回籍。曾為李侍堯屬員。其人材若何。居官賢否。知之必悉。著傳諭李侍堯。即將該員從前因何乞告終養。及為人居官若何之處。據實覆奏。又諭曰。李侍堯奏前據總兵劉國樑稟稱。守備蕭掄第精力就衰。意欲乞休。其詞意似有畏懼調考情事。嗣以該員雙目

昏盲。詳請勒休。復經批駁不准。始將蕭掄第送驗。見其兩目並不昏盲。惟騎射實屬不堪。請將蕭掄第革職。總兵劉國樑既經姑息於前。復思迴護於後。請交部嚴加議處等語。已批交該部議奏矣。總兵有督率營弁之責。李侍堯將劉國樑附叅。理所宜然。第念該鎮在金川軍營。頗知奮勉。若因此遽行降調。未免可惜。俟該部議覆時。朕再行酌量加恩。著李侍堯諭知該鎮。此案本應照例降調。朕因念

其在軍營曾經出力。是以此次姑從寬留任。劉國樑當感激朕恩。倍加黽勉。毋致終蹈綠營惡習。若不知悔改。再有過愆。朕不能復為寬貸矣。至另摺奏湖北歸州知州嵇承豫。前任雲南知州時。扣留運送軍糧腳價。擅自買米補運一案。請將嵇承豫革職。解滇質審。已降旨將嵇承豫革職。並諭令陳輝祖。即委委員押解該員。作速赴滇質訊矣。嵇承豫係尚書嵇璜之子。李侍堯不稍瞻徇。據實叅奏。

深得公正大臣之體。甚屬可嘉。並將此諭令知之。○戶部等部議覆。陝甘總督勒爾謹奏。請甘肅涇州改為直隸州。以附近之崇信。靈臺。鎮原。三縣撥歸管轄。文武生童請於平涼府學原額內酌減七名分撥。應如所請。從之。○乙丑。大學士管雲貴總督李侍堯奏。火藥為營中利器。防禦先資。所關甚鉅。滇省歷來辦理。惟聽各營自行差弁。向驛道衙門請票。徑赴各州縣採挖。地方官因係營員承辦。雖

有督煎之名其實並不過問煎熬數目既不報覈挑運經由亦無盤查其間採多報少販賣走私難保其必無至配用支銷亦不按依演鎗次數覈定需藥若干以致各營配製參差不齊因之年久備貯外尚有陳積查廣東礦山條題明召商開採採足即封其硝觔亦皆地方文員召商煎辦歲有定額與硫磺並解省局各營請買時報明總督衙門行藩司給照赴局領買彙價歸款經過汎口查覈此外花礮鋪匠並酌定額數赴司領照買用即鎗兵每名每月演放幾次每次演放幾出用藥若干加以合操與演放礮位皆各有一定之數臣現行司倣照詳議章程如緬寧騰越等處逼近緬地自應永行封禁交地方文武官嚴密稽查其出產硝磺處所令該地方官會營勘明結報召商承辦就各營需數採備數年即行封閉俟用完請開設立省局驗收支放給照查覈再黔省各營支放火藥臣現

咨會提臣倣照滇省畫一辦理得旨嘉獎以原任福建漳州鎮總兵保成為貴州鎮遠鎮總兵丙寅諭軍機大臣等據周元理保寧奏稱

後龍風水地方於八月十七日有兵丁張宗信陶文啓在葦塘溝守夜遺失火種延燒荒草當即撲滅該兵等畏罪逃走已將陶文啓拏獲送部治罪並請將玩忽疎懈之都司歐陞詔革職等語已批交該部矣守夜兵丁失火延燒荒草自有應得之罪但距禁地尚遠且未傷損樹株情節本不甚重而該兵等竟敢畏罪脫逃轉難輕縱所有未獲之張宗信一犯著傳諭周元理等即速嚴飭各屬選派妥幹兵役設法上緊緝拏務獲解部治罪以示懲儆直隸總督周元理奏永年磁州廣平曲周肥鄉成安大名元城等八州縣夏秋得雨未勻晚禾間有歉收所有本年應徵新舊錢糧及春借倉穀請緩至來年麥熟後徵收

其實在貧乏之戶。仍酌借麥種口糧。以資耕作。得旨允行。○丁卯。諭軍機大臣等。據登州鎮總兵李化龍奏稱。登州府城西門兵楊世得。揭獲匿名帖一紙。內稱寧海州之九龍川地方。池柳劉晏四姓。有聚眾不法事跡。業經逐戶細查。俱屬農業貧民。並無形蹤詭秘情事。顯係挾讐誣陷。現在查拏匿名犯人。尚未就獲等語。已於摺內批示矣。東省近年。屢有匿名揭帖之案。及經查拏。多係挾嫌誣捏。其風氣甚屬可惡。今登州府復有匿名揭帖。不可不查獲匿名之人。嚴訊治罪。此等案情。止須密訪各家。平日有無讐怨之人。自可根究正犯。若稍涉聲張。轉恐匪犯畏罪潛逃。致稽顯戮。著傳諭國泰。務須不動聲色。嚴密妥辦。毋致重犯。遠颺漏網。仍即將獲犯審訊情由。迅速具奏。○戊辰。遣官祭黑龍潭。昭靈沛澤龍王之神。玉泉山惠濟慈佑龍王之神。○諭。近日刑部進呈雲

南貴州秋審本。朕詳加披閱。其中情節。有械鬪各傷一命。及以金刃傷人者。同一案而分擬情實。緩決殊未允協。已交該部另行改擬矣。夫殺人者死。漢初約法已然。今擇其情輕者。列於緩決。已屬寬典。若糾眾械鬪。則為害於世道人心。漸不可長。是以朕於勾到時。遇有械鬪各傷一命之案。並予勾決。邇年來其風稍戢。然尚有未能盡熄者。至鬪毆之案情。形本自不同。有並非互鬪。亦援鬪毆律條。問擬者。因係積久相沿。姑仍其舊。而秋讞時之分別情實。緩決則輕重當有權衡。如彼此俱以手足相毆。及各持金刃互格。因而傷重致斃者。兩造情事相等。原可入於緩決。若死者僅以詈罵起釁。或用手足先毆。而兇犯輒持金刃。抵拒殺傷。其為逞強斃命。已可概見。且金刃本可殺人之物。若死者並非持械。豈能徒手相當。即非頓起殺機。其與故殺亦所差一間。此等而不入於情實。又何以懲暴除兇。

況為法司者。惟當準酌情理。務得其平。若稍存陰陽之見。曲從開脫。實乖明允之道。且死者何辜。寧不含冤地下乎。嗣後內外問刑衙門。於秋審鬪毆案犯。並當遵旨悉心定擬。毋有枉縱。庶奸勇鬪狠之徒。共知儆戒。不敢輕蹈法網。所全實多。是即辟以止辟也。將此通諭中外知之。已已遣官祭。

都城隍之神。諭軍機大臣等。前據總兵李化龍奏稱。登州府城揭獲匿名揭帖一事。當經傳諭國泰。令其不動聲色。嚴密妥辦。勿致重犯。遠颺漏網。昨據國泰奏到。據寧海州知州李瑛稟稱。已將捏造揭帖之李三。李五拏獲。而於該知州如何訪獲及李三等因何挾讐圖累。並到案時曾否訊取供詞各情。由摺內均未聲叙。正在傳旨詢問。今復據李化龍奏稱。寧海州知州李瑛傳訊三村民人。平日有無嫌隙之人。據供有李五因犯姦經村眾毆辱。臨行聲言。日後一併陷害。隨即拘審李

五。供認揭帖係伊黏貼。李三書寫。李三現已拘獲。已知會護撫國泰辦理等語。是此案訪獲各情。形業經明晰。著國泰迅速審明。定擬具奏。至該州李瑛。一得該鎮查獲揭帖之信。即能前往根究。迅速拏獲重犯。尚屬能事。著詢問國泰。如該州平日居官尚好。即奏明送部引見。將此傳諭知之。旌表守正被戕直隸新城縣民楊和妻王氏。庚午。諭昨刑部進呈秋審本內。有死者僅用手足先毆。而兇犯輒持金刃殺傷者。同一案而分擬情實。緩決。未為允協。因降旨。令嗣後內外問刑衙門。於秋審鬪毆案犯。悉心定擬。毋有枉縱。今刑部奏請將本年已入緩決各案內。查明死者並未持械。兇犯以金刃格傷致斃者。俱補繕黃冊。改擬情實進呈。所辦又屬過當。斷不可行。朕昨降諭旨。通飭酌定情實之意。原因近年金刃傷人之案較多。而秋審時每列入緩決。且數年後。仍得減等發落。於是好勇鬪狠。

之徒妄謂殺人可以倖生遂罔知儆戒輕蹈法網不可不示以嚴懲俾知用金刃殺傷徒手之人者斷難邀免庶可稍戢其逞強之心以免罹必誅之罪是以前旨有嗣後之言欲使衆共知曉凜刑章而不敢復犯若教而不從則是自取其死於情理均無可恕矣今刑部請於本年即行改正竟似朕急欲多勾百十人實屬誤會朕意且立法自有次第何不可待之有而為是汲汲乎著刑部轉行各督

撫將朕先後兩旨徧行出示曉諭雖窮鄉僻壤咸使聞知如此曉諭之後倘有仍用金刃殺傷徒手之人者即當擬入情實朕酌定其情即不予勾而以金刃鬪殺者概不予以減等庶幾辟以止辟之義至明年秋審內倘有未聞此旨以前之案亦不必辦及俟後年各省秋審時再行分別辦理俾共知朕仁義並施化民約法之意將此通諭中外知之辛未諭軍機大臣曰戶部議駁王亶望奏寧夏

一府收捐監糧請減照蘭州等處之例每名捐穀八十石等因一摺以寧夏鞏昌秦州向來每名捐穀一百八十石今若將寧夏一府減數收捐則寧夏一屬報捐者自多恐鞏昌秦州等處向來報捐較多之地不免生避多就少之情所駁亦是但前據王亶望奏寧夏穀價與蘭州等處相等而捐數較蘭州等處為多各生未免裹足以致捐數寥寥等語似係該處實在情形不可不為之調劑惟所請減

照八十石收捐之數又未免與鞏昌秦州等處多寡懸殊朕意莫若為之折中定數每名酌減穀十四石收捐使寧夏一屬不致因定額數多而心生畏阻而鞏昌秦州等屬亦不致因寧夏議減而聞風效尤似為兩得著傳諭勒爾謹將如此酌減收捐是否與寧夏有益及鞏昌等屬不致避多就少并援照請減之處即速詳細查明據實覆奏壬申上以恭謁

泰陵。

泰東陵自圓明園啟鑒。諭軍機大臣等。京師自八月初八日得有透雨以後。直至九月初六日。始得微雨寸許。深以田功為念。今日啟鑒。見沿途秋麥青葱。較往年九月杪所見尤勝。因召見周元理。詢知今歲畿輔及各屬夏秋雨澤霑濡。地土極為滋潤。所種秋麥頗多。惟大名一帶。入秋以來缺雨。間有歉收之處。至初六之雨。保定省城較北為優。迤南或更

霑足。亦未可定等語。大名所屬與豫省接壤毗連。晴雨諒亦相等。未知該省秋來雨澤若何。豫省以麥收為重。若七月雨少。即不能及時播種秋麥。不知秋間曾否得雨。麥田曾否種齊。設因缺雨。種麥未全。則於民食大有關係。或竟俟來年補種春麥。或當設法酌辦。不可不豫為籌畫。著傳諭徐績。即行查明該省雨水麥田情形若何。迅速據實覆奏。尋奏。豫省地方較直隸天時稍暖。若十月半前得有

透雨。尚可趕種宿麥。現在率同司道虔誠步禱。以冀甘霖普被。倘過期不雨。只可於來年播種春麥。惟有與藩司等細心籌畫。或糶借倉糧。購給籽種。俾農民咸資生理。得旨。所奏已遲。足見汝不留心民瘼。慎之又批。若非朕問。必無此禱設。再不誠。如何上對。

天下對民。旌表守正捐軀山西太谷縣民冀成妻李氏。是日。駐蹕黃新莊行宮。癸酉。兵部議覆倉場侍郎暫兼管順天府尹蔣賜

榮奏。查鄉試武生。八旗漢軍及各府州縣人數多寡不同。可照會試分別省分例。均勻分派辦理。其投卷造冊各事宜。請自本年丁酉科為始。由順天府查照各武生人數。按名勻派。分為四冊。先將分定名數。每圍若干。報部繕籤封固。於宣旨後。在部掣籤。分撥四圍考試。至各省鄉試。應聽各該省照舊辦理。從之。是日。駐蹕半壁店行宮。甲戌。諭軍機大臣等。據佛德等奏。三處織造。織解伊犁。本年

貿易所需緞絹綾綢共一萬一千匹。經陝甘總督勒爾謹轉行解到哈密。逐一查驗。內有徽點不堪應用之各色緞絹四十六匹。仍交原解官領回等語。新疆貿易緞匹。理應質地厚重。顏色鮮明。前經屢降諭旨。令該織造等如式製辦。妥協解送。並令陝甘總督逐一驗明轉解。此次緞匹解到甘省時。該督曾否詳悉點驗。若彼時驗有徽點不堪用者。至四十餘匹。即應一面駁回。一面奏明。令原辦之織

造賠製另解。若點驗並無徽污。已經派員轉解。於解到哈密時。經佛德等檢出。自係委員沿途不能小心照料所致。即應著落該委員賠補。如委員力不能賠。即應在原派之該督等名下。代為分賠。以清官項。此事必須徹底清查。分別辦理。著傳諭勒爾謹。即速查明。據實覆奏。嗣後每年解送貿易綢緞。均照此例辦理。以專責成。將此由四百里諭令知之。吏部議准倉場侍郎暫兼管順天府尹蔣賜

榮奏稱。嗣後順天鄉試北皿頁字中式舉人內。如有原係他省寄籍順天各府者。即令其發榜後填寫親供時。先行據實呈明。遵例改歸原籍。如實係無家可歸。亦令呈明原籍某處。及因何不能改歸緣由。確據註冊。其實係順天土著。即飭具得中舉人互結。並責成順天府詳加詢明。分晰造冊。咨送吏禮兩部存查。倘仍有含混隱匿情事。查出。將本人嚴行治罪。並將互結之舉人及順天府承辦之員。

照例議處從之。是日駐蹕秋瀾村行宮。乙亥。諭曰。傳景駐伊犁年久。著惠齡前去更換來京。諭軍機大臣等。據英廉奏。山西陳大樸等控告丁歸地糧一案。其代寫呈詞之董得壽。現已拏獲。並訊取供詞。據稱。因丁歸地糧一事。曾經捏寫假書。前往知縣衙門。面見縣官請託。羅縣官說。原是我縣中分內之事。自然替他辦妥等語。董得壽係在京無藉之徒。乃敢捏寫假書。持往山西求見該縣。面

為請託該縣亦即應許辦妥如所供果確該縣聽情允辦自有應得之咎復檢閱袁守侗原奏稱傳訊知縣羅興禧據供曾記有董姓來署稟見言及陳大樸等因丁歸地糧上京欲控經伊勸回等情彼時因本縣丁地現經議詳何必上控况係地方公務非伊應管即行逐出等語是羅興禧曾見董得壽之處已屬相符惟該犯供已應允該縣供係逐出各執一詞必須當面質訊方成信讞至該縣以素未識面之人輒與相見及聞其屬託公事又不即拏究稟詳僅以斥逐了事所辦已屬錯謬若訊如董得壽所供則羅興禧之罪更無可逭今董得壽等現經提督衙門交沿途地方官解往山西著將英廉原摺發交袁守侗閱看並將羅興禧解任提集案內應訊人犯詳悉研究質審務將此一節審得實情先行奏覆餘款仍即秉公研審明確一并定擬具奏將此由四百里諭令知之○是日駐蹕

梁格莊行宮○丙子
上謁
泰陵
泰東陵俱未至碑亭即降輿慟哭步入隆恩門詣寶城前行禮躬奠哀慟王以下文武大臣官員隨行禮○諭軍機大臣等本日國泰奏到山東八月分糧價單朕詳加披閱內除登萊二府屬各項糧價俱較上月稍減青州府屬黃黑豆高粱與上月同大米稍增餘稍減外其濟南各屬米糧價值俱有比上月稍增者此必入秋以來缺少雨澤各屬間有歉收之處是以糧價逐漸加增前據國泰奏稱省城於八月二十四日得有微雨其餘各屬於八月二十一二十四等日得雨二三寸未能普遍種麥不無望澤若九月二十以前得有澍雨渥霑已種者可以滋長未種者可以乘時佈種無虞遲誤等語是該省秋麥尚未普種不

知自九月以來各屬曾否得有透雨麥田曾否種齊設因缺雨種麥未全則於民食大有關係著傳諭國泰即行查明該省雨水麥田情形若何迅速據實覆奏○是日駐蹕秋瀾村行宮丁丑諭軍機大臣等前因郝碩奏漢州知州永靈率領人夫尋棟礮子諭令俟功成後共尋得多少節省錢糧多少查明奏聞今據郝碩奏該員自飭知後共棟獲礮子大小三萬二千五百餘顆合算共節省銀十

下奉李中

十九

二萬餘兩等語該員承辦此事尚屬認真著傳諭文綬即將永靈出具考語送部引見並諭郝碩知之○又諭此次平定兩金川攻碉擊寨每資大礮轟摧所有鑄礮工匠聞其極為嫻熟但大功告竣恐該省或視為無關緊要遂致日久失傳亦未可定雖國家嗣後斷無復有用兵之事而此等行軍利器不可一日不備著傳諭文綬查明該匠令其入伍食糧以資養贍並於本營挑選數人令其授徒

學習以傳久遠仍將如何酌辦之處隨便奏聞○是日駐蹕半壁店行宮

清錄卷十四

三

大清高宗法天隆運至誠先覺體元立極敷文奮武孝慈神聖純皇帝實錄卷之一千四十

大清高宗法天隆運至誠先覺體元立極敷文奮武孝慈神聖純皇帝實錄卷之一千四十一

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭書處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次官慶桂

總裁官經筵講官太子太傅文華殿大學士文淵閣領閣事稽察欽奉 上諭書件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲藍旗滿洲都統軍功紀錄次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉九月戊寅諭曰鐘音奏

建寧府知府蔣衡因學宮祭器殘缺檄委署松溪縣縣丞宋思謙督工喚錫匠鄒貴明給價承造鄒貴明自縊身死一案經屍子鄒昶赴臬司呈控提訊鄒貴明之死由差役鎖押索銀所致縣丞教諭官役勒詐威逼斃命該府先以札查致釀命案繼又不據實揭報且據所稱捐俸修葺祭器並無報案更恐有串通私派情事請將知府蔣衡署縣丞宋思謙教諭陳天琳革審等語蔣衡宋思謙陳天琳

俱著革職交與該督將業內有名犯證一併嚴審定擬具奏○又諭據福康安奏稱寧古塔副都統福珠禮係伊伯祖之孫例應迴避等語福珠禮著調補鑲藍旗漢軍副都統達色著調補寧古塔副都統○諭軍機大臣等據郝碩奏所有經手大板昭一路各站銷冊業經覈算就緒造冊送局現在川省並無應辦之事請遵前奉諭旨詣闕請訓赴任候旨遵行又同日據李世傑奏川省各站支放銀米業經造冊送局完竣俟本管段內銷案總局全行覈定一面奏聞一面詣闕請訓赴任各等語李世傑所奏俟總局覈定銷案再奏聞請訓自應如此至郝碩摺內既稱應遵前旨赴闕請訓又稱候奉到諭旨起程殊未明晰似伊於行止之間尚懷猶豫故爾隱躍其詞但伊經手奏銷之案雖已造冊陸續覈題而經部議駁者正復不少自應逐案詳細覈明登復完竣方可離川省况東撫印務現有

國泰護理。並無必須郝碩承辦之事。亦無庸急於赴任。著傳諭郝碩李世傑均俟經手奏銷各項經部指駁之案。登覆覈准。再行進京請訓。前赴新任。○又諭據徐績奏報地方情形。摺內稱豫省各屬。八月分共得雨者五十一處。其餘五十七處。未據報得雨。澤現在飭查等語。前因直隸大名等處秋來缺雨。豫省境壤毗連。恐亦有盼澤之處。曾於本月初十日降旨詢問。該撫拜發此摺時。雖未奉到前旨。而現在所奏。未報得雨者。有五十七處。又未言及九月初旬曾否得雨。是該省秋來不免稍乾。豫省全以麥收為重。若八九月缺雨。不能及時播種秋麥。於民食大有關係。朕心深為廑念。兩河地漸近南。氣候較畿輔更暖。若霜降前後得雨。尚可趕種秋麥。未知該撫曾否虔誠祈請。現在曾否優霑渥澤。設或竟致缺雨。應作何設法酌辦。俾閭閻不致拮据。亦當豫為籌畫。著傳諭徐績即速查明據實

覆奏。是日駐蹕黃新莊行宮。已卯諭軍機大臣等。本日薩載奏河湖水勢一摺。據稱山陽寶應高郵一帶運河水深六七八尺。一文二三尺不等。等語。是淮揚一帶運河尚屬深通。前聞運河久未挑濬。河身逐漸淤高。恐日久易致泛溢。於運道河防關係甚大。曾於八月二十六日降旨令高晉薩載將運河逐段查勘測量。如有應行挑濬者。迅即確實勘估奏聞。今薩載於未接奉前旨時。奏到之摺。所稱運河之水最少者。尚有六七尺。於運道應不致淺阻。則前此所聞淮揚河底漸高之語。或尚係向年黃水倒漾時。間有停淤。遂爾傳聞過甚。今清水遠出。刷黃不復有倒漾之患。則運河自不虞淤淺。又無藉興工挑濬。但該處情形。是否如此。難於懸定。著傳諭高晉薩載。即行詳細查明。迅速據實覆奏。是日駐蹕潭柘岫雲寺。庚辰諭據國泰奏署布政使事鹽運使章棠感冒風寒。現已病故。

等語。所有山東布政使事務著陸燿署理。其按察使事務著李燕署理。山東鹽運使員缺著于易簡補授。是日駐蹕靜宜園。翼日如之。辛巳吏部議准浙江巡撫三寶奏請道府廳州縣等官。凡遇病痊起用。以及終養丁憂服滿。請咨赴選者。均由本籍督撫驗看。如果年力不至衰庸。查叙原咨考語。給咨赴部引見。補用佐雜咨部銓選。倘精力就衰。難勝原任。即據實分別奏咨降補改教。及勒令休致。或有不肖廢棄。情願來京引見人員。照計叅六法人員願引見例。准其給咨赴部引見從之。壬午遣官祭歷代帝王廟。上迴圓明園。諭盛京乃我朝定都創業之地。永陵。福陵。昭陵巍然在望。皇祖聖祖仁皇帝御極六十一年。曾經三次展

謁。孝思追遠。常切欽承。朕自乾隆八年及十九年恭謁。祖陵以來。迄今已二十餘年。遙企橋山。每深依戀。常時恭閱太祖太宗實錄。敬惟開創艱難。佑啟萬年統緒。茲際重熙累洽之庥。溯念前勞。輒不禁愀然淚下。而松雲蔥鬱。向惟再蒞瞻仰。心甚歎焉。朕現在精力如前。尚堪遠涉。擬於明歲秋間。前詣盛京恭謁。祖陵。以申積悃。所有蹕路往來。俱由內地出山海關而行。於置頓安營。較為妥便。尚在二十七月之內。途次不行。圍至盛京時。不升殿。不筵宴。朝鮮國毋庸遣使朝賀。其扎薩克蒙古

王公等亦毋庸朝覲。至啟鑒日期。屆時再降諭旨。將此通諭知之。○癸未諭軍機大臣等。據勒爾謹奏。乾隆己亥年。新疆各處備用綢緞。開明各項色樣數目。請勅江寧蘇州杭州織造。暨山東山西巡撫。照依議定丈尺。織辦解甘分運等語。著傳諭已延三國泰基厚舒文福海。即照勒爾謹單開所需各項綢緞。如式妥協製辦。務使質地厚重。顏色鮮明。不得稍有粗糙輕減。致滋挑駁。前經佛德等奏。織造織解伊犁。本年備用綢緞內。有黴點不堪應用者四十餘疋等語。業已降旨令勒爾謹詳悉查覈。如係解甘時驗有黴點。即令原辦之織造賠製。若已經轉解哈密。復檢出黴污。應著落該委員賠補。並令嗣後。照此例覈辦。著傳諭該織造等。起運緞疋時。並須遴委幹員。妥協護解。毋得稍致黴污。致干咎戾。至所需秦紗二十疋。著畢沅一併照辦。解往。將此諭令知之。甲申諭曰。額爾德蒙額。年力就

衰。且有風痰之症。著解任調理。所遺鑲紅旗蒙古都統員缺。著永福補授。○諭軍機大臣等。昨據袁守侗奏。審訊祁縣知縣羅興禧與董得壽接見各情節一摺。已於摺內批示矣。看來羅興禧。自係一無能為而又狡詐之人。故始則輕與董得壽接見。繼復捏飾不吐實情。即昨所訊供詞。亦仍不實不盡。董得壽與該縣素未謀面。而所持之書。又係董得壽出名。若非董得壽妄稱在京王公大臣等。差彼前往。該縣豈能為其聲動。遽令相見。又即允其代辦。此情理之顯而易見者。該犯等不過因事已敗露。思欲避重就輕。故不肯據實供吐。似此含糊定案。豈足以成信讞。亦不足以警奸欺。不可不徹底根究。至寫字出名之董得福。自必實有其人。或係王公等門上。或係各衙門人役。俱未可定。應向董得壽嚴切追求。並將該縣之傳事管門胥役家人。分別嚴行隔訊。均無難得其實據。如供有指稱王公

大臣名色亦不可稍為隱瞞袁守侗係軍機大臣又奉欽差審事不宜有所顧忌即或供係指稱袁守侗之名或稱大學士額駙等名目甚至假稱阿哥等所差更不能有所瞻徇總之此事若不得董得壽指稱恐嚇實情斷不能定案著傳諭袁守侗於董得壽解到時即速將此情節詳細研究並提該縣傳事之胥役家人等隔別訊鞫如董得壽狡詐不供即當嚴加刑訊務得確情據實覆奏毋稍存

顛預了事之見自取戾咎將此由五百里諭令知之又諭刑部進呈河南省秋審冊由緩決內經九卿改入情實者三起所改甚為允當王三同伊兄王浩因微嫌逞兇攢毆各斃一命均應擬抵豈宜仍予留養陳大起於醉後毆斃十歲族姪張子蘭因教徒毆死九歲幼童情罪俱為兇惡並屬法無可貸該撫概行擬入緩決實不免於輕縱徐績著傳旨申飭但徐績於地方常行事件尚可詎勉辦

理而刑名非其所長新任臬司其人不過謹飭自守問刑之事自未能諳習榮柱係刑部司員出身向即知其能事是以有旨命其兼之嫌今所改之三犯榮柱不得謂之不知何竟任其舛謬若此該省秋讞時正當榮柱陞見進京未及與聞尚可云無過若正當趙銓進京榮柱或兼署臬司或臬篆另有委署之人而榮柱在省目擊不為救正即難辭咎著

徐績即行查明據實詳晰覆奏並令榮柱明白回奏至榮柱現任藩司惟錢糧是其專責其餘該省尋常刑名之案原可毋庸干與若遇有地方重大案情及每年秋審定擬疏冊榮柱仍當幫同徐績悉心妥辦毋稍存歧視致再舛誤干咎將此一併傳諭知之乙酉上詣

恩慕寺行禮諭軍機大臣等據國泰奏濟武兗東等屬雨澤缺少二麥未能全種糧價不

無少增請將歉收之歷城等十九州縣民間春借社穀一律緩至來歲徵收並請將各年民欠常平倉穀一併緩徵以紓民力等語如果小民因缺雨艱於種麥自應如此籌辦已批有旨諭部矣。隨復接據國泰奏報省城已於九月十九日夜起至二十日辰刻澍雨未止。入土已五寸有餘。現在雲陰廣濶得雨之處必多。民間得此時雨即可補種二麥並稱前請緩徵之十九州縣。如果此內尚有未普

者再行奏懇天恩等語。所辦甚是。覽奏為之慰懷。東省氣候較直隸稍暖若霈澤均霑自尚可趕種宿麥。但未知此次之雨曾否普遍霑足。著傳諭國泰即將該省得雨種麥情形詳悉查明據實具奏。如尚有未能普霑之處仍須量為緩徵迅速確查分別覆奏。候朕另降諭旨。丙戌諭據伊犁圖奏稱辦理伊犁屯田事務總兵官請照領隊大臣一體頒給印信等語著照所請鑄給印信。丁亥諭理

藩院奏喀爾喀郡王車布登扎布等將伊闐部王公扎薩克台吉等公進

皇太后齋醮九九馬駝交公丹巴旌準扎薩克台吉烏巴付恭送前來等語。車布登扎布等感戴朕恩。公進

皇太后齋醮馬駝長途遠涉意甚誠敬。朕悉鑒及令

皇太后大事已過伊等所進馬駝無庸收受仍交伊等領回。公丹巴旌準扎薩克台吉烏巴

付著加恩各賞八絲綬二疋五絲綬二疋。令回游牧。又諭曰敦福著賞給三等侍衛職銜前往喀什噶爾換申保回京。諭軍機大臣曰刑部議駁鐘音具題楊晉致傷胞叔楊娘身死聲明救父情切並非逞兇干犯一案細覈供詞於事理均難遽信恐非當日實在情形應令該撫研審確情詳晰聲叙到日再議所駁甚是已依議行矣。該部所稱楊傳跌地喊救之時正楊娘持刀欲砍之候情形危

急此時楊晉在園工作必不能聞喊即至而楊娘既欲砍其兄其勢間不容髮又豈能擎刀不動以待聞聲趨救之人此情理之顯而易見者該省審訊定案時如能以此等情節詰訊即甚狡黠亦斷不能託詞以避重就輕乃鐘音不加深察僅據該犯父子一面之詞竟以聞喊奔至奪刀致傷為實情輒謂楊晉係救父而非逞兇務為姑息而不顧是非豈成信讞鐘音平日辦事尚屬認真何辦理此案舛謬若此鐘音著傳旨申飭所有楊晉一案並著鐘音虛公覆訊悉心勘鞫務得實情定擬具奏朕於貼黃內折角之處並著鈔錄一分照式折角寄令閱看又諭前因豫省秋間未報得雨恐不能及時種麥曾降旨詢問嗣據該撫奏該省望雨甚切現在設壇祈禱朕心深為軫念此月十九日京師得雨四寸昨據國泰由五百里馳奏山東省城亦於十九日夜至次早得雨入土已五寸勢猶未

止且稱雲氣濃厚霪被必廣朕於山左稍為慰懷因思齊豫連疆諒必同霪渥澤計程途遠近豫省亦不過遲一兩日即將奏達今日始據徐績奏河南省城於二十日子時至次日辰時密雨連綿入土四寸可以趕種宿麥朕心稍慰然其奏到距山東已遲三日朕又多數日縈懷該省正當望雨亟切之時且經朕兩次諭詢今既得甘膏即應由驛馳奏以紓朕宵旰繫懷乃徐績僅照尋常事件遣人齎奏因致到遲何不曉事若此至另摺奏稱河北汲縣臨漳二縣秋禾歉收小民無力購種應酌借籽種銀兩俾民間及時播種並請俟奉到諭旨再於司庫撥借等語更不知事理緩急輕重汲縣臨漳秋禾既已歉收且未經得雨種麥經朕兩次諭詢徐績即應及早籌辦況十九日雨勢自北而南迤南更優於北省城既經得雨汲縣臨漳斷無不霪被之理尤當早為借給籽糧俾小民得以及時趕

種自應一面撥借一面奏聞如此等恤民之事朕從來有不允其所請者乎乃尚欲請旨遵行尤太不曉事體徐績著傳旨申飭仍即將該省曾否均霑及作何籌辦情形迅速覆奏將此由四百里傳諭知之 戊子諭軍機大臣等據吳虎炳奏續獲偷竊臬署之黃喜虞謝任華審擬謝仕朋等供出節次偷過臬司道府學政等各衙署衣物等項恐該犯等另有強劫等案飛咨廣東原籍徹底查究等語謝仕朋等係積年猾賊行竊七案且慣偷衙署衣物情罪甚為可惡若俟廣東原籍咨覆到日始行定擬具題未免需時而計賊滿貫定罪止能擬以監候若過今年勾到之期須待明年秋審此等匪犯轉得久稽顯戮不足示懲而竊盜案情又不值加重問擬立決今要犯業已到案且人贓並獲更無可疑毋庸輾轉行查致延時日著傳諭吳虎炳即就各犯現在供出各案迅加確覈分別首夥罪

名照滿貫律定擬由五百里馳奏雖廣西省勾到已過該撫迅速奏到時即交三法司速擬不拘勾到何省仍可一同奏進予勾彼時由驛發往該省尚可於冬至前趕辦使積匪早正刑誅宵小咸知儆戒其未獲各犯該撫仍即嚴飭各屬上緊查拏務獲另行嚴審定擬具奏 已丑

孝慈高皇后忌辰遣官祭

福陵 諭曰永平所遺鑲白旗滿洲副都統員

缺著塔永阿調補塔永阿所遺正黃旗漢軍副都統員缺著存泰坐補 諭軍機大臣曰高晉薩載覆奏查勘淮揚運河酌籌辦理情形一摺自應如此隨宜妥辦至所稱西岸寶應諸湖較低運河水面數尺擬添修閘座以備水大時分洩入湖又稱應將西隄之通湖港堵閉使湖水由靠裏之二河分流入運歸江等語所奏殊未明晰寶應諸湖在運河西岸本為瀦水之區且高堰五壩減下之清水

亦必歸入湖內。設遇漲盛之時。不能不有所宣洩。勢必由運入江。並無徑行歸江之路。今稱寶應運河轉高於湖。水大時并須洩入湖內。竟似以寶應諸湖為運河洩水之地。又云湖水由靠裏之二河分流入運歸江。則是湖水仍不得不由運入江矣。何以在寶應則河高而湖低。轉藉湖以納水。又至何處復湖高於運。湖水得以由運歸江。其故殊未深晰。或向日情形即係如此。抑係近年來寶應運河獨自淤高。故為此通融遷就之計。均未詳悉聲明。難以懸定。朕已於摺內用硃筆點記。著傳諭高晉薩載即將淮揚一帶河湖高低形勢確切繪圖。並將某處運河深淺若干丈尺。及何處洩運入湖。何處引湖入運。以歸江之路逐一詳細黏簽。據實覆奏。尋奏查西岸寶應諸湖周圍三百餘里。湖面寬濶。水勢一律相平。而運河自運口至瓜洲。計高十四丈有奇。地形北高南下。勢若建瓴。是以三溝閘外。

未設隄防。下游邵伯一帶湖河相通。向來形勢即係如此。目下寶應運河水深八九尺。至一大一二尺。河面較高。湖面一丈二寸。汜水汎運河水深六七八尺。河面較高。湖面六尺七寸。永安汎運河水深六七尺。河面較高。湖面五尺五寸。迤下六溝閘至萬家塘一帶。河面較高。湖面四尺五寸。及二尺九寸。一尺八寸不等。迨至高郵一帶。運河水深五六尺。河面與湖面相平。惟露筋閘迤下至三溝閘。通湖港一帶。湖面高於河面自二寸四寸。及一尺不等。此高郵以上河高而湖低。高郵以下湖高於運河。實在情形。至寶應西岸修建閘座。因淮揚運河綿長三百四十餘里。遇水勢盛漲。運河下注不能迅速。未免壅盛。查運河東岸閘座涵洞。運河水小時應須蓄水濟運。即下河民田需水亦祇量為挹注。以資播種。若運河水大。下河民田形如釜底。未便將河水洩入。致淹民田。是東岸閘洞不過資農田。

灌溉不能分洩運河盛漲惟西岸寶應臨湖一帶河面高於湖面儘可宣洩從前原有竹絡壩三里溝滾壩及減水閘等處分洩運河有餘之水以減上游暴漲近因該閘壩年久損壞請於三里溝上下修建石閘二座以備減洩入湖得旨自是如此爾等前奏未明此奏甚明晰知道了河南巡撫徐績疏報內鄉縣勸墾民田旱荒地一項九十八畝以故喀爾喀親王齊巴克雅喇木丕勒子齊巴

克多爾濟襲爵 庚寅

上詣

大高殿。

壽皇殿行禮還宮（是日起）

上以孟冬享

太廟齋戒三日 辛卯

孝敬憲皇后忌辰遣官祭

泰陵。恩賞新疆舉子馳驛諭向來雲南貴州舉人進京會試一路賞給驛馬騎坐所以體

恤遠方寒峻者至優極渥本年陝西鄉試中式第二名舉人黃斌即係新設迪化州阜康縣人可見關外人文漸盛殊屬可嘉第念該處進京道里較雲貴等省更遠即每科新疆士子赴西安鄉試路亦不近而新疆車馬等項雇覓維艱殊堪軫念嗣後嘉峪關以外士子赴西安鄉試及進京會試並著加恩照雲貴之例一體賞給驛馬以示優恤邊陲寒士之至意 諭軍機大臣曰富察善奏寧遠州

民張汝振嘔母馮氏將所剩之酒取飲出言唐突復毆傷伊母額顱旋撥醫調治傷痕平復請將張汝振照律擬斬俟奉旨到日即行正法一摺所辦非是向來各省遇有蔑倫之犯將父母傷害致死者實為天地所不容曾諭令各督撫等於審明時一面奏聞一面即將該犯凌遲處死以快人心而維風化其奏摺概不予批誠以此等兇惡逆犯行同梟獍非盛世所宜有而司明刑弼教之責者方且

引以為惡不欲污及丹毫朕此意自應共喻令張汝振輒敢用拳毆傷伊母額顱雖未至於死按律即當斬決自應照例綁赴市曹即行處斬俾眾共知懲儆又何必俟得旨後始行辦理耶富察善等殊不曉事著傳旨申飭仍著將張汝振即行正法毋使稍稽顯戮並將此通諭各省督撫知之又諭據畢沅奏陝省自七月下旬以後僅據鳳翔漢中及附近南山各縣稟報於八月二十七等日得雨

二三寸其餘僅獲微雨晴霽日久土脈漸乾日內再望甘霖續霑庶麥根得以穩固而未種之地正可及時趕種等語已於摺內批示矣該省七月以後雨水缺少晚禾業經受旱收成未免歉薄正賴播種秋麥以資接濟不知現在曾否得有透雨麥田曾否種齊朕心深為廑念且該省現在設壇祈禱自屬盼雨甚切昨京師及山東河南山西等省俱於本月十九及二十日得雨四五寸不等陝西與

河南山西境壤毗連十九二十之雨似應一律均霑但未知曾否透足能否趕種秋麥設因缺雨種麥未全該撫不可不及早籌辦或酌借籽種或量予緩徵當就各該處實在情形妥為經畫並當一面辦理一面奏聞俾窮黎不致失所不可稍存諱飾將此由五百里諭令知之仍將曾否得雨及作何籌辦情形迅即由驛覆奏尋奏九月十九日甘霖大霑各屬均霑其早經出土之麥得以盤根深固已種未出土者亦一律萌芽新苗透發至待雨補種之地臣已先期查明無力貧民開倉借給籽種復於九月二十七日西安等屬續得透雨二麥播種齊全得旨覽奏俱悉壬辰諭軍機大臣等刑部奏浙江巡撫三寶咨浦江縣民鄭遵明刀傷鄭若商因風身死一案違例用咨請令該撫另行詳覈案情具題到日再議一摺已依議行矣各省辦理原毆傷輕因風身死之案俱由各該督撫具題交

部覈擬。即浙省亦有辦過成案。今鄭遵明因與族叔鄭若商戲謔。各用鈎刀互毆。以致劃傷鄭若商偏右。該撫既審明。因風身死屬實。擬以滿流。自應循照定例具題。以昭慎重。乃將應題事件。率行咨部完結。殊屬不合。三寶著傳旨申飭。○是月。湖南巡撫顏希深奏。楚南設有養濟院。收養乞丐。向未設立普濟堂。老疾無依之人。未免向隅。請於省城設堂一所。收養附近老民五百名。每名日給米八合。銀一分。動用司庫銀四萬兩。借商起息。以作經費。得旨允行。○山西巡撫覺羅巴延三奏。烏喇特公恭格喇布坦等。因不能養贍屬人。蒙准借俸交地方官買米給領。自應於就近薩拉齊廳地方辦交。以資賑卹。查晉省本年各處秋收豐稔。統計九分。惟薩拉齊廳毗連烏喇特地方。約收分數。現僅六分有餘。恐民間米穀未能充盈。今該烏喇特公等所需米數。若驟向該廳採買。勢必米價頓昂。在蒙古

實錄卷十四十一

三十五

既不能多得糧石。而本處亦虞市糴維艱。查薩拉齊廳現貯常平倉穀三萬石。原以備平糶之需。即借動該廳倉穀碾給。行知恭格喇布坦等。就近領取。分給蒙古人等。急資餬口。仍將交到米價。存貯歸綏道庫。將來買補還倉。得旨嘉獎。○陝西巡撫畢沅奏。請將咸寧等二十九廳州縣收成四五分各地戶。查明實係無力貧民。按大小口數。在常平倉內。極貧者。借給兩月口糧。次貧者。借給一月口糧。所借糧石。明歲秋收後還倉。仍俟冬末春初。青黃不接時。寬為借給倉糧。照歉年例減二平糶。並請將咸寧等二十九廳州縣應徵本年未完錢糧。一併緩至來年麥熟後徵收。得旨著照所請行。○大學士管雲貴總督李侍堯雲南巡撫裴宗錫等奏。請嗣後銅廠廠務悉歸地方官經管。即繁劇地方。離廠較遠。正印官不能照料。亦宜改委州縣丞倅等官經理。各廠現委雜職。概行撤退。酌量地方遠近。

實錄卷十四十二

三十五

廠分大小分派各府廳州縣及試用正印人員接手承辦實力採煎如果辦銅寬裕奏請議叙倘有短缺即行參處得旨嘉獎

實錄卷一百一

三五

大清高宗法天隆運至誠先覺體元立極敷文奮武孝慈神聖純皇帝實錄卷之一千四十一

大清高宗法天隆運至誠先覺體元立極敷文奮武孝慈神聖純皇帝實錄卷之一千四十二

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉上諭事件處管理
吏部理藩院事務正黃旗滿洲都統世襲騎都尉軍功加七級隨帶加二級尋常加二級軍功紀錄一次
總纂官經筵講官太子太傅文華殿大學士文淵閣領閣事稽察欽奉上諭事件處管理刑部戶部庫事務
世襲騎都尉軍功加十九級隨帶加二級又加二級
纂修內大臣戶部尚書鑲藍旗滿洲都統軍功紀錄一次
尋常紀錄十四次
總纂經筵講官太子少保工部尚書紀錄六次
纂修總纂官

敕修

乾隆四十二年丁酉冬十月癸巳朔享

太廟

上親詣行禮遣官祭

永陵

福陵

昭陵

昭西陵

孝陵

孝東陵

景陵

泰陵

泰東陵○遣官祭

孝賢皇后陵

端慧皇太子園寢○頒乾隆四十三年時憲

書○諭前據鐘音等奏永嘉縣佃民胡挺三

糾衆抗租拒捕一案温州鎮總兵孟兆熊正

值在洋巡察聞信即親至該地方協力督拏

將本案首夥各犯先後報獲等語孟兆熊辦

理此案尚屬迅速妥協著傳諭鐘音即檄知

該鎮令其來京陛見並著於通省各鎮協內

遴委妥員前往署理○諭軍機大臣等據永

璋等奏廣州將軍衙門接到碣石鎮公文一

角內貯海豐縣監生匿名呈狀一紙冊一本

係首告陸豐縣鄭會禮兄弟謀為不軌詞語

悖逆已極先委按察使陳用敷策程馳往搜

查臣楊景素亦即於次日自省起程親往督

同徹底查究等語此等匿名呈狀自係奸徒

挾仇編造希圖誣陷但冊內所開至一百餘

人即使其平日素有仇怨何至如此之多或

係混窩多人以圖聳聽亦未可知不可不嚴

速根究徹底查辦該督既經親往正犯自無

難就獲案情亦即可查明著傳諭楊景素即

將所首謀逆情事有無影響及匿名吳姓曾

否查獲各確情迅速由驛馳奏將此由四百

里發往並令永璋李質穎知之吏部議覆

大學士管雲貴總督李侍堯奏稱滇省白鹽

井所屬之白石谷井現與白井提舉同駐一

方該井滴水歷係架立木槽流歸白井大使

經營之觀音井添補煎額為數無幾本井大

使並無專辦事又黑鹽井所屬之復隆井距

提舉駐劄地方路止十里且有黑井大使與

提舉同駐兼查不必另置專員是白石谷井

復隆井二處大使均屬冗設請裁汰各就近

歸併管理應如所奏從之甲午

上御乾清門聽政○兵部議准陝甘總督勒爾

謹疏稱前經安西提督俞金鰲奏准請將沙

州協副將都司與安西營參將守備互相調駐遵即會議各事宜臚奏一安西營原設參將守備各一千總二把總四外委三額外外委四今改為協應設副將一中軍都司一千總二把總六外委七額外外委五其原額千把外委不敷之弁即於沙州調撥沙州協原設副將一中軍都司一千總四把總八外委十二額外外委八今改為營除副將都司移駐安西餘千把外委除調駐安西并撥給巴里坤外尚餘千總二把總四外委六額外外委四定為沙州營額缺其參將守備即以安西參將守備調駐一安西改設副將應設兵一千名照舊馬步各半沙州改設參將應設兵七百四十名亦照舊馬六步四各按數裁移一移撥安西馬匹應於公糧塘撥摘缺緩補差屯等項馬內勻撥糧料於安西州額徵糧內估供一養廉公糧公費照員數酌留裁撥沙州書識二名帶赴安西再於都司衙門

添書識一名工食即於該營公費銀內支給一安西現有遺存空閑兵房及經制外委額外外委馬步兵衙署兵房即按員弁撥給沙州所遺衙署兵房估變一巴里坤所屬以東除松樹塘起至布隆吉爾止十七塘外應添設九十三塘共一百一十塘併歸巴里坤鎮管轄安西沙州等營改隸肅州鎮自沙州至肅州安設塘撥馬匹即於安西沙州靖逆各營勻撥一沙州黃墩營應令調駐之參將守備管轄安西之布隆吉爾踏實橋灣瓜州各營及雙塔堡應令調駐之副將都司管轄靖逆營應由肅州鎮統轄移駐安西副將兼轄其自安西起至馬蓮井子止軍臺五處歸調駐安西之中軍都司專管自三道溝起至渠口止軍臺三處仍令布隆吉爾營都司專管俱應如所奏其改設官弁關防鈐記傳勅割付勅書均請照例添換從之○以先祿寺卿吳綬詔為順天府府尹○乙未諭新授順天

府府尹吳綬詔尚係初任袁守伺未到京之前所有府尹事務仍著蔣賜榮暫行兼管諭軍機大臣等本日吏部帶領河南上南河同知推陞戶部員外郎之顧嵩楷引見據奏曾於乾隆二十六年隨高晉辦理楊橋河工等語該員既曾隨高晉辦事其於河防諸務是否留心諳習高晉必能知之著傳諭高晉即將顧嵩楷心地才情若何及於河工是否得用之處即行據實覆奏尋奏乾隆二十六年河南楊橋漫溢臣赴該處協同堵築管理西壩其時顧嵩楷委在西壩辦事人甚明白勤幹穩妥至心地究竟如何臣未與久處尚不深知報聞禮部議奏山東道御史戈源奏請申明冒籍治罪條例查大宛等縣多士雲集土著寄居不免參雜立法日久漸成具文應將歷年嚴定冒籍禁例詳開交順天府通行曉諭嗣後如有牽混入籍生監照例斥革治罪又奏順天廩缺多冒籍充補若責令

平定縣志卷之四十五

六

保人必滋弊竇應如所奏令寄籍廩生呈明改歸原籍無籍可歸者註冊土著者取各生互結備查統交順天府尹督各教官分別辦理又奏御史審音南籍者亦行開列似非遠嫌防弊之道亦應如所奏將南籍御史迴避扣除又奏順天貢監入場宜責成學政稽查錄科前該貢監先赴大宛二縣起文應令該縣於給文時逐一稽覈必實在土著及寄籍無家可歸者方准申送如混行送考照考試童生審音不實例議處至該縣申送時仍責學政嚴查又童生考試先應縣考應請交順天府飭令大宛二縣遵例嚴查如違叅處從之丙申

平定縣志卷之四十五

七

部查明改入緩決但官犯非常犯可比既改緩決後如遇應查辦緩決三次時不得與常犯一例減等其中或有應行寬宥者候朕隨時特降諭旨又諭據保定府城守尉烏林泰奏請來京陛見城守尉等令其與副都統等一體三年一次奏請陛見者緣各處城守尉等不能常得瞻仰朕顏是以三年一次具奏請旨若保定府城守尉凡遇朕臨幸各處皆至行在接送每年俱得瞻仰朕顏且有召

見者昨朕恭謁

陵寢伊尚隨行豈他處城守尉可比烏林泰亦拘泥成例奏請陛見顯係粉飾並非出自誠心烏林泰著飭行○丁酉

上御太和殿視朝文武陞轉各官謝恩○諭曰承德等具奏福州駐防兵丁所拴馬匹設立官園餵養一摺將原案重複引入以無緊要之語曉曉敘述而於此案事理仍未能聲敘明白承德雖非能事之人然承辦事件亦有

年矣何竟不曉事至此承德著飭行○戊戌諭本日吏部將倉場侍郎咨送押運漕船之江西同知劉國烜湖北通判福克精阿州同李超玠帶領引見本年漕務早竣該押運官何以遲至今日始行引見殊屬遲滯據吏部堂官查詢有倉場給咨本遲者有該員稱病未即到部者各官於引見後由陸路趕赴前途押回等語漕船抵通其押運各官既經糧石交清該倉場侍郎自應將該員等即日給咨送部該部亦即帶領引見俾得及早押送回空南下劉國烜等何以俱遲至半月餘方為送部且既經押重運而來即當押回空而往嗣後漕艘抵通糧石交完後所有應行送部之運員該倉場侍郎即行給咨送部該部亦即循例帶領引見著為令又諭曰戶部尚書果毅繼勇公豐昇額秉性忠誠奉職勤恪昨以副將軍征勦金川時殫力宣忱奮勇著績能承父志以紹祖風深可嘉尚是以降

旨於伊所襲果毅公爵加賞繼勇之號以獎
勲勞伊年力富強正堪任使乃於前月忽遭
沈疴即派太醫院堂官診視頻加存問兼賜
人蔭以冀速痊茲遽聞溘逝深為軫惻已加
恩賞給經被著派散秩大臣一員侍衛十員
往奠茶酒並著加恩晉贈太子太保所有應
得卹典仍著該部察例具奏又諭我朝定
鼎之初額亦都已圖魯曾立大功因係勲舊
世家其子孫累世俱有為領侍衛內大臣者

今豐昇額所遺正白旗領侍衛內大臣員缺
著加恩以特成額補授特成額奉到此旨即
著來京又諭曰原任尚書豐昇額代伊父
阿里袞應賠未完銀二千七百五十餘兩著
加恩豁免又諭曰福隆安係鑲黃旗滿洲
現管本旗事其正白旗滿洲都統員缺著福
隆安調補所遺鑲黃旗滿洲都統員缺著阿
桂調補又諭據伯忠奏稱回郡郡王額敏
和卓病故額敏和卓効力有年今聞溘逝深

為軫念著加恩賞銀五百兩治喪並派伯忠
往奠茶酒其所賞銀兩即由彼處庫貯銀兩
內支給調刑部尚書英廉為戶部尚書仍
兼管刑部事務以倉場侍郎德福為刑部尚
書以戶部侍郎和坤為步軍統領己亥
諭四庫全書館進呈李廌濟南集其詠鳳凰
臺一首有漢徹方秦政何乃誤至斯之語於
理不順因檢閱北史文苑傳敘亦有頡頏漢
徹跨躡曹丕之句韻府因而錄入均屬未協

秦始皇焚書坑儒其酷虐不可枚舉號為無
道秦後之人深惡痛絕因而顯斥其名尚無
不可若曹丕躬為篡逆稱名亦宜至漢武帝
在漢室為振作有為之主且興賢使能獨持
綱紀雖黷武惑溺神仙乃其小疵豈得直書
其名與秦政曹丕並論乎且自古無道之君
至桀紂而止故有指為獨夫受者若漢之桓
靈昏庸狂暴遂致滅亡亦未聞稱名指斥何
於武帝轉從貶抑乎又如南北朝彼此互相

詆毀南朝臣子稱北朝主之名北朝臣子稱南朝主之名宋之於金元金元之於宋亦然此皆局於其地之私心雖非天下之公尚無傷正理若李延壽乃唐臣李廌乃宋臣其於中國正統之漢武帝伊祖未嘗不為其臣豈應率逞筆端罔顧名義輕妄若此且朕御製詩文內如周程張朱皆稱為子不斥其名又如韓昌黎蘇東坡諸人或有用入詩文者亦止稱其號而不名朕於異代之臣尚不欲直呼其名千古以下之臣轉將千古以上之君稱名不諱有是理乎朕命諸臣辦理四庫全書親加披覽見有不協於理者如關帝舊謚之類即降旨隨時釐正惟準以大中至正之道為萬世嚴褒貶即以此衡是非此等背理稱名之謬豈可不為改正以昭示方來著交武英殿將北史文苑傳敘改為漢武韻府刪去此條酌為改刊所有陳設之書悉行改補其李廌集亦一體更正並諭四庫

全書館臣等於校刊書籍內遇有似此者俱加簽擬改聲明進呈毋稍忽略將此通諭知之○調工部侍郎舒常為倉場侍郎○調正白旗漢軍都統弘曉為鑲白旗滿洲都統以鑲黃旗漢軍副都統瑚世泰為正紅旗漢軍都統○以甘肅永昌協副將福敏泰為山西太原鎮總兵○庚子諭據伊犁圖奏本年軍政屆期將伊犁兩城滿洲錫伯官員照例甄別保舉卓異等語向來伊犁官員每遇軍政之年保舉卓異者並不送京引見原因伊犁僻處邊陲免其往返跋涉但軍政大典若未經引見僅憑該將軍大臣試看後即列卓異究屬未協嗣後伊犁等處官員每遇軍政之年將保舉卓異人員隨時奏聞存案遇有應陞之缺送京引見時將保舉卓異之處一併聲明候朕酌定其協領等保舉卓異者亦於年滿送京引見時一並聲明候朕酌定後方列卓異著為令○又諭陝西華嶽廟自三代

以來。即為望秩之地。規模宏壯。體制尊崇。近歲風雨調勻。屢昭靈應。昨據該撫畢沅奏稱。因歲久傾頽。亟宜葺治。約估需銀十二萬餘兩等語。此項工程甚鉅。理宜發帑興修。著於內務府撥銀十二萬兩。交畢沅覈實辦理。造報內務府覈銷。務俾工程堅固。廟貌鼎新。以妥神庥。而昭秩祀。○又諭據吏部侍郎吳嗣爵奏稱。現年七十一歲。精力衰邁。步履維艱。懇請解任。照例開缺等語。吳嗣爵著准以原

品休致回籍。○又諭據伊勒圖奏。土爾扈特郡王車凌德勒克之妻。於九月初一日病故等語。前車凌德勒克之母病故時。朕念車凌德勒克內附以來。感激朕恩。實心奮勉。特加恩賞銀三百兩治喪。並派格琿額前往祭奠。今伊妻病故。亦著加恩賞銀一百兩治喪。仍派格琿額齎茶酒往伊游牧賜奠。車凌德勒克母故未幾。又值妻故。必加悲悼。格琿額到彼時。傳諭恩旨。勿令過悲。宜善自調攝。以期

効力。○諭軍機大臣曰。國泰奏拏獲逆犯王倫案內之王振江。審擬斬決一摺。已批三法司覈擬速奏矣。此等逆犯。固宜留心緝獲。不容漏網。但尚非王倫案內要犯。如歸太。劉煥。可比。據訊明。王振江久經外出傭工。今秋始回家探望。即被拏獲。可見此等匪犯。先因本地查拏緊急。遠颺避匿。迨日久事平。以原籍未必挨查。潛回鄉里。乃情理必然之事。則歸太。劉煥等。或因病事隔數載。本省躡緝稍疎。

亦思潛回匿跡。正未可定。著傳諭國泰密飭所屬。設法躡訪。務獲。毋使要犯久逃顯戮。○刑部議覆湖北巡撫陳輝祖奏稱。已東縣民何興。同伊父何文亮與胞伯何文魁。爭種公地。共毆何文魁身死。何興依律擬斬立決。何文亮擬徒。查卑幼共毆期親尊長至死者。無分首從。應將何文亮。何興均擬斬立決。得旨。刑部覈覆湖北省具題何興。同父何文亮共毆期親尊長至死。均改為擬斬立決一疏。所

改甚是。此案何文亮毆傷胞兄至死與毆死胞伯事關服制厥罪惟均。但因一命而令其父子兩人俱立寘重辟未免可憫。何與即處斬。何文亮著改為應斬監候秋後處決。並交刑部存記。明年秋審入於情實有關服制冊內聲明。請旨至該撫陳輝祖審擬時。豈不知律有毆死期親尊長不分首從之條。乃於何與則照毆死律擬抵。何文亮僅照毆傷律擬徒一事。而兩引實屬舛誤。即或該撫因不忍其父子二人俱死。欲為求生。亦應照律擬罪具題。另行專摺入奏。候朕酌量加恩。豈有不守律文率行分別誤擬之理。陳輝祖著明白回奏。○調刑部侍郎王杰為吏部侍郎。實授錢汝誠為刑部侍郎。○調鑲黃旗漢軍副都統果星阿為正黃旗滿洲副都統。以西藏辦事大臣副都統銜恒秀為鑲黃旗漢軍副都統。以鑲黃旗滿洲副都統舒亮為鑲藍旗護軍統領。○辛丑。

上御懋勤殿。勾到四川廣西情實罪犯。停決四川斬犯五人。絞犯十二人。廣西斬犯三人。絞犯三人。餘七十六人。予勾。○諭吏部議請將從六品之州同以及布政司經歷理問等官。概不准其題陞知縣一摺。該部因從前疏通舉人案內未經議及州同等官。不得復占知縣員缺。因有此奏。自應如所議行。但此等人員內或有才猷出眾。在該省閱歷年多。若借補知縣。較部選新任人員於地方公務似有裨益。而才堪造就之員。若限於成例。概致積薪。亦未免可惜。嗣後著各督撫於此等人員留心察看。如有才具果優。堪膺民社。而其人其地實在必需者。准其據實聲敘。專摺奏請。候朕酌量降旨。○又諭刑部彙題議結細事一本。內稱降調順天府治中鄒瑛將他人換照實收私押銀兩。並侵用換照銀二十兩。殊屬不合。咨吏部照例議處等語。所辦非是。鄒瑛身為職官。乃將他人換照實收。私自押銀。

侵用。即屬有玷官箴。該部何得僅稱為不合。豈以此等彙題案件。朕未必寓目。遂爾意存含混。不知朕於每日所進本章。無不披覽。豈司官所能高下其手耶。姜晟在刑部。素稱能員。何亦如此。此案鄒瑛著該部照有玷官箴例。嚴加議處。所有承辦此案之刑部司員著交部嚴加議處。刑部堂官並著交部察議。○兵部議覆大學士管雲貴總督李侍堯奏稱。茂通地方自設普安營。弁兵瘴故甚多。奏准撤去。查原立駐防時。設都司一。守備一千。總二。把總四。外委千。把六。馬步戰守兵五百名。今既裁去駐防。除都司一員毋庸復設外。其景蒙營撥來之守備一千。總一把。總二。外委千。總一。外委把總二。兵二百八十四名。請徹回景蒙本營。景蒙自兵弁分撥普安後。原設叅將改為都司。今兵復前額。請裁都司。改設遊擊。以資彈壓。缺由部推。元江營原撥兵二百一十六名。即撥添普洱鎮右營。思茅新城

駐防交遊擊管轄。以壯邊營。尚餘普安營千總一把。總二。外委三。均請裁汰。現任各弁留省。遇缺輪補。應如所奏。其改設撥回各員弁。即令咨部換給關防。劉付從之。○壬寅諭軍機大臣等。據陳輝祖奏。到屬員賢否。摺內稱衡州府知府黃樹堂。接見二次。應對遲緩。胸次似欠開爽。到任後。現辦事件。尚係率常循分。容留心再看。等語。知府有整飭地方表率屬員之責。黃樹堂性既遲緩。且欠開爽。於知府自不相宜。該員到任已七八月。能否畧加練習。若仍不過率常循分。即不便姑容。貽誤著該撫即速查明。據實具奏。毋得稍存姑息。至賢否摺列及佐貳州縣等官。必其人尚堪造就。成材以備簡用。如漢陽府同知顧駟。該撫稱其才識明達。辦事勤敏。將來遇有府缺。或可擢任。若通省知縣甚多。豈能徧列。今長沙縣知縣范元琳。該撫稱其才質遲鈍。而罷免供職。尚無貽誤。是該縣於長沙首邑。尚恐

非宜。將來未必可至府道。因何列入此摺。著陳輝祖一併據實奏覆。將此遇便諭令知之。○命刑部尚書德福在紫禁城內騎馬。○癸卯。

上御懋勤殿。勾到廣東福建奉天情實罪犯。停決廣東斬犯七人。絞犯一人。福建斬犯十一人。絞犯一人。奉天斬犯一人。絞犯四人。餘八十七人。予勾。○諭湖北省江陵監利二縣本年因秋水泛漲。其最低垸田間有被浸處。所

雖該撫等查明疏消補種。俱秋成有望。不致成災。第念該處垸田。俟水退後補種。收穫收成。究未免歉薄。所有江陵監利二縣被水補種。歉收各垸田。本年下半年錢糧著加恩緩至次年麥熟後徵收。以示體恤貧民之至意。該部即遵諭行。○又諭據明亮等奏前因郭羅克賊番殺害青海公禮塔爾一案。尚有兇犯未獲。將該土司瑪克蘇爾袞布扣留內地。令伊弟索朗勒爾務實力緝。免令該土司因

不服水土患病身故。恐伊弟等聞知。急於緝犯。是以暫未諭知。以期速獲等語。所辦非是。瑪克蘇爾袞布羈留灌縣地方。距該土司住寨不遠。既經患病。即當就近遣令歸巢。迨其已死。更應將其身屍發還。查明應襲之人。令其襲職。方合正理。乃明亮等意欲匿不令知。殊失撫馭番夷之道。郭羅克賊番殺害禮塔爾一案。業經拏獲數犯正法。且土司瑪克蘇爾袞布扣留內地。已將四月。今又病故。亦足以償禮塔爾之命。所有未獲兇犯。即可毋庸勒緝。原派督緝之官弁等。俱著撤回。朕辦理庶務。惟以光明正大為主。即待邊圉番人。亦示以至誠。不肯稍存歧視。明亮文綬桂林及松茂道查禮所辦殊屬錯謬。俱著交部議處。其郭羅克土司即著瑪克蘇爾袞布之子承襲。仍令明亮等將此旨曉諭該番。○諭軍機大臣等。瑪克蘇爾袞布留居灌縣。與查禮所駐之地甚近。該土司因不服水土患病時查

禮如果曉事。即當一面稟知將軍總督。一面將該土司遣回調理。即不然。亦當將該土司患病情形。及早稟知明亮等。聽其查辦。則查禮尚可照常議處。若前此並未具稟。直至該土司病故。始行稟報。則查禮之獲咎甚重。不當僅照明亮等議處矣。著明亮等。即速據實奏覆。候朕另降諭旨。毋稍袒庇。隱飾。自干罪戾。將此由五百里傳諭知之。尋奏查瑪克蘇爾衮布七月內染病。經查禮稟已就痊。復據稟該土司於九月間患病。當飭上緊調理。旋於二十日病故。臣等辦理失宜。實不敢隱庇推諉。得旨覽爾等三人尚為曉事者。如此辦理夷情。足見前明漢官之辨邊情。令人訕笑也。甚為爾等愧之。○予故戶部尚書果毅繼勇公豐昇額祭葬如例。謚誠武。○旌表守正被戕浙江臨海縣民蘇仲光妻陳氏。○甲辰諭八旗承襲佐領世職。其應襲之人。若在外省駐防者。俱調取來京引見。後經降旨。令將

此等人員。於請旨後。再行調取。但伊等有在駐防地方立有產業者。或亦不願來京。著交八旗都統等。嗣後將應襲佐領世職之人。於具奏後。即行文該處大臣。問伊本人情願來京與否。除願來者。仍行調取外。若不願來京者。即不必調取。著為令。○又諭理藩院。奏據齊巴克多爾濟呈稱。現襲伊父親王之爵。所有從前賞戴花翎。應否照常戴用。請旨等語。蒙古王貝勒等。未經襲職之前。因係台吉塔布囊。前往木蘭行圍。經朕賞戴花翎。雖係朕恩。而伊等承襲王貝勒貝子後。其從前賞戴之單眼花翎。轉於職任未稱。自應不必戴用。嗣後伊等所襲之職。與從前所賞花翎相稱。即著照常戴用。若襲職較大。不當戴用單眼花翎者。不必戴用。伊等於木蘭行圍。果能奮勉。朕即按照職銜。賞戴雙眼花翎。齊巴克多爾濟。即照此例行。○諭軍機大臣等。據薩載奏。黃運湖河情形一摺。已於摺內批示矣。閱

進到新舊兩圖舊圖順黃壩外已有停淤故大溜趨北及閱新繪之圖則河流直抵壩根嫩灘所存無幾自係河勢向南畧逼刷去停淤前此朕命添築順黃壩薩載在京時意尚以為可以不辦朕為之詳悉指示始遵照辦理就現在情形而論若非此壩為重門保障河流之南逼者不且直到攔黃壩根乎又閱新圖河北岸長有嫩淤一帶北淤則流必南趨乃一定之理因於其處用硃筆標記急宜將此一帶嫩灘切去使其不復停淤則南岸新添之木龍挑溜自更得刀河流必日漸北趨不復搜刷壩根新河正溜亦益當暢順實為目下最要機宜著傳諭高晉薩載及此時即速實力遵辦以期妥善仍將辦後情形若何迅速覆奏著將硃批兩圖發往由五百里傳諭知之尋奏陶莊新河北岸新漲淤灘急應挑切但挑挖嫩淤甚難著足且旋切旋淤恐難盡刷擬於裏身抽挑引渠河頭酌築土

格俟來年汛發與下截溝槽一併開放引溜北趨匯歸新河并於南岸添紮木龍一架將陞關挺入河心使挑溜得刀刷盡北岸淤灘而南岸順黃壩外亦漸次停淤以資外護新河正溜必更加暢順得旨覽奏稍慰如所議行○又諭戶部奏駁川省報銷軍需餘丁口糧違例給以本色米石未便准銷應令該大臣等詳查情節明白回奏一摺已依議行矣餘丁口糧前據劉東恬等會奏條款內定以每石折銀六兩經戶部覈覆奏准是餘丁在營並無支給本色之例即應照伊等原奏覈辦乃二百一二百四二百十二百十八等四案應付陝甘餘丁復請銷本色米石又據何例若云陝甘所帶餘丁俱實有其人比他省不同應以本色支給該大臣等從前即應專摺奏聞或咨戶部存案今至報銷時以無案可據之項支銷無怪該部之指駁也至滇黔湖廣三省綠營兵丁因各該省未及募帶餘

丁辦夫又屬竭蹶。前經文綬等奏明。照每兵百名。額給餘丁三十名之數。將鹽菜口糧折價支給。並據富勒渾奏。於到營之日。即照折支。此更係該督等自行奏定之例。何以二百二。三。及二百十三。十六等案。仍支給本色米石。更屬違例妄支。且現據該大臣等題到二百七案。又復按奏准例。折銀六兩。是同一餘丁同一支給。而前後自相矛盾。尤不可解。著傳諭富勒渾等。即將戶部摺內指駁各情節。

逐一登答。仍即明白回奏。至此項支放米石。應由該辦糧大臣等覈定。飭知各站遵辦。不得諉其過於糧員。所有此項浮銷銀兩。查明共應覈減若干。即著落大臣等名下。按數攤賠。以為辦理不善者戒。毋庸攤及糧員。將此由四百里諭令知之。戶部摺並鈔寄閱看。○以翰林院侍讀徐光文。為順天武鄉試正考官。編修劉涓。為副考官。○旌表守正捐軀河南禹州民張路。工女張氏。○乙巳諭陝西咸

寧等二十九廳州縣。本年因七月內雨澤缺少。秋禾間有被旱之處。雖據該撫查明歉收處所。本屬無多。無須蠲賑。第念此等被旱地畝。在各州縣中。雖屬一隅。偏災但究係歉收。且距明歲麥秋尚遠。民食未免拮据。著加恩將咸寧等二十九廳州縣內所有收成四五分各戶。查明實係無力貧民。在於常平倉內。極貧者借給兩個月口糧。次貧者借給一個月口糧。以資口食。至二十九廳州縣境內歉

收地畝。應完錢糧。及借欠倉糧。例應緩徵。其並未歉收之處。與災地間段毗連。若仍照例徵收。恐糧價稍昂。貧民艱於糴食。並著加恩將此二十九廳州縣所有本年應徵未完錢糧。及各年借欠倉糧。俱緩至來年麥熟後徵收。以示軫惠窮黎之至意。該部即遵諭行。○又諭前經降旨。普免直省地丁錢糧。其額徵本色糧草等項。本不在應免之例。上屆輪蠲陝西。因該省地近邊陲。曾降旨將此項糧草。

一體加恩蠲免。今乾隆四十三年。屆陝省輸蠲年分。所有該省額徵民屯租糧草束等項。著仍照上屆之例。同地丁錢糧。一併蠲免。以昭優卹。邊氓至意。該部即遵諭行。○又諭。甘肅肅州鎮總兵員缺緊要。著該督於通省總兵內揀選一員調補。所遺員缺。著周鼎補授。○諭軍機大臣等。據慶桂奏。四十一年分塔爾巴哈台銷算事件各摺。已逐一批交該部議奏。前此各處有奏到者。亦一例批交矣。此

等請銷案件。令各該管之將軍大臣等具摺奏辦。無庸轉行總督覈題。原欲使各該處辦理簡便。乃各該處分款具摺。每奏多至四五件。轉不免煩瑣。嗣後著各該將軍大臣等。將應行奏銷各案事由。總敘一摺。其各款止須分別四柱清單。一併進呈。以便交該部彙覈。將此傳諭新疆辦事各大臣一體遵照。並諭令戶部知之。○以陝西漢興道宋豐綏為陝西按察使。○丙午。諭軍機大臣曰。戶部議駁

劉東恬等奏銷雇驛運送米石。前經戶部奏駁。降旨令劉東恬等明白回奏。今據覆奏各情節。經戶部逐一指駁。頗為得理。似伊等竟復難於登答也。如所稱此項驛頭原係各州縣雇覓解往。並非供備商人之用。其間往來駁運。自應較商運節省。乃以商運之米。即用官雇之驛。又云不多給價值。勢將棄置不前。則是各州縣雇解紛繁。該大臣等之多方籌畫。徒以遂商人謀利之圖。並非為軍糧起見。設或從前辦理軍糈。實有不得不通融遷就之處。何不隨時奏明。直至報銷議駁之後。始行辯說。又復不協情理。實不能為伊等曲解也。又如鄂寶所奏。辦驛二千。僅一載餘。已多倒斃。存者亦疲瘦不堪。變價時既未先行奏聞。所變價值若干。又未咨部存案。迨經部駁。始稱現已勒限變價。其何日起限。現在曾否追完。亦未一字議及。實不應如此舛謬。據大學士阿桂面奏云。伊等此案雇用驛頭牽混

之故。大約因鄂寶奏辦之驟率多倒斃。難以開銷。遂將此項雇價通融銷報等語。果爾。何妨將鄂寶從前奏辦錯誤之處。據實奏明。鄂寶自認照原價賠還。方屬正辦。且鄂寶久任巡撫。今又授以漕運總督。認賠原驟價。展限緩交。非力所不能。乃舍此不辦。轉於別款雇驟價值。牽混報銷。非特鄂寶之意存欺飾。自取罪愆。即富勒渾。劉東恬等代為影射。朦混亦難辭咎矣。以上情節。著富勒渾。鄂寶。劉東恬。文綬等。明白回奏。並將戶部原摺。朕折角處。發令閱看。俟伊等回奏到日。再降諭旨。○丁未。御史雷輪奏。鄉會兩試磨勘試卷。由禮部司員按名次將試卷分給磨勘官。恐不無指名索取某卷。囑託瞻徇等弊。請添派滿漢御史各一員。輪班稽察。如有前弊。據實查叅。得旨。著照所請行。

大清高宗法天隆運至誠先覺體元立極敷文奮武孝慈神聖純皇帝實錄卷之一千四十二

大清高宗法天隆運至誠先覺體元立極敷文奮武孝慈神聖純皇帝實錄卷之一千四十三

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部主事事務

世襲騎都尉軍功加十九級隨帶加二級又加二級 董誥內大臣戶部尚書鑲黃旗滿洲都統軍功紀錄次

尋常紀錄十四次臣德瑛經筵講官太子少保戶部尚書紀錄六次臣曹振鏞等奉

敕修

乾隆四十二年丁酉十月戊申

上御懋勤殿勾到陝西湖廣浙江情實罪犯停決陝西斬犯四人絞犯五人湖廣斬犯十一人絞犯七人浙江斬犯四人絞犯二人餘一百二十三人予勾。○兵部奏廣東饒平營字識黃雲聽從兵丁張剛寫匿名帖揭告彭勇等私賣火藥縱盜分款應將饒平營守備外委革職外該潮州鎮總兵馬乾宜捏稱訪聞應降二級調用得旨馬乾宜身為總兵既失察兵丁私賣火藥及得匿名揭帖又不據實

聲敘轉捏稱得自訪聞呈報該督意存欺飾不宜復邀寬免朕覈其情節應照部議處分使提鎮等共知懲儆非僅照案按例准行也馬乾宜著降二級調用。○已酉諭向來副參各員每屆五年該督等分別一二等密行咨部具奏一次而提鎮因係專閫大員向未之及今思各省提督不過十餘員皆朕所深知者始行擢用原無俟該督之甄覈至總兵員缺為數甚多間有經朕特加簡用之員其餘或因副參等於保送引見時酌量記名陞用亦有因軍營勞績及資俸稍深從而陞補者其人之才具優劣及在任管轄操防是否於營伍有益皆無由深悉嗣後著各該督將所屬總兵亦照副參之例出具切實考語分別等次每屆五年密為陳奏一次即以今歲為始其無總督省分即著兼提督之巡撫遵照辦理務宜一秉至公毋稍瞻徇。○又諭從前戡定回疆定貢賦之時各城伯克均無納糧

之例。惟因庫車地當孔道。差務殷繁。而回人戶口有限。是以庫車沙雅爾二城伯克俱令各按品級一律納糧。數年以來。應納糧米絕無拖欠。而每遇官差爭先奮勉。毫無退避。自應一體加恩。所有庫車沙雅爾二城伯克等亦著照各城伯克一體免其納糧。並令常喜將朕加恩之處。傳諭衆伯克等知之。諭軍機大臣等。據李侍堯奏滇省遷徙烏魯木齊土夷起解時。照發遣礦徒之例。將男丁概行上鎖。茲據顏希深咨稱。頭二三起夷戶先後到境。俱極安靜。惟無鎖鍊與滇省原行不符。當即行查。藩臬等詳覆。當日實係按名上鎖。經署昆明縣知縣徐沅連鎖匙點交委員查收。該委員等私擅開放。未便稍為寬貸。現將委員陳英棟等審明治罪。並咨明前途。即於所在地方。將該三起夷戶補行上鎖等語。該夷人等在雲南起解時。既按名上鎖。并經昆明縣將鎖匙點交解員。乃行至湖南。已無鎖

鍊。必係解員等中途擅開。自應查明辦理。但此等土夷俱係投誠之衆。本屬無罪。非前此竄回礦徒可比。今分別安插新疆。原可無庸鎖項。而伊等在途行走安靜。尚知守法。并當稍為憐惜。且從前鎖解礦徒。未嘗無沿途免脫之事。可見押解人犯。惟在解員等嚴為防範。自不致有疎虞。並不係乎鎖與不鎖也。今前途既已無鎖。即不應復加所過地方官。接到滇省傳知。毋庸補行鎖項。若接文在前。已

經照辦。即傳朕此旨。將鎖開去。俾伊等知朕體恤遠夷之意。將此傳諭湖廣至甘肅督撫妥辦。併諭李侍堯知之。○又諭據戶部奏查覈淮安關本年徵收贏餘銀數一摺。已依議行矣。淮關贏餘近年屢有短少。自伊齡阿復任監督以來。所收數目較之上三屆為多。自屬伊齡阿認真辦理。但據戶部夾片聲明。自乾隆二十五年以來。其不及二十萬兩。僅有三年。而多至二十四五萬。至三十二萬兩者。

共有十年。今年所收之數。雖較上三屆為多。究不得作為贏餘較多之準。請令該監督悉心經理。實力稽查。勿使吏役徵多報少。不得以此次即為定額等語。該部亦因慎重課項起見。該監督亦不可不知。著傳諭伊齡阿嗣後更當實心妥辦。毋以此次贏餘較上屆為多。稍生懈怠。○庚戌諭曰。楊景素奏查訊陸豐縣民鄭會通周維玉挾嫌捏造匿名揭帖。希圖傾陷一摺。已批交三法司覈擬速奏矣。

該逆犯等因懷挾私嫌。敢將謀逆重情。匿名誣陷至一百餘人之多。情罪甚為可惡。自應按律問擬。至其中應行緣坐人犯內。如鄭會寅鄭會禮鄭會衷鄭阿拱鄭阿果。即係該逆犯挾嫌誣控之人。今其事幸得昭雪。而轉以其逆犯弟兄之故。一一罹於重辟。是該逆犯雖身膺顯戮。而其意中所本欲傾誣者。亦不能免。俾無賴之徒。竟得拚一死以遂其所願。未為平允。且該逆犯既忍以大逆誣其弟兄。

則其蔑視天顯恩義早絕。更何必因其誼屬期親。概從緣坐乎。雖此等緣坐人犯。朕每從寬改為秋後處決。秋審情實冊內。亦不予勾。但定例遲至十年然後可入緩決。以次減等。亦復可憫。此案除逆犯鄭會通之妻子仍照大逆緣坐律定擬外。其本被該逆犯傾陷之鄭會寅等著與訊明之無干人衆一併省釋。俾悖逆奸徒知害人適以自害。無所施其傾陷伎倆。庶刁惡之風。可以稍戢。三法司即遵照覈辦。並通諭中外知之。○以閩浙督標中軍副將和忠為廣東潮州鎮總兵。○辛亥諭軍機大臣等。本年夏秋兩暘時。若京畿及各直省收成俱屬豐稔。惟甘肅皋蘭等三十二廳州縣。夏秋被旱成災。屢經降旨。令該督統率各屬切實查勘。妥協賑卹。災黎自可不致失所。但恐明春正賑已畢。尚屆青黃不接之時。民食不無拮据。是否尚須加賑。以資接濟。著該督即行妥酌覆奏。候朕於新正降旨再

江蘇安東等三縣衛窪地被水。雖係一隅偏災。業據該撫題報分別給賑。明春是否尚應量予加恩。或酌借口糧牛具之處。亦著該撫查明覆奏。候朕酌量降旨。此旨甘肅由五百里發往。江蘇由三百里發往。仍各按原發里數。由驛覆奏。尋勒爾謹奏。臯蘭等三十二廳州縣遵辦賑卹。民已不致失所。茲又加酌覈惟臯蘭渭源安定會寧平番涇州平涼七州縣被旱情形畧重。明春正賑畢時。民食尚艱。接濟得旨。屆時有旨。楊魁奏。安東臯寧大河三縣衛窪地微災。已蒙蠲賑。隨奉恩旨再查。明春酌借口糧牛具足資耕作。得旨覽。又批。如此則不必特頒諭旨。爾等酌辦可也。○以故郭爾羅斯扎薩克鎮國公錫喇博第子固魯扎布襲爵。○予故郭爾多斯扎薩克固山貝子納木扎勒多爾濟郭爾羅斯固山額駙蘇瑪第致祭如例。○壬子。

決江西斬犯三人。絞犯三人。安徽斬犯一人。絞犯二人。江蘇斬犯四人。絞犯二人。餘七十一人。予勾。軍機大臣等議覆。陞任浙江巡撫三寶奏稱杭州乍浦駐防滿洲官員所住官房如年久損壞。請照地方官修理衙署例。按品借給銀兩修理。協領借給二百四十兩。佐領二百兩。防禦一百六十兩。驍騎校一百二十兩。筆帖式八十兩。於各員俸銀內分作八年扣還。應如所奏。嗣後各駐防官房年久損壞者。該管將軍大臣等查實報部。按品借給銀兩修理。工竣覈銷。其先借之項未經扣清。不准復借。應飭各省駐防一體遵辦。從之。○癸丑諭曰。三寶陞任總督。已在本年恩詔之後。例應照巡撫銜請封。念其平日辦事尚屬認真。著加恩賞給總督封典。○諭軍機大臣曰。海成奏據新昌縣民王瀧南呈首舉人王錫係刪改康熙字典。另刻字貫。實為狂妄不法。請革去舉人。以便審擬等因。一摺。朕初

閱以為不過尋常狂誕之徒妄行著書立說自有應得之罪已批交大學士九卿議奏矣及閱其進到之書第一本序文後凡例竟有一篇將

聖祖

世宗廟諱及朕御名字樣開列深堪髮指此實大逆不法為從來未有之事罪不容誅即應照大逆律問擬以申國法而快人心乃海成僅請革去舉人審擬實大錯謬是何言耶海成既辨此事豈有原書竟未寓目率憑庸陋幕友隨意黏簽不復親自檢閱之理況此篇乃書前第十頁開卷即見海成豈雙眼無珠茫然不見耶抑見之而毫不為異視為漠然耶所謂人臣尊君敬上之心安在而於亂臣賊子人人得而誅之之義又安在國家簡用督撫厚給廉俸豈專令其養尊處優一切委之劣幕并此等大案亦漫不經意朝廷又安藉此輩尸位持祿之人乎海成實屬天良盡

昧負朕委任之恩著傳旨嚴行申飭至王錫侯身為舉人乃敢狂悖若此必係久困潦倒習多牢騷故吐露於筆墨其平時所作詩文尚不知作何訛謗此等悖逆之徒為

天地所不容故使其自行敗露不可不因此徹底嚴查一併明正其罪著海成即速親身馳往該犯家內詳悉搜查將所有不法書籍字跡即行封固進呈若再不詳查或有隱飾是與大逆同黨矣一面選派妥幹大員將該犯

王錫侯迅速鎖押解京交刑部嚴審治罪務於十一月內解到其犯屬應行緣坐之人亦著查明委員分起解京仍飭該員等沿途小心管押防範如途中或有疎虞致令自戕及免脫等事恐海成不能當其罪也至書中所載有參閱姓氏自係出資幫助鐫刻之人概可免其深究朕於諸事不為已甚此亦一端也至所有書版及已經刷印成帙者並著查明解京銷燬並恐此書或有流傳各省者著各

督撫留心訪查。如有此書刷印本及翻刻板片。均著即行解京銷燬。將此由六百里傳諭海成。并於各督撫奏事之便。諭令知之。○旌表守正捐軀廣東和平縣民陳再珩妻葉氏。

○甲寅。

上御乾清門聽政。○調刑部侍郎雅德為工部侍郎。以刑部員外郎喀寧阿為刑部侍郎。○以原任順天府府尹劉純煒為光祿寺卿。○以吏部侍郎王杰充四庫全書館三通館副

總裁。○以故多羅淳郡王弘暉子永鋆襲封貝勒。○乙卯。諭軍機大臣等。據弘昫奏盛京神杆石座漸至朽壞。神杆年雖久遠。不可輕易。石座中安放神杆處。雖少有朽壞。或接或補。將杆斗裂處。畧為修理完全。石座雖舊。亦無關礙。惟宜將破損處修補。無庸改作。著傳諭德保與弘昫會同查勘。若杆斗石座尚屬可用。即無庸修補。若朽壞過甚。即遵旨敬謹修理。毋得輕易改作。此時德保若已起程。至

二三站。接到此旨。即回盛京會同弘昫辦理。○又諭朕前至盛京。見宮殿內均置桌案筆硯等物。今已年久。恐不適用。德保尚屬諳練。著伊查看。或有應添應換之項。著明白記載。俟其回京時。再行選擇發往添換。著傳諭德保遵照辦理。○諭軍機大臣等。昨惠潮嘉道劉世寧請訓時。朕見其不過中才。且前在惠潮嘉道任內。係告終養回籍。似不免有所規避。因其原係李侍堯屬員。是以傳旨詢問。今

據李侍堯覆奏。該員才具中平。與之議論公務。不過隨聲附和。無所短長。遇事亦毫無決斷。因屢加教誡。該員情不自安。遂請終養等語。果不出朕之所料。此等中平才具。於監司恐非所宜。著傳諭楊景素、李質穎留心察看。該員到任後。如仍前拘謹游移。於道員不能勝任。即行據實覆奏。毋稍瞻徇。李侍堯摺並著鈔寄閱看。○又諭昨海成奏逆犯王錫侯妄作字貫一書。僅請革審。其書內大不法之

處並未查出。錯謬已極。實為味盡天良。隨即傳旨嚴行申飭。並諭令各省督撫查明。如有此書。及翻刻版片。即行解京銷燬矣。因查海成節次奏繳應燬各書單內。並無此書。朕令各督撫查辦。應行銷燬書籍。原因書內或有悖理狂誕者。不可存留於世。以除邪說。而正人心。是以舊人著作。尚且應查。豈有現在刊行者。轉置不問之理。況逆犯所刊字貫。悖逆不法之處。顯而易見。何以海成查辦各書時。並不早為查出。及至為人首告。始行具奏。可見海成從前查辦應燬書籍。原不過以空言塞責。並未切實檢查。且摺內尚稱其書並無悖逆之詞。是海成視大逆為泛常。全不知有尊君親上之義。天良漸滅殆盡。著再傳諭嚴行申飭。仍將此案。遵奉昨降諭旨。實力速辦。毋再稍存欺飾。更干重戾。將此由五百里發往。並此外恐有流傳他省。應一併查繳銷燬之處。並遇便諭令各督撫知之。○理藩院奏

額敏和卓郡王爵。應令伊子降等承襲。得旨。額敏和卓郡王爵。雖應降等承襲。但額敏和卓前在軍營。甚為出力。著加恩令伊子素賚瑞。仍襲郡王。○丙辰。

上御懋勤殿。勾到河南山東情實罪犯。停決河南斬犯十人。絞犯五人。山東斬犯二人。絞犯三人。餘八十七人。予勾。○諭上年因長淮衛宿州。一幫漕船。在洪澤湖漂沒二十五隻。丁力疲乏。購造無貲。曾降旨加恩。於道庫賞借銀一萬兩。給發各船。購料趕造。分作五年歸款。第念各該丁等。辦運歲需費用。若扣項稍多。丁力未免拮据。著再加恩。於原定五年之限。加展三年。俾丁力寬紓。以示體卹。○丁巳。賑卹江蘇阜寧安東大河三縣。衛本年水災貧民。並予緩徵。○旌表守正捐軀江蘇丹徒縣民張永敦妻刁氏。○戊午。諭前經海成奏王錫侯妄作字貫一書。請革去舉人審擬等語。朕閱其進到之書。第一本凡例。竟有一篇

將

先師孔子諱

聖祖

世宗廟諱及朕御名字樣全行排列實屬大逆不法已諭令海成將該犯王錫侯拏解來京交刑部嚴審治罪矣

廟諱御名凡為臣子者皆所敬悉至

先師孔子之諱尤眾所共知何至遍為告語乃該犯膽敢逐一羅列筆之於書實係有心顯斥反明列

先師之諱於前以遁其蹟此非大逆不道而何其妄作字貫駁書之罪轉不足論矣況此篇係序文後之凡例開卷即見海成豈得諉為不知乃摺內尚稱其無悖逆之詞是真視大逆為泛常全不知有尊君親上之義實屬昧盡天良海成著交部嚴加議處○已未諭軍機大臣等據伊勒圖奏該處剋鉛遣犯裴老五劉三魁於本年九月脫逃已逾二旬尚

未拏獲現在嚴飭查拏等語已交軍機處照

例行文各犯原籍及經過省分查緝矣此等遣犯在配脫逃自係潛回原籍否或沿途逗留希圖匿跡倖免乃節年行文查緝以來經各省拏獲奏報者甚屬寥寥可見各省督撫於此等查拏遣犯全然不以為事所謂派役嚴緝者亦不過以空言塞責毫無實際著傳諭各督撫即行查明此等脫逃遣犯共有若干務宜嚴飭所屬選派兵役實力嚴緝務獲毋得視為海捕具文仍將有無弋獲之處附便覆奏○旌表守正捐軀四川蒼溪縣民薛登俊妻戴氏○庚申

上御懋勤殿勾到山西直隸情實罪犯停決直隸斬犯二人絞犯十人餘七十五人予勾○設密雲縣駐防諭現在八旗滿洲生齒日繁若不稍為酌辦伊等生計日蹙密雲縣地方密邇畿輔彼處城邑亦大儘可建蓋兵房安插兵丁一二千名一轉移間既於新駐兵丁

有益。且京城出有多缺。又可補挑閒散壯丁。於八旗滿洲等。大有裨益。著軍機大臣。於八旗滿洲兵內。挑選二千名。派往密雲縣駐防。至於管轄此項兵丁。著設副都統一員。其如何建蓋兵房。料理起程。並設立官員。以及到彼如何安插之處。著即行妥議具奏。尋議奏。請照張家口之例。於兩旗合設協領一。每旗佐領二。防禦二。驍騎校二。住房協領十六間。佐領十五間。防禦十二間。驍騎校八間。兵每人二間。並副都統衙門。兩翼辦公所。及演武廳。一切房屋。共計五千餘間。應令直隸總督。派員赴密雲。詳度地勢。修葺再張家口。因駐兵設理事同知一員。今密雲亦應仿辦。查古北口理事同知。與密雲相隔較近。或即令兼管。或另設。並各官餉米如何支放。統令直隸總督詳查議奏。從之。○又諭京城兵丁。每三年舉行軍政。技藝較優者。列為頭等。賞給銀兩。劣者革退。所以示懲勸也。獨健銳營外火

器營圓明園兵丁。並無考驗之例。嗣後著將健銳營外火器營圓明園兵丁。亦照京城兵丁舉行軍政。派出王大臣考驗。一體辦理。○又諭據曹學閔奏。磨勘試卷詩內。間有平仄失粘。例應罰科。大抵北五省及雲貴小省之人。居多。請將一二字偶然失粘者。姑免置議。一摺。所見亦是。北省及邊省士人。語音限於風土。試帖內。平仄未能悉叶。自所不免。若因此即行停科。致伊等往返徒勞。情亦可憫。但試帖著於功令。且詩韻具在。士子如果留心學習。斷無終於不能之理。曹學閔僅將本科免議。尚恐未能遽改。著從寬予以十科之限。令此等省分科舉之人。於聲韻加意講求。以期通曉。俟十科後。仍有失粘者。照大省一體停科。計十科已閱三十年之久。如此寬其程限。若再不能改。則是伊等故違功令。終於不學。其處分實所自取。不能復為之原諒。加恩矣。將此通諭知之。○辛酉。都察院奏已革浙

江歸安縣縣丞孔鵬呈控知縣劉均浮收折色縱令蠹書於災賑案內舞弊得旨此案著派尚書袁守侗馳驛前往秉公查審具奏○又奏四川大足縣民黃玉芳呈控知縣趙憲高與管櫃紳約侵蝕津帖銀錢得旨此案著派侍郎周煌阿揚阿馳驛前往秉公查審具奏○壬戌

上詣

奉先殿

壽皇殿行禮○諭據薩載奏俸滿之淮揚道松齡保列一等之河營叅將李永吉現委查辦淮揚運河事宜俟工竣後於來春再行送部引見等語著照所請行至所稱河標中營副將徐建功年逾七旬自請休致但察其精力未衰且一切河務均屬諳練實為河工得力之人仍請將該員留任其上年保列一等之處請勅部註銷等語徐建功在工年久熟悉河務事宜係朕素知之人本年辦理陶莊引

河壩工亦甚為出力著仍留河標副將之任並加恩賞給總兵銜以示獎勵毋庸送部引見○又諭曰國泰奏嶧縣知縣吳濬詳報該縣界溝地方有私販九人各推鹽車一輛拒捕傷斃巡役仍推車而逸查緝無蹤密委中軍叅將飛赴該處督緝務獲並確查實在情形據叅將稟稱訪得私鹽小車四十餘輛鹽犯四十九人由龐家渡過河回南已獲夥犯二人俱係江南邳州人並據兗州府知府稟稱審訊所獲夥犯實係四十九人各犯往南逃走該縣因往西北追捕致被逃逸俟查明再行叅奏等語鹽梟如此結夥橫行可見該縣平日於地方事務漫無經理且犯已往南逃該縣不即詢察明確轉向北追捕致令遠颺實屬無能溺職又以四十餘犯捏報九人更屬欺飾吳濬著即革職留於該處協緝嶧縣為水陸要衝又常有鹽梟出沒員缺緊要著該護撫於通省知縣內揀選一員調補

諭軍機大臣曰。薩載奏請留河標副將徐建功一摺。現已另降諭旨矣。徐建功在工年久。熟悉河防事宜。甚為得力。係朕素知之人。今雖年逾七旬。其精力尚未衰頹。儘堪任用。且河營非陸路可比。所重在諳曉修防。而不在乎人材壯健。徐建功自應仍留河標副將之任。毋庸送部引見。至今年挑濬陶莊引河時。所築攔黃壩。未必不出於徐建功之意。薩載因此事實心奮勉。業已加恩賞給世職。徐建功亦當量予施恩。因賞給總兵銜。示獎河工。文武聞知。諒必衆心悅服也。至薩載請將徐建功留任。本屬應辦之事。即或因其年齒已衰。恐引見時。奏對或有不便。何妨據實直陳。乃云該副將自請休致。又稱其精力尚健。步履亦甚便利。若遽准其乞休。未免以一熟手。又請將保列一等之處。勅部註銷。委曲其辭。閱之轉不明晰。未免稍染外任習氣。薩載係實心任事之人。後勿復爾。將此諭令知之。

又諭曰。徐績奏稱。接據閩鄉縣稟報。遷徙烏嚕木齊土夷。未起到境。當即會同押解員弁。向土夷等宣傳諭旨。開放鎖鍊。該土夷等無不歡呼感激等語。自應如此辦理。此等土夷。本屬無罪之人。原可不必鎖項。前因李侍堯有咨明前途補行上鎖之奏。是以傳諭所過地方官。毋庸補鎖。即或接到滇省咨文。業經上鎖。亦即傳旨開去。今徐績接奉前旨。即行照辦。並具摺奏聞。他省奉到朕旨。作何辦理。因何尚未覆奏。且該土夷解至湖南時。尚未鎖項。又係何處復行上鎖。若係接准李侍堯咨行。補加鎖鍊。該督撫亦應隨時上聞。何以未見奏及。究係何時於何處補鎖。因何不即具奏。及接奉朕旨。作何辦理之處。並著傳諭各督撫。一體查明。據實覆奏。○又諭曰。國泰奏。嶧縣鹽梟拒捕傷差一案。該縣吳濬庸劣無能。又捏報欺飾。已降旨革職。又據稱前已奏明。同侍郎胡季堂往諸城查審控案。今嶧

縣既有鹽梟拒捕重情。若不親往督率嚴拏審辦。恐未能上緊弋獲。即前往嶧縣督拏逸犯等語。如此方是國泰。頗知事理輕重。今既親身前往。務將首夥各犯全行緝獲。重治其罪。以示懲儆。至據稱訊明現獲之夥犯李順李倫二名。俱係江南邳州人。供出有名者三十八人。不知姓名者二十一。人及孫二漢起意奪犯拒捕各等語。現獲二犯。既係邳州人。其餘各犯。又皆渡河南逸。自俱係邳州一帶

實錄卷五十三

十一

鹽徒。江南省必須實力協同嚴緝。薩載現署兩江總督印務。江蘇省係楊魁專屬地方。著傳諭薩載楊魁。速即專委幹大員前往邳州一帶。上緊查拏。并親臨督緝。務將逸犯按名弋獲。無使一人漏網。兩省所獲之犯。即各就該處審明。將應行正法者。一面辦理。一面奏聞。無庸展轉解送質訊。致有疎虞。此等鹽梟。聚集至四五十人。拒捕傷差。甚為可惡。若不盡獲嚴懲。久之必更滋蔓生事。薩載等務

須實力督辦。不可稍存畛域之見。仍將如何嚴緝及獲犯情由。迅速覆奏。○是月。河東鹽政瑞齡奏。河東池鹽自三十二年歉收以來。歷係新陳抵補。通融接濟。近蒙調劑。今歲池鹽豐收。除補足從前缺數。並配運額銷各項鹽引外。尚有盈餘鹽一千九百八十四名一百五引。至鹽池黑河工程。今春已挑挖三分之一。現飭各商集夫開挖。督催挑浚。務期及早完工。得旨。事在人為。若此後經理不善。是

實錄卷五十三

十一

誰之過耶。○陝甘總督勒爾謹奏。新疆應試文舉。均給驛馬。今科武闈。嘉峪關以外。取中武舉六名。赴京會試。計程萬餘里。長途車馬未免拮据。請嗣後嘉峪關外武舉會試者。均照文舉會試例。賞給馳驛過行。得旨。自應如此。亦無需特旨。○大學士伯管雲貴總督李侍堯奏。臣現親赴騰越。稽查出防弁兵。分撥駐劄。校織遊巡。務絕奸匪出入。使緬匪莫測內地端倪。較前倍加嚴密。聞緬匪尚用綻拉

機住老官屯。兼管木邦地方。老官屯一帶緬人傳言。蘇爾相回京時。必准開關。可以完事等語。是緬匪亦思輸誠納貢。盼望開關。總因綻拉機違衆把持。誠恐進貢開關。緬匪必將沿途用事之人徹去。所有老官屯。新街。蠻暮及木邦地方。不復歸綻拉機管理。是以慫恿緬子。將得魯蘊留住阿瓦。便伊專擅。此雖傳言。未盡虛誣。又聞緬匪每逢內地出防時。派猛拱。猛養。蠻暮三處兵。共六百名守卡。臣現令蘇爾相。在張鳳街帶兵駐守。密探動靜。隨時稟報。又南甸沙冲口。及張鳳街。係虎踞關一路總匯之所。現嚴飭弁兵。如遇關外有信星飛馳遞。相機辦理。得旨嘉獎。

實錄卷千四十三

三

大清高宗法天隆運至誠先覺體元立極敷文奮武孝慈神聖純皇帝實錄卷之一千四十三

實錄卷千四十三

三

大清高宗法天隆運至誠先覺體元立極敷文奮武孝慈神聖純皇帝實錄卷之一千四十四

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領事稽察欽奉 上諭事件處管理刑部都察院事務

世襲騎都尉軍功加十九級隨帶加二級又加二級臣董誥內大臣都察院總辦滿洲都統軍功紀錄五次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉十一月癸亥朔諭曰袁

守侗現在出差順天府事務仍著蔣賜榮暫行兼管。○諭軍機大臣等本日李侍堯等奏迤西道唐宸衡患病解任查有知府孔繼炘在滇年久辦事練達現在飭委兼護等語迤西道員缺緊要朕已簡員補放矣知府孔繼炘該督等稱其在滇年久辦事練達堪以暫委兼護似其人尚能勝任因檢閱從前李湖圖思德奏到屬員賢否單俱列該員於二等又不似實在出力之員著傳諭李侍堯裴宗

錫查明孔繼炘在任辦事是否認真其才情

識力將來能否堪勝道員之處據實覆奏並

查此外滇省知府內有無堪勝道缺之員一

併據實具奏。○又諭曰高晉奏請將武園二

場舞刀改用鳥鎗以中靶之多寡分別字號

考試一摺所奏不可行國家武鄉會試之設

原以文武制科相沿舊例不但舞刀一項全

無實際其開弓掇石又何獨不然即伊等之

騎射亦難盡期有用且向來用兵時何嘗仗

此項武舉臨陣克敵耶至鳥鎗一項原係制

勝要器而民間斷不宜演習多藏即如山東

逆匪王倫聚眾之事幸羣賊不諳放鎗易於

勦滅此顯而易見者前因民壯內有鳥鎗手

恐日久或致滋事曾諭令各督撫不動聲色

將鳥鎗改為弓箭所降諭旨甚明高晉豈遂

忘之耶若如高晉所奏武科改用鳥鎗考驗

準頭則應試之武生勢必常時習學打靶凡

應禁之火藥鉛丸俱難禁民間私相售賣且

一縣中添無數能放鳥鎗之人久而傳習漸多。於事實為有礙。高晉雖意在覈實而未計及其流弊。將無所底止。所謂知其一未知其二。高晉久任封疆。尚屬歷練曉事。何此奏不達事理。若是耶。所奏斷不可行。不必復交部議。將此諭令知之。○豁免浙江仁和場坍沒竈地課銀五百七十三兩有奇。○甲子遣官祭。

先醫之神。○兵部議奏署漕運總督德保奏稱。近年糧船每多失風之案。黃河大江閘河水大溜急。或易失事。內河並無險阻。即風暴尚可力為拯挽。乃失風案內河更多。總由押運廳弁並不實力稽查所致。且難保無奸丁捏報失風。虧折徽變。賈餘抵補情事。查失風處分運弁罰俸一年。押運廳員罰俸六個月。其一幫內失風船隻多寡並無區別。致廳弁視為無關考成。請嗣後除在大江黃河洪湖閘河內失風查無情弊者。仍照向例辦理外。

若江浙幫在鎮江口以內。江西幫在鄱陽湖以內。河南山東湖廣各幫均至臨清閘以北。或一二隻失風。亦照向例議處外。其失風至三隻以上。運弁降一級調用。廳員罰俸一年。五隻以上。運弁革職。廳員降一級留任。旗丁杖一百。枷號一個月。捏報者從重定擬。其進瓜州儀徵口至淮安均係內河。失風者亦照北河議處。至實係夏時大雨山水驟發失事至數隻者。天津南由漕臣奏明。天津北由巡漕御史會同倉場侍郎奏明。分別辦理。均應如所奏從之。○乙丑禮部議奏義夫貞女例。准請旌建坊。歷年來各省題報。義夫既不概見。貞女多係夫亡守志。循例辦理。至幼年聘定。彼此隔絕。經數十載之久。守義懷貞。各矢前盟。卒償所願者。實從來所未有。今據大學士管兩江總督高晉奏稱。山陽縣監生程允元與直隸平谷縣劉氏締姻後。隔絕五十餘年。各守前盟。終偕伉儷。事奇理正。應請旌表。

給銀共建一坊以獎節義從之○丙寅

上御懋勤殿勾到朝審情實罪犯停決斬犯四人絞犯二人餘十八人予勾○諭本日勾到朝審情實官犯內蘇爾德廣德二犯朕詳覈案情蘇爾德於黃邦寧往商秦廷基在寓自縊一事其移屍入監捏報病斃之處雖衆供謂其意出於蘇爾德但黃邦寧已死果否係蘇爾德授意無可質訊即使其說果倡於蘇爾德而蘇爾德僅係藩司事非為政黃邦寧

彼時現署臬司監獄案犯乃其專責若黃邦寧稍知持正不以所言為然蘇爾德豈能獨行已見是其罪究以黃邦寧為重黃邦寧先經正法蘇爾德尚可姑寬所謂罪疑惟輕是以未勾至廣德身為臬司原有奏事之責如以熊學鵬問擬秦廷基罪名過重即應不畫題或就所見據實上聞乃既不直情陳奏惟與熊學鵬嘵嘵辯論立意沽名及兩次傳旨詢問則妄稱當日原說該問死罪迨拏交刑

部審訊衆供確實乃吐實情仍以巧辭掩飾

其心實不可問於情理均難輕恕是以勾決案冊俱在其應決應寬之故較然不爽朕於勾到招冊必詳閱再三輕重權衡悉視其人之自取著明白宣諭使衆共曉且使凡為臬司者知法紀所在不可絲毫罔上行私如廣德之自取罪戾若心以為督撫所定案不協於理不妨據實直奏不可自居務寬之名而歸其過於督撫徒稱自不得主張自欺欺人

其孰信之將此通諭中外知之○諭軍機大臣等據伊勒圖奏稱額敏和卓病故差防禦前往致祭等語額敏和卓効力多年茲既病故朕施恩遣員賜奠方可若伊勒圖不過素與相知差人致祭以盡交誼此乃私情祇應派家人前往乃以私事擅差職官前往致祭實屬錯謬著傳旨申飭○丁卯諭軍機大臣等從前令各督撫於學政差滿時將是否不愧師儒之席及僅係循分供職或有通曉吏

治。堪勝道府兩司者。各就所見。秉公密奏。現在各督撫陸續奏到之摺。雖尚屬公當。但恐行之日久。學政等以三年報滿。其堪勝外任與否。由督撫覈舉。或有不妥。義命之人。竟因此逢迎督撫。以圖保薦。轉不免有流弊。且學政復命召見時。其人之才具見識。可否外用。皆可一一鑒別。更無藉督撫等多此一舉也。著傳諭直省督撫。嗣後學政差滿。止將其在任考試聲名。若何辦事。若何據實具奏。其能

否。勝任道府兩司之處。毋庸奏及。○又諭據富綱奏。接遞滇省遷徙烏魯木齊土夷。於九月三十日入關。陸續過省。現已經過八起。嚴飭員弁小心護解等語。前曾傳諭各省。以此項土夷在路。不必鎖項。即或接到滇省咨文。上鎖。亦著傳旨開去。昨據徐績奏。接奉前旨。於土夷未起出境時。已傳旨開鎖。其餘各省。未據奏覆。又復傳旨詢問。計土夷未起。已過河南。其餘各起。自在陝西境內頭起。或已抵

甘肅境。亦未可知。土夷等在途。究係有鎖無鎖。該督等奉到前旨。如何辦理之處。未據奏及。著傳諭畢沅。勒爾謹。即行挨站查明。據實覆奏。并諭令富綱知之。尋畢沅奏。十月二十二日。接奉諭旨。適第十起土夷過省。即行宣旨開鎖。隨飛傳東西兩路沿途各廳州縣。及滇省各起解員遵辦。已據陸續申覆。勒爾謹奏。十月二十五日。接奉諭旨。其時土夷已有六起。遞送甘省。頭起已抵省城。隨飭開鎖。沿途一體遵辦。已於十一月十八日全數過省。俱報聞。○戊辰。諭軍機大臣等。前因郝碩辦理金川軍需奏銷事件。其經手一股。雖已覈完。而各案內多有部議駁查之款。均須登答。其山東巡撫印務。現有國泰護理。是以諭令郝碩。俟覆覈全完。再行起程。前赴新任。昨江西巡撫海成奏。民人王瀧南首告舉人王錫侯。編字貫一書。詆斥字典。海成僅請將王錫侯革審。經朕披閱其書。凡例內竟有一篇。將

廟諱御名概行排寫此非大逆而何乃海成尚稱其書並無悖逆之語實堪駭異此篇即在前本序文後之凡例開卷即見豈得諉為不知海成係滿洲世僕經朕加恩簡任巡撫乃於此等大逆之書恬不為怪且稱其語無悖逆實屬昧盡天良負恩蔑理莫此為甚因交部嚴加議處今據吏部議請將海成革職交刑部治罪所議甚當海成革職外應有餘罪豈可照尋常案件留任令其復玷封疆江西巡撫應即開缺但海成覆奏之摺現在未到是以將吏部本暫留俟其奏到時再行明降諭旨而江西省藩臬兩司同辦此案其處分均重將來亦難姑寬是該省並無可護印之員所有江西巡撫員缺著郝碩調補郝碩係朕素知之人江西省又有應辦之事且不必來京請訓著傳諭郝碩接奉此旨即由川省馳驛迅速赴江西新任並查此案辦理本省公論以為何如其經手之軍需各案初稿已

經辦完即或部駁條款尚須覈覆現有富勒渾等在彼均可逐一覈查代為登答原可不專恃郝碩一人也郝碩到江西若海成尚無明旨即將此旨與彼看將伊革職差人送京此旨著由六百里發往並諭富勒渾等知之○已已諭軍機大臣等據國泰奏查辦嶧縣鹽梟拒捕一案請將該縣吳濬革職勒限協緝等語吳濬先已降旨革職原摺並已交該部嚴察議奏矣此案該犯等糾集夥黨至四十九人之多會聚一處計圖拒捕及至該縣役等前往查拏竟敢各持器械上前截刦傷斃官差並將鹽車奪去其兇橫不法情罪甚為可惡現在獲犯僅止四名其餘首夥各犯務須上緊嚴拏且業已傳諭薩載楊魁令赴該處會同督緝自可全數就獲不致一名漏網其陸續就獲各犯務應立即嚴審明確如係案內為首起意及動手搶刦傷人各要犯即當一面正法梟示一面奏聞至為從各犯

亦不可存留內地。並當問擬發遣伊犁烏魯木齊等處。給厄魯特為奴。或發黑龍江等處。給索倫為奴。以昭炯戒。至薩載楊魁接奉此旨。於何日前往該處。如何設法派員嚴行躡緝。及曾否獲犯幾名。並著據實覆奏。吏部奏挑取謄錄字號舛錯之考官梁國治等。均照例罰俸。得旨。鄉試落卷內挑取謄錄原係特旨派辦之事。並非科場正務。若不令挑取。則伊等亦無此錯矣。所有梁國治等應議之處。與科場正例無涉。著加恩寬免。○命禮部

尚書曹秀先為尚書房總師傳。○庚午諭曰。高晉奏江南提督陳杰性情偏執。器小易盈。舉劾任意。均欠公允。營員多有煩言等語。所奏頗屬公當。陳杰辦理營務。既未能公明穩妥。江南提督緊要。且係專駐之缺。不便留其在彼。致滋貽誤。但念其尚無大過。陳杰著調補烏魯木齊提督。仍著革職留任。以觀後效。所有江南提督員缺。即著俞金鰲調補。○辛

未以病休雲南永北廳屬順州土州同子宗麟子文翰襲職。壬申諭曰。余文儀久任刑部。歷練老成。昨歲刑部尚書缺出。特由巡撫擢用。俾效所長。茲以老疾乞休。情詞懇切。著照所請。准以原品致仕。並加恩賞給太子少傅銜。以示優眷。○癸酉諭據李質穎奏。粵海關監督德魁患病不能速痊。請簡員來粵接辦等語。德魁准其回京調理。所有粵海關監督事務。著圖明阿去。李質穎原係兼管關務。

圖明阿未到任之先。其監督印務。即著李質穎暫行兼管。○甲戌諭前因海成奏新昌縣舉人王錫侯妄作字貫一案。海成將大逆不法之處。視為泛常。摺內稱其尚無悖逆詞句。全不知有尊君親上之義。是以降旨將海成交部嚴加議處。經吏部議以革職。交刑部治罪。自應如此辦理。因將此本折留。今據海成奏稱。親往該犯家中。查出王錫侯纂輯各書共十種。一併進呈。檢閱各書。俱有悖謬不法。

之處各等語現將各書暫存俟王錫侯解到時嚴行審訊從重治罪至海成身為巡撫乃於初次叅奏王錫侯字貫時並不將伊書內大逆不法之處據實覈出轉稱其尚無悖逆之詞實屬昧盡天良罔知大義不可不重加嚴懲使為封疆大臣喪良負恩者戒海成著照部議革職交刑部治罪其江西巡撫員缺著郝碩調補即赴新任所遺山東巡撫員缺即著國泰補授郝碩未能即到著高晉前往暫管巡撫事務其江西省承辦此案之藩臬兩司並著高晉查明叅奏至海成此次奏到續查出王錫侯字貫另本前有李友棠古詩一首李友棠身為卿貳乃見此等悖逆之書尚敢作詩讚美實屬天良已昧伊自問復何顏忝列搢紳李友棠即著革職亦不必復治其罪又查其王氏家譜內有原任大學士史貽直序文其經史鏡及唐人試帖詳解內有加尚書銜錢陳羣序文使伊二人尚在自當

向其究問今二人俱已物故亦毋庸深究朕近作詩有不為已甚去已甚之句今辦此等案準酌得中即此意也將此通諭中外知之○諭軍機大臣曰江西省因見辦理王錫侯之事巡撫親至其家搜查又解書進京其有與該犯平日筆札往來交涉者自不免慮及株連心懷疑懼恐致滋生事端更覺不成事體著高晉善體朕心到江西後一切處以鎮靜並將朕不為已甚之意明白宣諭使眾共知曉以免驚疑高晉務實心妥協經理仍將如何妥辦之處即行覆奏此旨著由五百里發往並將海成各摺及單全行鈔寄閱看○又諭據國泰奏查辦嶧縣鹽梟拒捕一案陸續獲犯十三名其起意拒捕之盧添祥已經拏獲並嚴訊各犯已得姓名住址者四十六名現在上緊趕緝等語盧添祥既經弋獲其起意為首之孫二漢等自亦無難躡緝昨薩載奏已赴邳州協同嚴緝現經國泰親身在

彼督辦兩省會緝各犯自無能漏網著傳諭國泰迅速勒緝即行全獲嚴訊辦理仍將續獲逸犯之處即行奏覆○又諭據國泰奏東省七八月間有因雨澤稀少秋禾減收之處若徵買並行恐市價日昂有妨民食所有收成六七分各屬應買各項倉穀請概行停緩以平市價并請將收成少歉之區即查明將春借倉穀於今歲冬底即行出借俾資接濟等語所奏是自應如此辦理看來東省今歲

秋間雨少秋收大局不及直隸自當體察情形量為調劑著傳諭國泰悉心確查此等收成減少州縣如止須豫借倉糧民食即不致拮据者自可無庸另辦若有應另籌借緩以裕民食者即速妥酌奏聞候朕於新春降旨尋奏東省秋收少歉已蒙停買平糶倉穀又豫為出借民食有資現在完納本年地丁錢糧下欠尾數懇緩至來歲麥後徵收得旨屆時有旨○調戶部尚書袁守侗為刑部尚書

以戶部左侍郎梁國治為戶部尚書轉戶部右侍郎董誥為左侍郎以內閣學士劉墉為戶部右侍郎 乙亥

聖祖仁皇帝忌辰遣官祭

景陵

上詣

奉先殿

壽皇殿行禮 諭曰徐恕現在將屆服闋著署

理山東布政使俟服滿後再行實授 又諭

江西按察使員缺著德文補授該省藩司白瀛現在四川辦理奏銷尚未到任即著德文速行前往署理布政使印務其按察使印務著高晉於通省道員內揀選一員奏明暫署○兵部奏各省遇銅鉛船隻到境該督撫派遊擊都司守備押送即應令與文職地方官一體催趲請嗣後銅鉛逾限即移咨經過省分將催趲不力之押送各員職名送部各按逾限月日照文職專催地方官分別議處例

查議從之。○丙子諭前日披覽四庫全書館所進宗澤集內將夷字改寫彝字狄字改寫敵字昨閱楊繼盛集內改寫亦然。而此兩集中又有不改者殊不可解。夷狄二字屢見於經書。若有心改避轉為非禮。如論語夷狄之有君孟子東夷西夷又豈能改易亦何必改易。且宗澤所指係金人楊繼盛所指係諸達更何所用其避諱耶。因命取原本閱之則已改者皆係原本妄易而不改者原本皆空格加圈二書刻於康熙年間其謬誤本無庸追究。今辦理四庫全書應鈔之本理應斟酌妥善。在謄錄等草野無知照本鈔謄不足深責而空格則係分校所填既知填從原文何不將其原改者悉為更正分校覆校俱係職官豈宜失檢若此至總裁等身為大臣於此等字面尤應留心細勘何竟未能逐一校正其咎更無所辭。非他書總校記過者可比。所有此二書之分校覆校及總裁官俱著交部分

別議處。除此二書改正外他書有似此者並著一體查明改正。并諭該館臣嗣後務悉心詳校毋再輕率干咎。○刑部奏山西徐溝縣僧人界安恃酒逞兇將十一歲幼徒韓二娃毆斃擬斬監候得旨僧人界安將十一歲幼徒韓二娃用繩拴吊疊毆致斃甚至其父韓貴隴跪地求饒亦置不理其兇很慘毒情罪甚為可惡該部僅照故殺律擬以斬候尚未為允協。僧人出家持律原不應身犯殺戒是以每年秋審時遇有僧人毆斃人命者概予勾決以示懲警。今界安因其徒年幼貪頑輒恃醉逞忿頓起殺機立置之死是界安既犯王章又破佛律非尋常鬪毆故殺者可比豈可令其久稽顯戮著交該部另行妥議定例具奏。此案即照新例辦理尋議嗣後僧人逞兇謀故慘殺十二歲以下幼孩者即擬斬立決從之。○丁丑諭軍機大臣曰索諾木策凌奏稱額敏和卓病故遣防禦福星保前往祭

奠等語。前因伊勒圖遣防禦祭奠額敏和卓曾經降旨申飭。索諾木策凌尤非伊勒圖可比。伊勒圖在外當差。或不知此例。索諾木策凌係御前侍衛。且在奏事處行走多年。豈有不知此例之理。今因額敏和卓病故。遣人祭奠。不過私事。自應遣派家人。乃亦派防禦前往。殊屬非是。索諾木策凌著傳旨申飭。併恐直省將軍督撫等。多有似此者。著傳諭各省嗣後除辦理地方公務及奉有特旨頒賜祭

奠者。即派大員前往。亦無不可。如遇此等自致祭奠之事。係屬私情。止應遣家人齋往。即或必須差官。將軍都統副都統則差驍騎校督撫提鎮則差千把外委尚屬可行。其旗員自防禦以上武職自守備以上俱不准濫行差委。將此遇各省奏事之便傳諭將軍都統督撫副都統提鎮知之。○兵部議准四川總督文綬奏稱成都新設將軍標案內將永寧協副將改為軍標副將。龍安營叅將改為永

寧營叅將。惟永寧協原轄建武。敘馬二營。俱係遊擊。今永寧改協為營。領以叅將。與遊擊官階相近。於考覈體制未宜。查川北鎮所屬之潼綿營。原設都司一員。該營汎廣差繁。經理非易。請將建武營遊擊并所屬守備一員移於潼綿營。其潼綿營都司即請改為建武營都司。仍各歸該鎮營管轄。至敘馬營地較緊要。原設遊擊。未便議改。請仍隸提標。應如所奏從之。○豁免遭風漂沒江西袁州幫旗丁張大漕米一千一百四石有奇。并予淹斃水手等卹賞如例。

大清高宗法天隆運至誠先覺體元立極敷文
奮武孝慈神聖純皇帝實錄卷之一千四十四

實錄卷一千四十四

主

大清高宗法天隆運至誠先覺體元立極敷文
奮武孝慈神聖純皇帝實錄卷之一千四十五

監修總裁官經筵講官太子太傅文淵閣大學士文淵閣領事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加一級尋常加二級軍功紀錄一次慶裕

總裁官經筵講官太子太傅文華殿大學士文淵閣領事稽察欽奉 上諭事件處管理刑部戶部三庫事務

世襲騎都尉軍功加九級隨帶加二級又加二級 謹詣內大臣戶部尚書鑲藍旗滿洲都統軍功紀錄一次

尋常紀錄十四次 臣總纂經筵講官太子少保工部尚書紀錄六次臣曹振鏞等奉

敕修

乾隆四十二年丁酉十一月戊寅

實錄卷一千四十五

上御乾清門聽政。○諭曰。舒通阿。自革去副都
統。管理策凌納木扎勒游牧以來。追悔前非。
甚為奮勉。將游牧事務。辦理妥協。著加恩賞
給二等侍衛翎頂。○諭軍機大臣等。據楊魁
奏。現自蘇州起程。親赴邳州一帶。督緝鹽梟
拒捕各犯等語。前據署總督薩載奏業已親
往邳州督緝。所有江蘇省派委之道將等。自
皆上緊協拿。毋庸督撫並駐該處會辦。且該
撫本任地方公務。亦有應在蘇辦理者。著傳

諭楊魁即回蘇州辦事。至薩載距邳州一帶不遠。就近駐彼督辦。亦甚便易。昨據國泰奏到。東省前後共獲犯一十三名。其餘自更易隲緝。未知江省曾否獲有正夥。各犯務須率屬實力查捕。全數就獲。嚴審重懲。毋使一名漏網。仍著薩載將江省現已獲犯若干名。即行覆奏。將此傳諭薩載。楊魁知之。○兵部奏本年軍政屆期。將武職大臣都統等員開列進呈。得旨。容保。年力衰邁。不能辦理都統事務。著革去都統。加恩在散秩大臣上行走。扎勒桑。瑚尼勒圖。亦不能辦理副都統事務。均著離任。以副都統銜在散秩大臣上行走。餘著照舊供職。○又奏。前任吉林將軍今調杭州將軍。奉恩輔國公富椿。未能將私行挖濬人犯實力查拏。應請革職。得旨。富椿著革去公爵。另襲仍革職留杭州將軍之任。○以署鑲藍旗蒙古副都統朋素克喇錫為鑲紅旗蒙古副都統。二等侍衛鄂蘭為鑲藍旗漢軍

副都統。○以故雲南鎮南州屬鎮南關土巡檢楊檉子文輝襲職。○己卯。命翰林院侍讀童鳳三提督陝甘學政。○庚辰。諭軍機大臣等。朕前此諭令各督撫查辦應行銷燬書籍。原因書內或有悖理狂誕者。不可存留於世。以除邪說而正人心。乃逆犯王錫侯所作字貫一書。大逆不法。各省俱未經辦及。已疊降諭旨飭諭矣。本日高晉奏應燬各書單內。亦並無此種。可見外省查辦書籍。不過以空言塞責。並不切實檢查。昨據海成奏續查字貫板片及新刷字貫二部。其凡例內廟諱御名一篇。另行換刻。與初次奏到之本不同。可見該犯亦自知悖逆。潛行更改。而海成已見其初刻。尚稱其書無悖逆之詞。實屬天良漸滅。全不知有尊君親上之義。是以降旨將海成革職。交刑部治罪。至江寧省城與江西省相隔不遠。該逆犯初刊字貫之本。斷無不傳行至江寧之理。高晉等此次查辦。應燬

書籍何以尚未將此等大逆之書列入豈止查舊人著作而於現在刊行者轉置不問耶著傳諭高晉即飭屬通行訪查如有與字貫相類悖逆之書無論舊刻新編俱查出奏明解京銷燬如有收藏之家此時即行繳出者仍免治罪若藏匿不交後經發覺斷難輕宥即該督撫亦難辭重譴矣並著傳諭各督撫一體遵照妥辦毋稍疎漏干咎○又諭從前盛京將軍達勒當阿等奏奉天所屬廣寧等處向係低窪其水多自邊外流入而新開鷄鷹等河又無河身以致漫溢四出大路田畝均有積水若挑一大河引水入海則村莊道路旗民熟田均免淹浸且可開墾蕩田等語朕派高斌會同達勒當阿勘估具奏經軍機大臣覆議准於三年後興工後因將軍阿蘭泰奏新開等河河身較隄決處所微高即另挑河身仍不能暢流徒費帑項又經軍機大臣議停興工惟令該將軍每年修補橋道毋

致行人壅滯今據英廉口奏新開鷄鷹等河若照從前查辦另濬一河於彼處村莊旗民實有裨益且可開墾蕩田數萬餘頃等語廣寧等處停止挑河修補橋道以來已二十餘年近年新開鷄鷹等河河流情形若何若另挑河身能否安流順軌順流後可墾蕩田若干畝從前修補橋道是否有益現在仍舊修理與否均著傳諭弘昫親往詳勘據實定議具奏○刑部奏廣州駐防鑲紅旗滿洲前鋒倭什布妻楊氏違犯伊姑王氏教令致王氏自盡審擬具奏得旨楊氏依擬應絞著監候秋後處決至摺稱楊氏係駐防旗人之妻例應解部監候令該將軍等派員選人伴解等語因屬照例辦理但各駐防旗人內應入秋審者亦所常有若俱派人伴送不勝其煩向來東三省秋審常犯並不解京辦理各省駐防何獨不然況拘禁一二人犯亦非難事而理事同知衙門各有監獄即可令其收禁何

必多此一番跋涉耶。嗣後各駐防遇有應入秋審人犯。即令將軍都統等悉心確覈。分別情實緩決。可矜三種。造冊題達。交刑部九卿會覈具題。至勾到時。某省駐防。即另冊同該省應勾人犯一體辦理。著為令。○辛巳諭軍機大臣曰。薩載等奏陸續拏獲東省鹽梟案內逸犯十一名。其李二賴歹實係幫同孫二漢毆傷巡役之犯。質訊明確。即行處斬。梟示一摺。該督等督飭屬員。協緝鹽犯多而且速。尚屬認真。惟據各犯所供姓名。有與東省供詞不同。自應兩省會商覈實。分頭緝捕。其首犯孫二漢尤須嚴緝。速獲。餘犯務須全數獲得。勿使一名漏網。至閱李二賴歹供單內稱。係領郟城縣張莊鹽店票子買鹽等語。既向鹽店領票買鹽。似非私販。何以復糾夥潛行。拒捕搶犯。其故殊不可曉。或於正票勛數之外夾帶私鹽。故爾糾眾滋事。不可不據實究明。其各犯之鹽。又係買自何處。夾帶私鹽。若

干抑所賣盡係私販。亦須逐一訊明。通行覈辦。又李二賴歹供路遇李順等六人。齊到嶧縣固園。住徐寡婦家。見孫二漢等共四十八九人。有四十六把車。孫二漢起意到河北賣鹽。並云仗人多。不怕查拏等語。徐寡婦家若止係尋常歇店。安能容留如許人車。且鹽徒皆不約而同。前往投宿。其人必積慣窩藏梟販。坐地分贓。此等匪惡犯婦。結案時當從重辦理。不可因係孀婦。稍存姑息。又各犯同載私鹽渡河。售販東省。豈竟漫無盤詰。聽其糾夥販私。毫無忌憚。亦屬不成事體。因憶乙酉南巡時。該省沂水縣曾有私販拒捕之事。今又有如此聚眾鹽案。可見從前未曾妥辦善後事宜。致奸民習為故常。復蹈法網。不可不設法稽防。以杜後患。著交國泰。於此案獲犯結後。逐一詳覈酌定章程具奏。尋奏郟城與江南海州。贛榆鹽灘逼近。場多鹽賤。例准老少男婦挑負發賣。鹽梟藉此收買販私。康熙

年間曾設海贛同知駐兩省接壤之大興鎮查緝私鹽兼管河務又設千總一員兵五十名該同知管轄分巡雍正十二年因同知既管河務改隸河工即將緝私事歸沂州府通判管理近又因該同知河務簡少而沭河通判工程較多陞改同知該同知改為通判去海贛銜專司河務已無緝私之責沂州通判不兼海贛銜未能越境稽查千總微弁難資彈壓請將駐大興鎮之通判復改為海贛通判兼管河務仍轄千總專司巡緝海州贛榆嶧縣及蘭山郯城等處私鹽時赴灘場稽查竈戶毋許額外多煎倘有私鹽透漏越境即將通判叅處該通判既兼河務仍隸河東總河管轄又龐家渡口為兩省往來必由之地請於就近營汛內移駐把總一員巡查盤詰并於大興鎮千總所轄兵內撥給十名以供差巡再郯城崇達集居民多而離縣遠請令商人添設子店便民藉杜私販至海贛竈戶

應編保甲稽查現劉會兩江督臣飭運司妥辦得旨所奏是該部速議具奏尋議應如所奏從之○又諭曰勒爾謹奏河州民黃國其家聚集多人豎幡念經並勒令居民供應糧食且敢抗拒傷差等因一摺殊堪駭異按察使李本與勒爾謹先後馳往查拏自應如此辦理內地民人敢於設教聚眾並立有教主豎幡占聚一村入教者皆以白布為號即與前此山東叛逆王倫無異其情罪實為可惡所有首夥各要犯必須上緊弋獲盡法重治其罪以示嚴懲但陝甘兩省回民最多而易滋事此案若係回民或恐恃其勇悍敢於抗拒不可不用官兵勦捕今勒爾謹前往自必帶有兵役第恐為數無多或不敷應用提督法靈阿近在該省應即選帶精兵星夜馳往協剿如各犯業就全獲則已若尚有抵拒情形法靈阿即在彼調度加之以兵或勦或擒相機妥辦勿使一犯漏網就獲後勒爾謹即

將案內各要犯嚴訊起意聚衆煽惑糾約各實情分別凌遲斬決一面於該處正法梟示一面奏聞○以草爵杭州將軍富椿子斌寧襲奉恩輔國公○是日起

上以冬至祀

天於

園丘齋戒三日○壬午諭各省將軍向例不戴花翎必俟特賞方准戴用但提督尚有賞給花翎者將軍有統轄一省職任自宜戴翎不必俟賞賜後方行戴用嗣後補授外省將軍原無翎者准其戴用著為令○諭軍機大臣等昨勒爾謹奏河州民黃國其聚衆豎旗倡教拒捕一案實屬不成事體且非先天化日之下所宜有其情罪甚為可惡業經勒爾謹親往查拏自可將各犯迅就弋獲嚴訊重治以示懲創果爾甚善但恐該省回民最多又素習拳勇性復護其同類恃衆滋事即如從前馬得鰲一案窩盜縱劫蔓延不法其聲勢

固大但恐綠營兵丁必有回民在內若輩袒護徇情積習難改或不肯奮勇上前或有奸惡回人潛與勾結皆勢所不免則雖有官兵在彼仍不能得力因思此等勦賊打仗之事臨時勇往爭先恥於退怯惟滿洲兵最為足恃從前王倫一案派大學士舒赫德督率八旗兵前往不旬日即行勦滅其明驗也該省距京較遠惟調駐防兵最為便易著傳諭三全於寧夏駐防內即選派滿洲兵一千名索諾木策凌於烏魯木齊駐防內即選派滿洲兵二千名並將應用馬匹器械乾糧等項迅速妥辦豫備候勒爾謹之信遄行勒爾謹到彼如首夥各犯盡數擒獲不但毋庸另調滿兵即法靈阿亦當停其前往若勒爾謹法靈阿到後逆匪仍前抗拒尚未能剋期完事即一面由六百里馳奏一面即用六百里加緊印文飛調寧夏及烏魯木齊滿兵赴勦三全索諾木策凌一得勒爾謹印文隨到隨即起

行。帶兵兼程前往。仍將帶兵起程日期迅速奏聞。第法靈阿三全辦事雖極認真。然尚未經歷行陣。於調度機宜未必遽能悉合。因查固原鎮總兵圖欽保在金川軍營數年。曾經著有勞績。帶兵之事。乃所熟嫻。著傳諭圖欽保接奉此旨。即由該處馳驛。迅赴河州。幫同法靈阿辦理勦捕之事。寧夏兵到。伊并可幫帶滿兵。祇期於公事有益。彼此均不可稍存畛域之見。如勒爾謹此時已經獲犯完案。即圖欽保亦當行文停其前往。至勒爾謹昨奏此事。僅由四百里驛遞。尚屬不知緩急。現在如已獲犯竣事。著即由六百里奏聞。此旨著由六百里加緊發往。一并諭令知之。仍各將應行覆奏事宜。迅速覆奏。○軍機大臣等奏宗室瑪克湯阿赴寶坻縣以索取租錢滋事。審擬具奏。得旨。瑪克湯阿身為宗室。私行赴屯。以非分之事。藉端索錢滋擾。甚屬不堪。僅擬枷杖。宗室無枷杖之理。不過空房拘禁數

月。不足示儆。此人不可留於京城。著發往盛京。交與將軍弘昫嚴行管束。至寶坻縣村民高德仲等。將瑪克湯阿之家奴捆縛送官。尚係旁觀不平。激於公憤。即將其惡奴灌穢一節。亦屬小事。若將伊等一并治罪。將來宗室人等轉相效尤。必更無所顧忌。且恐滿洲大臣官員之家人等。亦從而私行滋事。不可不防其漸。所有高德仲等原擬枷杖之處。均著寬免。其明晦雨兒在屯催辦錢文。雖聽從伊主所使。但究係伊等倚勢妄為。釀成事端。軍機大臣及刑部未將該二犯擬罪。尚未為周到。著另行定擬具奏。○直隸總督周元理議奏密雲縣駐防官兵事宜。查古北口理事同知本係管轄密雲一帶旗民事務。相距八十里。儘可兼轄。毋庸添設專轄官員。其歲需兵米三萬餘石。請照馬蘭鎮例。改用折色。每石折銀一兩四錢。至官兵住房。現委員勘估修蓋。報聞。○癸未

上詣

南郊齋宮齋宿。○陝甘總督勒爾謹奏。河州民黃國其家聚眾拒捕。臣親往查辦。該州已拏獲從匪石忠信等七名。訊明倡教首匪名王伏林。自稱彌勒佛轉世。聚集二千餘人。擬攻河州。先令石忠信等赴州探信。即被拏獲。現在調兵一千。併力擒拏。諭軍機大臣等。據勒爾謹奏於十一日抵河州。已據該州拏獲匪犯石忠信等七名。審訊錄供。現在調兵。併力擒拏等因。一摺。所辦尚好。但此等奸民。既已就獲。即應立時審明。一面正法。一面奏聞。方為妥協。若羈禁日久。恐匪徒等。或糾眾劫牢。搶獄。更覺不成事體。此內石忠信。係邪教中四教主。郝天祥。係其偽軍師。此二犯。即應押赴市曹。凌遲處死。其張成。張大仁。張進。朝張六五。張哈味。五犯。俱已相隨入教。亦應即行斬決。仍將各犯首級。梟示。以申國法。而示懲儆。著勒爾謹。即速照此辦理。此後續獲各犯。

亦俱隨獲。隨審。將曾受偽封。及曾經拒捕傷差者。即行凌遲。其隨教入夥。現被擒拏者。即行斬決。惟實係被賊逼脅。或自行脫出。赴官投首者。審明。尚可貸其一死。然亦不可存留內地。並不宜發往新疆。當分遣雲貴烟瘴等處。該督務須切實分別。妥為辦理。不可稍存姑息。又閱供單內。張成供稱。被眾百姓拏來等語。此等百姓。尚屬守法良民。勒爾謹。即應查明。量加獎賞。並當出示曉諭云。爾甘肅百姓。素號淳良。皇上以爾等地瘠民貧。時深軫念。每歲蠲賑。頻施俾皆存活。得常安享太平。爾等受恩實為最厚。今河州逆匪王伏林等。倡立邪教。聚眾不法。意圖搶奪各村莊。擾害百姓。不可不即時誅滅。以安善良。是以現獲逆黨各犯。審明後。即行凌遲斬決。不肯久留貽害。至爾村眾內。將逆黨張成。拏獲送官。足見爾等俱有天良。明於大義。除量加獎賞外。特行明白曉諭。本督部堂在此統兵勦捕逆。

匪。惟期速剪根株。永除民害。爾良民照常安居樂業。勿稍驚惶。至在事兵衆。俱按日給發口食。絲毫不擾閭閻。爾等更無庸疑慮。如有逆黨至村。糾夥煽誘者。即速擒拏送究。以憑獎勵。如此辦理。犯法者既決不待時。守法者必共相激勸。自更易於辦理。勒爾謹務實力妥為之。至所調之兵一千似覺太少。前已諭令法靈阿帶兵前往。想亦可速到。必更易於集事。若法靈阿未到。首夥各犯俱已就擒。竣

事。即遵前旨。停止法靈阿前赴協剿。又石忠信供。有各犯擬於十二日。先差人到河州埋伏。夜間率衆攻破河州之語。今十二日勒爾謹已在河州拜摺。而所遣逆黨先已就擒。可見賊計未行。此事發覺稍速。較之山東王倫一案。滋事後再行辦理。似更省力。該州辦理此案。尚屬能事。但王伏林等倡教糾衆。必非始於近時。從前何以不行查辦。閱該督摺內。稱該州楊廣颺為署知州。或該州係委署後

辦此一事。從前失察。另是一人。或該州署事已久。功過皆其任內之事。並著勒爾謹於辦完此案後。確實查明。分晰具奏。將此由六百里加緊傳諭知之。仍將曾否全行獲犯完案之處。由六百里加緊覆奏。○甲申冬至。祀

天於

園丘

上親詣行禮。○遣官祭

永陵。

福陵。

昭陵。

昭西陵。

孝陵。

孝東陵。

景陵。

泰陵。

泰東陵。○遣官祭

孝賢皇后陵。

端慧皇太子園寢。諭據刑部奏直隸省斬犯王克均之同黨流犯王小五病故。該司書辦樊承先並不詳看原文。輒以王克均亦已病故。趕辦付子。送司員葛鳴陽畫押。移付秋審處開除。恐其中別有情弊。請將該書辦審完。並將堂司官嚴處等語。秋審情實人犯最關緊要。乃該書辦等混付開除。致重囚得稽顯戮。該堂司官漫不經心。未即查出。咎實難辭。著交部分別嚴加議處。至該書辦樊承先。有無弊混。不可不徹底根究。該犯王克均。現在南皮縣監禁。即欲速置於法。亦不爭此數日。自當提到質審。令其事水落石出。著按察使達爾吉善星速馳往該處。即將王克均親押解京。如途中或有疎虞。恐達爾吉善不能當其罪也。解到時。交軍機大臣會同刑部。嚴行鞫訊。並將該犯與樊承先用刑質對。務得實情。如訊有賄囑舞弊情事。則樊承先自當立正典刑。即或審無情弊。而以應勾人犯稽

誅二十餘日。樊承先之罪。亦非尋常錯誤可比。統俟審明定奪。至秋審勾到時。情實人犯已未勾決。均列於榜示之內。直隸省於二十八日勾到。該督周元理臬司達爾吉善接到部文。因何不行細查。將遺漏王克均一犯之處。及早據實具奏。其咎亦無可解免。著周元理達爾吉善。即行明白回奏。○諭軍機大臣等。昨據勒爾謹奏。河州奸民王伏林倡教聚眾一案。已獲犯七名。所辦尚好。業經諭令分別妥辦矣。此案幸發覺在該犯等未經舉事之前。較之山東逆犯王倫等不法一案。事後查辦者。自為省力。勒爾謹現在調兵擒剿。或全行獲犯事竣。固屬甚善。設因人眾尚未辦完。亦未可定。但思王伏林等聚集之眾。至二千餘人。其中情罪重大。難以寬宥者固多。而為賊迫脅強從。急切不能自脫者。諒亦不少。一經官兵進剿。則臨陣殲戮。既難分別。及被獲後。以二千人概予駢誅。亦覺不忍。自應一

面督兵勦捕。一面宣示朕諭。明切曉諭該犯等聚集之村。以此事昨經本督部堂奏聞。皇上以王伏林敢於倡立邪教。糾眾抗官。擾害良民。實非光天化日之下所宜有。其罪為覆載所不容。自當盡法嚴懲。以除民患。而申國法。但甘肅百姓素屬淳良。且所聚至二千多人。必非盡皆逆匪正黨。自有被賊逼脅。勉強隨從在內者。若不豫行開導。致被獲後。悉駢首就戮。其情亦覺可憫。從前山東王倫之案。其眾執迷不悟。官兵圍勦時。不但夥犯誅殺無遺。即隨賊同行。擒獲後亦盡殺無赦。此爾等所聞者。現今官兵進勦。其實係逆匪王伏林正夥要犯。自屬法所難逭。如脅從在內之人。有能各發天良。將此內正夥要犯設法擒獲。到官呈首者。不但可免爾等之罪。並當加以重賞。即或自知畏罪。豫行脫出。赴官呈首者。亦可稍減其罪。若此番曉諭之後。仍復執迷不知。悛改官軍勦捕。玉石俱焚。則是爾等

自取其死。雖欲施恩。亦無從原諒矣。禍福惟爾等自擇。勉之毋忽。如此曉諭百姓。或果能擒賊送官。盡行解散。其事更可速蕝。實為事半功倍。但投出之犯。必須分別辦理。即不加誅。亦不可留於內地。再不可改發烏魯木齊等處。恐伊等到彼。又復蠱惑新疆人眾。更屬不成事體。只可酌發雲貴川廣等省烟瘴地方。如因人數太多。即改發東三省給索倫為奴。亦可。勒爾謹務須妥協速辦。不可稍存姑息。此旨著由六百里加緊傳諭知之。仍將現在曾否全行獲犯完案情形。迅由六百里加緊覆奏。○豁免遭風漂沒江西鉛山幫旗丁孫云保漕米一千一百四十石有奇。○乙酉諭曰。郭爾羅斯台吉濟木巴等以民人梁依棟違例放債釀酒。占河捕魚。又將台吉之女。私娶為妻等情。呈控盟長王齊默特多爾濟。經齊默特多爾濟等請將梁依棟解回內地治罪等因。具報理藩院轉奏。朕派侍郎博清額

貝子羅布藏錫喇布前往審辦。今據博清額等審明。梁依棟所放帳目。並未違例取息。占河捕魚。係扎齊魯克齊達爾瑪等立給字樣。以捕魚還欠。並非私行占據。惟釀酒及聘娶台吉之女。有干例禁。而釀酒一事。每年給伊等銀三十兩。聘娶台吉之女。亦係兩相情願。並非逼勒聘娶。是台吉濟木巴等負欠梁依棟銀兩。不能償還。遂爾造言抵賴。以圖誣陷。內地民人居住蒙古地方。原以蒙古人等全賴耕種為生。或招募民人為伊開墾。或雇覓傭工。或民人攜帶貨物貿易。以資生計。是以民人居住蒙古地方貿易。原所不禁。今台吉濟木巴等所控之事。如果屬實。則梁依棟欺壓蒙古。自當解回內地。從重辦理。而一切在彼居住之人。俱應逐回。但台吉濟木巴等因欠梁依棟銀兩。無力償還。即肆行抵賴。以圖誣陷。是民人尚未欺壓蒙古。若不論是非。將彼處居住民人。全行逐回。將來耕種乏人。必

致失業。且商販不通。伊等日用無資。轉於蒙古無益。況此案現已審虛。梁依棟雖屬違例。而濟木巴等圖賴負欠。肆行捏控。殊失蒙古舊習。若不力行整飭。將來更不知何所底止。著該院行令各處盟長。轉飭眾台吉等。嗣後伊等蒙古地方。所居內地之人。有滋生事端。欺壓蒙古者。即據實呈明盟長。咨院嚴行審辦。至蒙古人等。亦必加意約束。務使伊等互相和睦。斷不可如濟木巴等之抵賴帳目。造言捏控也。○又諭昨據勒爾謹奏河州邪教匪犯王伏林等聚眾念經。署牧前往查拏。該犯拒捕傷差。當即督率司道等帶領官兵前往勦捕。隨將其四教主石忠信教師郝天祥等拏獲。本日又據奏稱官兵并力勦捕。生擒匪犯五百二十二名。其為首教主王伏林。張志明王九兒。均經殲斃。現將生擒各犯帶赴省城嚴審。分別定擬等語。此案匪犯等設立邪教。豎幡念經。聚集多人。敢於顯抗兵役。實

為不法已極。該督一聞該署州稟報。即親往該處。帶同文武飛調官兵。直抵該犯巢穴。奮力勦戮。一日之內。已將逆眾就擒。渠魁殲殄。所辦甚為妥速。勒爾謹及李本。將全迪。西德布等。俱著交部議敘。其餘在事員弁。或尚有出力者。著該督查明具奏。一併交部議敘。至摺內所稱。把總楊化祿。勇往被傷。殊堪嘉尚。俟其調理痊愈時。即行送部引見。或因傷重身故。亦奏明交部。照陣亡例議卹。○又諭。河州逆匪王伏林等。設立邪教。惑眾造逆。事體甚大。若辦理不合機宜。則賊黨蔓延。地方受害。勒爾謹聞信。即親自馳往。將探信賊匪。擒獲七名。旋即領兵。將賊匪生擒五百餘名。甚屬可嘉。著將朕所用珊瑚朝珠一盤。大荷包一對。小荷包四對。發往賞給。以示嘉獎。○諭軍機大臣等。前據勒爾謹奏。河州逆犯王伏林等。倡教聚眾。拒捕傷差一案。恐其恃眾不法。不能速完。曾經傳諭三全。選派寧夏駐防

兵一千。索諾木策凌。選派烏嚕木齊駐防兵二千。迅速挑備。候勒爾謹之信。遣行。並諭圖欽保。馳赴河州。幫同法靈阿。辦理勦捕。茲據勒爾謹奏到。官兵已於十三日。抵其巢穴。將賊眾生擒五百二十二名。首犯王伏林等。業俱殲戮。事已完結。頃據法靈阿奏。聞信後。即行馳往。想聞勒爾謹辦完此事之信。自即仍回甘州。著傳諭三全。索諾木策凌等。所有滿洲官兵。均無庸挑選豫備。圖欽保。亦即可回鎮。○又諭。曰勒爾謹奏。河州逆匪王伏林等。倡教聚眾一案。已於十三日。帶兵至王家坡地方。將各犯或殺或擒。立即完結等因。一摺。所辦極為妥速。甚屬可嘉。已降旨交部議敘矣。閱前此奏到供單內。據石忠信供稱。陸續入教來到者。共二千多人。今所獲僅五百二十名口。其餘眾犯。或於官兵勦捕時。並經殲戮。抑或尚有四散竄逸者。摺內未經敘及。著勒爾謹。即行查明。此案匪犯除現獲外。其

經官兵勦殺者共若干人或尚有畏罪逃竄者若干人詳晰查明及官兵如何進勦如何殺戮及獲賊各確情據實具奏至首犯王伏林及張志明王九兒三犯俱經殲斃未能碎磔伏法實屬幸免其黨惡逆犯不可不嚴切根究勿使得逃顯戮昨石忠信供詞內又稱王伏林手下尚有十二人封十二星又封二十八宿尚未封全等語應即詳細查訊所封俱係何人即將現獲之五百二十二犯逐一嚴訊如有曾受偽封之人俱應立時正法其隨賊持械抵拒官兵之犯亦當立就刑誅總之此案完結時必須多辦數人方足以示懲儆不可稍存姑息其餘脅從之犯並著訊究明確遵照前旨改發雲貴川廣烟瘴地方及發東三省給索倫為奴其發遣時並當分起派委妥員管押並行知沿途各督撫一體添派員弁防護勿使稍有兔脫至此案王伏林倡立邪教必非始於此時今獲犯甚多無難

細訊著勒爾謹查明該犯等所立邪教倡自何年及節年如何惑眾糾夥詳晰確查並將歷任失察職名及現署知州之楊廣颺因何得以先事發覺一併查明具奏○理藩院議覆侍郎博清額等奏審擬民人梁依棟聘娶台吉海青之女為妻應令離異得旨梁依棟不知民人不准與蒙古結姻之例禮聘海青之女為妻係台吉達瑪琳為媒兩家情願與因債逼勒謀娶者不同民間違例聘娶蒙古之女為妻固有應得之罪而蒙古收受聘禮願結為婚豈得無罪蒙古民人均係朕之臣僕今梁依棟既以禮聘並非強娶著不必令其離異○蠲免甘肅寧夏寧朔鹽茶安化合水環縣古浪等七廳縣本年夏秋雹水霜災額賦有差並予賑卹緩徵洮州岷州伏羌寧遠寧州平羅清水禮縣崇信等九州縣新舊額賦○丙戌諭前因四庫全書館呈進各書每多稽緩經總裁等議設總校六員分司校

勘各總裁仍隨時抽閱以專責成本日召見程景伊據奏應進各書經總校閱看後如總裁等全為檢閱不特耽延時日且總校等轉得有所推諉若不將如何抽看之處定有章程亦非覈實之道此後總裁等於每十本內抽閱二本黏貼總裁名簽其未經抽閱者於書內黏貼總校名銜如有錯誤各無可諉等語所奏自屬可行嗣後四庫館校閱各書即著照此辦理各總裁等務宜悉心校勘毋致再有舛誤○諭軍機大臣等昨據國泰奏查辦嶧縣鹽梟拒捕一案陸續獲犯十八名除起意拒捕之盧添祥業經正法餘犯亦俱審明分別擬以斬候發遣尚有要犯孫二漢李桐刁其山宋四夸子小王二等五犯及其餘夥犯尚未獲到等語本日又據薩載等奏續獲正犯李桐一名現在嚴訊已供認幫助毆差等語此案鹽梟各犯統計兩省所獲已三十人其未獲之十餘人內尚有要犯孫二漢

等四犯未獲而孫二漢尤係起意首犯更不可令其久稽顯戮著傳諭薩載國泰務須兩省會合實力查拏務獲速正刑誅以示懲儆其餘夥犯亦須上緊緝捕全數就獲勿使一名漏網又昨據國泰奏稱尚有劉三蓑衣李二賴歹二犯俱在江省其李二賴歹已經薩載審明即行斬梟至劉三蓑衣及續獲之李桐俱係拒捕傷差之人罪難輕宥著薩載迅速審明就該處即行正法將此傳諭知之仍將兩省現在續獲首夥各犯若干名作何辦理之處迅速具奏○丁亥

上以

孝聖憲皇后誕辰詣

慈寧宮行禮○諭軍機大臣等前日據刑部奏書辦樊承先將直隸秋審情實斬犯王克均列入病故人犯內混行開除一事朕因秋審勾到時情實人犯已未勾決均列入榜示之內該督等接到部文遺漏要犯因何不及早

奏明當經降旨著周元理等明白回奏並令按察使達爾吉善前往南皮縣提犯親押解京質訊今日據刑部奏稱二十三日接到直隸總督本月二十日移咨查詢部文內並無王克均其人是否入於下年情實等語直隸省於十月二十八日勾到保定距京甚近秋審部文不過一兩日該督等即可接到理應立時檢查將遺漏情實人犯之處即行奏明因何遲至二十餘日始行咨詢該部此必周元理等前於接到部文時並未細查及聞刑部有檢舉遺漏人犯之信始行移咨詢問又不據實具摺奏聞其咎究難辭免著傳諭周元理一併據實覆奏毋得稍有支飾○又諭前因江西逆犯王錫侯編刻字貫一書竟將廟諱御名排連開列實為大逆不法當即降旨將該犯派員鎖押進京嚴審治罪並令收查該犯家內書籍嗣據解到查出書內王氏家譜有原任大學士史貽直序文其經史鏡及

唐人試帖詳解有加尚書銜錢陳羣序文朕因二人俱經物故已降旨毋庸深究第該犯既請史貽直錢陳羣作序斷無不將原書送閱之理伊兩家自必存留其書錢汝誠史奕昂自應即將原書繳出銷燬現已令軍機大臣傳諭錢汝誠即行呈繳並著傳諭楊魁即遣員前至史奕昂家傳朕此旨令將所有該犯之書即行查出呈交該撫解京銷燬因係伊兩人故父之事并不干涉伊等已屬加恩即此時傳旨詢問仍係朕善示保全之意伊等當知感激朕恩如或稍有隱匿此時不即呈出倘後別經發覺恐錢汝誠史奕昂均不能當其罪也將此傳諭楊魁知之○又諭前據閔鶚元密奏學政秦潮心地質直辦事明爽似可勝道府之任等語昨秦潮到京復命召見時見其神情浮動竟有紋袴習氣似此何以勝外任即云學問尚優亦只可令於翰林內潛心積學庶幾變化氣質或堪造就若

一旦遽膺方面之任。必致貽誤地方。看來秦潮尚不如伊父秦錄。迺該撫閱鶚元。竟保其堪勝道府。愛之適以害之。可見外省官官相護。其保薦不足憑信。朕早已洞燭及此。昨曾傳諭直省督撫。嗣後學政差滿時。止將其任考試聲名若何。辦事若何。據實具奏。其能否勝任道府兩司之處。毋庸奏及。總之學政復命名見。其人之堪否外用。朕皆可臨時鑒別。本無藉督撫之保奏。如閱鶚元。從前即係由學政擢用臬司。又係何人舉薦耶。試令閱鶚元。以秦潮之才質心地。自相比較。果能及其一二否。乃竟率行保薦。殊屬非是。閱鶚元著傳旨嚴行申飭。○又諭朕恭閱

世祖章皇帝實錄內。載總河楊方興奏稱。山東滿家洞界連四縣。穴有千餘。周迴二三百里。自明季荒亂。頻仍窮民羣聚其內。分布四面。各數十里。節經調集官兵勦捕。數年乃得悉。平等語。國家承平百有餘年。民人皆安居樂

業。自不應有山澤藏奸之事。但前次王倫一案。即有未獲要犯焉。知不匿跡深山。幸逃顯戮。不可不留心查察。所云滿家洞界連四縣。其地跨連不小。究係在何四縣地方。無難詢問。至洞內現在有無人家居住。及所有洞穴。近日形勢若何。是否可以藏匿奸人。亦當實力體訪。著傳諭國泰。即密遣妥員前往該處查明。據實具奏。毋得稍涉張皇。所有楊方興原奏。並著鈔寄國泰閱看。尋奏遵即委員詳

查。據稟滿家洞古名遂山。周迴六里。在嘉祥縣界內。南距金鄉界五里。西距鉅野界八里。東距濟寧界十八里。北至嘉祥縣城五十里。山腰大石層疊。有廢洞口五處。俱係用石塊堵塞。洞口石色黃赤。詢係國初平定土賊時。曾用火攻。石經火煨。摧裂坍塌。隨刻開石塊入內探驗。寬約丈餘。俱有大石塊堵塞。亦不通連別處。山前有千總一員駐劄。足資巡查。實無藏匿奸匪之事。謹繪圖呈奏。得旨。圖留

覽○都察院奏河南商邱縣民人劉泰來呈控書吏湯錦強搶孀婦劉氏為妾致氏自盡一案得旨此案著派侍郎博清額押帶原控之劉泰來馳驛前往審訊前派侍郎胡季堂赴山東審辦案件昨已據奏事竣起程博清額可即沿途迎會胡季堂同赴河南秉公審擬具奏○戊子諭軍機大臣等都察院奏據河南商邱縣民劉泰來呈控布政司衙門書吏湯錦尚有順刀神拳兩會等數百人於本年三月內率眾持刀將伊已嫁守節孀女搶去隨赴歸德府鳴冤當委典史問供劉泰來於候訊時親見湯錦從典史署中送出然後問供嗣經縣訊時伊女當堂撞死復甦旋又自縊身死該縣以其女自縊並非被人謀害無從抵命又赴按察使巡撫衙門控告俱不肯從實審理今湯錦現充書吏不知何人抵命等語覽奏殊堪駭異湯錦現充藩司書吏敢於設立刀拳二會糾集匪棍搶占孀婦若

果屬實不可不嚴行懲治以警兇頑昨據胡季堂奏稱已將東省馮子明一案辦結於本月二十二日起程回京因降旨派博清額押帶原告劉泰來馳驛前往迎會胡季堂將此案秉公查審著傳諭胡季堂接奉此旨即由途次馳赴豫省與博清額相會公同審訊將搶婚及糾會各款嚴訊實情按律定擬具奏此案奸黨聚眾搶親屢經控告審實時徐績等俱難辭咎而榮柱更係徇庇書吏其獲戾尤重且河南順刀等會聚為民會昨歲榮柱曾經訪拏數案何以於本衙門書吏糾集之會竟置之不問罪更無可解免胡季堂等到省時先將朕此旨傳諭榮柱伊等何所置辦耶至胡季堂係河南人審辦本省案件尤當秉公持正斷不可因事涉地方大吏慮其將來報復稍為瞻顧胡季堂係朕加恩特用之人看其平日居心辦事尚屬明白正當諒不敢存畏首畏尾之心顛頂了事負朕委任也

將此由四百里沿途探聽傳諭胡季堂知之
都察院摺及劉泰來原呈並鈔寄閱看○已
丑

上詣

大高殿行禮○諭軍機大臣等本年豫省秋雨
未能一律普霑而汲縣淇縣為尤甚八月間
曾據榮柱奏汲淇臨漳三縣收成少歉請將
該處本年未完錢糧倉穀緩至來年麥後徵
收業已允准嗣又據徐績奏分別籌辦該處
歉收輕重情形惟淇縣無需借給籽糧外其
汲縣臨漳三縣小民無力購種應酌借籽種
銀兩俾得及時播種等語當即降旨撥借以
紓民力但此數縣秋成固屬歉薄即今年夏
麥亦未必豐收而得雨又復較晚民情未免
拮据近聞汲縣淇縣有司現辦粥賑其荒歉
情形可知淇汲地當孔道人所得見臨漳諒
亦如此似非僅緩徵借種即可以資接濟著
傳諭徐績悉心確查各該縣實在情形或應

量予蠲免抑或應於春間按災戶稍為賑濟
俾皆得所據實具奏候朕新春降旨毋得稍
存諱飾干咎尋奏汲淇臨漳秋成稍歉已蒙
緩徵借種並無失所豫省每逢冬月收養貧
民辦理粥賑現在各該有司加意舉行復蒙
眷念應仰體恩施請將該三縣緩徵地丁酌
蠲十分之四得旨屆時有旨○又諭曰德保
奏十一月初間雙金閘及邳宿一帶天寒冰
凍回空漕船稽阻南下當飭文武員弁上緊
敲打一律開通等語所辦尚好但據稱回空
漕艘至十一月初間未渡黃者尚三百餘隻
似較往年稍遲其適值凍阻究係行遲非盡
關寒早也且現在正屆冬月開兌之期而江
西回空船隻阻滯黃河以北者尚有如許不
致有誤開兌否著傳諭德保即速查明江西
幫船是否在路稽延遂爾回空較晚及此等
船隻回抵江西水次是否不誤今冬開兌之
處據實覆奏仍飭押運員弁將回空各船迅

速催趲前進。毋稍稽遲。仍將各船於何日全行渡黃。趲進之處。一併覆奏。尋奏各幫船於十一月二十七日。全數渡黃。雖較往年稍遲。實因冰凍。尚無稽延情事。江西船居通漕之尾。現在嚴催趲行。於新漕尚不致誤。報聞。又諭。前據勒爾謹奏。河州逆犯王伏林。倡教聚眾之案。已督兵勦捕。或殺或擒。現獲犯五百二十二名。隨帶犯回省審辦等因。一摺。已降旨獎敘矣。此摺本月二十三日奏到。距今又閱四日。何以尚未據勒爾謹說明此案起事原委。及官兵如何勦辦情形。並將各犯定擬罪名具奏。豈以業經獲犯完事。便視同尋常案件。不即審結。速奏耶。至前次所獲之石忠信。訊係邪教中四教主郝天祥。訊係偽軍師。彼時賊勢未散。恐此等要犯。羈禁日久。匪徒聞之。或有糾眾劫牢之事。是以諭令勒爾謹。即將該二犯凌遲處死。以杜後患。及犯已全獲。更無他慮。二犯轉可令毋庸急辦。且當

令其與各犯質對。細究此案倡教糾眾。暨拒捕各確情。其所供較餘犯自更詳盡。不知勒爾謹能見及此否。若勒爾謹接奉前旨。已將石忠信、郝天祥正法。則已。若二犯現存。著勒爾謹問取二犯口供之後。即派妥幹員。將二犯嚴行管押。解京交刑部審辦。並飭委員等沿途嚴密防範。勿致稍有疎虞。將此由六百里傳諭知之。朕辦理諸事。皆欲悉其底裏。從不將就了事。仍即將審明此案詳晰情由。及現獲各犯作何定罪。此外曾否續獲要犯。並石忠信、郝天祥是否尚存。一併具摺。由驛迅速覆奏。旌表守正被戕四川成都縣民向世魁妻楊氏。○庚寅。上幸瀛臺。○諭。前據刑部奏。書辦樊承先將直隸秋審情實斬犯王克均列入病故人犯內。混行開除。請將堂司各員分別議處一事。朕因秋審勾到時。情實人犯已未勾決。均列榜示。行文該省刑部遺漏王克均一犯。該督等

接到部文。自當立時檢覈。因何不及早奏明。當經降旨。著周元理達爾吉善明白回奏。今據周元理奏稱。此項部文。係於十一月初三日。在永平地方接到。因未隨帶全卷。未及詳查。當將部咨飭司辦理。至十三日。復於途次。據臬司詳稱。部文內並無王克均之名。請咨部查詢。至十六日。回署細查。具文咨部。並據達爾吉善覆奏。臬司職任刑名。又有奏事之責。既經查明。僅詳督臣咨查。不即具奏。實屬糊塗。均請交部嚴加議處等語。此事過失。自當以臬司為重。達爾吉善著交部嚴加議處。至周元理公出在途。未得細查。即辦理遲誤。尚屬有因。但僅咨部查詢。未經具奏。亦難辭咎。周元理著交部察議。○又諭據索諾木策凌奏稱。總兵巴格奏從前發往巴里坤原任知縣奇山。應否令其回歸本旗之處。請旨。摺內僅將奇山發往巴里坤。已滿十年之處。開寫。其三十五年曾經原任總兵存泰奏請賞

給奇山空銜摺內所奏殊批諭旨。並將存泰交部議處所降諭旨。全未聲敘。顯係有心為奇山希冀微幸。請將巴格嚴行治罪。以示儆戒等語。巴里坤總兵乃烏魯木齊所屬。一切事件。巴格理宜詳報。索諾木策凌覆覈後。一同列銜具奏。奇山一事。巴格既未詳報。索諾木策凌而從前朕因奇山所降諭旨。似此貪污以獲罪譴。從而加重。改發巴里坤。斷不可代伊等懇恩奏請之處。竟不敘入摺內。殊屬不堪。索諾木策凌據實陳奏者。屬是。著將巴格解任。令其來京。交部嚴加議處。尋議總兵巴格請照溺職例。革職從之。○兵部議奏。查八旗軍政例。卓異註冊。尚未陞用。遇下次降入平等者。將上次卓異加級註銷。至綠營軍政例內。並未議及。辦理參差。且恐卓異之員。自恃陞用有期。懈於供職。請嗣後將綠營武職薦舉後。較俸候陞。尚未得缺。再逢軍政降入平等者。即將上次卓異加級註銷。不准陞

用以歸畫一從之。以病休奉恩將軍永慶子綿彰雙官保子竈君保各襲職。○豁免遭風漂沒江西吉安幫旗丁岳蔣漕米一千一百五十石有奇。○辛卯吏部議准陝西巡撫畢沅奏稱涇陽縣西北治峪鎮戶稠商衆鎮西北治峪河有渠十道引水灌田居民常相爭挖知縣遥制為難請將該縣縣丞移駐治峪就近彈壓換給涇陽治峪鎮縣丞兼管水利字樣關防從之。○兵部奏本年軍政屆期將

實錄卷一〇四五

四三

武職大臣將軍副都統各員開列進呈得旨齊齊哈爾副都統倭昇額寧夏副都統福森布俱不勝副都統之任著來京以叅領補用餘著照舊供職。○調陝西興漢鎮總兵梁朝桂為甘肅肅州鎮總兵陝西延綏鎮總兵三德為興漢鎮總兵甘肅涼州鎮總兵喬照為巴里坤總兵以江南督標中軍副將德寧為甘肅涼州鎮總兵甘肅靖遠協副將周鼎為陝西延綏鎮總兵。○豁雲南冬瓜灘沉溺雲

南委員李發源運銅二萬二千觔並予淹斃船戶水手十二名卹賞如例。○壬辰舉行本年八旗軍政卓異官九十七員罷軟官十一員年老官三十五員有疾官三十四員才力不及官一員分別議敘處分如例。○以鑲白旗滿洲印務叅領官福為齊齊哈爾副都統荆州協領德爾賽為甘肅寧夏副都統。○是月湖廣提督寶璜奏湖南鎮筵寶慶永綏永順武岡保靖靖州長安綏寧等處俱屬苗疆

實錄卷一〇四五

四三

稽查彈壓稍有未周漢奸從中滋弊現巡察營伍經過各處苗生苗戶迎接臣宣布國恩各賞銀牌紅布俱各欣忭現在地方文武嚴禁兵役入寨漢奸無可托足臣又密囑營員勤練兵技使之畏威禁絕滋擾使之懷德如有弁兵疎懈稍生事端盡法處治得旨覽奏俱悉。○山東巡撫國泰奏謝陞授巡撫恩得旨不自滿足是受福之源也勉之。○河東河道總督姚立德奏豫省黃河本年秋汛在在

漫灘水落後凡灘上所刷支河溝槽應逐一查堵時近凌汛蘭儀河勢由南灘改趨北灘處亦須籌防臣查勘各處河灘窪溝按地勢高下估築土壩以資攔截限明春三月完竣蘭儀汛內北灘新走之河水漸歸槽溜不逼隄其南灘舊河前雖受淤所分之流僅十之一正宜留此為來歲汛漲分減之地現淘刷河底日漸寬深歸舊河者已及六分河勢仍可復故不但凌汛易防亦免北岸生工之費

實錄卷三十五

四

此後籌酌水勢增減即可合二為一以歸故道得旨覽奏欣慰又批好勉為之

大清高宗法天隆運至誠先覺體元立極敷文奮武孝慈神聖純皇帝實錄卷之一千四十五

實錄卷三十五

四

大清高宗法天隆運至誠先覺體元立極敷文奮武孝慈神聖純皇帝實錄卷之一千四十六

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務正黃旗滿洲都統世襲騎都尉軍功加七級隨帶加級尋常加二級軍功紀錄一次臣慶桂

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級又加二級臣董誥內大臣戶部尚書鑲黃旗滿洲都統軍功紀錄六次

尋常紀錄十四次臣德瑛經筵講官太子少保工部尚書紀錄六次臣曹振鏞等奉

敕修

乾隆四十二年丁酉十二月癸巳朔諭據圖

思德參奏准前護撫鄭大進移送先經保奏之署經歷易鴻猷等獲流丐張志么訊係殺死卑節縣差役劉瓊之逸犯王開龍旋因訪聞不實即奏明檢舉一案提犯親訊張志么實係革兵張起貴而非殺差之王開龍該署經歷刑訊誣服幾成冤獄該府汪嘉濟不察虛實依樣通詳恐另有通同串捏情弊請一併革審並將署臬司國梁等嚴處等語易鴻猷汪嘉濟俱著革職交該撫提同案犯一併

嚴審究擬具奏國梁著交部嚴加議處鄭大進前經訪聞檢舉業已從寬著免其交部

甲午諭明年正月恭值

孝聖憲皇后週歲忌辰及三月初節屆清明朕俱親詣

泰東陵展謁致祭所有應行豫備事宜著各該衙門照例敬謹辦理○又諭據索諾木策凌奏巴里坤種地兵丁每名收穫細糧在十五石以上古城木壘種地兵丁每名收穫細糧

在十八石以上並巴里坤種地遣犯每名收穫細糧在十五石以上均與欽賞之例相符等語所有巴里坤古城等處管屯官員及管遣犯官員俱著交部議敘兵丁著賞給一月鹽菜銀兩遣犯著分別賞給麵觔○乙未上幸瀛臺○諭據寅著奏湖北驛鹽道吳之黼係淮南總商吳惇大胞兄其服親世戚在淮揚一帶行鹽者不可悉數此等商人運鹽赴楚該道均應管理稽查將來辦事恐多未便

請將吳之黼另行酌調等語所奏甚是吳之黼本係商家其親族行鹽者甚多難以悉行辭退而管理又復不便自不若將吳之黼更調較為妥協所有湖北驛鹽道員缺著張廷化調補所遺之缺即著吳之黼調補○諭軍機大臣等據索諾木策凌報稱安南夷人黃公纘在烏魯木齊病故等語黃公纘等以外夷內附安插該處本與齊民無異但伊有眷屬一百餘人如其平日尚有頭人名色藉以約束而所屬夷人仍有盼其子孫為頭人之心索諾木策凌不妨就近查明伊子再襲頭人一次以資約束如其屬下不欲必得頭人管約即可無庸辦及其眷屬人等竟與各夷人一體管束更為妥協將此由四百里諭令索諾木策凌知之仍即查明覆奏○丙申諭今冬各省將軍督撫奏事之便仍照向例賞給福字以示錫福普天期共臻歲美人安之意將軍督撫等接奉後俱不必具摺謝恩將

此遇賞福字時一體傳知刑部等衙門奏山西太原縣民白明璋謀殺伊弟白明顯並扎死其子大娃二娃依律擬斬立決得旨此案白明璋因貪圖得伊父養老地畝謀殺親弟白明顯並將其子大娃二娃俱立時扎死慘毒已極情罪甚為可惡若僅照例斬決尚不足以懲儆兇殘且白明顯父子三命俱被殺死致伊一支竟爾絕嗣而白明璋拊以一命抵償將來其子轉得藉承伊父遺業以遂吞并之計揆之情理亦未為平允著交該部即將白明璋之子一併議抵俾貪狠兇惡之徒知絕弟之後者自亦絕其後庶可稍戢其慘殺之謀並著行令各省將此旨通行榜示俾僻壤愚氓咸知炯戒○丁酉上幸瀛臺○諭軍機大臣等前據勒爾謹奏河州逆匪王伏林等聚眾念經拒捕傷差一案節經降旨令將已獲之石忠信郝天祥等如尚未正法即行解京並將辦理情形迅速覆

奏今日據奏仍稱此案生擒匪犯人數衆多容俟訊明起意糾衆各實情從重定擬具奏等語而於起事大端究因何故及如何辦理之處仍未奏及殊為非是此案關係逆匪聚衆案情重大朕屢次馳諭詢問勒爾謹豈不知朕之屢念而如此泄泄從事耶且此案業已獲犯五百餘人分別錄供嚴究起事原委及敢於糾衆抗拒情形並非難辦之事即詳細覈辦亦不過三日可了今該督拜發距前

奏獲犯完事之摺已逾十日豈有經旬之久尚不能辦有頭緒仍復如此敷衍具奏耶勒爾謹一聞河州聚衆之事即親身馳往督兵勦捕立即殲滅渠魁擒拏逆黨可謂迅速是以交部議敘今於獲犯之後轉不即訊明大約案情奏聞又何不知事體輕重若此勒爾謹著傳旨申飭仍著該督即速將該犯等訊係何年倡立邪教如何惑人入夥并如何欲糾衆舉事此內濟惡要犯若干隨同逆犯若

干脅從餘犯若干分晰定罪並將石忠信郝天祥曾否已經正法或現將該二犯嚴行鎖押解京之處迅即具摺由驛馳奏○詔甘肅皋蘭金縣西和漳縣崇信涇州靈臺鎮原寧州環縣東樂鎮番寧夏寧朔中衛平羅禮縣等十七州縣乾隆四十一年被雹霜災額賦

○戊戌

孝惠章皇后忌辰遣官祭

孝東陵○以故四川松茂道屬大定河壩土千

戶蘇文儀子尚榮貴州都勻府屬平定司土官吳政簡子啟東貴陽府屬虎墜司土官宋岐子啟祚各襲職○己亥

上詣

大高殿行禮○幸瀛臺翼日如之○諭曰李侍堯等奏奏前署寧臺廠員之會澤縣知縣衛竟成私扣腳價短發銅觔甚至將承運銅五萬捏報腳戶趙映奎盜賣三十萬之多希圖索詐侵漁實出情理之外又署蒙化廳經歷

武定州吏目胡炎因向舉人饒湛借銀不遂挾嫌押令代腳戶趙映奎完銀輒以毀署抗官誣人重罪尤屬狡詐不堪請旨一併革審等語。知縣衛竟成吏目胡炎俱著革職交該督等提集案內人證嚴審究擬具奏。諭軍機大臣等本日據李侍堯等叅奏前署寧臺廠員衛竟成私扣腳價短發銅觔並捏報腳戶盜賣希圖索詐又署蒙化廳經歷胡炎因向舉人饒湛借銀不遂挾嫌押令代腳戶趙映奎完銀饒湛不依遂誣以肆罵毀署捏詳洩忿請旨一併革審一摺已有旨諭部矣。胡炎以職官勒借所部銀兩已干例禁復挾借銀不遂之嫌既令饒湛代毫不相涉之腳戶完銀因其不依又以毀署抗官誣報自當按例究擬但饒湛身為舉人應知理法果有屈抑亦當俟上司提訊時自行辯訴胡炎雖卑鄙究係職官乃當胡炎親自往拉輒與扭結且吏役以伊係舉人不敢向爭此風亦不可

長亦當示以懲儆使紳衿不敢恃符抗上著傳諭李侍堯等於審結此案時將饒湛亦予以應得之罪。又諭河州逆匪王伏林等聚眾念經拒捕傷差一案昨因該督尚未將審結情形具奏業已傳旨申飭今據勒爾謹奏稱前獲之石忠信郝天祥已經遵旨正法其餘人犯連日隔別質訊有知其謀搶城池確情者亦有僅行跟隨念經者有被脅強從者容分別辦理等語所奏仍未詳晰該犯等倡教聚眾斷非始於近時其立教年月必須確切訊明則從前失察各員俱應予以議處至現署河州之楊賡勳訪查此案尚為詭勉但奸民倡教是否在前該員署事日淺止有功而無過或功罪皆係該員任內之事前已諭令徹底查明叅奏為此案最要關鍵不可因案已完結顛倒了事至所稱各犯中曾受偽封及抗拒官兵同謀搶城各犯即凌遲梟示其久經入教轉糾匪眾之犯審明斬決又甫

被招引入夥及被強脅者俱發邊遠烟瘴自應分別辦理但獲犯旬餘屢經集訊何至尚無端緒既經具摺即應將審明應凌遲者某某若干犯應斬決者若干犯發遣者若干犯及於何時因何倡教今又因何糾衆起事先錄節要奏聞乃仍渾統入奏豈必待此案全行審辦完畢詳敘題本即為了事耶亦甚不曉事矣至皋蘭縣所獲楊伏龍一犯既係邪教頭目即應將起意設教及近時糾衆抗拒並謀搶城池各情節逐細向其根究自可以盡得實情且現在尚有續獲之首從各犯難免無豫行逃竄之人並當嚴訊楊伏龍及質訊各犯等除生擒五百餘犯外尚有要犯何人竄逸亦當嚴密速拏務獲毋任一人漏網又據稱例應緣坐之婦女幼孩俟覈明奏請發遣等語所辦固是但此等究係逆惡黨類不值照常僉妻發配而此女犯孩童與男犯不同即發往新疆亦屬無礙著傳諭勒爾謹

於本案審結時通查應發遣之婦孺若干咨商索諾木策凌查明烏魯木齊一帶屯種人丁及雲南新遷置之無妻室者量行賞給完配辦理更為便易著勒爾謹妥協查辦並將此一節諭令索諾木策凌知之此旨著由四百里發往仍令勒爾謹逐一查審明確即速由驛覆奏○辛丑諭軍機大臣等山東嶧縣地方鹽梟聚衆一案經該撫國泰馳往督緝前諭令署兩江總督薩載前往邳州會緝節據該督撫奏兩省獲犯三十餘名業經陸續審訊將要犯隨時正法從犯分別外遣並諭令將逸犯十餘人上緊勒緝務獲諒可不致漏網昨據國泰奏續獲要犯宋四夸子等一摺嚴訊該犯等供係在海贛交界之處零星偷買老少鹽積有一二百觔不等先後裝車推買等語因思山東曹沂一帶鹽梟之案已經屢犯由於其地與海贛鹽場相近而各場所出餘鹽舊例原為贍卹貧乏之用日久遂

為奸民牟利之資。即或嚴為查禁。非肩挑背負。不許出場。而此等梟眾。無難私雇窮人在場。如數攜出。彼即從旁收買。一落其手。仍可積少成多。販行無忌。是此例不除流弊。終難盡絕。不可不通盤籌畫。以期妥善也。且此等肩挑背負之鹽。期使瀕海貧戶。稍獲微利。以謀生。乃積久法弛。窮民之需。潤有限。奸販之影射。寢多。竟以老少之利源。變而為私梟之弊藪。可不急改弦更張乎。朕意與其存此例。以滋弊。莫若去此例。以防奸。自應將各鹽場所出餘鹽。窮民肩挑背負。歲可獲利若干。通行覈計。即照數官為收買。散給貧民。其一切肩挑背負之例。悉行停止。則貧民仍得倚以餬口。奸徒無得藉以犯科。實為兩便。其收買之鹽。或仍給商領銷。或併聽商買用。務使挑負之眾。仍免向隅。而場竈所餘。亦無狼藉。正本清源之道。莫過於此。著傳諭有鹽各省。分督撫及各鹽政等。將如何設法辦理之處。就

各省實情。公同悉心妥議。詳晰覆奏。又如湖廣省。向多川廣私販。陝甘省。向售蒙古私鹽。與此等情形。又復不同。或係積久相安。或應另為籌辦。務按各實在情形。妥為籌議。朕意籌度如此。但各省地方。及場竈情形。未能深悉。其事是否。可以行之有益。而無弊。著各督撫會同各鹽政。按該處實情。斟酌妥善。據實覆奏。不得因朕有此旨。稍存遷就也。將此通行傳諭知之。○又諭據勒爾謹奏。河州逆匪

王伏林等。倡教聚眾。官兵進剿。殺賊情形。所奏未為詳盡。且有不妥者。如稱先派兵五百名。令副將西德布帶領前往。西德布前已降旨。交部議敘。該員是否打仗勇往。及曾否親用刀箭。殺賊之處。並未敘及。又稱官兵刀箭併施。將王伏林射倒等語。亦未將何人首先射倒。逆渠及如何射斃之處。逐一聲明。均欠明晰。至所稱官兵施放鳥鎗時。王伏林仗劍誦咒。鎗子紛紛落地。射倒王伏林。

之後始能將餘犯打死更不成語烏鎗為軍行利器如果施放有準自然所向無敵此必綠營兵丁平日不習準頭臨時施放過高不能中賊或未見賊面先行放鎗至鉛藥已完而賊至綠旗庸劣通病從前徐績惟一等在山東勦賊即係誤信賊言致有挫折幸而速行搜擒完事否則較徐績惟一等之罪相去幾何如所稱王伏林念誦咒語鎗不能著彼既有邪術避鎗獨不能以邪術避箭乎此可信理之必無者勒爾謹聞此妄言即應正言斥之乃轉敘摺內徒使無能之烏鎗兵託詞避過且令邪教餘黨聞之妄謂其咒有靈日久又藉以滋事於地方要務甚有關係勒爾謹輕信邪言並不揆之於理遽以入告何所見庸陋若此著傳諭嚴行申飭仍著該督欵案題結時將此等荒唐語悉行刪除毋為人所嗤笑嗣後並當通飭所屬武員教令烏鎗兵演習準頭以期適用勿再具文干咎至副

將西德布如果此次帶兵出力及親身殺賊即行詳晰敘明覆奏並將該副將送部引見並查逆渠王伏林係何人首先射倒及為何人射殪之處一併據實具奏將此由五百里傳諭知之又諭本日據薩載奏續獲鹽梟案內從犯卞景成王斐分別發遣伊犁烏魯木齊及黑龍江等處為奴俱暫行監禁俟等獲孫大漢等實訊明確再行發遣等語所辦尚未允協此等匪徒雖係為從該督等審明屬實自應遵照前旨即時分別發遣以昭炯戒若仍行監禁該犯等素非安分之徒日久或稍有疎虞轉屬不成事體且孫大漢即孫二漢起意奪犯毆差為此案正兇歷據各犯指供確鑿已無可疑又何必留犯質證耶著傳諭薩載國泰等將節次續獲為從各犯應發遣者即行分別發遣為奴毋稍延緩至孫二漢為此案起意為首要犯何以至今尚未緝獲該督等各宜實力查拏毋致要犯久稽

顯戮。仍將現在續獲幾名之處。即行覆奏。又諭據戶部議駁富勒渾等覆奏餘丁口糧。在軍營支給本色米石。及驟運米石。按照商運腳價開銷兩摺。部駁甚是。朕亦不能為該大臣等代置一詞。著將指駁各款。經朕折角原摺。交富勒渾等一併明白回奏。至各款內。或果有不能照辦之處。由前此未經隨事奏咨致事後支離掩飾。轉不妨將實在情形。確切聲明具奏。朕尚可酌量情理。為之覈定。不得復存迴護。再令駁詰干咎也。尋奏臣督辦軍需報銷款項繁多。未能周妥。遵即據實奏明。餘丁實支本色口糧。係用兵成例。此次軍需因餘丁有實帶米帶之分。其口糧遂有本色折色之異。現有實丁照支本色。如無實丁。仍支折色。若有實丁而願折支者。亦聽是以分別覈銷。西路軍營樵汲長夫。係軍機大臣議覆准給南路。因辦夫較難。是以折給餘丁三十名價值。令自行備辦。驟運亦照

商運腳價報銷。因軍糧孔急。未能節減。遂照商運領給腳價。均係實支實發。實無浮冒得旨。既有此奏。待朕酌量加恩。癸卯上御乾清門聽政。諭軍機大臣曰。湖南永州鎮總兵李文英。上年在山東行在召見。觀其奏對。浮而不實。全染綠營漢軍習氣。恐於整飭營伍未必有益。昨三寶來京請訓。曾令軍機大臣轉諭該督。於到任後留心試看。今日據陳輝祖奏。到分別湖廣總兵等次。單將李文英列入三等。與朕所見相同。尚屬公允。但總兵為專閫大員。永州亦附近苗疆。要缺甚有關係。若該鎮實係中下之材。恐難勝任。著傳諭三寶密查李文英在任於管轄操防等事。能否認真於該鎮營伍。是否不致貽誤。即秉公據實覆奏。毋得稍有瞻徇。又諭甘肅河州逆匪王伏林等倡教聚眾一案。經該督勒爾謹帶領官兵前往勦捕。於兩三日即行殲斃賊渠。生擒餘犯五百餘人。辦理甚屬迅

速但其摺內稱官兵放鳥鎗時王伏林仗劍誦咒鎗子紛紛落地及射倒王伏林始能將餘犯打斃等語勒爾謹輕信妄言並不揆度事理遽以入告所見甚為庸陋已傳旨嚴行申飭矣鳥鎗為行軍利器如果施放有準自然所向無敵乃綠營兵丁平日不習準頭臨時施放往往過高是以不能中賊或未見賊而先行點放及賊至而鉛藥早完此係綠營庸劣從前徐績惟一等在山東勦捕臨清逆匪時亦係誤信賊言幾致誤事與勒爾謹所見相同試思賊果能念咒避鎗何獨不能避箭更可信為理所必無而庸劣綠營鳥鎗兵技藝不精託詞諉過既不思精演備用且使邪教餘黨聞之轉得藉詞惑眾似此有名無實該營設鳥鎗兵何益於事甚有關係著傳諭各省督撫轉行提鎮嚴飭所屬將綠營鳥鎗弁兵實力訓練演習準頭不使有過高空放之病該督撫提鎮考驗時如有仍前空放

不能著靶者即將該兵丁本身責革並將該管將弁分別叅處示懲如督撫提鎮仍前視為具文經朕訪聞或派大臣勘驗得實惟該督撫提鎮是問將此遇各省奏事之便傳諭知之又諭據已延三奏平遙縣地方遺失所遞四川總督文綬報匣請將該縣張大元革職及該管之上司交部議處一摺已交部議奏並交軍機大臣鈔錄該督等原摺並另將報匣發去矣其所失報匣該撫務須飭屬挨查務得即匣已破損亦須追出呈繳斷不可因畏罪迴護以致迷失無蹤也至各省馳驛馬遞公文向用馬夫二人同遞以防途中驚跌該省何以不照例辦理或向係如此抑係此次短少一人亦著已延三查明具奏並著傳諭各督撫詳查該省各驛站馳遞文報是否按例差遣兩人如有止派一人者俱著查明照例妥辦仍各據實覆奏○軍機大臣等議奏恭擬御用服色單內酌添各條一百

日外三十七月內親祀

天壇齋戒日御常服閱祝版宿齋宮御龍褂龍

袍祭日朝服作樂還宮時導迎鼓樂設而不

作一親祀

地壇

太廟

社稷壇齋戒日均御常服閱祝版御龍褂掛朝

珠祭日朝服作樂還宮時導迎鼓樂設而不

作一二十七月內新正坤寧宮親祀

大神御龍褂龍袍掛朝珠一

聖祖仁皇帝

世宗憲皇帝聖誕親詣

奉先殿

壽皇殿

安佑宮行禮

孝聖憲皇后聖誕詣

慈寧宮佛堂行禮均御龍褂龍袍掛朝珠一二

十七月內恭謁

祖陵謁

陵日素服行禮祭日朝服行禮途次仍用行衣

一冬至夏至親祀禮成還宮及立春立夏立

秋立冬日均常服立春日閱春山寶座及上

元日均常服掛朝珠一十二月十六十七兩

日御乾清宮引見御常服一十二月二十三

日親祀

竈神御龍褂掛朝珠又添改王公大臣官員

服色一恭遇祭

天壇齋戒日常服掛朝珠如遇忌辰常服不掛

朝珠隨閱祝版宿壇俱補褂蟒袍掛朝珠祭

時朝服禮成後常服掛朝珠一祭

地壇

太廟

社稷壇齋戒日俱常服掛朝珠隨閱祝版穿補

褂掛朝珠祭時朝服禮成後常服掛朝珠一

元旦祭

堂子隨駕執事各員穿朝服是日百官俱穿補

褂蟒袍掛朝珠其前後三日王公大臣穿貂褂掛朝珠百官俱補褂掛朝珠上元日均穿補褂掛朝珠一

上詣各廟拈香隨從各員常服掛朝珠一遇有經壇等事執事各員補褂蟒袍掛朝珠一冬至夏至

上親祀禮成及立春立夏立秋立冬日均常服掛朝珠一四孟月敬

神執事各員照常穿補褂蟒袍掛朝珠餘常

日掛朝珠一十二月十六十七兩日

上御乾清宮引見百官均常服掛朝珠一各衙門封印開印日均常服掛朝珠其在署行禮仍穿朝服一二十七月內新正坤寧宮祀

大神執事各員及派出食祭肉王公大臣俱穿

補褂蟒袍掛朝珠一二十七月內遇歲暮新

正王公大臣官員一體放用爆竹惟上元花

燈盒子過二十七月後方照常服用從之○甲

辰諭軍機大臣等據國泰奏東省七八月間

有因雨澤稀少秋禾減收之處若徵買並行恐市價日昂有妨民食所有收成六七分各屬應買各項倉穀請概行停緩以平市價并請將收成少歉之區即查明將春借倉穀於今歲冬底即行出借俾資接濟等語所奏是自應如此辦理看來東省今歲秋間雨少秋收大局不及直隸自當體察情形量為調劑著傳諭國泰悉心確查此等收成減少州縣如止須豫借倉糧民食即不至拮据者自可

毋庸另辦若有應另籌借緩以裕民食者即速妥酌奏聞候朕於新春降旨○又諭據國泰奏查辦嶧縣鹽梟拒捕一案續獲犯十三名其起意拒捕之盧添祥已經拏獲並嚴訊各犯已得姓名住址者四十六名現在上緊趕緝等語所辦好已於摺內批示矣起意拒捕之盧添祥既經弋獲其起意為首之孫二漢等自亦無難躡緝昨據薩載奏接奉前旨已起程赴邳州一帶實力協同嚴緝現今國

泰親身在彼督辦。又係兩省會緝。各犯自無能漏網。著傳諭國泰迅速勒緝。即行全獲。嚴訊辦理。仍將續獲逸犯之處。即行覆奏。併諭令薩載等將曾否緝獲要犯。亦即覆奏。戶部議奏。江蘇巡撫楊魁奏稱雲貴等省。辦運京局銅鉛錫餉。例有定限。其經過江蘇。應行四十八日五時內。惟清河至桃源計程七十九里。係屬逆水。統限四日。但清河四閘六壩。溜急水湧。挽運維艱。加以渡黃風信靡常。易致違限。請將該縣遇有必須雇船起剝及阻守風水等事。仍准道府查實。結報扣展。查黃河遇夏秋汛漲。運船體重。或難冒險。冬春水平。雖係逆流。僅日行二十里。不難依限。嗣後除冬春仍遵原限外。如逢夏秋。有必須起剝阻守風水等事。該縣即詳該管道府。親查結報。督撫將實應扣展日期。豫行送部查覈。如運員任意逗留。及地方官扶同捏報。該督撫揭叅從之。舉行本年軍政。京營卓異官一

員。年老官五員。有疾官一員。直隸卓異官二員。年老官一員。有疾官一員。江南卓異官五員。年老官一員。有疾官二員。才力不及官三員。江南河營卓異官八員。年老官四員。有疾官三員。江西卓異官四員。有疾官二員。才力不及官一員。浙江卓異官四員。罷軟官一員。年老官三員。有疾官一員。才力不及官一員。浙江河營卓異官一員。福建卓異官五員。罷軟官五員。年老官二員。有疾官三員。才力不及官三員。河南卓異官四員。年老官二員。山東卓異官四員。罷軟官四員。年老官三員。才力不及官一員。山東河營卓異官二員。才力不及官二員。山西卓異官十一員。罷軟官一員。年老官四員。才力不及官一員。陝西卓異官四員。年老官四員。有疾官一員。甘肅卓異官十五員。年老官一員。有疾官四員。才力不及官三員。廣東卓異官七員。罷軟官二員。年老官五員。有疾官三員。才力不及官四員。廣

西卓異官四員罷軟官三員年老官一員分別議敘處分如例。旌表守正被戕直隸大名縣民張纘妻郭氏。乙巳諭明年立春係正月初七日亥時是日不便穿朝服而亥時距初八日不遠所有春山寶座應於初八日清晨呈進。丙午諭軍機大臣等據國泰奏登萊青三府各屬於十一月初間得雪自一二三寸至六寸八寸不等等語今歲該省東三府已屢渥時霽而兗曹各郡及濟南所屬雖曾得雪一次未能周徧深透河南雪澤情形亦大畧相同看來豫東二省今歲之雪不及往歲該二省秋間得雨既遲若冬雪復不能霑足於麥田大有關係豫東視二麥收成較大田尤重此時民間盼雪之心必切國泰徐績因何不設壇誠禱以期早霑甘雪慰民俟望著傳諭國泰徐績即速實心祈禱仍將曾否續得渥雪之處迅速由驛馳奏以慰塵念。丁未

上御太和殿視朝文武陞轉各官謝恩。舉行本年各省駐防軍政熱河卓異官二員寧夏卓異官二員涼州卓異官二員伊犁卓異官三員烏魯木齊卓異官二員黑龍江卓異官二員不謹官一員罷軟官二員年老官二員有疾官三員浮躁官一員盛京卓異官六員罷軟官七員年老官十四員有疾官四員才力不及官一員廣州卓異官一員罷軟官三員青州卓異官一員罷軟官二員年老官一員。山海關卓異官一員罷軟官一員年老官一員有疾官一員西安卓異官二員年老官三員有疾官一員江寧卓異官三員年老官三員有疾官一員荊州卓異官三員年老官五員福州卓異官一員年老官一員綏遠城年老官二員有疾官二員山西年老官一員察哈爾卓異官一員有疾官六員分別議敘處分如例。

大清高宗法天隆運至誠先覺體元立極敷文
奮武孝慈神聖純皇帝實錄卷之一千四十六

大清高宗法天隆運至誠先覺體元立極敷文
奮武孝慈神聖純皇帝實錄卷之一千四十七

監修總裁官經筵講官太子太傅文淵閣大學士文淵閣領閣事領侍衛內大臣稽察欽奉 上諭事件處管理

吏部理藩院事務黃旗滿洲部純世襲騎都尉軍功加七級隨帶加一級尋常加二級軍功紀錄一次且履歷

總裁官經筵講官太子太傅文華殿大學士文淵閣領閣事稽察欽奉 上諭事件處管理刑部戶部三庫事務

世襲騎都尉軍功加十九級隨帶加二級入加二級 董誥內大臣戶部尚書鑲藍旗滿洲部統軍功紀錄五次

尋常紀錄十四次 臣德瑛經筵講官太子少保工部尚書紀錄六次 臣曹振鏞等奉

敕修

乾隆四十二年丁酉十二月戊申諭朕於明

年巡幸盛京恭謁

祖陵所有大臣侍衛兵丁等若止照前例給予

幫銀購辦行李或尚不敷著加恩御前及乾

清門侍衛等各賞銀一百二十兩大門侍衛

護軍參領各八十兩牽駝章京及拜唐阿開

散官員各五十兩護軍校驍騎校各四十兩

前鋒護軍等各三十兩侍衛護軍拜唐阿等

不必拘班次輪派必須擇勤慎者派出至所

賞銀兩令該管大臣等親身賞給備辦衣服

鞍轡應用之物。不准亂行花費。如有不遵者。該管大臣查出。嚴行治罪。該管大臣等若祇遵旨宣諭。並不認真辦理。經朕查出。惟伊等是問。各項拜唐阿。馬甲。匠役人等。俱著各按差使。照十九年之例。編為等次。其列為頭等者。賞銀二十兩。二等十五兩。三等十兩。出派人役。惟各按本處差使。足敷委用。不准任意多派。○以故一等伯傅良子善明。三等子班珠爾子敏珠爾。三等男普陀保子普康。高斌子垣。各襲爵。奉恩將軍賓泰子寧忠。阿。襲職。○旌表守正捐軀河南沔池縣民檀宮棟妻郭氏。○己酉。諭軍機大臣曰。勒爾謹查辦河州逆匪王伏林一案。前因其殲斃賊渠。生擒餘黨。辦理甚為妥速。特降旨交部議敘。並賞給朝珠荷包。以示嘉獎。該督接奉前旨。自應即具摺奏謝。同覆奏之事。由驛附奏。方為合理。乃拘專人齎奏謝恩之例。直至今日始行奏到。殊屬不達事理。督撫遇謝恩事件。如無

故由驛馳遞。自屬違例。若勒爾謹此次接奉恩旨後。已驛遞奏摺二次。何難即時具摺隨報奏謝。如將軍等在軍營。凡有謝恩之事。無不由驛附奏。勒爾謹豈未之前聞耶。乃遲之又久。而於感謝之忱。竟未上達。問心能自安乎。勒爾謹辦理此案。一聞稟報。即親往查拏。剋日獲犯結案。頗為奮勉。及審訊供詞。根究餘黨。節次所奏情節。均未明晰。今具摺謝恩。又復迂拙。若此。竟不類一人所為。殊不可解。勒爾謹著再傳旨申飭。嗣後辦理一切事務。均須通達事體。毋得似此拘泥干咎。○軍機大臣等議奏。據盛京將軍弘昫奏稱。大凌河馬廠西北杏山。松山。地方。大得澤田萬畝。有奇。地甚肥美。請移開散宗室。分往居住。查開散宗室內。願往者一百十五戶。大小共二百零三名。其十歲以上。及隨孀婦之單戶。開散宗室共一百三十四名。餘俱未及十歲。係隨父兄度日。不必給予房間地畝等項。其應得

者每名給銀二百八十兩暫給八十兩治裝起程俟到該處時再給二百兩每人給地畝三頃一半官為開墾一半著自行從容開墾或令家人耕種或募民耕種其地畝不許私行典賣如查出私行典賣者將價銀地畝並追入官典賣人照違禁例治罪如有病故乏嗣者將家產呈報將軍分給人口衆多之宗室成丁者再每戶給房八間如子弟衆多不敷居住者著該將軍酌量多予數間其房屋編為四屯各就地畝近處修築查在京宗室十歲者每月給銀二兩二十歲三兩每歲給米四十八斛今遣伊等前往不必支給米石仍按歲照京城宗室例減半給與銀兩俟十年後居久服習全行裁汰又每人給予耕種器械到該處先給一年口糧應飭該將軍將應墾地即豫行派兵耕種收貯糧石以備給予其紅白事應得銀兩俱照盛京舊居宗室例辦理再墾地蓋房豫交該將軍辦理俟來

年秋季分作二起遣往請飭宗人府於京城現任奉恩將軍內揀選四員護送到該處即分住四屯令其嚴行管束又由現往宗室內擇老成者每屯揀選二名賞戴金頂協同辦事奉恩將軍係現任官員其應得之俸照舊給予外每員給地五頃房十二間銀三百兩仍給予耕種器具所管宗室內有妄行滋事或私將房地典賣等事將該管官一併治罪盛京舊居之宗室等或有生齒日繁不能度日者併飭該將軍酌給地畝錢糧一體辦理從之○吏部奏署江西布政使贛南道周克開按察使馮廷丞閱看王錫侯字貫一書不能檢出悖逆重情竟同聲附和有不秉大義應請革職交刑部治罪其失察妄著書籍之大學士管兩江總督高晉照例降級留任得旨周克開馮廷丞俱著革職交刑部治罪高晉著降一級留任○以故二等子巴圖扎布子羅布藏伊什襲爵○豁除甘肅寧朔縣水衝

地二千三百五十一畝有奇額賦。○庚戌諭曰。傳玉等奏稱。審明派出芟除圍場卡座荒草之佐領錫庫爾特桑齋等。並未將草芟除淨盡。放火延燒圍場。請將錫庫爾特等交部嚴加議處。兵丁等已從重責懲等語。索約勒濟圍場。每年草黃時。即派官兵芟除卡座中間之草原。以防範圍場中荒火。錫庫爾特桑齋等。係派出芟除卡座荒草之員。乃偷安惡勞。並未芟除淨盡。膽敢放火。以致延燒緊要圍場。傳玉等。即應將錫庫爾特等。竟行革職。定擬枷罪。兵丁等。俱嚴加責懲。以示炯戒。而傳玉等。並未如此辦理。只將兵丁責懲。錫庫爾特桑齋等。僅請交部議處。甚屬糊塗。全不曉事。傳玉著嚴行申飭。錫庫爾特桑齋等。俱著革職。同兵丁等。一併重責。枷號兩個月。示衆。○吏部議覆。山西布政使黃檢奏。稱府廳州縣官員。每遇計典。及陞遷告病等事。例由實任本管道府。出具考語。詳司覈轉。但有因

人地相宜。到任未久。即委署他缺。而署任較久者。其實任所管道府。出具考語。或多未確。應酌為變通。查外省必須調署之缺。宜選在任日久。該上司素所深悉之員。始行委署。亦無虞考語不確。請嗣後調署人員。必本任已滿半年。方准調署。遇有應出考語事。仍著本任道府出考。以專責成。從之。○以侍講學士彭紹觀充文淵閣直閣事。○旌表守正被戕江蘇安東縣民嵇文進妻張氏。守正捐軀。山西忻州民楊二旺子妻陳氏。○辛亥諭。據勒爾謹覆奏。署河州知州楊廣颺。於本年八月委令署事。該員到任後。此案人犯甫經聚集。即被查拏。迅速稟報等語。是楊廣颺於此案有功而無過。又據奏都司馮燦守備孝順阿千總王一虎。把總朱廷奇。跟隨勒捕。俱屬奮勇等語。楊廣颺馮燦孝順阿王一虎朱廷奇俱著送部引見。○壬子敕諭。達賴喇嘛之呼畢勒罕曰。達賴喇嘛係西方各寺宇供養之

大喇嘛從前數世。即承受國恩。茲爾呼畢勒罕。勤學經典。朕甚嘉焉。又進獻佛像等物。朕已鑒其誠悃。嗣後宜益加勉。安輯衆生。則朕愈加歡慰。而汝亦承朕恩於不替矣。特賜玉如意一柄。珊瑚數珠一串。琺瑯花瓶一對。紅玻璃供器五件。大荷包一對。小荷包四對。紅錦二疋。紅漳絨二疋。玻璃燈一座。坐褥靠背一副。龍緞一疋。蟒緞一疋。各色大緞二十疋。大哈達十條。小哈達四十條。五色哈達十

條。交來使堪布囊蘇齋往。爾其祇領。欽遵朕訓。毋忽。○予出師緬甸陣亡雲南永北廳同知胡邦佑。廣南府經歷許景淹。贈蔭如例。○豁湖北巴東縣地方。沉溺雲南省委員孫新吉。運銅六萬七千二百七十六觔。○癸丑。以故奉國將軍謨恭子善宜襲職。○賑卹甘肅皋蘭金縣。狄道。河州。渭源。靖遠。紅水縣。永寧。西安定。會寧。漳縣。平涼。靜寧。隆德。固原。華亭。張掖。山丹。武威。永昌。鎮番。平番。靈州。中衛。巴

燕戎格。西寧。碾伯。大通。涇州。肅州。安西。玉門等三十二廳州縣。本年被旱災民。○旌表守正捐軀廣東始興縣民范朝古妻劉氏。○甲寅。吏部議覆。江蘇巡撫楊魁奏稱。定例。首領佐雜。接算前後歷俸。已滿六年。調驗甄別。才庸者。斥退。年衰者。勒休。勤慎者。留任。分別咨部。其才堪保薦者。督撫出具考語。送部引見。外省因原例內。有歷俸字樣。遂有從實授後。計俸扣算之案。是咨署人員。遇有違礙處分。

未能實授。轉藉此得以規避考驗。請嗣後除堪膺保薦者。必俟實授後。歷俸六年。方准保題。餘從咨署日算起。扣滿六年。即予調驗。分別斥退。勒休。留任。嚴行甄別。應如所奏。飭各省一體遵辦。從之。○乙卯。諭曰。伊勒圖等奏。請將秋審二次之劉宗武等減等發遣。為奴一摺。所擬未當。內地秋審人犯。緩決三次者。方准減等。情實十次未勾者。方准緩決。新疆人犯。治罪應較內地為重。庶各犯不敢輕蹈。

法紀豈可轉較內地從輕著交軍機大臣會同刑部另擬具奏○又諭據徐績奏司道等官賢否考語摺內稱按察使趙銓人尚謹飭微覺健忘辦理一切案件精神不能周到等語臬司為通省刑名總匯趙銓既已健忘精神又不能周匝豈可仍任臬司致滋貽誤公事趙銓著以原品休致至徐績既知該臬司不能勝任自應據實具奏勒休另請簡員補放乃僅於屬員賢否單內聲註而於該臬司應否去留不置一辭殊屬非是徐績著交部嚴加議處○諭軍機大臣等據國泰奏稱嶧縣鹽梟拒捕一案訊首犯孫二漢之子供稱伊父曾說要往東邊一帶逃走等語登萊地方海面與盛京相對該處民人渡海前往者正多該犯或潛跡偷渡亦未可知著寄諭弘煦出派妥幹員弁加意訪查毋致漏網並將國泰原摺鈔寄弘煦閱看○又諭嶧縣鹽梟拒捕孫二漢為此案起意正犯自知罪在不

赦且見國泰及薩載並駐兩省境上督屬嚴緝聲勢甚大該犯意在偷生自必遠颺避匿若陽示緩辦之局而隱佈緝訪之人該犯聞事勢稍冷或潛回本籍亦未可定且國泰在嶧縣薩載在邳州俱已一月有餘山東省城自有應辦事件而薩載現署督篆及挑濟運河工程並有應親行察閱之處若因此案而久駐在外不回本任亦可不必要著傳諭國泰即回濟南薩載即回駐劄衙門各將任內諸事逐一經理但須選派妥幹大員在各該處不動聲色密為訪拏或該犯等果爾潛回即無難就近弋獲但該督等不可因此稍有懈弛務須密速嚴拏不使該犯久逃顯戮將此由四百里傳諭知之仍各將派員嚴密緝拏辦理情形即行覆奏○丙辰以福建汀漳龍道鄭源璿為河南按察使○丁巳

考莊文皇后忌辰遣官祭

昭西陵○諭昨因三寶奏拏獲四川軍營逃兵張啟奉正法一案諭令檢查從前將軍等曾

否將該兵脫逃之處咨部。據兵部稱。未曾咨報等語。從前所辦本謬。綠營怯懦性成。脫逃實相沿惡習。乃軍營不以此事為重。遇有逃兵之案。既不奏聞。并不咨部。僅以移咨原籍緝拏塞責。致兵丁等無所忌憚。犯者接踵。若使脫逃之後。即奏明嚴緝。各省自必上緊訪拏。易於弋獲。且使若輩知一經竄逸。立即上聞。難以復邀倖免。不致覆轍相尋。則少逃一人。即可少正法一人。此亦辟以止辟之意。即

平定縣志卷之四十二

十一

如新疆遣犯逃脫者。尚且隨時具奏。今逃者究屬無多。乃其明驗。豈隨征兵丁潛逃干紀。轉可不奏聞乎。現在雖無用兵之事。但兵可百年不用。不可一日不備。設偶有征勦之事。軍律不可不嚴。嗣後如遇軍營有逃兵之事。著統兵大員。每月彙奏一次。以便嚴迅緝究。用昭炯戒。著為令。○諭軍機大臣等。緬匪曾有進貢還人之說。今已逾半年。尚無回信。自係匪酋等游移不定。其事本無甚關係。斷不

值差人探聽消息。轉致居奇。尤不可微露招致情形。令其輕忽。惟當視為泛常。不動聲色。使匪眾無從揣測。方為正辦。且緬匪業經送還蘇爾相。其事已完。至楊重英之是否送出。本無足重輕。設緬匪果送出。楊重英及有悔罪納貢之說。不過遵照前旨奏聞。准其開關交易。或所差大頭目。有願進京叩覲者。臨時量為加恩。若彼竟不踐前言。仍當付之不理。惟嚴查關隘。不許通市。但邊禁一事。行之已

平定縣志卷之四十七

十二

久。從前彰寶圖思德。各任內。雖有查禁之名。未免有名無實。是以賊匪無所畏忌。因李侍堯辦事切實。特令調任雲貴。專以此事交辦。李侍堯自必深體朕意。實力遵行。第恐所屬官員。不無日久生懈。致市物消息。稍有偷漏。仍不能使賊匪窘而生懼。所係非細。李侍堯惟當時刻留心。嚴行稽察。如有內地奸民。及近邊猺夷。私越邊隘。出入牟利者。即嚴拏重處。若管守官員。有心存怠忽。復蹈前轍者。亦

即叅奏治罪。庶各知儆惕。不至具文塞責。李侍堯係朕所信任之人。更非彰寶圖思德可比。必能實心妥辦。副朕恩眷也。至前此每歲派兵防邊。實屬不成事體。嗣經圖思德奏請。騰越等處移駐官兵。冬間不過移出巡防。於體制尚屬無礙。李侍堯亦當體察所駐之兵。是否有益。能否悉化從前張皇之迹。或尚有須籌辦者。並著悉心確覈。據實奏覆。將此由五百里傳諭知之。仍將緬匪近日有無信息。

實錄卷千四十七

五

之處。即行覆奏。○是日起。

上以歲暮禋祭

太廟。齋戒三日。○戊午。吏部奏。京察休致。補放

壇

廟等官。似與革職另用者無異。請將其前任內降革罰俸之案。免其隨帶。得旨。此項京察被叅人員。不與革職另用者同。用以看守

壇

廟等官。已是朕格外之恩。所有前任內降革罰

俸之案。自應照例帶於新任。一二年後。自可按例開復。永貴因阿桂病在家。亟亟為此奏。殊屬沾名市恩。著交都察院嚴加議處。其隨同具奏之堂官。亦著一併議處。○己未。以歲暮禋祭。遣官祭

太廟中殿。

後殿。○諭軍機大臣等。今歲豫東二省得雪。未能普徧。渥霑朕心深為廕念。業已傳旨詢問。並令該撫等虔誠祈禱。迄今未報得雪。今日

實錄卷千四十七

五

據西寧奏。天津一帶地方。於臘月二十四日。自申至亥。得雪三寸。四野均霑等語。前此京城之雪。迤北較大。而近南漸小。是以豫東二省。未得普霑。今天津地在京城東南。既經得雪。則迤南自當徧及。或該二省得以均被祥霽。亦未可定。著傳諭國泰。徐績。即將該二省曾否得雪。及分寸若何。是否普徧之處。迅速據實由驛覆奏。將此由五百里傳諭知之。○又諭前因勦捕河州逆匪王伏林一案。勒爾

謹所奏殺賊情形。及副將西德布。是否勇往。均未詳悉。諭令明晰奏覆。今據勒爾謹奏稱。西德布打仗甚屬勇往。親用刀箭殺賊十一名。又見王伏林仗劍誦咒。即用箭射倒等語。西德布已令送部引見。俟臨時再降諭旨。至所稱王伏林射倒後。隨有馬兵謝崇文。用刀砍斃。現已記名。遇有外委缺出。拔補等語。殊屬非是。王伏林係逆惡渠魁。罪應寸磔。既經射倒。不復防其抵禦。自應即將該犯生擒。嚴訊務得此案確情。然後明正刑誅。以昭國法。方為正辦。且王伏林若經西德布中其要害。立時斃命。理所宜然。射者仍有功而無過。至已經射倒之賊。復加刀砍。誰則不能。非但不能言勇。而適形其懦。且令碎磔之犯。倖得全屍。足見謝崇文之懵懂無能。並非若從前直隸兵丁穆維在山東奮勇殺賊者可比。此等綠營惡習。朕所痛恨。即如前明用兵。不惟其君。即所謂本兵。與經畧總督。亦不能知此等。

實錄卷千四十七

十六

積弊。賞格濫施。以致無所勸懲。卒受其害。邇年來出兵征勦。深有鑒於勝國之弊。凡庸懦邀功者。概不得與。冀稍挽回綠營風氣。今勒爾謹將該兵丁記名拔補。徒令懦兵售碌碌因人之術。使各營相率效尤。軍政尚可問乎。勒爾謹所辦。太不曉事。著再傳旨申飭。將此由四百里傳令知之。○庚申。禘祭太廟。上親詣行禮。○遣官祭永陵。福陵。昭陵。昭西陵。孝陵。孝東陵。景陵。泰陵。泰東陵。○遣官祭。

實錄卷千四十七

十七

孝賢皇后陵

端慧皇太子園寢○遣官祭

太歲之神○諭前據周元理奏熱河請添建考棚俾七廳所屬生童得以就近應試事屬可行但工程事宜地方官素未諳習辦理恐未能妥協所有熱河考棚工程著劉浩辦理○辛酉諭據朝鮮國王奏該國有逆臣洪麟漢等結黨謀逆一案罪人業經伏法恐其支黨實繁或有逃匿漏網者懇勅關口官員查

實錄卷千四十七

天

拏等因一摺該國臣服多年素稱恭順今該國王既恐有餘黨潛逸之事自應代為查詰不容竄入內地著諭盛京將軍弘昫山東巡撫國泰於盛京山東地方與朝鮮接界邊隘海口嚴飭所屬留心察詰如有語言形跡可疑查係朝鮮人民即行盤獲奏聞發交該國自行究治該將軍巡撫務實力妥辦毋得視為具文○是月浙江巡撫王亶望奏浙江收漕向多弊竇現加察訪凡踢斛淋尖明加暗

扣諸弊剔除淨盡又浙西晚禾收穫較遲十月開徵花戶上倉多在十一月望後糧船冬兌冬開徵收開兌同期並迫糧戶最畏守候奸胥藉多刁難或劣矜地棍包攬上倉或斛手倉夫侵扣剝米現飭糧道巡歷各府嚴密查察至糧艘現已兌竣於十二月二十四日開行催趲前進得旨好行之以實而要之以久可也○又奏布政使孫含中奏請塘工動用柴薪宜彙總覈銷奉批交撫臣酌議查向來柴薪豫期奏明動項發買原係通工撥用並非估計一工需用之柴始行買備而報銷之案總隨各工分冊覈銷向不彙總銷算日久易滋混淆請如所奏自四十二年為始將四十一年後每次發銀若干買辦柴薪某工動用若干現存若干將各項確數總造一冊按年咨部俾與本工隨時報銷之案互相參校覈實又塘工經費銀兩向於正冊外另造銀款細冊附送而柴薪報銷止聲明用柴數


實錄卷千四十七

无

目。其係某年每次採買案內動撥。並未分晰指明。亦請另造動用柴款細冊附送。以歸覈實。從之。○山東巡撫國泰奏。遵諭設壇祈雪。於二十四五日。濟南。東昌。泰安。武定。青州等府。及臨清州所屬。共二十七州縣。衛。據報。得雪自一二三寸。至五寸不等。豐收有兆。農民歡慶。得旨。未至霑足。何為侈談耶。○甘肅布政使王廷贊奏。甘省被旱偏災三十二處。遵諭辦賑。飛檄各道府。率印委各員。確按成災分數。將極貧次貧戶口。造具清冊。即照冊填單散給。以作領賑之據。又將被災幾分。應賑銀糧數目。刻刷告示遍貼。如官役短發索詐。許民喊控。以憑叅究。散賑後。臣即輕騎減從。取道抽查。悉令覈實。得旨。好。汝自當實力妥辦也。○是年。追予金川出師陣亡之藍翎侍衛哈達遜一員。防禦雅庫一員。把總王肇基一員。外委唐克倫一員。祭奠卹賞如例。俱入祀昭忠祠。○旌表孝子。安徽等省胡紳等三

名。孝婦。奉天倪華兆妻姚氏等二口。守節合例。八旗滿洲。伊里布妻劉氏等一百零五口。蒙古。馬甲納敏妻佟佳氏等十九口。漢軍。馬甲宋瑛妻韓氏等十五口。內務府正黃旗拔甲德慧妻劉氏等二口。奉天等處駐防。披甲烏爾太妻唐氏等六十六口。直隸等省。賞鐸妻王氏等三百七十五口。夫亡殉節。江蘇等省。張孟吉妻徐氏等十一口。未婚守志。直隸等省。李鳳妻高氏等十五口。百歲壽民。婦。直隸等省。崔克良等十七名口。給銀建坊如例。○一產三男。直隸等省。張愷等九家。○會計天下民穀數。各省通共大小男婦。二萬七千八十六萬三千七百六十名口。各省通共存倉米穀。四千一百四十五萬四千三百二十四石二斗二升五合六勺。

大清高宗法天隆運至誠先覺體元立極敷文
奮武孝慈神聖純皇帝實錄卷之一千四十七



統一書號:11018·1355—21

定 價: 48.00 元